


Teoso sãkire
amaneri



New Testament in Apurinã (BR:apu:Apurinã)

Teoso sãkire amaneri
New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022
253eaec7-f0c7-5b49-b6be-65ee5354d0ed

Contents

Mateo	1
Marko	66
Arókasi	104
Xoão	172
Átosi	217
Homano	274
1 Korĩto	301
2 Korĩto	323
Karásia	339
Épeso	349
Piriposi	359
Koroso	366
1 Tesarónika	372
2 Tesarónika	377
1 Tximótxio	380
2 Tximótxio	388
Txito	394
Piremõ	398
Epireo	400
Txiako	419
1 Petro	426
2 Petro	433
1 Xoão	438
2 Xoão	445
3 Xoão	446
Xota	447
Apokorípisi	450

MATEO

Xesosi Nirimaneakori Iua Apisapanika Auakani

(Arókasi 3.23-38)

¹ Xesosi Teoso mereëkiti itxaua. Uai aua Xesosi apika atokiriakorini uāka. Xosee inakori Xesosi iri atoko ïkorapokoriti. Apraãoni, Taviini pakini Xesosi apika atokiriakorini atoko. Ininiã Xesosi Taviini, Apraãoni pakini imi atoko itxa.

² Ininiã ia atoko itxa:

Kitxakapirïka Apraão, Isaki iri.

Isaki, Xakoo iri.

Xakoo, Xotaa itariakorikata iri.

³ Xotaa, Péresi, Sera pakini iri. Inorona Tamara.

Péresi, Ésirõ iri.

Ésirõ, Arão iri.

⁴ Arão, Aminatapi iri.

Aminatapi, Nasoõ iri.

Nasoõ, Sáomõ iri.

⁵ Sáomõ, Póasi iri. Póasi inoro Haapi.

Póasi, Opetxi iri. Opetxi inoro Hotxi.

Opetxi, Xesee iri.

⁶ Xesee, Tavii iri. Tavii Isaeokini auñte itxaua.

Tavii, Saromão iri. Saromão inoro mitxi Oria ïtanoro. Eereka Tavii takaro oa.

⁷ Saromão, Hopoão iri.

Hopoão, Apia iri.

Apia, Asa iri.

⁸ Asa, Xosapaa iri.

Xosapaa, Xorão iri.

Xorão, Osia iri.

⁹ Osia, Xotão iri.

Xotão, Akasi iri.

Akasi, Esekia iri.

¹⁰ Esekia, Manasee iri.

Manasee, Amõ iri.

Amõ, Xosia iri.

¹¹ Xosia, Xekonia itariakorikata iri. Iuusaaki ïkorakanani kãkiti Isaeokini maïkaãka. Papirõnia tixinimoni anikaãkana.

¹² Papirõnia anikikona atoko,

Xekonia, Saratxieo iri.

Saratxieo, Soropapeo iri.

¹³ Soropapeo, Apiotxi iri.

Apiotxi, Eriakiñ iri.

Eriakiñ, Asoo iri.

¹⁴ Asoo, Satoki iri.

Satoki, Akï iri.

Akï, Eriotxi iri.

¹⁵ Eriotxi, Ereasa iri.

Ereasa, Mataã iri.

Mataã, Xakoo iri.

¹⁶ Xakoo, Xosee iri. Iua Xosee, Maria ïtaniri. Xesosi, iuara Teoso Mereëkiti itxaua. Inoro Maria.

¹⁷ Apraão, iua ãkiri, imekaniri, apika mekaniri, apika mekaniri ãkiri, apika mekaniri apika mekaniri, apiko itxaãpota. Tavii auakasaaki, katosipeka pakini ninoa uãka. Eereka aua Tavii, Tavii ãkiri, imekaniri, apika mekaniri, apiko itxaãpota. Katosipeka pakini ninoa uãka. Iuasaakiika Xoteokori anikaãka Papirónia tixinimoni. Ninoa mekaniriakori katosipeka inakasaaki, Xesosi iponaniãpeka.

Xesosi Iponaniini Pirena

(Arókasi 2.1-7)

¹⁸ Ia atoko itxapaniko Xesosi. Teoso mereëkiti iponaniãkasaaki, Maria ominapatari Xosee. Oïtaniriuatini apisapanika, omotokiãri amarini Erekar Matamatakoti sikakiti. ¹⁹ Xosee uãkatari Maria kamari maerekati ãtikata. Atão inakarínoka kamakari iua, ininiã kona inirekari kãkiti imaropiretiniri oa kamixi onini. Kãkiti sauaki osiniã, Xosee !inirekaro opëtauatini, kotxi erekari kamakari iua. Ininiã inirekari itakanapiniro oa, ixika kãkiti m-marotakaniã. ²⁰ Ikara atoko inini ixiniremoni, Teoso nitiri iaxitikiri apoka itaponemoni. Ininiã itxa:

—Xosee, Taviini apika mekaniri pite. Kona pipïkapero Maria papakapini pïtanoro ïkapani, kotxi Erekar Matamatakoti, iuara kamixipeka txïkitakaro. ²¹ Auako oa ãkiri. Pitakauãkatari Xesosi itxauako, kotxi imakatzakari kãkiti maerekani —itxa Teoso nitiri.

“Xesosi” popïkari sãkireë, iuatxikana, “Kãkiti Maerekani Makatzakakari,” itxa.

²² Apikomoni Teoso nitiri txari:

—Ikara atoko inakari auapeka, kotxi kitxakapirïka Teoso sãkire sãpiretakari sãpiretapekari ikara sãkiretxi. ²³ Kitxakapirïka ia atoko itxa:

Hïkenakotari. Sito kikikata masirïkato mixiuatako. Auako oimi. Itakauãkataãka Emanoeo inakori —itxa Teoso nitiri Xoseemoni. “Emanoeo” popïkari sãkireë “Teoso atekata aua.”

²⁴ Xosee merekasaaki, iua auikari Teoso nitiri sãkire. Ininiã ïtanorouata Mariakata. ²⁵ Eereka amarini iponaniãkasaaki, Xosee takauãkatari Xesosi itxaua. Amarini iponaniini apisa iua !isirïka Mariakata.

2

Atokatxi Pokïkinimoni Auakani

¹ Xesosi iponaniã Pereë inakori sitatxiti, Xotéia tōpa, Erotxi auïtetxi inakasaakiua. Iuasaaki atokatxi pokïkinimoni auakani sari Xerosareë sitatxiti-moni Pereë takote. Iõriki imarotakani ninoa.

² Ininiã itxana kãkitimoni:

—Naniparari amarini Xoteo auïte inakariua? Ate itikapekaro iõrikite atokatxi pokïkinimoni. Oa iõriki oerekaua auïtetxi Apiananiri iponaniãpeka. Ininiã ate apoka uai akapotoreëkiniua iua apisatoõ, kotxi Apiananiri itxaua —itxana ninoa.

³ Erotxi ikara ikenakoenetakasaaki, kona erekaxinireri. Kona inirekari ãti auïtetxi apokini. Ininiã ikinimane Xerosareë auakani kona erekaxinirena, kotxi ninoa pïkari Erotxi. ⁴ Ininiã iua apotiitana sasetotxi auïteakori, kaiõkatsoparerini pakini. Ininiã Erotxi pimaãna:

—Nanipa Teoso Mereëkiti iponaniãko? —itxa.

⁵ Ninoa apakapapiretari:

—Pereë sitatxiti, Xotéia tōpa aua. Ia atoko itxapaniko Teoso sãkire sãpiretakari iõkatsopatakiti kitxakapirïka:

⁶ Pereẽ sitatxiti auakani, Xotéia tōpa, hīte sitatxine poiãori, iuaritika kona hīpētauatape, kotxi hīte sitatxineẽ iponaniãko İsaekini auīte. Kãkiti mīkiikakari itxauako

—itxa ninoa auītetxiakori Erotximoni.

⁷ Ininiã Erotxi akiritana ninoa iōriki imarotakani, ninoanani imisãkiretini ĩkapani. Ininiã ipimaãna:

—Mitxipitipanika kirisaakipa hītikataro oa iōriki? —itxa ninoamoni.

Ininiã ninoa sãpiretari. ⁸ Iposo atoko iokanatana Pereẽmoni:

—Hīsako Pereẽmoni amarini hinitini ĩkapani. Hãpokasaakiri, hīsãpiretano. Ininiã nota apaka sako, iua apisatoō nikapotoreẽkiniua ĩkapani —itxa Erotxi.

Txamari inirekari okiniri Xesosi, kotxi inirekari āti auītetxi auini.

⁹ Erotxi sãkire ikenakotakana atoko, ipotorikana. Iōriki atokatxi pokĩkinimoni itikakitona ĩkiika. Anikana Xesosi auinimoni. Iuaãtaã oa iōriki iotoka. ¹⁰ Ninoa atamatakasaakiro iōriki, iteene ipoxokoniuatana.

¹¹ Ininiã apokana aapoko. ĩroãna. Apokarina amarini inoro Mariakata. Ininiã ikapotoreẽkauana Xesosi apisatoō. Itxarina:

—Apiananiri pitxaua. Aãũte pitxaua —itxana.

Iposo atoko itiina imakatzakana. Ininiã imakatzakarina erekari imĩkitina auītetximoni isikakitina ĩkapani. Isikarina oro, ĩsẽso inakori, miha inakori pakini. ĩsẽso, miha pakini kamariãro peerekari. ¹² Ininiã eereka Teoso sãpiretana iōriki imarotakanimoni itaponeẽna:

—Kona hĩkanapiriãpe Erotximoni —itxa Teoso ninoa taponemoni.

Ininiã ninoa kanapiriãkasaaki auinimoni, āti kimaporitimoni isana.

Exitomoni Xosee, Maria Pakini Sini

¹³ Iōriki imarotakani sipeka atoko, Teoso nitiri iaxitikiri sãpiretari Xosee itaponemoni:

—Paiamata. Põkitikaua. Panikari amarini, inoro apaka Exito tixinimoni. Himiteka. Kona hĩkanapiriãpe nota masãpiretakanisaakii, kotxi Erotxi nitari amarini okiniri ĩkapani —itxa Teoso Xoseemoni.

¹⁴ Ininiã Xosee:

—Nisapitikako —itxa.

Ininiã iua ĩkanõkatika Xosee õkitikaua. Aiamata Exito tōpamoni isini, amarini anikini ĩkapani. Ininiã imimitekari amarini inorokata Exitomoni. ¹⁵ Erotxi ipinakasaaki, iuasaaki ikanapiriãko. Kona ikanapiriã Erotxi ipinini apisa. Ia atoko itxapaniko kitxakapiriãka Teoso sãkire sãpiretakari sãpiretakiti: Nakiritariko namarite Exito tixini itakanapini.

Amarini Okiko Pirena

¹⁶ Erotxi imarotakasaakiri iōriki imarotakani sipe inakasaaki, ! imisãkiretaikarina iua, ininiã iua omanãkarauata. Ininiã amarini ipikananipeka inakaniua, apaka axapitipanika inakaniua, imakinikana okãkitaka Pereẽ sitatxitiã auakani. Ikara atoko itxa, kotxi iōriki imarotakani sãpiretari ipikananipeka oa iōriki tokiã. ¹⁷ Kitxakapiriãka Teoso sãkire sãpiretakari Xeremia inakori sãpiretakiti iaõka auape iuasaaki. ¹⁸ Iua txari:

Hamaa sitatxiti ikenakotaãkako ātsaãtxi. Hakeo atoko sitoakoro txiapatako oimiakori matinani. !Onirekari kãkiti mĩkapiritiniro oa, kotxi oimiakori kona auaika.

Exito Tixini İkanapiriinina

¹⁹ Erotxi ipinaka atoko, Xosee Exito tixini auakasaaki, Teoso nitiri misãkiretari iua itaponemoni. ²⁰ Itxari:

—Põkitikaua, pĩmikanapiriãri amarini, inorokata İsaeko tixinimoni. Amarini kinirão okaka inakani kona auaika —itxari.

²¹ Ininiã Xosee mikanapiriãri amarini, inorokata Xotéia tōpamoni, Isaeo tixinimoni. ²² Txamari imarotakasaakiri Akirao, Erotxi ãkiri auñtetxi ininiua irini tikini, Xosee pĩkari Xotéia tōpa auini. Ininiã Teoso nitiri iuaĩkana itaponemoni sãpiretari ãtiãtaã isini ĩkapani. Ininiã Xosee, Maria, Xesosi pakini sari Kariréia tōpamoni Isaeo tixini. ²³ Nasaree sitatxiti kaikota itxana. Ia atoko itxa kitxakapirĩka Teoso sãkire sãpiretakani sãpiretakiti iaõka inini. Ninoa txari: Nimereẽkiti, Nasareekiri itxauako.

3

Xoão Kapatxisareri Sãpiretakiti
(Marko 1.1-8; Arókasi 3.1-20; Xoão 1.19-28)

¹ Eereka Xesosi aneẽpe. Iuusaaki Xoão kapatxisareri, ãparaã makipakaniãtaã Xotéia tōpa aua. Iuaã iua oerekari Teoso sãkire kãkitimoni.

² Iua txa:

—Himaerekani hĩtakanapako, kotxi Teoso mereẽkiti paĩtiki apokako iua ikinipoko auñte ininiua ĩkapani —itxari Xoão.

³ Kitxakapirĩka Isaía inakori, Teoso sãkire sãpiretakari, sãpiretapekari Xoão pirena. Itxari:

Auako kiki ãparaã makipakaniãtaã. Isãpirenauatako. Itxariko: “Hõeretariko kimapori Apiananiri apokini apisapanika. Itĩkaãpo erekari hĩkamako iua napini ĩkapani,”

itxa Isaía kitxakapirĩka.

⁴ Xoão takari mãkatxi kamero piti kamakori. Kamero kãkiti pira. Ipakiot-sere aamata kamakori. Inikari txĩtxiri. Itximari mapaã ĩtopakero. ⁵ Kãkiti Xerosareẽkini, ikinimane Xotéia tōpakini, ikinimane Xotão tinikata auakani pakini sari ikenakotinirina ĩkapani. ⁶ Iuaã ninoa sãpiretari Teosomoni maerekati ikamakitina, imaerekani imakatzakini ĩkapani. Eereka iua patx-isatana Xotão uiniti.

⁷ Txama Xoão atapakasaakina pariseoakori, satoseoakori pakini apokini iuamoni ipatxisatikona ĩkapani, iua txana:

—Imini katsiiri anaakorirai hĩte. Teoso misiritapitikai himaerekani xika. Himitekini ! auari. Hinirekari hĩpatxisatiko, txamari ! hinirekari hĩtakanapiniri himaerekani. ⁸ Hinirekiniãri himaerekani hĩtakanapini, ininiã hĩkamariko erekari. Ikara atoko ininiã, hõerekari Teoso atão hĩtakanapiniri himaerekani. ⁹ Hãkixiniremoni ! hĩxinikapiri: “Teoso apakapapitikauako ate, kotxi ate atokirini Apraãoni txaua,” ! hĩtxapeko. Ari, nota sãpiretai hĩte, Teoso nirekiniãri, iposotari ia kai soroã Apraãoni mekaniriakori ikamini. Kona Apraãoni posotari anikinii Teosomoni. ¹⁰ Aamina maereka iriti atoko hĩtxa. Teoso iposopeka hĩte ixipokini. Kãkiti auari ikitaite kauanari aamina maereka iriti itokini ĩkapani. Ikinika aamina maereka iriti tokaãkako. Xaminaã oka inaãkanako. Teoso kamakiti iua atokokana itxa. Ininiã Teoso kitaite kauanapeka, aamina kotsa sauakiko tĩkane. Iua atokokana ininiã, Teoso aiamatapeka hĩte ixipokini ĩkapani.

¹¹ —Hĩte nipatxisata ãparaã. Hĩpatxisatiko oerekari maerekati hĩkamakiti hĩtakanapapeka. Nota tikini apoãkari patxisataiko hĩte Erekari Matamatakotiã, xaminaã pakini. Apiatakari itxaua iua. !Apakata iua takote napokini ikiti mata nimakatzakini ĩkapani, kotxi iua apiata. Nota poiãoka. Imakatzakari himaerekani, itxiko metao ãki auakari arikini atoko. ¹² Katarereri ãpokari ahoisi otãta imakatzakini ĩkapani. Otãta arikaãka. Oki nĩkataãka ikiena nĩkatikoãtaã. Iua atokokana Teoso nĩkatariko kãkiti erekarini. Maerekati kamakani arikaãkako xamina maxipoãkatiã —itxa Xoão.

*Xesosi Patxisatiko Pirena
(Marko 1.9-11; Arókasi 3.21-22)*

¹³ Iuasaaki Xesosi potorika Kariréia tōpa. Isari Xotāo uinitimoni, Xoão patxisatiniri ĩkapani. ¹⁴ Txamari Xoão txari Xesosi:

—Pite nirekatari nota patxisatinii? !Apakata, kotxi pitemoni maerekati ! auari. Notara nirekari pite patxisatinino nota —itxa Xoão.

¹⁵ Xesosi apakapapiretari:

—Apakatapitika pipatxisatinino. Uatxa akamariko ikinika Teoso nirekaãkiti —itxa.

Ininiã Xoão:

—Ateeneka.

¹⁶ Eereka ipatxisataãka atoko ikanĩkiĩta imiriĩ. Iuasaakipeka iaxiti takaka. Ininiã kãkiti atapari Erekari Matamatakoti katxakaãpotini kamoã atoko inakari. Xesosimoni oãpoka. ¹⁷ Eereka Teoso sãkirauata iaxiti:

—Pite namarite, nitiretakiti, napokaerekatai, kotxi ninirekakiti pikama — itxa Teoso.

4

*Satanasi Nirekari Xesosi Kaminiri Maerekati
(Marko 1.12-13; Arókasi 4.1-13)*

¹ Erekari Matamatakoti anikari Xesosi ãparaã makipakaniãtaã Satanasi atamakaerekatiniri ĩkapani. ² Iuaã Xesosi takanapari inipokotini Teoso imisãkiretini ĩkapani. Koarêta pokamara, koarêta ĩkanõkati pakini itakanapari inipokotini. Ininiã inatxikatani iuani.

³ Ininiã iuasaakiika Satanasi apoka Xesosimoni. Iua katamakaerekareri itxaua. Itxari:

—Pite Teoso ãkiri pininiãua, ininiã ere kai soro komiri pitxĩkitaka —Satanasi txari Xesosi.

⁴ Xesosi apakapapiretari:

—Kona nikamari pite paniãtakiti, kotxi Teoso sãkire iõkatsopatakori txari: Kona komirinanini txĩkitakari kãkiti ãtipirika auini tĩkane. Ikinika Teoso sãkirera txĩkitakari kãkiti ãtipirika auini tĩkane

—itxa Xesosi Satanasiimoni.

⁵ Eereka Satanasi anikari Xesosi Xerosareẽmoni. Iua sitatxi akiritaãka Teoso nakiti. Satanasi anikari Xesosi Teoso misãkiretiko aikotimoni apiata õtano tsokitiri nopini. ⁶ Ininiã Satanasi txari Xesosi:

—Teoso ãkiri pininiãua, pokaua xiti. Ininiã ikinipoko kãkiti imarotariko Teoso ãkiri pininiãua, kotxi Teoso sãkire iõkatsopatakori txari:

Teoso iokanatanako initiriakori iaxitikini pite inĩkatinina tĩkane. Ninoa maĩkai pimapinakani tĩkane, ininiã pikarouatini !auari. Kona kai soro karo-tari pikiti,

—itxa Satanasi.

⁷ Xesosi apakapapiretari:

—Teoso sãkire iõkatsopatakori apaka txari:

Kona patamakaerekatapiri Apiananiri piTeosone.

⁸ Eereka Satanasi anikari Xesosi ãtiãtaã iuaĩkana. Itano xiratarimoni anikari. Iuaã Satanasi oerekari ikini itixiti, ikinika tiitxiti iuaã auakari pakini. ⁹ Ininiã itxa:

—Pikapotoreẽkiniãua nota apisatoõ piteosonetinino, ininiã ikinika nisikaiko —itxa Satanasi.

¹⁰ Xesosi apakapapiretari:

—Konapitini. Pisipeka Satanasi. Teoso sãkire iõkatsopatakori txari:

Apiananiri piTeosone, iuanokara piteosoneta. Iua ĩkapaninokara piparĩkauatako

—itxa Xesosi.

¹¹ Ininiã Satanasi takanapa txari iua. Ininiã Teoso nitiriakori iaxitikini apoka Xesosimoni inĩkatinirina ĩkapani, kotxi itapara !auaika.

Xesosi Mipotorikari Iparĩka Kariréia Tõpa

(Marko 1.14-15; Arókasi 4.14-15)

¹² Xesosi kenakoenetakasaakiri Xoão kapatxisareri kateia åki takiko, isari Kariréia tõpamoni. Nasaree sitatxitimoni isa. ¹³ Ininiã eereka itakanapari Nasaree sitatxiti. Kapanaoõ sitatxitipeka aua itxa. Kapanaoõ, Kariréia poa takote, apaka Seporõ, Natarii pakini tõpati takote. ¹⁴ Kitxakapirĩka Isaía, Teoso sãkire sãpiretakari sãpiretapekari, iuaã Xesosi auako. Ia atoko Teoso sãkire txapeka:

¹⁵ Seporõ, Natarii pakini tõpati ipoa mitari takote, Xotão uiniti ipiniã. Kãkiti takauãkatari iua itixi, Kariréia tõpa. Xoteo minakanuia tixine itxaua. Iuaã Erekarari apokako. ¹⁶ Ninoa kãkiti, ipiã auakani, !imarotari Teoso. Ipĩkaniãtaã ninoa auanãta. Ninoa atamatariko tirikapi. Ikamara mitari. Iua tirikapi iopinipokotako ipiã auakani sauaki.

Ikara atoko itxa Isaía kitxakapirĩka.

¹⁷ Xesosi apokasaaki Kapanaoõ sitatxiti, imipotorikari oerekarauatini. Ia atoko itxa:

—Himaerekani hĩtakanapa, kotxi iposope Teoso hĩauĩte ininiua —Xesosi txana ikinipoko kãkiti.

Xesosi Akiritari Ipi Ipi Pakini Kokatsaãriti

(Marko 1.16-20; Arókasi 5.1-11)

¹⁸ Xesosi Kariréia poa tiniã itĩpokotakasaaki, itikari ipi kiki, Simão Petro inakori, itari Åtree inakori pakini. Itakanãtarina hetxi. Kokatsaãriti itxauana.

¹⁹ Ininiã Xesosi akiritana ninoa:

—Masa notakata. Hĩtakanapariko hõkatsaãtini parĩkatxiti. Noerekaiko hĩte Teoso sãkire hõerekini ĩkapani, kãkiti imarotini ĩkapani —itxa Xesosi.

²⁰ Ininiã iusaakiika ninoa takanapari okatsaãtinina. Xesosikata sa itxana.

²¹ Apikomoni itĩpokotakasaaki, atamatana Txiako, Xoão pakini. Sepeteo anaakori itxauana. Ninoa irikata kanauaã auanãta. Ihetxina iotsaãnãtana. Ininiã Xesosi akiritana ninoa. ²² Iusaakipeka itakanaparina iri, kanaua pakini. Xesosikata sa itxana imoianatinirina ĩkapani.

Xesosi Amianatakani Imakananitini

(Arókasi 6.17-19)

²³ Xesosi sari ikini Kariréia tõpamoni. Aiko Xoteoakori apotiitiniãtaãua isa. Iuaã isãpiretana Teoso iokanapirena erekari, Teoso kãkiti auĩte inini pirena. Apaka erekapeka itxĩkitakana amianatakani. ²⁴ Xesosi kamakiti, apaka isãpiretakiti, iaripiretapeka ikinika Síria tixini. Ininiã kãkiti minana itomaneri amianatakani iuamoni. Ikini sereti amianari auakini sari iuamoni. Kãkiti maerekati matamatakoti Satanasi nitiri auaĩtotakiti apoka iuamoni. Apaka kãkiti mapitxiritakani apoka. Apaka titinanakakari amianariti auakini apoka. Apaka kãkiti maposota tĩpokotakani pakini apoka Xesosimoni. Ikinikana erekape itxĩkitakana ninoa. ²⁵ Itomaneri sari iua tikini. Kãkiti Kariréiakini, tesi pakini sitatxitikini, Xerosareẽkini, kãkiti Xotéia tõpakini, Xotão uiniti ipiniãkini pakini sari iua tikini.

5

Xesosi Sãkirauata Ixirata Auĩte Nopini

(Kapítoro 5, 6, 7)

¹ Xesosi itomaneri kãkiti atapakasaaki, ixirata nopini isa, topãka itxa oerekarauatini ïkapani. Imoianariakori apotiitaua iuamoni. ² Iuasaaki oerekana ia sãkiretxiti:

Kirimonipa Teoso Sikatari Erekarì?

(Arókasi 6.20-23)

³ —Teoso takari erekari kãkitimoni, ia atoko inakanimoni. Ninoa nirekari Teoso nireëkiti ikaminina, iuaritika imarotarina liposotarina Teoso nireëkiti ikaminina, ininiã amanaãrina Teoso sikaposotiiretinina ninoa. Teoso takari erekari kãkiti ikara atoko inakanimoni. Ninoa sari Teoso auïtetxi ininiãtaãua.

⁴ —Teoso takari erekari kãkitimoni, ia atoko inakanimoni. Mitxi ninoa txiapata imaerekanina xika. Ininiã eereka Teoso mïkapiritana ninoa, amarini mïkapiritiko atoko.

⁵ —Teoso takari erekari kãkitimoni, ia atoko inakanimoni. Pataparaxinirena ninoa, iuaritika !itxitarina ãti. Iamonïkarina ãti. Teoso sika-panikariko ikinika itixi ikara atoko inakanimoni.

⁶ —Teoso takari erekari kãkitimoni, ia atoko inakanimoni. Ninoa iteene nirekari erekarinoka ikaminina. Nipokori inirekinina atoko, ãparaã inirekinina atoko, ninoa iteene nirekari erekari ikaminina. Ininiã Teoso sikana ninoa ikinipoko erekari inirekakitina.

⁷ —Teoso takari erekari kãkitimoni, ia atoko inakanimoni. Ninoa amonïkari ninoa misiritakani, ininiã iua atokotxikana Teoso amonïkanako ninoa kaa-monïkarerini.

⁸ —Teoso takari erekari kãkitimoni, ia atoko inakanimoni. Ninoa kamari Teoso nireëkitinoka, ininiã ninoa aõkitariko Teoso.

⁹ —Teoso takari erekari kãkitimoni, ia atoko inakanimoni, kauaïrerinimoni. Ninoa parïkauata neenamatzxi xipokini ïkapani. Ininiã ninoa akiritaãkako Teoso anaakori.

¹⁰ —Teoso takari erekari kãkitimoni, ia atoko inakanimoni. Ninoa kamari erekari, ininiãkara apanakini kãkiti misiritana. Ninoa erekari kamakani auako Teoso auïtetxi ininiãtaãua.

¹¹ —Teoso takari erekari hïtemoni, apanakini misiritakasaakii, imisãkirepiretakasaakii, aãpirena ikamakasaaki hïtemoni nota sãkire hãuikini xika. ¹² Poxokonoka hïtxako, kotxi Teoso sikai hïparïka ïki ito, itixine hãpokasaaki. Hïte misiritiko atokokana Teoso sãkire sãpiretakani kitxakapirïka misiritaãka, ininiã hïpoxokoniuatako —itxa Xesosi.

Iõkira Pirena

(Marko 9.50; Arókasi 14.34-35)

¹³ Iuaïkana Xesosi sãkirauata:

—Iõkira erekaro atoko hïtxaua ikinimane ïkapani. Iõkira matxoatapeka onakasaaki, ininiã !apakata otxoa kanapiriini iuaïkana. Ininiã oõkaãka. Kãkiti kitakaro, kotxi kona otxaika.

Tirikapi Pirena

¹⁴ —Tirikapi atoko hïtxaua ikinimane kãkiti ïkapani. !Hïposotari hïkipatiniri sitatxi xirata nopini auakari, kotxi ikinimane atamatari tirikapi. ¹⁵ Kãkiti ! itakari tirikapi kopiti ãki. Itakarina itano ikini aapokotxiti iopinikini ïkapani.

¹⁶ Iua atokokanera hïtxako, kotxi erekari hïkamakiti tirikapi kamara atoko itxa. Erekarinokara hïkamako. Ininiã apanakini atamatari erekari hïkamakiti. Ininiãra itxarina aïri iaxitikirimoni: “Peerekai pite.”

Teoso Sãkire Moisesi Apakapakiti

¹⁷ Iuaïkana Xesosi sãkirauata:

—Kona hïtxape: “Xesosi xipokariko Teoso sãkire Moisesini apakapakiti,” kona hïtxape. Apaka, “Kitxakapirïka Teoso sãkire sãpiretakani sãpiretakiti

Xesosi xipokako,” kona h̄txape. Kona ikara inakari !nixipoka. Nota ina ikinipoko ninoa s̄piretakiti nikamini ĩkapani. ¹⁸ At̄aopitika ikinika Teoso s̄kire apokako. Kona xatiki Teoso s̄kire iōkatsopatakori kona xipoka. Iaxiti, itixi pakini xipokini apisa Teoso s̄kire !ixipoka. Apokapitikako imakinika is̄kire. ¹⁹ Teoso s̄kire ipaniātakiti apiari aua, apaka poiāori aua. K̄akiti makamakaniāri ikinika Teoso s̄kire, oerekiniāri apanakini ikinika Teoso s̄kire imakamakani ĩkapani, poiāori itxaua Teoso aūtetxi ininiātaāua. Āti k̄akitipekana, ikaminiāri ikinika Teoso s̄kire, oerekiniāri apanakini ikinika Teoso s̄kire ikamini ĩkapani, apiari itxaua Teoso aūtetxi ininiātaāua. ²⁰ Ia nis̄piretai. Kaiōkatsopareriakori, pariseoakori pakini !ikamari at̄a inakari Teoso nireēkiti. Ininiā h̄ite kaminiāri ninoa atokotxikana, !h̄auritaāka h̄īroini Teoso aūtetxi ininiātaāua. At̄a inakari Teoso nireēkiti h̄ikaminiā, h̄īroāpitika iuaā.

Omanākaretxi Pirena

²¹ —H̄ite imarotari k̄akiti kitxakapir̄ika s̄piretaāka. Ia atoko inaāka: “Kona apanakini h̄okape. Kokaniri anikaākako imisiritikomoni,” inaāka kitxakapir̄ika. ²² Uatxa apikomoni nota s̄piretaiko h̄ite. Maxikatiika pomanatiniāri pitari, panikaākako pimisiritikomoni. Pite napetiniāri pitari, ininiā aūtetxiakori misiritapitikai. Pakiritiniāri pitari: “K̄īkitei,” ininiā pimisiritiko pāitiki apokako. Nota txai h̄ite, kona erekari kokaniri. Iua atokokana kona erekari hinaperauatini. Hinaperauatiniā, ininiā maerekani misiritikoāta h̄isapitikako.

²³ —Ininiā h̄isikasaaki Teoso apisatoō h̄isikakiti h̄isikini ĩkapani, iusaaki h̄ixinikari h̄itari homanatakiti. ²⁴ Iusaakiika h̄itapanariko h̄isikakiti iuaā h̄isikiniri apisa. H̄isako katimaritika homanatakitimoni. Himis̄kiretari, homanākare h̄ixipokini ĩkapani. Iposo atoko kanapiriā, h̄isikakiti t̄ikane sika h̄txako Teosomoni —itxa Xesosi.

²⁵ Iuaīkana Xesosi s̄kirauata:

—K̄akiti kinir̄aō apoitakinīāi, ininiā pimisiritiko mereēkarimoni iua anikinīi apisapanika, katimariā pisa iuamoni. Pimis̄kiretari iua, kotxi pimisiritiko mereēkari sikaiko pite pimisiritakirimoni. Ininiā eereka iua takai kateia āki. Iuaā pikaikotako. Ininiā apisapanika pimis̄kiretariko iua pomanatakiri. ²⁶ At̄a nis̄piretai, kona pos̄ipikari kateia ikinika pimisiritiko mereēkari paniātakiti p̄im̄īkitxitakanisaaki —itxa Xesosi.

Kipa Tx̄ikitakai Maerekati Pikamini?

²⁷ Xesosi apikomoni s̄kirauata:

—H̄ite imarotapekari kitxakapir̄ika s̄piretakori: “P̄itanoro minakotokatika kona pisir̄ikape.” ²⁸ Kitxakapir̄ika ikara atoko itxama. Nota s̄piretaiko h̄ite apikomoni. Sito atamatakarī kinir̄aō oakata sir̄kaka inakari, iuara kamapekari maerekati ākixinireē. ²⁹ Kona pauiritapiri maerekati pikamini tx̄ikitaākari pitekata ikaikotini. Patamatakiti tx̄ikitakinīāi maerekati pikamini, pimakatxakari poki, oka pitxari, kotxi maerekati pikaminiā, maerekani misiritikoātaā pokaākako. Apiaerekata Teosokata ātipirika pauini āti pokinoka pauini. ³⁰ Piuako pikikomoni auakari tx̄ikitakinīāi maerekati pikamini, ininiā pisauaka, oka pitxa, kotxi maerekati pikaminiā, maerekani misiritikoātaā pokaākako. Apiaerekata mauakotikai pauini ātipirika Teosokata. Kona pauiritapiri maerekati kaikotini pitekata. Pitakanapariko maerekati.

Kiki Ītanorokata Itakanapakakini

(Mateo 19.3-9; Marko 10.2-12; Arókasi 16.18)

³¹ —Kitxakapir̄ika ia atoko itxa s̄kiretxi:

P̄itanoro pitakanapiniā, aātsopa pisika oamoni ĩtanorotxi takanapiko aātsopati.

³² Iuaritika nota sãpiretaiko hĩte, !hĩtakanapaperoko pĩtanoro. Pitakanapiniãro, ininiã maerekati pikamapitika, kotxi eereka oa atxiĩti nirekakari ãti kiki. Ininiã iuasaaki oa kamari maerekati apaka pite xika. Apaka oa takakari kamari maerekati. Apakata pitakanapiniro pĩtanoro, ãtikata osirĩkiniã —itxa Xesosi sãkire.

Atãopitika Inakari Sãkiretxi

³³ Iuaĩkana Xesosi sãkirauata:

—Hĩte imarotapekari kitxakapirĩka sãkiretxiti. Ia atoko itxapaniko: “Hĩkamariko imakinika hĩkamaenetakiti. Hĩkamariko hĩkamaenetakiti Teoso ĩkapani,” itxa. ³⁴ Notara sãpiretai hĩte apikomoni: “Nikamapitikariko,” pinakasaaki, !pakiriuãkatapiri Teoso tixine uãka, kotxi iuaã Teoso auĩtetxi ininiãtaãua. “Nikamapitikariko,” pinakasaaki, kona apikomoni pakiritape. ³⁵ “Nikamapitikariko,” pinakasaaki, !pakiriuãkatapiri itixi uãka, kotxi Teoso uai aua apaka. “Nikamapitikariko,” pinakasaaki, !pakiriuãkatapiri Xerosareẽ uãka, kotxi auĩtetxi Apiananiri sitatxine itxa. ³⁶ “Nikamapitikariko,” pinakasaaki, !pakiriuãkatapiri pikii uãka, kotxi !apakata pitxĩkitakiniri piãko pomama inini, kasarori inini. ãtika piãko kona piposotari pitxĩkitakiniri kasarori inini, pomamari inini. ³⁷ “Ari,” pinakasaaki, pikamapitikariko. “Kona,” pinakasaaki, kotxi kona piposotari pikaminiri. Kona ãti sãkiretxi !pikamape. Maxikatiĩka kamakori sãkiretxiti Satanasi sãkire itxaua —itxa Xesosi.

Xikatxitakaniua Pirena (Arókasi 6.29-30)

³⁸ Xesosi oerekarauatapanika:

—Ia atoko kitxakapirĩka sãkiretxiti: “Neenamatsisaaki ãti makatxakiniãri poki, pixikatxitariko. Iuasaaki pimakatxakariko iua oki apaka. Pitsiriĩ pataka ãti kãkiti xika, pixikatxitariko. Iuasaaki iua tsiriĩ apaka pimapatakako,” itxa sãkiretxi kitxakapirĩka. ³⁹ Txamari nota sãpiretaiko hĩte apikomoni. Kona hĩxikatxitapiri maerekati hĩtemoni auakasaaki. ãti aritiniãri pitoõ, ininiã pikirioka ipinitoõ iaritini ĩkapani. ⁴⁰ Atxiĩti ãti nirekari anikinii pimisiritiko mereẽkarimoni, kotxi iua nirekari pite sikiniri pimãka iuamoni iua txineirote pimasikakani xika. Ininiã anikinii apisapanika, pisikariko pimãka inirekakiti, apaka apikomoni ãti pimãka. Ikara atoko hĩkamako. ⁴¹ Ia ãti sãkiretxiti: ãti paniãtiniãi itii panikini ãti õti, ininiã ipi õti panikari itii. Poerekariko pitiraõki. ⁴² Atxiĩti ãti amanaãi pitii, ininiã pisikariko iuamoni inirekakiti. Iua amanainiãi pitii “Akamoni iuaĩkana !nisikai,” ininiã iuasaaki pisikariko iuamoni —itxa Xesosi.

Pomanatakini Pitiretini (Arókasi 6.27-28, 32-36)

⁴³ Iuaĩkana Xesosi sãkirauata:

—Hĩkenakotapekari ia sãkiretxiti: “Hĩtiretariko hinirimane. Homanatariko himokaiakari.” Ikara atoko kitxakapirĩka auari. ⁴⁴ Ikara atoko itxama. Nota sãpiretaiko hĩte ipinimoni. Kona homanatapiri himokaiakari. Hĩtiretariko iua apaka. Hamanaãri Teoso hĩte omanatakani erekari isikini ĩkapani. ⁴⁵ Apakatapitika amokaiakarimoni erekari akamini, kotxi Teoso kamari atokatxi kãkiti erekarini auiniãtaã iopinikini ĩkapani, apaka maerekani auiniãtaã iopinikini ĩkapani. Iua iokanatarĩ ãparaã atão inakari kamakanimoni, apaka atão minakati kamakanimoni. ⁴⁶ Hĩte tirketakaninani hĩtiretiniã, kinirepa Teoso sikari erekari hĩtemoni hinirimanenokara hĩtirketakasaaki? Kotxi kãkiti maerekati kamakani apaka tirketari ninoa tirketakani. ⁴⁷ Hĩte misãkirketakaninani himisãkiretiniã, kãkiti Teoso mimarotakani atoko hĩtxa,

kotxi ninoa misākiretakani imisākiretana. ⁴⁸ Ikinipoko hīri iaxiti auakari kamakiti erekari, ininiā iua atokokana hītxīkitakariko ikinipoko hīte kamakiti erekari —itxa Xesosi.

6

Xesosi Oerekari Teoso Sikiko

¹ Iuaīkana Xesosi sākirauata:

—Erepaniko. Erekari pikamakasaaki, kona pikamapiri piuikiniua īkapani, erekari pikamakiti apanakini imarotini īkapani. Pikaminiāri erekari apanakini apokaerekatinii īkapani, kona papakapari piparīka īki iaxiti, aīri iaxiti auakari sikakiti. ² Aua kākiti ia atoko inakari. Ikamakiti atxiīti erekari, txamari ixinikakiti kona erekari. Kākiti ikara atoko inakari sikarauatakasaaki minakati matiitimoni aiko Xoteo apotiitiniātaāua, apaka mapara kākiti napiniātaā, inirekarina ikinimane itikiniri erekari ikamakitina. Inirekarina kākiti iuikinina. Ikara atoko !pityape minakati matiitimoni pisikarauatakasaaki. Pixinikariko ia: Ninoa apakapapekari ikinika erekari kākiti sikakiti, txamari !apakaparina erekari Teoso sikakiti. ³ Pisikarauatakasaaki minakati matiitimoni, kona pauiritapiri piuako pisaneremoni auakari imarotini piuako pikikomoni auakari sikakiti. ⁴ Ikara atoko ininiā, pitenani imarotari pisiākiti. Piri iaxitikiri, ikinipoko atamatakari, iikitxitaiko kākiti apisatoō —itxa Xesosi.

Teoso Misākiretiko Pirena (Arókasi 11.2-4)

⁵ Iuaīkana Xesosi sākirauata:

—Teoso himisākiretakasaaki, kona hīkamapiri kamisirienereri atoko hinini. Ninoa potxitari itiminina aiko Xoteo apotiitiniātaāua, kimaporiā apaka, Teoso imisākiretini īkapani. Ininiā ikinimane itikana. Hīxinikari. Ninoa apakapapekari poxokonitxi uai īkorapokoriti auakari. Txamari ninoamoni atāo poxokonitxi !auari. ⁶ Teoso pimisākiretakasaaki, pisa pitenani auiniātaā. Kona pauiritapiri āti kaikotini pitekata Teoso pimisākiretakasaaki. Iuaā pimisākiretari piri matamatakoti. Iuaā iua atamataiko pite. Eereka isikaiko erekari iaxitikiri.

⁷ —Teoso pimisākiretakasaaki, pimixinikariko pisākire. Maxikatiīka kona pisākirauatape iuakata. Teoso sākire mauīākati xinikari Teoso kenakotini isākire kotxi kaiāori isākire. ⁸ Ikara atoko !pikamape pimisākiretakasaakiri iua, kotxi pisākirauatini apisapanika Teoso imarotapekari pinirekakiti. ⁹ Ia atoko hītxako Teoso himisākiretakasaaki:

“Aīri iaxiti auakari, ate nirekari piuāka paxitiko.

¹⁰ Anirekari ikini itixiti auakani auītetinii pite. Pite tixine pinireēkiti kamiko atokokana, anirekari pinireēkiti kamiko īkorapokoriti,

¹¹ Nipokori ikiniōtika pisikauako.

¹² Pimaxinīkaretariko maerekati akamakiti. Maerekati atemoni kamakori amaxinīkaretini atokokana pimaxinīkaretariko.

¹³ Kona panikapeua aātaerekatikomoni. Pisikakauako ate, maerekati sauaki aāuakasaaki. Ikara atoko piposota, kotxi pitenanira auītetxi txaua. Pitenanira kaposotiire. Ātipirika peerekai pite. Ameē.”

Ikara atoko hītxako Teosomoni.

¹⁴ —Pimaxinīkaretiniāri maerekati āti kamakiti pitemoni, ininiā piri iaxiti auakari maxinīkaretari maerekati pite kamakiti apaka.

¹⁵ Pimamaxinīkaretaniāri maerekati āti kamakiti pitemoni, ininiā piri iaxitikiri kona maxinīkaretari maerekati pite kamakiti apaka —itxa Xesosi.

Nipokori Takanapiko Pirena

¹⁶ Iuaĩkana Xesosi sãkirauata:

—Aua kãkiti ia atoko inakari. Ikamakiti atxiĩti erekari, txamari ixinikakiti kona erekari. Kãkiti ikara atoko inakari takanapari inipokotini Teosokata isãkirauatini ĩkapani. Txamari ninoa nirekari ikinimane imarotini itakanapinirina inipokotinina, kãkiti iuikinina ĩkapani. Ininiã ninoa matinaniuata itooãna ikara kãkiti imarotini ĩkapani. Atão nitxai, ninoa apakapapekari ikinika erekari kãkiti sikakiti, txamari !apakaparina erekari Teoso sikakiti. Kona ikara atoko !pitxape nipokori pitakanapakasaaki Teoso pimisãkiretini ĩkapani. ¹⁷ Hĩte ikara atoko !hĩkamape. Hinipokotini hĩtakanapakasaaki Teoso himisãkiretini ĩkapani, hãrokatoõtaua. Hõeretari hiãko. ¹⁸ Ininiãkara apanakini !imarotari hĩtakanapiniri hinikini. Ininiã hĩri matamatakoti, iuananira itikariko hĩkamakiti, apanakini mimarotakiniti, ininiã isikaiko hĩparĩka ĩki — itxa Xesosi.

Pitiretakiti
(Arókasi 12.33-34)

¹⁹ Iuaĩkana Xesosi sãkirauata:

—Maxikatĩka kona papotiitapiri pitiretakiti uai auakari, kotxi atxiĩti kamara nikari pitii. Atxiĩti oerẽkata. Atxiĩti kiĩtiriri ĩtirĩkari iua. ²⁰ Ikara atoko kona pikamape. Papotiitariko pitiretakiti Teoso tixineẽ, kotxi iuaã !auari kamara. Iuaã tiitxi !oerẽkata. Kona ixipoka. Kiĩtiriri !ĩtirĩkari iua. ²¹ Pitiretakiti auiniãtaã, iuaã pixinikapika. Iuaã pinirekari pauini —itxa Xesosi.

Tirikapi ĩtotxiãkiri Pirena
(Arókasi 11.34-36)

²² —Poki tirikapi atoko itxa piĩto ĩkapani. Poki ereka inakasaaki, ipinikare aua pãkixinireẽ, ininiã pinireẽkiti imakinika erekari. Erekarinokara patamatinia, erekari pixinire. ²³ Txamari poki oerekasaakii maerekati pikamini, ipiã apoka pãkixiniremoni. Iuasaaki tirikapi kamara na xatiki !auari pitemoni —itxa Xesosi.

Ipi Auĩtetxi Pirena
(Arókasi 16.13; 12.22-31)

²⁴ Iuaĩkana Xesosi sãkirauata:

—!Apakata kãkiti parĩkauatini ipi iauĩtena ĩkapani, kotxi atxiĩti ãti omanata, ãti itireta. Atxiĩti ãti apokaerekata, ãti inorita. Iua atokokana kãkiti kona posotari iparĩkauatini tiitxi ikinipoko iamotini ĩkapani, Teoso ĩkapani iparĩkauatakasaaki. !Apakata piauĩtetiniri Teoso, txineiro piauĩtetakasaaki.

Teoso Nĩkatiniua Ate
(Arókasi 12.22-31)

²⁵ —Ininiã nitxai: Pinirekari nipokori, iãriã pakini auãki pinini ĩkapani. Apaka pinirekari mãkatxi piĩto ĩkapani. Ikara pinirekini xika maerekaxiniretika kona pitxape. Erekarini nipokori. Apiaerekata pixinire. Erekarini mãkatxi. Apiaerekata piĩto. Ininiã ãtipirika !pixinikapiri nipokori, mãkatxi pakini pinitini. ²⁶ Kona pipĩkarauatape nipokori poião auakasaaki. Pixinikariko kotipiriki. Kona ninoa takarauata. Kona apotiitari ikiena. Kona ipotetari ikiena. Iuaritika piri iaxitikiri sikakienatana ninoa. Ininiã ninoamoni nipokori !ixipoka. Teoso apia xinikai hĩte. Ininiã kona pipĩkarauatape. ²⁷ Kinirepa maerekaxiniretinoka pitxa? Pimaerekaxinirene !itxĩkitakai apikomoni ãti oara pauini.

²⁸ —Kinirepa maerekaxiniretinoka pitxa pimãka pinirekini xika. Aãui pixinikako. Kona aãui parĩkauata. !Ikamari imãka, iuaritika aãui peereri. ²⁹ Kitxakapirĩka auĩtetxi Saromão inakori, iteene katiiri itxaua. Kaiãori imãka ereri, iuaritika apia ereri ikinika aãui. ³⁰ Aãui !okanani aua. Uatxa aua.

Katana ikatikata iotikaãka. Iuaritika Teoso nĩkatari aãui. Ininiã apiata inĩkatai hĩte. Ikamamãkatapitikai. Poiãonoka hĩte auikari Teoso sãkire. Ikara xika maerekaxiniretinoka hĩtxa.

³¹—Ininiã maerekaxiniretinoka kona hĩtxape. “Kipa ninika? Kipa niãta? Nãpa napokari mãkatxi?” kona hĩtxape. ³²Teoso sãkire mauĩãkani maerekaxiniretinoka itxana ikara atoko. Piri iaxiti auakari imarotari pinirekaãkiti. Ininiã maerekaxiniretika !pĩtxape. ³³Merepitipanika pinirekariko Teoso piauĩte ininiãua. Iua nireẽkiti pinitako, ininiã atão inakarínoka pikamako. Ikara atoko inakari pikaminiã, pite nirekakiti apaka isikaiko. ³⁴Maerekaxiniretinoka kona pĩtxape katana pinirekakiti pixinikini xika. Pinirekakiti auapitikako katana, iuaritika mitxipanika kona pixinikapiri ikara maerekaxiniretika, kotxi ikiniõtika aua ikara atoko inakari —ĩtxa Xesosi.

7

Apoĩretxi Pirena

(*Arókasi 6.37-38, 41-42*)

¹ Iuaĩkana Xesosi sãkirauata:

—“Kona erekari pikamakiti,” kona pĩtxape ãtimoni, ininiãkara Teoso kona txai pite: “Kona erekari pite kamakiti,” !itxai, ² kotxi Teoso misiritai pimaerekani xika, ãti pite misiritini atokokana. Iteene pimisiritiniãri ãti imaerekani xika, iteene Teoso misiritai pite, pite maerekani xika. ³ Ikara ia atoko. Pisãpiretari ãti: “Aãsorokana aua poki ãki,” txamari kona pimaãkatari aãtxirata pite oki ãki auakari. Kinirepa ikara atoko inakari pikama? ⁴ !Apakata pisãkire pitarimoni: “Pauritano aãsorokana poki ãki auakari nimakatzakini.” Ikara atoko pininiã !erekari, kotxi aãtxirata aua pite oki ãki. ⁵ Maerekati kamakarii pite, kotxi pikamakiti erekari atxiĩti, txamari maerekatinoka pixinikakiti. Pimakatzakariko aãtxirata pite oki ãki auakari merepanika, ininiã eereka apakata patamatiniri aãsorokana pitari oki ãki auakari pimakatzakini. Ikara oerekaua piteka maerekani auakasaaki, pitakanapariko piteka maerekani, ininiã eereka apakata pimoianatiniri ãti iua maerekani itakanapini ĩkapani.

⁶—Kãkiti kona sikari Teoso nakiti anãpamoni, kotxi atxiĩti iua anãpa kirioka, akatsata txai. Iua atokokana Teoso nakiti kona asika Teoso mapaxitakati-moni, kotxi iua anãpa atoko. Eereka iua misiritapitikai.

—Apaka kona pinoakitsa ereri kona pisika irarimoni, kotxi iua katxaratari. Iua atokokanera Teoso mapaxitakanimoni kona hĩsikari Teoso nakiti, kotxi eereka imisiritari Teoso nakiti noakitsatxi irari misiritini atoko —ĩtxa Xesosi.

Kona Hĩtakanapapiri Teoso Himisãkiretini

(*Arókasi 11.9-13*)

⁷ Iuaĩkana Xesosi sãkirauata:

—Teosomoni pamanarauatakasaaki, papakapariko pinirekakiti. Pinitarauatakasaaki, papokapitikariko pinireẽkiti. Aĩri iaxitikiri pakiritiniã, iua apakapapiretai. Ia atoko itxako: “Pikanikauata. Pĩroã,” itxako. ⁸ Ikinika amanarauatakari apakapariko inirekakiti. Nitarauatakari apokariko in-itakiti. Teoso akiritakari apakapaãkapitikako. ⁹ Amarini amanainiãri iri komiri, atauako kai sorokani isikatari imi? ¹⁰ Ximaki amanainiãri, atauako iminikani isikari? Konapitini. Irĩtxi kona kamari ikara atoko inakari. ¹¹ Kãkiti maerekani apaka imarotari erekari isikini amaritenamoni. Aĩri iaxitikiri apiata imarotari isikiniri erekari iua anaakorimoni, ninoa amanaãkasaakiri.

Āti Pitiretini Pirena

¹² —Pixinikariko. Natokopa pinirekari apanakini tiretinii pite? Ininiā iua atokokana pitiretariko apanakini. Ikara atoko itxa ikinika Teoso paniātakiti aātsopaā auakari, apaka Teoso sākire sāpiretakani sāpiretakiti kitxakapirīka — itxa Xesosi.

*Ipi Kimapori Pirena**(Arókasi 13.24)*

¹³ Iuaīkana Xesosi sākirauata:

—Teoso tixine hīroā axapitiri ĩronakikoātaā. Mitari ĩronakikoātaā sikari sari maerekani misiritikoātaā. Iua kimapori mitari, kotxi itomaneri kākiti sari iuaā. ¹⁴ Axapitiri ĩronakikoātaā, kimapori axapitiri. Iua apo sari auapininiika inini tixinemoni. Iua kimaporiti axapitiki, kotxi poiāoka kākiti sari iua kimaporiti —itxa Xesosi.

*Omina, Ori Pakini Pirena**(Arókasi 6.43-44)*

¹⁵ Iuaīkana Xesosi sākirauata:

—Erepaniko. Auapitika Teoso sākire sāpiretakari, txamari iua na atāo isāpireta, kotxi isāpiretari iua sākire Teoso sākirekata. Ikoketari. Atāo inakari ikoketa maerekatikata. Erepaniko. Pamonōkoniri iua. Mapara patamatakasaakiri, soti auīte atoko itxa. Ākixiniremoni ākiti atoko itxa. ¹⁶ Pimarotari kākiti ikara atoko inakari, kotxi patamatari ninoa kamakiti maerekati. Inako mina kona iritari kīpaima. Aanaia kona iritari pama. Iua atokotxikana kākiti maerekati kamakani kona kamari erekari. ¹⁷ Ikinika aamina erekari, erekari iri. Aamina maerekati, ininiā maerekati iri. ¹⁸ Aamina erekari kona posotari maerekati iritini. Iua atokokana aamina maerekati kona posotari erekari iritini. ¹⁹ Aamina maereka iriti itoāka, arika inaāka. ²⁰ Ininiā aamina iriāra kākiti imarotari ereka inini. Iua atokokanera kākiti imarotaāka —itxa Xesosi.

*Kākiti Teoso Tixine Īroākani**(Arókasi 13.25-27)*

²¹ Iuaīkana Xesosi sākirauata:

—Apanakini txano nota: “Pite niauīte” inakani, !isapanina Teoso auītetxi ininiātaāua. Niri iaxiti auakari nireēkiti kamakarinanira sapaniko iuaā. ²² Itixi xipokini ōtisaaki, itomaneri kākiti maxikatīka akiritano: “Pite aāuīte apiatakari. Papakapaua. Aōerekapekari pisākire apanakinimoni. Aōmitikapekari maerekati matamatakoti piuākaā. Akamapekari posotiiretxi kaiāopokori,” itxanako ninoa. ²³ Txamari nitxanako: “Kona nimarotai hīte. Hīsipiniikaua. Maerekatira hīkama.” Ikara atoko nisāpiretanako ninoa, kotxi maerekati kamakani itxauana —itxa Xesosi.

*Aapokotxi Kamakari**(Arókasi 6.46-49)*

²⁴ Iuaīkana Xesosi sākirauata:

—Nisākire kenakotakari, nisākire nīkaenetakari, ia kiki kimaroreri atoko itxa. Ia kiki kamakasaakiri aapoko, iopitimita aapokotxi tsota. Otsomori ikama. ²⁵ Ininiā āparaā kipakasaaki, uini apoātakasaaki, ĩtima apisatakasaaki, aapoko kona irika, kotxi iua tsota itakapekari otsomori. Nisākire kenakotakani nisākire nīkaenetakani, iua kiki kimaroreri atoko itxana.

²⁶ —Nisākire kenakotakari, nisākire miinīkaenetakati, kākiti miīkiteti atoko itxa. Iua kamari aapoko ikipatxiteē. ²⁷ Ikipakasaaki, uini apoātakasaaki, ĩtima apisatakasaakiri, aapoko irika. Irika, kotxi aapokotxi !otsomori.

Poião tsomikari. Irikasaaki, ikinika xipoka. Ikara atoko itxa nisäkire mi-niñkaenetakati. Iua imarotapitikamari, txamari likamari. Ikara atoko nisäkire mapaxitakani —itxa Xesosi.

Xesosi Posotiire Pirena

²⁸ Xesosi oerekarauatini xipoka atoko, kākiti xinikari: “Paimatireri Xesosi. Iua imarotari atão.” ²⁹ Ikara atoko ixinikana, kotxi Xesosi imarotapitikari Teoso sākire oerekini. Kaposotiireri iua isākirauatakasaaki. Kaiōkatsoparerini atoko kona itxa. Ninoa kona imarotari Teoso sākire Xesosi imarotiniri atoko.

8

Kiki Maere Matati

(Marko 1.40-45; Arókasi 5.12-16)

¹ Xesosi ixirata iokiriitaka atoko, itomaneri kākiti sari iua tikini. ² Iuasaaki amianatakari maere matati apoka iuamoni. Ikapotoreēkaua iua apisatoō. Itxari:

—Nimarotari pinirekiniã, erekapeka pitxīkitakano nota —itxa.

³ Xesosi maātakari iua. Ininiã itxa:

—Ari, ninirekapitikari. Erekapekai —itxari.

Iuasaakipeka erekapeka itxa. ⁴ Ininiã Xesosi:

—Kona ĩkora !pisāpiretape apanakinimoni. Uatxa sasetotximoni pisa. Poerekaua iuamoni erekapeka pinini. Moisesini paniātakiti atoko pikama. Pikaminiãri ipaniātakiti atoko, ininiã ikinimane imarotari erekapeka pinini —itxa Xesosi.

Eereka isari Xesosi paniātakiti ikamini ĩkapani.

Sotato Auñte Nitiri Makananitiko

(Arókasi 7.1-10)

⁵ Kapanaoō sitatxiti apokasaaki, sotatoakori auñte sari Xesosimoni. Homano itxaua. Iua iteene amanaãri Xesosi:

⁶ —Xesosi, ninitiri iteene amianata naapoko. Ikikinanaka. !Itĩpokotaika. Inikoriãtsiitari —itxari Xesosi.

⁷ Ininiã Xesosi:

—Iuaã nisako erekape inini ĩkapani —itxa Xesosi.

⁸ Ininiã iua Homano:

—Konapitini. Pite auñttxi apiatakari pitxaua. Nota poiãorino. !Apakata naapoko piĩroini. Pisākirenani piokanata. Ininiã erekapeka itxako ninitiri.

⁹ Nimarotari ikaranani apakatako, kotxi nota kamari nota auñte paniātakiti. Apaka sotato auñte nitxaua nota. Nisākirauatakasaaki, nisotatone kamapitikari nipaniātakiti. Nota txari: “Pisa.” Iuasaakipeka isa. Nitxari ãti: “Pina.” Iuasaakipeka ina itxa. “Ia pikama,” nitxari ninitiri. Iuasaakipeka ikamari. Ininiã pisākirenani apakatapitika —itxari Xesosi.

¹⁰ Isäkire Xesosi kenakotakasaaki, iteene ipotxitari isäkire. Iposo atoko itxa:

—Atão nitxai. Isaeo auakani poião auikari nisäkire. Ia Homano itxaua, iuaritika apiata iua auikari nota posotiire. Kona nitikapanikari kākiti Isaeo auakari auikiniri nisäkire ia kiki auikiniri atoko. ¹¹ Nota sāpiretai hñte, itomaneri kākiti ãti uãka atokatxi pokĩkini tixinimoni auakani, atokatxi ereēkokini tixinimoni auakani apaka, itomaneri itixi auakani kiiniritauatako Teoso auñttxi ininiãtaãua. Ninoa nipokotako anirimanekata kitxakapirĩka auakanikata. Apraão, Isaki, Xakoo pakinikata inipokotana. ¹² Iuasaaki apanakini Apraão apika mekaniriakori kona sari iua Teoso kiiniritemoni, kotxi ninoa !auikari Teoso sākire. Piãkatximoni iokanataãkanako. Iuaã itxia-patanako, akatsakatsiriĩtauanako imisiritikona xika —itxa Xesosi sākire.

¹³ Ininiã Xesosi txari sotatoakori auñte:

—Pisa paapokomoni. Pite auikari niposotiire pinitiri erekape inini ĩkapani. Uatxa auape pinirekakiti —itxa Xesosi.

Ininiã iniriti iuasaakipeka erekape itxa.

Simão Petro Imakiro Makananitiko
(Marko 1.29-34; Arókasi 4.38-41)

¹⁴ Iposo atoko Xesosi sari Petro aapokomoni. Iuaã apokasaaki, atamataro Petro imakiro. Osirimata nopini osirĩkanãta. Oãpoomata. ¹⁵ Ininiã Xesosi takapiotaua ouako nopini. Iuasaakipeka apoomari xipoka. Ininiã oõkitikaua. Osikakienatana ninoa.

Xesosi Makananitana Amianatakani

¹⁶ Mapiãpeka inakasaaki, kãkiti anikana itomaneri maerekati matamatakoti auaĩtotakini iuamoni. Isãkireẽ omitikana maerekani matamatakoni. Imakananitana ikinikana amianatakani. ¹⁷ Ikara atoko itxa Xesosi, kotxi inirekari Isaía sãkire iaõka apokini. Kitxakapirĩka Teoso sãkire sãpiretakari Isaía inakori txari:

Iua tiretariko amianatakari. Imakatzakariko aamianare. Imakananitaua. Iuaka atatsiirauata ate ĩkapani.

Kãkiti Xesosi Imoianatinina Nireẽkani
(Arókasi 9.57-62)

¹⁸ Itomaneri kãkiti iuakata auakasaaki, Xesosi txari imoianariakori: —Masa ipiniãmoni —itxana.

¹⁹ Iuasaakipeka ãti kaiõkatsopareri apoka Xesosimoni. Itxa: —Koerekareri, nota iposope nisini pite nirekinimoni —itxa.

²⁰ Ininiã Xesosi: —Atauako pinirekatari pisini notakata? Aripa aua auini iriko. Araãkani auari ikoa. Txamari nota kãkiti itari iaxitikiri !auari nimakiniãtaã —itxa Xesosi.

²¹ Ætipekana apoka Xesosimoni. Xesosi moianari iua. Itxari: —Niauĩte, pauiritano niri nikatanapini merepanika, kotxi kiomãtxipekari iua. Eereka nisa pitekata —itxari.

Iteene iua !inirekari isini Xesosikata. ²² Xesosi apakapapiretari: —Notakata pisa uatxa. Nisãkire mauĩãkani ipĩkani atoko itxana. Ininiã pauiritana ipĩkani katiniri inirimane nisãkire mauĩãkani —itxa Xesosi.

Xesosi Iotokakiniri Ītima Pirena
(Marko 4.35-41; Arókasi 8.22-25)

²³ Iposo atoko, Xesosi imoianariakorikata iereẽtaua, ĩpiriãtinina ĩkapani. ²⁴ Mokatanitika ĩtima kataparari apoãkata. Tsakati okari ãparaã kanaua ãki. Iuasaaki Xesosi imakanãta. ²⁵ Imoianariakori sari iuamoni. Ōpirĩkarina. Akiripoakatana:

—Apiananiri, !pauiritapiri apinini. Apinanapanoka —itxana.

²⁶ Ininiã Xesosi: —Kinirepa hĩpĩkarauata? Poiãonoka hãuikari niposotiire —itxa. Iposo atoko õkitikaua, pinita itxari ĩtima, tsakati pakini. Iuasaakipeka ĩtima, tsakati pakini iotoka. ²⁷ Ininiã imoianariakori tsorĩkaãta. Itxana:

—Natokopa inakaripa ia kiki? Ītima, tsakati pakini kenakotari isãkire —itxana imoianariakori.

Ipi Kiki Maerekani Matamatakoni Auaĩtotakini
(Marko 5.1-20; Arókasi 8.26-39)

²⁸ Ipiniã apokasaakina Xerasa tõpamoni, itaõkitarina ipi kiki itomane maerekani matamatakoni auaĩtotakini. Akauariã auanãtana. Paneena-mana. Ikara xika kãkiti pĩkari akauarimoni isinina. ²⁹ Xesosi inaãpotakasaaki, maerekani matamatakoni iĩtoãna auakani akiripoakata:

—Xesosi, Teoso ãkiri pitxaua. Kiripa pinirekaka atemoni? Pite ina uaimoni amisiritiko õti apisapanika pimisiritiniua ãkapani atxiiti? —itxarina.

³⁰ Ikara ininiãtaã takote auana itomane irariakori. Ikira atoko inipokonãtana. ³¹ Ininiã maerekani matamatakoni txari:

—Ate pomitikiniã, irariakorimoni piokanataua —itxarina.

³² Ininiã Xesosi:

—Hĩsipeka ninoamoni —itxa.

Iuasaakipeka irariakori ãtoã ãroãna. Ininiã imakinikana irariakori miteẽkata. Iokiriãkatana. Ipoamoni isana. Iuaã ikomokana, axãpoãta itxana.

³³ Ninoa irariakori nãkatakani miteka sitatximoni. Iuaã ikinika isãpiretana irari ipinini pirena, kiki maerekani matamatakoni auãitotakini pirena apaka. ³⁴ Ininiã ikinimane sitatxikini sari Xesosi itaõkitinina ãkapani. Iua itaõkitakasaakina, amanaãrina ninoa tixine itakanapini ãkapani.

9

Matĩpokotakati Pirena

(Marko 2.1-12; Arókasi 5.17-26)

¹ Ininiã Xesosi iereẽtaua kanauaã. Ikanapiriã iua auinimoni Kapanaoõ sitatxitimoni. ² ãtikaka kikiakori minari matĩpokotakati Xesosimoni. Xesosi imarotari ninoa auikiniri iua sãkire. Ininiã itxari:

—Namarite, pipoxokoniuatako. Pimaerekani makatxakapeẽkaika —itxa.

³ Iuasaaki aua ãtikaka kaiõkatsoparerini iuaã. Ninoa ãkixinireẽ itxana:

—Kona erekari isãkire. Teosonanira posotari kãkiti maerekani imaktxakini —itxana ninoa.

⁴ Xesosi imarotari maerekati ixinikakitina ãkixinireẽna. Ininiã iua txa:

—Kinirepa hũãkatari nisãkire maerekati inini? ⁵ Nitxari iua imaerekani nimaktxakini, txamari ! himarotari imaerekani atão nimaktxakini. “Põkitikaua. Pitĩpokota,” nininiã, himarotari nisãkire atão ininiãua, kotxi hĩtikari. Niposotiire imaerekani nimaktxakini ãkapani, niposotiire iua nõkitikini ãkapanitxikana. ⁶ Ininiã uatxaika noerekai hĩte, Teoso iokanatano nota hĩtari iaxitikiri ãkorapokoritimoni kãkiti maerekani nimaktxakini ãkapani —itxa Xesosi.

Ininiã itxari matĩpokotakatimoni:

—Põkitikaua. Pisirimata pikoseka, sipe pitxa paapokomoni —itxa Xesosi.

⁷ Iuasaakipeka iua õkitikaua, aapokomoni sipe itxa. ⁸ Ikara inakari apanakini itikasaaki, ipĩkarauatana.

—Peerekari Teoso, kotxi iua oerekari iposotiire kãkitimoni —itxana.

Mateo Pirena

(Marko 2.13-17; Arókasi 5.27-32)

⁹ Ikara inakari oereka atoko Xesosi sipeka. Isikasaaki, itaõkitari Mateo inakori. Auĩtetxiakori txineirote apotiitakari iua. Xesosi napakasaaki, iitopãkanãta txineiro apakapiniãtaã. Ininiã Xesosi txari:

—Masa notakata pimoianatinino ãkapani.

Ininiã Mateo õkitikaua, Xesosikata sa itxa. ¹⁰ Eereka Xesosi imoianari-akorikata nipokota Mateo aapoko. Txineiro apotiitakani, apanakini kãkiti maerekati kamakani pakini apoka Xesosikata inikinina ãkapani. Kãkiti kona potxitari txineiro apotiitakani, kotxi ninoa sikaro oa txineiro ãti uãka auĩteakorimoni. !Neerekana ninoa. ¹¹ Pariseoakori itikari ninoa nipokotini, ininiã itxana Xesosi moianariakorimoni:

—Kinirepa hĩauĩte nipokota txineiro apotiitakanikata, maerekanikata? —itxana.

¹² Ininiã Xesosi kenakotari ninoa sãkire. Itxa:

—Maerekati kamakari amianatakari atoko itxa. Ninoa nirekari erekape ininina. Kākiti mamianatakani ! inirekari ipini sikakarimoni isinina. Amianatakaninoka nirekari ipini sikakarimoni isinina. Hīte ! inirekari nota makatxakiniri himaerekani, kotxi hīte uākatari ! auari himaerekani. ¹³ Hīxinikariko ia Teoso sākire iōkatsopatakori:

Hīsikarauata notamoni. Apiaerekata hiamonīkiniri apanakini.

Nota ina īkorapokoriti kona kākiti “atāo inakarino kamakarino nota” inakani īkapanini, kotxi ninoa uākatari erekarini ininiāuana, txamari kona erekana. Kākiti maerekati kamakani īkapanira nina nota uai imaerekanina itakanapinina īkapani —itxa Xesosi.

Nipokori Takanapiko Teoso Misākiretiko Īkapani
(Marko 2.18-22; Arókasi 5.33-39)

¹⁴ Eereka Xoāo kapatxisareri moianariakori apoka Xesosimoni. Itxana:

—Ate, pariseoakori pakini atakanapari anipokotini itokata Teoso amisākiretini īkapani. Kinirepa pite moianariakori ! itakanapari inikinina Teoso imisākiretinina īkapani? —itxana.

¹⁵ Ininiā Xesosi apakapapiretana:

—Nota kiiniri kamakari atoko nitxa. Kiki nirekiniā ītanorouatini, ikamari kiiniri. Iuasaaki imoianariakori kona nirekari imatinaniuatina, iua ninoakata auakasaaki. Ininiā kona itakanaparina inikinina Teoso imisākiretinina īkapani. Āti ōti nimaīkaākako. Nanikaākako ninoa mauakaniātaā. Iuasaakiko itakanaparina inikinina Teoso imisākiretinina īkapani —itxa Xesosi.

Mākatxi Tāpanatiko Pirena

¹⁶ —Kiomātxiakori kitxakapirīka auakani sākirekata kona hīkoketapiri nota sākire. Ikara hīkaminiā, ininiā mākatxi kitxakari amaneriā hītāpanatini atoko itxa. Mākatxi kitxakari amaneriā kona hītāpanatape, kotxi parokasaakiri, amaneri txikika, ininiā ikatsorākari mākatxi kitxakari. Ininiā mitari it-sorākare. Mākatxi amaneri nota oerekakiti atoko. Mākatxi kitxakari, kākiti kitxakapirīka oerekakiti atoko itxa. Hīkoketiniāri kitxakapirīka oerekakiti, amaneri oerekakitikata, imakinika xipoka.

Sako Aamata Kamakori

¹⁷ —Kitxakapirīka kākiti takari iāriā sako aamata kamakori āki. Iuasaaki kona kākiti takari amaneri iāriā kitxakari mata āki, kotxi iāriā txiōkaātakaasaaki, itiākaāpota. Ininiā omata kitxakari tsorakitako, kotxi paikori. Kona itiāka. Ininiā iāriā katxaka. Iāriā, aamata pakini xipoka. Amaneri matariā itakaāka iāriā amaneri. Ikara atoko ininiā, erekapitikari. Kona ixipokapaniko. Iua atokokana kona hīkoketapiriko kiomātxi kitxakapirīka oerekakiti nota oerekakitikata —itxa Xesosi sākire.

Xoteoakori Auīte Pirena
(Marko 5.21-43; Arókasi 8.40-56)

¹⁸ Xesosi sākirauatapanika, inakasaaki Xoteoakori auīte apoka iuamoni. Ikapotoreēkaua Xesosi apisatoō. Itxa:

—Namarite opinanapanoka. Masa. Piuako pitaka oa nopini, ininiā kona opina —itxari Xesosi.

¹⁹ Ininiā Xesosi imoianariakorikata ōkitikaua, iuakata sa itxana.

Xesosi Māka Maātakakaro
(Mateo 9.20-22; Arókasi 8.43-48)

²⁰ Isikasaakina, sito apoka iua porikimoni. Oamianare oārēka !iotokiniāro. Tosikanani oamianatini. Oāpokasaaki, omaātakari imāka imapotomatare.

²¹ Oākixinireē otxa:

—Imãka nimaãtakiniã, erekape nitxako —otxa.

Ininiã otikakari imãka. ²² Iuasaakipeka Xesosi kirioka, atamata itxaro:

—Namarite, kataparaxinire pitxako. Pauikari niposotiire, ininiã erekapekai —itxaro.

Iuasaakipeka oa erekape.

*Xáiro Ákero Ōkitikiko Pirena
(Marko 5.35-43; Arókasi 8.49-56)*

²³ Iposo atoko Xesosi sari Xoteoakori auíte aapokomoni. Iuaã apokasaaki, ñroã. Itikari sokonaki xökakani, itomaneri kãkiti txiapatakani apaka. ²⁴ Ininiã Xesosi:

—Mapara hïsa, kotxi oa amarini kona opina. Omakanãta —itxa Xesosi.

Ininiã ninoa napetari Xesosi:

—!Omakanãta. Opïpe. Pite !imarotari —inapetarina.

²⁵ Ikinimane mapara isikasaakina, Xesosi sari oa ãtokoromoni. Imaïkaro ouako. Iuasaakipeka oõkitikaua. ²⁶ Ikara ene iaripireta iua tõpa.

Xesosi Kõsiãrepeka Txïkitakari Mõsiãreti

²⁷ Iposo atoko Xesosi sipe. Iuasaaki ipi mõsiãreni sari iua tikini. Iuasaaki ninoa akiripoakata:

—Tavii apika mekanirii, piamonïkaua ate —itxana.

²⁸ Aapokotxi Xesosi ñroãkasaaki, ninoa ñroã apaka. Ininiã Xesosi:

—Hãuikatarari niposotiniri erekapeka nitxïkitakinii hïte? —itxa Xesosi.

Ininiã ninoa:

—Ari, Apiananiri —itxana.

²⁹ Ininiã itakapiotaua ninoa oki nopini. Ininiã itxa:

—Ari, hãuikakiti iaõka itxako —itxa Xesosi.

³⁰ Iuasaakipeka ninoa kõsiãrepeka itxana. Ininiã Xesosi:

—Kona hïsaãpiretapiri nikamakiti apanakinimoni —itxa Xesosi.

³¹ Eereka ninoa sipe. Txamari iaripiretarina ikamakiti ikinika iua tõpa.

Masãkireti Pirena

³² Ninoa kiki potorikasaaki, masãkireti anikaãka Xesosimoni. Iua kona kasãkireri, maerekati matamatakoti auaitotakiti xika. ³³ Iuasaaki Xesosi omitikari iua maerekati matamatakoti. Iuasaakipeka iua kiki sãkirauata. Itomaneri kãkiti itikari. Iuasaakiika ninoa tikoka. Ininiã itxana:

—Ikinika Isaeo tixiniã auakani, mitxi !itikapanikari ñkora atoko inakari —itxana.

³⁴ Txamari pariseoakori txari:

—Xesosi omitikari maerekati matamatakoti Satanasasi posotiireẽ —itxana.

Na atão ninoa sãkire.

Xesosi Ikini Sitatxiti Sini

³⁵ Ininiã Xesosi sari ikini sitatxiti tõpa. Aapokotxi auiniãtaã apaka isa. Oerekarauata aiko Xoteo apotiitiniãtaãua. Isãpiretari Teoso iokanapirena erekari, Teoso auïtetxi ininiãua pirena. Apaka erekapeka itxïkitakana ikinipoko amianatakani. Ikini sereti amianari aua kãkitimoni. Ikinika imakananita. ³⁶ Atamatakasaakina ninoa kãkitipokoni, iamoniãkana ninoa, kotxi soti auíte minïkatakoni atoko itxana, kotxi !imarotarina isinimonina. Imaãkauana. ³⁷ Ininiã itxari imoianariakori:

—Kaiãori kãkiti iposope auikiniri nisãkire, txamari !imarotarina nisãkire, kotxi !ikenakotapanirina. Ninoa kikiõ erekari atoko itxana. Imakinika iposope iuaã. Ininiã iposope auikinirina nisãkire. Txamari, poiãoka parïkauatakani aua nisãkire isãpiretinina ñkapani. ³⁸ Ininiãkara himisãkiretariko

Apiananiri iaxitikiri iokanatinina parĩkauatakani iua sãkire auiãkani apotiitinina ïkapani. Ikara atoko hĩtxako Teosomoni —itxa Xesosi.

10

Xesosi Mereẽna Tosi Imoianariakori (Marko 3.13-19; Arókasi 6.12-16)

¹ Xesosi mereẽna tosi imoianariakori. Isikari iposotiire ninoamoni maerekati matamatakoti omitikinina ïkapani. Isikari iposotiire ninoamoni amianatakani imakananininina ïkapani, ikinika amianari inokasaakina nino amianatakani. ² Naia imoianariakori uãka: Merepitipanika auari Simão Petro inakorima, apaka itari Átree inakorima. Auari Txiakoma, apaka itari Xoãoma. Ninoa Sepeteo anaakori. ³ Auari Piripima, Patoromeoma, Tomeema. Apaka auari Mateoma, txineiro apotiitakari. Apaka áti Txiakoma, Aopeo ãkiri. Aua Tateoma. ⁴ Aua Simãoma, Homano omanatakari. Apaka aua Xotasi Isikariotxi inakorima. Iua Xesosi mĩkapiritakari itxaua. Ninoa Xesosi moianariakori itxauana.

Xesosi Iokanataka Imoianariakori Kãkitimoni (Marko 6.7-13; Arókasi 9.1-6)

⁵ Ininiã Xesosi iokanataka ninoa isãkire isãpiretinina. Ia atoko õtãkikana: —Kona hĩsipeko Xoteo minakonimoni, apaka Samaria tõpa sitatxitimoni kona hĩsipeko. ⁶ Hĩsako kãkiti Isaeo tixinikinimoni. Hinirimanemoni, Xoteoakorimoni hĩsako. Ninoa soti auĩte pĩpinanaãkani atoko itxana. ⁷ Hãpokasaaki kãkitimoni, hĩtxariko: “Teoso ikinimane auĩte ininiua manapi paĩtiki apokako.” ⁸ Himakananitanako amianatakani. Maere matati erekapeka hĩtxĩkitakako apaka. Ipĩkani hõkitikako. Homitikariko maerekati matamatakoti kãkiti auãĩtotakini. Ikara atoko hĩkamako. Kona hĩte ïkitxitari Teoso hãpakapakiti ïkapani. Ininiã ikara atokokana hĩtxako. Kona hinirekapiri kãkiti ïkitxitinii hĩte, hĩte sikakiti ïkapani. ⁹ Kona hanikapero txineiro oro kamakoro. Pirata kamakoro, átião txineiro apaka, kona hanikape. ¹⁰ Uatxa hianaxititakasaaki, sako mata !hanikape. Áti himãka !hanikape. Áti hĩkiti mata kona hanikape. Hĩtsonere !hanikape. Kona himaãkapeua, kotxi parĩkauatakani apakapariko nipokori. Hinirekakiti apokapitikako.

¹¹ —Sitatxi hãpokasaaki, hinitari kãkiti Teoso sãkire kenakotakani, hĩte apakapakani. Hĩkaikota ninoakata. Eereka kona hĩsipe áti aapokomoni hĩkaikotini ïkapani. ¹² Aapokotxi ãki hĩĩroãkasaaki, hĩtxako: “Erekari Teoso sikakiti kaikotako hĩtekata,” hĩtxako. ¹³ Kãkiti ipoxokoniritika apakapiniãi, hĩtxako: “Teoso takari erekari hĩtemoni,” hĩtxako. Imanirekakaniãi, hĩtxariko: “Teoso kona takari erekari hĩtemoni.” ¹⁴ Atxiĩti aapokotxi hãpokasaaki, kãkiti iuaãtaã ! apakapai. Atxiĩti !inirekarina hĩsãkire, ininiã iuasaaki hĩsipeka. Hĩtakanapariko iuaãtaã. Hĩpotorikasaaki, himakatzakari kipatxi hĩkiti mataã auakari. Ininiã iuasaaki ninoa imarotari Teoso kona apokaerekatana. ¹⁵ Hĩxinikariko ia nisãkire. Kãkiti misiritiko õti apokasaaki, ninoa apiata misiritaãka. Sotoma sitatxiti auakani, Komoha sitatxiti auakani pakini misiritaãka poiãoka —itxa Xesosi.

Misirikaretxi Pirena (Marko 13.9-13; Arókasi 21.12-19)

¹⁶ Iuaĩkana Xesosi sãkirauata: —Erepaniko, pamonõkoniri. Hĩte soti auĩte atoko hĩtxa, kotxi !kaposotiirei hĩte, iuaritika niokanatai kãkitimoni. Ninoa ãkiti atoko, ininiã erepaniko. Ininiã kimarorei hĩtxako. Imini kimaroreri atoko hĩtxako. Ininiã maerekati ninoa auakiti kona misiritai. Iuasaakiika kamoã atoko hĩtxako, kotxi kamoã !imisiritari kãkiti.

17 —Erepaniko. Araõkire hĩtxako. Auako kãkiti kinirão anikinii maxikatiĩka kãkiti misiritiko mereẽkanimoni. Apanakini xirokaiko hĩte maxikatiĩka aiko ãki Xoteo apotiitiniãtaãua. 18 Nota sãkire hãuikini xika hanikaãkako auĩtetxiakorimoni himisiritiko himarotini ĩkapani. Ikara atoko ininiã, iusaaki erekapitikari, kotxi hĩsãpiretariko nota sãkire iuaã auakanimoni, Xoteo minakonimoni apaka.

19 —Kãkiti misiritiko mereẽkarimoni hanikikosaaki, kona himaãkapeua hĩsãkirauatini apisa. Teoso sikaiko hĩsãpirena tĩkane. 20 Sãkiretxi hĩsãpiretakiti kona hĩte sãkireni. Erekar Matamatakoti, iuarako sikariko sãkiretxi hĩsãkirauatini ĩkapani iusaaki.

21 —Ãti õti hĩtari sikaiko hĩte homanatakinimoni okinii ĩkapani, kotxi hĩte aukari nota sãkire. Iua atokokanerako irĩtxi sikariko imi ãtimoni okiniri ĩkapani, kotxi imi aukari nota sãkire. Auako apaka imi omanatinina iri, inoro pakini, kotxi inoro, iri pakini aukari nota sãkire. Iua sikanako ãtimoni okinina ĩkapani. 22 Ikinimane omanataiko hĩte nota sãkire hãuikini xika, iuaritika hãuikiniãri nisãkire ãtipirika, nimakatzakai himapinakani ĩkapani. 23 Sitatxiã hãuakasaaki, himisiritikosaaki, ãti sitatxitimoni himitekako. Atão nota sãpiretai hĩte. Kona hĩte xipokapaniri hĩparĩka ikini sitatxiti Isaeo tixini hĩtari iaxitikiri kanapiriini apisa —itxa Xesosi sãkire.

Apiatakari, Poiãori Pakini

24 Iuaĩkana Xesosi sãkirauata:

—Apaiaõkarauatakari poião. Koerekareri apiata. Apaka nitiritxi poião. Iauĩte apiata. 25 Apakatapitika apaiaõkarauatakari koerekareri imarotakiti iaõka imarotini. Iua atokokanera nitiritxi iua auĩte atoko inini. Apanakini akiritano nota “Peosepoo,” Satanasi inakori. Ininiã itakauãkatai hĩte hũuãka apia maerekati, kotxi nota anaakorirai hĩte —itxa Xesosi.

Kipatakori !Auari

(*Arókasi 12.1-3*)

26 —Ininiã kona ! hĩpĩkapena ninoa maerekati kamakani, kotxi nota kanapiriãkasaaki, kona kipatakori auapanika. Ikinika imarotaãkako. 27 Hĩtemoni ĩkanõka nimaasakapiretakiti, ikara nisãkire hãkiripoakatako aapokotxi nopini imakinika kãkiti imarotini ĩkapani. Uatxa hĩtemoninani nisãpiretakiti ãti õti ikinimanemoni hĩsãpiretako.

Kipa Apĩka?

(*Arókasi 12.4-7*)

28 Kona hĩpĩkapena hĩito okakani, kotxi ! iposotarina hĩxinire okinina. Hĩpĩkariko Teoso, kotxi iuanokara posotari iokanatinii hĩte, hĩito, hĩxinire pakini maerekani misiritikoãtaã. Iuara hĩpĩkako.

29 —Ipi kotipiriki ĩki poião, ãtika txineiro otanoka. Iuaritika hĩri iaxiti auakarĩ taretana ninoa. Imauritakaniãri, kona ãtika ipina. 30 Kipakinipa piãko pikiiã auakarĩ aua? !Pimarotari. Teoso imarotapitikari, kotxi iteene inĩkatai, ininiãkara ! hĩpĩkarauatape. 31 Kotipiriki ĩki poião, iuaritika Teoso taretari kotipiriki. Ininiãkara kona hĩpĩkarauatape. Kaiãopokori kotipiriki auiniã, iuaritika hĩte ĩki apiata, ininiã Teoso taretapitikai hĩte —itxa Xesosi.

Xesosi Tiretakani, Xesosi Manirekakani Pakini

(*Arókasi 12.8-9*)

32 Xesosi sãkirauatapanika:

—Apanakini apisatoõ hĩsãpiretiniãri: “Xesosi nakiti nitxaua nota,” iua atokokanerako nitxariko niri iaxiti auakarĩ apisatoõ: “Nota nakitipitikara iua,” nitxako —itxa Xesosi. 33 Hĩsãpiretiniãri apanakini: “Xesosi nakiti !

nitxaua nota,” iusaaki nisāpiretari niri iaxiti auakari: “Kona nota nakitini iua.”

Pinirekakiti Pirena

(Marko 8.34-35; Arókasi 12.49-53; 14.26-27)

³⁴ —Kona hīxinikapiri nota ĩkorapokoriti napokini neenamatzixi nixipokini ĩkapani. Kotxi kākiti auikari nisākire, ininiā eereka apanakini omanatana. Kona neenamatzixi xipokapanika, kotxi nota minari niposotiire maerekati nixipokini ĩkapani. ³⁵ Nota apokini xika imi omanatana iri, inoro pakini, kotxi ninoa auikari nisākire. Tīirotxi omanataro oimakiro, kotxi āto omanatano nota, āto tiretano nota. ³⁶ Iusaaki pinirimane pimokaiakarinarako itxauanako.

³⁷ —Poiāoka pitiretiniāno nota, apiata pitiretiniāna pinoro, piri pakini, kona erekari nimoianari pininiua. Apiata pitiretiniāna pamariteakori, kona erekari nimoianari pininiua. ³⁸ Nota kinirāo moianataka hinakasaaki, notakata hīsa. Himamīteenekakanisaakiri himisiritiko nota ĩkapani, ininiā ! apakata himoianatinino. ³⁹ —Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininiika txako Teosokata —itxa Xesosi.

Hīte Apakapakani Pirena

(Marko 9.41)

⁴⁰ Iuaīkana Xesosi sākiraauata:

—Kākiti hīte apakapakani, apakapano nota apaka. Nota apakapakari apakapari nota iokanatakari apaka. ⁴¹ Papakapiniāri Teoso sākire sāpiretakari, kotxi iua sāpiretari Teoso sākire, ininiā papakapari erekari Teoso sikakiti iua apakapakiti iaōka. Papakapiniāri atāo inakari kamakari, kotxi iua kamari atāo inakari, ininiā papakapari erekari Teoso sikakiti iua apakapakiti iaōka. ⁴² Pisikiniāri āparaā nimoianari poiāorimoni iātini ĩkapani, kotxi nimoianari itxaua, Teoso ĩkitxitapitikai pite —itxa Xesosi.

11

Xoāo Kapatxisareri Tikini Sikani

(Arókasi 7.18-35)

¹ Xesosi moianariakori tosi pakini isākire oerekini xipoka atoko, Xesosi sipe. Isa āti sitatxitimoni, eereka āti sitatxitimoni Kariréia tōpa itxaāpota oerekarauatakasaaki. Teoso sākire isāpiretari kākiti.

² Xoāo kapatxisareri, kateia āki auakasaaki, ikenakoenetari Xesosi kamakiti, ininiā iokanataro ipi imoianariakori Xesosimonikari.

³ Ininiā Xoāo txari imoianariakori:

—Hīpimaāri Xesosi: “Pitekani iaxiti ĩkari, kākiti iātapakiti pitxataua? Ātikani atxiīti aiātapakiti pitxataua?” hītxariko —itxa Xoāo.

Ininiā ninoa sipe. Ipimaārina Xesosi Xoāo sākire iaōka. ⁴ Ininiā Xesosi apakapapiretana:

—Hīkanapiriā Xoāomoni. Hīsāpiretari hīkenakotakiti, hātamatakitaki pakini. ⁵ Hīte atamatapekari mōsiāreti kōsiārepeka inini. Matīpokotakiti tīpokotapeka. Hātamatapekari maere matati erekapeka inini. Makenakokiti kakenakokipeka. Ipīkani ōkitikapekaua. Teoso iokanapirena erekari sāpiretapeēkaika minakati mauapikinitinimoni. Pakini hātamatapeka. Ikara hīsāpiretako Xoāomoni. ⁶ Kākiti iteene auikiniāri nota sākire, Teoso takari erekari iuamoni. Ikara nisākire hīsāpiretari Xoāo —itxa Xesosi.

⁷ Ininiā ninoa sipe. Isikasaakina, Xesosi sāpiretari Xoāo pirena itomaneri kākitimoni. Ia atoko itxa:

—Kipa ikai hite, Xoão kapatxisarerimoni h̄sikasaaki, āparaā makipakaniātaā iua auakasaaki? Hite sari iuamoni, kotxi ātitxika isākire aua. Teoso sākirenoka isāpireta. Ītima āpokaxitikasaaki, katsotati ipinimoni ipapīka, iuaīkana ipinimoni ipapīka inini atoko kākiti, kotxi isākire kita āti, isākire uatxa ātiāo, isākire katana iuaīkana ātiāo, itxaāpota isākire. Ikara atoko !itxa Xoão.

⁸—Kipa ikai hite Xoāomoni h̄sikasaaki? Hite sari iuamoni, kotxi !inirekari tiitxi, txineiro pakini. !Kakaroneri imāka, kotxi !ikaikota auītetxi aapoko. Auītetxi aapoko peereri mākaxi.

⁹—Kipa ikai hite iuamoni h̄sikasaaki? Hite sari iuamoni, kotxi iua Teoso sākire sāpiretakari itxaua. Atāopitika Teoso sākire sāpiretakari itxaua. Iua Xoão Teoso sākire sāpiretakari apiari.

¹⁰—Teoso sākire iōkatsopatakori kitxakapirīka txari: Niokanatariko nisākire sāpiretakari kākitimoni pite apisa, papokini isāpiretini ikapani, kākiti iposope inini ikapani.

¹¹ Atāopitikara. Ikinimane sauaki Xoão kapatxisareri apiatakari itxaua. Iuaritika Teoso auītetakari poiāori inakari api imarotariko Teoso kamakiti tīkane. ¹² Xoão auakasaaki Teoso auītetakani misiritaāka, kotxi kākiti kaneenamari naiatana ninoa. Ninoa nirekari ixipokinirina Teoso auītetxi ininiua ikorapokoriti. Uatxapiima auapanika ikara atoko inakari. ¹³ Xoão apokini apisapanika, ikinika Teoso sākire sāpiretakani, ikinika Teoso sākire iōkatsopatakani, sāpiretari Teoso auītetxi ininiua pirena. Xoão apokasaaki, iua apaka oerekari Teoso auītetxi ininiua pirena.

¹⁴—Kitxakapirīka Teoso sākire sāpiretakani sāpiretaua: Āti Teoso sākire sāpiretakari Eríasi atoko inakari apokako, itxana. Iuakara Xoão. Hāuikiniāri nisākire, hāuikariko iuara apokapeka.

¹⁵ Kakenakokii, ininiā h̄kenakotariko nisākire —itxa Xesosi.

¹⁶—Kanatokopa itxa kākiti ikorasaaki auakani? Amarini sarauatini atoko itxana ikorasaaki auakani. Ninoa amarini topāka tiitxi amotikoātaā. Apanakini amarini txitana apanakini amarini. Itxana: ¹⁷ “Ate xikarauata hite serenini ikapani, txamari !h̄serena. Kākiti pīkasaaki xikariti axikareta, txamari !h̄itxiapata.” Ninoa amarini sarauatini atoko itxana ikorasaaki auakani, ¹⁸ kotxi Xoão kapatxisareri apoka ikorapokoriti. Itakanapari inikini Teoso imisākiretini ikapani. !Iātari ovaā. Iuaritika hite txari: “Maerekati mata-matakoti auaītotari Xoão,” h̄itxari. ¹⁹ Nota h̄itari iaxitikiri apoka ikorapokoriti. !Nitakanapari ninikini. Ikiniōtika ninipokota. Niātari ovaā. Ininiā hite txari: “Iua kiki ixori. Poātakari iua. Iua moianatana txineiro apakapakani, kākiti maerekati kamakani,” himisākirepirenātano. Kimaroreri atāo inakari kamari erekarinani. Kākiti atamatakasaakiri ikamakiti, imarotari kimaroreri atāo inakari ininiua —itxa Xesosi.

Sitatxi Auakani Teoso Sākire Mauiākani
(Arókasi 10.13-15)

²⁰ Ininiā Xesosi pinitana Korasiī sitatxiti auakani, Petsáita sitatxiti auakani pakini, kotxi kaiāopokori iposotiire ikamapeka iuaātaā, iuaritika kona itakanaparina maerekati. ²¹ Xesosi txana ninoa:

—Kākiti Korasiī auakani himisiritaākako. Kākiti Petsáita auakani hite apaka misiritaākako. Kitxakapirīka Txiro, Sitoō pakini sitatxitikini kamari maerekati, ininiā Teoso xipokana ninoa arikatxiā. Ninoa atamataākamariko nota posotiire hite atamatiniri atokokana, ininiā ninoa mākatariko sako mata. Itakamariko atapani iitoāna. Ikara atoko ininiā, ninoa oerekari maerekati itakanapinina. ²² Nisāpiretai hite ia: “Kākiti misiritiko ōtisaaki, Txirokini, Sitoōkini pakini misiritaāka poiāo. Hite apiata.” ²³ Hite Kapanaoōkinipekana, Teoso ākiri aua h̄tekata. Hite itikapekari ito posotiiretxi

iaxitikiri. Txamari hōkakatapeēkako maerekani misiritikoōtaā. Nikamakiti hītemoni Sotoma auakani sauaki nikamaākamako, kona ninoa xipokamako. Auapanikamanako. ²⁴ Ininiā nitxai hīte: “Himisiritikosaaki, apiata himisiri-taāka. Poiāoka Sotomakini misiritaāka,” —itxa Xesosi.

Teoso Imarore Apakapakani
(Arókasi 10.21-22)

²⁵ Iuasaaki Xesosi misākiretari iri:

—Niri, pitixine auakani auīte pitxaua. Uai ikini itixiti auakani auīte apaka pitxaua. Peerekai pite, kotxi na poerekari pimarore kākiti kimarorerinimoni, iuikakanimoni. Pite oerekari pimarore kākiti poiāorinimoni, miuikakanimoni. ²⁶ Ari niri, ikara atoko pinireka. Ikara atoko papokaerekata —itxari iri.

²⁷ Eereka imisākiretari kākiti:

—Niri sikapekano ikinika. Kākiti !imarotano nota Teoso ākiri nininiua. Nirinokara atāo imarotano nota. Apaka kākiti na atāo imarotari niri. Notanokara imarotari niri, kotxi iua ākiri nitxaua. Kākiti nirekiniāri imarotiniri niri, nota oerekari niri iuamoni.

²⁸ —Iteene minari atoko itxa himaerekani. Hinireka hītakanapiniri iua, txama !hīposota hītakanapiniri. Hīsāpakiniā himaerekani xika, hina notamoni hītomatini ĩkapani. Iuasaaki nimakatzakari himaerekani.

²⁹ Hītakariko nipaniātakiti hākixinireē. Hāpaiaōkariko nota pirena. Erekapitikari hāpaiaōkiniri ninirekakiti, kotxi kona kaneenamano. Kona nota napetari kākiti. Niuikiniua !auari. Ikara atoko ininiā, hīxinire tomatapitika. ³⁰ Hīposotapitikari nipaniātakiti hīkamini, notakata hīparīkauatiniā. Nipaniātakiti !kasāpaniri. Kona kamimari. Peerekari nipaniātakiti —itxa Xesosi.

12

Tomatiko Ōti Pirena
(Marko 2.23-28; Arókasi 6.1-5)

¹ Mapaōti atoko tomatiko ōtisaaki, Xesosi imoianariakorikata napaāpota triko takikoōtaā. Inatxitana. Inapaāpotakasaakina, imakatzakarona triko iki mapaki inikinirona ĩkapani. ² Pariseoakori ikara itikasaaki, itxarina Xesosi:

—Patamata. Pimoianariakori kamari ate mauritakiniti. Ninoa parīkauata tomatiko ōtisaaki —itxana.

³ Ininiā Xesosi:

—Atxiīti kona hātatsopatapanikari Taviini kamakiti imoianariakorikata kitxakapirīka inatxitakasaakina? ⁴ Iua ĩroā Teoso misākiretikoōtaā. Imoianariakorikata inikari komiri Teosomoni sikakori. Sasetotxinokara auiritaāka iua komiri inikinina. Apanakini !auiritaāka inikiniri. Iuaritika ninoasasetotxiakori tiretari Taviini, imoianariakori pakini inatxitakasaakina.

⁵ Atxiīti kona hātatsopatapanikari Moisesini iōkatsopatakiti. Iua auiritari sasetotxi parīkauatini tomatiko ōtisaaki, Teoso misākiretiko aikotiā. Iuasaaki ninoa !ikamari maerekati, kotxi iparīkauatana Teoso misākiretiko aikotiā. ⁶ Atāo nisāpiretai, hīte paniātakiti poiāori. Nota paniātakiti apiari. ⁷ Teoso sākire iteene hāuikasaaki, kona hāpoītana kākiti maxikatiīka, kotxi Teoso sākire txari: Nota nirekari apanakini hītiretini. Pimatiretakanisaakiri āti, !apakata pisikarautini notamoni. Iuasaaki kona ninirekari pisikakiti, itxa Teoso kitxakapirīka.

⁸ —Nota hītari iaxitikiri posotari ikinipoko ninireēkiti nikamini tomatiko ōtisaaki, kotxi Apiananiri nitxaua —itxa Xesosi.

Motĩkauakotakari Pirena
(Marko 3.1-6; Arókasi 6.6-11)

⁹ Xesosi ikara inaãka atoko, isa aiko Xoteoakori apotiitiniãtaãua. ¹⁰ Iuaã aua kiki motĩkauakotakari. Iuaã aua apaka pariseoakori Xesosi kinirão apoĩtaka inakani tomatiko õtisaaki iparĩkauatini xika. Ninoa amanaãri Xesosi:

—Atauako apakata atxiĩti tomatiko õtisaaki, erekape pitxĩkitakiniri kãkiti? — itxarina.

¹¹ Ininiã Xesosi pimaãna:

—Hĩpira soti auĩte tomatiko õtisaaki aariko ãki irikiniã, himakatzakatari? Atãopitikara Teoso sãkire auiritapitikari kãkiti makatzakiniri ipira tomatiko õtisaaki. ¹² Soti auĩte poiãori, kãkiti apiari. Ininiã Teoso sãkire auiritapitikari tomatiko õti erekape nitxĩkitakiniri kãkiti —itxa Xesosi.

¹³ Ininiã itxari kiki motĩkauakotakarimoni:

—Poerekauakotauako —itxa.

Oerekauakotakasaakiaua, erekapeka itxa, ipini uako atokopeka itxa.

¹⁴ Iuasaaki pariseoakori sipeka atoko, ninoakakarika misãkiretakakauana:

—Natokopa atxatari Xesosi aõkini? —itxakakana.

Nitiritxi Teoso Mereẽkiti

¹⁵ Xesosi imarotakasaakiri ninoa okaenetiniri iua, iuasaakipeka Xesosi sipeka. Itomaneri kãkiti sa iuakata. Ikinika amianatakani erekapeka itxĩkitaka. ¹⁶ Xesosi ! auiritana isãpiretinirina ikamakiti apanakinimoni.

¹⁷ Ikara atoko itxa Xesosi, Teoso sãkire sãpiretakari Isaía inakori sãpiretakiti iaõka apokini ãkapani. Ia atoko itxa Teoso Isaíamoni:

¹⁸ Ia ninitiri nimereẽkiti. Ia nitiretakiti napokaerekatakiti. Nota sikariko Erekaru Matamatakoti iuamoni. Iua sãpiretariko nota sãkire Xoteo minakonimoni.

¹⁹ !Kataparasãkireri ahoa kimaporiti ãtiniãpo isãkirauatakasaaki. !Ineenamauata. !Itxitakaka apanakinikata kãkiti napiniãtaã.

²⁰ Apanakini Teoso sãkire auĩãkani oiõkapeta ãkixinireẽna. Itapara !auari. Ninoa aanaia katxitoãkari atoko itxana. Iuaritika kona imapirinikari iua aanaia katxitoãkari. Iua atokokana kona ixipokari iua sãkire auĩãkani mataparani. Itiretana. Apanakini Teoso sãkire auĩãkani, kona iteene auikari Teoso sãkire. Ininiã ninoa tirikapu iopinikare xapitikiri atoko itxana, iuaritika kona iua oakari. Iua atokokana kona ixipokana Teoso sãkire auĩãkani. Ikamaãpotari erekari, erekarinoka kãiatini ãkapani.

²¹ Xoteo minakaniua auikariko iua sãkire.

Itxa Isaía sãpirena kitxakapirĩka.

Maerekani Matamatakoni Omitikiko
(Marko 3.20-30; Arókasi 11.14-23)

²² Iuasaaki kãkiti anikari kiki maerekati matamatakoti auãĩtotakiti Xesosimoni. !Isãkirauata. Mõsiãreti itxaua iua, maerekati matamatakoti xika. Xesosi erekapeka txĩkitakari iua. Iuasaaki kõsiãrepeka, kasãkirepeka itxa. ²³ Iuasaaki kaiãopokori kãkiti iuaã tsorĩkaãta. Ininiã ipimaãkakauana:

—Atauako ia kiki aãũte Taviini apika mekanirikani? Atxiĩti Teoso iokanatakitikani? —itxana.

²⁴ Pariseoakori ikara ikenakotakasaakina:

—Konapitini. Maerekati matamatakoti auĩte Peosepoo inakori sikari iposotiire Xesosimoni maerekati matamatakoti omitikini ãkapani —itxana pariseoakori.

²⁵ Xesosi imarotari ikara ixinikakitina. Ininiã itxa Xesosi:

—Kãkiti tixine auakani ninoakakarika inaiatakakiniãuana, ixipokakakauana. Iarikapenako. Iua atokokana kãkiti aapokoã auakani inaiatakakiniãuana, ixipokakakauanako. ²⁶ Iua atokokana Satanasi

nitiriakori, ninoakakarika inaiatakakiniãuana, ixipokako Satanasi tapara. ²⁷ Hïte sãkire, Peosepoo sikari iposotiire notamoni maerekati matamatakoti nomitikini ïkapani. Ininiã nota pimaã: “Kipa sikari posotiiretxi hïte moianariakorimoni, maerekati matamatakoti omitikinina ïkapani?” Himoianariakori sãpiretai: “Teosonoka sikari posotiiretxi maerekati matamatakoti omitikakanimoni.” ²⁸ Teoso posotiireẽ nomitikari maerekani matamatakoni. Ikara atoko ininiã, Teoso oerekai iua apokapeka hïtemoni hïauïte inini ïkapani.

²⁹ —Kiki pataparari iua aapoko auiniã, kona kiïtiriri ïroã ïtiriuatini ïkapani. Kiïtiriri iaxirikiniãri iua kiki pataparari, iusaakiika apakata ïtirïkiniri itii.

³⁰ —Notakata maparïkauatakani omanatano nota. Imamoianatakaniãno, inirekari niparïka ixipokini. ³¹ —Ininiã nisãpiretai. Apakata Teoso makatxakiniri ikinipoko maerekati kãkiti kamakiti, imaerekani Teoso imisãkirepiretini pakini. Txamari Erekari Matamatakoti misãkirepiretakari maerekani makatxakiko kona auari. ³² Kãkiti misãkirepiretiniãno nota hïtari iaxitikiri, eereka amanainiãri Teoso ikara imaerekani imakatxakini, ininiã Teoso makatxakapitikari. Kãkiti misãkirepiretiniãri Erekari Matamatakoti, ! kimakatxakikori ikara maerekati ikamakiti —itxa Xesosi.

Aamina Iri Pirena
(*Arókasi 6.43-45*)

³³ Ininiã Xesosi sãkirauata iuaïkana pariseoakorimoni:

—Aamina atoko hïtxa. Aamina erekari ininiã, iri erekari apaka. Aamina maerekati ininiã, iri apaka !erekari. Patamatiniãri amãtiri, pimarotari imina. ³⁴ Nimarotai hïte. Imini katsiiri atoko hïtxaua hïte. Hïte maerekati kamakanii. Ininiã !hïposotari erekari hïsapiretini, kotxi hãkixinire !erekari. Hinamaã hïsapiretakiti hãkixinireẽ potoriãkari itxaua. ³⁵ Kãkiti erekari ininiã, erekarinoka isãkire, kotxi iua ãkixinireẽ erekarinoka aua. Kãkiti maerekati ininiã, isãkire maerekati apaka, kotxi maerekatinoka auari iua ãkixinireẽ. ³⁶ Atão nisãpiretai hïte. Ikinipoko kãkiti sãkire Teoso atamakaerekata xipokatxi õtisaaki. Iusaaki Teoso mereẽri kãkiti misiritiko. Maxikatïka hïsapiretakiti kona apakata. Kona iua potxitari. Ininiã iusaaki iua pimaã: “Kinirepa ikara atoko pisãkire?” itxako. ³⁷ Pisãkire ereka ininiã, ixika !auari Teoso misiritinii. Pisãkire maerekati ininiã, pisãkire maerekati xika Teoso misiritai —itxa Xesosi.

Pariseoakori Nirekari Xesosi Oerekiniri Iposotiire
(*Marko 8.11-12; Arókasi 11.29-32*)

³⁸ Ætikaka kaiõkatsoparerini, pariseoakori pakini txari:

—Koerekareri, takaõtxikari Teoso posotiire poerekaua ate, aãtamatiniri ïkapani, Teoso iokanatinii ïkorapokoriti aimarotini ïkapani —itxarina.

³⁹ Xesosi apakapapiretana:

—Kãkiti uatxarini !erekana. Itakanaparina Teoso. Hïte nirekari noerekinii Teoso takaõtxikare, iposotiire. Konapitini. Kona noerekai hïte. Kitxakapirïka Teoso sãkire sãpiretakari Xonasini inakori auakasaaki, Teoso kamari posotiiretxi. Ikara atoko inakari posotiiretxi Xonasini auakasaaki, iuaïkana ikamapanikariko. Iua posotiiretxi Teoso takaõtxikare itxapanikaua hïte ïkapani. Iua takaõtxikarinoka Teoso takaõtxikare hïte ïkapani. ⁴⁰ Xonasi kaikota ximaki mitari tikako ãki ipi ãti pakini õti. Iua atokokanerako hïtari iaxitikiri napako ipi ãti pakini õti ipïkani auiniãtaã.

⁴¹ —Itixi xipokini õtisaaki, kãkiti Nïnivi sitatxiti auakani sãkirauatapitikako. Ninoa txai hïte: “Kona erekai hïte, kotxi !hïtakanapari himaerekani. Ate takanapari amaerekani Xonasi sãkire akenakotakasaaki,” itxanako ninoa.

Uatxa uai aua h̄ite apisatoõ Xonasi apiatakari. Imisãkiretai h̄ite, iuaritika kona !h̄itakanapari himaerekani.

⁴² —Xipokatxi õtisaaki, sito Sapaa auakani aūite sãkirauatapitikako. Oa õtakoxiti auakaro, iuaritika osari Saromãomoni imatire okenakotini ãkapani. Uatxa apopeka Saromão apiatakari, iuaritika h̄ite !auikari nota sãkire —itxa Xesosi.

Maerekati Matamatakoti Kanapiriini Pirena
(Arókasi 11.24-26)

⁴³ Iuaãkana Xesosi sãkirauata:

—Maerekati matamatakoti kiki auaãtotakiti takanapakasaakiri iua kiki, iua maerekati matamatakoti saãpota ãparaã makipakaniãtaã, ikaikotiniãtaã inisini ãkapani, txamari !apokari. ⁴⁴ Ininiã itxa: “Nikanapiriãpiriko mitxi nauinimoni nipotorikinimonikari,” itxa iua maerekati matamatakoti. Ininiã ikanapiriã. Apokasaaki, ãti iuaã auakari !auari. Oeretapeẽkaika. Iposope ãti auini ãkapani. ⁴⁵ Ininiã apana apikomoni setxi pakini maerekani matamatakoni apia maerekanitakani. Imakinikana aua iua kiki ãtoã. Ininiã iua kiki mitxi poiãoka imaerekani, eereka apia maerekanita. Ikara atoko itxako kãkiti uatxarini maerekani —itxa Xesosi.

Xesosi Inoro, Itariakori Pakini
(Marko 3.31-35; Arókasi 8.19-21)

⁴⁶ Xesosi sãkirauata itomane kãkitimoni, inakasaaki oãpoka inoro, itariakorikata. Iporikiti auana. Ipãkapiretarina. ⁴⁷ Ininiã ãti txari Xesosi:

—Pinoro, pitariakori ãkiraã iporikiti auana. Inirekakarina imisãkiretinii pite —itxa.

⁴⁸ Ininiã Xesosi:

—Keropa ninoro? Kiripa nitariakori? —itxa Xesosi.

⁴⁹ Ininiã imioakari imoianariakori:

—Hãtamata. Uai aua ninoro, nitariakori pakini. ⁵⁰ Niri iaxitikiri nirekaãkiti kamakanira, ninoara nitariakori, nitaroakoro, ninoro txaua —itxa Xesosi.

13

Katakareri Pirena
(Marko 4.1-9; Arókasi 8.4-8)

¹ Iua õtisaaki Xesosi takanapari iua aapokotxi. Ipoa tiniã isa. Iuaã ipoa tiniã iitopãka. ² Iuaã auana itomaneri kãkiti. Apotiitauana iua takote. Ininiã kanaua ãki iereẽtaua, topãka itxa oerekarauatini ãkapani. Ninoa kaikota imiriã. ³ Ininiã itori sãpirenatxi atão inakari oerekiko isãpiretana ninoa Teoso imarotinina ãkapani.

Ia atoko itxa:

—Katakareri potorika itakarauatini ãkapani. ⁴ Takari iki itakaãpotakasaaki, okaãpotakasaaki, ãtikaka irika kimapori tiniãpo. Kotipiriki apoka. Inikari imakinika. ⁵ Apanakini irika kai auiniãtaã. Poiãoka kipatxi auari, ininiã mokatanitika ipitxaka. ⁶ Txamari, atokatxi papatakari inakasaaki, arikari iua takari. Otxiaroka, kotxi kona kakotsari. ⁷ Apanakinipekana irika aanaia auiniãtaã. Ininiã aanaia aneẽ takari takote. Aãpitsa iapinokari takari, oka txari. ⁸ Apanakinipekana irika kipatxi erekariãtaã. Ininiã iriuata. ãtiãtaã ãti takari iriuata seã oki pakini. ãtiãtaã takari iriuata sesẽta oki pakini. ãtiãtaã ãti takari iriuata trãta oki pakini. ⁹ Kakenakokii, ininiã h̄ikenakotariko nisãkire —itxa Xesosi.

Kãkiti Mimarotakiniti Xesosi Sãpiretini Pirena
(Marko 4.10-12; Arókasi 8.9-10)

¹⁰ Imoianariakori apoka Xesosimoni. Ipimaãrina:

—Kinirepa sãpirenatxi atão inakari oerekiko pisãpiretari kãkiti? —itxarina.

¹¹ Ininiã Xesosi:

—Kãkiti xinikiniãri Teoso auõtetxi ininiãua pirena, auapitika kaiãopokori ninoa mimarotakiniti, kotxi Teoso kona oerekana ninoa. Teoso oerekai hïte ninoa mimarotakiniti. ¹² Teoso sãkire auakiti, iua sãkire kïpitakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makïpitakati, imarore xapiti iuamoni auakari makatxakaãkako.

¹³ Nisãkirauatakasaaki kãkitikata, nisãpiretana sãpirenatxi atão inakari oerekiko, kotxi kokiri kãkiti, iuaritika !atamatarì Teoso kamakiti. Kakenakokiri kãkiti, iuaritika !imarotari Teoso sãkire. ¹⁴ Ininiã apokaepka Isaia sãkire kitxakapirïka, kotxi iua sãpiretari Teoso sãkire:

Hïkenakotapiikamari nisãkire, iuaritika !himarotari. Hïtikapiikamari nikamakiti, iuaritika !himarotari,

¹⁵ kotxi ! hinirekari himarotiniri atão inakari. ! Hinirekaikari nisãkire hïkenakotini. ! Hinirekaikari nikamakiti hãtamatinì. Hinirekaãkamariko, hãtamatariko nikamakiti. Hinirekaãkamariko, hïkenakotamariko nisãkire. Hinirekaãkamariko, himarotamariko nisãkire. Hïkanapiriaãkamako notamoni, nimaktxakamariko himaerekani,

itxa Teoso.

¹⁶ —Hïtepekana, Teoso sikari erekari hïtemoni, kotxi hõki atamatapitikari iua kamakiti. Hïkenakoki kenakotapitikari iua sãkire. ¹⁷ Atão nisãpiretai. Itomaneri Teoso sãkire sãpiretakani, apanakini kiki atão inakari kamakani pakini kitxakapirïka nirekari atamatiniri hïte atamatakiti, txamari kona atamatarina. Inirekarina ikenakotininirina hïte kenakotakiti, txamari kona ikenakotarina —itxa Xesosi.

Katakareri Pirena Oerekiko
(Marko 4.13-20; Arókasi 8.11-15)

¹⁸ Xesosi sãkirauanãtapanika:

—Hïtakaõtxikari ikara sãpirenatxi atão inakari oerekiko, katakareri pirena. Noerekai ikara. ¹⁹ Kãkiti kenakotakasaakiri Teoso auõtetxi ininiua pirena, imimarotakaniãri ikenakotakiti, kimapori kãkiti katxaratakiti ikotaxiti atoko itxa iua ãkixinire, kotxi Satanasi apoka iuamoni. Imaktxakari Teoso sãkire iua ãkixinireẽ apokakari. Teoso sãkire takariki atoko itxa.

²⁰ —Takariki kai auiniãtaã iriãkari, Teoso sãkire ipoxokoniritika apakapakari atoko itxa. ²¹ Itxama kona okanani aua, kotxi kona kakotsari. Omatiko inakasaaki, inapetiko inakasaaki, Teoso sãkire auikini xika, itakana-pari Teoso sãkire auikini.

²² —Ãti kãkitipekana kenakotari Teoso sãkire, txamari ixinikapikari tiitxi, nipokori, iparïka pakini. Ikinipoko ixinikapika, ininiã maerekaxiniretinoka itxa. Txineiro ipotxitini xika !inirekaikari Teoso sãkire. Takariki aanaia auiniãtaã iriãkari atoko itxa iua. Takari mariti atoko itxa iua ãkixinire.

²³ —Ãti kãkitipekana ikenakotakasaakiri Teoso sãkire, atão iua auikari. Iua ãkixinire kipatxi erekari atoko itxa. Takari mininiua atoko, iua kãkiti minari atxiiti seï pakini kãkiti Teosomoni isãkire auikinina ïkapani. Atxiiti iminari sesëta pakini kãkiti. Atxiiti iminari trïta pakini kãkiti Teosomoni isãkire auikinina ïkapani —itxa Xesosi.

Katsotati Ahoisi Atoko Inakaro

²⁴ Iuaïkana Xesosi sãpiretari ãti sãpirenatxi atão inakari oerekiko. Ininiã ia atoko itxa:

—Teoso auõtetxi ininiua ia atoko itxa. Teoso katakareri atoko itxa. Iua katakareri takari erekari takariki ikikioteẽ. ²⁵ ãti ïkanõkati ikinimane

imakasaaki, imokaiakari apoka. Itakaro katsotati ahoisi atoko inakaro ahoisi sauaki. Kona !otxa. Iposo atoko ĩkorape itxa. ²⁶ Takari aneēka atoko, oriyata. Iuasaaki kākiti imarotapekari katsotati ahoisi atoko inakaro auapeka. Kona otxa. ²⁷ Ininiā katakareri nitiriakori apoka iauĩtemonina. “Auĩtetxi, pite takaro takariki erekaro. Nanipa oina katsotati?” itxana ninoa.

²⁸—“Amokaiakari takari,” itxa.

—“Pinirekatari amaporokiniri?” itxana initiriakori.

²⁹—“Kona. Katsotati himaporokiniā, atxiĩti himaporokaro nitakare apaka.

³⁰ Hĩtakanapari imakinika aneinina ĩkapani. Oamikosaakirako, omakatzakaāka. Ininiā iuasaakiko nipaniātaiko hĩte: ‘Merepanika himakatzakaroko katsotati. Hāpotiitaro. Xaminamoni oka inaākako. Iposo atoko hāpotiitari ahoisi. Hĩtakari nikiena nĩkatiko aikoti āki.’ ”

Mostata Pirena

(*Marko 4.30-32; Arókasi 13.18-19*)

³¹ Iuaĩkana Xesosi oerekari āti sāpirenatxi atāo inakari oerekiko. Ininiā ia atoko itxa:

—Teoso auĩtetxi ininiua, kiki takiniro mostata iki ikikioteē atoko itxa.

³² Mostata iki axapitiki. Apanakini takariki apiata, iuaritika oaneēka atoko amananiikaro. Aamina otxaua. Ininiā kotipiriki ina. Ikamari ikoa okatiā — itxa Xesosi.

Tirekakari Pani

(*Arókasi 13.20-21*)

³³ Xesosi iuaĩkana sāpiretari sāpirenatxi atāo inakari oerekiko. Ininiā ia atoko itxa Xesosi:

—Teoso auĩtetxi ininiātaāua ĩkorapokoriti ia atokokana itxa. Sito kosekari tirekakari pani. Okoketari axapiti tirekakari pani kaiāopokori triko panikata, āparaākata. Eereka ikinika ipe tirekaāpota otxa.

Sākiretxi Atāo Inakari Oerekiko

(*Marko 4.33-34*)

³⁴ Xesosi sākirauatakasaaki kākitekata, isāpiretari sāpirenatxi atāo inakari oerekiko. Ikara sāpirenatxinokara isāpiretari kākiti. ³⁵ Ininiā kitxakapirĩka Teoso sākire sāpiretakari sāpiretakiti apokapeka, kotxi iua txari:

Nisākirauatakasaaki kākitekata, nisāpiretari sāpirenatxi atāo inakari oerekiko. Itixi kamikosaakipanika aua kākiti mimarotakiniti. Ikara noerekako kākitimoni, itxa Teoso sākire.

Xesosi Sāpiretari Katsotati Pirena

³⁶ Eereka Xesosi takanapana ninoa kākitypokoni. ĩroā aapokotxi. Imoianariakori apoka iuamoni. Itxana:

—Poerekaua ate ikara sāpirenatxi atāo inakari oerekiko, katsotati pirena, mixikanani pisāpiretakiti. Ate !imarotari —itxana.

³⁷ Ininiā Xesosi:

—Hĩtari iaxitikiri, iua erekari oki taākari itxaua. ³⁸ Itixi iua kikio atoko itxa. Teoso auĩtetakani takariki erekari atoko itxana. Kākiti Satanasi naki-tiakori iua katsotati atoko itxana. ³⁹ Katsotati takakari Teoso nakitiakori mokaiakari itxaua. Satanasi itxaua. Itixi xipokini ōti iua takari amiko ōti atoko itxa. Teoso nitiriakori iaxitikini ninoa takari amakani atoko itxana.

⁴⁰ Iua katsotati apotiitaāka, xaminamoni oka inaāka. Iua atokotxikana inaāka itixi xipokini ōti. ⁴¹ Hĩtari iaxitikiri iokanatanako initiriakori itiximoni.

Apotiitarinako maerekati oerekakani. Apotiitarinako ikinimane maerekati kamakani. ⁴² Iposo atoko Teoso nitiriakori okana ninoa xaminamoni. Iuaā iteene itxiapatana. Akatsatsiriĩtauana. ⁴³ Iuasaaki atāo inakarinoka

kamakani aua iotximerena Teoso auñtetxi ininiãtaãua. Atokatxi iotximere atoko itxa ninoa iotximere. Kakenakokii, ininiã hñkenakotariko nisãkire —itxa Xesosi.

Txineiro Kipatakoru Pirena

⁴⁴ —Teoso auñtetxi ininiua, txineiro itomanero kipatakoru atoko itxa. Oa txineiro kipataãka kikiu. Ñti õti kiki napaãpotakasaaki, apokaro, ininiã iuaãkana ikipataro. Iteene ipoxokoniuata, ininiã ivẽtxitari ikinika itii, iua kikiu iamotini ñkapani. Eereka sa itxa iua kikiu iamotini ñkapani. Ikara atoko itxa Teoso auñtetxi ininiua.

Pérora Inakori Pirena

⁴⁵ —Teoso auñtetxi ininiua, pérora iamotakari atoko itxa. Iua nitari pérora apia erekari. ⁴⁶ Pérora iteene erekari apokiniã, ikinika itii ivẽtxita iua pérora iamotini ñkapani.

Hetxi Pirena

⁴⁷ —Teoso auñtetxi ininiua hetxi ipoaã taãkari atoko itxa. Ikini sereti ximaki apotiita hetxi. ⁴⁸ Ixãpokasaaki kaiotaroriti kosekaãpotari itakoãmoni. Iuaã kaiotaroriti iitopãka. Imereërina ximaki. Ximaki erekari kotariã itaka. Kãkiti maniãkiniti mapara oka. ⁴⁹ Xipokatxi õtisaaki ikara atoko itxa. Teoso nitiriakori mereëriko kãkiti. Mapara itakarina erekarini. Mapara itakarina maerekani. ⁵⁰ Ininiã xaminamoni okanaço kãkiti maerekati kamakani. Iuaã itxiãtana. Akerakitatsiriãtauana, kotxi patsiiri.

Kitxakapirika Oerekakori, Amaneri Oerekakori Pakini

⁵¹ Xesosi pimaãna imoianariakori:

—Hñte imarotatari ikara atoko inakari nisãpiretakiti? —itxa.

—Ari, aimarotapitikari —itxarina.

⁵² Ininiã Xesosi:

—Kaiõkatsopareri oerekikosaaki Teoso auñtetxi ininiua imarotini ñkapani, imarotari amaneri oerekakori, apaka kitxakari oerekakori. Kaapokori atoko itxa. Iua kaapokori makatxakari apokaerekatakiti mareta ãki inñkatakiti. Amaneri, kitxakari apaka imakatxaka.

Nasaree Auakani Kona Auakari Xesosi Sãkire (Marko 6.1-6; Arókasi 4.16-30)

⁵³ Ikara sãpirenatxi atão inakari oerekiko ixipokapiretaka atoko, Xesosi sipe. ⁵⁴ Ikanapiriã Nasaree sitatxitimoni. Ininiã oerekarauata aiko Xoteoakori apotiitiniãtaãua. Ininiã kãkiti tsorñkaãta isãkire ikenakotakasaakina. Itxana:

—Kiripa sikatari iua imarore? Kiripa sikaposotiiretari iua? ⁵⁵ Aapokotxi kamakari ãkiri iua. Inoro Maria. Itariakori Txiako, Xoão, Simão, Xotasi pakini. ⁵⁶ Itaroakoro uai apaka aua. Nanipa apaiaõkari ikinika imarore? —itxana.

⁵⁷ Ininiã kona inirekarina iua. Ininiã Xesosi txari:

—Teoso sãkire sãpiretakari paxitaãka, txamari Teoso sãkire sãpiretakari itixineë auakasaaki, inirimane sauaki auakasaaki, !ipaxitaãka. Isãkire !auikaãka —itxa Xesosi.

⁵⁸ Ininiã Xesosi kona kamari itori Teoso posotiire iuaã Nasaree sitatxiti auakani ñkapani, kotxi kãkiti iuaãkini !auikari isãkire.

14

Xoão Kapatxisareri Ipinini Pirena (Marko 6.14-29; Arókasi 9.7-9)

¹ Iuasaaki Erotxi Kariréia auakani auíte txaua. Iuasaaki ikenakopiretari Xesosi pirena. ² Iuasaaki itxana initiriakori:

—Iua Xoão kapatxisareri ipĩpekariika õkitapekaua. Iuakara Xesosi txaua. Ininiã uatxa apiata iposota ikamini —itxa Erotxi.

Txamari Xesosipitikara. Kona Xoãoni iua. ³ Mitxi Erotxi paniãtari Xoão kapatxisareri iaxirikiko, itari Piripi ãtanoro xika. Ouãka Erotxia. Oomanatari Xoão, ininiã itakaãka kateia ãki. ⁴ Mitxi Xoão kapatxisareri txari Erotximoni:

—Kona erekari pitari ãtanorokata pisirĩkini. !Apakata pikamakiti —itxa.

⁵ Ininiã Erotxi nirekamari okiniri Xoão, iuaritika kona okari, kotxi ipĩkana Xoão sãkire auĩãkani. Ninoa uãkatari Xoão, Teoso sãkire sãpiretakari ininiua.

⁶ Erotxi kamari kiiniri auini õti pirena. Erotxia ãkero serena iua Erotxi apisatoõ, ikemaĩtxitakini apisatoõ pakini. Ininiã oserenini kamari ninoa poxokoniuatini. ⁷ Ininiã Erotxi poxokoniuatakasaaki itxa:

—Nisikai imakinika pinireẽkiti pitemoni —itxaro oa.

Ininiã osari onoromoni. ⁸ Onoro nirekari Xoão okiko, ininiãkara oamanaãri Xoão kii prato nopini. Ininiã otxari Erotximoni:

—Xoão kapatxisareri kii ninireka prato nopini.

⁹ Ininiã Erotxi kona erekaxinireri. Kipa ikama? Kotxi ikinimane ike-maĩtxitakini kenakotari isikaenetiniri oa nirekakiti oamoni. Ininiã iua paniãtari oa nirekakiti sikiko oamoni. ¹⁰ Ininiã iua iokanatarari sotatoakori kateiamoni Xoão kii tsotakiko ãkapani. ¹¹ Ininiã ninoa minari ikii prato nopini. Isikarina oamoni. Oa sãkari onoromoni. ¹² Eereka Xoão moianariakori sari kateiamoni. Ninoa anikari ãto akauarimoni. Iuaã ikatarina. Eereka ninoa sari Xesosimoni. Isãpiretarina Xesosi Xoão ipinini pirena.

*Sĩko Mio Kãkiti Xesosi Sikakienatini
(Marko 6.30-44; Arókasi 9.10-17; Xoão 6.1-14)*

¹³ Xesosi kenakopiretakasaakiri Xoão okiko, ipotorika kanauaã. ãtiãtaã iuanani auini nire isa, txamari itomaneri kãkiti imarotari Xesosi sinimoni. Ininiã itakanaparina sitatxi. Isana imiriĩ iua sinimoni. ¹⁴ Iua kanĩkiĩtakasaaki, atapari kãkiti apokaãpotini. Ininiã iua amonĩkana ninoa. Imakananitana amianatakani.

¹⁵ Mapiãpeka inakasaaki, imoianariakori apoka iuamoni. Itxarina:

—Mapiãpeka. Uai aapokotxi mauakaniãtaã, ininiã uai nipokori !auari. Piokanatarari kãkiti aapokotximoni, ininiã iamotarina nipokori iuaãtaã —itxana imoianariakori.

¹⁶ Xesosi apakapapiretana:

—Nota kona iokanatanana isinina. Hĩtekarako sikakienatana ninoa —itxa Xesosi.

¹⁷ Ininiã ninoa:

—Komiri ipi ipi ãti pakininokara aua atemoni. Ipi ximaki apaka aua. ! Apakata —itxana.

¹⁸ Ininiã Xesosi:

—Himina uai notamoni —itxa.

Ininiã imoianariakori minari Xesosimoni. ¹⁹ Eereka iua paniãtari kãkiti xiti topãkini. Eereka ikosekari komiri sĩko, ximaki ipi pakini. Ininiã iua ionakaãta iaxiti. Itxari:

—Niri pisikakiti peerekari —itxa.

Ininiã imaxinĩkaãpotari. Isikaãpotana imoianariakori. Ninoa sikaãpotana kãkiti. ²⁰ Ikinikana nipokota. Ikinimane:

—Kamitopekaua ate —itxana.

Eereka imoianariakori apotiitari itetakori. Ininiã xãpokaka itxarina tosi kotari. ²¹ Iuasaaki sĩko mio kikiãkini nipokota. Sitoãkini, amarini pakini nipokota apaka.

Xesosi Ipoa Nopini It̄pokotini
(Marko 6.45-52; Xoão 6.15-21)

²² Eereka ipaniātana imoianariakori kanauaã iereētiniua iua apisa ĩpiriātiniina ĩkapani. Ninoa sipeka. Iua kaikota kākiti itakapiretini nire. ²³ Kākiti itakapiretanapaka atoko, Xesosi sari oxiratarimoni, Teoso imisākiretini nire. ĩkanōkapeka inakasaaki, iuanani iuaã aua. ²⁴ Iuasaaki kanaua ipoa apanīkakiāpeka. ĩtima apiākatáro kanaua. Ininiã tsakati iteene apoākata.

²⁵ Imaropirīkatapeka inakasaaki Xesosi sari ninoamoni. It̄pokota ipoa nopini. ²⁶ Imoianariakori atapakasaakiri Xesosi ipoa nopini it̄pokotini, ninoa pīkarauata.

—Kamiri napani —itxana.

Akiripoakatana. ²⁷ Iuasaakipeka Xesosi:

—Kataparaxinire hītxako. Notara. Kona hīpīkarauatape —itxa.

²⁸ Ininiã Petro sākirauata:

—Apiananiri. Xesosi pininiãua, pipaniātano pitemoni napokini ipoa nopini —itxa Petro.

²⁹ Ininiã Xesosi:

—Uai pina —itxari.

Ininiã Petro katxaka. Ipotorika ianini ipoa nopini Xesosimoni isini.

³⁰ Txamari kataparari ĩtimati itikasaaki, ipīkarauata, ininiã ipatapiã itairakaãpota. Ininiã iua akirikata:

—Apiananiri. Pimaĩkano.

³¹ Iuasaakipeka Xesosi maĩkari iua. Itxari:

—Poiãoka pauikari niposotiire. Kinirepa kona atão pauikari? —itxa Xesosi.

³² Iuaĩkana morōkoka itxauana kanaua āki. Iuasaaki ĩtima iotoka.

³³ Imoianariakori kapotoreēkaua Xesosi apisatoō:

—Apiananiri pitxaua. Atãopitikara Teoso ākiripitikarai —itxana.

Xesosi Makananitana Amianatakani Xenesareekini
(Marko 6.53-56)

³⁴ Ipoa ĩpiriātana, Xenesaree tōpamoni apoka itxana. ³⁵ Iuaã kākiti imarotari Xesosi, ininiã iokanapireta kākiti ninoa tixine takote auakanimoni:

—Amianatakani himina.

Ininiã kākiti minari itomane amianatakani Xesosimoni. ³⁶ Amianatakani amanaãri Xesosi:

—Pauiritaua pimãka mapotomatare atakapiotini —itxana.

Ikinimane imãka takapiotakani makananitaãka.

15

Xoteoakori ĩkite Pirena
(Marko 7.1-13)

¹ Iuasaaki pariseoakori, kaiōkatsopareriakori pakini apoka Xesosimoni. Xerosareēkini ninoa. Ipimaãrina Xesosi:

² —Kinirepa pimoianariakori kona kamari aãtokiriakorini sãkire iaōka, kotxi inipokotakasaakina, kona arokauakotauana —itxana.

³ Ininiã Xesosi apakapapiretana:

—Hītepekana, kinirepa kona hīte kamari Teoso sãkire iaōka? Hīte kamari hōereēkitinokara, ⁴ kotxi Teoso txari: “Pipaxitariko piri. Pipaxitaroko pinoro.” Apaka Teoso txari: “Piri, pinoro pimisākirepiretiniã, pokaãkako.”

⁵ Txamari hīte oerekari kākiti: “Kākiti auakiti iri, inoro pakini nirekiniã, iua manirekakaniãri isikiniri ninoamoni, isãpiretana: ‘Ia nota auakiti nisika Teosomoni.’” Ininiã !isikari ninoa nirekakiti ninoamoni. ⁶ Ininiã hīte oerekari kākiti mapaxitakanina iri, inoro pakini. Ininiãkara hīte sãkire hōereēkiti

kipatari Teoso sākire. ⁷ Hīte txari: “Akamapitikari Teoso sākire iaōka,” txamari kona hīte kamari. Atāopitikara Isaía sākire kitxakapirīka. Iua sāpiretari Teoso sākire hīte pirena. Teoso txari:

⁸ Kamisirinererini ninoa kākiti. Ninoa sākireēnanira ipaxitanona. Ākixinireēna linirekanona.

⁹ Maxikatiīka ninoa kapotoreēkaua nota apisatoō. Maxikatiīka ninoa txano: “Ateosone pitxaua,” kotxi ninoa !oerekari nota sākire. Ninoaka sākire oerekana, txamari “Teoso sākire asāpiretai” itxana.

Itxa Teoso Isaíamoni kitxakapirīka —itxa Xesosi.

*Ākixiniretxi Txiko Pirena
(Marko 7.14-23)*

¹⁰ Xesosi akiritana kākiti, ininiā itxana:

—Hīkenakota himarotini īkapani. ¹¹ Nipokori, piixirākakiti kona kamatxikotari pākixinire. Pisākire maerekati, pinamaā potoriākari, iuara txikotapitikari pākixinire —itxa Xesosi.

¹² Iuasaaki Xesosi moianariakori apoka iuamoni. Itxarina:

—Pimarotatari pariseoakori !apokaerekatari ikara pisākire ninoamoni?

¹³ Ininiā Xesosi:

—Kākiti takari atoko itxa. Ininiā ikinika takari niri iaixitikiri mataākiniti maporokaākako. ¹⁴ Kona himaākatapena pariseoakori. Īkiikakani mōsiāreni atoko itxana. Mōsiāreti mīkiikiniāri mōsiāreti, ikinipoko irikako aariko āki. Iua atokokana maerekati ōtākikiniāri maerekati, imakinika ninoa sari imisir-itikoātaā —itxa Xesosi.

¹⁵ Ininiā Petro:

—Poerekaua ate ikara sāpirenatxi atāo inakari oerekiko. Ate !imarotari —itxa.

¹⁶ Ininiā Xesosi:

—Hīte apanakini atoko hītxa atxiīti? Kona himarotapanikari?

¹⁷ Himarotari. Nipokori hinamaā hīxirākakiti hītikakomoni isa. Eereka hītikatakasaaki, inapa. ¹⁸ Hīsākire hinamaā pokīkakari potorika hākixinireē. Iuara txikotari kākiti ākixinire. ¹⁹ Kotxi hākixinireē hīxinikakiti maerekati potorika. Okaniuatakatxi, āti kākiti itanorokata sirīkiko nire, anokaretxi, itiriuatakatxi, misirineretxi, āti misākirepiretiko pakini potorika hākixinireē. ²⁰ Ikara atoko inakarinanira txikotari kākiti ākixinire. Kākiti marokauakotakaniuua kona txikotari ākixinire —itxa Xesosi.

*Xoteo Minakatoua Auikiniri Xesosi Sākire
(Marko 7.24-30)*

²¹ Ikara atoko inaāka atoko Xesosi sipe. Isipeka Txiro, Sitoō pakini tōpamoni.

²² Iuasaaki sito Kanaaākero, iuaā auakaro, apoka Xesosimoni. Iteene oa-manāri:

—Apiananiri, Tavii apika mekaniri, piamonīkano. Maerekati mata-matakoti auaītataro namarite. Iua iteene misiritaro oa —otxari.

²³ Txamari Xesosi kona apakapapiretaro oa. Imoianariakori apoka Xesosimoni. Itxana:

—Piokanataro, osipekako. Atemoni ātipirika oākiripoanāta —itxana.

²⁴ Xesosi apakapapiretaro oa:

—Niokanataāka Isaeokini ninīkatini īkapani. Ninoa soti auīte pīpinanaākani atoko itxana. Txamari pite kona Isaeokero. Pite āto uāka —itxa.

²⁵ Iuaritika oa sito apoka iuamoni. Okapotoreēkaua iua apisatoō. Ininiā oa:

—Apiananiri, pimakananitaro namarite —otxari.

²⁶ Ininiā Xesosi:

—Isaeokini amarini atoko. Nota ninoa iri atoko. Kona erekari amarini komirite nimixirikini, anāpamoni nisikini īkapani —itxaro.

²⁷ Ininiã oa:

—Ari, atãopitikara pisãkire. Anãpa atoko nitxaua, iuaritika anãpa nikari nipokori iriãkari kaapokori patapi koa —otxa.

²⁸ Ininiã Xesosi:

—Atãopitikara. Sito, pite iteene auikari niposotiire. Pinirekakiti nikamapitikako —itxaro.

Iuasaakipeka oimi erekapeka otxa.

Xesosi Erekapeka Txĩkitakari Kãkiti

²⁹ Eereka Xesosi sari Kariréia poatimoni. Iuaã oxiratari nopini topãka itxa.

³⁰ Itomane kãkiti iuamoni apoka. Ninoa minari iuamoni kãkiti mõiãreni, masãkireni, matĩpokotakani, apanakini amianatakani itomaneri pakini. Xesosi makananitana ninoa. ³¹ Kãkiti iuaã auakani tsorĩkaãta, kotxi itikarina Xesosi makanaitinina amianatakani. Kãkiti masãkireti sãkirauatapeka. Kãkiti matĩpokotakati tĩpokotapeka. Mõiãreti, kõiãrepeka itxapeka. Ikinimane txari:

—Peerekari Teoso, Isaeo auakani Teosone —itxana.

Xesosi Sikakienatana Ipi Ipi Pakini Mio Kãkiti

(Marko 8.1-10)

³² Xesosi akiritana imoianariakori. Itxana:

—Nota amonĩkana naia kãkiti. Ipi õti, ãti õti pakini notakata auana. Uatxa kona minakati kona auari inikinina ĩkapani. Kona nota iokanatanana ninoa natxiritika, kotxi arikama ipĩtaxititamana, irika itxamana —itxa Xesosi.

³³ Ininiã imoianariakori txari:

—Nanipa ate apokari nipokori komiri naia kãkiti asikakienatini? —itxana.

³⁴ Ininiã Xesosi:

—Kipakinipa komiri aua hĩtemoni? —itxa Xesosi.

Ininiã ninoa:

—Setxi komiri, ãtikaka ximaki axapitiri pakini —itxana.

³⁵ Ininiã Xesosi:

—Hĩpaniãtana kãkiti xiti topãkini —itxa Xesosi.

³⁶ Eereka imaĩkari ninoa setxi komiri, ximaki pakini. Itxari Teoso:

—Erekapitikari ia komiri, ximaki pakini pite sikakiti.

Mapixinika itxari komiri, ximakikata. Eereka xanakaãpota itxari imoianariakorimoni. Ininiã ninoa xanakaãpotari kãkitimoni. ³⁷ Ikinika nipokota. Kamitopeka itxana. Imoianariakori xãpokakari setxi kotari nipokori itetakori. ³⁸ Ipi ipi pakini mio kikiãkini nipokotapeka, apaka sitoãkini, amarini pakini. ³⁹ Eereka Xesosi iokanatanana kãkiti aapokomonina. Iposo atoko iereẽtaua kanaua ãki. Makataã tõpamoni isa.

16

Teoso Takaõtxikare

(Marko 8.11-13; Arókasi 12.54-56)

¹ Pariseoakori, satoseoakori pakini sari Xesosimoni. Inirekarina Xesosi kerokiniri, ininiã itxarina Xesosi:

—Takaõtxikari, Teoso posotiire poerekaua ate, aãtamatiniri ĩkapani, Teoso iokanatinii ĩkorapokoriti aimarotini ĩkapani —itxarina.

² Txamari Xesosi txana:

—Na noerekai. Mapiãnikata iaxiti põkamarari inakasaaki: “Peereõtiri katana,” hĩtxa. ³ Iua atokokana ĩkanõkapanika iaxiti põkamarari, piãkaxitita inakasaaki: “Ãparaãnapani. Kataparari ĩtimatipani,” hĩtxa. Himarotapitikari takaõtxikari iaxiti auakari. Txamari kona himarotari Teoso kamanãtakiti ĩkorakanani. Hĩsãkirauatakasaaki, kãkiti erekarini atoko hĩtxa, txamari maerekati hĩkama. ⁴ Kãkiti uatxarini !erekana. Itakanaparina Teoso. Hĩte

nirekari noerekinii Teoso takaõtxikare, iposotiire. Konapitini. Kona noerekai hïte. Kitxakapirïka Teoso sãkire sãpiretakari Xonasi inakori auakasaaki, Teoso kamari posotiiretxi. Ikara atoko inakari posotiiretxi Xonasi auakasaaki, iuaïkana ikamapanikariko. Iua posotiiretxi Teoso takaõtxikare itxapanikaua hïte ïkapani. Iua takaõtxikarinoka Teoso takaõtxikare hïte ïkapani —itxa Xesosi.

Iposo atoko Xesosi takanapana, sipe itxa.

*Pão Tireëkari Pirena
(Marko 8.14-21)*

⁵ Xesosi imoianariakorikata ïpiriãtari ipoa. Ipiniã apokasaakina, imoianariakori xinikaro pão imaxinïkaretakitona. ⁶ Iuasaaki Xesosi õtãkikana ninoa: —Erepaniko. Pariseoakori, satoseoakori pakini pãote tireëkari pamonõkoniri —itxana imoianariakori.

⁷ Ininiã imoianariakori misãkiretakakaua:

—Pão amaxinïkaretini xika Xesosi ikara atoko txaua ate —itxana imoianariakori.

⁸ Xesosi imarotari imisãkiretakakiniuana, ininiã iua:

—Kinirepa himisãkiretakakaua, pão himaxinïkaretini xika? Kona iteene hãuikari ninïkatinii. ⁹ Atauako kona kiïkitepanikai hïte? Atauako himaxinïkaretapekari pão sïkonoka sïko mio kãkiti nisikakienatini? Hïxinikariko kipakinipa kotari hïxãpokaka pão itetakoro? ¹⁰ Atauako kona hïxinikatari ãti õti ipi ipi pakini mio kãkiti setxinoka pãoã nisikakienatini? Hïxinikariko kipakinipa kotari hïxãpokaka pão itetakoro? ¹¹ Hïte nõtãkikasaaki: “Erepaniko. Pariseoakori, satoseoakori pakini pãote tireëkari pamonõkoniri,” ninakasaakii, kinirepa kona himarotatari kona pãoni ikara atoko nitxai hïte? —itxa Xesosi ninoamoni.

¹² Iuasaakiika imarotarina kona pão tireëkarini monõkori txaua. Imarotarina pariseoakori, satoseoakori pakini sãkirera, ninoa oereëkitira, monõkori txauã.

*Petro Auikari Xesosi Teoso ãkiri Ininiãua
(Marko 8.27-30; Arókasi 9.18-21)*

¹³ Xesosi sari Sesaréia-Piripi sitatxiti takote. Iuaã ipimaãna imoianariakori: —Kipa kãkiti uãkatano nota hïtari iaxitikiri?

¹⁴ Ininiã imoianariakori:

—ãtikaka uãkatoi Xoãoni kapatxisarerini iuaïkana õkitikaua inakarii. Apanakini uãkatoi Eríasini iuaïkana õkitikaua inakarii. Apanakinipekana uãkatoi Xeremiani iuaïkana õkitikaua inakarii. Minakanisaaki ãtikaka: “ãti Teoso sãkire sãpiretakarini iuaïkana õkitikaua inakarii,” itxaina —itxarina.

¹⁵ Ininiã Xesosi:

—Hïtepekana, kipa hïte uãkatano nota? —itxana ninoa.

¹⁶ Simão Petro apakapapiretari:

—Teoso mereëkitirai pite. Teoso mapïkati ãkirirai pite —itxari iua.

¹⁷ Ininiã Xesosi:

—Simão Petro, Xoão ãkiri, Teoso takari erekari pitemoni, kotxi kona kãkitini sãpiretai Teoso ãkiri nininiua. Niri iaxitikirira sãpiretai. ¹⁸ Nisãpirenauatapanika pitemoni. Piuãka Petro. Kai sorotxikana piuãka. Kai aapokotxiti kamakari mereëri kai kaikori xiti itakini ïkapani, aapokotxi iua kai nopini ikamini ïkapani, ininiã aapokotxi ïrika, kotxi kaikori nopini aua. Aapokotxi kamakari takari kai kaikori xiti. Iua kai atoko itxa ikara Teoso sãkire, isãpiretakiti pitemoni. Kãkiti nota nakitiakori naapoko atoko, ninoa sauaki nauini ïkapani. Napotiinãtapanikari kãkiti naapoko ïkapani. Satanasi tapara kona posotapaniri ixipokiniri ia naapoko. ¹⁹ Nipaniãtai Teoso sãkire pisãpiretini kãkitimoni. Xavi nisikinii atoko itxa ikara, kotxi kãkiti auikasaakiri Teoso

sākire iïroã Teoso auïtetxi ininiãtaãua. Ìkorapokoriti kãkiti kamakiti pimauiri-takaniã, Teoso tixine apaka !auiritaãka. Ìkorapokoriti kãkiti kamakiti pauiri-tiniã, apaka auiritaãka Teoso tixine —Xesosi txari Petro.

²⁰ Iposo atoko Xesosi:

—Teoso mereëkiti nininiua, apanakinimoni !kasãpirena hïtxapeko —itxana imoianariakori.

Xesosi Sãpiretari Ipinini

(Marko 8.31–9.1; Arókasi 9.22-27)

²¹ Iua õtisaaki Xesosi potorika isãpiretinina imoianariakori:

—Nisako Xerosareëmoni. Iuaã kiomãtxiakori, kaiõkatsoparerini, sasetotxi auïteakori pakini misiritanoko. Iposo atoko oka ninaãkako. Ipi äti õtisaaki iuaïkana nõkitikaãkako. Iuaïkana aua nitxako —itxana.

²² Ininiã Petro misãkiretari Xesosi iuanoka inakasaaki. Itapararitika itxari:

—Konapitini, kona ikara atoko inakari kona auapani pitemoni, Api-ananiri. Kona Teoso auiritapaniri ikara atoko piniko —itxari.

²³ Ininiã Xesosi kirioka Petromoni.

—Pisipiniikaua Satanasi. Nikimapore katokapareri atoko pitxa, kotxi pite nireëkiti kãkiti nireëkiti atokotxikana. Pite nireëkiti kona Teoso nireëkiti atokoni —itxari.

Xesosi Moianari Atão Inakari

(Marko 8.34-38; Arókasi 9.23-27)

²⁴ Iposo atoko Xesosi misãkiretana imoianariakori:

—Notakata kinirão sika pinakasaaki, piteka nireëkiti kona pinirekape. Notakata kinirão sika pinakasaaki, nota misiritiko atokokana pimisiritaãkako. Ia atoko pinirekiniã, notakata pisapitikako. ²⁵ Pite ätipirika kaminiãri pite nireëkitinoka, ininiã pinireëkiti xipokapitikako pitekata. Pite nireëkiti pimanirekakaniã, nota sãkire pauikini xika, Teoso iokanapirena erekari pisãpiretini xika, pite auapininiika txako Teosokata. ²⁶ Atxiïti papakapari ikinipoko tiitxi, ikini itixiti auakani tii, pinakiti ïkapani. Atxiïti iua tiitxi xika kona pikïpitari Teoso sãkire, ininiã kona pikaikota ätipirika Teosokata. Ikara atoko ininiã, erekari atxiïti ikinipoko tiitxi auinii? Konapitini. Apiaerekata Teosokata ätipirika pikaikotini. !Apakata kãkiti iïkitxitiniri Teoso, iuamoni isini ïkapani. ²⁷ Nota hïtari iaxitikiri apokako ninitiriakorikata. Iuasaaki niri iotximeretxikana nota iotximeretako. Iuasaakirako erekari isika erekari kamakanimoni. Iparïkana ïki isika iparïkana iaõka. Txamari imisiritanako maerekati kamakani. ²⁸ Atãopitikara nisãpiretai hïte. Uai uatxa aua kãkiti, ninoa imarotapanikariko nota hïtari iaxitikiri auïtetxi nininiua. Ikara imarotatinina apisa kona ipinapanikana —itxa Xesosi.

17

Moisesi, Eríasi Pakini

(Marko 9.2-13; Arókasi 9.28-36)

¹ Seisi õti napaka atoko Xesosi anikana Petro, Txiako, Xoão pakini. Xoão Txiako itari. Ikanïkana oxiratari nopinixiti. Ninoanani anika iuaã. ² Iuaã ninoã atamatari iua. Ipinimonipo itxapeka. Itoõ iotximere atokatxi iotximere atoko itxa. Imãka serõka ipinikare atoko itxa. ³ Iuasaakipeka Moisesi, Eríasi pakini tokiã iuaã, misãkireta itxarina Xesosi. ⁴ Ininiã Petro akiritari Xesosi:

—Apiananiri, erekapitikari uai aãuini. Pinirekiniãri, nota kamari ipi äti pakini papiri uai. Pite nakiti ïkapani, Moisesi nakiti ïkapani, Eríasi nakiti ïkapani nikama.

⁵ Petro sãkirauanãtakasaaki, katxiãri pomëkoriri ninoa nopini apoka. Katxiãri ãki Teoso txari:

—Ere namarite, nitiretakiti. Napokaerekatari iua, kotxi ikamari ninirekakiti. Hīkenakotariko iua sākire.

⁶ Xesosi moianariakori ikara atoko inakari ikenakotakasaakina, iteene ipīkarauatana, ininiā iriākatana xitipe. Itoōna ikipatana. ⁷ Xesosi sari ninoa-moni. Itakauakotaua ninoa nopini. —Hōkitikaua. Kona hīpīkarauatape — itxana.

⁸ Ininiā itikapokotana. Xesosinoka aua.

⁹ Oxiratari xirata iokiriiāpotakasaakina, Xesosi txana ninoa:

—Kona hīsāpiretapiri apanakinimoni hītikakiti. Nota hītari iaxitikiri nipina iuaīkana naua ninaka atokoikarako hītikakiti mixikanani hīsāpiretako — itxana.

—Ateeneka —itxarina.

¹⁰ Xesosi moianariakori pimaāri iua:

—Kinirepa kaiōkatsoparerini oerekaua: “Eríasi apokako Teoso mereēkiti apokini apisa?”

¹¹ Ininiā Xesosi apakapapiretana ninoa:

—Ari, atāopitikara ninoa sākire. Merepitipanika Eríasi apokapitika. Iua kamari imakinika iposope inini īkapani. ¹² Ari, nisāpiretai, Eríasi apokapeka. Txamari kākiti !imarotari iua. Imisiritarina iua inireēkitina iaōka. Iua atokotxikana itxanonako nota hītari iaxitikiri. Imisiritanona —Xesosi txana Petro, Txiako, Xoão pakini.

¹³ Ininiā imoianariakori imarotari Xesosi sākire. Eríasi, Xoão kapatxisareri itxaua.

*Amarini, Maerekati Matamatakoti Auaītotakiti Pirena
(Marko 9.14-29; Arókasi 9.37-43)*

¹⁴ Ikanapiriākana atoko, itomaneri kākiti apotiitiniātaāua apokasaakina, kiki apoka Xesosimoni. Ikapotoreēkaua iua apisatoō. ¹⁵ Itxari:

—Apiananiri, piamonīkari namarite. Maerekati matamatakoti auaītotari iua. Atatsiirauata. Xaminaā irikapika. Kāuaāriā ikomokapika.

¹⁶ Niminamari namarite pimoianariakorimoni. Ninoa kona posotari erekapeka itxīkitakinirina.

¹⁷ Ininiā Xesosi txari:

—!Kauikarei hīte. Maerekati kamakanii hīte. Kipakinikananipa Teoso nirekatari hītekata nauini? Kipakinikananipa Teoso nirekatari hīte nimīteenekini? Himinari amarini notamoni —itxana.

¹⁸ Apokaāka atoko, Xesosi txitari iua maerekati matamatakoti:

—Pisipe.

Ininiā iua maerekati sipe. Iuasaakipeka iua amarini erekapeka itxa.

¹⁹ Eereka imoianariakori apoka Xesosimoni. Iuasaaki ninoanoka aua iuakata. Imisākiretarina:

—Kanatokopa ininiāpa ate kona posotari maerekati matamatakoti aomitikini?

²⁰ Ininiā Xesosi:

—Kona atāoni hāuikari nisākire, ininiā kona hīposotari homitikiniri iua. Atāoenepitikara nisāpiretai hīte. Mostata iki axapitikiri. Axapitipitika nisākire hāuikiniā, mostata iki atoko nisākire hāuikiniā, hīposotari ia ōtanoxiratari hīpaniātini: “Pite oxiratari, uai posipika, ikaimoni pisa,” ininiā oxiratari sapitikamako. Hīte posotari ikinipoko hinireēkiti hīkamini. ²¹ Txamari himamisākiretakaniāri Teoso, hinipokotini himatakanapakaniā Teoso himisākiretini īkapani, ininiāra kona hīposotari maerekati matamatakoti homitikini —itxa Xesosi.

*Xesosi Iuaīkana Sāpiretari Ipinini
(Marko 9.30-32; Arókasi 9.43-45)*

²² Kariréia tōpa apokasaakina, Xesosi misākiretana imoianariakori:
 —Nota, hītari iaxitikirino mīkapiritaākako. Nisikaākako kikiakorimoni inirekaākitina ikaminina tīkane. ²³ Ninoa okano nota. Ipi āti pakini ōtisaaki iuaīkana nōkitikauako, iuaīkana aua nitxako —itxana ninoa.
 Ikara inakari ikenakotakasaakina, imatinaniuatana.

Txineiro Teoso Misākiretiko Aikoti Īkapani

²⁴ Kapanaoō sitatxiti apokasaakina, kikiakori sari Petromoni. Ninoa kiki apakaparo txineiro Teoso misākiretiko aikoti nīkatakani amanaākito. Ipi-maārina Petro:

—Hīte oerekakari sikataro txineiro Teoso misākiretiko aikoti nīkatakani amanaākito? —itxarina iua Petro.

²⁵ Ininiā Petro:

—Ari, isikapitikaro —itxa.

Eereka Petro ĩroā aapokotxi āki ikara sākiretxiti Xesosi isāpiretini ĩkapani. Xesosi sākirauata, Petro masākirauatakani apisa:

—Petro, ikini itixiti kipa sikataro txineiro auītetxiakorimoni? Atauako auītetxi nirimane sikataro? Atauako kākiti ātiātaā ĩkanikani sikataro? —itxari.

²⁶ —Kākiti ātiātaā ĩkani sikaro txineiro auītetximoni —itxa Petro.

—Ari atāopitikara. Ininiā kona auītetxi nirimani sikaro txineiro iuamoni. Iuaritika asikapitikaro. ²⁷ Txineiro amasikakaniā, txineiro apotitakani !apokaerekataua. !Anirekari ikara atoko inakari. Ininiā ipoa pisa. Pokatsaāta. Pimanamākarō ximaki merepitipanika pimaīkakito. Onamaā papokaro txineiro ota aīkitxirauatini ĩkapani. Oa txineiro ota apakata nota sikakito ĩkapani, pite sikakito ĩkapani apaka. Panika. Pisikaro oa txineiro Teoso misākiretiko aikoti nīkatakanimoni —itxa Xesosi.

Ininiā Petro kamari Xesosi sākire iaōka.

18

Kiripa Kākiti Apiatakari Txataua?

(Marko 9.33-37; Arókasi 9.46-48)

¹ Iuasaaki Xesosi moianariakori apoka iuamoni.

—Teoso auītetxi ininiātaāua, kipa kākiti apiatakari txataua? —itxana.

² Xesosi akiritari amarini axapitiri. Ninoa apisatoō taka itxari.

³ —Atāopitikara nota sākire. Himaerekani himatakanapanisaaki, Teoso nireēkiti himakamakanisaaki, amarini axapitiri atoko himinakanisaaki, kona hīsapani Teoso auītetxi ininiātaāua. ⁴ Ia amarini axapitiri !iuikaua. Kākiti ia amarini atoko inakarira, iuaka poiōtakiniāua, iuara apiatakari itxaua Teoso auītetxi ininiātaāua. ⁵ Nota nireēkiti pikamakasaaki, pipoxokoniritika papakapiniāri amarini ia atoko inakari pinakasaaki, papakapano nota apaka —itxa Xesosi.

Maerekati Oerekakari

(Marko 9.42-48; Arókasi 17.1-2)

⁶ Xesosi sāpirenauatapanika:

—Kākiti txīkitakiniāri amarini, nota sākire auīākari, maerekati ikamini, ! apakata. Erekamariko kai mitari iua kākiti maerekati oerekakari iaxirikanokitaākamako, iposo atoko ipoa apanīkakiā okaākamako ipinini ĩkapani. ⁷ Kākiti ikini itixiti auakani misiritaākako, kotxi auari kākiti maerekati apanakini kamini txīkitakakani. Auapika kākiti ikara atoko inakani. Ninoa misiritaākako. ⁸ Piuako txīkitakiniāi maerekati pikamini, ininiā pitsotakari, oka pitxariko. Pikiti txīkitakiniāi maerekati pikamini, ininiā pitsotakari, oka pitxariko. Kotxi maerekati pikaminiā arikatxi maxipokatimoni pokaākako. Apiaerekata mauakotikai pauini ātipirika Teosokata. Apiaerekata

makititikai pauini ātipirika Teosokata. Pauiritiniāri maerekati pikamini txīkitaākari pitekata ikaikotiniā, ininiā pite kamari maerekati apaka, ininiā arikatxi maxipokatimoni pokaākako. ⁹ Iua atokokana poki txīkitakiniāi maerekati pikamini, pimaporoka, oka pitxariko. Kotxi maerekati pikaminiā, arikatximoni maerekani misiritikoātaā pokaākako. Apiaerekata Teosokata ātipirika pauini āti pokinoka pauini. Kona pauiritapiri maerekati pikamini txīkitaākari pitekata ikaikotini —itxa Xesosi sākire.

*Soti Auīte Pīpinanaākari
(Arókasi 15.3-7)*

¹⁰ —Ikinipoko amarini pipaxitako, kotxi niri tixine aua niri nitiriakori. Ninoa nīkatari amarini. Niri apisatoō ātipirika initiriakori auapika, ininiā kākiti mapaxitakaniāri amarini, isāpiretarina niri. ¹¹ Nota hītari iaxitikiri napoka ĩkorapokoriti kākiti pīpinanaākani atoko inakani napokini ĩkapani, kotxi !imarotarina Teoso kimapore.

¹² —Kiātokopa itxa hīxinikakiti? Kiki aua ipiraakori soti auīte seī pakini. Txamari ātika pīpinanaka. Kiātokopa itxa? Itakanapari ipiraakori novēta novi pakini. Isari oxiratarimoni. Initari iua pīpinanaākari. ¹³ Ipiraakori novēta novi na pīpinanaka, ininiā ipoxokoniuata. Apokasaakiri iua pīpinanaākari, iteene ipoxokoniuata. ¹⁴ Iua atokokana hīri iaxitikiri kona nirekari amarini ātika pīpinanakini. Hīri nirekari imakinika amarini imarotiniri ikimapore iuamoni sikari apo —itxa Xesosi sākire.

Maerekati Pitemoni Kamakari

¹⁵ —Pitari nisākire auīākari kaminiāri maerekati pitemoni, ininiā pisa iuamoni. Pitenoka pisa iuamoni. Iuanani pimisākiretako. Pōtākikiniri ikīpitakasaaki, pimoianari iuaīkana itxapekaua. ¹⁶ Pōtākikiniri imakīpitakanisaaki, ipi kākiti panikako iuamoni. Ipi minakanisaaki ātika panika iuamoni. Ininiā iuaīkana pōtākikari iua maerekati kamakari. Iuasaaki pitekata sikani apaka ōtākikari. Kotxi Teoso sākire iōkatsopatakori oerekaua kākiti sākire kenakotakani, kākiti kamakiti itikakani ipi āti pakini auiniā, apakata apanakini atāo inakari imarotini ĩkapani. Ipi āti minakanisaaki, ipi apakata. ¹⁷ Ninoa pitekata sikani sākire imakīpitakanisaaki, pisāpiretana kākiti Teoso misākiretikoātaā apotiitakaniua. Ninoa ikinipoko Teoso sākire auīākani ōtākikariko iua. Imakīpitakanisaakiri ninoa sākire, himarotari atāo maerekati kamakari itxaua iua. Teoso sākire mauīākati atoko itxaua iua, kotxi kona inirekari ōtākikiko. Ate mokaiakari moianari atoko itxaua —itxa Xesosi sākire.

Pauiritakiti, Pimauiritakiniti Pakini

¹⁸ —Atāopitikara nitxai hīte. ĩkorapokoriti kākiti kamakiti himauiritakiniti, Teoso tixine apaka !auiritaāka. ĩkorapokoriti kākiti kamakiti hāuiritakiti, apaka auiritaāka Teoso tixineē.

¹⁹ —Apikomoni ia nisāpiretai. Pite xinikakitixikana āti xinikiniā apaka, hinirekakiti hamanainiāri Teoso, niri iaxitikiri sikapitikai hamanaākiti. ²⁰ Kākiti apotiitakasaakiua nota ixinikinina ĩkapani, nota ninoakata aua. Atxiīti ipi ātinoka aua. Atxiīti ipinoka aua. Iuaritika nota aua ninoakata — itxa Xesosi.

Nitiritxi Āti Matiretakati

²¹ Petro sari Xesosimoni, pimaā itxari Xesosi:

—Apiananiri, kipakinikatapa napakapari nitari, maerekati ikaminano ātipirika inakasaaki? Setxikata atxiīti?

²² Ininiā Xesosi:

—Kona, kona setxikatani papakapari iua. Setxikata setêta papakapari iua, ininiã âtipirika papakapariko.

²³ —Apikomoni noerekai papakapiniri kâkiti, maerekati ikamakasaaki pitemoni. Teoso auñtetxi ininiua patrão ia atoko inakari itxa. Ia patrão nirekari initiriakori iñkitxitiniri iua. ²⁴ Ininiã iua iaõtaro txineiro isikakitopeka. Iuasaaki initiri minaãka iuamoni. Mitxipeka iua patrão sikari tesi mirão txineiro ota iua initirimoni. Txineiropokoni. Oa txineiro isikasaaki, itxari initiri: “Âti õti iuaãkana pisikano oia nitxineirote,” itxari initirimoni. Txamari, !isikaro, kotxi !oãuaika. ²⁵ Kona katxineiroteri. Ininiã ipatrãote paniãtari ivẽtxitiko iua, ãtanoro, imiakori, itii ikinipoko, ipatrãote iñkitxitini ãkapani. ²⁶ Iua initiri ikara inakari sãkiretxiti ikenakotakasaaki, ipatrãote apisatoõ ikapotoreẽkaua. Itxari iua: “Piãtaparoko. Ikinika pitxineirote nisikaiko,” itxari ipatrãotemoni.

²⁷ —Ininiã ipatrãote amonĩkari. “Kona ninirekaikaro nitxineirote pisikinino.” Ininiã auiritari isini.

²⁸ —Ininiã sipe itxa. Iua nitiritxi mitxi sikapekaro txineiro iua inakito seĩ ota ãti ipatrãote nitirimoni. Poiãonoka oa txineiro. Iuasaaki, aapokomoni isikasaaki, aõkitari iua ãti nitiritxi ipatrãote nitiri. Imaĩkari inoakiã. “Uatxa pisikano nitxineirote,” itxari.

²⁹ —Ininiã imoianari kapotoreẽkaua iua apisatoõ. “Piãtaparoko. Ikinika pitxineirote nisikaiko,” itxari.

³⁰ —Txamari mitxiri nitiritxi: “!Niãtapaikaroko,” itxari. Ininiã kateiamoni ieretakakitãkari imoianari txineiro xika. “Ikinika nitxineirote pisikasaaki-ikanoko, pikatxakako,” itxari. ³¹ Ikara inakari ene apanakini iua patrão nitiriakori kenakotakasaaki, ninoa naiataua. Ininiã isana ipatrãotemonina. Isãpiretarina initiri iokanatiniri ãti initiri kateiamoni. ³² Ininiã iua patrão akiritari iua initiri: “Pite maerekati pitxaua, kotxi kita pite amanaãno nota niamonĩkinii, ininiã pũkitxitinino !nininirekaika. ³³ Kinirepa kona pite amonĩkari pimoianari nota amonĩkinii atokokana? Kona erekai,” itxari.

³⁴ —Ininiã ipatrãote iteene naiataua. Iokanataro iua kateiamoni imisiritikomoni ipatrãote txineirote okinika imasikakanisaaki.

³⁵ Ininiã Xesosi xipokapiretari ia isãpirena:

—Niri iaxitikiri iua atokokana txaiko hĩte, maerekati ãti kamakasaakii hĩtemoni himamaxinĩkaretakaniã hãkixinireẽ —itxa Xesosi.

19

Kiki ãtanorokata Itakanapakakini

(Mateo 5.31-32; Marko 10.1-12; Arókasi 16.18)

¹ Ikara inaka atoko Xesosi potorika Kariréia tãpa. Isa Xotéia tãpamoni uini Xotão ipiniã. ² Iuaã itomaneri kãkiti sari iuamoni. Erekapeka itxĩkitakana amianatakani.

³ Pariseoakori apaka sari iuamoni. Inirekarina Xesosi kerokiniri isãkire. Ininiã ipimaãrina Xesosi:

—Auiritaãka atxiĩti kiki takanapiniro ãtanoro, itakanapiniro inirekasaaki? —itxarina.

⁴ Ininiã Xesosi:

—Hĩte imarotapekari ia Teoso sãkire iõkatsopatakori:

Kitxakapirĩka merepitipanika ikinipoko Kamakari kamari kãkiti, kiki inini, sito onini apaka ikamari kãkiti.

⁵ Ikara atoko ininiã, kiki takanapari iri, inoro pakini, ãtanorokata auini ãkapani, ininiã ninoa ãtika atoko itxauana,

itxa Teoso sākire iōkatsopatakori. ⁶ Ininiã kona ipi litxaikauana. Ātika itxauana. Ikara atoko ininiã, !erekari kākiti kaiarikiniri Teoso apotiitakini —Xesosi txana ninoa.

⁷ Ininiã ninoa pariseoakori pimaãri:

—Ikara atoko ininiã, kinirepa Moisesi paniātari kiki iōkatsopatiniri aātsopa, ĩtanoro itakanapini aātsopate, ininiã eereka auiritari iua iokanatiniro oa?

⁸ Ininiã Xesosi apakapapiretana:

—Moisesi auiritai hĭtanoro hĭtakanapini, kotxi paikori hĭxinire. Teoso nireēkiti himanirekakani xikara, Moisesi auiritai hĭtanoro hĭtakanapini. Txamari kitxakapirĭka merepitipanika kona kiki takanaparo ĩtanoro. ⁹ Ininiã nitxai hĭte, kiki takanapiniãro ĩtanoro, ātikata masirĭkatoka, iua kamari maerekati. Itakiniãro āto sito, maerekati apiata ikama, kotxi !imaākatari Teoso paniātakiti. Oa itakanapakito taākari apaka kamari maerekati —Xesosi txana ninoa.

¹⁰ Ininiã imoianariakori ikara ikenakotakasaakina, itxarina Xesosi:

—Ītaniritxi, ĩtanorotxi !auiritaãka itakanapakakinina, ininiã erekapiimana imĭtaniriuatakanina —itxarina.

¹¹ Ininiã Xesosi:

—Erekapitikari kākiti ĩtanorouatini. Ātikakanoka Teoso kona nirekari ĩtanorouatinina. ¹² Ixika auapitika kākiti mĭtanorouatakani. Kotxi ātikaka kiki auakasaaki, iĭtona kona apakata ninoa takiniro sito. Apanakinipekana ikisauakatsikitiko xika kona ninoa posota itakinirona sito. Apanakinipekana kona nirekari ĩtanorouatini Teoso auĭtetxi ininiãua ātipirika isāpiretini ĩkapani. Teoso manirekakaniãri pite ĩtanorouatini, ininiã kona pĭtanorouatape —itxa Xesosi.

Xesosimoni Amarini Apokini

(Marko 10.13-16; Arókasi 18.15-17)

¹³ Iposo atoko kākiti minana amarini Xesosimoni. Inirekarina ninoa kii nopini iuako itakini. Inirekarina Xesosi misākiretiniri Teoso amarini ĩkapani. Txamari imoianariakori txitana. !Auiritana amarini anikinina Xesosimoni.

¹⁴ Ininiã Xesosi txana imoianariakori:

—Hāuiritanako amarini notamoni apokini. Kona hĭtokakapena notamoni apokinina. Kotxi kākiti Teoso auĭtetakani amarini atoko itxauana —itxana.

¹⁵ Ininiã iuako itaka ninoa kii nopini. Iposo atoko ĩkorape itxa.

Ātokori Ito Txineiroteri

(Marko 10.17-31; Arókasi 18.18-30)

¹⁶ Ātokori apoka Xesosimoni.

—Koerekareri erekarii, kiripa erekari nikama ātipirika Teosokata nauini ĩkapani? —itxari.

¹⁷ Ininiã Xesosi:

—Kininiãpa “erekari” pitxano? Kākiti erekari !auari. Teosonanira erekari. Teosokata ātipirika pauini pinirekiniã, pikamariko Teoso paniātakiti.

¹⁸ —Īkiripa? —itxa.

Ininiã Xesosi:

—!Pokaniuatape. !Pisirĭkape āti ĩtanorokata. !Pĭtiritiatape. Poxiene ! pikamape. ¹⁹ Piri, pinoro pakini pipaxitako. Pitiretanako apanakini, piteka pitiretiniua atokokana, pitxapaniko —itxari.

²⁰ —Nikamapitikari ikara atoko pinakiti. Kiripa apikomoni nikamaã Teosokata ātipirika nauini ĩkapani? —itxari.

²¹ —Ikinika kinirão kamaka pinakasaaki, ikinika pitii pivĕtxitako. Txineiro papakapakito pisika kākiti matxineirotenimoni. Ikara atoko inakari

pikaminiã, Teoso tixine papokasaaki ikinipoko erekari auiniiko pite. Pitii pivêtxitaka atoko, notakata sa pitxako —Xesosi txari.

²² Iua âtokori ikara ikenakotakasaaki, isipe. Imatinaninoka itxari âtokori, kotxi kaiãori itii. !Inirekari itii ivêtxitini. ²³ Ininiã Xesosi txana imoianariakori:

—Atãopitikara ia nitxai hîte. Pamimari katxineiroterini auîtetiniri Teoso. ²⁴ Apikomoni nisãpiretai. Atauako kamero napatari âkorike sonakiã? Apia mimari kãkiti katxineiroterini auîtetiniri Teoso —itxana.

²⁵ Xesosi moianariakori ikara ikenakotakasaakina, itsorîkaãtana. Ninoa uãkatari katxineiroterinimoni txineiro aua, kotxi Teoso apokaerekatana ninoa, ininiã txineiro isika ninoamoni, ninoa uãkatakiti. Ininiã ninoa pimaãri:

—Katxineiroteri maposotakaniãri Teoso tixinemoni isini, kipa posotari iuaã isini? —itxanãtana.

²⁶ Xesosi atamatana. Apakapapiretana:

—Kãkitika kona posotari. Teoso posotari ikinipoko ikamini.

²⁷ Petro misãkiretari Xesosi:

—Atepekana, ate takanapapekari ikinipoko pitekata asini îkapani. Ikara atoko aniniã, kiripa ate apakapako? —itxari.

²⁸ Ininiã Xesosi:

—Atãopitikara nitxai hîte. Nota, hîtari iaxitikiri niitopãkako auîtetxi itopanere nopini. Iuasaaki ikini itixiti amaneri itxauako. Ikinipoko atamatanoko nota hîtari iaxitikiri iotximere. Iuasaaki hîte nisãkire kîpitakanii apaka topãkako auîtetxi itopanere nopini. Iua iitopaneretxi tosi pakini. Tosi nirimanetxi Isaeo tixine auakani auîteakori hîtxauako. ²⁹ Atxiîti nota îkapani pitakanapari paapoko, pitariakori, pitaroakoro. Atxiîti nota îkapani pitakanapari piri, pinoro, pamarite. Atxiîti pitakanapari pikikiote nota îkapani. Ikara pitakanapakasaaki nota îkapani, apiata papakapariko. Itori papakapariko. Ikara atoko pininiã nota îkapani, âtipirika paua Teosokata. ³⁰ Itori kãkiti apiarini uatxa, itixi xipokini ôtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini ôtisaaki —itxa Xesosi sãkire.

20

Ova Takakoriãtaã Parîkauatakani

¹ Xesosi txari:

—Teoso auîtetxi ininiua ia kakikioteri atoko itxa. Ia kakikioteri takapekari txipokori ova inakoro ikikioteë. Ovanoka itaka. Oiõpeka onakasaaki, iua kakikioteri potorika îkanõkapanika. Initari parîkauatakani ova amakani îkapani.

² Aõkitakasaakina, ipimaãna: “Hinirekatari parîkatxi?” itxa.

—“Ari, anirekapitikari,” itxana.

—“Atauako âtoka txineiro ota pirata kamakori apakata âti ôti pokamara piparîka îki îkapani?” itxana.

—“Ari, apakatapitika,” itxana. Kotxi âtoka ota pirata kamakori iuasaaki atão parîkatxi îki âti ôti pokamara kãkiti parîkauatini îki. Ininiã itakaremoni iokanatanana iparîkauatinina îkapani.

³ —Novi oarape inakasaaki iuaîkana ipotorika. Nipokori vêtxitikoãtaãmoni isa. Iuaã atamatana kãkiti maparîkauatakani. ⁴ Ininiã imisãkiretana: “Hîte apaka atxiîti nirekatari hîparîkauatini nitakareãtaã, ininiã niîkitxitai atão inakari hîparîka îki,” itxa. Ininiã ninoa apaka sari.

⁵ —Apaniãxitipeka inakasaaki iuaîkana iokanatanana apanakini parîkauatakani itakaremoni. Itinîtitakasaaki iuaîkana iokanatanana apanakini parîkauatakani itakaremoni. Mitxi isãkire atokokana itxa isãkire ninoamoni. ⁶ Mapiãnikata takotepeka inakasaaki iuaîkana isa parîkauatakani

initini. Apokapanikana maparĩkauatakani. Ipimaãna: “Kinirepa ia õti maparĩkauatakanika hĩtxa?” itxana.

⁷ —“Kotxi kona kãkiti sikaua parĩkatxi,” itxarina.

—“Nitakareãtaã hĩsa. Iuaã hĩparĩkauata. Hĩte apakapariko hĩparĩka ìki erekari,” itxana.

⁸ —Ìkanõkapeka inakasaaki kakikioteri akiritari initiri apiari: “Parĩkauatakani pakirita. Pĩikitxitana. Merepanika pĩikitxitana kíkata parĩkauatakani. Eereka pĩikitxitana tinĩtikita parĩkauatakani, pitxaãpotako,” itxari.

⁹ —Kíkata parĩkauatakani imakinikana apakapari ãtoka txineiro ota pirata kamakori. ¹⁰ Kikiãkini ìkanõkapanika parĩkauatakani ikara itikasaakina, oãkatarina: “Ate apakaparoko apiatako aparĩka ìki,” itxamana. ãtoka txineiro ota pirata kamakoro imakinikana apakapana. ¹¹ Txineiro apakapakana atoko, omanãkarauatana. “!Erekari kakikioteri,” itxanãtana. ¹² Ininiã ninoa txari iua: “Naia kíkata parĩkauatakani poiãoka iparĩkauatana. ãto oaranoka iparĩkauanãtana. Ate parĩkauata ikiniõtika kapatakariã. Ate parĩkauatapitipo, txamari pite ìkitxitaua ate naia pĩikitxitini atokokana. Kona erekai,” itxarina.

¹³ —Iua kakikioteri apakapapiretana: “Nitiretakini, kona nota misiriene-tai hĩte. Ìkanõkapanika nipimaãi: ‘Atauako ãtoka txineiro ota pirata kamakori apakata ãti õti pokamara piparĩka ìki ìkapani?’ nitxai mixikanani. Ininiã hĩte: ‘Ari, apakatapitika,’ hĩtxa. Ininiã na nimisirienetai hĩte. ¹⁴ Ininiã txineiro nisikakito hanikaika. Haãpokomoni hĩsipeka. Nota nirekari niĩkitxitinina hĩte tikini parĩkauatakani hĩte niĩkitxitini iaõka. ¹⁵ Atauako kona erekari nota txineirote ninirekakitimoni nisikini? Hĩte xikotano, erekari nikamini xika,” itxana ninoa.

¹⁶ Xesosi xipokari isãpirena:

—Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki. Teoso aiatana kaiãopokori kãkiti itixine isinina ìkapani, txamari poiãonoka iua mereẽ —itxa Xesosi.

Iuaĩkana Xesosi Sãpiretari Ipinini

(Marko 10.32-34; Arókasi 18.31-34)

¹⁷ Xesosi Xerosareẽmoni ikimaporitakasaaki, akiritana imoianariakori. Ninoanoka imisãkireta.

¹⁸ —Hĩkenakotari nisãkire. Xerosareẽmoni asako. Iuaã nota hĩtari iaxitikiri mĩkapiritaãkako. Sasetotxi auĩteakori, kaiõkatsoparerini pakinimoni nisikaãkako, ininiã ninoa apotiitaua. Iuasaakiko ninoa txari: “Okaãkapitikako.” ¹⁹ Eereka ninoa sikano Xoteo minakonimoni. Ninoa napetano. Ixirokitatanona aãpitsaã. Iposo atoko aamina ìpiriãmitakariã tokakita ninaãkako, oka itxanonako. Ipi ãti õtisaaki nõkitikauako, iuaĩkana aua nitxako —itxa imoianariakorimoni.

Txiako, Xoão Pakini Amanaãkiti

(Marko 10.35-45)

²⁰ Eereka Sepeteo ìtanoro apoka Xesosimoni. Ominana imi Txiako, Xoão pakini. Ninoa Txiako, Xoão pakini Xesosi moianariakori. Okapotoreẽkaua iua apisatoõ.

—Atauako ninirekakiti pikaminano? —otxari.

²¹ —Kipa pinireka? —itxaro.

—Ikinimane auĩte pinakasaakia, ninirekari naia ipi namariteni auĩtetxiakori ininiãuana pitekata. Pauritatana pitekata iĩtopãkinina, ãti pikikomoni inini, ãti pisaneremoni inini? —otxari.

²² Ininiã Xesosi apakapapiretana ninoa:

—!Himarotari hamanaãkiti. Mapaõti napa atoko iteene nimisiritaãkako. Atauako hĩposotatari hãtatsiitini notakata? —itxana ninoa.

—Aposotapitika —itxarina.

²³—Atãopitikara hãtatsiirauata notakata, txamari kona notani mereẽna kãkiti nikikomoni, nisanaremoni topãkakani ïkapani. Nirira mereẽpekana ninoa kãkiti notakata topãkini ïkapani —itxana.

²⁴Apanakini Xesosi moianariakori kenakoenetari Txiako, Xoão pakini amanaãri Xesosi auĩtetxi ininiuana ïkapani, ininiã omanatana. ²⁵Ininiã Xesosi akiritana ninoa imakinikana iuamoni.

—Himarotari Xoteo minakanuia auĩteakori paniãtari kãkiti ikinika auĩteakori nireẽkiti ikaminina ïkapani. Kona atão itiretana kãkiti. Kãkiti kona kamari auĩtetxiakori mauiritakiniti. ²⁶Kona ninoa auĩtetxiakori atoko ! hĩtxape. Atão apiari pininiua pinirekiniã, pimoianatariko apanakini. ²⁷Apanakini auĩte pininiã pinirekiniã, nitiritxi pitxauako merepanika. ²⁸Ikara atoko nitxa nota hĩtari iaxitikiri ïkorapokoriti napokasaaki. Ninitiri ! auari. ïkorapokoriti napoka, kãkiti nitiri nininiua ïkapani, kãkiti nitiretini ïkapani. ïkorapokoriti napoka nipinini ïkapani, kaiãopokori kãkiti mapinakani ïkapani, kotxi nota ïkitxirauata ninoa mapinakani ïkapani —itxana ninoa.

Ipi Mõsiãreni Xesosi Makananitini
(Marko 10.46-52; Arókasi 18.35-43)

²⁹Xerikoo sitatxiti ipotorikasaakina, itomaneri kãkiti sari Xesosikata, imoianariakori pakinikata. ³⁰Iuasaaki ipi mõsiãreni topãkanãta kimapori tiniãpo. Xesosi napaãpotini ikenakotakasaakina, akiritana:

—Apiananiri, aãuĩte Taviini apika mekanirii, piamonĩkaua ate —itxarina.

³¹Kãkiti iuaã pinitana:

—Himaãtako —itxana.

Txamari apiata akirikatana:

—Apiananiri, aãuĩte Taviini apika mekanirii, piamonĩkaua ate —itxarina.

³²Ininiã Xesosi iotoka. Akiritana ninoa mõsiãreni. Apokana iuamoni.

—Kipa hinireka nikaminii hĩte? —itxa.

³³—Apiananiri, aĩtikapokotini anireka.

³⁴Ininiã Xesosi amonĩkana. Okina nopini itakari iuako. Iuasaakipeka kõiãrepekana, sa itxana Xesosikata.

21

Xesosi Xerosareẽ Apokaãpotini
(Marko 11.1-11; Arókasi 19.28-40; Xoão 12.12-19)

¹Xesosi imoianariakorikata imatokoãpotari Xerosareẽ. Apokana Petxi-paxee inakori aapokotxiti, õtanoxiratari takote Oriva inakori xiratamoni. Iuaã Xesosi iokanatana ipi imoianariakori aapokotximoni.

²—Hĩsa ikiraã kaixiti auakari aapokotxitiã. Iuaxiti hãpokasaaki, hãpokaroko xomẽta iaxiriãkoro oimikata. Hĩkoxirikana. Uaimoni mina hĩtxanako. ³Ãti misãkiretakasaakii: “Kinirepa hĩkaxirikatari pirãtxi?” Ininiã hĩte: “Apiananiri nirekana,” hĩtxako. Ininiã iua auiritai himininina —itxana ninoa.

⁴Kitxakapirĩka Teoso sãkire sãpiretakari sãpiretapekari ikara atoko inakari. Ininiã iua sãpiretakiti kitxakapirĩka atão inakari apokapeka. ⁵Iua txari:

Hĩtxariko Xerosareẽ auakanimoni: “Hãtamata. Hĩauĩte apokaãpota hĩtemoni.

!Kaneenamari. Xomẽta nopini iitopãkanãta. Xomẽta ãkiri nopini isaãpota,” hĩtxako ninoamoni,

itxa Teoso sãkire sãpiretakari kitxakapirĩkapeka.

⁶ Ininiã Xesosi moianariakori sari. Ipaniãtakiti iaõka ikamana. ⁷ Ininiã iminaro xomêta oimikata. Itakarina imãkana inopinina Xesosi topãkini ìkapani. Ininiã Xesosi topãka xomêta ãkiri nopini. ⁸ Itomaneri kãkiti katamêkari imãkana kimapori ãpo. Apanakini sauakari aãxike. Ikasirìkaxikeãpotarina aãxike kimapori ãpo. Ikara atoko ikamana, Xesosi paxitiko oerekinina ìkapani. Imãkana nopini, aãxike nopini, xomêta napaãpota. ⁹ Kãkitipokoni ìkiikakani. Kãkitipokoni Xesosi tikini ìkani. Imakinika saãpotakasaakina, akirikatana:

—Peerekari Tavii apika mekaniri. Teoso posotiirekata ìkari, Teoso nireëkiti kamakari iua. Teoso sikariko erekari iuamoni. Peerekari Teoso, iaxiti apiko nopinixiti auakari. Apiananiri itxaua —itxaãpokatana.

¹⁰ Ininiã Xesosi apokapeka Xerosareë. Iuasaaki ikinimane Xerosareë auakani tsoriãkaãta.

—Kirinapanipa ikira kiki inatari? —itxanãtakakana.

¹¹ Kãkiti Xesosikata ìkani sãpiretana:

—Xesosikara ikira. Teoso sãkire sãpiretakari, ikira. Nasaree sitatxitikiri, Karirëia tõpa auakari ikira —itxana.

Pirãtxi Vêtxitakani Omitikiko

(Marko 11.15-19; Arókasi 19.45-48; Xoão 2.13-22)

¹² Xesosi ìroã aiko ãki Teoso misãkiretikoãtaã. Omitikenatana tiitxi vêtxitakani. Amotiitakani Teoso misãkiretikoãtaã auakani omitikenata. Itakaritari txineiro vêtxitakani mesate. Kamoã vêtxitakani topãkini apaka ikitaka.

¹³ Xesosi misãkiretana:

—Teoso sãkire iõkatsopatakori txari:

Ia naapoko, “Teoso misãkiretiko aikoti” akiritaãkako, itxa. Txamari hite txìkitakari ia aiko kütiririni iomaãtiniãtaã ininiua —itxa Xesosi.

¹⁴ Mokirini, kãkiti matipokotakani pakini apoka Xesosimoni Teoso misãkiretiko aikotiã. Erekapeka itxìkitakana ninoa. ¹⁵ Iuasaaki amarini Teoso misãkiretikoã auakani iteene akirikata:

—Peerekari aãuïte Taviini apika mekaniri —itxanãtana.

Sasetotxi auïteakori, kaiõkatsoparerini pakini itikari Xesosi posotiire, kãkiti erekapeka itxìkitakini. Ninoa kenakotari amarini akiritakiti:

—Peerekari aãuïte Taviini apika mekaniri.

Ininiãkara ninoa omanãkarauata. ¹⁶ Ininiã imisãkiretarina Xesosi:

—Pikenakotatari ikara amarini akiritakiti? —itxana.

—Nikenakotapitikari. Hite atatsopatapekari ia Teoso sãkire iõkatsopatakori: ãtokoriakori, amarini pakini, ninoapeka apaka txariko: “Peerekari iua,” itxanako,

itxa Teoso sãkire iõkatsopatakori. Ininiã Teoso sãkire iaõka ninoa kamanãta. Ininiã erekapitikari ninoa akiritakiti —itxa Xesosi.

¹⁷ Iposo atoko itakanapana. Ìkorape itxa. Itakanapari Xerosareë. Isa aapokotximoni Petãnia inakorimoni. Iuaã itxiaka.

Piko Mina Marito Pirena

(Marko 11.12-14, 20-25)

¹⁸ Katimatinãkata iuaãkana Xesosi sari sitatximoni. Ipixinipokoriti inatxita.

¹⁹ Atamataro piko mina kimapori ìtiniãpo. Isa oamoni txipokori itximini ìkapani. Txamari otsopanani auaro. Iuasaaki itxa:

—Kona kariikaiko —itxaro.

Iuasaakipeka otxiaroka.

²⁰ Imoianariakori ikara itikasaakina, itsorikitaãtana.

—Ii natokopa otxape katimari otxiarokini? —itxanãtana ninoa.

²¹ Ininiã Xesosi:

—Atão nisāpiretai. Teoso sākire hāuikiniā, hīte posotari hīkaminiri mixikanani nikamakiti atoko inakari. Piko mina txiarokini nitxīkitakini atoko, hīposota hīkamini. Teoso sākire iteene hāuikiniā, apiata hīkamako. Hīposotamariko hīpaniātiniri ikira ixirata: “Pōkitikaua. Ipoamoni oka pitxaua.” Iuasaakipekamako ixirata ipoamoni oka itxamauako. ²² Pite atão pauikiniāri Teoso sākire, iua pimisākiretakasaaki, ikinipoko pamanaākiti Teoso sikai —itxa Xesosi.

*Xesosi Paniātakari Moerekakoni
(Marko 11.27-33; Arókasi 20.1-8)*

²³ Xesosi ĩroā Teoso misākiretiko aikotiā. Kākiti oerekasaaki, sasetotxi auīteakori, kiomātxiakori pakini apoka iuaā. Ipimaārina Xesosi:

—Kipaniāpa pikamari ĩkora pikamakiti? Kipa paniātai? —itxarina.

²⁴ Ininiā Xesosi:

—Nota apaka pimarauatako hītemoni. Ātinoka nipimaāiko hīte. Nota pimaākitiko hītemoni hīsāpiretiniāno, nota apaka sāpiretai hīte hīpimaākiti notamoni, ininiā nisāpiretai nota paniātakari uāka apaka. ²⁵ Ia nipimaāi hīte: “Kipa paniātari Xoāoni ipatxisarauatini? Teosokani paniātari Xoāo? Kākitikani paniātari Xoāo?” —itxana.

Ininiā ninoa misākiretakakaua:

—“Teoso paniātari,” aniniā, “Kinirepa kona hāuikatari isākire?” Xesosi txamaua eereka. ²⁶ “Kākitira paniātari Xoāo,” aniniā, apanakini omanatamaua, kotxi ninoa uākatari Xoāo Teoso sākire sāpiretakari ininiua.

Ikara atoko itxana imisākiretakakiniuana. ²⁷ Ininiā apakapapiretana:

—!Aimarotari iua paniātakari.

Ininiā Xesosi:

—Nota apaka kona sāpiretai nota paniātakari uāka.

Iri Sākire Kīpitakari, Iri Sākire Makīpitakati Pakini

²⁸ —Hīxinikariko ia nisāpiretakitiko: Kiki auari ipi imi. Akiritari anekari. “Namarite uatxa piparīkauata nitakare ova auiniātaā,” itxari imi.

²⁹ —Ininiā imi anekari: “!Nisapani. !Ninirekari niparīkauatini,” itxari. Eereka ixinikaxitināta. “Ari, nisapītikako,” ininiā isa iri takaremoni.

³⁰ —Iua kiki akiritari imi maneritakari. Ipaniātari iua atokokana. Iua imi: “Ari, nisapītikako.” Txamari, ĩsari.

³¹ —Ininiā ĩkiripa kamatarari iri paniātakiti? —itxa Xesosi.

Ininiā ninoa kiomātxiakori, sasetotxi auīteakori pakini apakapapiretari:

—Anekarira.

Ininiā Xesosi:

—Atāopitika nisāpiretai hīte. Kīitiriri apokako Teoso auītetxi ininiātaāua hīte apisapanika. Kanokarero apokako Teoso auītetxi ininiātaāua hīte apisapanika. ³² Kotxi Xoāo kapatxisarerini apoka hītemoni. Oerekai erekari kimaporiti. Txamari kona hīte auikari isākire. Kīitiriri, kanokarero pakini auikari isākire. Iuasaaki himarotari ninoa maerekati kamakani takanapiniri imaerekanina. Ikamarina erekarinoka. Hīte itikapekari. Txamari hīte kona takanapari himaerekani. Kona hāuikari Xoāo sākire, ininiā iua kiki sākire makīpitakati atoko hītxa, kotxi hīsākire: “Akīpitapitakari Teoso sākire,” txamari kona hīkīpitari —itxa Xesosi.

*Parīkauatakani Maerekani
(Marko 12.1-12; Arókasi 20.9-19)*

³³ —Āti sāpirenatxi atão inakari oerekiko nisāpiretai. Hīkenakota —Xesosi txana.

—Kiki kakikioteri takaro txipokori ova inakoro. Ovanoka itaka. Iposo atoko ipiriketaro. Eereka iuaātaā ikamari ova katsonakiko. Iposo atoko

ikamari aapokotxi õtanori, ikinipoko itakare atamatini ïkapani. Iposo atoko ïkitxitana kikiãkini itakare nïkatakani ïkapani. Ininiã ninoa nïkatari itakare. Eereka kakikioteri sari ãti itixiti. ³⁴ Ova manapi inakasaaki, iokanatana initiriakori itakare nïkatakanimoni, ova apakapinina ïkapani.

³⁵ —Txamari, ninoa maïkapena initiriakori. Ixirokitatarina ãti. Okapirina ãti. ãti kai soroã ikiporonakana. ³⁶ Iuaïkana iua kakikioteri iokanatana initiriakori. Iuasaaki ito iokanata. Mitxirini atokokana itakare nïkatakani txapena ninoani. ³⁷ Eereka imapotõkire iokanatarimi imi ninoamoni. Iuãkatari: “Namarite iua, ininiã ninoa paxitari iua,” itxa.

³⁸ —Txamari, imi atapakasaakina, imisãkiretakakana: “Erepani imi. Maõkari, ininiã okinika itakare kaikotinaua atemoni.” ³⁹ Ininiã imaïkarina imi. Kikio xiripirexiti anikarina. Iuaã oka itxapirina.

Ininiã Xesosi pimaãri kãkiti iua takote auakani:

⁴⁰ —Ininiã iua kakikioteri ïkasaaki, kiãtokopa itxatanako ninoa kikiãkini? — itxa Xesosi.

⁴¹ Ininiã ninoa iua takote auakani apakapapiretari:

—Kakikioteri okanako ninoa maerekati kamakani. Iikitxitanako apanakini itakare nïkatakani ïkapani, ininiã ninoa sikapitikaroko ova oiõkasaaki — itxarina Xesosi.

⁴² Ininiã Xesosi:

—Hïte atatsopatapekari ia iõkatsopatakori Teoso sãkire:

Kai aapokotxi kamakani kona nirekari ãti kai soro. Iua kai imanirekakiniti kai apiari itxapekaua. Apanakini kai soro maïkakari itxaua. Teosokara txïkitakari ikara atoko inini. Ikara peerekari atemoni.

Nota hïtari iaxitikiri iua kai atoko nitxaua. Peerekari Teoso, kotxi nota hïtari iaxitikiri kãkiti manirekakiniti. Teoso txïkitakano nota apiananiri nininiãua.

⁴³ —Ininiã nisãpiretai hïte, Teoso kona hïauïte !itxaikauako. Iua mereëriko apanakini kãkiti inakitiakori ïkapani. Ninoa kamapitikari Teoso nireëkiti.

⁴⁴ Apikomoni Teoso sãkire iõkatsopatakori sãpiretaua iua kai apiari atoko inakari. Itxari:

Kãkiti iua kai nopini irikasaaki, ikarouata iua. Kai kãkiti nopini irikiniã, !
auaika kãkiti,

—Xesosi txana ninoa.

⁴⁵ Sasetotxi auïteakori, pariseoakori pakini kenakotakasaakiri ikara sãpirenatxi atão inakari oerekiko Xesosi sãpiretakiti, ninoa !apokaerekatarina isãpirena, kotxi imarotarina ninoa takari nïkatakani maerekani atoko inakani itxauana. ⁴⁶ Ininiã ia xika inirekarina imaïkinirina. Txamari !imaïkarina, kotxi ipïkarina kãkiti iuaã apotiitakaniua. Kãkitimoni Xesosi atão Teoso sãkire sãpiretakari itxaua.

22

Kiiniri ïtanorouatiko Pirena (Arókasi 14.15-24)

¹ Iuaïkana Xesosi sãkirauatakasaaki kãkitikata, isãpiretari sãpirenatxi atão inakari oerekiko. Itxari:

² —Teoso auïtetxi ininiãua ia auïtetxi atokokana. Ia auïtetxi kamari kiiniri imi ïtanorouatini ïkapani. ³ Ipaniãtari initiriakori akiritinina ikemaïtxitakini kiiniriã ininina ïkapani. Txamari ikemaïtxitakini !inirekari ikiiniriteë isinina.

⁴ Iuaïkana iokanatarimi apanakini initiriakori ikemaïtxitakinimoni. “Hïtxanako: ‘Nipokori iposopeka. Nokapekari kema auïte, kema auïte ãkiri pakini. Païpepokori. Imakinika niposotapekari. Hïsapoka kiinirimoni,’ hïtxanako.” Ininiã ninoa kamari isãkire iaõka.

5 —Txamari ikemaïtxitakini ! imaãkapiretarina. Iparïkamoni isana. Ätikaka sari kikiomoni. Apanakini sari ätiätaã tiitxi ivëtxitinimoni. 6 Apanakinipekana maïkapena initiriakori, noropata, oka itxapena. 7 Iua auïtetxi ikara inakariene ikenakotakasaaki, iteene inaiataua. Iokanatari isotatoneakori ninoamoni. Ininiã okapena ninoa kokanirini. Iotikapirina ninoa aapoko.

8 —Eereka iua auïtetxi akiritana apanakini initiriakori: “Kiiniri namarite ïtanorouatini pirena iposopeka. Txamari merepitipanika nike-maïtxitakini !erekana. 9 Iua atoko ininiã, hïsa ahoaätaã, kãkiti napanakiniätaã. Hïkemaïtxitana ikinimane haõkitakini,” itxana ninoa.

10 —Ininiã isana ahoaätaã. Ikemaïtxitana ikinimane aõkitakini. Apotiitarina kãkiti itanapoko. Maerekani, erekarini pakini apotiitana. Anikana kiinirimoni, ininiã kãkitipokoni xãpoãkata.

11 —Iua auïtetxi atamatana ikemaïtxitakini. Atamatari kiki mãkatxi ïtanorouatikosaaki ieretaãkori mieretaãkati. 12 Ininiã akiritari iua: “Nimoianari, kiãtokopa piïroã naapoko, kotxi mãkatxi ïtanorouatikosaaki ieretaãkori kona pieretaka?” Iua kona kasãkireri.

13 —Ininiã iua auïtetxi paniätari initiriakori: “Himaïkariko. Hïaxirikariko iuako, ikitinota pakini, anika hïtxariko mapara. Piãkatximoni hõkariko,” itxana initiriakori. Iuaätaã kãkiti txiapatiniätaã, kãkiti akerakitatsiriïtiniätaã.

14 Xesosi xipokapiretari isãpirena.

—Itomaneri kemaïtxitakoni. Txamari poiãoka mereëkoni —itxana ninoamoni.

*Homano Auïte ïkitxitiko Pirena
(Marko 12.13-17; Arókasi 20.19-26)*

15 Ninoa pariseoakori sipeka. Eereka apotiitauana. Imisãkiretakakana. Ixinikaxitinãtarina:

—Anirekari Xesosi kerokiniri isãkire, aãpoïtiniri ïkapani. Ininiã kiãtokopa atxatari apimainiri ikerokiniri ïkapani? —itxanãtakakana.

16 Ininiã ninoa pariseoakori paniätana ätikaka ninoa oerekakini, apaka ätikaka Erotxi sãkire auiãkani, Xesosimoni isinina ïkapani. Ininiã isana iuamoni. Imisãkiretarina. Pariseo sãkire iaõka isãpiretana.

—Koerekareri, aimarotari atãoenepitikara pisãkire. Atãoenepitikara pisãpiretari Teoso nireëkiti akamini ïkapani. Pite na pïkarauata xatiki kãkiti sãkire xika. Ätinoka pisãkire pisãpireta ikinakariti kãkitimoni. Apanakinimoni pisãpiretakiti iuatxikana pisãpiretari apanakininapemoni.

17 Ininiã pisãpiretaua. Atãokani txineiro asikini Homanoakori auïtemoni, Sesa inakorimoni? Apakata amasikakaniri iuamoni? —itxarina iua.

18 Xesosi imarotari ninoa nirekari ikerokiniri isãkire. Ininiãkara itxana:

—Kinirepa hinirekari nikerokiniri nisãkire? Kona erekai hïte. Hïsäkirauatakasaaki, kãkiti erekarini atoko hïtxa, txamari maerekati hïkama.

19 Hõerekano txineiro ota Homano auïte asikini ïkapani.

Ininiã iminarona txineiro ota.

20 —Kisanõkapa ia? Kiuãkapa aua uai? —itxana ninoa.

21 —Ari, Homano auïte —itxana.

—Ininiãkara hïsikariko Sesamoni iua nakiti. Hïsikariko Teosomoni iua nakiti —Xesosi txana ninoa.

22 Ikara apakapapirenatxi ikenakotakasaakina itsorïkaãtana.

—Paimatireri iua —itxanãtakakana.

Ininiã itakanaparina, sipeka itxana.

*Ipïkari Ökitikiniua Mauïkakoni
(Marko 12.18-27; Arókasi 20.27-40)*

²³ Iua õtisaakipeka ãtikaka satoseo apoka Xesosimoni. Satoseo inakoni ! auikari ipĩkani iuaĩkana õkitikiniua.

²⁴ —Koerekareri, Moisesinira oerekari ia sãkiretxiti: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipĩpekarini uãka,” itxa Moisesini. ²⁵ Setxi itaritxi-akori aua mitxi ãkorapokoriti. Apia anakatakari ãtaniriuata. Eereka ipĩpe meenetika, ininiã itari takaro iuani tikinitakito. ²⁶ Iua atokokana iua itari ipĩpe meenetika. ãti itari iuaĩkana takaro iuani tikinitakito. Txamari iua atokokana ipĩpe meenetika. Iua atokokana txaãpota ikinika itariakori. ²⁷ Eereka oa sito apaka opĩpe. ²⁸ Ininiã ipĩkani iuaĩkana õkitikasaakia iuaĩkana auãki ininina, ãkiripa õtaniri aua oakata iuasaaki? Kotxi ikinimane ninoa setxi itariakori takapekaro oa —itxarina iua.

²⁹ Ininiã Xesosi:

—Hĩte kerokari, kotxi !himarotari Teoso sãkire iõkatsopatakori. !Himarotari Teoso posotiire apaka. ³⁰ Ipĩkani iuaĩkana aua inakasaaki, kona ninoa ãtaniriuataika. Teoso nitiriakori iaxitikini atokopeka itxanako. ³¹ Hĩte !auikari ipĩkani õkitikiniua iuaĩkana auãki inini. Atauako kona hãtatsopatapanikari Teoso sãpiretakiti hĩtemoni? Iara isãpiretai:

³² Apraõo, Isaki, Xakoo pakini Teosonekarano nota, itxa Teoso. Ininiã Apraõo, Isaki, Xakoo pakini auãkipanika itxana, kotxi auãki inakani Teosonera iua. Ninoa uatxa auãki inakani, kotxi kona ipĩkani Teosoneni Teoso —itxa Xesosi.

Iuasaaki kãkitipokoni kenakotari ikara Xesosi sãkire. ³³ Xesosi sãkire ikenakotakasaakina, itsorĩkaãtana, kotxi paimatireri Xesosi apakapapiretakiti satoseoakorimoni.

*Teoso Paniãtakiti Apiari Akamini
(Marko 12.28-34)*

³⁴ Xesosi iikiteritika apakapapiretari satoseo pimainiri, ininiã satoseo !pimarauataika. Pariseoakori kenakotari ikara, ininiã apotiitauana. ³⁵ Pariseo, Moisesi sãkire oerekakari, iua nirekamari Xesosi kerokiniri isãkire. Ininiã ipimaãri:

³⁶ —Koerekareri, ãkiripa Teoso paniãtakiti apiari txataua? Kipa apiaerekata Teoso nireẽkiti akamini? —itxa.

³⁷ Ininiã Xesosi apakapapiretari:

—“Pitiretariko Apiananiri piTeosone, ikinipoko pinireẽkitiã, ikini pãkixinireẽ, ikinipoko pixinikakitiã pakini.” ³⁸ Ikara atoko inakari Teoso merepitipanika paniãtaua akamini. Ia ipaniãtakiti akamini apiari itxaua. ³⁹ Iuaĩkana Teoso paniãtaua. Ia ipaniãtakiti apaka apiari. Merepanika ipaniãtakiti akamini atoko itxa. “Piteka pitiretiniãua atokotxikana, pitiretariko ãti.” ⁴⁰ Iteene atiretiniãri Teoso, iteene atiretiniãri ãti, ininiã akamapitikari apanakini Teoso paniãtakiti, Moisesinimoni isãpiretakiti. Iteene atiretiniãri Teoso, iteene atiretiniãri ãti, ininiã akamapitikari Teoso sãkire sãpiretakani paniãtakiti apaka —Xesosi txari iua.

*Teoso Mereẽkiti Tavii Apika Mekaniri
(Marko 12.35-37; Arókasi 20.41-44)*

⁴¹ Pariseoakori apotiitapanikaua inakasaaki, Xesosi pimaãna ninoa:

⁴² —Teoso mereẽkiti pisãpiretano. Kiripa apika mekaniripa iua? —itxana ninoa.

Ninoa apakapapireta:

—Ari, Taviini apika mekanirira —itxana.

⁴³ Ininiã Xesosi:

—Ikara atoko ininiã, kinirepa Erekaru Matamatakoti kamasãkiretari Tavii: “Teoso mereëkiti niauïte itxaua,” ina sãkiretini? ⁴⁴ Kotxi Tavii txari: Apiananiri misãkiretari niauïte: “Nota kikomoni piitopãkiniritika nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niauïte, itxa Taviini. ⁴⁵ Ininiã Tavii akiritari Teoso mereëkiti “niauïte.” Ikara atoko ininiã, kiãtokopa itxa Teoso mereëkiti Taviini apika mekaniri ininiãua? — Xesosi txari pariseoakori.

⁴⁶ Kona imarotarina, ininiã kona kasãkirena ninoa. Ikara eereka kona kãkiti pimarauataika Xesosimoni, kotxi ipïkarina Xesosi imarore.

23

Xoteo Auïteakori Maerekani (Marko 12.38-40; Arókasi 11.37-54; 20.45-46)

¹ Ininiã Xesosi misãkiretana imoianariakori, itomaneri kãkiti iuaã auakani apaka. ² Ia atoko isãpiretana:

—Kaiõkatsoparerini, pariseoakori pakini, Moisesini sãkire oerekakani itxauana. ³ Ininiãra ikinika kaiõkatsoparerini, pariseoakori pakini paniãtakiti hïkamako, kotxi ninoa sãpiretari Moisesini sãkire Teoso oerekakiti. Ikara erekari. Txamari kona ninoa kamari Moisesini paniãtakiti. Ikara !erekari. Ininiã ninoa kamakiti atoko !hïkamape. Kotxi isãkirena erekari, txamari ikamakitina !erekari. ⁴ Ninoa kaiõkatsoparerini, pariseoakori pakini, kiki ia atoko inakari ninoa. Ia kiki takari iminani imoianariakori porikiã, txamari iuaka na xatiki nirekari iporikitiniri. Kaiõkatsoparerini, pariseoakori pakini, ikara kiki atoko itxana. Ninoa paniãtakiti iua iminani atoko itxa.

⁵ —Pariseoakori kamari erekari apanakini atamatini ïkapaninoka, ereka ininina apanakini uãkatini ïkapaninoka. Himarotari kãkiti ieretakari Teoso sãkire iõkatsopatakori aãkoana xapitikiri ãki. Eereka iaxirikarina iteëtaãna, iuakonotaãna pakini. Ninoa kaiõkatsoparerini, pariseoakori pakini takari aãkoana mitari apanakini atamatini ïkapaninoka. Païtanori itsarãpe imãkana apanakini atamatini ïkapani. ⁶ Kiinirisaaki ninoa nirekari kãkiti potxitiniãtaã iitopãkinina. Aiko ãki Xoteoakori apotiitiniãtaãua inirekarina kãkiti potxitiniãtaã iitopãkinina. ⁷ Apokaerekatarina okapiretikona ipaxitikona kienatxi vëtxitikoãtaã. Apokaerekatarina kãkiti akiritinina: “Koerekareri” inikona.

⁸ —Txamari, ãtinani hïte oereëkari txaua, Teoso mereëkitira iua. Koerekareri hiniko !hãuiritapeko, kotxi himakinikara hïtaritakakaua. ⁹ Kona ïkorapokoriti auakari “niri,” !hïtxape, kotxi ãtinani aïri auari iaxiti auakari. ¹⁰ Apaka apanakini akiritinii “aãuïte,” !hãuiritapeko, kotxi ãtinani hãuïte. Teoso mereëkiti itxaua. ¹¹ Auïtetxi pininiua pinirekiniã, apanakini nitiri atoko pitxauako. ¹² Iua “Auïtetxi nitxaua,” inakari, Teoso txïkitakariko nitiritxi itxauako. Iua “Nitiritxi nitxaua,” inakari, Teoso txïkitakariko auïtetxi itxauako.

Xoteo Auïteakori Misiritaãkako (Marko 12.40; Arókasi 11.37-44, 52; 20.47)

¹³ Iuaïkana Xesosi sãkirauata:

—Erepaniko hïte kaiõkatsoparerinii, pariseoakorii pakini. Hïsãkire atxiïti erekari, txamari kona hïkamari hïsãkire iaõka. Kinirão ïroãkari apisapanika aapokotxi tore totakani atoko hïtxa, kotxi hïte iotokakari kãkiti Teoso sãkire atão auikini, ininiãkara hïte iotokakari kãkiti ïroini Teoso auïtetxi ininiãtaãua. Hïte kona ïroã. Apaka kona hïte auiritana kinirão ïroãkani. ¹⁴ Erepaniko hïte kaiõkatsoparerinii, pariseoakorii pakini. Hïsãkire atxiïti erekari, txamari kona hïkamari hïsãkire iaõka. Hïte mixirikari tikinitakoro aapoko. Himisirienetana.

Teosokata hīsākirauatakasaaki, itori sākiretxi hīkama apanakini, “paimatirena” inini ĩkapaninokara. Ikara xika himisiritiko apiatako.

¹⁵ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hīte sari ōtakoxiti. Hīpiriātari kāuaāri. Imiriī ōtakoxiti hīsa, hīsākire auikakari hinitini ĩkapani. Ātinoka hīsākire auikakari auiniā, iuaritika hīsa iuaxiti. Eereka hōerekari iua ikinipoko himarotakiti. Eereka hīte maerekani xika, iua kiki maerekani apiatako. Isapitika hītekata maerekani misiritikoātaā.

¹⁶ —Erepaniko hīte. Mōsiāreni atoko hītxa, iuaritika hinirekari hōerekiniri Teoso kimapore apanakinimoni. !Hīposotari. Hīte oerekari apanakini ia hīsākire: “‘Ia nikamapitikako’ pinakasaaki, Teoso misākiretiko aikoti pakiriuākatakasaaki, pimamakamaniāri, kona pimisiritaākako,” itxa hīte sākire. Iuaīkana hīte sākire: “‘Nikamapitikariko,’ pinakasaaki, Teoso misākiretiko aikoti āki auakaro oro pakiriuākatakasaaki, pikamapitikariko pikamaenetakiti. Ikara pimamakanisaaki, pimisiritaākako,” itxa hīte sākire.

¹⁷ —Hīte mōsiāreni atoko. Kona kiīkitei hīte. Īkiripa apiari? Orokani? Teoso misākiretiko aikotikani? Teoso misākiretiko aikoti apiari, kotxi oa oro aiko āki aua, ininiā aiko txīkitakaro oro Teoso nakito oniniāua.

¹⁸ —Hīte oerekari apanakini ia hīsākire apaka: “‘Nikamapitikariko’ pinakasaaki, Teosomoni sikakori takikoātaā pakiriuākatakasaaki, pikamaenetakiti pimamakaniā, kona pimisiritaākako. ‘Nikamapitikako’, pinakasaaki, Teosomoni sikakori takikoātaā nopini takakori pakiriuākatakasaaki, pikamapitikariko pikamaenetakiti. Pimamakanisaakiri, pimisiritaākako,” itxa hīte sākire.

¹⁹ Hīte mōsiāreni atoko hītxa. !Kiīkitei hīte. Īkiripa apiata? Sikakorikani? Sikakori takikoātaākanani? Sikakori takikoātaā apiata, kotxi sikakori inopini takikosaaki, iusaakipeka Teoso nakitipeka. Ininiā sikakori takikoātaā txīkitakari sikakori Teoso nakiti ininiāua. ²⁰ Ininiā pisāpiretakasaakiri Teoso pikamaenetakiti, Teoso sikakori takikoātaā pakiriuākatiniā, iuatxikana iua nopini auakari pakiriuākata. ²¹ Pakiriuākatakasaakiri Teoso misākiretiko aikoti, iua atokotxikana pakiriuākatari Teoso, kotxi iua aiko āki aua. ²² Pakiriuākatakasaakiri Teoso tixine, ininiā iua atokotxikana pakiriuākatari Teoso topākini. Iua atokotxikana pakiriuākatari Teoso, kotxi Teoso topākini nopini iitopāka Teoso.

²³ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Ipixini hinakiti hīsikari Teosomoni. Tesi hīti auiniāi, hīsikari āti Teosomoni. Tesi txineiro ota auiniāi, hīsikari āto Teosomoni, hītxaāpota. Ikara hīkamakiti erekari. Nipokori koke, oteraā, erva tosi, komínio, axapitikiri inakari, iuaritika ipixini hīsika Teosomoni. Ikara Teoso paniātakiti hīkamapitika. Txamari, Teoso paniātakiti apiari !hīkama, kotxi !hīkamari atāo apanakinimoni. !Hiamonīkana apanakini. Hīkamaenetakiti !hīkama. Ikinika Teoso paniātakiti hīkamako. ²⁴ Mōsiāreni atoko hītxaua, iuaritika hinirekari hōerekiniri Teoso kimapore apanakinimoni. ! Hīposotari. Himakatzakaro xikiri iāriā āki komokakaro, txamari hīxirapoataro kamero, kotxi Teoso paniātakiti poiāori hīkama, txamari ipaniātakiti apiari kona hīkama.

²⁵ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hōeretari hīto maparakiri, txamari hākixinireē !erekari. Papotxinanii, patirenanii, paītirii. ²⁶ Hīte pariseoakorii, mōsiāreni atoko hītxa. Merepitipanika himakatzakariko maerekati hākixinire auakari, ininiā hīto erekatxikana. Hākixinire ereka ininiā, hīkamakiti ereka apaka.

²⁷ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Kai auīte iriko, ipīkari takikoātaā atoko hītxa. Mapara txīta kasarori minapaākapeka, ininiā mapara peerekari. Txamari, iriko āki ipinakari api, arakapoakatakari aua. ²⁸ Iua atokokanera hītxa. Kākiti uākatai hīte atāo inakaranoka kamakani hininiua, kotxi hinopini ererini hītxa. Txamari, hākixinire !ereri, kotxi maerekatinoka hīkama. Hīsākire atxiīti erekari, txamari kona hīkamari hīsākire iaōka — itxa Xesosi sākire.

Xoteo Auīteakori Misiritiko
(Arókasi 11.47-51)

²⁹ Iuaīkana Xesosi sākiraauata:

—Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hīkamari akauari Teoso sākire sāpiretakanini īkapani. Peereri akauari hīkama. Hīkamari akauari ipīkani atāo inakaranoka kamakani īkapani. Txīta himinapa akauariā. Aāui hītaka iuaātaā.

³⁰ Hītixari: “Kitxakapirīka aātokiriakorini okana Teoso sākire sāpiretakani. Atepitika auaākamako iusaaki, konimako ate okana ninoa,” hītxa. ³¹ Teoso sākire sāpiretakanini okakani mekaniriakori hītxa hīte. Kotxi hītekara txari: “Aātokiriakorini okana Teoso sākire sāpiretakani.” Hīte maerekati kamakani ninoa atokokana hītxa. ³² Hātokiriakorini mipotorikari Teoso sākire sāpiretakani okinina. Hīte xipokapanikanako ātikaka kaikotakani Teoso sākire sāpiretakani.

³³ —Imini atoko hītxa. Imini anaakori atoko hītxa hīte. Himisiritākapitikako maerekani misiritikoātaā. Himitekini ! auari. ³⁴ Ininiā nisāpiretai hīte. Niokanatanipani hītemoni Teoso sākire sāpiretakani, Teoso iokanapirena imarotakani, koerekarerini pakini niokanata hītemoni. Txamari ātikaka hōka, aamina ipiriāmitakari nopini hītokitana apanakini. Apanakinipekana hīxirokītata aiko Xoteo apotiitiniātaāua. Eereka hāsikatikinitana ninoa āti sitatxitimoni sikani, eereka āti sitatxitimoni, eereka āti sitatxitimoni hītxaāponāta ninoa hāsikatikinitini. ³⁵ Ininiā hīte misiritaākako ikinika atāo inakari kamakani okiko xika. Kitxakapirīka Apeo inakorini okapeēka. Atāo inakari kamakari iua. Ikinimane okapekoni tikinimoni okapeēka Sakariani, Parakia ākiri. Iua Sakariani okapeēka sikakori takikoātaā takote Teoso misākiretiko aikoti āki. ³⁶ Atāopitikara nisāpiretai hīte. Kākiti uatxa auakani apakapariko misirikaretxi ninoa erekarini okapekoni xika —itxa Xesosi sākire.

Xerosareē Xesosi Tiretini
(Arókasi 13.31-35)

³⁷ Iuaīkana Xesosi sākiraauata:

—Xerosareē auakanii, Xerosareē auakanii, hīte okapekana Teoso sākire sāpiretakani. Kai soroā hīkiporonakana ninoa hītemoni Teoso iokanatakini. Kaiōkatani ninirekamari ninīkatini, patari oimiakori omīkita patapi otakini atokokana nitxanakamaiko hīte. Txamari !hāuiritano nota nīkatini. ³⁸ Ikara atoko inakari xika haāpoko asikaākako. Teoso !auaika hītekata. ³⁹ Nisāpiretai. Ia ōti hātamatano, eereka !hātamataikano. “Teoso takari erekari uaimoni īkarimoni, Apiananiri posotiireē īkarimoni,” hinakasaaki, iusaakinanirako hātamatanoko nota —itxa Xesosi.

24

Teoso Misākiretiko Aikoti Irikiko
(Marko 13.1-2; Arókasi 21.5-6)

¹ Teoso misākiretiko aikoti Xesosi potorikasaakipeka, imoianariakori apoka iuamoni.

—Patamata. Peerepokori aikoniri —itxarina.

² Ininiã Xesosi:

—Ari, hãtamatatari ere aikoniri? Atãopitikara nisãpiretai hãte. Koniko kai kaikotapani ãti kai nopini. Imakinika kai irikaãkako —itxana.

Misirikaretxi Apokaenetini

(Marko 13.3-13; Arókasi 21.7-19)

³ Iposo atoko Xesosi sari oxiratarimoni, Oriva inakorimoni. Iuaã topãka itxa. Imoianariakori sari iuamoni. Ninoanoka auari iuaãtaã.

—Pisãpiretaua kirisaakiparako aiko Teoso misãkiretiko irikataãkako. Natokopa ininiãparako ate imarotatari pite kaiama kanapirikape pinini? Natokopa ininiãparako aimarotatari itixi xipokini õti kaiamapeka inini õti? —itxarina Xesosi.

⁴ Ininiã Xesosi:

—Erepaniko. !Hãuiritapena apanakini misirienetini. ⁵ Kotxi apokako kãkiti itomaneri “Teoso mereẽkiti nitxaua nota,” inakani. Ninoa misirienetana itomaneri. ⁶ Hãkenakopiretariko neenamatzixi ene uaimoni, õtakoxiti apaka. Iuaritika !hãpãkarauatape. Kotxi auapitikako neenamatzixi. Txamari itixi xipokini õti !apokapanika. ⁷ Ikara inakari apisapanika, ãti uãka neenamauatako ãti uãkakata. Apanakini auãte inirimanekata neenamauatako apanakini auãtekata inirimane pakinikata. ãtiãtaã kãkiti inikoriãriko natxi. ãtiãtaã amianari inokanako kãkiti. ãtiãtaã itixi iakeẽkatakako. ⁸ Ikara atoko itxako misirikaretxi potarikini. Sito amarini tsii atoko itxako iusaaki.

⁹ —Iusaaki hãte maãkaãkako, himisiritiko ãkapani. Iposo atoko oka hinaãkako. Nisãkire hãuikini xika ikinimane omanataiko hãte. ¹⁰ Iusaaki itomaneri !auikaikari Teoso sãkire. Itakanapapekarina Teoso kimapore. Imãkapiritakakanako. Omanatakakanako. ¹¹ Apokako kãkiti “Nota Teoso sãkire sãpiretakari nitxaua,” inakari. Txamari kona atão. Ninoa misirienetanako itomaneri kãkiti. ¹² Kãkiti tiretiko poiãotako, kotxi maerekanitxi iarikako ikini itixitimoni. ¹³ Iusaaki kãkiti mĩteenekiniãri misirikaretxi, imatakana-pakaniãri Teoso sãkire, auapikako ãtipirika Teosokata. ¹⁴ Teoso iokanapirena erekari, Teoso auãtetxi ininiãua, sãpiretaãkako ikini itixiti auakani, ikini kãkititi imarotiniiri ãkapani. Ikara inakari auaãka atokoikarako itixi xipokini õti apokako.

Iteene Maerekanitxi Apokini

(Marko 13.14-23; Arókasi 21.20-24)

¹⁵ Xesosi sãpirenauatapanika:

—Hãte itikariko iteene maerekati kamakari timini aiko Teoso misãkiretiko ãki. Kitxakapirãka Tanieo inakori, Teoso sãkire sãpiretakari, sãpiretpekari ikara ene. Hãte ia atatsopatakani, himarotariko ikara. ¹⁶ Ikara atoko inakari hãtikasaaki hãte ãkorapokoriti Xotéia auakani, oxiratarimoni himitekako. ¹⁷ Ikara õti apokasaaki haãpoko nopini hãuiniã, katima hãtxako himitekini. !Apakata haãpoko ãki hãtii himakatzakini. ¹⁸ Kikio hãparãkauanãtakasaaki, hãapokomoni !hãkanapiripe himãka hãpini ãkapani. ¹⁹ Ikara õti apokasaaki, kamixironi, kaxitakareroni pakini iteene atatsiitariko. Pasãpaniri ninoa mitekini. ²⁰ Hamanaãriko Teoso katxãkareri mauakani himitekini õtisaaki. Hamanaãriko tomatiko õtisaaki ikara inakari mauakani ãkapani. ²¹ Kotxi ikara mitekatzixi õtisaaki kãkiti iteene atatsiitariko imisiritiko. Ikara õti apisa kãkiti !imarotari iteene imisiritiko. Itixi kamikosaakipanika !auari ikara atoko inakari misirikaretxi. Ikara mitekatzixi õti napaãka atoko kãkiti !imarotaikari iteene imisiritiko. Ikara õti apiatako kãkiti misiritiko. ²² Teoso poiãotakari iua õti ikinipoko kãkiti mapinakanani ãkapani. Ito õti ininiã, kãkiti !auaika. Ipoiãotakari iua õti, kotxi itiretana kãkiti imereẽkini.

²³ —Iuasaakiko āti: “Ia kiki Teoso mereēkiti aiātapakiti inakari,” inakasaakii, !hāuikapiri. Ātipekana: “Ikira Teoso mereēkiti inakari,” inakasaakii, !hāuikapiri. ²⁴ Kotxi apokako kākiti paxirari kamakari, “Teoso mereēkiti hiātapakitino nota,” inakari, “Teoso sākire sāpiretakari nitxaua nota,” inakari. Ninoa kamariko posotiiretxi kākiti tsorikitaātini ĩkapani. Inirekarina kākiti Teoso mereēkini imisirienetinina. ²⁵ Hīkenakota. Nōtākikai hīte ikara inakari apokini ōti apisa.

²⁶ —Hīte sāpiretikosaaki: “Hīkenakota. Teoso mereēkiti aiātapakiti āparaā makipakaniātaāpekarari,” hinikosaaki, !hīsipe iuaā. Hīsāpiretikosaaki: “Iriko ākirari iua,” hinikosaaki, kona hāuikapiri. ²⁷ Kotxi nota hītari iaxitikiri nikanapiriākasaaki, !ikara atokoni nitxa. Mēkokari atoko itxa nota hītari iaxitikiri nikanapiriākasaaki, kotxi mēkokari atokatxi pokīkinimoni imēkoka, isapitipo atokatxi ereēkokinimoni, ininiā ikinimane itikariko. Iua atokokana nota hītari iaxitikiri napokini. Ikinimane itikanoko nota. ²⁸ Aātamatakasaakiri maiori apotiitiniua, aimarotari ipīkari iuaātaā auini. Iua atokokana nota kanapiriākasaaki, ikinimane imarotari napokini.

Kākiti Itari Iaxitikiri Kanapiriini
(Marko 13.24-27; Arókasi 21.25-28)

²⁹ Xesosi sāpirenauatapanika:

—Apikomoni nisāpiretai nikanapiriini pirena. Iua inikoriākori napaka atoko, atokatxi piākako. Kasiri kona ponikaikako. Iōriki iaxitikero irikako. Iaxiti iōriki auiniātaā auakari iakeēkatako. ³⁰ Iuasaaki Teoso takaōtxikare auako iaxiti, nota hītari iaxitikiri kaiamapeka uai nikanapiriini himarotini ĩkapani. Ikara atoko inakasaaki, ikini kākititi itixi auakani txiapatako, kotxi ninoa atapanoko nota kākiti itari iaxitikiri katxiāri āki nikatxakaāpotini. Nitapararitika napoākatako, kotxi ikinimane auīte nitxauako iuasaaki. Niotximerekata nikatxakaāpota. ³¹ Okenakotaākako koitxi mitaro, trōpeta inakoro. Iuasaakipekako niokanatanana ninitiriakori itixi iaōka kākiti Teoso mereēkini apotiitakani ĩkapani.

Piko Mina Pirena
(Marko 13.28-31; Arókasi 21.29-33)

³² Xesosi sāpirenauatapanika:

—Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini ĩkapani. Pooīoporipeka onakasaaki, otomorekasaaki, “Kamoī apokanapanoka,” hītxa. ³³ Iua atokokana, ikara misirikaretxi mixikanani nisāpiretakiti hītikasaaki, himarotapekariko nota kaiama kanapirikapeka ninini. ³⁴ Ia nisākire atāo. Itixi auakani !ixipoka ikinipoko nisāpiretakiti mapokakani apisa. ³⁵ Iaxiti xipokapitikako. Īkoraxiti apaka xipokapitikako. Iuaritika nota sākire !ixipoka.

Kākiti Iimarotari Xesosi Apokini Manapi
(Marko 13.32-37; Arókasi 17.20-37)

³⁶ Xesosi sāpirenauatapanika:

—Kākiti !imarotari ikara ōti, nota hītari iaxitikiri nikanapiriini ōti. Teoso nitiriakori iaxitikini apaka !imarotari ikara ōti. Nirinanira imarotari. ³⁷ Nota hītari iaxitikiri nikanapiriākasaaki, kitxakapirīka Noee auakasaaki atoko itxako. ³⁸ Xirataātxi apisa ikinimane nipokota, iāta itxa. Kiki, sito ĩtaniriua. Ikara atokokanera itxa Noee maporo āki iereētini ōti. ³⁹ Ikara apisa !imarotarina ipininina tīkane. Mokatanitika xirataātxi apoka, ikinikana xipoka itxana. Nota hītari iaxitikiri nikanapiriākasaaki, iua atokokanerako itxa, ininiā iposope hītako.

⁴⁰ —Iuasaaki nikanapiriini ōtisaaki, ipi kiki parīkauanāta kikio. Teoso nitiri iaxitikiri anikariko āti, āti kaikota itxako. ⁴¹ Ipi sito atarokiri kamakani, āto anikaākako, āto takanapaākako. ⁴² Ininiā iposope hītxako, kotxi kona himarotari hīauīte kanapiriini ōti. ⁴³ Hīxinikariko. Kaapokori imarotaākamariko kiītiriri apokini ōti, !imakamako. !Auritamariko kiītiriri anikiniri itii. ⁴⁴ Kiītiriri apoka kākiti miātapakinitipanika. Iua atokokanerako nota apokako himimarotakinitipanikarako. Ininiā iposope hītxako nota hītari iaxitikiri hiātapini —itxa Xesosi sākire.

Nitiritxi Erekarī, Nitiritxi Maerekati Pakini
(Arókasi 12.41-48)

⁴⁵ —Ininiā Teoso nitiriakori erekarini hītxauako. Nisāpiretai nitiritxi kimaroreri inakari, kotxi iua kīpitari ipatrāote sākire. Iuakara ipatrāote paniāta, apanakini initiriakori inīkatini īkapani. Isikakienatana ipatrāote nitiriakori, nipokori sikiko manapi. ⁴⁶ Iua initiri poxokoniuata ipatrāote paniātakiti iaōka ikaminiā, ipatrāote apokasaaki iposope itxa. ⁴⁷ Atāopitikara nitxai hīte. Iua patrāo paniātariko iua initiri ikinika inakiti inīkatini īkapani. ⁴⁸ Nitiritxi maerekatipekana xinikari: “!Katimari ikanapiriā nipatrāote,” itxa. ⁴⁹ Ininiā apanakini nitiritxi ixiroka. Inipokota, iāta poātakanikata. ⁵⁰ Ininiā ipatrāote kanapiriāko imiātapakinitipanika. Ikanapiriāko initiri mimarotakinitipanika. ⁵¹ Ininiā ipatrāote xirokitatariko aāpitsaā. Iposo atoko imisiritaākako maerekanikata, “Erekapitikaua ate,” inakanikata. Iuaā kākiti txiapata, akatsatsiriītaua ātipirika. Ininiā ikara nitiritxi maerekati atoko kona hītxape —itxa Xesosi sākire.

25

Tesi Ātokoroakoro Pirena

¹ Xesosi sāpirenauatapanika:

—Ia nisāpirena oerekai Teoso auītetxi ininiāua. Tesi ātokoroakoro kosekari tirikapi. Isana kimaporiā. Iātaparina ipatrāotena. Iua inapanikako kiinirimonī ītanorouatini īkapani. ² Sīko ātokoro kiīkiterini, sīko miīkiteni. ³ Miīkiteni anikari tirikapi koana, txamari !anikarina tirikapiā. ⁴ Kiīkiterini anikari tirikapi koana. Apaka anikarina tirikapiā. ⁵ Ipatrāotena !katimari apokini. Ininiā itaponoka ininiāna, imakanātana.

⁶ —Apanīkanōka ikenakotarina: “Apokanapanoka. Hīsapoka. Hāpiākatari.”

⁷ —Ininiā ātokoroakoro ōkitikaua, tirikapi iopotokaka, sa itxana. ⁸ Ninoa miīkiteni amanaāri kiīkiterini tirikapiāte, kotxi miīkiteni tirikapite oakaarita.

⁹ —Kiīkiterini apakapapiretana: “Kona. Tirikapiā ate nakiti !apakata hīte īkapani. Ate īkapaninokara apakata. Hīsa tirikapiā vētxitakarimoni. Hiamotariko.”

¹⁰ —Ininiā ninoa miīkiteni sari tirikapiā iamotinina. Ninoa sikasaaki, ipatrāotena apoka. Ātokoroakoro iposope inakani īroā iuakata aapokotxi āki ītanorouatakari kiiniritiā. Itore totaāka.

¹¹ —Eereka ātokoroakoro tirikapiā amotakani kanapiriā. Ninoa akirita: “Patrāo, patrāo, pimatakakināua itore aīroini īkapani,” itxana.

¹² —Ipatrāotena apakapapireta: “Hīsipeka. Atāo nisāpiretai. !Nimarotai hīte.”

¹³ Xesosi sākiraūata:

—Erepaniko. Iposope hītxako, kotxi !himarotari nota hītari iaxitikiri kanapiriini ōti. !Himarotari amonikitaūako napokini —itxa Xesosi.

Ipi Āti Pakini Nitiritxiakori
(Arókasi 19.11-27)

¹⁴ Xesosi sãpirenauatapanika:

—Nikanapiriini ia atoko itxapaniko. Kiki aiamatapeka õtakoxiti ãti itixitimoni isini ïkapani. Ininiã akiritari initiriakori. “Hinïkatariko ikini nitii,” itxana. ¹⁵ Isikari initiri apia imaroretakari txineiro ota sïko mio. ãti initiri isika txineiro ota ipi mio. ãti initiri poiãoka imarotakari ãtika mio txineiro ota isikari iua. Eereka sipe itxa.

¹⁶ —Sïko mio apakapakari amotari tiitxi, eereka vëtxita itxari. Ikara atoko ininiã apakaparo txineiro ota tesi mio. ¹⁷ Iua ipi ãti mio apakapakari iua atokokana itxa. Iua apakaparo ipi ipi pakini mio txineiro ota. ¹⁸ Iua ãtika mio txineiro ota apakapakari, ikisakari kipatxi, taka itxaro txineiro iua aariko ãki. Ikataro ipatrãote txineirote.

¹⁹ —Eereka okananixiti inaka atoko ipatrãotena kanapiriã. Akiritana: “Kiãtokopa hïtxataro nitxineirote?” itxana. ²⁰ Iua sïko mio apakapakari minari tesi mio. Iua sãpiretari ipatrãote: “Patrão, pite sikano sïko mio txineiro ota. Patamata. Napakapari apikomoni sïko mio txineiro ota pite ïkapani,” itxa.

²¹ —Ipatrãote apakapapiretari: “Erekapitikai pite. Erekarini nitiritxi pitxaua. Erekarini pinïkatini nitxineirote. Erekapitikari pinïkatini poiãoka nisikinii. Ininiã nauiritaiko itomaneri pinïkatini. Ininiã pipoxokoniatako notakata,” itxa.

²² —Iua ipi mio ota apakapakari apoka. Iminaro ipi ipi pakini mio. Isãpiretari ipatrãote: “Patrão, pite sikano ipi mio txineiro ota. Patamata. Apikomoni nota apakaparo ipi mio txineiro ota pite ïkapani,” itxa.

²³ —“Erekapitikai pite. Erekarini nitiritxi pitxaua. Erekapitikari nitxineirote pinïkatini. Erekarini poiãoka pinïkatini. Ininiã itomane nitakanapako pinïkatini ïkapani. Ininiã pipoxokoniatako notakata,” itxa.

²⁴ —Eereka iua ãtika mio txineiro ota apakapakari apoka. Iua sãpiretari ipatrãote: “Patrão, nimarotai pite. Pataparaxinirei pite. Pite amotari pikiena, kotxi kona pite takarauata. Pite apari pikiena pimaparïkauatakaniãtaã. ²⁵ Nipïkarauatiniã, nikipataro pitxineirote kipatxi ãki. Patamata. Oia pitxineirote,” itxa.

²⁶ —“Nitiritxi maerekati iareri pitxaua pite. Pimarotari niamotiniri nikiena, kotxi ! nitakarauata. Pimarotari nota apari nikiena nimaparïkauatakaniãtaã. ²⁷ Ikara atoko ininiã, pimanirekakaniãri piparïkauatini, kinirepa kona pisikatari nitxineirote pãkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa.

²⁸ Ininiã ãti ipaniãta:

—“Pimakatxakariko iua mio ãtika mio auakiti. Tesi mio txineiro ota auakitimoni pisika. ²⁹ Kotxi apikomoni isiãkako iua itomaneri auakiti, ininiã apiata auinariko iua. Iua poiãoka auakiti, inakito mixirikaãkako. ³⁰ Ia ninitiri iareri hõka mapara piãkatximoni. Iuaã kãkiti txiapata. Akerakitatsiriãta itsii xika.”

Ikinimane Apotiitaãkako Xesosi Apisatoõ

³¹ Apikomoni Xesosi sãpirenauata:

—Nota hïtari iaxitikiri nikanapiriãkasaaki auïtetxi ninakasaakiua, ikinika Teoso nitiriakorikata, niitopãkako auïtetxi itopanere nopini. Peerekari iusaaki. Ikinimane paxitanoko nota. ³² Ikini uãkati kãkiti apotiitaãkako nota apisatoõ. Iusaaki nikaiarikitatanako ninoa. Soti auïte, kapra pakini piratakari ipiraakori koketakaniua ikaiarikitatini atokokanera, nota hïtari iaxitikiri kaiarikitatana ikinimane kãkiti. ³³ Pirãtxi piratakari takiniri soti auïte ikikomoni, itakiniri kapra isanaremoni, iua atokokanera nota hïtari iaxitikiri takari kãkiti erekarini nikikomoni. Kãkiti maerekani nitaka nisanaremoni.

³⁴ —Eereka nota kākiti auīte txanako ninoa kākiti erekarini nīkikomoni auakani: “Niri sikari erekari hītemoni. Hina. Hīiroā auītetxi nininiātaāua. Ia auītetxi nininiātaāua maiamatapeēkaika hīte īkapani itixi kamikosaakipeka. ³⁵ Mitxipeka ninatxitakasaaki, hīte sikakienatapekano nota. Niposonatakasaaki, āparaā hīsikapekano. Āti itixiti nīkasaaki, hīte apakapapekano nota. ³⁶ Nimamākanisaaki, mākatxi hīsikapekano. Namianatakasaaki, hinīkatapekano. Kateia āki nauakasaaki, himotikaētapekano. Ininiā hīiroā,” nota kākiti auīte txanako kākiti erekarini.

³⁷ —Ininiā kākiti atāo inakari kamakani apakapapiretariko: “Apiananiri, kirisaakipa pinatxitakasaaki, asikakienatai? Kirisaakipa piposonatakasaaki, āparaā asikai? ³⁸ Kirisaakipa āti itixiti pīkasaaki, aāpakapai? Kirisaakipa pimamākanisaaki, mākatxi asikai? ³⁹ Kirisaakipa pamianatakasaaki, anīkatai? Kirisaakipa kateia āki pauakasaaki, amotikaētai?” itxanonako nota.

⁴⁰ —Ininiā nota kākiti auīte apakapapiretanako: “Atāopitikara nitxai hīte. Kākiti poiāori, nisākire auīākari, hītiretiniā, iusaaki nota hītiretini atokokana hītiretari,” nitxanako ninoa.

⁴¹ —Iusaaki nitxanako nisanaremoni auakani: “Hīsipeka. Teoso misir-itaiko hīte, kotxi !hīkīpitari iua sākire. Hīsipeka arikatxi maxipokatimoni. Teoso kamari iua arikatxi, Satanasi misiritikoātaā tīkane, Satanasi nitiriakori misiritikoātaā tīkane. Hīsipeka iuamoni. ⁴² Kotxi ninatxitakasaaki nipokori !hīsikano. Niposonatakasaaki, āparaā !hīsikano. ⁴³ Āti itixiti nīkasaaki, !hinirekano haāpoko napokini. Nimamākanisaaki, kona mākatxi !hīsikano. Namianatakasaaki, !hinīkatano. Kateia āki nauakasaaki, !himotikaētano,” itxanako kākiti maerekani.

⁴⁴ —Ininiā ninoa apakapapiretariko: “Apiananiri, pinatxitakasaaki, piposonatakasaaki, pamianatakasaaki, pimamākanisaaki, kateia āki pauakasaaki, āti itixiti pīkasaaki, kirisaakipa ate !apakapai?” maerekani txanoko nota.

⁴⁵ —Ininiā nota kākiti auīte apakapapiretanako ninoa: “Atāopitikara nitxai hīte. Himanirekakanisaakiri hītiretiniri kākiti poiāori nisākire auīākari, iusaaki !hinirekari nota hītiretini,” nitxanako ninoa.

⁴⁶ —Ininiā Teoso iokanatanako ninoa maerekani kamakani misiritikoātaā. Iuaātaā ninoa misiritaākapikako. Imisiritikona kona xipokaikako. Kākiti atāo inakarinoa kamakani auapininiika imaxipopekaniika Teosokata — itxa Xesosi.

26

Xesosi Okaenetiko Pirena (Marko 14.1-2; Arókasi 22.1-2; Xoão 11.45-57)

¹ Ikara inakari isāpiretaka atoko, Xesosi misākiretana imoianariakori:

² —Hīte imarotari ipi ōti napaka atoko aua Páskoia inakori kiiniriti. Iua kiiniriti auakasaaki nota hītari iaxitikiri nisikaākako nimokaiakariakorimoni. Aamina ĩpiriāmitakari nopini nitakaākako. Iua atoko ipina nitxako —Xesosi txana imoianariakori.

³ Iusaaki sasetotxi auīteakori, kaiōkatsopareriakori, kiomātxiakori pakini apotiitaua. Sasetotxi auīte apiatakari Kaipasi inakori aapoko āki apotiitauana. ⁴ Imapapiretarina Xesosi imaīkinina īkapani. Inirekarina Xesosi imaīkinina apanakini mimarotakinitika. Imisākiretakakana Xesosi okinina īkapani.

⁵ —Kiinirisaaki !amaīkapaniri. Amaīkiniāri, apanakini kākiti naiatamaua ate —itxakakana.

Sito Kamariãro Mĩkaro
(*Marko 14.3-9; Xoão 12.1-8*)

⁶ Xesosi auanãta aapokotxi Petãnia inakoriãtaã. Isari Simão inakori aapokomoni. Iua Simão mitxi amianatakari, maere matati. Eereka erekapekari. ⁷ Simão aapoko Xesosi auakasaaki, sito apoka iuamoni. Om-inari kopitipaki kai kamakori, kai arapástiro inakori. Kopitipaki xãpoka kamariãro. Oa pakaronero. Xesosi nipokonãtakasaaki, oa sito kitakaro kamariãro ikiã.

⁸ Imoianariakori itikari Xesosi kiiã okitakiniro, ininiã ninoa naiataua:
—Kinirepa oa ioanataro kamariãro? ⁹ Kinirepa kona ovẽtxitataro? Ovẽtxitaãkamaroko oãpakapamaroko txineiro ito, matxineirotenimonikari osikini ãkapani —itxakakana.

¹⁰ Xesosi imarotari ninoa ikara atoko ininina.
—Kinirepa homanataro oia sito? Erekari okaminano notamoni.
¹¹ Auapikanako matxineiroteni hãtekata. Kona nota auapani hãtekata. ¹² Oia kitakaro kamariãro nikiiã, nota iposope ninini nikatiko apisa. ¹³ Atão nisãpiretai hãte. Teoso iokanapirena erekari sãpiretikoãtaã ikini itixiti, isãpiretaãkako apaka oia sito kitakiniro kamariãro nikiiã, ininiã kãkiti ikini itixiti auakani xinikapikaro oa —Xesosi txana ninoa.

Xotasi Sari Sasetotxi Auãteakorimoni
(*Marko 14.10-11; Arókasi 22.3-6*)

¹⁴ Eereka Xesosi moianari Xotasi Isikariotxi inakori sari sasetotxi auãteakorimoni.

¹⁵ —Xesosi nisikiniã hãtemoni, kiripa hãte sikano nota? —itxana ninoa.

Ininiã ninoa:

—Asikaiko trãta txineiro ota pirata kamakoro —itxana ninoa.

Ininiã iãkitxitarina. ¹⁶ Eereka Xotasi iãtapari Xesosi poiãonoka kãkitikata auakasaaki, imãkapiritiniri ãkapani.

Pãskoã Kiiniriti Kamiko
(*Marko 14.12-21; Arókasi 22.7-13*)

¹⁷ Pão miãtiãkati nikiko kiiniriti potarikini õti, Xesosi moianariakori apoka iuamoni.

—Namonipa ate maiamatari Pãskoã kiiniriti pite ãkapani? —itxarina iua.

¹⁸ —Hãsa sitatximoni. Nisãpiretakiti iaõka hinitari kiki. Hãpokasaakiri, hãtxariko iua: “Koerekareri txai, ipinini tãkane kaimapeka. Ikamariko kiiniri Pãskoã inakori pite aapoko imoianariakorikata,” hãtxako.

¹⁹ Ininiã imoianariakori kamari Xesosi paniãtakiti iaõka. Imaiamatari ikinika kiiniri ãkapani.

²⁰ ãkanõkapeka inakasaaki, Xesosi imoianariakorikata topãka inipokotinina ãkapani. ²¹ Inipokotakasaakina, Xesosi txana:

—Atão nisãpiretai hãte. ãtika hãte sauaki mãkapiritanoko nota.

²² Ininiã imoianariakori tsoriãkaãta. Iteene imatinaniuatana. ãti pimaãri:

—Apiananiri, atauako notakani?

Iua atokokana ãtipekana:

—Apiananiri, atauako notakani?

Ikara atoko itxanãtana ikinikana, ipimaaãpotinirina Xesosi. ²³ Ininiã Xesosi apakapapiretana:

—Ia tiãtxiã notakata nikakari mãkapiritanoko. ²⁴ Nota hãtari iaxitikiri okaãkako. Teoso sãkire iõkatsopatakori sãpiretapekari nipinini tãkane. Nota hãtari iaxitikiri mãkapiritakari iteene misiritaãkako. Erekamariko maponaniãkatika inaãkamako.

²⁵ Ininiã Xotasi kamãkapirireri misãkiretari Xesosi:

—Koerekareri, atauako notakani?
Xesosi apakapapiretari:
—Ari, pitepitikara.

Xesosi Īto, Iarēka Pakini

(*Marko 14.22-26; Arókasi 22.14-23; 1 Korĩto 11.23-25*)

²⁶ Inipokonātakasaakina, Xesosi kosekari komiri. Imisākiretari Teoso:

—Erekapitikari ia komiri pisikakiti atemoni —itxa.

Eereka imaxinĩkitari, sika itxari imoianariakorimoni.

—Apakapa, nika hĩtxako. Ia niĩto —itxana.

²⁷ Eereka ikosekari iākoanatchi iāriā auini. Imisākiretari Teoso:

—Erekapitikari ia iāriā pisikakiti atemoni —itxa.

Eereka sika itxari iākoanatchi ninoamoni:

—Hĩkinika hiātariko. ²⁸ Ia niarēka xiketakariko makatxakariko kaiāopokori kākiti maerekani. Teoso sāpiretapekari kākiti ikamaenetakiti amaneri kākiti ĩkapani. Ia niarēka oerekari kākiti, Teoso kamapekari ikamaenetakiti. ²⁹ Atāo nisāpiretai. !Niātaikaroko ovapeē, Teoso auĩtetxi ininiātaāua nimapokakanisaaki. Iuaā napokasaaki niātari. Amaneri iāriāti niātako hĩtekata —itxana imoianariakori.

³⁰ Xipoka atoko ixikaretarina xikari Teoso ĩkapani. Eereka isana oxiratari-moni Oriva inakorimoni.

Xesosi Sāpiretari Petro Kipatiniri Iua

(*Marko 14.27-31; Arókasi 22.31-34; Xoāo 13.36-38*)

³¹ Iuaā Xesosi misākiretana imoianariakori:

—Ia ĩkanōkati hĩkinika hĩte takanapanoko nota, kotxi Teoso sākire iōkatsopatakori sāpiretapekari ikara atoko inakari. Itxari:

Nokariko soti auĩte piratakari, ininiā ikinika ipiraakori iarikitatako, itxa Teoso sākire iōkatsopatakori. ³² Ininiā eereka nota nipinaāka atoko, iuaĩkana nōkitikaākaua atoko, nisako hĩte apisa Kariréiamoni —itxa.

³³ Ininiā Petro apakapapiretari:

—Nota !nitakanapai pite. Atxiĩti ikinimane takanapai, iuaritika kona nota takanapai —itxa.

³⁴ Ininiā Xesosi:

—Atāo nisāpiretai. Ia ĩkanōkati patari sākirauatini apisapanikako, “!Nimaro-tari iua,” pitxanoko ipi āti pakinikata.

³⁵ Ininiā Petro:

—Ikara atoko !nitxapanii pite. Nikipatinii apisapanikamako, nipinamako. Ikinika Xesosi moianariakori ikara atoko itxana.

Xesosi Misākiretiniri Teoso Xetsémani Inakoriātaā

(*Marko 14.32-42; Arókasi 22.39-46*)

³⁶ Eereka Xesosi sari imoianariakorikata Xetsémani inakoriātaā. Xesosi:

—Uai hĩtopāka. Ikiraā nisako Teoso nimisākiretini ĩkapani —itxa Xesosi.

³⁷ Anikari Petro, Sepeteo anaakori ipi pakini iuakata isinina. Iuaā Xesosi tsorĩkaānāta, imaromaxiretari. ³⁸ Imisākiretana ninoa:

—Nixinire imaromaxiretari. Iteene nimaxire, ininiā okaaritano. Uai hĩkaikota. Araōkire hĩtxako —itxana ninoa.

³⁹ Apikomoni isa, pamaka itxa, misākireta itxari Teoso:

—Niri, atauako apakata pimakatxakiniri nimisiritiko akamoni ĩkari? Kona ninirekari natatsiirauatini. Iuaritika pite nirekiniāri, ininiā nota apaka nirekari —itxari Teoso.

⁴⁰ Iuasaaki ikanapiriā ipi āti imoianariakori auiniātaā. Ninoa imakanāta:

—Petro, atauako kona hĩte mĩteenekari hĩtikapokotini āto oaranoka?

⁴¹ Erepaniko. Hinirekasaakiri maerekati hĩkamini, !hĩkamapiri. Araōkire hĩtxako. Himisākiretariko Teoso, ininiā !hĩkamari maerekati. Kākiti xinire

atxiiti !inirekari maerekati ikamini. Txamari kākiti ito tapara poiãoka, ininiã ikamari maerekati. Ininiã erepaniko —Xesosi txari Petro.

⁴² Iuaĩkana isa apikomoni Teoso imisãkiretini ĩkapani:

—Niri, pinirekiniãri natatsiitiniri nimisiritiko akamoni ĩkari, ininiã nikamapitkariko pinirekakiti —itxari Teoso.

⁴³ Iuaĩkana ikanapiriã imoianariakorimoni. Imakanãtapanikana. Itaponoka itxana. Kona iposotarina ikoatinina. ⁴⁴ Iuaĩkana Xesosi takanapana, iuaĩkana ikanapiriã iuaãtaãkana. Iuaĩkana misãkireta itxari Teoso. Mitxi atokokana itxa isãkire.

⁴⁵ Iuaĩkana ikanapiriã imoianariakorimoni:

—Himakanãtapanika? Hĩtomanãtapanika? Nisikiko manapi apopeka. Nota hĩtari iaxitikiri nimĩkapiritaãka maerekanimoni nisikiko, inireẽkitina ikaminina ĩkapani. ⁴⁶ Hõkitikaua. Masipeka. Hãtapa. Ikiraã ina nota mĩkapiritakari —itxana ninoa.

Xesosi Maĩkiko Pirena

(Marko 14.43-50; Arókasi 22.47-53; Xoão 18.1-11)

⁴⁷ Xesosi sãkirauanãtapanika inakasaaki, Xotasi, Xesosi mitxi moianari, apoka. Iuakata ina itomaneri kãkiti, saasara mĩkani, piriri mĩkani pakini. Sasetotxi auĩteakori, kiomãtxiakori pakini iokanatana ninoa. ⁴⁸ Iua Xotasi kamĩkapirireri sãpiretapekana ninoa:

—Iuapitipankarako napitxokapaniko. Himaĩkariko iua napitxokakiti.

⁴⁹ Xotasi apoka. Xesosimonipitipo isa.

—Ereẽkai koerekareri.

Eereka apitxoka itxari. ⁵⁰ Ininiã Xesosi txari Xotasi:

—Nitiretakiti, pikamariko pinirekakiti. Nauritai —itxari.

Iuasaakipeka Xotasikata sikani sakata Xesosimoni, maĩka itxarina. ⁵¹ ãti Xesosi moianari kosekaro saasara. Isauaãkatari sasetotxi auĩte apiatakari nitiri. Itsotakakĩpitataru.

⁵² Ininiã Xesosi txari:

—Pitaka saasara mitxi oãuiniãtaã. !Pineenamauatape. Ikeekotxi himaĩkiniã, ãti õti hĩpinako ikeekotxi xika. ⁵³ !Pimarotari niposotiire. Nota nirekiniãri, nakiritari niri moianatinino nota. Nakiritiniãri, iuasaakipeka iua iokanatariko seĩ mio initiriakori nota imakatzakinina ĩkapani. ⁵⁴ Kona nakiritari niri, kotxi Teoso sãkire iõkatsopatakori sãpiretapekari nimaĩkiko tĩkane ia atoko inakari.

⁵⁵ Iuasaaki Xesosi misãkiretana iuamoni ĩkani:

—Kinirepa himinari saasara, piriri pakini himaĩkinino ĩkapani? !Kiĩtirino nota. !Kikeekono nota. Ikiniõtika niĩtopãka Teoso misãkiretiko aikoti ãki noerekini hĩte. Iuasaaki kona himaĩkano. ⁵⁶ Ia atoko himaĩkano, kotxi kitxakapirĩka Teoso sãkire sãpiretakani iõkatsopatapekari ia atoko himaĩkinino. Ininiã Teoso sãkire iõkatsopatakori iaõka uatxa apokapeka —itxa Xesosi. Iuasaakipeka Xesosi moianariakori asikari iua, miteka itxana.

Xesosi Xoteo Auĩteakori Apisatoõ

(Marko 14.53-65; Arókasi 22.66-71; Xoão 18.12-14, 19-24)

⁵⁷ Ninoa Xesosi maĩkakani anikari Xesosi Kaipasi aapokomoni. Iua Kaipasi sasetotxi auĩte apiatakari itxaua. Iuaãtaã kaiõkatsopareriakori, kiomãtxiakori pakini apotiitapekaua iuasaaki. ⁵⁸ Ninoa anikasaakiri Xesosi, Petro sari Xesosi tikini. ĩkira atoko auaãponãta. Sasetotxi auĩte apiatakari aapoko takote isa. ĩroã pirikere ãki. Iitopãka Kaipasi nitiriakorikata. Kiatokopa inaãkapani Xesosi, ininiãra isa Xesosi tikini imarotiniri ĩkapani.

⁵⁹ Kaipasi aapoko ãki Sasetotxi auĩteakori, kiomãtxiakori, ikinika Xoteo auĩteakori pakini nitana kãkiti aãpirena kamakani Xesosi okinina ĩkapani.

⁶⁰ Itori kākiti sãpiretari aãpirena Xesosi ikamapiretinina. Txamari ixika !auari Xesosi okinina İkapani.

Eereka apokana ipi aãpirena kamakani. ⁶¹ Ninoa txari:

—Ia kiki txari: “Nota posotari aiko Teoso misãkiretiko nirikini. Ipi äti õtisaaki niposotari iuaİkana nõkitikiniri,” itxa isãkire.

Kona atão ninoa sãkire. ⁶² Sasetotxi auİte apiatakari õkitikaua.

—Kona papakapapiretatari pitemoni apoİrauatakani? Atãokani piposotatari ikara atoko pikamini? —itxari Xesosi.

⁶³ Xesosi !kasãkireri. Ininiã sasetotxi auİte apiatakari iuaİkana misãkiretari Xesosi:

—Uatxa nipimaãi Teoso mipİkati apisatoõ. Atãonani pisãpiretaua. Pite, Teoso mereëkiti pitxataua? Teoso äkirikai pite? —itxari Xesosi, kotxi inirekari Xesosi kerokiniri isãkire.

⁶⁴ —Ari, iuapitikarano. Nisãpiretaiko hİte hİkinika. Hãtamatariko kākiti itari iaxitikiri topãkini Kaposotiireri kikomoni. Hãtapariko kākiti itari iaxitikiri uai apokaãpotini katxiãri äki —Xesosi txana ninoa.

⁶⁵ Sasetotxi auİte apiatakari kenakotari ikara Xesosi sãkire. Iuasaakipeka iua matsorãkari imãka, kotxi kona xatiki ipotxitari Xesosi sãkire.

—Maerekati isãkire: “Teoso äkirirano,” itxa. !Anirekaikari apanakini kamapiretiniri Xesosi. Uatxaika hİkenakotapekari isãkire maerekati.

⁶⁶ Kiãtokopa atxatari Xesosi? —itxana ninoa.

—Ixika auapeka ipinini İkapani ininiã uatxa okaãkapitikako —ninoa txari iua.

⁶⁷ Eereka ikiisokatoõtarina. Iãsokarina. Apanakini aritoõtari Xesosi.

⁶⁸ —Pite Teoso mereëkiti pininiãua, pisãpiretaua, kipa aritai? —itxarina iua. Inapetarina.

Petro Kipatari Xesosi İmarotini

(Marko 14.66-72; Arókasi 22.54-62; Xoão 18.15-18, 25-27)

⁶⁹ Iuasaaki Petro topãkanãta mapara pirikeri äki. Ätokoro Kaipasi nitero sari iuamoni.

—Pite Xesosi Kariréiakiri moianaripitikarai —otxari iua.

⁷⁰ Txamari iua kipatari ikinimane apisatoõ.

—!Nimarotari ikara atoko pinanãtakiti.

⁷¹ Ininiã isa pirikeri İroãnakikomoni. Iuaã äto ätokoropekana Kaipasi nitero atamatari iua. Ininiã osãpiretana kākiti iuaã auakani:

—Xesosi Nasareekiri moianaripitikara ikira —otxa.

⁷² Iuaİkana ikipatari:

—Teoso imarotari iua kiki nimimarotakani —itxa.

⁷³ Eereka paİtiki atoko kikiãkini iuaã auakani sari Petromoni:

—Pite atãopitika iua moianaripitikarai, kotxi pisãkire ipinimoni. Kākiti Kariréiakiri sãkire atokokana, Xesosi sãkire atokokana pitxa pite sãkire —ninoa txari Petro.

⁷⁴ Ininiã Petro apakapapiretana:

—Atão nisãkire minakaniãua Teoso misiritanoko. Nisãkire atãopitika. !Nimarotari iua kiki —itxama.

Iuasaakipeka patari sãkirauata. ⁷⁵ Ikara ikenakotakasaaki, Petro xinikari Xesosi sãkire, kotxi mitxipe Xesosi txari iua: “Patari sãkirauatini apisapanikako, ipi äti pakinikata, ‘!Nimarotari iua,’ pitxanoko.” Ininiã Petro sipeka. Itxiapakata.

27

Xesosi Pirato Apisatoõ

(*Marko 15.1; Arókasi 23.1-2; Xoã 18.28-32*)

¹ Katimatiníkata sasetotxi auñteakori, kiomãtxiakori pakini apotiitaua.

Imisãkiretakakana:

—Kiãtokopa atxatari Xesosi aõkini? —itxana.

² Eereka iaxirikãkitakarina Xesosi, anika itxarina Homano auñte Põsio Pirato inakorimoni, sikanapa itxarina.

Xotasi Ipinini

(*Átosi 1.15-19*)

³ Xotasi, Xesosi mĩkapiritakari, kenakoenetakasaakiri Xesosi ipinini tĩkane, maerekaxiniretinoka itxa, kotxi iuaka sikari Xesosi imokaiakariakorimoni okiko tĩkane. Iuaĩkana isipikaro trĩta txineiro ota pirata kamakoro sasetotxi auñteakori, kiomãtxiakori pakinimoni.

⁴ —Nota kamari maerekati. Nimĩkapiritari Xesosi. Ixika !auari iua ipinini ĩkapani —itxana ninoa.

Ininiã ninoa:

—Pite kamakiti xikakara. Pitekara sikaua ate Xesosi.

⁵ Ininiã Xotasi okaro txineiro ota Teoso misãkiretiko aikoti ãki, eereka isipe ãtiãtaã. Iuaãtaã iuaka iaxirikanokitapeua, aamina poriã iaxirikaua, arõka, ipĩpe itxa.

⁶ Teoso misãkiretiko aikoti ãki sasetotxi auñteakori kosekaro oa txineiro.

—Oia txineiro kiki okiko ĩki. Ia xika ate !auiritaãka aãpotiitiniro oia txineiro ãto txineirotikata Teoso misãkiretiko aikotiãkero. ⁷ Kiãtokopa atxataro oia txineiro? —itxakakana.

Eereka ninoa imarotape. Iamotarina kikio, tiitxi kamakari kikiote, Xoteo minakaniua ikatiko tĩkane. ⁸ Oa txineiro kiki okiko ĩki xika, Xesosi okiko ĩki xika, iua akauari takauãkatakãka “Arẽkatxi Akauariti” inaãka. Uatxa akiritaãkapanika iuaãtaã “Arẽkatxi Akauariti.” ⁹ Iua atoko ininiã, kitxakapirĩka Teoso sãkire sãpiretakari Xeremia inakori atão txari:

Isaeo auakani ĩkitxitari trĩta ota pirata kamakoro Teoso mereẽkiti okiko ĩkapani.

¹⁰ Eereka isikarona oa txineiro ota tiitxi kamakarimoni, ikikiote iamotinina ĩkapani, kotxi Teoso nirekari ia atoko ikaminina,

itxa Xeremia kitxakapirĩka. Ininiã Xeremia sãkire iaõka apopeka iuasaaki.

Xesosi Pirato Apisatoõ

(*Marko 15.1-5; Arókasi 23.1-5; Xoã 18.28-38*)

¹¹ Iuasaaki Xesosi tima Homano auñte Pirato inakori apisatoõ. Pirato pimaãri Xesosi:

—Pitekani Xoteoakori auñte txataua?

—Ari, iuapitikarano —itxari.

¹² Eereka sasetotxi auñteakori, kiomãtxiakori pakini apoĩtari Xesosi. ! Kasãkireri Xesosi iuasaaki. ¹³ Ininiã Pirato txari:

—Atauako kona pikenakotatari apoĩtiniina?

¹⁴ Xesosi !kasãkireri, ininiã Pirato tsorĩkaãta. ãkixinireẽ iua:

—Kininiãpa !kasãkireri?

Xesosi Okiko Nirekiko

(*Marko 15.6-15; Arókasi 23.13-25; Xoã 18.38-19.16*)

¹⁵ Ikini kiiniriti Pãskoã inakori, Homano auñte sikakari ãtika kateia ãki auakari kãkiti nirekakiti. ¹⁶ Iuasaaki aua kateia ãki auakari Pahapasi inakori. Ikinimane imarotari iua. ¹⁷ Itomaneri kãkiti apotiitakasaakia, Pirato pimaãna ninoa:

—Īkiripa kateia āki auakari hinireka nisikakini? Pahapasikani? Xesosi Teoso mereēkiti inakorikani? —itxana ninoa.

¹⁸ Pirato imarotari Xesosi isikinina iuamoni ixikotinirina xika.

¹⁹ Iuasaaki Pirato topākanāta kākiti misiritiko isāpiretini pakita āki. Iuasaaki ĩtanoro iokanapireta iuamoni.

—Maerekati !pikamape iua kikimoni, kotxi ixika !auari pokiniri. Erekaru iua. Minipani nitaponetari iua kiki, ininiā maerekaxiniretinoka nitxa —otxari.

²⁰ Mapara sasetotxi auñteakori, kiomātxiakori pakini misākiretana kākiti iuaātaā apotiitakaniua:

—Piratomoni hĭtxako: “Pisikakariko Pahapasi. Pokākitakariko Xesosi,” hĭtxariko —itxana kākiti.

Ininiā ninoa auikari isākirena. ²¹ Eereka Pirato pimaāna kākiti iuaā apotiitakaniua:

—Īkiripa kateia āki auakari hinireka nisikakini?

Ininiā ninoa akirikata:

—Pahapasira.

²² —Kiātokopa nitxtari Xesosi, Teoso mereēkiti inakorima? —itxa Pirato.

Ikinikana apakapapiretana:

—Aamina ĩpiriāmitakari nopini pitokakitariko.

²³ Ininiā Pirato:

—Kixikapa? Maerekati !ikama —itxa.

Iuasaakipeka ninoa iteene akiripoakatana:

—Aamina ĩpiriāmitakari nopini pitokakitariko.

²⁴ Ininiā Pirato kona sāpiretaikari Xesosi isikakini, kotxi ninoa neenamauatanapanoka. Ikosekari āparaā. Arokauakotaua ninoa apisatoō.

—Na nota xikani ia kiki ipinako. Hĭte xikakara ia kiki ipina —Pirato txana ninoa.

²⁵ Ikinimane apakapapiretari:

—Atāopitikara. Misirikaretxi auiniā okiko xika, ate, amariteni pakini apakapariko iua misirikaretxi —itxana.

²⁶ Iuasaakipeka Pirato sikakari Pahapasi. Eereka ipaniātari Xesosi xirokitatiko aāpitsaā. Eereka isikari Xesosi isotatonemoni aamina ĩpiriāmitakari nopini itokakitinirina tĭkane.

Sotatoakori Napetiniri Xesosi

(Marko 15.16-20; Arókasi 22.63-65; Xoāo 19.2-3)

²⁷ Ininiā sotatoakori anikari Xesosi ninoa auñte aapokomoni. Iuaā akiritarina apanakini sotatoakori, ininiā ikinimane sotatoakori ākitari Xesosi. Inapetarina. ²⁸ Imakatzakarina Xesosi māka. Mākatxi pōkamarari ieretaka itxarina. ²⁹ Eereka itakarina saporieña kotipiaro kamakori ikiiā. Iuako ikikomoni taka itxari aāke. Ininiā itxĭkitakarina Xesosi auñtetxi atoko ininiāua. Eereka ikapotoreēkauana iua apisatoō, napeta itxarina Xesosi:

—Aāuñte —itxarina Xesosi inapetinina.

—Xoteo auñtekai pite —itxarina.

³⁰ Ikiisokarina. Iua aāke ikosekana, arikiita itxapikarina. ³¹ Inapetarina, eereka imakatzakarina mākatxi pōkamarari. Iua nakiti imāka iuaĭkana ieretaka itxarina. Eereka mapara anika itxarina, aamina ĩpiriāmitakari nopini itokakitinirina ĩkapani.

Xesosi Tokakitaāka Aamina ĩpiriāmitakari Nopini

(Marko 15.21-32; Arókasi 23.26-43; Xoāo 19.17-27)

³² Xesosi anikaāpotakasaakina, aōkitarina Sireni sitatxitikiri, Simāo inakori. Ninoa paniātari iua, Xesosi anikakiti aamina ĩpiriāmitakari, anikini ĩkapani,

kotxi Xesosi ! iposotaikari anikiniri. Ininiã Simão anikari. ³³ Apokana Kóokota inakoriãtaã. Apanakini akiritari “Kiitãtãtxi” inaãka akiritiko. ³⁴ Iuaã iãriãmoni ikoketarina pinĩtxi kipixiãri, sika itxarina Xesosimoni, Xesosi iãtini ĩkapani, imakini ĩkapani. Atapixiãtaãka atoko, !iãtari. ³⁵ Ininiã itokakitarina Xesosi aamina ĩpiriãmitakari nopini. Inaãka atoko ikamarina sarauatxi kai soroã. Sarauatxi kãiatakani apakapari Xesosi mãka. Kitxakapirĩka Teoso sãkire sãpiretakari sãpiretapekari ikara atoko inini tĩkane. Iua txari: Ixanakarina nimãka. Sarauatxi ikamana nimãka apakapakani imarotiniina ĩkapani.

Itxa Teoso sãkire sãpiretakari kitxakapirĩka. ³⁶ Sarauatxi xipoka atoko iitopãkana. Imoiaãrina Xesosi, kãkiti manikakaniri ĩkapani. ³⁷ Aamina ĩpiriãmitakariã ikii nopini itakarina iõkatsopatakori: “Xesosi, Xoteoakori Auĩte,” itxa iõkatsopatakori. Ikara xika okaãka Xesosi.

³⁸ Xesosi takote itokakitarina ipi kiĩtiririni aamina ĩpiriãmitakari nopini, ãti Xesosi kikomoni, ãti Xesosi sanaremoni. ³⁹ Kãkiti iuaã napakani napetari, nokonoko itxa kiitana. Maerekaeneti isãkirepiretarina Xesosi:

⁴⁰ —Pite txari: “Aiko Teoso misãkiretiko niriãka atoko, ipi ãti õtisaaki iuaĩkana nõkitikari,” pitxa. Piteka pimakatzakaua. Pite Teoso ãkiri pinakasaak-
iua, pikatzaka. Ikara atoko itxa sãkiretana kãkiti iuaã napakani. ⁴¹ Iua atokotxikana itxana sasetotxi auĩteakori, kaiõkatsoparerini, kiomãtxiakori pakini ikara atoko inapetarina Xesosi:

⁴² —Iua makananitapekari apanakini. Txamari iuaka ! iposotari imakananitiniua. Iua Isaeo auakani auĩte ininiãua, iuaka imakatzakama-
mauako. Ikatxakiniã, ate auikari iua sãkire. ⁴³ Iua auikari Teoso sãkire. Maiãtapari. Atauako Teoso nirekari imakatzakiniri iua uatxa, kotxi iua txari: “Teoso ãkirirano nota,” itxa —itxana.

⁴⁴ Kiĩtiririni iuakata tokakitakoni apaka maerekaeneti isãkirepiretarina Xesosi.

Xesosi Ipinini Pirena

(Marko 15.33-41; Arókasi 23.44-49; Xoão 19.28-30)

⁴⁵ Apaniãxiti itixi piãka. Ipi ãti pakini oara ipiãka. ⁴⁶ Ipi ãti pakini oarape kikatamonipeka Xesosi iteene akirikata:

—Erii, Erii, aremaa sapakatani.

Ikara Epiro sãkire. Ia atatsopatakari sãkireẽ, “NiTeosone, niTeosone, kinirepa pitakanapano?”

⁴⁷ Kãkiti iuaã auakani kenakotari Xesosi sãkire. Ninoa uãkatari akirinãtiniri Eríasi.

⁴⁸ Ininiã ãti miteka, mapoa atoko inakari iãka itxari iãriã katxioãrimoni. Aãke mapotõkire taka, isirĩka itxamari Xesosi iãtini ĩkapani. ⁴⁹ Txamari apanakini:

—Kona pisikapiri. Atxiĩti Eríasi makatzakari iua —itxana.

⁵⁰ Iuaĩkana Xesosi iteene akirikata. Eereka iokanatarini ixinire Teosomoni, eereka ipĩpe.

⁵¹ Iuasaakipeka mãkatxi mata Teoso misãkiretiko aikoti ãki arõkakari tso-
rakita. Itano itsorakita. Ixitipeka apoka. Mitxi iua mãkatxi mata !auiritari kãkiti ĩroini Teosonani Auini Pakitaãtaã. Itsorakitakasaaki, itixi iakeẽkata. Kai mitari xoreka iuasaaki. ⁵² Apanakini akauari xoreka. Itomaneri kãkiti ipĩkani Teoso nakitiakori iuaĩkana õkitikapekaua. ⁵³ Osipikarina akauari. Xesosi iuaĩkana õkitikaãkaua atoko, isana Xerosareẽmoni, Teoso nakiti sitatxitimoni. Iuaã itomaneri kãkiti itikana ninoa iuaĩkana õkitikakaniua.

⁵⁴ Sotato auĩte, sotatoakori Xesosi moiaãkani apaka, itikarina Xesosi ipinini. Imarotarina itixi iakeẽkatini, ininiã iteene ipĩkarauatana.

—Atãopitikara Teoso ãkiri itxaua —itxana.

⁵⁵ Itoro sitoãkini ikira atoko atamanãtari Xesosi. Kariréia tõpa Xesosi potorikasaaki ninoa sitoãkini moianatari iua. ⁵⁶ Maria Matarena inakoro iuaã aamina ìpiriãmitakari ikira atoko auanãta apaka. Txiako, Xosee pakini inoro, Maria inakoro iuaã aua. Sepeteo anaakori inoro iuaã auanãta apaka.

Xesosi Ikatiko Pirena

(*Marko 15.42-47; Arókasi 23.50-56; Xoão 19.38-42*)

⁵⁷ Ìkanõka katxineiroteri Xosee inakori, Arimateia sitatxitikiri, apoka. Iua apaka Xesosi sãkire auiãkari itxaua. ⁵⁸ Isa Piratomoni. Xesosi ìto amanaã. Ininiã Pirato paniãtari isikiko. ⁵⁹ Ininiã Xosee anikari Xesosi ìto. Mãkatxi mataã iapirika itxari. Mãkatxi mata amaneri arínio inakoriã iapirikari. ⁶⁰ Eereka taka itxari akauari ãki. Iua akauari amaneri, Xosee kisakakiti kai auíte iriko. Ikamari iua akauari ipĩkasaaki ikatiko ìkapani. Xesosi ìto iriko ãki itaka atoko ikakanapiritari kai meraminapoari, itota itxari akauari iriko, sipe itxa. ⁶¹ Iusaaki Maria Matarena inakoro, ãto Maria inakoro apaka topãkanãta akauari apisatoõ.

Imoiaãrina Xesosi Akauari

⁶² Iua õti sesta veira, tomatiko õti apisa. Iua õti Xoteoakori parĩkauatapitipo, tomatiko õti imaparĩkauatakani ìkapani. Katimatinĩkata sasetotxi auíteakori, pariseoakori pakini sari Piratomoni. ⁶³ Ninoa txari:

—Ate xinikari iua kamisirienereri sãkire. Iua txari: “Nipĩkasaaki eereka ipi ãti pakini õtisaaki iuaĩkana nõkitikauako.” ⁶⁴ Pipaniãtana pisotatoneakori ipi ãti pakini õti akauari imoiainina. Imamoiaãkaniãrina, imoianariakori ìkanõka sari iuaã ìito ìtirĩkinina. Ininiã eereka isãpiretarina kãkiti: “Teoso õkitikapekari iua. Iuaĩkana auãki itxapeka,” itxamana ninoa imoianariakori. Ininiã ikara misirieneretxi apiatama eereka. Mitxiri misirieneretxi poiãoka —itxarina Pirato.

⁶⁵ —Ininiã hanikari sotatoakori akauari moiaãkani tĩkane. Hĩsa. Hĩtotariko akauari sona —Pirato txana.

⁶⁶ Ininiã isana iuaã. Akauari sona iteene itotinina ìkapani. Itakarina Pirato takaõtxikare itore nopini. Sotatoakori iuaã kaikota. Imoiaãrina akauari.

28

Xesosi Iuaĩkana Auãki Inini

(*Marko 16.1-8; Arókasi 24.1-12; Xoão 20.1-10*)

¹ Tomatiko õti xipoka atoko, tomĩko ìkanõkapanika Maria Matarena, oa ãto Maria pakini sari akauarimoni.

² Ninoa saãpotakasaaki, katimaritika itixi iakeẽkata itapararitika. Iusaaki Teoso nitiri iaxitikiri katxaka. Ikatapakiritari kai akauari tore, topãka itxa iua kai nopini. ³ Itoõ atokatxi iotximere atoko itxa. Imãka mapoa saro atoko itxa. ⁴ Sotatoakori, akauari moiaãkani, kikinanaãkata, ipĩkarauatinina. Irikana xitipeka. Ipĩkani atokopeka itxana.

⁵ Eereka ninoa sitoakoro apoka akauari. Teoso nitiri misãkiretana:

—!Hĩpĩkarauatape. Nimarotari hĩte nitanãtiniri Xesosi, aamina ìpiriãmitakari nopini tokakitakori. ⁶ !Auaika uai. Teoso õkitikapekari iua. Ikara iua sãpiretpekai hĩte. Uai hina. Hãtamatarari ìto mitxi auiniãtaã.

Ininiã ninoa atamatari.

⁷ —Katima hĩtxako imoianariakorimoni hĩsini ìkapani. Hĩsãpiretana: “Iuaĩkana auapeka itxa Xesosi. Teoso õkitikapekari iua. Iua sari hĩte apisapanika Kariréiamoni. Iuaã haõkitariko iua,” hĩtxako ninoamoni. Ikara atoko nitxa nisãpirena hĩtemoni —itxa Teoso nitiri.

⁸ Ininiã ninoa takanapari akauari. Ipĩkareritikana, ieneniritikana isana. Imitekana Xesosi moianariakorimoni õkitikiniua isãpiretini tĩkane. ⁹ Ninoa mitekaãpotakasaaki, ipixinipokoriti Xesosi tokiã ninoamoni:

—Hĩtepini ina —itxana.

Ininiã ninoa kapotoreẽkaua iua apisatoõ, maĩkakitita itxarina.

—Peerekai. Apiananiri pitxaua —itxanãtana.

¹⁰ Ininiã Xesosi:

—Kona hĩpĩkarauatape. Nitariakorimoni hĩsa. Hĩsãpiretana Kariréiamoni isinina. Iuaã aõkitanonako nota —Xesosi txana ninoa Mariaakoro.

Ininiã ninoa sipe.

Sotatoakori Xesosi Akauare Moiaãkani

¹¹ Sitoãkini sikasaaki, ãtikaka sotatoakori akauari moiaãkani kanapiriã sitatximoni. Isãpiretarina itikakitina sasetotxi auĩteakorimoni. ¹² Ininiã sasetotxi auĩteakori, kiomãtxiakori pakini apotiitaua ikara ene ixinikinina ĩkapani. Eereka isikarina itoro txineiro sotatomoni, atão imasãpiretakanina ĩkapani apanakinimoni. ¹³ Ininiã sasetotxi auĩteakori, kiomãtxiakori pakini txana:

—Hĩtxariko apanakinimoni: “Xesosi moianariakori apoka ĩkanõka aimakasaaki. ĩtirĩkarina Xesosi ĩto,” hĩtxako. ¹⁴ Hĩauĩte Pirato imarotakasaakiri himakini, ininiã ate misãkiretariko iua, ininiã kona himisiritaãka himakini xika —itxarina sotatoakorimoni.

¹⁵ Ininiã sotatoakori apakaparo txineiro, sãpireta itxarina kãkiti Xesosi moianariakori ĩtirĩkiniri Xesosi ĩto. Ikara aãpirena iaripireta Xoteoakorimoni. Uatxa apaka ikara aãpirena auĩãkapanika.

Xesosi Apoka Imoianariakorimoni

(Marko 16.14-18; Arókasi 24.36-49; Xoão 20.19-23; Átosi 1.6-8)

¹⁶ Õsi pakini Xesosi moianariakori sari oxiratarimoni Xesosi paniãtinimoni Kariréia tõpamoni. ¹⁷ Ninoa atamatari Xesosi. Ikapotoreẽkauana iua apisatoõ.

—Peerekai. Apiananiri pitxaua —itxanãtana.

Txamari ãtikaka kona iteene auikari iua Xesosi ininiãua. ¹⁸ Xesosi apoka ninoa takote, misãkireta itxana ninoa:

—Teoso txĩkitakano itixine auakani auĩte nininiãua. Itxĩkitakano ĩkoraxiti auakani auĩte apaka nininiãua. Ininiã ĩkinika posotiiretxi aua notamoni.

¹⁹ Ininiã nipaniãtai. Hĩsako ĩkini uãkati kãkitimoni ĩkini itixitika. Hõerekana ninoa nisãkire. Hĩpatxisatana nisãkire kĩpitakani niri uãkaã, imi uãkaã, Erekarĩ Matamatakoti uãkaã pakini hĩpatxisatanako. ²⁰ Hõerekanako ninoa ĩkinika nipaniãtakiti ikaminina ĩkapani. Hĩxinikariko ia. Nota ãtipirika auako hĩtekata. Hĩtekata nauiniritika itixi xipokako —itxa Xesosi sãkire.

MARKO

Xoão Kapatxisareri Sāpiretakiti
(*Mateo 3.1-12; Arókasi 3.1-20; Xoão 1.19-28*)

¹ Ia Xesosi Kristo iokanapirena erekari. Teoso ākiri itxaua Xesosi.

² Teoso sākire sāpiretakani iōkatsopataria ia:

Niokanatariko niokanapirena aniākari kākitimoni kimapori oeretini ĩkapani pite uai apokini apisa.

³ Iua auako āparaā makipakaniātaā. Isāpirenauatako: “Hōeretariko kimapori Apiananiri apokini apisapanika. Itīkaāpo erekari hīkamako iua napini ĩkapani,” itxa iua.

Itxa Teoso sākire iōkatsopatakori kitxakapirīka.

⁴ Ikara atoko Xoão kapatxisareri āparaā makipakaniātaā aua. Ipatxisa-takasaakiri kākiti, isāpiretari ia pirena:

—Hītakanapariko maerekati hīkamakiti. Hīpatxisataākako. Ininiā Teoso makatxakariko maerekati hīkamakiti —itxa Xoão kapatxisareri.

⁵ Ikinimane kākiti Xotéia auakani Xerosareē sitatxiti auakani pakini sari Xoāmoni isākire ikenakotinina ĩkapani. Ninoa sāpiretakasaakiri maerekati ikamakitina, ipatxisatana uini Xotāo inakoriātaā.

⁶ Xoão takari imāka kamero piti kamakori. Itakari ipakiomatare pirātxi mata kamakori. Inikari txītxiri. Mapaā itxima. ⁷ Iua txari kākitimoni:

—Nota poiāori. Nota tikini apokako apiatakari. !Apakata nikaporetoreēkiniua iua takote ikiti mata nimakatxakini ĩkapani, kotxi nota poiāoka. Iua apiata. ⁸ Nota patxisatai āparaānokara. Iua patxisataiko Erekar Mata-matakotiā. Iuasaaki hīte apakapariko Erekar Matamatakoti.

Xesosi Patxisatiko Pirena
(*Mateo 3.13-17; Arókasi 3.21-22*)

⁹ Iuasaaki Xesosi apoka Nasaree sitatxiti, Kariréia tōpamoni. Iuasaaki Xoão kapatxisareri patxisatari iua uini Xotāo inakoriātaā. ¹⁰ Xesosi kanīkiītakasaaki, iua itikari iaxiti takakini. Iuasaaki Erekar Matamatakoti katxaka kamo katxakini atoko. Iua nopini apoka. ¹¹ Iuasaakipeka Teoso iaxitikiri txari:

—Pite namarite, nitiretakiti, napokaerekatai, kotxi ninirekakiti pikama.

Satanasi Atamakaerekatini Xesosi
(*Mateo 4.1-11; Arókasi 4.1-13*)

¹² Iuasaaki Erekar Matamatakoti iokanataria Xesosi āparaā makipakaniātaā. ¹³ Iuaātaā ikaikota koarēta ōti. Iuasaaki Satanasi atamakaerekataria iua. Iuaātaā auari kaxipirini kaneenamarini. Ininiā Teoso nitiriakori iaxitikini nīkatari Xesosi.

Xesosi Mipotorikiniri Iparīka Kariréia Tōpa
(*Mateo 4.12-22; Arókasi 4.14-15*)

¹⁴ Xoão kateia āki takikosaaki, Xesosi sari Kariréia tōpamoni. Iuaātaā isāpiretari Teoso iokanapirena erekari, Teoso auītetxi ininiāua pirena.

¹⁵ Itxari:

—Teoso keto apopeka. Iua auītetxi ininiua apokaāpotapeka. Ininiā hītakanapariko himaerekani. Hāuikariko Teoso iokanapirena erekari —itxa Xesosi.

¹⁶ Xesosi t̄ipokota Kariréia poati tiniã. Iuasaaki atamatana ipi hetxi takakani, Simão Petro, itari Ātree pakini. Iua atamatana itakinirina hetxi.

¹⁷ Ininiã Xesosi txana:

—Uatxa masa notakata. !Himaĩkaikariko ximaki. Ātiã h̄iparĩka auako. Nisãkire h̄isãpiretako kãkitimoni —itxa.

¹⁸ Ininiã iuasaaki ninoa takanapari hetxi, sa itxana Xesosikata.

¹⁹ Apikomoni ninoa saãpota. Itikana Txiako, itari Xoão pakini. Ninoa Sepeteo anaakori. Kanaua miramaneri ãki auanãtana iuasaaki. Hetxi iot-saãnãtana. ²⁰ Iuasaaki iua akiritana ninoa. Ininiã ninoa takanapari iri, iri nitiriakori pakini kanaua ãki. Eereka isana Xesosikata.

Kiki Maerekati Matamatakoti Auaĩtotakiti
(Arókasi 4.31-37)

²¹ Xesosi imoianariakorikata apoka Kapanaoõ sitatxiti. Ininiã tomatiko õtisaaki Xesosi sari aiko Xoteo apotiitiniãtaãua oerekaruatini ĩkapani. ²² Iua sãkire kenakotakani tsorĩkaãta, kotxi kona kaiõkatsoparerini atokoni !itxa. Iua oerekakiti sãkiretxiti pataparari, kotxi !isãpiretari ãti koerekareri sãkire apanakini kaiõkatsoparerini atoko. Iuaka sãkirekara isãpireta.

²³ Iuasaaki aiko ãki Xoteo apotiitiniãtaãua aua kiki maerekati matamatakoti auakiti. Iua akiripoakata:

²⁴ —Xesosi Nasaree sitatxitikiri. Kipa pinireka atemoni? Pite ina ate pixipokini ĩkapanikani? Erekarinoka kamakarii. Teoso nakiti pitxaua —itxa.

Ikara atoko iua akiripoakata, kotxi iua maerekati matamatakoti pĩkari Xesosi.

²⁵ Ininiã Xesosi itapararitika txari:

—Piotoka. Pitakanapariko ere kiki ĩto.

²⁶ Iuasaaki maerekati matamatakoti iõkokaĩtotari. Ikatxakasaaki, akiripoakata.

²⁷ Kãkiti iuaãtaã auakani tsorĩkaãta. Iuasaaki imisãkiretakauana:

—Kiripa? Atxiĩti oerekakori sãkiretxiti amaneri apopeka? Iua sãkire kaposotiireri. Ipaniãtakiti maerekati matamatakoti kamapeka —itxanãtana.

²⁸ Ininiã ikara pirena iaripireta ikini Kariréia tõpati.

Xesosi Makananitiniro Simão Petro Imakiro
(Mateo 8.14-15; Arókasi 4.38-39)

²⁹ Ininiã Xesosi, Txiako, Xoão pakini takanapakasaakiri aiko Xoteo apotiitiniãtaãua, isana Simão, Ātree pakini aapokomoni. ³⁰ Iuasaaki Simão imakiro apoomata. Osirĩkanãta. Ininiã ninoa sãpiretari Xesosi oamianare. ³¹ Ininiã Xesosi sari oamoni. Imaĩkaru ouako. Ōkitikaru. Iuasaakipeka oãpoomare ! auaika. Ininiã opotorika oparĩkauatini, ninoa kiena okamini ĩkapani.

Xesosi Makananitinina Amianatakani
(Mateo 8.16-17; Arókasi 4.40-41)

³² Ininiã mapiãnikata kãkiti minana ikinipoko amianatakani, maerekati matamatakoti auaĩtotakini pakini iuamoni. ³³ Ininiã ikinimane iua sitatxi auakani apotiitaua aapokotxi tore takote. ³⁴ Ininiã Xesosi makananitana itomaneri amianatakani. Kaiãopokori amianari auakini imkananita. Apaka omitikana itomaneri maerekani matamatakoni. Iuasaaki !auiritana ninoa sãkirauatini, kotxi ninoa imarotari Teoso ãkiri ininiua Xesosi.

Xesosi Sãpiretiniri Teoso Sãkire
(Arókasi 4.42-44)

³⁵ Īkanõkapanika mapiãpanika Xesosi õkitikaua. Itakanapari aapokotxi. Iuanoka sari kãkiti mauakaniãtaã iri iaxitikiri imisãkiretini ĩkapani.

³⁶ Eereka Simão imoianariakorikata sari Xesosi initinina ĩkapani. ³⁷ Ninoa apokasaakiri, itxana:

—İkinimane nitai —itxarina.

³⁸ Xesosi apakapapiretana:

—Masa ātiātaā kākiti aapokomoni. Iuaā nisāpiretariko Teoso sākire, kotxi ikara atoko itxa nipařka kākitimoni. ³⁹ Xesosi sari ikini Kariréia tōpa. Aiko Xoteo apotiitiniātaāua isāpiretari Teoso sākire. Apaka omitikana maerekani matamatakoni kākiti ĩtoā auakani.

Kiki Maere Matati

(*Mateo 8.1-4; Arókasi 5.12-16*)

⁴⁰ Amianatakari maere matati apoka Xesosimoni. İkapotoreēkaua iua apisatoō. Iua iteene amanaāri:

—Nimarotari, pinirekiniāri piposotari erekape pitxĩkitakinino —itxa.

⁴¹ İniniā iuasaaki Xesosi iteene tiretari iua. İtakari iuako iua nopini. İtxari:

—Ari, ninirekapitikari. Erekapekai uatxa.

⁴² İuasaakipeka amianari !auaika. Erekapekari iua.

⁴³ Xesosi iokanatarı iua. İuasaaki isāpiretari iua:

⁴⁴—Kona pisāpiretapiri apanakini pitemoni nikamakiti. Uatxa merepanika pisa sasetotxiakorimoni. Poerekari pĩto ninoamoni. Eereka pikamariko Moisesini paniātakiti. İkara atoko oerekari kākiti atāo erekapeka pinini —itxari.

⁴⁵ İuaritika isāpiretapikari Xesosi kamakiti. İniniā iaripireta ikara pirena. İkara xika Xesosi !iposotaika isini aapokotximoni. İkaikota kākiti mauakaniātaā. İuaritika kākiti sari iuamoni.

2

Matĩpokotakati Pirena

(*Mateo 9.1-8; Arókasi 5.17-26*)

¹ Eereka mapaōtıpeka inaka atoko iuaĩkana Xesosi Kapanaoō sitatxiti apoka itxa. İaripireta Xesosi inirimane aapoko apokini. ² İuasaakipeka mirikiniti kākiti apoka iuamoni, ininiā iua aapokotxi xāpoka. Apotiıtauana ĩronakikoātaā apaka. İniniā !apakata apanakini kākiti ĩroini aapokotxi āki. İuasaaki Xesosi sāpiretari Teoso sākire kākitimoni. ³ İuasaaki ipi ipi pakini kikiakori minari matĩpokotakati. ⁴ Kākiti itomaneri ĩronakikoātaā aua, ininiā kona iposotarına Xesosi takote apokinina. İniniā aapokotxi nopini, Xesosi manapi ninoa sonatarı iua matĩpokotakati iokatxakinina tĩkane Xesosimonikari. İposo atoko isikakaāpotarina iua manapi. ⁵ Xesosi imarotari ninoa atāo auikiniri iua sākire. İniniā Xesosi txari matĩpokotakatimoni:

—Namarite, pimaerekani makatxakapeēkaika —itxa.

⁶ İuasaaki ātikaka kaiōkatsopareriakori topākanāta iuaā. İtsorĩkaānātana. İxiniremoninani:

⁷—Kinirepa ia kiki ikara atoko itxa? Maerekati isāpiretakiti, kotxi Teosonanira posotari imakatxakiniri kākiti maerekani —itxa ninoa sākire.

⁸ İuasaakipeka Xesosi imarotari ninoa xinikakiti ākixinireēna. İniniā Xesosi txana ninoa:

—Kininiāpa ikara atoko hĩtxa xinireta? ⁹ Nıtxari iua imaerekani nimakatxakini, txamari !himarotari imaerekani atāo nimakatxakini. “Pōkitikaua. Pisirimata pikoseka, sipe pitxa,” nininiā, iuasaaki himarotari nisākire atāo ininiāua, kōtxi hĩtikari. Nıposotiire imaerekani nimakatxakini ĩkapani, nıposotiire iua nōkitikini ĩkapanıtxıkana. ¹⁰ İniniā uatxaika noerekai hĩte, Teoso iokanatanı nota hĩtari iaxıtikiri ĩkorapokoritimoni kākiti maerekani nimakatxakini ĩkapani —itxana kaiōkatsopareriakori.

¹¹ Ininiã matĩpokotakatimoni itxa:

—Põkitikaua. Pisirimata pikoseka, sipe pitxa paapokomoni —itxa.

¹² Iuasaakipeka iua õkitikaua. Ikosekari isirimata. Īkorape itxa ikinimane okiãtaã. Imakinika kãkiti tikoka.

—Peerekari Teoso kamakiti. Kona mitxi ate itikari ĩkora atoko inakari — itxanãtana kãkiti.

Mateo Pirena

(*Mateo 9.9-13; Arókasi 5.27-32*)

¹³ Ininiã iuaĩkana isari ipoamoni. Kaiãopokori kãkiti apotiitaua iuakata. Iuasaaki oerekana ninoa. ¹⁴ Isaãpotakasaaki, atamatari Arevii inakori. Āti iuãka Mateo inaãka. Aopeo inakori ãkiri itxaua iua. Iitopãkanãta auĩtetxiakori txineirote apakapiniãtaã. Ininiã Xesosi txari:

—Masa notakata.

Iuasaakipeka õkitikaua, Xesosikata sa itxa.

¹⁵ Eereka Xesosi nipokota Arevii aapoko. Itori auĩtetxiakori txineirote apakapakani, itori apanakini maerekani, topãkanãta Xesosi takote, imoianariakori takote pakini. Kaiãopokori kãkiti aua iuasaaki, kotxi kaiãopokori kãkiti Xesosikata sikani. ¹⁶ Pariseoakori, kaiõkatsopareriakori pakini itikari Xesosi auĩtetxiakori txineirote apakapakanikata, apanakini maerekanikata pakini inipokotini. Ininiã kaiõkatsopareriakori, pariseoakori pakini pimaãna Xesosi moianariakori:

—Kinirepa hinipokota auĩtetxiakori txineirote apakapakanikata, maerekanikata? —itxana.

¹⁷ Xesosi ikara ikenakotakasaaki, itxana:

—Kãkiti mamianatakani kona nirekari kãkiti pinĩtxi imarotakari. Amianatakaninokara nirekari pinĩtxi imarotakari. Nota uai apoka maerekani nakiritini ĩkapani, imaerekanina itakanapinina ĩkapani. Kona nakiritari kãkiti “atão inakari kamakani” uãkatakaniua —itxa Xesosi.

Nipokori Takanapiko Teoso Misãkiretiko Īkapani

(*Mateo 9.14-17; Arókasi 5.33-39*)

¹⁸ Āti õti Xoão moianariakori, pariseoakori pakini takanapari inikinina Teoso imisãkiretinina ĩkapani. Iuasaaki kãkiti pimaãri Xesosi:

—Kinirepa Xoão moianariakori, pariseoakori pakini takanapari inikinina Teoso imisãkiretinina ĩkapani, txamari pite moianariakori kona ikara atoko ! itxana.

¹⁹ Ininiã Xesosi:

—Kiiniri kãkiti ĩtanorouatakasaaki, ĩtanorouatakari aua iuaã, ininiã kona kãkiti takanapari inikini iuasaaki. Kona iua ĩtanorouatakari nirekari kãkiti natxitini. Ininiã iua auakasaaki ninoakata, ikinimane nipokota.

²⁰ Ininiã nota ĩtanorouatakari atoko nitxa. Nota auakasaaki nimoianariakorikata, kona itakanaparina inikinina Teoso imisãkiretinina ĩkapani. Āti õti nota !auaika nimoianariakorikata. Iuasaakiikarako itakanaparina inipokotinina Teoso imisãkiretinina ĩkapani.

Amaneri Mãkatxi Pirena

²¹ Kona kãkiti tãpanetari mãkatxi kitxakari mãkatxi mata amaneriã. Mãkatxi mata amaneri itxikika, ininiã kitxakari tsorakita.

Amaneri Sako Aamata Kamakori

²² Kona kãkiti takari iãriã amaneri sako kitxakari aamata kamakori ãki. Itakiniãri, koanatxi kitxakari aamata kamakori tsorakita, ininiã iãriã xikepoata, ininiã koanatxi !kikeikari. Sako amaneri ãki itakaãka iãriã amaneri. Iua atokokana kona hĩkoketari kitxakari sãkiretxiti amaneri sãkiretxitikata.

Tomatiko Ōti Pirena
(Mateo 12.1-8; Arókasi 6.1-5)

²³ Tomatiko ōti Xesosi imoianariakorikata napaāpota kikio triko takikoātaā. Ininiā ninoa makatxakaro triko iki mapaki inikinirona ĩkapani.

²⁴ Pariseoakori atamatana, ininiā itxarina:

—Kinirepa ninoa parĩkauata tomatiko ōtisaaki? —itxana.

²⁵ Ininiā Xesosi apakapapiretana:

—Kona hātatsopatapanikari Taviini kamakiti? Iua, imoianariakorikata natx-itakasaaki, kona himarotatari ikamakiti? ²⁶ Iua ĩroā Teoso misākiretikoātaā. Apiataa inakori sasetotxi auĩte apiatakari iuasaaki. Iuaā Tavii nikari komiri Teosomoni sikakori. Sasetotxinokara auiritaāka iua komiri inikinina. Apanakini !auiritaāka inikiniri. Txamari Tavii sikari imoianariakori inikinina ĩkapani.

²⁷ —Tomatiko ōti kamaāka, kākiti ĩto ereka inini ĩkapani. Kona kākiti kamaāka tomatiko ōti auini ĩkapani. ²⁸ Nota hĩtari iaxitikiri posotari ikinipoko ninireēkiti nikamini tomatiko ōtisaaki, kotxi Apiananiri nitxaua —itxa Xesosi.

3

Motĩkauakotakari Pirena
(Mateo 12.9-14; Arókasi 6.6-11)

¹ Iuaĩkana Xesosi imoianariakorikata ĩroā aiko Xoteoakori apotiitiniātaāua. Iuaā apokari kiki motĩkauakotakari. ² Ininiā iuaā auakani txari

—Atxiĩti iua erekapeka txĩkitakari motĩkauakotakari uatxa tomatiko ōtisaaki?

Ninoa xinikari ikara atoko inini, kotxi ninoa kinirāo apoĩtaka txari Xesosi.

³ Ininiā Xesosi akiritari iua motĩkauakotakari:

—Uaimoni pina —itxari.

⁴ Iposo atoko ipimaāna iuaā auakani:

—Kipa atāo Teoso paniātaua akamini tomatiko ōtisaaki? Maerekati akaminikani? Erekarı akaminikani? İpaniātataua āti amakananitini? İpaniātataua āti aōkini?

Txamari ninoa !kasākirena. ⁵ Xesosi atamatana. İuasaaki inaiataua, iuaritika imatinaniuata, kotxi ninoa !inirekarı atāo imarotinina. Ininiā Xesosi txari iua motĩkauakotakari:

—Pisirĩkauakota —itxari.

Ininiā itamēkauakota. Ereka pe itxa iuako. ⁶ Ininiā pariseoakori potorika iuaā. Isana Erotxi sākire auĩākanimoni. İuaātaā ninoa xinikari Xesosi okaenetinina.

İtori Amianatakani Sari Xesosimoni

⁷ Ininiā Xesosi sari Kariréia poamoni. İuasaaki itori kākiti Kariréia tixinikini, Xotéia tixinikini pakini sari iuamoni. ⁸ Xerosareē sitatxitikini, İtoméiakini, Xotāo ipiniākini, Txirokini, Sitoōkini pakini sari iuamoni. Ninoa kenakoenetari ikamakiti, ininiā iuamoni isana. ⁹ Ininiā ipaniātana imoianariakori:

—Kanaua himina, kotxi kaiāopokori kākiti katikaāpotano. Ininiā kanaua āki niereētaua —itxa Xesosi.

¹⁰ İuasaaki kaiāopokori kākiti erekapeka itxĩkitakapeka. Apanakini amianatakani nirekakari imaātakinirina Xesosi, erekapeka ininina ĩkapani. Ininiā ikatikaāpotarina Xesosi, kotxi kaiāori kākiti. ¹¹ Maerekati matamatakoti auakini atamatakasaakiri Xesosi, irikana Xesosi apisatoō. Akiripoatana:

—Teoso ākiripitikai pite.

¹² Ininiā Xesosi kona auiritana ninoa: “Teoso ākiripitikai,” ininina.

Xesosi Mereēna Tosi İmoianariakori
(Mateo 10.1-4; Arókasi 6.12-16)

¹³ Iposo atoko Xesosi sari õtanoxiratarimoni, akirita itxana inirekaãkini. Ininiã ninoa sari iuamoni. ¹⁴ Ininiã iua mereẽna tosi kikiakori iuakata kaikotakani tãkane, Teoso sãkire sãpiretakani ãkapani. ¹⁵ Iua sikari iposotiire ninoa moni, amianatakani erekapeka itxãkitakinina ãkapani, apaka maerekati matamatakoti omitikinina ãkapani. ¹⁶ Ininiã akiritari Simão. Xesosi takauãkatari Simão ãti iuãka. Petro itxaua. ¹⁷ Akiritana Txiako, itari Xoão pakini. Sepeteo anaakori itxauana. Xesosi takauãkatana ninoa Poanexi. Poanexi Popãkari sãkireẽ “Ikarokirauari anaakori.” ¹⁸ Akiritana ãtree, Piripi, Patoromeo, Mateo, Tomee, Txiako pakini. Aoepo ãkiri itxaua iua Txiako. Akiritana Tateo, Simão pakini. Homano omanatakari iua Simão. ¹⁹ Akiritari Xotasi Isikariotxi inakori apaka. Xesosi mãkapiritakari itxaua iua Xotasi Isikariotxi. Pakini Xesosi akiritakini imoianariakori ininiuana ãkapani.

*Maerekani Matamatakoni Omitikiko
(Mateo 12.22-32; Arókasi 11.14-23; 12.10)*

²⁰ Iuaãkana ãti aapokotxitimoni isa Xesosi, imoianariakorikata. Iuasaaki mirikiniti kãkiti iuaãkana apotiitaua. Ikara atoko ininiã kona ninoa nipokota. !Apakata inipokotinina, kotxi mirikiniti kãkiti aua iuaã. ²¹ Xesosi nirimane kenakotari kãkiti apotiitiniua iuakata. Ininiã isana iua apinina ãkapani.

—Imapitxiritapeka —itxana.

²² Kaiõkatsopareriakori Xerosareẽ ãkani apoõtari Xesosi maerekati ikamini. Ninoa sãkire:

—Peosepoo inakori auaãtotari iua. Ininiã Peosepoora omitikari maerekati matamatakoti —itxana.

Peosepoo Satanasi itxaua. Apanakini sãkire:

—Maerekani matamatakoni auãte sikaposotiiretari Xesosi maerekati matamatakoti omitikini.

²³ Ininiã Xesosi akiritari kãkiti isãkire ikenakotinina ãkapani. Sãpirenatxi atão inakari oerekiko isãpiretana ninoa. Ipimaãna:

—Natokopa itxa Satanasi omitikiniua? ²⁴ Auãtetxi tixine auakani naiatakaniãua, ixipokaãkanako. ²⁵ Kãkiti aapoko ãki auakani ninoakakarika neenamauatiniã, ixipokaãkanako apaka. ²⁶ Iua atokokana, Satanasi nitiriakori, ninoakakarika naiatakaniãua, Satanasi tapara xipokako.

²⁷ —Kona kãkiti ãroã kiki mitapoari aapoko ãki ãtiritiutini ãkapani. Kinirão ãtiritiutaka, ininiã iaxirikari mitari mitxi. Iposo atoko inirekaãkiti ãtiritãka.

²⁸ —Ari, atãopitikara nota txai hãte. Apakata Teoso makatxakiniri ikinipoko maerekati kãkiti kamakiti, imaerekani Teoso imisãkirepiretini pakini. ²⁹ Txamari ãtipekana maerekati kamakari aua. Erekari Matamatakoti misãkirepiretakari maerekani makatxakiko kona auari. Ikara atoko inakani inikoriãriko imisiritiko maerekani misiritikoãtaã —itxa Xesosi.

³⁰ Xesosi ikara atoko itxa, kotxi pariseoakori txari: “Iua auari maerekati matamatakoti.”

*Xesosi Inoro, Itariakori Pakini
(Mateo 12.46-50; Arókasi 8.19-21)*

³¹ Iuasaaki itariakori inorokata apoka porikiti. Ipaniãtarina ãti akiritiniri Xesosi. ³² Iuasaaki itori kãkiti topãkakani ãkitari Xesosi. Isãpiretarina:

—Pitariakori, pinoro apaka porikiti aua. Initanãtai —itxarina.

³³ Ininiã Xesosi apakapapireta:

—Kiripa nitariakori, ninoro pakini?

³⁴ Iua atamatana itakote topãkakani:

—Hãtamata, uai aua ninoro, nitariakori pakini. ³⁵ Teoso nireẽkiti kamakani nitariakori, nitaroakoro, ninoro pakini itxauana —itxa Xesosi.

4

*Katakareri Pirena**(Mateo 13.1-9; Arókasi 8.4-8)*

¹ Iuaĩkana Xesosi oerekarauata ipoa takote. Kãkiti mirikiniti, ininiã imorõkokaua kanaua ãki. Iitopãka. Ninoa aua imiriĩ, ininiã iua kanauaã oerekarauata. ² Itori Teoso sãkire oerekana ninoa sãpirenatxi atão inakari oerekikoã. Itxana:

³—Hĩkenakota. Katakareri takarauata. ⁴ Itakarauatakasaaki itakareki irika kimapori tiniãpo. Ininiã kotipiriki nikari itakareki.

⁵—Apanakini itakareki irika kai auiniãtaã, kipatxi mauakaniãtaã. Atãoka ipitxaka. ⁶ Kipatxi poiãoka auiniã atokatxi pataka apokasaaki itxarika. Omakotsani xika osonãka. ⁷ Apanakini irika inako sauaki. Inako aneẽkasaaki, okari takari. !Iriuata. Ipina.

⁸—Apanakini irika kipatxi auiniãtaã. Ininiã iriuata. ãti poiãoka iriuata, trĩtakata. ãti apiata iriuata, sesẽtakata. ãti kaiãopoko iriuata, seĩkata.

⁹—Kakenakokii, ininiã hĩkenakotariko nisãkire —itxa Xesosi.

*Kãkiti Mimarotakiniti Xesosi Sãpiretini Pirena**(Mateo 13.10-23; Arókasi 8.9-15)*

¹⁰ Iuanani imoianariakorikata auakasaaki, ipimaãrina Xesosi:

—Poerekaua mixikanani sãpirenatxi atão inakari oerekiko pisãpiretakiti? —itxarina.

¹¹ Ininiã isãpiretana:

—Teoso sãkire mauĩãkani !imarotari Teoso auĩtetxi ininiua. Teoso oerekai hĩte ninoa mimarotakiniti. Teoso oerekana ninoa isãkire sãpirenatxi atão inakari oerekikoã. ¹² Atxiĩti ninoa iteene atamatari Teoso oerekakiti, iuaritika !imarotarina atamatakitina. Atxiĩti iteene ikenakotarina Teoso sãkire, iuaritika !imarotarina ikenakotakitina. Imarotaãkamariko, akiritaãkamariko Teoso, ininiã Teoso makatxakamariko ninoa maerekani.

¹³ Ininiã Xesosi txari:

—Himarotatari ikara sãpirenatxi atão inakari oerekiko?

—!Aimarotari —itxana.

—Ininiã natokopa ininiãparako himarotatari apanakini sãpirenatxi atão inakari oerekiko?

¹⁴ Ininiã imimarotakinitina oerekana:

—Iua takarauatakari takari Teoso sãkire. ¹⁵ Aua kãkiti kimapori tiniãpo takarekitxi irikiniãtaã atoko inakani. Ininiã Teoso sãkire ikenakotakasaaki Satanasi apoka. Ininiã imakatxakari Teoso sãkire ãkixinireẽna apokakari.

¹⁶ —Aua kãkiti kai auiniãtaã atoko inakani. Ninoa kenakotakasaakiri Teoso sãkire, iuasaakipeka apakaparina ipoxokoniritikana. ¹⁷ Itxamana, kona kakotsari. Imaxikiko apokiniã, imisiritiko Teoso sãkire auikinina xika apokiniã, iuasaaki itakanaparina Teoso sãkire.

¹⁸ —Aua kãkiti aanaia auiniãtaã atoko inakani. Ninoa kenakotapitikari Teoso sãkire. ¹⁹ Txamari maerekaxiniretinoka itxana. Txineironoka inirekana, ininiã ikara misirienetana ninoa. Kaiãopokori inireẽkitina, Teoso manirekakiniti. Maerekaxiniretinoka ininina, txineiro, inireẽkitina pakini inako atoko itxa, ininiã !ixinikaikarina Teoso sãkire, ininiã kona iriuata.

²⁰ Aua kãkiti kipatxi erekari auiniãtaã atoko inakani. Ninoa auikari Teoso sãkire. Iriuatana. ãti iriuata poiãoka, trĩtakata. ãti iriuata apiata, sesẽtakata. ãti iriuata ito, seĩkata.

*Tirikapi Pirena**(Arókasi 8.16-18)*

²¹ Xesosi pimaãna ninoa:

—Nanipa hītakari tirikapi? Kopiti ākikani hītakatari? Amesa patapikani hītakatari? Konapitini. Hītakari itano imakinika iopinikini ĩkapani. ²² Iomaātakori āti ōti oerekaākako. Kipatakori oerekaākako, kotxi nota imarotapitikari hīkamakiti. ²³ Kakenakokii, ininiā hīkenakotariko nisākire —itxa Xesosi.

²⁴ Xesosi sākirauatapanika:

—Hītakaōtxikariko nisākire. Imakinika hīkenakotako. Erepaniko pikamakiti ātimoni, kotxi pite kamakitixikana kamaāka pitemoni. Erepaniko, kotxi apiata ikamaāka pitemoni. ²⁵ Teoso sākire auakiti, iua sākire kīpitakari, Teoso sikari apikomoni imaroretxi iuamoni. Txamari Teoso sākire kenakotakari, isākire makīpitakati, imarore xapiti iuamoni auakari makatxakaākako.

Takariki Pirena

²⁶ Apikomoni Xesosi txari:

—Teoso auītetxi ininiāua kiki takariki taākari atoko itxa. ²⁷ Itakarauata. Imaka ĩkanōka. Āti iparīka ikama pokamara. Iuasaaki itakare pitxakapeka. Kona iua imarotari otomorekini. ²⁸ Merepanika otomoreka. Iposo atoko opitxaka. Eereka opa aua. ²⁹ Oaneēpeka onakasaaki katakareri makoapataro, kotxi oamiko manapipeka itxa.

Ikara atoko itxa Teoso auītetxi ininiāua.

Mostata Pirena

(*Mateo 13.31-32; Arókasi 13.18-19*)

³⁰ Xesosi sākirauatapanika. Itxari:

—Natokopa itxa Teoso auītetxi ininiāua? Īkiripa sāpirenatxi atāo inakari oerekiko oerekaua? Ia atoko itxa: ³¹ Teoso auītetxi ininiāua mostata oki atoko itxa. Axapitikiro oa. Apanakini iki apiata. ³² Otakaāka atoko opitxaka. Eereka oaneē. Apanakini takari ĩtano apiata oa. Amaripokoro okati. Kotipiriki takari okoa okatiā. Iua atokotxikana Teoso auītetxi ininiātaāua.

Merepanika poiāo kākiti. Eereka apiata. Eereka kaiāopokori kākiti auītetari Teoso. Txamari iuasaaki Satanasi apoka ninoamoni kotipiriki apokini atokokana.

³³ Kaiāopokori sāpirenatxi atāo inakari oerekiko isāpiretana, Teoso sākire imarotinina ĩkapani. Ninoa imarotakasaakiri isākire, apiata isāpiretana. Imimarotakanisaakiri isākire, poiāonoka isāpiretana. ³⁴ Teoso sākire oerekasaakina ninoa, sāpirenatxi atāo inakari oerekikonoka isāpireta. Eereka imoianari-akorinoka auakasaaki iuakata, oerekana ikara imarotinina ĩkapani.

Xesosi Iotokakiniri Ītima

(*Mateo 8.23-27; Arókasi 8.22-25*)

³⁵ Iua ōtipanika mapiānikata itxana imoianariakori:

—Maīpiriāta ipoa. Ipiniāmoni masa —itxana.

³⁶ Ininiā itakanapana itomaneri kākiti. Iuasaaki imoianariakori anikari Xesosi kanauaā. Apanakini kanaua axapitiri apaka sari ninoakata. ³⁷ Īpiriātakasaakina ĩtima kataparari apoka ninoamoni. Tsakati kataparari, ininiā āparaā ierepeēpokataua kanaua āki. Kanaua sakikaariāpotape.

³⁸ Iuasaaki Xesosi ikapokiāmoni imakanāta. Isirimata nopini imakanāta. Ninoa ōpirīkari iua:

—Kona pimaākataua ate. Kona pitiretataua? Apinanapanoka —itxana.

³⁹ Ininiā imereka. Ipinitari ĩtima:

—Piotoka. Auapika pitxako —itxari ipoa.

Ininiā itsorīkaxitita. Ītima iotoka. Tsakati iotoka apaka. ⁴⁰ Ininiā Xesosi:

—Natokopa ininiāpa kapīkarei hīte? Kinirepa hīte kona auikano nota? —itxana ninoa.

⁴¹ Apiapĩkareta ninoa. Ininiã ninoa:
—Kinakaripa ia kiki, kotxi ãtima, tsakati pakini auikari iua sãkire —itxana.

5

Kiki Maerekani Matamatakoni Auaĩtotakiti
(Mateo 8.28-34; Arókasi 8.26-39)

¹ Xesosi imoianariakorikata apoka ãtiãtaã Xerasa tõpa, Kariréia poa ipiniã. ² Xesosi kanĩkiĩtakasaaki, kiki ina iuamoni. Iua akauariãtaã auakari. ³ Iuaãtaã iua auanãta. Kãkiti !iposotari iĩtxikiniri iua. Iĩtxikare metao kamakori karakitapekata. ⁴ Kaiãokatani kãkiti iĩtxikari iuako, ikiti pakini metaoã, txamari ikakarakitsatari metao. !Apakata kãkiti nĩkatiniri iua. ⁵ Īkanõka, pokamara pakini ixirataãtaã akiripoanãta akauari auiniãtaã. Kai soroã iuaka ikisauakitataua. ⁶ Ōtakopanika atapari Xesosi inini. Ininiã imiteẽkata iuamoni. Ikapotoreẽkaua iua apisatoõ.

—Apiananiri pitxaua —itxa.

⁷ Akiripoakata:

—Xesosi, Teoso ãkiri pitxaua. Apiananiri ãkiri pitxaua. Kipa pinireka nota ĩkapani? Teoso uãkaã namanaãi pite, kona pimisiritapeno —itxa maerekati matamatakoti. ⁸ Ikara atoko itxa kotxi Xesosi paniãtari:

—Maerekati matamatakoti pisipeka. Pitakanapari ere kiki —itxari.

⁹ Xesosi pimaãri:

—Kipa piuãka? —itxari.

Iua apakapapiretari:

—“Itori” ninaãka niuãka. Kotxi itori maerekani matamatakoni ate.

¹⁰ Iteene iua amanaãpotari Xesosi:

—Kona piokanatapeua ãtiãtaã.

¹¹ Iuasaaki auari kaiãopokori irari ixiratamoni nipokonãtakani.

¹² Maerekati matamatakoni iteene amanaãri Xesosi:

—Piokanataua ate irarimoni. Pauiritaua ate sini ninoamoni —itxanãtana.

¹³ Ininiã Xesosi iokanataua. Iuasaakipeka maerekani matamatakoni takanapari iua kiki, ĩroã itxana irari ĩtomoni. Iuaãtaã auari ipi mio irari. Ninoa ĩroãkasaaki, irari miteẽkata oiokiriĩtini ipoamoni. Komoka, axãpoãta itxana iuasaaki.

¹⁴ Irari nĩkatakani miteka sitatximoni, aapokotxi poião auinimoni pakini. Isãpiretana kãkiti itikakitina. ¹⁵ Eereka isana Xesosimoni. Iuasaaki atamatarina kiki mitxi maerekati auaĩtotakiti. Iitopãkanãta. Mãkatxi auapekari. Atão iĩkitapeka auari. Iuaritika ninoa pĩkarauata. ¹⁶ Itikakani sãpiretari apanakini iua kiki pirena, irari pirena pakini. ¹⁷ Kãkiti iuaãtaã auakani paniãtari Xesosi osipikiniri iuaãtaã.

¹⁸ Xesosi iereẽtakasaakiua kanaua ãki, iua kiki amanaãri iuakata isini ĩkapani.

¹⁹ Xesosi !auiritari. Itxari:

—Pisa pinirimanemoni. Pisãpiretana Apiananiri kamakiti pite ĩkapani. Pisãpiretana iua iteene iamoniĩkai pite. ²⁰ Ininiã iua sipe. Iuaãtaã auari sitatxi tesi pakini. Iua kiki sari ninoa tesi sitatxitimoni. Isãpiretari kãkiti Xesosi kamakiti iua ĩkapani. Iuaãtaã auakani tsoriãkaãta:

—Anekani, peerekari Teoso —itxana.

Xáiro Amanaãkiti Pirena
(Mateo 9.18-19; Arókasi 8.40-42)

²¹ Ininiã eereka Xesosi ĩpiriãta ipoa. Ininiã ipoa ĩtiniã kaiãopokori kãkiti apotiitaua iuakata. ²² Aiko Xoteo apotiitiniãtaãua sikani auĩte apoka iuamoni. Akiritaãka Xáiro iua. Iua kapotoreẽkaua Xesosi apisatoõ. ²³ Iua iteene amanaãri Xesosi:

—Namarite opinanapanoka. Masa notakata. Pitakari piuako oa nopini erekape onini ikapani.

²⁴ Ininiã Xesosi sari iuakata. Kãkiti kinapokope itxakata isinina.

Xesosi Mãka Maãtakakaro
(Mateo 9.20-22; Arókasi 8.43-48)

²⁵ Iuasaaki sito amianatakaro apoka. Tosikanani oa arêka !iotoka. ²⁶ Okinika otxineiroteẽ oïkitxitapekari oamianare imarotakani. Kaiãopokori ipitamaro. Txamari ninoa !iposotari imaktxakinirina oamianare. Kona erekaro. Apiata oamianare. ²⁷ Okenakoenetakasaakiri Xesosi napini, osari iuamoni. Omaãtakari imãka, ²⁸ kotxi oamoni: “Nimaãtakiniãri imãka, iuasaakiika erekapekano,” otxanãta oxinikakiti. ²⁹ Ininiã omaãtakasaakiri, oarêka iotoka. Iuasaakipeka oimarotari erekape onini.

³⁰ Iuasaakiika Xesosi posotiire sari oamoni. Ininiã ikirioka kãkiti sauaki. Eereka ipimaãna:

—Kipa maãtakatari nimãka? —itxa.

³¹ Iuasaaki imoianariakori apakapapiretari:

—Apiananiri, patamata. Itomaneri kãkiti kinapokopeka, iuaritika pite pimaãri kãkiti: “Kipa maãtakatano?” pitxa —itxana.

³² Iuaritika Xesosi nitari imãka maãtakakari. ³³ Iuasaaki oa sito imarotari erekape onini, ininiã okapotoreẽkaua iuamoni. Opïkarauata. Okikinanaka. Eereka osãpiretari ikinika oamianare iuamoni. ³⁴ Ininiã Xesosi txaro:

—Namarite, pite erekapekai uatxa, kotxi pauikari niposotiire. Pisipini-ikaua, erekaxinirepekai —itxa Xesosi.

Xáiro Ákero Ôkitikiko
(Mateo 9.23-26; Arókasi 8.49-56)

³⁵ Xesosi sãkirauatakasaaki oakata, apanakini Xáiro nitiriakori apoka. Itxari: —Pamarite !auaika. Opïpeka. Pauiritari Xesosi kanapiriini.

³⁶ Ininiã Xesosi !imaãkatari ikara pirena. Itxari Xáiro:

—Kona pipïkarauatape. Pauikano —itxari.

Ininiã ninoa sari Xáiro aapokomoni. ³⁷ Xesosi auiritana Petro, Txiako, Txiako itari Xoão pakini sini iuakata. !Auiritana apanakini sini iuakata. ³⁸ Ninoa apokasaaki Xáiro aapoko, kãkiti iuaãtaã auakani !imarotarina ikamakitina. Ikinipoko kãkiti txiapanãta, akiripoakanãtana. ³⁹ Xesosi ãroã. Itxana:

—Kinirepa iteene hïtxiapanãta? Kinirepa hãkiripoanãta? Amarini !ipina. Oimakanãta —itxa.

⁴⁰ Ininiã inapetarina iua. Ininiã iokanatana ninoa mapara. Oïri, onoro, Xesosi moianariakori pakini ãroã amarini auiniãtaã. ⁴¹ Imaïkaro ouako. Iuasaaki isãpiretaro oa isãkireẽ:

—Taritaa komii.

Popïkari sãkireẽ: “Amarini põkitikaua.” ⁴² Iuasaakipeka oõkitikaua. Otïpokota. Oa amarini aua tosi anokanani. Iuasaaki ninoa iteene tsorïkaãta. ⁴³ Ininiã Xesosi paniãtana:

—!Hïãpiretapiri apanakini nimakananitiniro oa.

Apaka ipaniãtana isikakienatiniro oa.

6

Nasaree Auakani Kona Auikari Xesosi Sãkire
(Mateo 13.53-58; Arókasi 4.16-30)

¹ Xesosi imoianariakorikata potorika iuaã. Nasaree sitatxitimoni isana. Iuaãtaã mitxi Xesosi aneẽ. ² Tomatiko õtisaaki iua oerekari kãkiti aiko Xoteo apotiitiniãtaãua. Xesosi sãkire kenakotakani tsorïkaãta. Itxana:

—Nanipa apaiaõkarauata, ikara atoko imarotini? Kipa oerekari imarore? Ikamakiti oerekari apiata imarore aua. Kininiãpa ìkora atoko itxa posotiireta? ³ Ate imarotari iua, kotxi aapokotxi kamakari itxaua iua. Maria ãkiri iua. Iua itariakori Txiako, Xosee, Xota, Simão pakini itariakori itxauana. Itaroakoro apaka aua uai, ininiã ate imarotari iua —itxana.

Ikara xika kona ninoa auikari isãkire.

⁴ Ininiã Xesosi txana ninoa:

—Teoso sãkire sãpiretakari paxitaãka, txamari Teoso sãkire sãpiretakari itixineẽ auakasaaki, iuaã auakani, inirimane, iua aapoko ãki auakani pakini ! ipaxitari. !Auikarina iua sãkire —itxa.

⁵ Ininiã iuaã kona ikamari iposotiire apiari. Iuako itaka ãtikaka amianatakani nopini, ininiã amianatakani erekapeka itxĩkitaka. ⁶ Itsorĩkaãta, kotxi iuaã auakani !auikari isãkire. Ininiã iua tōpa isari aapokotximoni. Oerekarauata iuaã. Eereka isari apanakini aapokotxitimoni. Iuaĩkana oerekarauata. Itxaãpota iuaãtaã.

Xesosi Iokanatana Imoianariakori Kãkitimoni.
(Mateo 10.5-15; Arókasi 9.1-6)

⁷ Xesosi akiritana imoianariakori tosi pakini. Ipi iokanata ãtiãtaã, iuaĩkana ãtiãtaã iokanatana ipi. Ikara atoko iokanaãpotana imoianariakori. Iposotiire isikana ninoa maerekani matamatakoni omitikinina ìkapani.

⁸ Itxana:

—Kona minakati hanikape. Hĩtsonerenoka hanika. Kona hĩtii, kona auatxi, kona txineiro !hanikape. ⁹ Hĩkiti mata hĩeretaka. ãtika kasipiri himãka hanika. ¹⁰ Sitatxi hãpokasaaki, ãtika aapokotxinanirako hãua. Iua sitatxi hãuakasaaki, hĩkaikota iua kãkiti aapoko. Kona hãuape ãti kãkiti aapoko. ¹¹ Kãkiti mapakapakanisaakii, hĩsãkire imakenakotakanisaakina, ininiã hĩtakanapana. Hĩpotorikasaaki, hĩxaxipokari kipatxi hĩkiti mataã auakari, ininiã ikara atoko hõerekana ninoa maerekani ininiuana. Kãkiti misiritiko sãpiretiko õti apokasaaki, Sotoma sitatxiti auakani misiritiko auapitika. Iuasaaki Komoha sitatxiti auakani misiritiko auapitika. Iuaritika sitatxi auakani hĩte mapakapakanani misiritaãkako apiata iuasaaki.

¹² Ininiã isana. Isãpiretari kãkiti imaerekani itakanapini.

¹³ Mirikiniti maerekati matamatakoti iokanatana. Iĩtxiã itakana amianatakani nopini. Ininiã erekapeka itxĩkitakana amianatakani.

Xoão Kapatxisareri Ipinini
(Mateo 14.1-12; Arókasi 9.7-9)

¹⁴ Auĩtetxi Erotxi inakori kenakopiretari Xesosi pirena. Xesosi uãka iaripireta ikini tōpati. Ininiã Erotxi xinikanãta:

—Ikara Xesosi, Xoão kapatxisareri itxaua. Uatxa iua õkitikapekaua. Iuakara Xesosi itxa. Ininiãkara iposotiire aua iuamoni.

¹⁵ ãtikaka uãkatari Xesosi Eríasi ininiua. ãtikaka uãkatari Xesosi Teoso sãkire sãpiretakari kitxakapirĩka ininiua.

¹⁶ Ikara Erotxi kenakopiretakasaaki, itxari: —Xoãokara nitsotakakiitakitikara iua Xesosi txa. Ipĩpekariika iuaĩkana õkitikapekaua —itxa.

¹⁷ Mitxi Erotxi takaro itari Piripi ìtanoro. Ouãka Erotxia inakoro. Oa xika Erotxi maĩkari Xoão. Iaxiriĩtotari, kateia ãki taka itxari. ¹⁸ Xoão takaãka kateia ãki, kotxi itxari Erotximoni:

—!Erekari pitari ìtanoro pitakini —itxari.

¹⁹ Ikara xika Erotxia apaka omanatari Xoão. Oa iteene kinirão okaka otxamari Xoão. Kona oposotari oõkiniri iua, ²⁰ kotxi Erotxi pĩkari Xoão. Iua imarotari, atão inakarinoka kamakari, erekarinoka kamakari ininiua

Xoão. Xoão sākire ikenakotakasaaki, !iteene !imarotari isākire, iuaritika iua apokaerekatari ikenakotiniri isākire.

²¹ Erotxi kamari isaiã kiiniriti. Iua kemaĩtxitana sotato auĩteakori, Kariréia auakani auĩteakori, apanakini auĩteakori pakini. ²² Ininiã Erotxia ãkero apoka iua kiiniritiã. Iuasaaki oserenapirĩkata Erotxi apisatoõ, ikemaĩtxitakini apisatoõ pakini. Ninoa potxitari oserenini. Ininiã Erotxi txaro oa ãtokoro:

—Pinirekakiti pamanaãno, ininiã nisikai. ²³ Atãopitikara nisikai pamanaãkiti. Nitixine pinirekiniã, ipixini nisikai —itxaro.

²⁴ Ininiã oa miteka onoromoni. Oa pimaã txaro onoro:

—Kiripa namanaãtari? —otxaro.

Ininiã onoro txaro:

—“Xoão Kapatxisareri kii prato nopini ninireka,” pitxari. Ikara atoko pamanaãri iua —otxaro.

²⁵ Ininiã katimariã okanapiriã kiiniri auiniãtaã iuaĩkana. Katimariã auĩtetximoni osa. Oamanaãri iua:

—Ninirekari Xoão kapatxisareri kii prato nopini —otxa.

²⁶ Ininiã Erotxi maerekaxiniretinoka itxa, kotxi mitxi iua sãpiretaro oa amanaãkiti isikiniro oa ikemaĩtxitakini apisatoõ. Ininiã !apakata imasikakaniãri isikaenetakiti. ²⁷ Ininiã katimariã ipaniãtari sotatoakori okiniri Xoão:

—Ikii himina —itxa.

Ininiã isana kateiamoni. Itsotakakiitarina Xoão. ²⁸ Pirato nopini itakarina ikii, sika itxarona ãtokoro. Ininiã oa sikari onoromoni.

²⁹ Ininiã Xoão moianariakori kenakopiretakasaakiri Xoão okiko pirena, isana kateiamoni. Aparina iĩto. Itakarina iĩto kai iriko ãki.

*Sĩko Mio Kãkiti Xesosi Sikakienatini
(Mateo 14.13-21; Arókasi 9.10-17; Xoão 6.1-14)*

³⁰ Ininiã Xesosi iokanatakini kanapiriã iuamoni. Apoka itxana Xesosi-moni. Isãpiretarina ikamakitina, oerekakitina pakini. ³¹ Iuasaaki kaiãopokori kãkiti aua iuaãtaã, ininiã !apakata inipokotinina. Ininiã:

—Amasipeka kãkiti mauakaniãtaã atomatini ĩkapani —itxana.

³² Ininiã kanauaã iereẽtauana. ĩpiriãtarina ipoa. Isana kãkiti mauakaniãtaã.

³³ Kãkiti itikari Xesosi inapaãpotini, ininiã ninoa miteka. Iopiriãrina ipoa koropoa, apoka itxana Xesosi apisapanika. ³⁴ Iua kanĩkiĩtakasaaki apisamoni mirikiniti kãkiti, ininiã iamoniĩkana, kotxi soti auĩte ipitikiri mauakiniti atoko itxana. Iuasaaki Xesosi oerekana kaiãori Teoso sãpiretakiti.

³⁵ Ininiã mapiãpeka inaãpotiniã, Xesosi moianariakori iuamoni apoka. Itxarina:

—Kona kãkiti aapoko auari uai. Uatxa mapiaãpopeka. ³⁶ Ininiã pipaniãtana kãkiti isinina ĩkapani nipokori iamotinina tĩkane.

³⁷ Ininiã Xesosi:

—Hĩtekarako sikakienatana ninoa —itxana.

Ininiã ninoa:

—Pinirekatari asini komiri aamotini ĩkapani? Oito kasiriti kãkiti parĩkauatini ĩki anireka komiri ĩki naia kãkiti nikini ĩkapani —itxana.

³⁸ Ininiã Xesosi pimaãna ninoa:

—Kipakinipa komiri katari aua? Hãtariko —itxa.

Ninoa imarotakasaakiri, apoka iuamoni. Itxana:

—Sĩko pakini komiri katari, ipi ximaki pakini aua —itxarina.

³⁹ Xesosi paniãtana ikinika kãkiti topãkini katsotati nopini. ⁴⁰ Ātiãtaã iitopãkana sĩkoẽta, ipinimoni iitopãkana seĩ. Imakinikana ikara atoko itxaãpotana iitopãkinina.

⁴¹ Ininiã Xesosi kosekari sïko pakini komiri, ipi ximaki pakini. Iuasaaki ionakaãta iaxiti:

—Erekapitikari pisikakiti —itxa.

Eereka imaxiõpekari komiri. Isikari imoianariakori. Imoianariakori-ripekana sikaãpotana apanakini. Iuaïkana imapirinikari ximaki, xanaka itxari imakinikana. ⁴² Ikinimanekana nipokota, kamitopeka itxana. ⁴³ Ininiã imoianariakori apotiitari ximaki itetakori, komiri itetakori pakini. Tosi pakini kotari xãpoka itetakori. ⁴⁴ Iuasaaki sïko mio kikiakori nipokotakani.

Xesosi Ipoa Nopini Itïpokotini

(Mateo 14.22-33; Xoão 6.15-21)

⁴⁵ Xesosi takapiretakasaakiri kãkiti, iuasaaki iokanatana imoianariakori ïpiriãtinina iua apisa, Petsáita tixinimoni isinina ïkapani. ⁴⁶ Xesosi takapiretanapaka atoko, mitaxiratari nopini isa Teoso imisãkiretini ïkapani. ⁴⁷ Mapiãpe inakasaaki kanaua ipoa apanïkakiãxitipeka aua. Iuasaaki Xesosi imiriïpanika aua.

⁴⁸ Xesosi atamatana ninoa, itaparanoka itxana imekoãtinina, kotxi ïtima, tsakati pakini anikaãpotana ninoa. Ininiã ikatimaãpotakasaaki, Xesosi apokaãpota ninoamoni. Itïpokota ipoa nopini. Inapaãpoaritana imoianariakori. ⁴⁹ Ininiã ninoa atapakasaakiri ipoa nopini itïpokotini, ninoa uãkatari kamiri. Ininiã ninoa akiripoakata. ⁵⁰ Ininiã iua misãkiretana:

—Kataparaxinire hïtxako. Notakara. Na !hïpïkarauatape —itxana imoianariakori.

⁵¹ Eereka kanauaã iereëtaua. Iuasaaki ïtima iotoka itxa. Ininiã itikokitatana ninoa. Itsorïkaãtana:

—Kiripa atxiïti? —itxana.

⁵² Ikara atoko isãkirena, kotxi kona ixinikaikarina Xesosi posotiire komiri ixanakasaaki. Paikoxinirena ninoa iuasaaki.

Xesosi Makananitana Amianatakani Xenesareekini

(Mateo 14.34-36)

⁵³ Xesosi imoianariakorikata ïpiriãtari ipoa. Isari Xenesaree tixinimoni.

⁵⁴ Ikanïkiïtakasaakina apanakini itikari Xesosi.

—Xesosira —itxana.

⁵⁵ Ininiã imitekana kãkiti auinimoni amianatakani apinina ïkapani. Anikana isirimatana nopini Xesosimoni. ⁵⁶ Ikini sitatxiti kãkiti amianatakani sirïka kimapori tiniãpo. Amanaãrina Xesosi auiritinina ninoa imãka itikakinina. Ikinikana imãka tikakakani erekapeka itxïkitaka.

7

Xoteoakori ïkite Pirena

(Mateo 15.1-9)

¹ Ininiã pariseoakori, kaiõkatsopareriakori pakini, Xerosareë ïkani, apotiitaua Xesosikata. ² Iuasaaki itikarina Xesosi moianariakori marokapiotakanua nipokori inikinina apisa. Ininiã itxana:

—!Erekari imarokapiotakanuana —itxana.

³ Pariseoakori, imakinikana Xoteoakori apaka kamari ikiomaneakori kitxakapirïkarini sãkire iaõka. Inipokotinina apisapanika arokapiotauana.

⁴ Nipokori amotikoãtaã Xoteoakori sikasaaki, eereka apokasaakina aapokona imarokapiotakanianuana kona inipokotana. Tiitxi iãkoanatxi, kopiti, apanakini itiina pakini arokasaakina ikiomaneakorini oerekakiti iaõka arokana.

⁵ Ininiã pariseoakori, kaiõkatsopareriakori pakini pimaãri Xesosi:

—Kinirepa pimoianariakori kona kamatari kitxakapirika atoko ininina? Kinirepa marokapiotakanikaua inikarina nipokori? —itxarina.

⁶ Ininiã Xesosi apakapapireta:

—Mitxipitipanika Isaia sãpiretai hïte. Atão iua sãkire, kotxi hï sãkire atxiïti erekari, txamari kona hïkamari hï sãkire iaõka. Iua txari:

Kamisirienererini ninoa kãkiti. Ninoa sãkireẽnanira ipaxitanona. Åkixinireẽna !inirekanona.

⁷ Maxikatiïka ninoa kapotoreëkaua nota apisatoõ. Maxikatiïka ninoa txano: “Ateosone pitxaua,” kotxi ninoa !oerekari nota sãkire. Ninoa sãkire oerekana, txamari “Teoso sãkire asãpiretai” itxana.

Ikara atoko Isaia iõkatsopatakiti Teoso sãkire.

⁸ —Ininiã hïtakanapapekari Teoso sãkire, kãkiti oereëkiti hïkamini ïkapani. ⁹ Hïtakanapapikari Teoso paniãtakiti, hinirekaãkiti hïkamini ïkapani.

¹⁰ Kitxakapirika Moisesi txari:

Pipaxitariko piri. Pipaxitaroko pinoro. Piri, pinoro pimisãkirepiretiniã, pokaãkako,

itxa Moisesi sãkire. ¹¹ Txamari hïte oerekari kãkiti: “Kãkiti auakiti iri, inoro pakini nirekiniã, iua manirekakaniãri isikiniri ninoamoni, isãpiretana: ‘Ia nota auakiti nisika Teosomoni.’ ” Ininiã lisikari ninoa nirekakiti ninoamoni. Ikara atoko inakari kãkiti sikakiti Teosomoni, hïte takauãkatari “Kopaã.”

¹² Ininiãkara hõerekari kãkiti imatiretakanina iri, inoro pakini. !Apakata hõerekakiti. ¹³ Ikara hõerekakiti xika kona hïte maãkatari Teoso sãkire. Apiata hinirekari kãkiti oereëkiti. Auapanika itori hõereëkiti sãkiretxiti ikara atoko inakari —itxa Xesosi.

Åkixiniretxi Txiko Pirena (Mateo 15.10-20)

¹⁴ Xesosi iuaïkana akiritana ikinimane kãkiti. Itxana:

—Hïkinika hïkenakota. Hïtakaõtxikariko nisãkire. ¹⁵ Imakinika hinikakiti, mapara auakari. !Ikamari ate maerekani. Hïxinireẽ potoriãkarira kamari maerekanitxi. ¹⁶ Kakenakokii, ininiã hïkenakotariko nisãkire —itxa Xesosi.

¹⁷ Ikinimane kãkiti itakanapaka atoko, aapokotxi ãki ïroã. Iuasaaki imoianariakori pimaãri:

—Pisãpiretaua mixikanani pisãpiretakiti —itxana.

¹⁸ Ininiã iua txari:

—! Kiïkitei hïte. Kona hïte imarotatari hinamaã ïroãkari kona kamari maerekanitxi. ¹⁹ Kotxi ïroãkari lisari hïxiniremoni. Hïtikako ãki isa. Iposo atoko hïtikatakasaaki inapa. Ikara atoko ininiã, erekari ikinipoko kãkiti niãkiti.

²⁰ —Ixinireẽ potoriãkari iuara kamari kãkiti maerekani. ²¹ Kãkiti ãkixinire ipotorika ixinikakiti maerekati, anokaretxi, ïtiriatakatxi, okaniuatakatxi, ãti kãkiti ïtanorokata isirïkini nire pakini. ²² Kãkiti ãkixinireẽ ipotorika itirenani, maerekati Satanasi oerekakiti, misirieneretxi, pëtauatakatxi kamakari, xikotakatxi, ãti misãkirepiretiko, iuikiniua, miïkiteti inini pakini. ²³ Ikinika ikara maerekati kãkiti ãkixinire auakari txikotari kãkiti xinire —itxa Xesosi.

Xoteo Minakatoua Auikiniri Xesosi Sãkire (Mateo 15.21-28)

²⁴ Xenesaree tixini Xesosi potorika. Txiro sitatxiti tõpa, Sitoõ tixini pakini moni isa. Iuaã kãkiti aapoko ïroã. Kona inirekari kãkiti imarotiniri iua auiniãtaã. Txamari !iposotari iomaãtiniua. Kãkiti imaroãpotari iua auiniãtaã.

²⁵ Sito apoka Xesosimoni, kotxi oa kenakopiretari Xesosi pirena. Maerekati matamatakoti auaïtotaro oimi. Oãpokasaaki Xesosimoni, okapotoreëkaua iua apisatoõ.

²⁶ Oa sito sākiretari Kreko sākire. Āto uāka oa. Siropenísia tixinikero oa. Okapotoreēkasaakiua Xesosi apisatoō, oamanaāri Xesosi:

—Pomitikenatariko maerekati matamatakoti namarite ĩtoā auakari —otxari.

²⁷ Ininiā Xesosi:

—Xoteo !pitxaua. Maparakerorai. Pite nirekakari nisikinii Xoteoakori nakiti. Amarini mitxi nikini atāo. !Erekari nokiniri amarini kiena anāpamoni —itxaro oa.

²⁸ Oa apakapapireta:

—Atāopitikara ikara atoko pitxa, kotxi nota maparakerero, anāpa atoko Xoteoakorimoni. Iuaritika kākiti auiritari anāpapiki nikiniri nipokori katxakakari amarini nipokotiniātaā patapi —otxari Xesosi.

²⁹ Ininiā Xesosi apakapapireta:

—Erekari papakapapiretini, ininiā paapokomoni pisa. Maerekati matamatakoti !auaika pamarite ĩtoā —itxaro.

³⁰ Oaāpoko oāpokasaaki, oāpokaro oamarite sirīkanāta. Erekapekaro oa. Maerekati matamatakoti asikapekaro.

Makenakoreti Pirena

³¹ Eereka Xesosi takanapari Txiro sitatxiti tōpa. Īpirixititari Sitoō tixini. Sitatxi tōpa tesi pakini Īpirixitita. Apoka Kariréia poamoni. ³² Ātikaka kākiti minari makenakoreti Xesosimoni. !Iposota atāo isākirauatini. Ninoa iteene amanaāri Xesosi:

—Piuako pitaka iua nopini kakenakorepeka inini ĩkapani —itxana.

³³ Xesosi anikari iua kiki kākiti mauakaniātaā. Itakari iuakoki ikīpita āki. Eereka ikiisoka, taka itxari ienemaā masākireti nini nopini. ³⁴ Eereka ionakaāta iaxiti, oōka itxa:

—Epataa —itxa.

Popīkari sākireē, “Piauāka.” ³⁵ Iuasaakipeka ikenakoki auāka, ininiā kak-enakorepeka itxa. Iuasaaki inini poiōpeka apaka. Eereka erekapeka itxa isākirauatini. ³⁶ Ininiā Xesosi txana ninoa:

—Kona hīsāpiretapiri apanakini nimakananitiniri iua.

Txamari apiata ninoa sāpirenauata. ³⁷ Kākiti tsorīkaāta:

—Ikinika ikamakiti peerekari. Makenakoreti kakenakorepeka itxa. Mimatāsākiretakati, kasākirepeka itxa —itxana.

8

Xesosi Sikakienatana Ipi Ipi Pakini Mio Kākiti

(Mateo 15.32-39)

¹ Eereka mapaōti itomaneri kākiti apotiitaua Xesosimoni. Nipokori xipokapeka, ininiā Xesosi akiritana imoianariakori. Itxana ninoa:

² —Nota amonīkana naia kākiti, kotxi ipi ōti, āti ōti pakini ōtipeka auana notakata. Ininiā uatxa nipokori !auaika. ³ Niokanatināna auinimoni manipokotakatipanikana, ininiā ipixiniāpo iōkapetana. Irikana. Ātikaka ōtako ĩkani kona apakata manipokotakanika isinina —Xesosi txana imoianariakori.

⁴ Imoianariakori apakapapireta:

—Uai aapokotxi mauakaniātaā, ininiākara nāpa aāpokari nipokori ito naia kākiti asikakienatini ĩkapani? —itxana.

⁵ Ininiā Xesosi:

—Kipakinipa komiri katari hītemoni aua?

—Setxinokara komiri aua atemoni —itxana.

⁶ Īpaniātari kākiti topākini ixiti. Imaīkari iua komiri setxi.

—Erekari pisiākiti —itxari Teoso.

Iposo atoko imaxiōpekari komiri, sika itxana imoianariakori. Imoianariakori sika itxana apanakinimoni. ⁷ Ninoamoni aua ātikaka ximaki axapitiri. Ininiā Xesosi txari:

—Ia erekari —itxa Teosomoni.

Eereka ipaniātana imoianariakori sikiniri kākitimoni. ⁸ Ininiā ikinipoko kamitopeka itxana. Iposo atoko apotiita itxarina itetakori. Xāpokaka itxarina setxi kotarina. ⁹ Ninoa komiri nikakani ipi ipi pakini mio kākiti. Kamitopeka itxana.

Ininiā itakapiretanapana ninoa. ¹⁰ Iposo atoko imoianariakorikata iereētaua kanaua āki. Taomanota tōpamoni isana.

Pariseoakori Nirekari Xesosi Oerekiniri Iposotiire
(Mateo 12.38-42; 16.1-4; Arókasi 11.29-32)

¹¹ Pariseoakori apoka Xesosimoni. Inirekarina Xesosi kerokiniri, ininiā itxarina Xesosi:

—Takaōtxikari, Teoso posotiire poerekaua ate, aātamatiniiri ĩkapani, Teoso iokanatinii ĩkorapokoriti aimarotini ĩkapani —itxarina. ¹² Ininiā Xesosi oōka. Itxari:

—Kinirepa kākiti uatxarini nirekari noerekiniri Teoso takaōtxikare, iposotiire? Atāopitikara nota txai hīte, kona noerekai hīte.

¹³ Ininiā itakanapana. Iereētaua kanaua āki. Ikanapiriā ipoa ipiniāmoni iuaīkana.

Pāo Tireēkari Pirena
(Mateo 16.5-12)

¹⁴ Xesosi moianariakori maxinīkaretari pāo. Ātika pāo porī kanaua āki aua. ¹⁵ Ininiā Xesosi ōtākikana:

—Erepaniko, pamonōkoniri pariseoakori, Erotxi pakini pāote tireēkari —itxa Xesosi.

¹⁶ Xesosi moianariakori misākiretakakaua:

—Ikara atoko itxaua, kotxi amaxinīkaretari pāo.

¹⁷ Xesosi imarotari ninoa sākire, ininiā itxana:

—Kinirepa hīsākirauanāta pāo mauakani xika? Kona himarotatapanikari niposotiire? Kona hīkitetapanikari? Kona hinirekatari hāuikiniri nisākire?

¹⁸ Kokimai, txamari, !hātamari. Kakenakokimai, txamari !hīkenakotari nisākire. ¹⁹ Kona hīxinikapanikari iuasaaki nimaxiōpekitakiti sīko komiri, sīko mio kākiti nisikakienatini? Kipakinipa kotari itetakori hīxāpokaka? —ipimaāna.

Ininiā ninoa apakapapireta:

—Tosi kotari axāpokaka.

²⁰ Xesosi txana ninoa:

—Eereka āti ōti nimaxiōpekari setxi komiri porī. Nisikari ipi ipi pakini mio kākiti. Itetakori hāpotiitakiti, kipakinipa kotari hīxāpokaka? —ipimaāna.

Ininiā ninoa:

—Setxi kotari axāpokaka.

²¹ Ininiā Xesosi:

—Ininiā kinirepa kona hīkitetapanikari?

Mōsiāreti Petsáita Aapokotxitikiri

²² Xesosi Petsáita aapokotxitimoni apoka. Iuasaaki kākiti minari mōsiāreti iuamoni. Amanaārina Xesosi maātakiniiri iua mōsiāreti. ²³ Ininiā iua anikaāpotari iuakoā kākiti mauakanimoni. Iuaā iminapari ienemaā mōsiāreti okiā. Eereka taka itxari iuako iītoā. Ipimaāri iua:

—Kōsiārepekai? —itxari.

²⁴ Ininiā iua atamata.

—Nota itikapokotapeka, txamari nitikari kākiti tīpokotakari aamina atoko —itxa.

²⁵ Iposo atoko Xesosi iuaīkana takari iuako mōsiāreti nopini. Eereka mōsiāreti atāo itikapokotapeka. Ikinipoko atamata. ²⁶ Ininiā Xesosi iokanatari:

—Pisipeka paapokomoni. Kona pisipe Petsáita aapokotxitimoni, kotxi kona ninirekari pisāpiretiniri nikamakiti kākitemoni —itxa Xesosi.

Petro Auikari Xesosi Teoso Mereēkiti Ininiāua
(Mateo 16.13-20; Arókasi 9.18-20)

²⁷ Eereka Xesosi imoianariakorikata sari kākiti poiāoka auinimoni, Sesaréia-Piripi sitatxiti takote isana. Ipixiniāpo Xesosi pimaāna imoianariakori:

—Kiripa kākiti uākatano nota? —itxa.

²⁸ Ninoa apakapapireta:

—Xoāo kapatxisareri iuākataina. Apanakini “Eríasi inakori” iuākataina. Ininiā apanakini “Teoso sākire sāpiretakari” iuākataina —itxana Xesosi moianariakori.

²⁹ Iuaīkana Xesosi pimaāna:

—Hītepekana, kipa hīte uākatano? —itxana.

Ininiā Petro apakapapiretari:

—Teoso mereēkiti, kākiti iātapanātakiti pitxaua —itxari.

³⁰ Ininiā Xesosi txana imoianariakori:

—Teoso mereēkiti nininiua !hīsāpiretapiri apanakini —itxa.

Xesosi Sāpiretari Ipinini
(Mateo 16.21-28; Arókasi 9.22-27)

³¹ Ininiā ia atoko oerekarauata:

—Nota hītari iaxitikiri iteene atatsiirauatako. Kiomātxiakori, sasetotxi auīteakori, kaiōkatsoparerini pakini kona nirekapanino nota. Nokaākako. Eereka ipi āti pakini ōtisaaki iuaīkana nōkitikauako.

³² Ikara isāpireta ikinimane kākitemoni. Ininiā Petro anikari iua maparamoni. Itxari:

—Kona ikara atoko !pitxape. Kona erekari pisākire ikara atoko pinini —itxa Petro.

³³ Ininiā Xesosi kirioka imoianariakorimoni. Iua txitari Petro:

—Pisipiniikaua Satanasi. Pite nireēkiti kākiti nireēkiti atokotxikana. Pite nireēkiti kona Teoso nireēkiti atokoni —itxa Xesosi.

Xesosi Moianari Atāo Inakari
(Mateo 16.24-28; Arókasi 9.23-27)

³⁴ Xesosi akiritana kākiti imoianariakori apaka. Itxana ninoa:

—Notakata kinirāo sika pinakasaaki, piteka pinireēkiti kona pixinikape. Notakata kinirāo sika pinakasaaki, nota misiritiko atokokana pimisiritāākako. Ia atoko pinirekiniā, notakata pisapitikako. ³⁵ Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata.

³⁶ Atxiīti papakapari ikinipoko tiitxi, ikini itixiti auakani tii, pinakiti īkapani. Atxiīti iua tiitxi xika kona pikīpitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiīti ikinipoko tiitxi auinii? Konapitini. Apiaerekata Teosokata ātipirika pikaikotini, kotxi tiitxi īki poiāoka, pixinire karone apiata. ³⁷ !Apakata kākiti iikixitiniri Teoso, iuamoni isini īkapani.

³⁸ Īkorasaaki kākiti !inirekari Teoso. Inirekari maerekatinoka. Īkorasaaki pipētatiniaño nota, pipētatiniaři nota sākire, ininiākara nota kākiti itari iaxitikirino pētataiko pite, uai nikanapiriākasaaki. Nikanapiriākasaaki, niri iotximere aua notamoni. Nina niri nitiriakorikata, erekarinikata.

9

¹ Xesosi txana ninoa:

—Hixinikariko ia nisākire. Apanakini hīte uatxa uai auakanii, hīpinini apisapanika himarotari Teoso auītetxi ininiāua. Auītetxi kaposotiireri itxaua —itxa Xesosi.

Moisesi, Eríasi Pakini

(Mateo 17.1-13; Arókasi 9.28-36)

² Seisi pakini ōti napaka atoko Xesosi anikana Petro, Txiako, Xoño pakini oxiratarimoni, mitaxiratarimoni. Iuasaaki ninoanani aua iuaā. Iuaā auakasaakina, Xesosi ĩto ipinipo itxa. ³ Imāka kasarori itxaua. Iotximere apaka auari. Ikara imāka saro atoko inakari, !auari. Kākiti iteene arokiniāři mākaxi, iuaritika ikara isaro atoko !auari. ⁴ Iuasaaki Eríasi, Moisesi pakini tokiā iuaā. Isākirauatana Xesosikata. ⁵ Ininiā Petro txari Xesosi:

—Koerekareri, erekapitikari uai aāuini. Makamari papiri ipi āti pakini, pite ĩkapani, Moisesi ĩkapani, Eríasi ĩkapani —itxa.

⁶ Ikara atoko itxa Petro, kotxi !imarotaikari isākire, iteene ipĩkarauatiniā.

⁷ Iuasaaki katxiāři apoka ninoamoni. Katxiāři āki auana. Katxiāři āki Teoso txari:

—Ere namarite, nitiretakiti. Hīkenakotariko iua sākire —itxa.

⁸ Katimaritika Xesosi moianariakori saporika. Itikapokotana. Mitxi Xesosikata sākirauatakani !auaika iuaā. Xesosinokara kaikota ninoakata.

⁹ Ōtanoxiratarari iokiriiāpotakasaakina, Xesosi txana:

—Mixikanani hītikakiti !hīsāpiretapiri apanakini. Nota hītari iaxitikiri nipinaka atoko iuaĩkana nōkitikaākaua atokoikarako, hīsāpiretariko mixikanani hītikakiti —itxana.

¹⁰ Ininiā !isāpiretarina apanakinimoni. Ninoanoka isākirauanātana:

—Natokopa itxa kākiti ipĩkaripeka iuaĩkana ōkitikiniāua —itxanātana.

¹¹ Ipimaārina Xesosi:

—Kinirepa kaiōkatsoparerini sākire: “Teoso mereēkiti apokini apisapanikarako Eríasi apokako.” Kinirepa ikara atoko itxana?

¹² Ininiā Xesosi:

—Inipitikara Eríasi apoka merepanika, kākiti iposope inini ĩkapani. Teoso sākire iōkatsopatakori txari: “Kākiti itari iaxitikiri iteene atatsiirauatako. ! Inirekaākako.” Kinirepa ikara atoko itxa Teoso sākire iōkatsopatakori?

¹³ Nisāpiretaiko Eríasi apokapeka. Kākiti misiritapekari iuani. Inireēka iaōka imisiritarina. Teoso sākire iōkatsopatakori sāpiretapekari ikara ene —itxa Xesosi.

Amarini Maerekati Matamatakoti Auaĩtotakiti

(Mateo 17.14-21; Arókasi 9.37-43a)

¹⁴ Ninoa apokaāpotakasaaki apanakini imoianariakorimoni, atamatana kākitypokoni. Ninoa ākitana Xesosi moianariakori. Iuasaaki kaiōkatsoparerini kākitykata itaparakienetakakaua. ¹⁵ Iuasaaki kākiti atapari Xesosi. Ipoxokoniritikana itxana:

—Xesosi napani.

Ininiā imitekana iuamoni, okapireta itxarina:

—Piteni?

¹⁶ Ininiā Xesosi:

—Ari, notara.

Ipimaãna:

—Kininiãpa hĩtxitakakaua? —itxa.

¹⁷ Ininiã kiki kãkiti sauaki auakari apakapapiretari:

—Nota minamari namarite pitemoni. Maerekati matamatakoti auaitotari iua. !Auiritari namarite sãkirauatini. ¹⁸ Iua maĩkasaakiri, okaĩtotari iua xiti. Iuasaaki namarite sorikipeta. Akatsakatsiriĩtaua. Itorõkaĩtota. Ininiã nimisãkiretamana pimoianariakori omitikiniri maerekati matamatakoti, txamari ninoa !iposotari.

¹⁹ Xesosi txari:

—!Kauikarei hĩte. Maerekati kamakanii hĩte. Kipakinikananipa Teoso nirekatari hĩtekata nauini? Kipakinikananipa Teoso nirekatari hĩte nimĩteenekini? Himinari amarini notamoni —itxana.

²⁰ Ininiã ninoa anikari iua amarini Xesosimoni. Iuasaakipeka maerekati matamatakoti atamatari Xesosi. Iuasaakipeka maerekati matamatakoti txĩkitakari amarini okaratiniua. Ininiã iua amarini iriãkata. Ikanapirikata, isorikipekata, itxĩkitakari amarini. ²¹ Xesosi pimaãri iri:

—Kirisaakipa ipotorika ĩkora atoko inini?

—Axapitipanikara ipotorika ĩkora atoko inini. ²² Itokata maerekati matamatakoti okaĩtotari xaminamoni. Itokata okaĩtotari kãuaãrimoni. Inirekari okiniri iua. Puposotiniãri, pomitikariko maerekati matamatakoti. Piamonĩkauako atepaniko —itxa iri sãkire.

²³ Ininiã Xesosi:

—Nota posotatari? Teoso sãkire auiaãkari posotari ikaminiri ikinika —itxari.

²⁴ Iuasaaki iua kiki apakapapiretari iãtsaritika:

—Nauikapitikari piposotiire. Axapitikinoka !nauikari, ininiã pisikaposotiiretano iteene pisãkire nauikini ĩkapani.

²⁵ Isãkirauanãtakasaakina, kãkitipokoni miteẽkata ninoamoni Xesosi kamakiti imarotinina ĩkapani. Ininiã Xesosi itapararitika txitari maerekati matamatakoti:

—Pite maerekati matamatakoti. Pitxĩkitakari kãkiti masãkireti inini. Pitxĩkitakari kãkiti makenakokiti inini. Nota omitikai pite. Pipokĩka. Iuaĩkana !pĩroãpinikako iua ĩtoã —itxa Xesosi.

²⁶ Iua maerekati matamatakoti akiripoakata. Okaraĩtokatari atoko, sipe itxa. Iua amarini ipĩkari ĩto atokopeka itxa. Ininiã apanakini kãkiti:

—Ipĩpeka —itxarina.

²⁷ Ininiã Xesosi maĩkauakotari. Ōkitikari iua, ininiã itima.

²⁸ Xesosi aapokotxi āki auakasaaki, iuanoka inakasaaki, imoianariakori pimaãri:

—Natokopa ininiãpa kona ate posotatari maerekati matamatakoti aomitikini? —itxana iuamoni.

²⁹ Ininiã Xesosi:

—Teoso pimisãkiretakasaaki, iuasaaki pimanipokotakaniãra, iuasaaki piposotari ikara atoko inakari maerekati matamatakoti pomitikini —itxa Xesosi.

Xesosi Iuaĩkana Sãpiretari Ipinini

(Mateo 17.22-23; Arókasi 9.43b-45)

³⁰ Iuaã ipotorikana. Īpirixitarina Kariréia tõpa. Xesosi !inirekari apanakini kenakoenetiniri iua auiniãtaã. ³¹ Kotxi inirekari oerekinina imoianariakorinoka ipinini pirena. Ininiã Xesosi:

—Nota hĩtari iaxitikiri mĩkapiritaãkako. Nisikaãkako kikiakorimoni inirekaãkitina ikaminina tĩkane. Ninoa okano nota. Ipi õti āti õti inakasaaki iuaĩkana nõkitikauako —itxa.

³² Ninoa !imarotari Xesosi sãkire. Ninoa pĩkari ipimainirina iua.

Kiripa Kākiti Apiatakari Txataua?
(Mateo 18.1-5; Arókasi 9.46-48)

³³ Kapanaoō sitatxiti apokana. Aapokotxi āki auakasaakina, Xesosi pi-maãna ninoa:

—Natokopa itxa hīsākire, uaimoni aĩkasaaki hĩtaparakienatakakasaakia? — itxa.

³⁴ Masākirenika itxana, kotxi kimaporiāpo ninoa sākire: “Ĩkiripa ate api-atakari?” itxana. ³⁵ Xesosi, iitopāka atoko, akirita itxana imoianariakori tosi pakini.

—Hĩkinika uaimoni hĩitopāka. Apiatakari pininiāua pinirekiniā, piteka poiāotakaua. Ikinimane nitiri pitxauako.

³⁶ Xesosi kosekari amarini, mina itxari imoianariakori sauaki, katarata itxari.

³⁷ —Papakapiniāri amarini pipoxokoniritika, papakapano nota apaka. Papakapiniāno nota, na notananini papakapa. Iuasaaki papakapari iua uaimoni niokanatakiri —itxa Xesosi.

Maerekani Matamatakoni Omitiākari
(Arókasi 9.49-50)

³⁸ Xoāo sāpiretari Xesosi:

—Koerekareri, ate kenakotari kiki omitikinina maerekani matamatakoni pite uākaã. Kona pimoianarini iua. Ininiā ate: “Ikara atoko !pitxape,” atxari.

³⁹ Ininiā Xesosi:

—!Hĩotokakapiri ikara ikamini. Kākiti nota uākaã maerekati matamatakoti omitiākari, kona imisākirepiretano. ⁴⁰ Iua ate mokaiakari minakatiua. Atiretakiri itxaua. ⁴¹ Nota atāopitikara nitxai hĩte. Atxiĩti kākiti sikai āparaã, kotxi Teoso mereēkiti nakiti pitxaua. Iua kamakiti erekari, ininiā apakapapitkariko ikamakiti ĩki.

Maerekati Oerekakari
(Mateo 18.6-9; Arókasi 17.1-2)

⁴² !Erekari kākiti mitari oerekiniāri amarini nota sākire auiākari maerekati ikamini. !Erekari. Erekamariko kai mitari iaxirikaākamako iua kākiti mitari nokiā, eereka okaākamako ipoamoni ipinini ĩkapani. ⁴³ Piuako maerekati ikamākitakiniāi, pitsotakari. Erekamariko ātinani piuako Teosokata ātipirika pauini ĩkapani, kotxi maerekati pikaminiā, pisa maerekani misiritikoātaã. Iuaã xamina tirinapika. !Oakaāka. Atxiĩti piuako ipi aua, txamari pite sari iuaãtaã. !Erekari. ⁴⁴ Iuaã kĩtxi piĩtoã auakaro !opina. Xamina !oakaāka. ⁴⁵ Pikiti maerekati ikamākitakiniāi, pitsotakari. Erekamariko ātinani pikiti Teosokata ātipirika pauini ĩkapani, kotxi maerekati pikaminiā, pisa maerekani misiritikoātaã. Iuaã xamina tirinapika. !Oakaāka. Atxiĩti pikiti ipi aua, txamari pite sari iuaã. !Erekari. ⁴⁶ Iuaã kĩtxi piĩtoã auakaro !opina. Xamina !oakaāka. ⁴⁷ Poki maerekati ikamākitakiniāi, pimakatxakari. Erekamariko ātinoka poki auini Teoso auĩtetxi ininiātaãua pisini ĩkapani, kotxi maerekati pikaminiā pisa maerekani misiritikoātaã. Iuaã xamina tirinapika. !Oakaāka. Atxiĩti poki ipi aua, txamari pite sari iuaã. !Erekari. ⁴⁸ Iuaã kĩtxi piĩtoã auakaro !opina. Xamina !oakaāka.

⁴⁹ Iōkira nipokorimoni takiko atokokana xamina tirinakari takaākakako ikinimane kākitimoni. Ikara atokokana ikinimane ataerekataākakako. ⁵⁰ Iōkira erekaro. Txamari iōkira koketikosaaki kipatxikata, !erekaikaro. !Apakata xinitxi piōkiratini ĩkapani. Atāo iōkira atoko hĩtxako. !Hĩtxitakakapeua.

10

Kiki Ītanorokata Itakanapakakini

(Mateo 5.31-32; 19.1-12; Arókasi 16.18)

¹ Xesosi potorika iuaã. Xotéia tōpa isa. Īpiriākitari Xotāo kāuaāriti. Iuaīkana kākiti apotiitaua iuamoni. Kaiāopokori kākiti, ininiā oerekarauata, mitxi oerekarauanātini atokokana.

² Kikiakori, pariseo inakaniua, apoka Xesosimoni. Ninoa nirekari Xesosi kerokiniri isākire, ininiā ipimaārina:

—Atāokani erekari kiki takanapiniro ĩtanoro?

³ Ininiā Xesosi:

—Kiatokopa itxa Moisesi paniātakiti?

⁴ Ininiā ninoa:

—Moisesi paniātari kiki iōkatsopatiniri aātsopa, ĩtanoro itakanapini aātsopate, ininiā eereka auiritari iua iokanatiniro oa —itxana.

⁵ Ininiā Xesosi:

—Moisesi auiritari hĭtanoro hĭtakanapini, kotxi paikori hĭxinire. Teoso nireēkiti himanirekakani xikara, Moisesi auiritari hĭtanoro hĭtakanapini. ⁶ Kotxi merepitipanika Teoso ikinipoko ikamakasaaki, ikamari kiki, sito pakini. ⁷ Ikara atoko ininiāpitikara, kiki takanapari iri, inoro pakini, ĩtanorokata auini ĩkapani. ⁸ Ininiā ātika atoko itxauana. Ininiā ipi kākiti !itxaikauana. Ātinokara itxapekauana. ⁹ Ikara atoko ininiā, !erekari kākiti kaiarikiniri Teoso apotiitakini —itxa Xesosi.

¹⁰ Eereka Xesosi imoianariakorikata kanapiriā aapokomonina. Iuaã apokasaakina, imoianariakori pimaāri iua ikara sākiretxiti iuaīkana oerekinina ĩkapani. ¹¹ Ininiā isāpiretana:

—Kiki ĩtanoro takanapakari, āto sito itaka inakari, maerekati ikaminaro ĩtanoro. ¹² Iua atokokana sito ōtaniri takanapakaro, āti ōtanirita inakaro maerekati okaminiri ōtaniri —itxa Xesosi.

Xesosimoni Amarini Apokini

(Mateo 19.13-15; Arókasi 18.15-17)

¹³ Iposo atoko ātikaka kākiti anikari amarini Xesosimoni. Inirekarina Xesosi misākiretiniri Teoso ninoa amarini ĩkapani. Txamari imoianariakori txitana. !Auiritana amarini anikinina Xesosimoni. ¹⁴ Xesosi ikara ikenakotakasaaki, !apokaerekatari. Ininiā iua:

—Hāuiritariko amarini notamoni apokini. !Hĭotokakapiri, kotxi kākiti Teoso auĭtetakani amarini atoko itxauana. ¹⁵ Ia atāo: Kākiti mapakapakaniāri Teoso, amarini apakapiniri atoko iminakaniā, kona isa Teoso auĭtetxi ininiātaāua —itxa Xesosi.

¹⁶ Ininiā Xesosi kataratari amarini. Itakari iuako ikiina nopini. Amanaāri Teoso erekari itakini amarinimoni.

Ātokori Ito Txineiroteri

(Mateo 19.16-30; Arókasi 18.18-30)

¹⁷ Xesosi iuaīkana potorika. Iuasaaki ātokori miteka iuamoni. Ikapo-toreēkaua Xesosi apisatoō.

—Koerekareri erekari, kiripa nikama Teosokata ātipirika nauini ĩkapani? —itxa.

¹⁸ Ininiā Xesosi:

—Kininiāpa “erekari” pitxano? Teosonanira erekari. ¹⁹ Pite imarotari Teoso paniātakiti. !Pokaniuatape. !Pisirĭkape āti ĩtanorokata. !Pĭĭtiriuatape. Poxiene !pikamape. Apanakini !pimisirienetape. Piri, pinoro pakini pipaxitako —itxa Xesosi.

²⁰ Iua ātokori txari:

—Noereëkiri, axapitipanikara ninakasaaki, nikĩpitari ikara Teoso paniãtakiti —itxari.

²¹ Ininiã Xesosi apokaerekatari iua.

—Auapanika ãtinoka pikamini tĩkane. Pisa. Tiitxi ikinika pinakiti pivẽtxitako. Txineiro papakapakito pisikako matxineirotenimoni. Eereka pimoianatanoko nota. Ikara atoko inakari pikaminiã, Teoso tixine papokasaaki ikinipoko erekari auiniiko pite —itxari iua.

²² Ikara Xesosi sãkire ikenakotakasaaki, imatinaniuata. Isipe. Maerekaxiniretinoka itxa, kotxi kaiãori itii.

²³ Xesosi sapotorika, misãkireta itxana imoianariakori:

—Pamimapaniri katxineiroteri sini Teoso auĩtetxi ininiãtaãua —itxa.

²⁴ Imoianariakori:

—Anekani? —itxana.

Iuaĩkana Xesosi txari:

—Pamimapaniri katxineiroteri sini Teoso auĩtetxi ininiãtaãua. ²⁵ Atauako kamero napatari ãkorike sonakiã? Apia mimari kãkiti katxineiroterini auĩtetiniri Teoso —itxana.

²⁶ Imoianariakori iteene tsorĩkaãnãta.

—Ininiã kipa sari Teoso auĩtetxi ininiãtaãua? —itxana imoianariakori.

²⁷ Ininiã Xesosi apakapapiretana:

—Teoso posotari ikinipoko ikamini. Kãkiti !iposotari. Teoso posotari anikiniri katxineiroteri itixinemoni —itxa.

²⁸ Petro txari:

—Ate takanapapekari ikinipoko pite amoianatini ĩkapani —itxari Xesosi.

²⁹ Ininiã Xesosi:

—Atão nitxai. Paapoko pitakanapiniã, pitariakori, pitaroakoro, piri, pinoro, pĩtanoro, pamariteni, pikikiote, pitakanapiniã notakata pisini ĩkapani, Teoso iokanapirena erekari pisãpiretini ĩkapani, ³⁰ pitakanapakiti iua apiata nisikaiko. ĩkorasaaki nisikaiko itomaneri aapokotxi, itomaneri pitariakori, itomanero pitaroakoro, itomanero pinoroakoro, itomaneri pamariteni, itomaneri pikikiote, nisikaiko. Txamari iusaaki patatsiitari pimisiritiko. Iuaritika eereka Teosokata pauapika ãtipirika. ³¹ Uatxa apiari inakari, iusaakiko minakati itxauako. Uatxa minakati inakari, iusaakiko apiari itxauako —itxa Xesosi sãkire.

Iuaĩkana Xesosi Sãpiretari Ipinini

(Mateo 20.17-19; Arókasi 18.31-34)

³² Xesosi imoianariakorikata Xerosareë kimaporite iãpotakasaakina, Xesosi ĩkiika. Iusaaki ninoa maerekaxiniretinoka itxana. Apanakini ninoa tikini sikani pĩkarauata. Ininiã Xesosi iotoka. Akiritana imoianariakori tosi pakini. Isãpiretana paĩtiki kãkiti kamakiti iuamoni tĩkane. ³³ Ininiã iua:

—Hĩkenakota. Xerosareëmoni asa uatxa. Iuaã nota hĩtari iaxitikiri sikaãkako sasetotxi auĩteakorimoni, kaiõkatsopareriakorimoni pakini. Ninoa paniãtariko nota okiko. Iposo atoko Xoteo minakonimoni sika ninaãkako.

³⁴ Inapetanonako. Inoropatanonako aãpitsaã. Ikiisokanonako. Iposo atoko oka ninaãkako. Ipi ãti pakini õti inakasaaki iuaĩkana nõkitikauako —itxa imoianariakorimoni.

Txiako Xoão Pakini Amanaãkiti

(Mateo 20.20-28)

³⁵ Iposo atoko Txiako, Xoão pakini sari Xesosimoni. Ninoa Sepeteo anaakori.

—Koerekareri, ate nirekari aamanaãkiti pikamini —itxana.

³⁶ Ininiã Xesosi pimaãna:

—Kipa hinireka nikaminii hĩte? —itxana.

³⁷ —Pite ikinimane auite pinakasaakia, pauiritaua pitekata aĩtopãkini, pikikomoni, pisaneremoni aĩtopãkini —itxana.

³⁸ Ininiã Xesosi:

—!Himarotari hamanaãkiti, kotxi mapaõti napa atoko nota apakapariko iãtatxi tsiĩtxiã niãtini ĩkapani. Hĩposotari ikara hiãtini? Nipatxisataãkako tsiĩtxiã. Hĩposotari ikara atoko hĩpatxisatiko?

³⁹ —Aposotapitika —itxana ninoa.

Xesosi txana ninoa:

—Inipitikara hiãtariko nota iãtakiti. Inipitikara hĩpatxisataãkako nota patxisatiko atokokana. ⁴⁰ Txamari !niposotari nauiritinii hĩte nikikomoni, nisanaremoni hiĩtopãkini, kotxi Teoso mereẽpekana kãkiti nikikomoni, nisanaremoni topãkakani tĩkane —itxa Xesosi.

⁴¹ Xesosi moianariakori tesi pakini kenakopiretakasaakiri Txiako, Xoão pakini amanaãkiti, ininiã ninoa omanatana. ⁴² Ininiã Xesosi akirita txana imoianariakori:

—Uaimoni hina. Hiĩtopãka notakata —itxana ninoa.

—Hĩte imarotari Xoteo minakaniau auĩteakori pataparana. Ninoa auiritari kãkiti kaminiri ninoa paniãtakitinoka. ⁴³ Ninoa atoko !hĩtxape. Apiari pininiua pinirekiniã, pimoianatana apanakini. ⁴⁴ Apanakini auite pininiã pinirekiniã, nitiritxi pitxauako merepanika. ⁴⁵ Ikara atoko nitxa nota hĩtari iaxitikiri ĩkorapokoriti napokasaaki. Ninitiri !auari. ĩkorapokoriti napoka, kãkiti nitiri nininiua ĩkapani, kãkiti nitiretini ĩkapani. ĩkorapokoriti napoka nipinini ĩkapani, kaiãopokori kãkiti mapinakani ĩkapani, kotxi nota ĩkitxirauata ninoa mapinakani ĩkapani —itxa Xesosi.

Mõsiãreti Patximeo Inakori

(Mateo 20.29-34; Arókasi 18.35-43)

⁴⁶ Xesosi imoianariakorikata apoka Xerikoo sitatxiti. Eereka ipotorikasaaki imoianariakorikata itomaneri kãkitikata, iuasaaki mõsiãreti Patximeo inakori kimapori ĩtiniãpo iĩtopãkanãta. Tximeo inakori ãkiri iua. Iua mõsiãreti amanaãnãtaro txineiro. ⁴⁷ Iua kenakotari Xesosi Nasareekiri inapaenetini, ininiã akirinãta:

—Xesosi, Taviini apika mekanirii, piamonĩkanoko —itxa.

⁴⁸ Ininiã apanakini kãkiti pinitari:

—Maãtako. !Pakirinãtape —itxarina mõsiãreti.

Iuaritika apiata akirinanikata:

—Taviini apika mekani. Piamonĩkanoko nota —itxanãta.

⁴⁹ Ininiã Xesosi iotoka itxa.

—Hãkiritari iua mõsiãreti —itxa.

Ininiã ninoa:

—Pipoxokoniuatako. Põkitikaua. Akiritapekai —itxarina iua mõsiãreti.

⁵⁰ Ininiã Patximeo okanapari imãka inopini auakari. Pakoteri õkitikaua, sa itxa Xesosi akiritiniri manapi.

⁵¹ Ininiã Xesosi:

—Kipa pinireka nota kaminii pite? —itxari.

—Apiananiri, nõsiãrera ninireka —itxari.

⁵² Ininiã Xesosi:

—Pisa. Erekapekai, kotxi pite auikari niposotiire —itxari.

Iuasaakipeka Patximeo kõsiãrepeka itxa. Xesosikata sa itxa kimaporiã.

11

Xesosi Xerosareẽ Apokaãpotini

(Mateo 21.1-11; Arókasi 19.28-40; Xoão 12.12-19)

¹ Xesosi imoianariakorikata imatokoãpotari Xerosareë. Ötanoxiratari, oriva mina takikoãtaã takote apokana. Iuaã aua aapokotxi Petxipaxee inakori, Petánia inakori apaka. Iuaã Xesosi iokanata ipi imoianariakori.

² —Hísa ikiraã kaixiti auakari aapokotxiã. Iuaã hãpokasaaki, hãpokari xomëta äkiri iaxiriãkori. Käkiti !iitopãkapanika iua nopini. Hïkoxirikari. Uaimoni mina hïtxari. ³ Käkiti pimaãkasaakii hïte: “Kinirepa hïkoxirikatari xomëta äkiri?” hinikosaakiko: “Apiananiri nirekari iua. Iuaïkana akamoni aminariko,” hïtxako.

⁴ Ininiã eereka isana. Apokarina iua xomëta äkiri iaxiriãkori kimaporiã aapokotxi tore takote. Ininiã ikoxirikarina. ⁵ Ätikaka käkiti iuaã auakani:

—Kinirepa hïkoxirikatari xomëta äkiri? —itxana Xesosi moianariakorimoni.

⁶ Ininiã Xesosi paniãtini iaõka apakapapiretana. Ininiã käkiti iuaã auakani: —Ininiã hanikaikari —itxana.

⁷ Ninoa anikari xomëta äkiri Xesosimoni. Ininiã imãkana äti imãkana nopini auakari itakarina xomëta äkiri nopini Xesosi topãkini ïkapani. ⁸ Apanakini käkiti matameëkari imãkana äti imãkana nopini auakari kimaporiã Xesosi napini tïkane. Apanakinipekana sauakari aãxike. Kimaporiã itakaãpotarina. ⁹ Ninoa Xesosi tikini ïkani, iua apisa sikani pakini akiriãpokatana ipoxokonir-itikana imakinikana:

—Peerekari Teoso, Apiananiri. Iua iokanatai pite atemoni. Anirekari erekari isikini pite. ¹⁰ Peerekari Teoso, aãtokirini Tavii aãuïte ininiua atokokana iuaïkana apoka. Peerekari Teoso, iaxiti apiko nopinixiti auakari. Apiananiri itxaua —itxaãpokatana.

¹¹ Xesosi apoka Xerosareë. Teoso misãkiretiko aikotimoni isa. Iuaã ïroã itxa. Ikinika iroko äki itikapokota. Iua atoko mapiãpe, ininiã isari Petánia aapokotxitimoni tosi imoianariakorikata.

*Piko Mina Marito Pirena
(Mateo 21.18-19)*

¹² Ikatimatakasaaki ipotorikana Petánia. Iuasaaki Xesosi natxita. ¹³ Ikira atoko atamataro piko mina. Ito otsopa aua. Isari oamoni kariro iuãkatiniãro, kotxi piko mina tsopa auakasaaki, ori auapitika. Txamari apokasaaki, otsopanani auari, kotxi kona ori manapini. ¹⁴ Ininiã Xesosi:

—Käkiti !itximaikaiko piri —itxari piko mina.

Imoianariakori kenakotari isãkire.

*Pirãtxi Vëtxitakani Omitikiko
(Mateo 21.12-17, 20-22; Arókasi 19.45-48; Xoão 2.13-22)*

¹⁵ Xesosi imoianariakorikata apoka Xerosareë. Xesosi ïroã Teoso misãkiretiko aikotiã. Omitikana käkiti iuaãtaã amotiitakani, sikatiitakani. Ikapakitikari amesa ninoa txineiro apakapakani amesane. Ikapakitikari kamoã vëtxitakani topãkini apaka. ¹⁶ Iua !auiritana käkiti anikiniri tiitxi aiko ïpirikoatinina. ¹⁷ Xesosi oerekana käkiti iuaã auakani:

—Teoso sãkire iõkatsopatakori txari:

Ia naapoko. “Teoso misãkiretiko aikoti” akiritaãkako, ikini itixiti auakani misãkiretinino ïkapani, itxa. Txamari hïte txïkitakari ia aiko kiïtiririni iomaãtiniãtaã ininiua —itxa Xesosi.

¹⁸ Sasetotxi auïteakori, kaiõkatsoparerini pakini kenakotari Xesosi sãkire. Ininiã ninoa tsoriãkaãta. Ixinikaxititana.

—Kanatokopa atxatari Xesosi aõkini? —itxanãtana.

Ikinimane iteene apokaerekatari Xesosi sãkire, ininiãkara sasetotxi auïteakori, kaiõkatsoparerini pakini pïkari Xesosi.

¹⁹ Ipiãkapokotapeka Xesosi takanapari sitatxi imoianariakorikata.

²⁰ Katimatinĩkata kimaporiã isaãpotakasaakina, atamatarona oa piko mina. Opĩpe. Okotsapekara ipinakepeta apaka. ²¹ Petro xinikari iua apisapanika Xesosi sãkire, ininiã akiritari Xesosi:

—Koerekareri, patamataro piko mina. “Kãkiti ! itximaikaiko piri,” pinakito. Oa piko mina ipĩpeka —itxari.

²² Ininiã Xesosi:

—Pauikapiretariko Teoso sãkire. ²³ Atãoenekara nisãpiretai. Pauikiniãri Teoso sãkire, piposotari pipaniãtiniri ikira õtanoxiratari: “Põkitikaua. Pokakataua potxoari uinitimoni.” Pãkixinireẽ iteene pauikiniãri pisãkire iaõka apokini, ininiã apokapitikako pamanaãkiti. ²⁴ Ikara atoko ininiã nota txai hĩte, Teoso pimisãkiretakasaaki, pamanaãkasaakiri pinirekakiti, pauikariko iposope Teoso sikinii, ininiã papakapapanikariko. ²⁵ Teoso pimisãkiretakasaaki, ãti pomanatiniã, pitakanapariko pomanãkare. Pimaxinĩkaretiniãri maerekati ikaminii, ininiã piri iaxitikiri maxinĩkaretari maerekati pite kamakiti. ²⁶ Pimamaxinĩkaretakaniãri maerekati ãti kamakiti pitemoni, ininiã piri iaxitikiri kona maxinĩkaretari maerekati pite kamakiti apaka.

Xesosi Paniãtakari Moerekakoni
(Mateo 21.23-27; Arókasi 20.1-8)

²⁷ Iuaĩkana apokana Xerosareẽ. Xesosi tĩpokota aiko Teoso misãkiretiko pirikere ãki tinĩkata. Itĩpokonãtakasaaki, sasetotxi auĩteakori, kaiõkatsoparerini, kiomãtxiakori pakini apoka iuamoni. ²⁸ Ininiã ninoa txari:

—Kipaniãpa pikamari ĩkora pikamakiti? Kipa paniãtai? —itxarina Xesosi.

²⁹ Ininiã Xesosi apakapapiretana:

—Nota apaka pimarauatako hĩtemoni. ãtinoka nipimaãiko hĩte. Hĩsãpiretiniãno, nota sãpiretai hĩte niokanatakiri uãka apaka. ³⁰ Kipa paniãtari Xoãoni ipatxisarauatini? Teosokani paniãtari Xoão? Kãkitikani paniãtari Xoão? Hĩsãpiretano —itxana.

³¹ Ininiã ninoa xinikaxitinãta. Imisãkiretakakana. Ipimaãkakana:

—Natokopa itxa aãpakapapiretiniri iua? Aãpakapapiretiniãri: “Teoso paniãtari iua,” ininiã iua: “Kinirepa kona hãuikatari iuani sãkire?” itxapemaua.

³² Aãpakapapiretiniãri: “Kãkiti paniãtari iua,” ikinimane omanataua —itxanãtana.

Ninoa pĩkari kãkiti kotxi ikinimane auikari Xoãoni atão Teoso sãkire sãpiretakari ininiua. ³³ Ikara atoko ininiã ninoa apakapapiretari Xesosi:

—Ate !imarotari.

Ininiã Xesosi:

—Ikara atoko ininiã, nota !nisãpiretai hĩte nipaniãtakiri uãka.

12

Parĩkauatakani Maerekani
(Mateo 21.33-46; Arókasi 20.9-19)

¹ Eereka Xesosi sãpiretana ninoa sãpirenatxi atão inakari oerekiko. Itxari:

—Kiki takarauata. Txipokori ova inakoronoka itaka. Ipiriketari. Ikamari ova maõkiko. Iposo atoko itakare apanĩkakixitika ikamari aapokotxi axapitiri õtanori ikikiote imakinetini ĩkapani. Iposo atoko ipaniãtana ãtikaka kikiakori itakare inĩkatinina ĩkapani, kotxi iua sariko õtakoxiti. Ninoa apakapamaroko ipixini ova iparĩkana ĩki. Iposo atoko katakareri sipe. ² Ova manapi, iua katakareri iokanatarini ititiri ninoa kikiakorimoni ova ipixini apakapini ĩkapani. ³ Txamari iua apokasaaki ninoa maĩkari iua. Ixirokitatarina. “Pisipeka,” itxarina. Miketika ikanapiripe.

⁴ —Iuaĩkana katakareri iokanataru āti initari ninoamonikana. Txamari ninoa kikiakori misiritari iua. Kai soroā ikiporonakarina, karota itxapirina ikiiā. ⁵ Iuaĩkana katakareri iokanataru āti ninoamonikana, txamari ninoa okapiri iuani. Kaiāopokori initariakori iokanata ninoamoni. Apanakini inoropatana. Apanakini okana. Itxaāpotana.

⁶ —Iua katakareri auapanika ātinoka iokanataru ĩkapani, imi iteene itiretakiti. Imapotōkire iokanataru imi ninoamonikana. “Notamoni ninoa paxitariko namarite” itxa. Ininiā imi apoka ninoamoni. ⁷ “Katakareri ākiri napani. Maōkari. Aōkiniāri, itakare imakinika kaikotināua ate,” itxakakana kikiakori.

⁸ —Ininiā ninoa maĩkari katakareri ākiri, oka itxapirina, kikio xiripire oka itxarina ĩto.

⁹ —Ininiā kiripa ikama katakareri? —itxa Xesosi.

—Iua kanapiriā. Okanako ninoa kikiakori. Ipaniātana apanakini itakare imakinetinina ĩkapani —itxa Xesosi.

¹⁰ Hīte atatsopatapekari ia Teoso sākire iōkatsopatakori: Aapokotxi kamakani kona nirekari ātika kai soro. Iua kai imanirekakiniti kai apiari itxapekaua. Apanakini kai soro maĩkakari itxaua.

¹¹ Teosokara txĩkitakari ikara atoko inini. Ikara peerekari atemoni, itxa Teoso sākire iōkatsopatakori.

¹² Xoteo auĩteakori imarotarina Xesosi sākire. Ninoa imarotari ikamakitina takari makinetakani kamakiti atokokana, ininiā ninoa omanākarauata Xesosi sāpiretakiti xika. Ninoa kinirāo maĩkaka itxarina Xesosi, txamari !imaĩkarina iua, kotxi ipĩkarina kākiti. Ininiā itakanaparina Xesosi, sipe itxana.

*Homano Auĩte ĩkitxitiko
(Mateo 22.15-22; Arókasi 20.19-26)*

¹³ Eereka Xoteo auĩteakori iokanataru ātikaka Erotxi sākire auĩākani, ātikaka pariseoakori pakini Xesosimoni. Inirekarina Xesosi kerokiniri isākire, kotxi ninoa nirekari Xesosi kaminiri maerekati imaĩkinirina ĩkapani. ¹⁴ Ninoa apokasaaki, imisākiretarina Xesosi:

—Koerekareri, ate imarotari pite sākire atāonani ininiāua. Poerekari atāonani Teoso nireēkiti kākiti kamini ĩkapani. !Pipĩkari kākiti. Kākiti poiāori pimisākiretini atokokana kākiti apiari pimisākireta apaka. Ikara atoko ininiā, pisāpiretaua. Atāokani txineiro asikini Homanoakori auĩtemoni, Sesa inakorimoni? ¹⁵ Atāokani asikiniri iuamoni? Apakata amasikakaniri iuamoni? —itxana.

Xesosi imarotari isākirena. Imarotari ninoa pimarauatini isākire ikerokini ĩkapani. !Inirekarina atāo inakari imarotinina. Ininiā Xesosi txana ninoa:

—Kinirepa hātamakaerekatano nota? Himinaro txineirota. Ninirekari natamatiniro —itxa.

¹⁶ Ininiā iminarona.

—Kisanōkapa ia? Kiuākapa aua uai? —itxana.

Ininiā ninoa:

—Sesa sanōka, iuāka pakini —itxana.

¹⁷ Ininiā Xesosi:

—Ikara atoko ininiā, hīsikariko Sesamoni iua nakiti. Hīsikariko Teosomoni iua nakiti —itxana.

Ininiā kasākirena ninoa, kotxi peerekari Xesosi apakapapiretakiti.

*Ipĩkari Ōkitikiniua Mauikakoni
(Mateo 22.23-33; Arókasi 20.27-40)*

¹⁸ Kikiakori satoseo inakoni, !auikari kākiti ipĩkaripeka iuaĩkana ōkitikiniua iuaĩkana auāki inini ĩkapani. Ninoa satoseo apoka Xesosimoni.

¹⁹ —Koerekareri, Moisesini iōkatsopataru ia ipaniātakiti: “Kiki meenetipatika ipininiā, iua itari takaroko tikinitakoro. Iua itari keene ininiā,

itakauākatari amarini iua itarini ipīpekarini uāka,” itxa Moisesi. ²⁰ Setxi itar-itxiakori aua ĩkorapokoriti. Apia kiomanetakari takaro sito. Txamari ipīkasaaki meenetopanika itikinitaro. ²¹ Ininiā āti itari takaro oakana. Ipīkasaaki ! keenepanikaro oa. Iua atokokana itxape āti itari. ²² Ininiā imakinikana ninoa takapiimaro oa. Ikinikana ninoa meenenipanika ipīpena. Eereka oanipekana apaka opīpe. ²³ Ipīkani ōkitikasaakia, kiriītanoropa otxatauako? Kotxi ikinikana setxi takapekaro oa —itxana.

²⁴ Ininiā Xesosi:

—Hīte kerokari, kotxi ! himarotari Teoso sākire iōkatsopatakorari. Teoso posotiire apaka !himarota. ²⁵ Ipīkani iuaīkana ōkitikasaakia, Teoso nitiriakori iaxitikini atoko itxapekauana. !Ītanorouataikako. ²⁶ Hīte !auikari ipīkani ōkitikiniua. Hīte atatsopatapekari Moisesi iōkatsopatakiti aanaia tirinakari pirena. Iuasaaki Teoso misākiretari Moisesi: “Apraō, Isaki, Xakoo pakini Teosonekarano nota,” itxari Moisesimoni. ²⁷ Ikara atoko ininiā Apraō, Isaki, Xakoo pakini ōkitikapekaua iuaīkana, kotxi auāki inakani Teosona iua. Kona ipīkani Teosoneni itxaua Teoso. Amananini hīkerokari —itxa Xesosi satoseoakorimoni.

*Teoso Paniātakiti Apiari Akamini
(Mateo 22.34-40)*

²⁸ Iuaātaā aua kaiōkatsoparerari. Ikenakotana ninoa misākiretakakiniua. Ikenakotari Xesosi apakapapiretakiti erekari ene. Ininiā iua pimaāri Xesosi:

—Īkiripa Teoso paniātakiti apiari txataua? Kipa apiaerekata Teoso nireēkiti akamini?

²⁹ Xesosi apakapapiretari:

—Teoso paniātakiti apiari ia: “Isaero tōpa auakani, hīkenakota. Ateosone Apiananiri iua. Iuananira Teoso txaua. ³⁰ Pitiretariko Apiananiri piTeosone, ikinipoko pinireēkitiā, ikini pākixinireē, ikinipoko pixinikakitiā, ikini pitaparaxinireē pakini.” ³¹ Ātipekana Teoso paniātakiti apiari ia: “Piteka pitiretiniāua atokotxikana, pitiretariko āti.” Iuananira Teoso paniātakiti ipi apiari txaua —itxa Xesosi.

³² Ininiā iua kaiōkatsoparerari apakapapiretari Xesosi:

—Inipitikara pisākire, koerekareri. !Auari āti Teoso. Iuanokara auari. ³³ Ininiā atiretamariko Teoso ikinipoko anireēkitiā, ikinipoko axinikakitiā, ikini ataparaxinireē. Atiretamanako apanakini aītoka atiretini atokokana. Ikara Teoso paniātakiti ipi apiari txaua. Teoso paniātakiti pirātxi aōkini iua ĩkapani poiāori —itxa Xesosimoni.

³⁴ Xesosi kenakotakasaakiri isākire ereka inini, itxari iua:

—Pite auītearitari Teoso.

Iposo atoko apanakini !kataparaxinireika apikomoni ipimainirina.

*Teoso Mereēkiti Tavii Apika Mekaniri
(Mateo 22.41-46; Arókasi 20.41-44)*

³⁵ Xesosi Teoso misākiretiko aikoti oerekaruanātakasaaki, ipimaāri:

—Kinirepa kaiōkatsoparerini sākire: “Tavii apika mekanirako Teoso mereēkiti txauako?” itxana. ³⁶ Erekari Matamatakoti kamasāpirenatakari Tavii:

Apiananiri misākiretari niauīte: “Nota kikomoni piitopākiniritika nixipokariko pimokaiakariakori. Nikamariko ninoa pikiti pitakiniātaā atoko ininiua,” Apiananiri txari niauīte, itxa Taviini. ³⁷ Tavii akiritari iua Teoso mereēkiti “Niauīte.” Ikara atoko ininiā, natokopa itxa iua Tavii apika mekani ininiua? —itxa Xesosi.

Iuasaaki ikinimane kākiti iuaā apitiitakaniua potxitari Xesosi sākire.

*Kaiōkatsoparerini Maerekani Pirena
(Mateo 23.1-36; Arókasi 20.45-47)*

³⁸ Xesosi oerekarauanātakasaaki, ōtākikana kākiti:

—Kaiōkatsoparerini moianari !hītxapeua. Ninoa potxitari mākatxi ereri ieretakinina kākiti apisatoō inapinina īkapani, kākiti atamatinina īkapani. Ninoa apokaerekatari imisākiretikona ipaxitikona nipokori sikikoōtaā inapāpotakasaakina. ³⁹ Ninoa potxitari kākiti topākini apiaerekatakari nopini iitopākinina aiko Xoteo apotiitiniātaāua. Kiiniriā ninoa potxitari kakiiniriteri topākinimoni iitopākinina. ⁴⁰ Ninoa mixirikari tikinitakoni aapoko, iuaritika okanani imisākiretarina Teoso kākiti apisatoō, ininiā kākiti uākatari ninoa erekarini atoko ininiāuana. Teoso iteene misiritanako kākiti ikara atoko inakani.

*Tikinitakoro Matxineiroto Sikakito
(Arókasi 21.1-4)*

⁴¹ Xesosi topāka txineiro Teoso īkapani apakapikoōtaā. Xesosi itikari kākiti ieretakiniro txineiro kaixa āki. Itori katxineiroterini okaro txineiro mirikinito kaixa āki. ⁴² Eereka tikinitakoro matxineiroto apoka iuaā. Otakaro ipi txineiro otaki kaixa āki. Poiāonoka txineiro. ⁴³ Ininiā Xesosi akiritana imoianariakori.

—Inipitikara nisāpiretai hīte. Ōkora tikinitakoro matxineiroto sikakito apiata. Apanakini sikakito poiāoka. ⁴⁴ Kotxi ninoa sikaro txineiro itetakoro. Oa matxineiroto sikari okinika onakito —itxa Xesosi.

13

*Teoso Misākiretiko Aikoti Irikiko
(Mateo 24.1-2; Arókasi 21.5-6)*

¹ Teoso misākiretiko aikoti Xesosi pokīkasaaki, imoianari misākiretari iua:

—Koerekareri, patamata ia kai aapokotxiti itomaneri. Amaripokori. Ia aiko Teoso misākiretiko peerekari.

² Ininiā Xesosi:

—Hātamatari ia aiko mitari. Āti ōti imakinika irikaākako. Kona kai kaiko-taikako āti kai nopini —itxa Xesosi.

*Misirikaretxi Apokaenetini
(Mateo 24.3-14; Arókasi 21.7-19)*

³ Xesosi topāka oxiratari nopini Teoso misākiretiko aikoti apisatoō. Iuaā aua oriva minanape. Iuasaaki Petro, Txiako, Xoāo, Ātree pakini apoka iuamoni. Ninoanoka aua iuaā. ⁴ Ipimaārina Xesosi:

—Kirisakipa aiko Teoso misākiretiko irikaāka? Natokopa itxa aimarotiniiri ikara ōti apisapanika?

⁵ Ininiā Xesosi:

—Erepaniko. !Hāuiritapiri apanakini misirienetini hīte. ⁶ Itopaniriko kākiti, “Xesosikarano,” inakanipaniko. Ninoa misirienetari kaiāopokori kākiti. ⁷ Neenamatzhi hīkenakoenetakasaaki, neenamatzhi ene hīkenakoenetakasaaki, !hīpīkarauatape. Ikara auapitikako, iuaritika kona xipokatxi ōtipanikani. ⁸ Āti uāka neenamauata āti uākakata. Āti tixini auakani neenamauatako āti tixini auakanikata. Ātikaka itixi iakeēkatakako. Kaiāopokopaniri natxi. Amarini auini tsii atoko itxapaniko.

⁹ —Erepaniko hīte. Himaīkaākako, auītetximoni hīsiākako. Hinoropataākako aāpitsaā aiko āki Xoteo apotiitiniātaāua. Nota sākire hāuikini xika hīte anikaākako poiāori auītetximoni. Apiari auītetximoni apaka hanikaākako. Iuasaaki hīte sāpiretanako ninoa Teoso iokanapirena erekari. ¹⁰ Itixi xipokini apisapanika Teoso iokanapirena erekari sāpiretaākako ikinimanemoni ikini

itixitikinimoni. ¹¹ Kākiti maĩkasaakii hĩte, anikasaakii hĩte auĩtetxiakorimoni, !hĩxinikapiri hĩsākire tĩkane hĩsākirauatini apisapanika. Hĩsākirauatakasaaki, iusaakipeka himarotari hĩsākire. Erekarı Matamatakoti txĩkitakai iusaakii hĩsākire himarotini. ¹² Kākiti sikanapariko atão itariakori auĩtetximoni okiko tĩkane. Iriakoritxi sikanapanako imiakori auĩtetximoni okiko tĩkane. Eenetxiakori omanatana iriakori, inoroakoro pakini. Eenetxiakori xika ninoa okapeẽka. ¹³ Nota sākire hãuikini xika, ikinimane omanatai hĩte, iuaritika himatakanapakaniãri nisākire hãuikini, hanikaãkako Teoso tixinemoni —itxa Xesosi imoianariakorimoni.

Iteene Maerekanitxi Apokini
(Mateo 24.15-28; Arókasi 21.20-24)

¹⁴ Iuaĩkana Xesosi sãpiretana:

—Hĩtikariko Maerekati Apiatakari Teoso misãkiretiko aikoti ãki. Kitxakapirĩka Teoso sãkire sãpiretakari Tanieo inakori sãpiretapekari ikara pirena. (Ininiã hĩte ia atatsopanãtakanii, hĩkenakotariko Xesosi õtãkikiniua.) Maerekati Apiatakari Teoso misãkiretiko aikoti ãki hĩtikasaaki, hĩte Xotẽia tõpa auakanii, himitekapoka mitaxiratarimoni. ¹⁵ Iusaakii hĩte haãpoko nopini auakanii, katima hĩtxako hĩkatxakini. Haãpoko !hĩĩroãpe hĩtii himakatzakini ĩkapani. ¹⁶ Hĩte kikio auakanii, !hĩkanapiripe haãpokomoni himãka hãpini ĩkapani. ¹⁷ Ikarasaaki !erekapaniri sito kamixiromoni, sito kaxitakakareromoni. ¹⁸ Teoso hamanaã himitekini kamoĩsaaki, kotxi himitekini mitaãsaaki !erekari. ¹⁹ Iusaakii atatsiiri auakatapitikako. Ia atatsiiri apiata atatsiitaãkako. Kitxakapirĩka itixi Teoso kamakasaaki kãkiti atatsiirauata poiãoka. Ikara atatsiiri õti apisa kãkiti atatsiirauata poiãoka. Ikara atatsiiri õti napa atoko !ikara atoko inakari atatsiiri !auaikako. ²⁰ Teoso mapoiãotakaniãri iua õti kãkiti atatsiirauatini õti, !auaikamako kãkiti. Ikinipekamako ipĩpemanako. Teoso iotokakariko ĩkora atatsiiretxi, imereẽkini mapĩnakani ĩkapani.

²¹ —Apanakini sãpiretiniãi hĩte: “Xesosi Teoso mereẽkiti ia,” hinikosaaki, !hãuikapiri. “Xesosi Teoso mereẽkiti ikiraãtaã,” hinikosaaki, !hãuikapiri. ²² Kotxi Teoso mereẽkiti minakaniua apokapitikako, “Xesosikarano nota,” inakari. Apaka apanakini apokapitikako, “Teoso sãkire sãpiretakarikarano nota,” inakari. Paxirari ninoa sãkire. Kãkiti ikara atoko inakani kamariko posotiiretxi, kãkiti itikiniri ĩkapani. Ninoa nirekamari Teoso mereẽkini imisirienetinina. ²³ Erepaniko. Ikara õti apokini apisapanika nõtãkikai hĩte —itxa Xesosi imoianariakorimoni.

Kãkiti Itari Iaxitikiri Kanapiriini
(Mateo 24.29-31; Arókasi 21.25-28)

²⁴ —Iua misirikaretxi napa atoko atokatxi iuakapeka. Kasiri !iponikaika. ²⁵ Iõriki iaxitikero irikako. Ikinipoko kaikori iaxiti auakari ioĩketaãkako. ²⁶ Iusaakipekako ikinimane atapariko kãkiti itari iaxitikiri apokaãpotini katxiãri ãki. Itapararitika apoka. Kaiotximereri itxaua iusaakii. ²⁷ Iusaakii iokanatana iniriakori iaxitikini ĩtinixitimoni, ipinimoni ĩtinixitimoni, atokatxi pokĩkinimoni, atokatxi ereẽkokinimoni. Iokanatana iniriakori ikini itixitimoni kãkiti imereẽkini apitiitinina ĩkapani —itxa Xesosi imoianariakorimoni.

Piko Mina Pirena
(Mateo 24.32-35; Arókasi 21.29-33)

²⁸ Iuaĩkana Xesosi sãkirauata.

—Nisãpiretai sãpirenatxi atão inakari oerekiko, piko mina pirena, nikanapiriini apiata himarotini ĩkapani. Pooĩoporipeka onakasaaki, otomorekasaaki, “Kamoĩ apokanapanoka,” hĩtxa. ²⁹ Iua atokokana ikara misirikaretxi mixikanani nisãpiretakiti hĩtikasaaki, himarotapekariko

nota kaiama kanapirikapeka ninini. ³⁰ Ia nisäkire atão. Itixi auakani ! ixipoka ikinipoko nisãpiretakiti mapokakani apisa. ³¹ Iaxiti xipokapitikako. Ìkoraxiti apaka xipokapitikako. Iuaritika nota sãkire !ixipoka —itxa Xesosi imoianariakorimoni.

*Kãkiti !Imarotari Xesosi Apokini Manapi
(Mateo 24.36-44)*

³² Iuaĩkana Xesosi sãkirauata:

—Kãkiti !imarotari ikara õti manapi apokini. Teoso nitiriakori iaxitikini apaka !imarotari ikara õti. Nota Teoso ãkirikanera !imarotari ikara õti. Nirinanira, Teosonanira, imarotari. ³³ Hiãtapapikariko. Hĩkoatapikako. Teoso himisãkiretapikako. Kotxi !himarotari ikara õti apokini.

³⁴ —Nikanapiriãkasaaki, kiki õtako sikari kanapiriini atoko nitxa. Iua kiki potorikasaaki, ipaniãtana initiriakori aapoko inĩkatinina. Ikininape isikana-pana parĩkatxi ikaminina. Ipaniãtari initiri aapoko toreãtaã kaikotakari, “Araõkire pitxako,” itxari. ³⁵ Nota hĩtari iaxitikiri iua kiki õtako sikari atoko nitxako. ãtipirika hiãtapapikanoko, kotxi !himarotari nota apokini õti. !Himarotari mapiãtikikauako napoka. !Himarotari apanĩkanõkauako napoka. Imaropirĩkatauako napoka. Ìkanõkapanikauako napoka !himarotapaniri. ³⁶ Atxiĩti patimari napokini, ininiã hĩkoatapikako, mimakatika hinini ìkapani nota apokasaaki. ³⁷ Ininiã ãtipirika hiãtapapikanoko. Ikininapemoni apaka ikara nitxa —itxa Xesosi imoianariakorimoni.

14

*Xesosi Okaenetiko Pirena
(Mateo 26.1-5; Arókasi 22.1-2; Xoão 11.45-53)*

¹ Iuasaaki kãkiti apotiitaua ipi kiiniriti auakasaaki. Pãskoã kiiniriti, pão miãtiãkati nikiko kiiniriti pakini aua. Ipi õti kiiniri potorikini apisapanika sasetotxi auĩteakori, kaiõkatsoparerini pakini xinikaxitita:

—Natokopa atxatariko Xesosi amaĩkini aõkini ìkapani? ² !Amaĩkapaniri kiinirisaaki, kotxi amaĩkiniãri, kãkiti naiatamaua eereka —itxanãtana.

*Sito Kamariãro Mĩkaro
(Mateo 26.6-13; Xoão 12.1-8)*

³ Xesosi auanãta Petãnia aapokotxiti Simão inakori aapoko. Iua Simão akiritaãka “Maere Matati.” Simão aapoko Xesosi nipokonãtakasaaki, sito apoka. Oa minari kopitipaki kai kamakori, kai arapãstiro inakoro. Kopitipaki ãki aua kamariãro, nato inakoro. Pakaronepokoro. Oãpokasaaki Xesosimoni, opakauanakari kopitipaki. Okitakaro kamariãro Xesosi kiiã. ⁴ Iuasaakipeka apanakini iuaã auakani omanãkarauata.

—Kinirepa oioanataãka kamariãro? ⁵ Ovẽtxitamaroko, ininiã kaiãopokomaniko txineiro oãpakapamako. Tresẽtosi txineiro ota prata kamakori oãpakamako. Txineiro mauakinitimoni osikiniã erekamariko —itxana.

Iteene ikapatitana. ⁶ Ininiã Xesosi:

—Ikara atoko !hĩtxapero. !Homanatapero. Erekarĩ okaminano. ⁷ Kãkiti matxineiroteni auapikako hĩtekata. Hinirekasaakiriko hĩsikaro txineiro ni-noamoni. Nota !auari ãtipirika hĩtekata. ⁸ Oia sito kamari ikinipoko oimaro-takiti nota ìkapani. Nipinini apisapanika oina notamoni. Omaritari niĩto, niĩto iposope inini nikatiko ìkapani. ⁹ Atão nisãpiretai hĩte. Teoso iokanapirena erekari sãpiretikoãtaã ikini itixiti, osãpiretaãkako apaka oia sito kitakiniro kamariãro nikiiã, ininiã kãkiti ikini itixiti auakani xinikapikaro oa —itxa Xesosi.

*Xotasi Mīkapiritiniri Xesosi**(Mateo 26.14-16; Arókasi 22.7-16, 21-23; Xoão 13.21-30)*

¹⁰ Tosi pakini Xesosi moianariakori. Imoianari Xotasi inakori sari sasetotxi auñteakorimoni. Imisäkiretana ninoa Xesosi imīkapiritini ĩkapani, ninoamoni isikiniri ĩkapani. ¹¹ Ikenakotakasaakirina Xotasi sãkire, ipoxokoniuatana. Isikaenetarona txineiro iuamoni. Eereka Xotasi iãtapari Xesosi imīkapiritini õti.

*Páskoa Kiiniriti Kamiko**(Mateo 26.17-25; Arókasi 22.7-13)*

¹² Páskoa kiiniriti potorikini õti, soti auñte anaakori okiko õti, Xesosi moianariakori misãkiretari iua:

—Namonipa pinirekatari Páskoa kiiniriti akamini?

¹³ Ininiã Xesosi iokanatanana imoianariakori ipi.

—Hĩsa sitatximoni. Iuaã kiki ãparaã kopitiã anikakari hãpiãkata. Iua kikikata hĩsa. ¹⁴ Iua sinimoni kaapokori himisãkireta. Hĩtxariko iua: “Koerekareri nirekari imarotiniri, namonipa erekari imoianariakorikata inipokotini Páskoa kiiniriti ikamakasaakina?” hĩtxariko. ¹⁵ Ininiã iua oerekaiko hĩte itanokiri koa mitapoari. Auapeka kãkiti topãkini. Imakinika oeretapeãkaika —itxana.

¹⁶ Ininiã imoianariakori sari. Sitatxi apokasaakina Xesosi sãkire iaõka aua. Ininiã ninoa kamari nipokori Páskoa kiiniriti ĩkapani.

¹⁷ ĩkanõkapeka inakasaaki Xesosi apoka tosi imoianariakorikata.

¹⁸ Inipokonãtakasaakina, Xesosi txana:

—Atão nisãpiretai. ãti hĩte notakata nipokotakari mīkapiritanoko nota —itxa.

¹⁹ Ininiãkara Xesosi moianariakori matinaniuata. Ipimaãrina Xesosi:

—Notakani atxiĩti?

ãtipekana:

—Notakani atxiĩti?

Ininiã imakinikana ikara atoko itxana. ²⁰ Ininiã Xesosi:

—ãtika hĩte notakata auakari mīkapiritano. Notakata komiri iopitiãtakarikarako sikano nimokaiakariakorimoni. ²¹ Nota hĩtari iaxitikiri okaãkako. Teoso sãkire iõkatsopatakorini sãpiretapekari nipinini tĩkane. Nota hĩtari iaxitikiri mīkapiritakari iteene misiritaãkako. Erekamariko maponaniãkatika inaãkamako.

*Xesosi ĩto, Iarẽka Pakini**(Mateo 26.26-30; Arókasi 22.14-23; 1 Korĩto 11.23-25)*

²² Xesosi imoianariakorikata nipokonãtakasaaki, Xesosi kosekari komiri. Imisãkiretari Teoso:

—Erekapitikari ia komiri pisikakiti atemoni —itxari.

Imapopeẽri komiri, xanaka itxari imoianariakorimoni.

—Apakapa, nika hĩtxako. Ia niĩto —itxana.

²³ Iposo atoko koseka itxaro iãkoanãtxi. Imisãkiretari Teoso:

—Erekapitikari ia iãriã pisikakiti atemoni.

Ininiã iãkoanãtxi isikana imoianariakori. Ikinikana iãtarina iãriã. ²⁴ Ininiã Xesosi:

—Ia niarẽka xiketakari makatxakariko kaiãopokori kãkiti maerekani. Teoso sãpiretapekari kãkiti ikamaenetakiti amaneri kãkiti ĩkapani. Ia niarẽka oerekari kãkiti, Teoso kamapekari ikamaenetakiti. ²⁵ Atão nisãpiretai. !Niãtaikaroko ovapeẽ, Teoso auñtetxi ininiãtaãua nimapokakanisaaki. Iuaã napokasaaki niãtari. Amaneri iãriãti niãtako —itxa Xesosi.

²⁶ Eereka ninoa xikarauata Teoso ĩkapani. Iua atoko isana oriva mina auiniãtaã, oxiratari nopini.

Xesosi Sāpiretari Petro Kipatiniri Iua
(Mateo 26.31-35; Arókasi 22.31-34; Xoão 13.36-38)

²⁷ Xesosi misākiretana imoianariakori:

—Ia ìkanōkati hīkinika hīte takanapanoko nota, kotxi Teoso sākire iōkatsopatakori sāpiretapekari ikara atoko inakari. Itxari:

Nokariko soti auīte piratakari, ininiā ikinika ipiraakori iarikitatako, itxa Teoso sākire iōkatsopatakori. ²⁸ Ininiā eereka nota nipinaāka atoko, iuaīkana nōkitikaākaua atoko, nisako hīte apisa Kariréiamoni —itxa Xesosi.

²⁹ Ininiā Petro:

—Nota !nitakanapai pite. Atxiīti ikinimane takanapai, iuaritika kona nota takanapai.

³⁰ Ininiā Xesosi:

—Atāo nisāpiretai. Ia ìkanōkati patari ipikata sākirauatini apisapanikako, ipi āti pakinikata, “!Nimarotari iua,” pitxanoko —itxari Petro.

³¹ Petro apakapapiretari itaparaxinireritika:

—Atxiīti pitekata nokaāka, iuaritika kona nota sāpiretari apanakini nimirarotakanii pite.

Ikininape Xesosi moianariakori Petro sākire iaōka ikamana.

Xesosi Misākiretiniri Teoso Xetsémani Inakoriātaā
(Mateo 26.36-46; Arókasi 22.39-46)

³² Xesosi imoianariakorikata apoka ātiātaā kākiti akiritakiti Xetsémani inakoriātaā. Iuaā Xesosi paniātana imoianariakori:

—Uai hīītopāka. Teoso nimisākiretako —itxa.

³³ Anikari Petro, Txiako, Xoão pakini iuakata apikomoni. Iuaā Xesosi iteene matinaniuata. Maerekaxiniretinoka itxa. ³⁴ Ininiā iua:

—Nixinire imaromaxiretari. Iteene nimaxire, ininiā okaaritano. Uai hīkaikota. Araōkire hītxako —itxana.

³⁵ Apikomoni isa. Ipamaka xitimoni, misākireta itxari Teoso. ³⁶ Itxari iri:

—Papai, pite posotari ikinipoko pikamini. !Pauiritapeno paītiki natat-siirauatini, iuaritika ninirekari pite nirekakiti nikamini. Nota nirekakiti nikamini kona ninireka —itxari iri.

³⁷ Eereka ikanapiriā Petro, Txiako, Xoão pakinimoni, txamari ninoa imakanāta. Xesosi akiritari Petro:

—Simão, himakanāta? Kona hīposotatari āti oaranoka hīkoatini?

³⁸ Erepaniko. Hinirekasaakiri maerekati hīkamini, !hīkamapiri. Araōkire hītxako. Himisākiretariko Teoso, ininiā !hīkamari maerekati. Kākiti xinire atxiīti !nirekari maerekati ikamini. Txamari kākiti ito tapara poiāoka, ininiā ikamari maerekati. Ininiā erepaniko —itxana ninoa.

³⁹ Iuaīkana isa Teoso imisākiretini ìkapani. Teoso imisākireta, mitxi isākire atokokana itxa. ⁴⁰ Iposo atoko ikanapiriā. Txamari iuaīkana ninoa imakanātapanika. !Iposotarina ikoatinina. Ipētauatana, ininiā !kasākirena.

⁴¹ Iuaīkana ikanapiriā Petro, Txiako, Xoão pakinimoni.

—Himakanātapanika? Hītomanātapanika? Iaōpe. Hātapanana. Hītari iaxitikiri uatxa sikaākako maerekati kamakanimoni. ⁴² Hōkitikaua. Masa. Hātapanana. Apokaāpota kiki nimīkapiritakiri —itxana.

Xesosi Maīkiko Pirena
(Mateo 26.47-56; Arókasi 22.47-53; Xoão 18.1-11)

⁴³ Xesosi sākirauanātakasaaki, Xotasi apoka. Iua Xotasi Xesosi moianarika-mara. Iminana ito kiki, saasara mīkani, piriri mīkani. Sasetotxi auīteakori, kaiōkatsoparerini, kiomātxiakori pakini iokanatarari Xotasi kikiakorikata Xesosi imaīkinina ìkapani. ⁴⁴ Xotasi mitxipeka sāpiretari kikiakori:

—Nota apitxokakiti Xesosipitikarako iua. Iuasaaki himaïkapekariko. Erepaniko hanikasaakiri, imamitekakani ïkapani —itxa.

⁴⁵ Xotasi apokasaaki, isakatapitipori Xesosimoni. Akiritari:

—Koerekareri.

Inakasaakipeka apitxoka itxari.

⁴⁶ Inakasaakipeka kikiakori maïka, anika itxarina Xesosi. ⁴⁷ Kiki iuasaaki iuaã auakari kosekaro saasara. Iua sauaãkatari sasetotxi auïte apiatakari nitiri. Itsotakakïpitari. ⁴⁸ Iuasaakipeka Xesosi:

—Hïte ina himaïkinino ïkapani, saasarakata, piririkata. Kiïtiriri atoko hïtxapeno nota himaïkinino. ⁴⁹ Ikiniõtika nota auanãtari hïtekata Teoso misãkiretiko aikoti ãki, noerekarauatakasaaki. Iuaã hïte !imaïkano nota, kotxi Teoso sãkire iõkatsopatapeëkaika hïte maïkinino kiïtiriri himaïkini atoko —itxana ninoa.

⁵⁰ Iuasaakipeka ikinika Xesosi moianariakori miteka, asika itxarina iua.

⁵¹ Iuasaaki ãtokori sari Xesosi tikini. Iua mãka ãtinoka aua iïtoã pirikakari. Kikiakori maïkamari iua. ⁵² Imãkanoka kaikota iuakoãna. Kasarapeka imiteka iua ãtokori.

Xesosi Xoteo Auïteakori Apisatoõ

(Mateo 26.57-68; Arókasi 22.54a, 63-71; Xoão 18.12-14, 19-24)

⁵³ Ninoa anikari Xesosi sasetotxi auïte apiatakari aapokomoni. Iuaã ikinika sasetotxi auïteakori, kiomãtxiakori, kaiõkatsoparerini pakini apotiitaua.

⁵⁴ Petro ikira atoko isaãpota Xesosi anikakani tikini. Ìroã sasetotxi auïte aapoko piriketakorïã. Iuaã iitopãka sasetotxi auïte apiatakari nitiriakorikata. Iroka xamina tinipoki.

⁵⁵ Aapokotxi ãki sasetotxi auïteakori, ikinika Xoteo auïteakori pakini pimaãna kãkiti:

—Kipa imarotatari maerekati Xesosi kamini?

Ninoa nirekari Xesosi okiko imaerekani xika. Txamari !apokarina imaerekani imarotakani, kotxi !ikamari maerekati. ⁵⁶ Kaiãopokori kãkiti sãpiretari maerekati Xesosi kamakiti, txamari paxirari ninoa sãkire, kotxi ãti sãpiretakiti ipinimoni, ãti sãpiretakiti ipinimoni, itxaãpotana.

⁵⁷ Apanakini kiki õkitikaua, sãpireta itxarina ia aãpirena Xesosi ikamapiretinina. ⁵⁸ Ninoa:

—Ate kenakotari isãpiretiniri: “Nirikariko ia aiko Teoso misãkiretiko aikoti kãkiti kamakiti. Ipi ãti pakini õti inakasaaki nikamariko ãti aiko kãkiti makamakiniti,” itxa isãkire.

⁵⁹ Txamari ikara sãkiretxi ãti sãpiretakiti ipinimoni, ãti sãpiretakiti ipinimoni, itxaãpota.

⁶⁰ Iposo atoko sasetotxi auïte apiatakari tima ikinimane apisatoõ. Iua pimaãri Xesosi:

—Kininiãpa na papakapapiretari ninoa sãkire? Kixikapa ninoa ikara atoko txanãtai? —itxari.

⁶¹ Txamari !kasãkireri Xesosi. !Apakapapiretari. Ininiã sasetotxi auïte apiatakari iuaïkana pimaãri:

—Pitekani Teoso mereëkiti txataua? Pitekani Teoso ãkiri txataua? —itxari.

⁶² Ininiã Xesosi:

—Ari, iua ãkiripitikarano. Hãtamatariko kãkiti itari iaxitikiri topãkini Kaposotiireri kikomoni. Hãtapariko kãkiti itari iaxitikiri uai apokaãpotini katxiãri ãki —itxa.

⁶³ Iuasaakipeka sasetotxi auïte apiatakari matsorãkari imãka, kotxi iuãkatari Xesosi sãkire maerekati ininiua.

—! Anirekaikari Xesosi kamakiti sãpiretakani. Atokopeka. ⁶⁴ Kotxi hĩte kenakotapekari isãkire maerekati, “Teoso ãkirirano” inini. Natokopa atxatari iua? —itxana.

Ininiã ninoa apakapapiretari:

—Okaãkapitikako —itxarina.

⁶⁵ Apanakini kiisokari Xesosi. Mãkatxi mataã iapirikarina ikiiã oki manapi imatamatakani ĩkapani. Iposo atoko iãsokarina.

—Pisãpiretaua, kipa ãsokai? —itxarina.

Sasetotxi auĩte nitiriakori apaka ãsokari iua iuakoãna.

Petro Kipatari Xesosi Imarotini

(Mateo 26.69-75; Arókasi 22.54b-62; Xoão 18.15-18, 25-27)

⁶⁶ Iuasaaki Petro ixti aua aapokotxi piriketakori ãki. Sasetotxi auĩte apiatakari nitero ãtokoro apoka iuaã. ⁶⁷ Oãtamatarari Petro irokanãtini xamina tinipoki. Oa mixinitari iua. Ininiã oa:

—Xesosi Nasareekiri moianarikai pite apaka —otxa.

⁶⁸ Ininiã:

—Kona, nota !imarotari pisãkire —itxaro.

Iuasaaki pirikere ĩronakikoãtaã isari. Iuasaakipeka patari sãkirauata. ⁶⁹ Oa sasetotxi auĩte nitero atamatari iua iuaã.

—Ere kiki iua moianaripitikara —otxana ninoa Petro takote auakani.

⁷⁰ —Kona iuano nota —itxa.

Paĩtiki ninoa iuaã auakani:

—Iua moianaripitikarai. Pite Kariréiakirikarai. Pisãkireẽra ate imarotai —itxarina.

⁷¹ Ininiã Petro:

—Nota !imarotari kiki ikara atoko hinanãtakiti. Atãoene nimasãpiretakaniã, Teoso misiritamanoko. Teoso imarotari nota sãkire atãoka nisãpiretini —itxana.

⁷² Ikara atoko Petro inakasaaki, iuaĩkana patari sãkirauata. Ininiã Petro xinikari Xesosi sãpiretakiti iuamoni. “Ipikata patari sãkirauatini apisapanikako, ipi ãti pakinikata, ‘!Nimarotari iua,’ pitxanoko.” Ikara inakari ixinikasaaki, itxiapata.

15

Xesosi Pirato Apisatoõ

(Mateo 27.1-2, 11-14; Arókasi 23.1-5; Xoão 18.28-38a)

¹ Katimatiniãkata sasetotxi auĩteakori, kiomãtxiakori, kaiõkatsoparerini, ikinimane Xoteo auĩteakorikata xinikaxitinãta. Ipaniãtarina Xesosi iaxirikiko. Iposo atoko anika, sika itxarina Piratomoni. ² Pirato pimaãri Xesosi:

—Pitekani Xoteoakori auĩte txataua? —itxari.

Ininiã Xesosi:

—Ari, pisãkire atãopitikara.

³ Sasetotxi auĩteakori apoiãpotari Xesosi, txamari Xesosi !kasãkireri. ⁴ Ininiã Pirato:

—Na papakapapiretatari? Ninoa iteene misãkirepiretai —itxari.

⁵ Iuaritika Xesosi !apakapapiretari. Ininiã Pirato ãkixinireẽ:

—Kinirepa kona apakapapiretari? —itxa.

Xesosi Okiko Nirekiko

(Mateo 27.15-26; Arókasi 23.13-25; Xoão 18.38b-19.16)

⁶ Pãskoã kiiniriti auakasaaki, Pirato itotari isikakiniri kateia ãki auakari kãkiti nireẽkiti. ⁷ Iuasaaki Xesosi maĩkikosaaki, Pahapasi inakori aua

kateia āki. Iua Pahapasi apanakini kateia āki auakanikata okaniuat-apeka Homanoakori inaiatakasaakina. ⁸ Pirato sākirauatakasaaki Xesosikata, kăkitipokoni apoka Piratomoni.

—Kateia āki auakari pisikaka —itxarina.

⁹ Ininiā Pirato pimaāna:

—Hinirekatari nisikakiniri Xoteo auīte hīte ĩkapani? —itxana.

¹⁰ Pirato iteene imarotari sasetotxi auīteakori sikari Xesosi iuamoni Xesosi ixikotinina xika. ¹¹ Sasetotxi auīteakori maasakana ninoa iuaā apotiitakaniua:

—Hamanaāri Pirato Pahapasi isikakini ĩkapani —itxana kăkitimoni.

¹² Pirato iuaĩkana pimaāna:

—Natokopa nitxatari ia kiki Xoteo auīte inakori? —itxa.

¹³ Akiripoakatana:

—Aamina ĩpiriāmitakari nopini hītokakitari —itxana.

¹⁴ Ininiā Pirato:

—Kixikapa? Maerekati !ikama —itxa.

Apiata akiripoakatana:

—Aamina ĩpiriāmitakari nopini hītokakitari —itxakatana.

¹⁵ Ininiā Pirato sikakari Pahapasi ninoa ĩkapani, kotxi inirekari ikamapox-okonitinina ninoa kăkiti. Eereka ipaniātari Xesosi xirokitatiko aāpitsaā. Eereka Pirato paniātari sotatoakori tokakitiniri Xesosi aamina ĩpiriāmitakari nopini.

Sotatoakori Napetiniri Xesosi

(Mateo 27.27-31; Arókasi 22.63-65; Xoāo 19.1-3)

¹⁶ Ininiā sotatoakori anikari Xesosi Pirato aapoko āki. Akiritarina ikinika sotato. ¹⁷ Iposo atoko ieretakarina măkatxi pōkamarari Xesosi ĩtoā. Ikamarina saporietā kotipiaro kamakori, taka itxarina Xesosi kiiā.

¹⁸ —Aāuīte —itxarina Xesosi inapetinina.

—Xoteo auītekai pite —itxarina.

¹⁹ Iaritakiitarina aākeē. Ikiisokarina. Ikapotoreēkauana Xesosi apisatoō.

—Aāuīte —itxarina Xesosi inapetinina.

²⁰ Inapetakarina atoko imakatzakarina măkatxi pōkamarari. Xesosi măka iuaĩkana ieretaka. Eereka anikarina Xesosi aamina ĩpiriāmitakari nopini itokakitinirina ĩkapani.

Xesosi Tokakitaāka Aamina ĩpiriāmitakari Nopini

(Mateo 27.32-44; Arókasi 23.26-43; Xoāo 19.17-27)

²¹ ĩpixinipokoriti itaōkitarina kiki Simāo inakori. Sireni sitatxitikiri iua. Iua anaakori Arexātri, Hopo pakini. Iusaaki Simāo apoka Xerosareē. Sotatoakori paniātari iua:

—Ia aamina ĩpiriāmitakari panikinari —itxana.

²² Anikarina Xesosi ixirataā, Kóokota inakoriātaā. Xoteo sākire “Kóokota.” Apanakini akiritari iua oxiratari uāka “Kiitāttxi,” inaāka akiritiko. Iuaā apokana. ²³ Isikamarina iāriā pinĩtxikata, miha inakorokata, Xesosi iātini ĩkapani, itsii imimarotakani ĩkapani, txamari !inirekaro iātiniro. ²⁴ Ininiā itokakitarina aamina ĩpiriāmitakari nopini. Eereka ikamarina sarauatxi, Xesosi măka apakapakani imarotinina ĩkapani. Ikara atoko apanakini anikari Xesosi măka. ²⁵ ĩkanōkapanika novi oara itokakitapeēka Xesosi aamina ĩpiriāmitakari nopini. ²⁶ Aaminaā auari iōkatakittina, apoĩtiko pirena, “Xoteoakori Auīte” itxa. ²⁷ Ninoa tokakitana ĩpi kiĩtiririni apaka aamina ĩpiriāmitakari nopini, ikikomoni āti, isanaremoni āti. ²⁸ Kitxakapirĩka Teoso sākire iōkatsopatakori txari:

Okapeëkako iua, kokaniri okiko atoko inapeëkako. Ininiã Xesosi okikosaaki ia Teoso sãkire iõkatsopatakori iaõka auapeka iuasaaki.

²⁹ Ninoa iuaã napakani misãkirepiretapikari Xesosi:

—Kiïkitei. Pite sãkire: “Nirikariko Teoso misãkiretiko aikoti. Ipi ãti pakini õti inakasaaki nikamari iuaïkana,” pitxama. ³⁰ Ikara atoko piposotiniã, piteka pimakatxakauako, ininiã pikatxaka aamina ïpiriãmitakariã —itxarina Xesosi inapetinina.

³¹ Sasetotxi auïteakori, kaiõkatsoparerini pakini napetari Xesosi:

—Iua makananitapekari apanakini. Txamari iuaka !iposotari imakananiniua —itxakakana.

³² —Ikatxakiniãrako ate auikari Teoso mereëkiti ininiãua. Ikatxakiniã, aãuikari Isaeo auakani auïte ininiãua —itxakakana.

Kiïtiririni iuakata tokakitakoni apaka misãkirepiretari.

Xesosi Ipinini Pirena

(Mateo 27.45-56; Arókasi 23.44-49; Xoão 19.28-30)

³³ Iuasaaki apaniãxiti ipiãka. Ikini itixitika piãka. Ipi ãti pakini oara ipiãka.

³⁴ Ipi ãti pakini oara napa atoko Xesosi akiripoakata:

—Erii, Erii, aremaa sapakatani —itxa.

Ia atatsopatakari sãkireë: “NiTeosone, niTeosone, kinirepa pitakana-pano?” itxa.

³⁵ Kãkiti iuaã auakani kenakotari akirinãtini.

—Hïkenakota. Akirinãtari Eríasi —itxana.

³⁶ Iuasaakipeka kiki ina katimariã. Iãkari mapoa atoko inakari iãriã katxioãrimoni, aãke mapotõkire taka itxari, sika itxari Xesosi iãtini ïkapani.

—Mitxipanikako. Maiãtapari. Atauako Eríasi makatxakatapaniri Xesosi —itxana.

³⁷ Xesosi itapararitika akiripoakata, eereka ipïpe itxa. ³⁸ Iuasaakipeka mãkatxi mata Teoso misãkiretiko aikoti ãki arõkakari tsorakita. Itano itso-rakita. Ixitiþeka apoka. Mitxi iua mãkatxi mata !auiritari kãkiti ïroiini Teosonani Auini Pakitaãtaã. ³⁹ Sotatoakori auïte aua aamina ïpiriãmitakari apisatoõ. Ikenakotari Xesosi akiritini. Itikari ipinini.

—Atãopitikara Teoso ãkiri itxaua ia kiki —itxa.

⁴⁰ Åtokaka sitoakoro ikira atoko atamanãtarina Xesosi, Maria Matarena, Saromeema, ãto Mariama, apanakini sitoakorokata. Xesosi, Txia-ako pakini inoro oa Maria. Iua Txiaako maneripanika inakari. ⁴¹ Xesosi Kariréia auakasaaki, ninoa sitoakoro moianatari iua. Imiparïkatarina. Xesosi ipïkasaakikanera apanakini sitoakoro kaiãopokoro aua iuaãtaã. Ninoa apoka Xerosareë Xesosikata.

Xesosi Ikatiko Pirena

(Mateo 27.57-61; Arókasi 23.50-56; Xoão 19.38-42)

⁴² Ikara õti, Xesosi ipinini õti, kãkiti parïkauatini õti, kãkiti tomatini õti apisapanika, iuasaaki kikatatikipeka. ⁴³ Iuasaaki Xosee inakori, Arimateia sitatxitikiri, sari Piratomoni. Iua Xosee Xoteo auïte apanakinikata. Ikinimane paxitari iua. Iua apaka iãtapari Teoso ikinimane auïte ininiua õti apokini. Itaparaxinireritika Piratomoni isa, amanaã itxari Xesosi ïto. ⁴⁴ Ininiã Pirato ãkixinireë:

—Atauako patimari Xesosi ipinini? —itxa.

Ininiã ipïkapiretari sotatoakori auïte. Iua apokasaaki Pirato pimaãri:

—Atauako Xesosi ipïþeka? —itxa.

⁴⁵ Ininiã iua:

—Ari, ipinapitiþeka —itxari.

Ininiã Pirato:

—Panikaikari iïto —itxari Xoseemoni.

⁴⁶ Iuasaaki Xosee amotari mākaxi mata erekari, arínio inakori. Eereka imaktxakari Xesosi ïto. Iapirikari iïto mākaxi mataã, anika itxari akauari irikomoni. Kai kisakakori āki ieretakari Xesosi ïto. Eereka kai mitapoari ikatika, tota itxari iriko. ⁴⁷ Ipi Maria itikanātari Xesosi ïto takikoãtaã, Maria Matarenama, Maria, Xesosi inakori inoroma pakini.

16

Xesosi Iuaïkana Auãki Inini

(*Mateo 28.1-8; Arókasi 24.1-12; Xoão 20.1-10*)

¹ Tomatiko õti xipoka atoko mapiñnikata, ipi ãto pakini sito amotaro kamariãro, Xesosi ïto ikamamaritinina ïkapani, Maria Matarenama, Saromeema, Maria Txiako inoroma pakini. ² Katimatinñkata, tomñkosaaki, ïkanõkapanika, atokatxi pokñkasaaki, ninoa sari akauarimoni. ³ Kimaporiã isikasaakina, isãkirauaãpotana:

—Kipa makatxakinua kai auïte iriko tore? —itxaãpotana.

Amaripokori iua kai. ⁴ Iuaã apokasaakina, atamatarina. Kai makatxakapeëkaika. ⁵ Ininiã ïroãna iriko āki. Atamatarina ãtokori topãkanãta ikikomoni. Imãka ïtanori, kasarori. Ininiã ninoa tikoka.

⁶ Ininiã iua:

—! Hñtikokape. Hñte nitanātari Xesosi Nasareekiri, aamina ïpiriãmitakari nopini tokakitakori. Õkitikapekaua iua. !Auaika uai. Hãtamata. Mitxi itakarina iïto uai. ⁷ Hñsipeka. Hñsãpiretari Petro, apanakini Xesosi moianariakori pakini: “Xesosi sapanikako hñte apisa Kariréiamoni. Iuaã hñte aõkitari iua, kotxi ipinaka apisapanika isãpiretapekari ikara hñtemoni,” —itxana ninoa.

⁸ Itimaritikana ninoa pokñka. Imitekana. Ikikinanakana, ipñkarena xika. ! Isãpiretarina apanakini, kotxi ipñkarauatana.

Xesosi Oerekaua Maria Matarenamoni

(*Mateo 28.9-10; Xoão 20.11-18*)

⁹ Xesosi õkitikasaakiua ipinaka atoko ïkanõkapanika semana potarikini õti, tomñkosaaki, oerekaua merepitipanika Maria Matarenamoni. Mitxipe Xesosi aõkitakasaakiro oa Maria, omñtikari maerekani matamatakoni setxi pakini oa ïtoã auakani. ¹⁰ Xesosi õkitikasaakiua, iua oaõkitaka atoko, osari merepanika Xesosi moianariakorimoni. Iuasaaki iteene imatinaniuatana. Itxiapanãtana. Osãpiretana ninoa:

¹¹ —Xesosi iuaïkana auãki itxapeka. Nota aõkitari iua —otxana.

Txamari ninoa kona auikari osãkire.

Xesosi Oerekaua Ipi Imoianariakorimoni

(*Arókasi 24.13-35*)

¹² Eereka iuaka oerekaua ipi imoianariakorimoni, kimaporiã isikasaakina aapokotxi mauakaniãtaã. Iuasaaki itoõ ipinipo itxa. ¹³ Eereka ninoa kanapiriã. Isãpiretana apanakini imoianariakori, txamari !auikarina isãkirena.

Xesosi Oerekaua Imoianariakorimoni

(*Mateo 28.16-20; Arókasi 24.36-49; Xoão 20.19-23*)

¹⁴ Eereka Xesosi oerekaua õsi imoianariakorimoni inipokotakasaakina. Xesosi õtãkikana:

—Kinirepa hñte !auikatari nota iuaïkana auãki ninini? Kinirepa !hñuikatari nota aõkitakani sãkire? !Kaiokakarekii —itxa.

¹⁵ Iposo atoko Xesosi txana:

—Ikini itixiti hñsako. Hñsãpiretariko Teoso iokanapirena erekari ikinimanemoni. ¹⁶ Teoso sãkire auiaãkari patxisatakori, iuarako sari Teoso

tixinemoni. Teoso sãkire mauikakati, Teoso misiritapikariko. ¹⁷ Teoso sikaposotiiretanako isãkire auiãkani, ininiã apanakini imarotari Teosokara sikari iposotiire ninoamoni. Ia atoko Teoso sikaposotiiretana. Omitikarina maerekani matamatakoni nota uãkaã. Isãkirauatana imimarotakinitina sãkiretxitiã. ¹⁸ Imaĩkiniãrina imini, !ipinana. Iãtiniãrina ikianari, !amianatana. !Ipinana. Itakauakotaua amianatakani nopini, ininiã amianatakani makananitaãka —itxa Xesosi sãkire.

Xesosi Anikaãka Teoso Tixinemoni
(*Arókasi 24.50-53; Átosi 1.6-11*)

¹⁹ Imoianariakori imisãkiretanapaka atoko, Xesosi anikaãka Teoso tixinemoni. Iuaã iua topãka Teoso kikomoni. ²⁰ Xesosi moianariakori eereka isipekana, Teoso sãkire ikini aapokotxiti auakani isãpiretinina ãkapani. Apiananiri moianatana. Apiananiri sikaposotiiretana ninoa, ininiã apanakini imarotari ninoa sãpiretakiti atão inini. Ameẽ.

ARÓKASI

Arókasi Iőkatsopata Teópiro Inakorimoni

¹ Nota Arókasi iőkatsopata pite Teópiromoni. Iteene nipaxitai. Kākiti ito iőkatsopatapekari ikinipoko Xesosi kamakiti Xoteoakori sauaki auakasaaki. ² Ninoa, nota pakini imarotari ikinipoko Xesosi kamakiti, kotxi Xesosi kamakiti atamatakani, isākire oerekakani, sāpiretapekaua ate. ³ Nota apaka apaiaōkapekari ikinipoko Xesosi sākire, ikamakiti pakini. Ininiā nota apokaerekatari ikinipoko Xesosi pirena niőkatsopatini pite Teópiromoni. Merepitipanika ikamakiti nisāpiretai. Ininiā eereka ikamakiti nisāpiretai. Ininiā eereka ikamakiti nisāpiretai, nitxaāpotako. ⁴ Koerekarerini oerekapekai Xesosi pirena, ininiā uatxa pimarotari ninoa oerekakiti atāo inini.

Xoão Kapatxisareri Iponaniini Sāpiretiko

⁵ Erotxi inakori Xoteoakori auīte inakasaakia Xotéia tōpa, iusaaki auanāta sasetotxi Sakaria inakori. Sakaria auīte, apanakini sasetotxiakori auīte apaka, Apia inakori. Sakaria tanoro ouāka Isapeo otxaua. Oīri, oātokiri, oātokiri iri imakinikana sasetotxi itxauana. Oātokiri kitxakapirīkari Moisesi itari Arāo inakori. Iua apaka sasetotxi itxaua. ⁶ Teoso nirekaākitinirina ikamana Sakaria, Isapeo pakini. Ninoa kamari ikinipoko iua paniātakiti, Apiananiri paniātakiti. Atāo inakarínoka ikamana. !Ikerokarina ikamakitina. ⁷ Txamari !keenena. Isapeo !oposotari kamixi onini. Iusaaki ikiomaneēpekana.

⁸ Āti ōti Sakaria, apanakini sasetotxiakorikata, parīkauanāta Teoso misākiretiko aikoti āki. Iusaaki ninoatene iuaā parīkauata. ⁹ Sasetotxiakori itotari sasetotxi imereinina Apiananiri misākiretiko aikoti ĩroini kamariāro arikini ĩkapani, ininiā iusaaki ninoa mereēri Sakaria. Ininiā iua ĩroā. ¹⁰ Sakaria aiko āki kamariāro arikanātakasaaki, mapara kākiti apotiitakaniua misākiretari Teoso.

¹¹ Iusaakipeka Teoso nitiri iaxitikiri tokiā Sakariamoni kamariāro arikikoātaā takote. ¹² Sakaria atamatakasaakiri, itikoākata, pīkarauata itxa. ¹³ Teoso nitiri misākiretari iua:

—Sakaria, kona pipīkarauatape. Teoso sikapitikaiko pamanaākiti. Ininiā pītanoro Isapeo keenepitikaroko. Pitakauākatariko pamarite Xoão. ¹⁴ Iua auakasaaki ikamapoxokonitaiko pite, itori kākiti apaka. ¹⁵ Apiananirimoni apiari itxauako iua Xoão. Kona Xoão iātapaniroko kapoāro. Erekarī Mata-matakoti auariko iua ākixinireē. Inoro irokota ākipanika auakasaaki, Erekarī Matamatakoti auako iua ākixinireē. ¹⁶ Iua Xoão anikanako itomaneri kākiti Isaeo auakani Teosomoni. Apiananirimoni iua anikana. Ininiā iuaīkana ninoa kanapiriā iTeosonemonina, isākire auikinina ĩkapani. ¹⁷ Xoão apokako Apiananiri apokini apisapanika. Erekarī Matamatakoti sikataparatarī Eríasi kitxakapirīka. Iuatxikana Erekarī Matamatakoti sikataparatarīko Xoão. Ikara atoko ininiā, iua oerekarīko irītxi iuaīkana amaritena itiretinina ĩkapani. Iua Xoão oerekarīko kākiti Teoso paniātakiti makamakani, imaerekanina itakanapinina, erekarinoka ikaminina ĩkapani. Paimatirenako ninoa iusaakiko. Iua Xoão oerekarīko kākiti iposope ininina Apiananiri apokini apisapanika —itxa Teoso nitiri Sakariamoni.

¹⁸ Ininiā Sakaria pimaāri:

—Kiãtokopa nitxa uatxa keenepeka ninini, kotxi nota, nĩtanoro apaka kiomaneẽpeka —itxa.

¹⁹ Teoso nitiri apakapapireta:

—Niuãka Kapirio. Nota auari Teosokata ipaniãtakiti nikamini ĩkapani. Teoso iokanatano pitemoni pite nimsãkiretini ĩkapani, ia erekari pirena niminapiretini ĩkapani. ²⁰ Txamari na pauikari nisãpiretakiti. Ia xika ! kasãkireikaiko, kotxi nisãpiretakiti atãopitika. Teoso sikaenetakiti apokapitikako. Apokasaaki, pimarotariko nisãkire atão ininiua. Iuasaakiikarako piposotari pisãkirauatini —itxa Teoso nitiri Sakariamoni.

²¹ Iuasaaki kãkiti mapara auakani iãtapanãtari Sakaria.

—Kiripa ikamanãta Sakaria aiko ãki? !Katimari —itxanãtana.

²² Ipokĩkasaaki !kasãkireikari. Ninoa kãkiti imarotari Teoso misãkiretiniri iua aiko ãki itaponeẽ, kotxi !kasãkireikari. Iuakoãnokara imisãkiretana ninoa.

²³ Mapaõti iparĩka xipoka atoko aapokomoni isipeka. ²⁴ Eereka Isapeo kamixipeka otxa. Onapari ipi ipi ãti pakini kasiriti oaãpoko. !Osari ãtiãtaã.

²⁵ —Apiananiri sikano namarite. Erekari ikaminano notamoni. Uatxa ! nipẽtautaika kãkiti apisatoõ. Keenepekano —otxa.

Kapirio Iokanataãka Mariamoni

²⁶ Isapeo seisi pakini kasiriti kamixi onakasaaki Teoso iokanatarini itiri iaxitikiri Kapirio Nasaree sitatxitimoni, Karirẽia tãpamoni. ²⁷ Iuaã iokanatarini iua ãtokoromoni Maria inakoromoni. Oa kona sirĩkapanika kikikata. Osãpiretapekari ãtokori Xosee inakori iuakata oĩtaniriuatini ĩkapani. Xosee atokiri kitxakapirĩka Xoteoakori auĩte Tavii inakori. ²⁸ Teoso nitiri apokasaaki oamoni, akiritaro Maria:

—Ereẽkai. Apiananiri pitekata aua. Iua mereẽi pite. Itoro sitoakoro ikini itixiti aua, iuaritika pitenanirako Teoso sika iteene erekari —itxaro oa.

²⁹ Maria pĩkarauata Teoso nitiri sãkire okenakotakasaaki.

—Kinirepa ikara atoko itxa sãkireta? —otxa oãkixinireẽ.

³⁰ Teoso nitiri txaro:

—!Pipĩkarauatape, Maria. Teoso apokaerekatai pite. ³¹ Pimixiuatako, keene pitxako. Pitakauãkatariko pamarite Xesosi. ³² Iua Apiatakari itxauako. Apiananiri ãkiri akiritaãkako. Teoso Apiananiri kamariko iua auĩtetxi ininiãua. Kitxakapirĩka Xoteoakori auĩte Taviini. Taviini auĩtetxi ininiua atokokana, Teoso txĩkitakariko Xesosi Xoteoakori auĩte ininiua. ³³ ãtipirika Xoteoakori auĩte, Xakooni apiko mekaniriakori auĩte, itxauako. Iua auĩtetxi ininiua ! ixipoka —itxaro oa.

³⁴ Ininiã oa:

—Kiãtokopa nitxa kikikata masirĩkatokano, keenepe ninini? —otxa.

³⁵ Teoso nitiri apakapapiretaro:

—Erekari Matamatakoti apokako pãkixinireẽ. Apiananiri posotiire ãkitaiko pite, ininiã amarini auakari Teoso ãkiri akiritaãkako. ³⁶ Pinoromane Isapeo kiomãtxipe, iuaritika kamixiro oa. Kãkiti sãkirema: “!Oposotaikari kamixi onini” iuaritika seisi pakini kasiritipe kamixi onini. ³⁷ Kotxi Teoso posotari ikinipoko ikamini —itxaro oa.

³⁸ —Nikamapitkariko Apiananiri nirekaãkiti. Pisãpiretakiti iaõka ninirekapitika —otxa Maria.

Iuasaakipeka Teoso nitiri sipeka.

Maria Isapeomoni Motikini

³⁹ Mapaõti napa atoko Maria katimariã sari oxiratarimoni, Xotẽia tãpamoni. Iuaã osari sitatximoni. ⁴⁰ Oĩroã Sakaria aapoko. Oãkiritaro Isapeo:

—Ereẽkai —otxa.

⁴¹ Isapeo kenakotakasaakiri Maria akiritiniro oa, iusaaki amarini otikakoãkiri oãkika. Iusaakipeka Erekaru Matamatakoti itapararitika apoka Isapeo ãkixinireẽ. ⁴² Iusaaki otapararitika otxaro Maria:

—Kaiãopokoro sito itixi auakani, iuaritika pitenokara Teoso sika apia erekari. Apaka Teoso sikariko erekari pamaritemoni. ⁴³ Erekaru Teoso kaminano nota, kotxi niauĩte inoro motikaẽtano. Kinirepa ia erekari Teoso kaminano, kotxi nota minakato nitxaua. ⁴⁴ Nikenakotakasaakiri “Ereẽkai” pininino, namarite nitikakoãkiri oãkika, ipoxokoniuatiniã. ⁴⁵ Teoso sikari erekari pitemoni, kotxi pite auikari isãkire. Pite auikari isikaenetakiti atão isikinii —otxa Isapeo Mariamoni.

Maria Xikaretakiti

⁴⁶ Maria txari:

“Erekapitikari Apiananiri notamonikari.

⁴⁷ Nipoxokoniua, kotxi Teoso nimaerekani makatxaãkari itxaua.

⁴⁸ Nipoxokoniua, kotxi ixinikano nota. Initero poiãoro nitxaua. Ìkorakanani eereka auakani kãkiti txanoko: ‘Teoso kamapoxokoni-taro, erekari isikiniro,’ txanoko nota.

⁴⁹ Nipoxokoniua, kotxi Teoso Apiananiri kaminano posotiiiretxi. Maerekati !auari iuamoni.

⁵⁰ Iua amonĩkari kãkiti iua paxitakani, kitxakapirĩkarini, ìkorakanani auakani, eereka auakani apaka iamoniãka.

⁵¹ Pataparari iua, ininiã ikamari posotiiiretxi. Teoso txĩkitakana kãkiti iuikakaniua minakani ininiãuana, kotxi ãkixinireẽ iuikauana.

⁵² Teoso makatxakapekari auĩtetxi pataparari inakaniua. Eereka auĩtetxi ! itxaikauana ninoa. Kãkiti poiãorini inakaniua Teoso kamari auĩtetxi ininiãuana.

⁵³ Isikakienatari natxitakani. Iokanataru katxineiroteri sini. Kona xatiki isikari iuamoni.

⁵⁴ Imoianatapekana Xoteoakori, iua ìkapani parĩkauatakani. !Imaxinĩkaretari iamoniãkinina ninoa.

⁵⁵ Kitxakapirĩka Teoso xinikari Apraãoni iamoniãkini. Apaka iua tikini auakani ãtipirika iamoniãka, kotxi: ‘Nimoianataiko hĩte,’ itxa aniri-manemoni kitxakapirĩkarinimoni,”

otxa Maria.

⁵⁶ Okaikota ipi, ãti pakini kasiriti Isapeokata. Eereka oaãpokomoni kanapiriã otxa Maria.

Xoão Kapatxisareri Iponaniini

⁵⁷ Amarini auini õti apopeka. Isapeo auãkitakari amarini kiki. ⁵⁸ Oaãpoko takote auakani, onirimane pakini kenakotari erekari Teoso kaminaro oa, ininiã ninoa, Isapeo pakini poxokopeka itxana ninoa.

⁵⁹ Oito õtisaaki, onirimane motika oamoni, Teoso takaõtxikare amarini-moni itakinina ìkapani. Inirekarina iuãka Sakaria itakauãkatinirina, kotxi iri uãkatxikana ninoa nireka itakauãkatinirina. ⁶⁰ Txamari inoro:

—Kona Sakariani iuãka. Xoãorako akiritaãkako —otxa.

⁶¹ Ininiã ninoa txaro:

—Pimirimane ãtika kona Xoão txa uãkataua.

⁶² Ninoa pimaãri amarini iri Sakaria iuakoãna amarini uãka inirekaãkiti.

⁶³ Ininiã Sakaria amanaãri iõkatsopatiko. Iõkatari: “Imi uãka Xoão.” Ininiã ikinimane tsoriãkaãta. ⁶⁴ Iusaakipeka Teoso sikaposotiiiretari isãkirauatini:

—Peerekari Teoso —itxa Sakaria.

⁶⁵ Kãkiti iua aapoko takote auakani pĩkarauata. Teoso posotiiire ipĩkana. Ikara inakariene Sakaria, Xoão pakini pirena iaripireta oxiratari Xotẽia tõpa,

ininiã kãkiti iuaãtaã sãpirenauanãta ikara pirena. ⁶⁶ Kãkiti ikara inakariene kenakotakani tsorĩkaãta:

—Kanatokopa inakaripa itxatapaniua ia amarini? —itxana.

Ikinimane imarotari Apiananiri nĩkatiniri iua amarini.

Sakaria Xikaretakiti

⁶⁷ Iuasaaki Erekarĩ Matamatakoti sikaposotiiretari Xoão iri Sakaria, ininiã Sakaria sãpiretari Teoso sãkire:

⁶⁸ “Peerekari Apiananiri aTeosone, ikinimane Xoteoakori Teosone, kotxi iua apoka inakitiakorimoni imakatzakinina ĩkapani, imapinakanina ĩkapani.

⁶⁹ Teoso iokanatarĩ kãkiti maerekani makatzakakari kaposotiireri atemoni. Teoso nitiri Taviini mekanirira iua.

⁷⁰ Kitxakapirĩka Teoso sãkire sãpiretakani erekarini sãpiretari ikara Teoso sãkire.

⁷¹ Teoso txari: ‘Nimakatzakaiko hĩte himokaiakari mokakanii tĩkane, homanatakini mokakanii tĩkane.’

⁷² Isãpiretari aãtokiriakorini kitxakapirĩkarini: ‘Niamonĩkai. Nikamariko nikamaenetakiti hĩte ĩkapani,’ itxa ninoamoni. Ikara Teoso kamaenetakiti erekarĩ.

⁷³ Kitxakapirĩka Teoso txari aãtokiri Apraãoni: ‘Kona nimaxinĩkaretari nisikaenetakiti.

⁷⁴ Nimakatzakapitikaiko hĩte himokaiakari mokakanii tĩkane, ininiã hĩparĩkauata nota ĩkapani mapĩkaretika.

⁷⁵ Ininiã hĩte auini erekarĩ. Kona hĩkamari maerekati hãuapanika hinakasaaki,’ Teoso txari Apraãoni.

⁷⁶ Pitepekana namarite Xoão, Teoso sãkire sãpiretakari pitxauako. Teoso Apiananiri iaxitikiri sãkire sãpiretakari pitxauako. Pite sari Apiananiri apisa. Ikinika pimaiamatako iua apokini apisa, ikinika iposope inini ĩkapani.

⁷⁷ Pisãpiretariko kãkiti Teoso nakitiakori, Teoso makatzakiniri maerekanitxi kãkiti kamakiti. Ininiã ninoa imarotariko ikara.

⁷⁸ Katiraõkiri aTeosone. Kaamonĩkareri iua. Ininiã iua tixinekiri apokako atemoni. Atokatxi pokĩkini atoko itxako. Iuasaaki ipiã !auaika, kotxi iua makatzakari amaerekani.

⁷⁹ Ininiã iua iopinikari kãkiti xinire, ipinini pĩkakani xinire. Ipiaã auakani atoko ninoa. Ininiã iua iopinikari axinire Teoso kimapore aimarotini ĩkapani, aãuini ereka inini ĩkapani.”

Itxa Sakaria xikare.

⁸⁰ Iua amarini aneẽ. Teoso sãkire iaõka ikamapika. Teoso sãkire Xoteoakorimoni imasãpiretakani apisapanika ãparaã makipakaniãtaã aua Xoão.

2

Xesosi Iponaniini Pirena

(Mateo 1.1-25)

¹ Iuasaaki Homanoakori auĩte Sesa Akósito inakori. Iua paniãtana iniritiakori iaõtiniri ikininape kãkiti iua auĩtetxi ininiãtaãua tõpa auakani, ikini aapokotxitikini uãka imakatzakini ĩkapani. ² Mitxi Sesa Akósito !ikapanikari kãkiti iaõtiko. Iuasaaki Síria tixini auakani auĩte Sirénio inakori. ³ Iuasaaki ikinimane sari sitatximoni iponaniiniãtaãna. Iuaã isikarina iuãkana.

⁴ Ininiã Xosee apaka sari iuãka isikini ĩkapani. Ininiã ipotorika Nasaree sitatxiti Kariréia tõpa. Xotéia tõpamoni isa, Pereẽ sitatxitimoni. Iuaã isa, kotxi iuaã auĩtetxi Taviini kitxakapirĩka aua. Taviini nirimane itxaua Xosee.

⁵ Isa Mariakata. Ītanoro tīkane oa. Iuasaaki !itakapanikaro. Kamixipeka otxa iuasaaki. ⁶ Pereē apoka itxana. Iuaā auakasaakina, aua itxa amarini. ⁷ Oāuākitakari merepitipanika oimi kiki. Ininiā mākatxi mataā oiapirikari, pirātxi nipokotini tiitxitiā taka otxari amarini, kotxi kākiti imakanakiniātaā imakinika xāpokapeka, ininiā ninoa auanāta pirātxi auiniātaā.

Soti Auīte Piratakani Pirena

⁸ Iuaātaā Pereē sitatxiti mapotōkire ĩkanōka kikiakori soti auīte piratakani nīkanātari ipiraakorina. ⁹ Iuasaaki katimaritika Apiananiri nitiri iaxitikiri tokiā ninoamoni. Iuasaaki Apiananiri iotximere iopinikari ninoa auiniātaā, ininiā imarotarina Teoso apokini iuaātaā. Ininiā iteene ipīkarauatana ninoa. ¹⁰ Ininiā Teoso nitiri txana ninoa:

—! Hīpīkarauatape. Nota minapiretari erekari pirena ikinimane kākiti enenīkini ĩkapani, ¹¹ kotxi ia ōti kākiti maerekani makatxaākari iponaniāpeka Taviini auini sitatxitiā. Iua Teoso mereēkiti. Apiananiri iua. ¹² Himarotariko nisākire atāo inini, kotxi hāpokariko ia amarini mākatxi mataā iapirikiko pirātxi nikini tiitxitiā —Teoso nitiri txana ninoa.

¹³ Iuasaakipeka itomaneri Teoso nitiriakori iaxitikini tokiā iuaātaā. Ninoa xikarauata Teoso ĩkapani. ¹⁴ Ixikaretarina:

—Peerekari Teoso, iaxiti apiko nopinixiti auakari. Iua kamaerekaxiniretari kākiti iua apokaerekatakini —itxana ixikarena.

¹⁵ Teoso nitiriakori kanapiriā itxana Teoso tixinemoni. Iuasaaki ninoa pirātxi nīkatakani misākiretakakaua:

—Masa Pereēmoni. Maātamatarari ikara Apiananiri sāpiretakiti —itxana.

¹⁶ Ininiā katimaritika isana Pereēmoni. Iuaā apokasaakina, initarina amarini. Apokana Xosee, Maria pakini. Ininiā atamatarina amarini pirātxi nikini tiitxitiā. ¹⁷ Ikara atamataākana atoko, isāpirenātarina Teoso nitiri sāpiretakiti amarini pirena ikinimanemoni. ¹⁸ Kākiti kenakotakasaakiri soti auīte nīkatakani sāpiretakiti, ikinimane tsorīkaāta iuasaaki. ¹⁹ Maria kenakotakasaakiri soti auīte nīkatakani sāpiretakiti, oa ākixinireē onīkatari ikara ene. ! Omaxinīkaretari ninoa sāpiretakiti. Oxinikapikari. ²⁰ Eereka pirātxi nīkatakani kanapiriā ipiraakori auinimoni. Imisākiretakakana:

—Peerekari Teoso. Apiananiri iua, kotxi erekapitikari aītikakiti. Erekapitikari initiri iaxitikiri sāpiretakiti. Isāpiretakiti atāopitika, kotxi aātamatarari isāpiretakiti iaōka —itxanātana ninoa soti auīte nīkatakani.

Xesosi Takauākatiko

²¹ Xesosi oito ōti auakasaaki, inirimane kamari Teoso takaōtxikare iūtoā. Iuasaaki inirimane takauākatari Xesosi, kotxi iua iaōka Teoso nitiri iaxitikiri sāpiretapedakaro Maria oa kamixi oinini apisapanika.

Xesosi Anikiko Teoso Misākiretiko Aikotimoni

²² Moisesini ketotiniri manapi Xosee, Maria pakini kamari Moisesini paniātakiti iaōka amarini auakasaaki, Xosee, Maria pakini maerekani Teoso makatxakini ĩkapani. Ikara xipoka atoko anikarina Xesosi Xerosareē sitatxitimoni Apiananirimoni isikinirina ĩkapani, ²³ kotxi Apiananiri paniātakiti iōkatsopatakori txari:

Merepitipanika iponaniākari sikaākako Teosomoni, kotxi Teoso nakiti iua.

²⁴ Apaka Apiananiri paniātakiti iōkatsopatakori txari:

Amarini iponaniākasaaki, ipi kamoā pisika Teosomoni. Iminakaniā, ipi kamoā ākiri pisika Teosomoni,

itxa Teoso. Ininiā Xosee, Maria pakini sari Xerosareē kamoā isikinina ĩkapani.

²⁵ Iuasaaki kiki Simiāo inakori aua Xerosareē. Iua erekari kamakari. Ikinipoko Teoso paniātakiti ikama. Erekari Matamatakoti auari ākixinireē.

Ākixinireē iātapanātapikari Teoso Mereēkiti apokini, kotxi Isaeo auakani maerekani makatxaākari itxaua. ²⁶ Erekarī Matamatakoti sāpiretapekari iua: “Pipinini apisa paōkitapanikariko Apiananiri Mereēkiti,” itxari Simiāo. ²⁷ Erekarī Matamatakoti sikanireōtari Simiāo aiko Teoso misākiretiko aikoti ĩroini. Iuasaaki Xosee, Maria pakini ĩroā iuaātaā, Apiananirimoni Xesosi isikinina ĩkapani, Teoso paniātakiti ikaminina ĩkapani. ²⁸ Iuasaakipeka Simiāo apakapari Xesosi:

—Peerekari Teoso. ²⁹ Niauīte Apiananiri, uatxa apokapeka ia amarini pisikaenetakiti. Nota pite ĩkapani parĩkauatarino. Uatxa niposotari nipinini erekaxinirepeka ninini, ³⁰ kotxi nota atamatari ia amarini piokanatakiti atemoni, amaerekani imaktxakini ĩkapani, amapinakani ĩkapani. ³¹ Pite iokanatapekari ia ĩkorapokoriti ikini itixiti auakani maerekani imaktxakini ĩkapani. ³² Ia amarini tirikapi atoko, kotxi iopinikariko pikimapore, pisākire Xoteo minakaniuā imarotini ĩkapani. Ia amarini tirikapi apiatakari atoko Xoteoakorimoni pinakitiakorimoni, kotxi oerekai pite ninoamoni —itxa Simiāo sākire Teosomoni.

³³ Xosee, Xesosi inoro apaka tsorĩkaānāta ikara Simiāo sākire ikenakotakasaakina. ³⁴ Simiāo amanaāri Teoso ikinipoko erekari ninoamoni isikini ĩkapani. Eereka imisākiretaro Maria, Xesosi inoro:

—Teoso mereēri ia amarini Xoteoakorimoni iokanatiniri ĩkapani. Ia apakapakari Teoso apakapa apaka. Ia mapakapakati Teoso !apakapari. Imisiri-taākako. Ia amarini oerekari Teoso kākitemoni, txamari itori kākiti !auikari isākire. ³⁵ Ikara atoko ininiā, itori kākiti xiniākiti kipatakori ākixinireē, imarotaākako. Pitepekana pite matinaniuatako. Pākipa iouata iorotini tsii atoko itxako —itxa Simiāo sākire Mariamoni.

³⁶ Iuasaaki oāua sito Teoso sākire sāpiretakaro Ana inakoro. Panoeo ākero oa. Oātokiri kixakapirĩka Asee inakori. Iuasaaki kiomātxipekaro oa. Oāua setxi ano ōtanirikata. Eereka ipĩpe. ³⁷ !Oĭtaniriuataika. Oitēta koatrokananipeka oāuini. Oa auapika Teoso misākiretiko aikoti āki. Iuaā ikini ōti, ikini ĩkanōkati pakini omisākiretapikari Teoso. Itokata otakanapari onipokotini Teoso omisākiretini ĩkapani. ³⁸ Xosee, Maria pakini Simiāo misākiretaka atoko Ana apoka. Omisākiretari Teoso:

—Erekapitikari ia amarini pimereēkiti kākiti iātapakiti piokanatinini atemoni —otxa.

Eereka osāpirenauata Xesosi apokini pirena Xerosareē auakanimoni kākiti maerekani makatxaākari iātapakanimoni.

Nasaree Sitatxitimoni Ikanapiriinina

³⁹ Xosee, Maria pakini Apiananiri paniātakiti iōkatsopatakori imakinika ikamaākana atoko, kanapiriā itxana Kariréia tōpamoni. Iuaā isana aapokomonina Nasaree sitatxitiā. ⁴⁰ Iua amarini aneē. Itapara auaāpotari. Kimaroreri itxaua. Teoso iteene tiretari iua Xesosi.

Xesosi Misākirenātari Koerekarerini

⁴¹ Ikinikanani Xosee, Maria pakini sari Páskoa kiiniritimoni Xerosareē sitatxitimoni. ⁴² Xesosi tosi anopeka inakasaaki, isana Xerosareē auakari kiiniritimoni mitxi isanātinina atokokana. ⁴³ Kiiniri xipoka atoko Xosee, Maria pakini potorika aapokomonina isinina ĩkapani. Iuasaaki Xesosi kaikota Xerosareē. Txamari ninoa !imarotari ikaikotini. ⁴⁴ Ninoa uākatamari apanakini inirimanekata isini. Ikara atoko ininiā, ikimaporitana āti ōtipeka. Mapiānikata ipixinipokoriti initamarina inirimanemoni, aōkimaneremoni. ! Apokarina. ⁴⁵ Ininiā ikanapiriāna Xerosareēmoni iuaākana initinirina ĩkapani. ⁴⁶ Ipi, āti pakini ōti initapiūmarina. !Apokarina Xesosi. Eereka apokarina Teoso misākiretiko aikoti āki. Moisesi sākire oerekakanikata iitopākanāta.

Xesosi kenakonātari ninoa sākire. Apaka ipimarauata. ⁴⁷ Ninoa Xesosi sākire kenakotakani tsorīkaānāta, kotxi paimatireri iua. ⁴⁸ Xosee, Maria pakini apokasaakiri iua, kona imarotarina Xesosi parīka. Inoro txari:

—Namarite, kinirepa pimisiritaua ate? Piri, nota pakini pikamamaxirex-iniretaua ate. Anitapiimai. Kona aāpokai —otxari Xesosi.

⁴⁹ Ininiā Xesosi:

—Kinirepa hinitanātano? Kona himarotatari uai niri aapoko ninirekari nauini, ipaniātakiti nikamini īkapani —itxa.

⁵⁰ Txamari ninoa !imarotari Xesosi sākire.

⁵¹ Ikara atoko ininiā, Xesosi kanapiriā ninoakata Nasaree sitatxitimoni. Ikinika Xosee, Maria pakini sākire ikīpita. Inoro xinikapikari Xesosi sākire oākixinireē. Opotxitari oxinikiniri Xesosi sākire. ⁵² Xesosi aneē. Imatire apaka aneē. Teoso apokaerekatari Xesosi. Kākiti apaka apokaerekatari Xesosi.

3

Xoão Kapatxisareri Sāpiretakiti

(Mateo 3.1-12; Marko 1.1-8; Xoão 1.19-28)

¹ Homa sitatxitiā Homanoakori auīte Txipério inakori iua. Kīsi anokananipeka iua auītetxi ininiua iuasaaki. Iuasaaki Xotéia tōpa auakani auīte Pōsio Pirato inakori. Kariréia tōpa auakani auīte Erotxi inakori. Erotxi itari Piripi inakori. Itoreia tixini auakani auīte, Takonitxi tixini auakani auīte apaka itxaua Piripi. Iuasaaki Apireni auakani auīte Arisánia inakori. ² Iuasaaki Anasi inakori, Kaipasi inakori pakini sasetotxi auīteakori apiatakani itxauana ninoa. Iuasaaki Teoso sāpiretari isākire Xoãomoni Sakaria ākirimoni, āparaā makipakaniātaā auakasaaki. ³ Ininiā Xoão sari ikininape kākitemoni, uini Xotāo takote auakanimoni. Isāpiretari Teoso sākire:

—Hītakanapariko himaerekani. Eereka patxisata hinaākako. Ikara atoko hininiā, Teoso makatxakinii himaerekani —itxanāta Xoão ikininape kākitemoni.

⁴ Kitxakapiriā Teoso sākire sāpiretakari Isaía inakori iōkatsopatari: Auako kiki āparaā makipakaniātaā. Isāpirenauatako. Itxariko: “Hōeretariko kimapori Apiananiri apokini apisapanika. Itīkaāpo erekari hīkamako iua napini īkapani.

⁵ Kipatxiā ixāpokakaākako ikini isauana. Ixirata miriī oerekataākako. Kimapori ikitokare oerekataākako. Kimapori pakota totaākako.

⁶ Ikinimane kākiti itixi auakani imarotariko Teoso makatxakiniri kākiti maerekani imapinakani īkapani,” itxanāta.

Ikara atoko itxa Isaía iōkatsopatakiti Xoão pirena. Kimapori kākiti oerekatini atokokana, auītetxi apokini apisa, iua atokokana Xoão nirekari kākiti iposope inini Apiananiri apokini apisa, imaerekanina itakanapinina īkapani.

⁷ Itomaneri kākiti sari Xoãomoni ipatxisatikona īkapani. Ininiā Xoão:

—Imini katsiiri anaakorirai hīte. Teoso misiritapitikai himaerekani xika. Himitekini !auari. Hinirekari hīpatxisatiko, txamari !hinirekari hītakanapiniri himaerekani. ⁸ Hinirekiniāri himaerekani hītakanapini, ininiā hīkamariko erekari. Ikara atoko ininiā, hōerekari Teoso atāo hītakanapiniri himaerekani. Hākixiniremoni !hīxinikapiri: “Teoso apakapapitikauako ate, kotxi ate atokirini Apraāoni txaua,” !hītxapeko. Ari, nota sāpiretai hīte, Teoso nirekiniāri, iposotari ia kai soroā Apraāoni mekaniriakori ikamini. Kona Apraāoni posotari anikinii Teosomoni. ⁹ Aamina maereka iriti atoko hītxa. Teoso iposopeka hīte ixipokini. Kākiti auari ikitaita kauanari aamina maereka iriti itokini īkapani. Ikinika aamina maereka iriti tokaākako. Xamīnā oka inaākanako. Teoso kamakiti iua atokokana itxa. Ininiā Teoso kitaite kauanapeka, aamina kotsa

sauakiko tĩkane. Iua atokokana ininiã, Teoso aiamatapeka hĩte ixipokini ĩkapani —itxa Xoão ninoamoni.

¹⁰ —Ikara atoko ininiã, kipa akama Teoso mamisiritakaniua ĩkapani? — itxarina.

¹¹ Ininiã Xoão apakapapireta:

—Pimãka kauanata ipi auiniã, ãti pisika mãkatxi kauanata mauakinitimoni. Nipokori auiniã, pisikari nipokori mauakinitimoni —itxa Xoão sãkire.

¹² Kikiãkini, txineiro apakapakani Homano auĩte nitiriakori, apoka apaka ipatxisatikona ĩkapani.

—Koerekareri, atepekana, kipa ate kama Teoso mamisiritakaniua ĩkapani? —itxarina.

¹³ Ininiã Xoão:

—Kãkiti txineirote himaktxakakito, Homano auĩte nireẽkito iaõka himaktxakako. Apikomoni !himaktxakapero —itxana.

¹⁴ ãtikaka sotatoakori apaka pimaãri:

—Atepekana, kipa ate kama amaerekani atakanapini ĩkapani?

Ininiã Xoão:

—!Himaĩkapiri kãkiti, itxineirote himixirikini ĩkapani. Kona ãti maxikatĩka ! hãpoĩtape. Hĩpoxokoniuatako txineiro hãpakapakitoã hĩparĩka ĩki. !Hinarekapero apikomoni —itxa sotatoakorimoni.

¹⁵ Iuasaaki kãkiti iãtapanãtari Teoso mereẽkiti apokini. Ininiã Xoão sãpiretakiti ikenakotakasaakina, ãkixinireẽna ixinikarina:

—Xoãokani Teoso mereẽkiti txataua atxiĩti? —itxanãtana ixinikanãtakitina.

¹⁶ Ininiã Xoão:

—ãparaaãnokara nipatxisatai hĩte. Nota tikini apoãkari patxisataiko hĩte Erekareri Matamatakotiã, xaminaã pakini. Apiatakari itxaua iua. !Apakata iua takote napokini ikiti mata nimaktxakini ĩkapani, kotxi iua apiata. Nota poiãoka. Imaktxakari himaerekani, itxiko metao ãki auakari arikini atoko.

¹⁷ Katarareri ãpokari ahoisi otãta imaktxakini ĩkapani. Otãta arikaãka. Oki nĩkataãka ikiena nĩkatikoãtaã. Iua atokokana Teoso nĩkatariko kãkiti erekarini. Maerekati kamakani arikaãkako xamina maxipoãkatĩã.

¹⁸ Ikara atokora itxa Xoão sãpirena õtãkikinina kãkiti. Isãpiretari erekareri pirena Teoso pirena kãkitimoni. ¹⁹ ãti õti Xoão pinitari Erotxi, Karirėia auakani auĩte:

—Pitakiniãro pitari Piripi ĩtanoro Erotxia inakoro, maerekati pikama. Apaka apikomoni maerekati pikamapitipo —itxa Xoão.

²⁰ Ininiã iuasaaki iuaĩkana Erotxi kamari maerekati, kotxi itakari Xoão kateia ãki isãkire imapokaerekatakani xika.

*Xesosi Patxisatiko Pirena
(Mateo 3.13-17; Marko 1.9-11)*

²¹ Xoão Erotxi maĩkini apisapanika ikinimane kãkiti ipatxisatakasaaki, Xesosi apaka patxisataãka. Iuasaaki Xesosi sãkirauatakasaaki Teosokata, iaxiti takaka. ²² Erekareri Matamatakoti katxaka Xesosi nopini. Kamoã katxakini atoko itxa ikatxakini. Iuasaaki ikenakotaãka iaxitikiri sãkire:

—Pite namarite, nitiretakiti, napokaerekatai, kotxi ninirekakiti pikama — itxa.

*Xesosi Nirimaneakori Iua Apisapanika Auakani
(Mateo 1.1-17)*

²³ Iuasaaki Xesosi potorika iparĩkauatini Teoso ĩkapani. Trĩta anokananipeka itxaua iuasaaki Xesosi. Kãkiti uãkatari iua Xosee ãkiri ininiãua.

Xosee iri Erii.

²⁴ Erii iri Matatxi.

Matatxi iri Arevii.

Arevii iri Meokii.
 Meokii iri Xanai.
 Xanai iri Xosee.
²⁵ Xosee iri Matatxia.
 Matatxia iri Amosi.
 Amosi iri Naoõ.
 Naoõ iri Esirii.
 Esirii iri Nakai.
²⁶ Nakai iri Maatxi.
 Maatxi iri Matatxia.
 Matatxia iri Semei.
 Semei iri Xosee.
 Xosee iri Xota.
²⁷ Xota iri Xoanaã.
 Xoanaã iri Hesa.
 Hesa iri Soropapeo.
 Soropapeo iri Saratxieo.
 Saratxieo iri Nerii.
²⁸ Nerii iri Meokii.
 Meokii iri Atxii.
 Atxii iri Kosaã.
 Kosaã iri Eomataã.
 Eomataã iri Eri.
²⁹ Eri iri Xosoe.
 Xosoe iri Eriesa.
 Eriesa iri Xoriĩ.
 Xoriĩ iri Matatxi.
 Matatxi iri Arevii.
³⁰ Arevii iri Simião.
 Simião iri Xotaa.
 Xotaa iri Xosee.
 Xosee iri Xonaã.
 Xonaã iri Eriakiĩ.
³¹ Eriakiĩ iri Mereaa.
 Mereaa iri Mena.
 Mena iri Matata.
 Matata iri Nataã.
 Nataã iri Tavii.
³² Tavii iri Xesee.
 Xesee iri Opetxi.
 Opetxi iri Póasi.
 Póasi iri Sáomõ.
 Sáomõ iri Nasoõ.
³³ Nasoõ iri Aminatapi.
 Aminatapi iri Átximĩ.
 Átximĩ iri Anii.
 Anii iri Ésirõ.
 Ésirõ iri Péresi.
 Péresi iri Xotaa.
³⁴ Xotaa iri Xakoo.
 Xakoo iri Isaki.
 Isaki iri Apraão.
 Apraão iri Tera.
 Tera iri Nakoo.
³⁵ Nakoo iri Seroki.
 Seroki iri Hakao.
 Hakao iri Pareki.
 Pareki iri Epi.
 Epi iri Sara.

³⁶ Sara iri Kainaã.
 Kainaã iri Apaxatxi.
 Apaxatxi iri Seĩ.
 Seĩ iri Noee.
 Noee iri Arameki.
³⁷ Arameki iri Metosareẽ.
 Metosareẽ iri Enoki.
 Enoki iri Xaretxi.
 Xaretxi iri Marereo.
 Marereo iri Kainaã.
³⁸ Kainaã iri Enosi.
 Enosi iri Setxi.
 Setxi iri Adão.
 Adão iri Teoso. Imapotõkirepe.

4

Satanasi Nirekari Xesosi Kaminiri Maerekati (Mateo 4.1-11; Marko 1.12-13)

¹ Xesosi ipatxisatiko atoko, Erekarı Matamatakoti iteene sikaposotiiretari iua. Erekarı Matamatakoti txĩkitakari Xesosi uini Xotão itakanapini, ãparaã makipakaniãtaã isini ĩkapani. ² Iuaã koarẽta õti auakasaaki, Satanasi atamakaerekatari Xesosi. Koarẽta õti manipokotakatinoka itxa Xesosi. Ininiã natxinoka itxa Xesosi.

³ Ininiã Satanasi txari:
—Pite Teoso ãkiri pitxaua, ininiã ia kai soro komiri pitxĩkitaka —itxari Xesosi.

⁴ Ininiã Xesosi apakapapiretari:
—Kona, kotxi Teoso sãkire iõkatsopatakori txari:
Kona komirinani txĩkitakari kãkiti ãtipirika auini tĩkane. İkinika Teoso sãkirera txĩkitakari kãkiti ãtipirika auini tĩkane.

⁵ Ininiã iusaaki Satanasi anikari Xesosi ixirata nopinixiti. Iuaã pakoteri oerekiniri ikinimane tixine. ⁶ Ininiã Satanasi:
—Nota posotari nisikini ikinimane auĩtetxiakori posotiire. İkinipoko ninoa txineirote apaka niposotari nisikini. Merepitipanika notamoni isikaãka ia posotiiretxi, ininiã nota sikari ninirekaãkitimoni. ⁷ İkara atoko ininiã, piteosonetiniãno, ia posotiiretxi nisikai pite —Satanasi txari Xesosi.

⁸ Ininiã Xesosi:
—Konapitini. Pisipeka Satanasi. Teoso sãkire iõkatsopatakori txari:
Apiananiri piTeosone. İuanokara piteosoneta. İua ĩkapaninokara pi-parĩkauatako.

⁹ Eereka Satanasi anikari Xesosi Xerosareẽmoni, aiko Teoso misãkiretiko nopinixiti. İtanoxiti paĩtanori. Pamonõkoniri. İuaã itxari:

—Teoso ãkiri pininiãua, pokaua xiti. Ininiã ikinipoko kãkiti imarotariko Teoso ãkiri pininiãua, ¹⁰ kotxi Teoso sãkire iõkatsopatakori txari:
Teoso iokanatanako initiriakori iaxitikini pite inĩkatinina tĩkane.

¹¹ Ninoa maĩkai pimapinakani tĩkane, ininiã pikarouatini !auari. Kona kai soro karotari pikiti,
itxa Teoso sãkire —Satanasi txari Xesosi.

¹² Ininiã Xesosi:
—Teoso sãkire iõkatsopatakori apaka txari:
Kona patamakaerekatapiri Apiananiri piTeosone,
—itxari.

¹³ İusaakipeka Satanasi atamakaerekatiniri Xesosi xipope. Ininiã itakanapari Xesosi ãti õti iuaĩkana ikanapiriini iuamoni ĩkapani.

Xesosi Mipotorikari Iparĩka Kariréia Tõpa
(Mateo 4.12-17; Marko 1.14-15)

¹⁴ Ikara inaãka atoko Xesosi kanapiriã Kariréia tõpa auakanimoni. Pa-posotiireri, kotxi Erekaru Matamatakoti auari iuakata. Iua pirena iaripireta ikini Kariréia tõpa auakanimoni. ¹⁵ Iua oerekarauata aiko ãki Xoteo apotiitiniãtaãua. Ininiã ikinimane txari:

—Peerekari iua, kotxi erekapitikari iua sãpiretakiti —itxana.

Nasaree Auakani Kona Auikari Xesosi Sãkire
(Mateo 13.53-58; Marko 6.1-6)

¹⁶ Eereka Xesosi sari Nasaree sitatxitimoni. Iuaã Xesosi aneẽ mitxi. Xoteo tomatini õtisaaki Xesosi itotapekari aiko Xoteo apotiitiniãtaãua isini. Ininiã iuasaaki, Xoteo tomatini õtisaaki isari iuaã. Iuaãtaã itima Teoso sãkire iõkatsopatakoru atatsopatini ikapani. ¹⁷ Teoso sãkire sãpiretakari Isaía iõkatsopatakiti tsopa isikaãka. Ininiã imatakireẽri aãtsopa. Ia Teoso sãkire inita, atatsopata itxa:

¹⁸ —Erekaru Matamatakoti notakata aua, ininiã Apiananiri mereẽno nota matxineirotenimonikari erekaru pirena nisãpiretini ikapani. Iokanatanu kateia ãki auakani nisikakini ikapani. Iokanatanu mõiãrenimoni iuaĩkana atamarauatinina ikapani. Iokanatanu misiritakonimoni, ninoã misiritakani nixipokini ikapani.

¹⁹ Ipaniãtano kãkiti nisãpiretini: “Ikorakanani Teoso apokapeka kãkiti maerekani imakataxakini ikapani, imapinakanina tĩkane.”

Ikara atatsopata Xesosi.

²⁰ Aãtsopa iapirikaãka atoko, sika itxari sasetotxi nitirimoni. Ikara inaãka atoko Xesosi topãka. Imakinika kãkiti aiko Xoteo apotiitiniãtaãua ãki auakani, imakinikana atamatari Xesosi, isãpiretakiti kinirão kenakotaka inakani.

²¹ Ininiã Xesosi sãpiretana:

—Ikara Teoso sãkire hĩkenakotakiti apokapeka uatxa —itxa ninoamoni.

²² Ikinimane kãkiti sãpirenauata Xesosi ereka inini. Itsorĩkaãnãtana isãkire erekaru ikenakotakasaakina:

—Kiãtokopa ininiãpa imarotatari ikara atoko inakari isãpiretini? Kotxi Xosee ãkirira iua, minakati ãkirira iua —itxanãtana.

²³ Ininiã Xesosi txana ninoã:

—Atxiĩti hĩte txanoko nota imatiretxi kitxakapirĩka kiomãtxiakori sãkire. Ninoã txari: “Pinĩtxi imarotakari pininiãua, piteka pipitaua.” Atxiĩti hĩxinikanãtari: Kapanaoõ sitatxiti nauakasaaki, nikamari posotiiretxi iuaãtaã. Kinirepa na nikamatari posotiiretxi uai nauiniãtaã? Ikara atoko atxiĩti hĩxinikanãta. ²⁴ Atão nisãpiretai, kãkiti Teoso sãkire sãpiretakari inirimane sauaki auakasaaki, inirimane !auikari isãkire. Ia xika kona nikamari posotiiretxi uai. ²⁵ Atãopitika nisãpiretai hĩte. Kitxakapirĩka Teoso sãkire sãpiretakari Eríasi inakori auakasaaki, ipi ãti pakini ano ipixini ano pakini ãparaã !ikipa. Iuaã Isaeo tixini natxinoka aua. Iuasaaki kaiãopokoro sitoakoro tikinitakoro auari iuaãtaã. ²⁶ Iuaritika Teoso !iokanataru Eríasi ninoã ikininapemoni. Iokanataru ãtoka sitomoni tikinitakoromoni, nipokori isikiniro ikapani. Oa sito aua Sarepita sitatxiti Sitoõ tõpa, Isaeo tixini takote. Xoteo !itxaua oa.

²⁷ —Ikara atokotxikana itxa Teoso sãkire sãpiretakari Eriseo inakori. Iua auakasaaki, kaiãopokori amianatakani maere matati Isaeo tixini auakani aua. Kona imakinikani erekapeka inaãkana. Kiki Naamaã inakori Síria tixini auakari, iuanokara erekapeka itxĩkitakaãka. Iua Naamaã kona Xoteo !itxaua iua —itxa Xesosi ninoamoni.

²⁸ Ikinimane aiko ãki apotiitakaniua, ikara ikenakotakasaakina, iteene ina-iatauana. ²⁹ Ininiã ikosekaĩtotarina Xesosi sitatxi mapotõkiremoni. Anikarina

ixirata nopini sitatxi auiniãtaã. Iuaã inirekarina Xesosi okinina ixiratamoni ipinini ìkapani. ³⁰ Txamari Xesosi napari ninoa sauaki, ìkorape itxa.

Kiki Maerekati Matamatakoti Auaãtotakiti
(Marko 1.21-28)

³¹ Eereka Xesosi sari Kapanaoõ sitatxitimoni Kariréia tõpa. Iuaã tomatiko õtisaaki oerekana kãkiti Teoso sãkire. ³² Kãkiti iuaã auakani tsoriãkããna oerekakiti ikenakotakasaakina, kotxi paimatireri iua. Isãpiretakiti atãonoka itxa isãkire. ³³ Iuasaaki aiko ãki kãkiti apotiitiniãtaãua, aua kiki maerekati matamatakoti auaãtotakiti.

³⁴ Iua kiki ãkixinire auakari akiripoakata:

—Xesosi Nasareekiri, kipa ìkai uai? Kiãtokopa pitxataua ate? Atxiiti papoka ate pixipokini ìkapani? Nota imarotai pite. Pite maerekati mauakiniti pite. Teoso nakiti pitxaua pite —itxa maerekati matamatakoti Xesosimoni.

³⁵ Ininiã Xesosi txitari iua. !Auiritari isãkirauatini:

—Maãtako. Posipikari ere kiki —itxari.

Ininiã maerekati matamatakoti iriãkatari iua kiki ikinimane okiãtaã. Ininiã itakanapari iua, makarotika itxa kiki. ³⁶ Kãkiti iuaãtaã tsoriãkããna. Imisãkiretakauana:

—Ìkora kiki paposotiireri isãkire. Itapararitika ipaniãtari maerekati matamatakoti sini, ininiã nãkorape itxapena maerekani matamatakoni.

³⁷ Ininiã Xesosi pirena iua tõpa iaripireta.

Xesosi Makananitaro Simão Petro Imakiro
(Mateo 8.14-17; Marko 1.29-34)

³⁸ Eereka Xesosi potorika aiko Xoteoakori apotiitiniãtaãua. Simão aapokomoni isa. Iuasaaki Simão imakiro iteene oãpoomata. Ininiã amanaãrina Xesosi oa erekape inìkitakini. ³⁹ Ininiã ipapãka oamoni:

—Nipaniãtari apoomari iotokini —itxa.

Ininiã apoomari iotoka. Iuasaakipeka oa õkitikaua, nipokori osikana ninoa.

Xesosi Makananitana Amianatakani
(Mateo 8.16-17; Marko 1.32-34)

⁴⁰ Atokatxi ereëkokaãpotapeka inakasaaki, kãkiti anikana amianatakani ikinipoko amianari auakini, Xesosimoni. Itakari iuako amianatakani nopini. Iuasaakipeka ninoa erekapeka itxana. ⁴¹ Omitikari maerekati matamatakoti kãkiti ìtoã auakari apaka. Osipikasaakina, akiripoakatana:

—Pite Teoso ãkiri pitxaua.

Ininiã Xesosi txitana ninoa. !Auiritaikana akiritinina, kotxi ninoa imarotari Teoso mereëkiti ininiãua Xesosi.

Xesosi Sãpiretari Erekari Pirena
(Marko 1.35-39)

⁴² Katimatinìkata Xesosi sari kãkiti mauakaniãtaã. Iuasaaki kãkiti nitanãtari iua. Apokasaakirina, amanaãrina Xesosi:

—Pikaikota atekata —itxarina.

⁴³ Txamari Xesosi txari:

—!Apakata uai nikaikotini, kotxi ãtiãtaã apaka nisãpiretariko erekari pirena Teoso auãtetxi ininiãua pirena. Ikinimanemoni ikara nisãpiretini ìkapanira, Teoso iokanatanano kãkitimoni.

⁴⁴ Ikara atoko ininiãra, isãpirenauata ikininape aiko ãki Xoteoakori apotiitiniãtaãua ikinipoko Xoteoakori tixine.

5

Merepitipanika Xesosi Moianariakori
(Mateo 4.18-22; Marko 1.16-20)

¹ Āti ōti Xesosi auanāta Xenesaree inakori poa tinikata. Xenesareetxikana Kariréia poa. Ipi iuāka aua. Iuasaaki kãkitipokoni ākitari iua Teoso sãkire ikenakotinina ĩkapani. Iuakatapeka xãpoka itxana. ² Iuasaaki Xesosi atamatari ipi kanaua ioporoko. Kokatsaãriti kanauate. Ninoa imiriĩ arokanātari hetxi.

³ Xesosi iereētaua Simão kanauate āki:

—Pikatika pikanauate amaātiki apanĩkakiã —itxa Simãomoni.

Eereka iitopãka kanaua āki. Iuaãtaã isãpiretari Teoso sãkire kãkitimoni imiriĩ apotiitakanimoni.

⁴ Isãpirenauataka atoko itxari:

—Apanĩkakiã pimekota. Iuaãtaã pitakari hetxi kãuaãriã —Xesosi txari Simão.

⁵ Ininiã Simão:

—Koerekareri, hetxi atakapikama ĩkanõka. Iteene aõkatsaãkatapiikama. Txa-mari na xatiki ximaki amaĩka. Kona ātika amaĩka. Iuaritika pite paniātiniãno, iuaritika nitakapitikariko hetxi —itxa Simão.

⁶ Hetxi ninoa takasaaki kãuaãriã, ximakipokoni imaĩkana, ininiã hetxi tsorakiarita. ⁷ Ikara xika akiritana imoianariakori āti kanauate āki auakani:

—Āpina. Himoianataua ate. Hetxi tsorakiãpotanapanoka.

Ininiã ninoa ina. Ikinimane kosekari hetxi. Ximakipokoni. Ipi kanaua xãpoãkata ximakinoka. Ximaki xika kanaua sakikaarita. ⁸ Simão Petro atamatakasaakiri ximakipokoni, ikapotoreëkaua Xesosi apisatoõ:

—!Pikaikotape nota takote, kotxi erekai pite. Maerekati kamakarino nota —itxa.

⁹ Ikara atoko itxa Simão sãkire, kotxi iua, imoianariakori apaka tsorĩkaãta kaiãopokori ximaki ninoa maĩkakiti xika. ¹⁰ Simão moianariakori Txiako, Xoão pakini, ninoa apaka tsorĩkaãta. Txiako, Xoão pakini Sepeteo anaakori. Ininiã Xesosi txari Simão:

—!Pipĩkarauatape. !Pimaĩkaikari ximaki. Ātiã piparĩka auako. Nisãkire pisãpiretako kãkitimoni —itxa.

¹¹ Eereka ninoa apokitaãka atoko, ikinika itiina itakanapana, Xesosikata sa itxana imiparĩkatinirina ĩkapani.

Kiki Maere Matati

(Mateo 8.1-4; Marko 1.40-45)

¹² Āti ōti Xesosi auanāta āti sitatxitiã. Iuaã auakasaaki, aua kiki maere matati. Atamatakasaakiri Xesosi, ikapotoreëkaua, iãka Xesosi apisatoõ. Iteene amanaãri Xesosi:

—Apiananiri, pinirekiniãri, piposotari nota ereka pitxĩkitakini —itxari.

¹³ Ininiã Xesosi maãtakari iua:

—Ari ninirekapitikari. Erekapekai —itxari.

Iuasaakipeka erekapekai itxa. ¹⁴ Ininiã Xesosi paniātari:

—!Pisãpiretapiri apanakini ereka nitxĩkitakinii. Pisa sasetotximoni. Poerekari piĩto iuamoni, ininiãkara itxai: “Atãopitika erekapekai pite.” Eereka pisikari Teosomoni Moisesi paniãtakiti iaõka. Ikara atoko pikaminiã, ikini-mane imarotari pite atão ereka pininiãua —itxa Xesosi.

¹⁵ Xesosi paniātari iua apanakini imasãpiretakani, iuaritika Xesosi pirena apikomoni iaripireta. Ininiã kãkitipokoni sari iuamoni isãkire ikenakotinina ĩkapani, amianari imakaxakini ĩkapani. ¹⁶ Ininiãkara Xesosi itotapekari iuanoka isini kãkiti mauakaniãtaã Teosokata isãkirauatini ĩkapani.

Matĩpokotakati Pirena

(Mateo 9.1-8; Marko 2.1-12)

¹⁷ Āti ōti Xesosi sãpirenauata. Iua takote pariseoakori, kaiŏkatsoparerini apaka topãkanãta. Ninoa Kariréia tŏpakini, Xotéia tŏpakini, Xerosareē sitatx-itikini pakini. Iuasaaki Xesosi sãpirenauataksaaki, Apiananiri sikaposotiiretari Xesosi amianatakani erekapeka itxĩkitakini ĩkapani.

¹⁸ Iuasaaki kikiakori apoka iuaã. Iminarina kiki matĩpokotakatinoka inakari. Isirimata nopini iminarina. Inirekarina aapokotxi āki ĩroinina, Xesosi apisatoŏ iua matĩpokotakati itakinina ĩkapani. ¹⁹ Txamari !apakata ninoa ĩroini, kotxi kãkitipokoni xãpoka. Ininiã ikanĩkana kanikoatxiã aapokotxi nopini. Imaktxakarina itano auakari kipatxi kai kamakori, eereka isikakaãpotarina iua matĩpokotakati isirimata nopini Xesosi manapi kãkiti sauaki. Xesosi apisatoŏ apoka. ²⁰ Ininiã Xesosi imarotari ninoa auikiniri iua posotiire. Ininiã itxari matĩpokotakati:

—Namarite, pimaerekani maktxakapeẽkaika.

²¹ Iuasaaki pariseoakori, kaiŏkatsoparerini pakini tsorĩkaãnãta. Ākixinireẽna ninoa:

—Teosonokara posotari amaerekani imaktxakini. Maerekati Xesosi kama Teosomoni —itxana.

²² Xesosi imarotari ninoa xinikakiti ākixinireẽna, ininiã Xesosi txana:

—! Erekari hãkixinireẽ ikara hĩxinikakiti. ²³ Nĩtxari iua imaerekani nimaktxakini, txamari !himarotari imaerekani atão nimaktxakini. “Pŏkitikaua. Pitĩpokota,” nininiã, ininiã himarotari nisãkire atão ininiãua, kotxi hĩtikari. Niposotiire imaerekani nimaktxakini ĩkapani, niposotiire iua nŏkitikini ĩkapanitxikana. ²⁴ Ininiã uatxaika noerekai hĩte. Teoso iokanatano nota hĩtari ĩaxitikirino ĩkorapokoritimoni kãkiti maerekani nimaktxakini ĩkapani.

Ininiã ipaniãtari matĩpokotakati:

—Pŏkitikaua. Pisirimata pikoseka, sipe pitxa paapokomoni —itxari.

²⁵ Iuasaakipeka ōkitikaua. Ikinimane kãkiti okiãtaã ōkitikaua. Ikosekari isirimata, sipe itxa aapokomoni. Isikasaaki ipoxokoniuaata.

—Peerekari Teoso —itxaãpota iua.

²⁶ Ikinimane kãkiti tsorĩkaãta. Ipĩkarauatana.

—Peerekari Teoso. Mitxi !aĩtikari matĩpokotakati erekapeka txĩkitaãkari. Peerekari uatxa aĩtikakiti —itxanãtana ninoa.

Mateo Pirena

(Mateo 9.9-13; Marko 2.13-17)

²⁷ Eereka Xesosi tĩpokoãponãtakasaaki, atamatari kiki Arevii inakori. Iitopãkanãta iparĩkauatiniãtaã. Iuaã apakapari txineiro Homanoakori auĩte paniãtakiti kãkiti aĩtiãtaã tiitxi anikini ĩkapani. Xesosi akiritari Arevii:

—Āpina, uatxa nimoianari pitxaua —itxari.

²⁸ Iuasaakipeka Arevii ōkitikaua. Ikinika itii itakanapa, Xesosikata sa itxa, Xesosi imiparĩkatini ĩkapani. ²⁹ Eereka Arevii kamari kiiniri aapokoã Xesosi ĩkapani. Kiinirisaaki aua ĩkamanere kaiãopokori. Txineiro apakapakani aua kiiniriã. Ninoa apanakinikata nipokota Xesosikata Arevii aapokoã. ³⁰ Pariseoakori, ninoakata parĩkauatakani, kaiŏkatsoparerini pakini txitana Xesosi moianariakori, Xesosi txineiro apakapakanikata nipokotini xika. Ininiã ninoa txari:

—Kinirepa hĩte nipokota txineiro apakapakanikata, maerekati kamakanikata? —itxana.

³¹ Xesosi apakapapiretana:

—Kãkiti mamianatakani ! inirekari pinĩtxi siãkarimoni isinina. Amianatarinoka nirekari pinĩtxi siãkarimoni isini. ³² Iua atokokana, nota ina ĩkorapokoriti kona kãkiti “Atão inakaranoka kamakarino” ĩkapanini, kotxi

ninoa uākatari atāo inakarinoa ikaminina, txamari !ikamarina atāo. Kākiti maerekati kamakani ĩkapanira nina nota uai imaerekani itakanapini ĩkapani. Nota pinĩtxi siākari atoko inakarino nota —itxa Xesosi sākire iuasaaki.

Nipokori Takanapiko Teoso Misākiretiko ĩkapani
(Mateo 9.14-17; Marko 2.18-22)

³³ Kākiti txari Xesosi:

—Xoāo kapatxisareri moianariakori itokata takanapari inikinina Teoso imisākiretinina ĩkapani. Iua atokotxikana itxa pariseoakori moianariakori. Txamari pite moianariakori !itakanapari nipokori, iāriā, Teoso imisākiretinina ĩkapani. Kinirepa? —itxana kākiti.

³⁴ Ininiā Xesosi apakapapiretana:

—Kiki ĩtaniriuatini pirenasaaki erekari atxiĩti kemaĩtxitakoni manikakaniāri nipokori? !Erekari. Ninoa poxokoniuata imoianari ĩtaniriuatini, ininiā inipokotapitikana. ³⁵ Txamari āti ōti ninoa moianari maĩkaākako, oka inaākako. Iuasaakiko ninoa takanapari inipokotini, kotxi imatinaniuatana. Iua atokotxikana nota. Nota auapanika nimoianariakorikata. Āti ōti nokaākako. Iuasaakiko ninoa takanapari inipokotini Teoso imisākiretinina ĩkapani —itxa Xesosi.

³⁶ Eereka Xesosi sāpiretari sāpirenatxi, atāo inakari oerekiko.

—! Pikitsorākitari mākatxi amaneri, kitxakari pitāpanetini ĩkapani. Ikara atoko pikaminiā, mākatxi amaneri pioanata. Mākatxi mata amaneri ĩsapekata piotsainiā, mākatxi kitxakari tsorakita iuaĩkana. ³⁷ Kākiti kitakari ovaā sako aamata kamakori āki. Ovaā amanero auiniā, !otakaāka aamata kitxakari āki. Pitakiniāro aamata kitxakari āki, aamata tsorakita. Ovaā xikepoatamako. Sako !otxaika. ³⁸ Ovaā amanero pikitakako aamata amanero āki. ³⁹ Ovaā kitxakaro auiniā, kākiti !inirekaro amanero, kotxi: “Ovaā kitxakaro apiaerekata,” itxa.

Ikara atoko Xesosi txari kākitimoni. Ikara sākiretxiti Xesosi sāpireta, kotxi apanakini kākiti itotapekari Moisesini sākire, Teoso sākire kitxakapirĩka isāpiretakiti, ininiā !inirekari Xesosi sākire amaneri inakari. Ninoa mākatxi kitxakari atoko. Sako kitxakari atoko ninoa. Ovaā kitxakaro atoko ninoa. Xesosi sākire mākatxi amaneri atoko. Ovaā amanero atoko itxa Xesosi sākire.

6

Tomatiko Ōti Pirena
(Mateo 12.1-8; Marko 2.23-28)

¹ Xoteoakori tomatini ōtisaaki Xesosi imoianariakorikata motipetari kikiotakari triko auiniātaā. ĩpiripetakasaakirina, imoianariakori makatxakaāpotari triko oki. Iuakoā ikotxokarona, ixōka itxarona otāta katxakini ĩkapani, okinoka nika itxana. ² Ātikaka pariseoakori itikana imaktxakinirona:

—Kinirepa triko hĩkotxoka tomatiko ōtisaaki? !Auiritaāka tomatiko ōtisaaki parĩkauatiko —itxana.

³ Ininiā Xesosi apakapapiretana:

—Himarotari Taviini kamakiti kitxakapirĩka, iua imoianariakorikata natx-itakasaaki. ⁴ Iua ĩroā Teoso misākiretikoātaā. Iuasaaki imaktxakari komiri Teosomoni sikakori. Inikari, sika itxari imoianariakorimoni. Ninoa nikari apaka. Sasetotxinokara auiritaāka iua komiri inikinina. Apanakini !auiritaāka inikiniri. Iuaritika iua Taviini nikari. ⁵ Nota hĩtari iaxitikiri posotari ikinipoko ninireēkiti nikamini tomatiko ōtisaaki, kotxi Apiananiri nitxaua —Xesosi txana ninoa pariseoakori.

Motĩkauakotakari Pirena
(Mateo 12.9-14; Marko 3.1-6)

⁶ Āti tomatiko ōtisaaki Xesosi ĩroã aiko āki Xoteoakori apotiitiniãtaãua. Oerekarauata. Iuasaaki iuaãtaã aua kiki iuako ikikomoni motĩkauakotakari. ⁷ Kaiōkatsoparerini, pariseoakori apaka aua iuaã. Atamatapikarina Xesosi, atauako erekapeka itxĩkitakapaniri motĩkauakotakari tomatiko ōtisaaki. Inirekarina Xesosi kerokiniri. Tomatiko ōtisaaki iparĩkauatiniã, ninoa apoĩtari iua. ⁸ Xesosi imarotari ākixinireẽna ixinikakitina, ininiã ipaniãtari kiki motĩkauakotakari:

—Pōkitikaua. Āpina ikinimane okiãtaã.

Ininiã iua kiki ōkitikaua, sa itxa Xesosimoni. ⁹ Ininiã Xesosi pimaãna kaiōkatsoparerini, pariseoakori pakini:

—Natokopa itxa Moisesini paniãtakiti iōkatsopatakiti tomatiko ōtisaaki atão akamini? Ipaniãtataua maerekati akamini tomatiko ōtisaaki? Ipaniãtataua erekari akamini tomatiko ōtisaaki? Inirekatari amoianatiniri āti imap-inakani ĩkapani tomatiko ōtisaaki? Inirekatari aōkaniuatini tomatiko ōtisaaki? —itxa Xesosi ninoamoni.

¹⁰ !Kasãkirena ninoa kaiōkatsoparerini, pariseoakori pakini. Xesosi atamatana ikinimane.

—Piuako poerekata —itxari iua kiki.

Oerekatari iuako. Iuasaakipeka iuako erekapeka itxa. ¹¹ Pariseoakori, kaiōkatsoparerini pakini omanãkarauata. Imisãkiretakakauana Xesosi okinina ĩkapani.

Xesosi Mereẽna Tosi Imoianariakori
(Mateo 10.1-4; Marko 3.13-19)

¹² Āti ōti Xesosi kanĩka oxiratari nopini, Teoso imisãkiretini ĩkapani. ĩkanōka ikaikota iuaãtaã Teosokata isãkirauatini ĩkapani. ¹³ Katimatiniĩkata akiritana itomaneri imoianariakori iuamoni apokinina ĩkapani. Apokasaakina, imereẽna kikiakori tosi pakini kãkitimoni iokanatakini tĩkane. ¹⁴ Imereẽna

Simãoma, (Iuãka Petro apaka.)

Ātreema, (Simão itari)

Txiakoma,

Xoãoma,

Piripima,

Patoromeoma,

¹⁵ Mateoma,

Tomeema,

Txiakoma, (Aopeo ākiri)

Simãoma, (Homano omanatakari)

¹⁶ Xotasima, (Txiako ākiri, āti Txiakoti)

Xotasi Isikariotxima (Xesosi mĩkapiritakari tĩkane) pakinima.

Ninoa kikiakori tosi pakini Xesosi mereẽkini imoianariakori ĩkapani.

Xesosi Amianatakani Imakananitini
(Mateo 4.23-25)

¹⁷ Eereka oxiratari iokiriiãpotana. Ipitexitimoni apokana. Iuaã aua kaiãopokori imoianariakori. Apanakini kãkiti iuaãtaã aua apaka. Xotéia tōpa ĩkani, Xerosareẽ sitatxiti ĩkani pakini auari iuaã. Apaka auari Txiro sitatxiti ĩkani, Sitoō sitatxiti ĩkani apaka. Txiro, Sitoō pakini potxoari uiniti ĩtinikata aua. ¹⁸ Ninoa kãkitipokoni sari Xesosimoni isãkire ikenakotinina ĩkapani, amianarena imaktxakini ĩkapani. Ninoa maerekati matamatakoti auaĩtotakini sari Xesosimoni maerekati imaktxakini ĩkapani. ¹⁹ Ikinimane nirekari imaãtakiniri Xesosi, kotxi imaãtakiniãrina, apakapari Xesosi tapara

amianarena sini ĩkapani. Ininiã ikinimane amianatakani Xesosi maãtakakani iuaĩkana erekape itxana.

Kirimonipa Teoso Sikatari Erekarı?

(Mateo 5.1-12)

²⁰ Eereka Xesosi misãkiretana imoianariakori:

—Hĩte matxineiroteni Teoso sikai erekari. Teoso hãauĩte itxaua. Iua nakitiakori hĩtxaua.

²¹ —Hĩte ĩkorapokoriti natxitakani Teoso sikai erekari. Himitouatapanikako.

—Hĩte ĩkorapokoriti txiapatakani Teoso sikai erekari. Hãpiapoxokonitapanikako. Hĩsiroatapanikako.

²² —Apanakini omanatiniãĩ hĩte, hĩtari iaxitikiri sãkire hãuikini xika, Teoso sikai erekari. Atxiĩti apanakini !nirekai. Atxiĩti apanakini misãkirepiretai. Atxiĩti ninoa akiritai “maerekati kamakari” nota hĩtari iaxitikiri sãkire hãuikini xika. Ikara atoko hinaãkako.

²³ —Ninoa misiriãpotakasaakii, hĩpoxokoniuatako. Himĩteenekariko hĩpoxokoniritika, kotxi erekari Teoso nĩkatini iaxiti itixine. Inĩkatakiti hĩte ĩkapani peerekari. Apanakini misiritinii atokokanera, ninoa atokiriakorini misiritari Teoso sãkire sãpiretakani kitxakapirĩka.

²⁴ —Hĩte ĩkorapokoriti katxineiroterini misiritaãkako. Mitxi papoxokonii hĩte. Uatxa hĩpoxokoni !auaika.

²⁵ —Hĩte ĩkorapokoriti ikiniõtika mitouanãtakanii misiritaãkako. Hinatxitaapanikako.

—Hĩte ĩkorapokoriti siroatakanii misiritaãkako. Himatinaniuatapanikako. Hĩtxiapatapanikako.

²⁶ —Ikinimane: “Peerekai pite,” ininiã, himisiritaãkako, kotxi ninoa nirimane kitxakapirĩkarini sãpiretari ikara atoko inakari Teoso sãkire atão masãpiretakanimoni —itxa Xesosi.

Kãkiti Mokaiakari Tiretiko

(Mateo 5.38-48)

²⁷ Iuaĩkana Xesosi sãpirenauata:

—Nõtãkikai hĩte nisãkire kenakotakanii. Hĩtiretanako himokaiakari. Erekarı hĩkaminana hĩte omanatakani. ²⁸ Himisãkiretariko Teoso erekari hĩte misãkirepiretakani isikini ĩkapani. Himisãkiretariko Teoso hĩte misiritakani ĩkapani. ²⁹ Kãkiti aritiniãĩ pikakota, ipinimoni pikakota iuaĩkana pisikana. Kãkiti anikiniãri pimãka õtanominari, pauiritari iua pimãka kauanata apaka anikini. ³⁰ Pitii amanaãkarimoni pisika inirekakiti. Kãkiti anikiniãri pitii, !pamanaãpiri iuaĩkana imikanapiriiniri. ³¹ ãti tiretinii pinirekini atokotxikana, pitiretari ãti.

³² —Pite tiretakaninani pitiretiniã, kinirepa Teoso sikari erekari pitemoni, pinirimanenokara pitiretakasaaki? Kotxi kãkiti maerekati kamakani apaka tiretari ninoa tiretakani. ³³ Pimoianatiniãna pite moianatakaninani, !apakata, kotxi iua atokotxikana maerekati kamakari moianatana iua moianatakaninani. ³⁴ Pisikiniãro pitxineirote, pitxineirote mikanapiriãkarimoninani, !apakata, kotxi iua atokotxikana maerekati kamakani sikaro itxineirotena apanakini maerekati kamakanimoni ãti õti iuaĩkana imikanapiriiniro ĩkapani. ³⁵ Iua atokokana na pitxape. Pitiretariko pimokaiakari. Erekarı pikaminariko. Inirekiniãri pitii iparĩkauatini ĩkapani, pisika iuamoni. !Pimaãkapeua, pitii iuaĩkana imasikakaniãĩ. Iua atokokana hĩkaminiã, Teoso sikai hĩte iteene erekari. Iua atokokana hĩkaminiã, Apiananiri iaxitikiri anaakori hĩtxauako, kotxi iua amonĩkari kãkiti maerekati kamakani. Ninoa !isãpiretari Teoso iua ereka inini, iuaritika Teoso

amonĩkana. ³⁶ Piamonĩkariko āti, aĩri Teoso amonĩkaruatini atokokana —itxa Xesosi.

Apoĩretxi Pirena
(Mateo 7.1-5)

³⁷ —!Papoĩtapiri āti. Papoĩtiniāri āti, ininiā pite apaka apoĩtaākako. ! Pisāpiretapiri āti ikamakiti maerekati inini, ininiākara Teoso !isāpiretai pite pikamakiti maerekati inini. !Pixinikapinikari maerekati āti kamakiti pitemoni, ininiā Teoso !ixinikaikari maerekati pite kamakiti. ³⁸ Pisikarauatako ātimoni, ininiā Teoso sikarauata ito pitemoni. Kaiāopokori papakapa. Atarokiri arata āki takakori atokokana papakapa. Atarokiri iōkokakori, kaiākakori kinapakopeka iuaĩkana atarokiri inopini takaāka. Xāpoākata, ininiā katxapoaāpota. Iua atokotxikana Teoso sikai kaiāopokori, ātimoni pisikarauatiniā. Ātimoni pisikarauatini atokotxikana, Teoso sikarauata pitemoni —itxa Xesosi.

³⁹ Xesosi sāpiretari ia sāpirenatxi atāo inakari oerekiko:

—Apakata āti mōsiāreti anikiniri āti mōsiāreti? !Apakata. Ninoa ipi irikako aariko āki. Ininiā nota sākire himimarotakanisaaki, kona apakata hōerekiniiri āti. Hōerekiniāri āti, hīkerokari. Ninoa mōsiāreni aariko āki irikakani atoko hĩtxa. ⁴⁰ Apaiaōkarauatakari !imarotari koerekareri imarotakiti atoko. Poiāonoka imarota. Apaiaōkarauatini ixipokasaaki, iusaaki koerekareri imarotakiti atoko imarotape.

⁴¹ —Pisāpiretari āti: “Aāsorero aua poki āki,” txamari kona pimaākatari aātxirata pite oki āki auakari. Kinirepa ikara atoko inakari pikama? ⁴² Kinirepa pitxari pitari? “Nitari, nota makatxakinii aāsorero pokiā auakari,” kotxi !piposotari patamatiniri aātxirata piteka pokiā auakari. Pisākire atxiīti erekari, txamari pikamakiti kona erekari. Merepitipanika pimakatxakari aātxirata piteka pokiā auakari. Eereka piposotari patamatiniri aāsorero pitari okiā auakari pimakatxakini. Maerekati pite kamakiti apiata atxiīti iua aātxirata atoko. Maerekati āti kamakiti poiāoka atxiīti iua aāsorero atoko. Iuaritika !pimaākatari maerekati piteka kamakiti. Pōtākikari āti imaerekani itakanapini. Ikara atoko !apakata. Merepitipanika pite takanapariko pite maerekani, eereka pōtākikari āti imaerekani itakanapini —itxa Xesosi sākire.

Amātiiri Pirena
(Mateo 7.15-20; 12.33-35)

⁴³ —Amātiiri erekari kona iritari matximakoti. Amātiiri matximakoti kona iritari erekari. ⁴⁴ Patamatiniāri amātiiri, pimarotari imina. Txipokori piko inakoro pinirekiniā, kona pisa inakomoni. Ova pinirekiniā, kona pisa inakomoni. ⁴⁵ Kākiti erekari amātiiri erekari atokokana itxa. Iua erekari, ininiā erekarinoka ikama, kotxi iua ākixinireē erekarinoka aua. Kākiti maerekati amātiiri matximakoti atoko itxa. Iua maerekati, ininiā ikamakiti maerekati apaka, kotxi maerekatinoka auari iua ākixinireē. Iua ākixinire ereka, ininiā isākire ereka apaka. Iua ākixinire maerekati, ininiā isākire maerekati apaka, kotxi isākire potorika ākixinireē —itxa Xesosi sākire.

Aapokotxi Kamakari
(Mateo 7.24-27)

⁴⁶ Xesosi sākirauatapanika:

—Kinirepa pakiritano nota “Apiananiri,” nipaniātakiti pimakanisaaki? ⁴⁷ Kākiti notamoni ĩkari, nisākire kenakotakari, nisākire kīpitakari, aapokotxi kamakari atoko itxa. ⁴⁸ Iua kamari aapokotxi. Ikisakari kipatxi. Otsomori aapoko tsota ikama. Iua apokari kai, ininiā iopitĩkari aapoko tsota iua kai nopini. Ininiā aapokotxi ikamakiti paikori. Āparaā

apoãtakasaaki, itorõkani inokasaakiri iua aapoko, !iakeka, kotxi iua kiki atão ikamari aapoko. Iua kiki atoko kãkiti nisãkire kãpitakari.

⁴⁹ —Ãti kiki aapokotxi kamakari, iua iopitãkari aapoko tsota motsomotika popaiape ininiãtaã. Åparaã apoãtakasaaki, itorõkani inokasaakiri iua aapoko pakitika. Xipoka itxa. Iua kiki atoko kãkiti nisãkire kenakotakari, nisãkire mauiãkati —itxa Xesosi.

7

Xesosi Makananitiniri Sotato Auãte Nitiri (Mateo 8.5-13)

¹ Ikara sãkiretxiti isãpiretaka atoko, Kapanaoõ sitatxitimoni isa Xesosi. Iuaãtaã apoka. ² Kapanaoõ auari kiki ãti uãka Homano inakori. Sotatoakori auãte itxaua iua Homano. Ipaniãtana sotatoakori seã pakini inireẽkiti ikaminina. Xesosi apokasaaki Kapanaoõ, iua Homano nitiri iteene itiretakiti amianata. Ipinanapanoka.

³ Iua Homano kenakopiretari Xesosi. Ininiã ipaniãtari Xoteoakori kiomãtxiakori Xesosimoni isinina.

—Hãtxariko: “Homano nirekai iuamoni pisini, initiri pimakananitini ãkapani.”

⁴ Ininiã ninoa sa itxana Xesosimoni, aõkita itxarina.

—Masa sotatoakori auãtemoni. Initiri amianata. Masa, pimakananitiniri ãkapani. Iua Homano erekari itxaua, ininiã erekapitikari pimoianatiniri iua. ⁵ Itiretari Xoteoakori. Aiko aãpotiitiniãtaãua ikaminaua ate, ininiã iua Homano erekari itxaua —itxana ninoa.

⁶ Ininiã Xesosi sari ninoakata. Iua Homano aapoko takote apokasaaki, iua Homano iokanatarari imoianariakori Xesosimoni, isãpiretinirina ãkapani:

—Apiananiri, apikomoni !pisipe, kotxi minakati nota. Pite Apiananiri txaua. Nota apakapiniãi naapoko ãki !apakata. ⁷ Nota pitemoni napokini !apakata, kotxi pite Apiananiri, nota poiãori. Ininiãkara ereẽ pïotoka. Ereẽkarako pitxãkitakariko ninitiri ereka inini. ⁸ Nota auãte paniãtiniãno nota ipaniãtakiti nikamini ãkapani, ininiã nikamapitikariko. Nota auãtetxi nitxaua apaka. Nota paniãtakiti sotatoakori kamapitika. Åti nipaniãta: “Pisa,” ininiã iua sa. Åti nipaniãta: “Uai pina,” ininiã iua ina. Ninitiri nipaniãta: “Ia pikama,” ininiã iua kamari. Ininiã nimarotari ereẽ pite paniãtiniãri ninitiri ereka inini, ereẽkarako erekapeka pitxãkitakari ninitiri —itxa Homano sãkire Xesosimoni.

⁹ Iua Homano sãkire ikenakotakasaaki, Xesosi tsorãkaãta. Isapotorika, misãkireta itxana kãkiti iuakata sikani.

—Iua Homano iteene auikari nisãkire. Peerekari. Mitxi !naõkitari nisãkire auãkari iua Homano atoko inakari. Na naõkitapanikari Xoteo iua Homano atoko inakari —itxa.

¹⁰ Eereka ninoa Homano iokanatakini kanapiriã Homano aapokomoni. Iuaã apokasaakina, atamatarina Homano nitiri. Erekapeka itxa.

Xesosi Txãkitakari Ipãkari Iuaãkana Auãki Inini

¹¹ Mapaõti napaãka atoko Xesosi sari Naiã sitatxitimoni. Imoianariakori, kãkitipokoni apaka sari iuakata. ¹² Iimatokoãpotakasaakiri sitatxi pirikere tore kãkiti ãronakikoãtaã, ipãkari imipokãkaãka sitatxi mapara. Sito imatonõkari oimi ipãpe. Oa sito tikinitakoro. Kaiãopokori kãkiti sitatxi auakani pokãka oakata sikani. ¹³ Apiananiri atamatakasaakiro, iamoniãkaro oa, ininiã:

—!Pitxiapatape —itxaro.

¹⁴ Isa ipãkarimoni. Imaãtakari ipãkari auini kaixati, ininiã iua kaixa anikakani iotoka. Iuasaaki iua akiritari:

—Ātokori, nipaniātai pōkitikaua —itxa Xesosi.

¹⁵ Iuasaakipeka iua ātokori topāka, sākirauata itxa. Ininiā Xesosi sikari iua inoromoni.

¹⁶ Ikinimane pīkarauata.

—Peerekari Teoso. Teoso iokanatarari isākire sāpiretakari apiatakari atemoni. Teoso apokapeka īkorapokoriti ate inakitiakori imoianatini īkapani —itxanātana ninoa.

¹⁷ Ia Xesosi pirena iaripireta ikini tōpati Xotéia tōpa. Apaka apikoxiti Xesosi pirena kenakopiretaāka.

*Hoão Kapatxisareri Pimaãkiti Sãkirextiti
(Mateo 11.2-19)*

¹⁸ Hoão kapatxisareri moianariakori minapiretari Xesosi pirena Hoãomoni. Eereka Hoão akiritari imoianariakori ipi:

¹⁹ —Hīsa Xesosimoni. Hīpimaãri: “Teoso mereēkitikai pite? Kãkiti iātapanātakitikai pite? Kãkiti iātapanātakiti ātikani atxiīti?” Ikara atoko hīt_xako Xesosimoni —Hoão txana ninoa.

²⁰ Ininiā ninoa ipi sari Xesosimoni. Iuamoni apoka itxana.

—Hoão kapatxisareri iokanataua ate pitemoni. Ipimaãri: “Teoso mereēkitikai pite? Kãkiti iātapanātakitikai pite? Kãkiti iātapanātakiti ātikani atxiīti?” itxai —itxana.

²¹ Iuasaaki ninoa Xesosimoni apokasaaki, amianatakani kaiãopoko erekapeka itxīkitaka Xesosi. Iua omitikari maerekani matamatakoni kãkiti itotaã auakani. Mõsiãreni kõsiãrepeka itxīkitaka. ²² Ininiā Xesosi apakapapiretana Hoão moianariakori:

—Hīkanapiriã Hoãomoni. Hīsãpiretari mixikanani uai hītikakiti, hīkenakotakiti pakini. Hīsãpiretari mitxi mõsiãreni uatxa kõsiãrepeka nitxīkitakapeka. Hīsãpiretari mitxi matīpokotakani tīpokotapeka uatxa. Mitxi maere matati erekapeka uatxa. Mitxi makenakokini uatxa kakenakokipeka. Mitxi ipīkani iuaīkana auãki itxapekana. Hīsãpiretari Hoão, nota sãpiretari Teoso iokanapirena erekari minakati mauakinimoni. ²³ Kãkiti iteene auikiniãri nota sãkire, Teoso takari erekari iuamoni. Ikara nisãkire hīsãpiretari Hoão —itxa Xesosi.

Hoão Kapatxisareri Pirena

²⁴ Ininiā ninoa Hoão moianariakori sipe. Eereka Xesosi sãpiretari Hoão pirena kãkiti iuamoni apotiitakaniua.

—Kipa īkai hīte Hoão kapatxisarerimoni hīsikasaaki ãparaã makipakaniãtaã iua auakasaaki? Hīte sari iuamoni, kotxi isãkire ātinoka, Teoso sãkirenoka. Kãkiti katsotati itima anikakiti atoko itxa. Isãkire kita āti, isãkire uatxa ātião, isãkire katana iuaīkana ātião, itxaãpota isãkire. Ikara atoko !itxa Hoão. ²⁵ Kipa īkai hīte Hoãomoni hīsikasaaki? Hīte sari iuamoni, kotxi !inirekari tiitxi, txineiro pakini. !Kakaroneri imãka, kotxi !ikaikota auītetxi aapoko. Auītetxi auiniãtaã kãkiti mãka peereri. ²⁶ Kipa īkai hīte iuamoni hīsikasaaki? Hīte sari iuamoni, kotxi iua Teoso sãkire sãpiretakari itxaua. Atão inakari Teoso sãkire sãpiretakari itxaua. Apiata iua Hoão. ²⁷ Apiata iua, kotxi kitxakapiriãka Teoso sãkire iõkatsopatakori sãpiretapekari Hoão pirena:

Ia kiki nisãkire sãpiretakari. Niokanatarari iua kãkitimoni, pite nimereēkiti sini apisa, papokini isãpiretini īkapani, kãkiti iposope inini īkapani, itxa Teoso sãkire iõkatsopatakori.

²⁸ Iuaīkana Xesosi txana kãkiti:

—Atão nisãpiretai, āti Hoão atoko inakari !auari. Hoão apiata. Iuaritika kãkiti Teoso auītetakarari poiãori inakari apia imarotariko Teoso kamakiti tīkane —itxa Xesosi.

²⁹ Ikinimane kākiti, txineiro apakapakani apaka kenakotakasaakiri Xesosi sākire, imarotarina Teoso nireēkiti kākiti kamini ĩkapani atāo inini, kotxi ninoa sari Xoāomoni ipatxisatikona ĩkapani. ³⁰ Txamari pariseoakori, Teoso paniātakiti oerekakani pakini !inirekari Xoāo patxisatinina ninoa, ininiākara Teoso nireēkiti iaōka !inirekana ikaminina.

Kākiti ĩkorasaaki Auakani

³¹ Xesosi sāpirenauatapanika:

—Kiātokopa itxana kākiti ĩkorasaaki auakani? ³² Amarini sarauatini atoko itxana ĩkorasaaki auakani. Ninoa amarini topākanāta tiitxi amotikoātaā. Ipxini amarini tsoanāta. Itxana apanakinimoni: “Ate xikarauata hīte serenini ĩkapani, txamari !hīserena. Kākiti ipīkasaaki xikariti axikareta, txamari !hītxiapata.” Ninoa amarini sarauatini atoko itxana ĩkorasaaki auakani, ³³ kotxi Xoāo kapatxisareri apoka ĩkorapokoriti. Itakanapari inikini Teoso imisākiretini ĩkapani. !Ītari ovaā. Iuaritika hīte txari: “Maerekati matamatakoti auaitotari Xoāo,” hītixari. ³⁴ Nota hītari iaxitikiri apoka ĩkorapokoriti. !Nitakanapari ninikini. Ikiniōtika ninipokota. Niātari ovaā. Ininiā hīte txari: “Iua kiki ixori. Poātakari iua. Iua moianatana txineiro apakapakani, kākiti maerekati kamakani,” himisākirepiretano. ³⁵ Paimatireri Teoso. Iua nakitiakori imarotari isākire atāo ininiua —itxa Xesosi.

Sito Arokari Xesosi Kiti Oātsaā

³⁶ Āti ōti pariseo Simāo inakori aiataro Xesosi inipokotini iuakata, ininiā Xesosi sari iua aapoko. Iuaā apoka atoko iitopāka inipokotini ĩkapani. ³⁷ Simāo auini sitatxiti oāua sito kanokarero. Oa kenakopiretari Xesosi iua pariseo aapoko inipokotini, ininiā oa anikaro kamariāro iuamoni. Kopitipaki kai arapástiro kamakori āki oāua kamariāro. Xāpoka. ³⁸ Otima Xesosi kiti takote. Otxiapanāta. Oātsaā oārokari ikiti. Okaxipokari oiākoā. Ikiti oāpitzoka. Eereka okitakari kamariāro ikiti nopini.

³⁹ Iua Simāo atamatakasaakiro Xesosi kiti oārokini, ākixinireē ixinikari:

—Xesosi atāo Teoso sākire sāpiretakari inaākamako, imarotamaroko oa sito iua maātakakaro. Imarotamaroko maerekati kamakaro oa —itxa ākixinireē.

⁴⁰ Ininiā Xesosi:

—Simāo, ninirekari nimisākiretinii —itxa.

—Ei, koerekareri, pisākirauata —itxa Simāo.

⁴¹ Ininiā Xesosi:

—Ipi kiki apakapari txineiro sikakari txineirote. Imikanapiriāpanikaroko txineiro isikakito. Āti apakapari isikakito txineiro kaiāopokoro, kiētosi txineirota. Ātipekana apakapari isikakito poiāonoka, sīkoēta txineirota. ⁴² Ninoa ipi !iposotaikarina iuaīkana txineiro isikinirina txineiro sikakarimoni, kotxi !oāuaika. Iuaritika iua xipokari ninoa kōtane. !Inirekaikaro itxineirote. Ininiākara ĩkiripa ninoa kiki ipi apia apokaerekatari iua txineiro sikakari? —Xesosi pimaāri Simāo.

⁴³ Ininiā Simāo:

—Niuākatari kiētosi txineirota apakapakari. Iua apia apokaerekatari txineiro sikakari, kotxi iua apakaparo kaiāopokoro txineiro —itxa.

—Iuapitikara —itxa Xesosi.

⁴⁴ Iuasaaki Xesosi sapotorika sitomoni. Itxari Simāomoni:

—Patamatataro oia sito? Niīroā pite aapoko, txamari kona pite sikano āparaā nikiti narokini ĩkapani. Oia arokapekari nikiti oātsaā. Oiākoā okaxipokari. ⁴⁵ Uai napokasaaki kona pite apitzokano. Oia !iotoka nikiti oāpitzokini. ⁴⁶ Pite na takari iitxi nikiiā. Oia kitakari kamariāro nikitiā.

⁴⁷ Oia iteene turetano, ininiã aimarotari omaerekani kaiãopokori makatxakaãkapeka. Kãkiti poiãonoka turetakasaakino, aimarotari imaerekani poiãonokari makatxakaãkapeka —itxa Xesosi.

⁴⁸ Iuasaaki Xesosi sãpiretaro:

—Nimakatxakapekari pimaerekani —itxaro oa sito.

⁴⁹ Xesosikata nipokonãtakani ãkixinireẽna ixinikanãtarina:

—Kiripitipa ia kiki atxiĩti? Iua makatxakatari kãkiti maerekani? —itxanãtana ninoã.

⁵⁰ Iuasaaki Xesosi txaro oa sito:

—Atão pauikari nisãkire, ininiãkara pimaerekani makatxakaãkapeka. Pisipiniikaua erekaxinirepeka pinini —itxaro oa.

8

Sitoãkini Xesosi Moianatakani

¹ Mapaõti napaãka atoko Xesosi sari ãti sitatxitimoni, ininiã eereka ãti sitatxitimoni isa, itxaãpota. Isãpiretari erekari pirena Teoso auĩtetxi ininiãua. Imoianariakori tosi pakini sari iuakata. ² Sitoakoro apaka sari iuakata. Mitxipe Xesosi erekapeka txĩkitakana ninoã sito. Mitxipe ãtikaka amianata. Mitxipe maerekati matamatakoti auaĩtotana ãtikaka. Maria Matarena inakoro sari iuakata. Mitxipe Xesosi omitikana maerekani matamatakoni setxi pakini oĩtoã auakani. ³ Xoana inakoro, Kosa inakori tanoro, oa apaka sari Xesosikata. Kosa parĩkauata auĩtetxi Erotxi inakorikata. Erotxi paniãtakiti ikama. Sosana inakoro apaka sari Xesosikata. Apanakini sitoakoro apaka sari iuakata. Ninoã sikari itxineirotena Xesosimoni, imoianariakori pakiniimoni nipokori iamotinina ãkapani.

Katakareri Pirena

(Mateo 13.1-9; Marko 4.1-9)

⁴ Kãkitipokoni apokaãpota Xesosimoni, ãti sitatxitikini, iuaĩkana ãti sitatxitikini, iuaĩkana ãti sitatxitikini txaãpota apokinina Xesosimoni. Kãkitipokoni apotiitakasaakia Xesosikata, Xesosi sãpiretana ninoã sãpirenatxi atão inakari oerekiko.

⁵ —Kiki sari ikikiote itakarauatini ãkapani. Triko oki itaka. Okaãpotari. Okaãpotakasaakiro, kimaporiã apaka oãpoka oki okakiti. Eereka oki katxarataãka. Apanakini kotipiriki nika. ⁶ Oki apoka kai nopini. Kai auiniãtaã kipatxi poiãonoka auari. Eereka ipitxaka, txamari pitxakakaro kotsa imiti masakaniã, ãparaã mauakaniã, opina. ⁷ Triko oki apoka inako sauaki apaka. Eereka inako aneẽ takarikata, txamari inako matxorotakaro takari, ininiã opina. ⁸ Oki apoka kipatxi erekari nopini apaka. Eereka takari pitxaka, aneẽ otxa. Eereka ominaua kaiãopokori. Triko katiã seĩ oki aua.

Xesosi sãkirauata iuaĩkana:

—Kakenakokii, ininiã hĩkenakotariko nisãkire —itxa Xesosi.

Kãkiti Mimarotakiniti Xesosi Sãpiretini Pirena

(Mateo 13.10-23; Marko 4.10-20)

⁹ Xesosi moianariakori pimaãri iua:

—Poerekaua ikara sãpirenatxi atão inakari oerekiko pisãpiretakiti. !Aimarotari mixikanani pisãpiretakiti.

¹⁰ Ininiã Xesosi:

—Nisãpiretapitikaiko hĩte Teoso auĩtetxi ininiãua, ininiã hĩte imarotari. Apanakini !imarotari hĩte imarotakiti Teoso auĩtetxi ininiãua. Ninoã apanakinimoni nisãpiretari sãpirenatxi atão inakari oerekiko. Ninoã kenakotari, txamari !imarotarina nisãpiretakiti sãkiretxiti, kotxi kitxakapirĩka Teoso sãkire sãpiretakani sãpiretari:

Kokiri kākiti, txamari !atamatar Teoso kamakiti. Karokokenakokiri kākiti, txamari !ikenakotari Teoso sākire.

¹¹—Noerekai hite ikara sãpirenatxi atão inakari oerekiko, kiki takarauatini pirena. Triko oki atoko itxa Teoso sākire.

¹² Apanakini kākiti kimapori atoko itxa. Ninoa kenakotari Teoso sākire, kimapori nopini oki apokini atoko itxa. Txamari Satanasi apoka kotipiriki apokini atoko. Imakatzakari Teoso sākire ãkixinireẽna apokakari, ininiã ninoa !auikaikari Teoso sākire, ininiã Teoso !imakatzakari ninoa maerekani.

¹³—Apanakini kākiti kai auiniãtaã atoko itxa. Ninoa kenakotari Teoso sākire, ininiã ipotxitarina. Txamari oki kipatxi poião nopini apokini atoko, Teoso sākire !ïroã ninoa ãkixinireẽ. Mapa kasiriti ninoa auikari Teoso sākire atxiïti. Eereka imisiritaãkana Teoso sākire auikinina xika, ininiã itakanaparina Teoso sākire.

¹⁴—Apanakini kākiti inako auiniãtaã atoko itxa. Ninoa kenakotari Teoso sākire. Eereka ninoa maerekaxinirenoka itxana. Inirekarina txineiro, tiitxi pakini. Inirekarina isarauatinina. Inako atoko itxa txineiro, tiitxi, isarauatinina, maerekaxinirenoka ininina pakini. Ininiã !ixinikaikarina Teoso. Oki inako sauaki pitxakakaro !ominaua. Iua atokokana, ninoa kākiti !ikamari erekari Teoso ïkapani.

¹⁵—Apanakini kākiti kipatxi erekari atoko itxa. Ninoa kenakotari Teoso sākire. Teoso sākire ïroã ninoa ãkixinireẽ ikaikotini ïkapani. Erekari ninoa ãkixinire. Ninoa nirekari Teoso paniãtakiti ikaminina ikiniõtika. Eereka ninoa kamapitikari erekari Teoso ïkapani.

Tirikapi Pirena

(Marko 4.21-25)

¹⁶—Tirikapi iopotokaãkari iomaãtatari tirikapi kopiti ãki atxiïti? Isïkatatxi patapi itakatari atxiïti? Konapitini. Itano itakari tirikapi, ininiã iopinikari aapokotxi ãki ïroãkani atamarauatini ïkapani. ¹⁷ Ikinika iomaãtakori atamataãkako. Ikinika ipatakori apokaãkako, iopinikaremoni anikaãkako.

¹⁸—Erepaniko. Iteene pikenakotariko Teoso sākire, kotxi isãkire auakiti, Teoso sākire kïpitakari, Teoso sikari apikomoni imaroretxi iuamoni. Txamari Teoso sākire kenakotakari, isãkire makïpitakati, imarore xapiti iuamoni auakari makatzakaãkako —itxa Xesosi.

Xesosi Inoro, Itariakori Pakini

(Mateo 12.46; Marko 3.31-35)

¹⁹ Xesosi sãpirenauanãtakasaaki, inoro, itariakori pakini apoka iuaãtaã. Inirekamarina Xesosimoni apokinina, txamari kãkitipokoni ãkitari iua.

²⁰ Iuasaaki kākiti txari Xesosi:

—Pinoro, pitariakori porikiti auanãta. Inirekarina imisãkiretinii —itxana.

²¹ Ininiã Xesosi sãpiretari ikinimane:

—Teoso sākire kenakotakani, isãkire kïpitakani, ninoro atoko itxauana. Nitariakori atoko itxauana —itxa Xesosi.

Xesosi Iotokakiniri ïtima

(Mateo 8.23-27; Marko 4.35-41)

²² Æti õti Xesosi iereẽtaua kanaua ãki imoianariakorikata. Aiatana:

—Masa ipoa ipiniã —itxana imoianariakori.

Ininiã ïpiriãtana. ²³ ïpiriãtakasaakina, Xesosi imaka. Mokatanitika ïtima inataparata. Kataparari ïtima apokasaaki, tsakati kataparari apaka, ininiã ierepeẽpokataua. Iuasaaki kanaua ãki ãparaã xãpokaãpokata. Pamonõkoniri.

²⁴ Xesosi moianariakori õpirïkari.

—Apiananiri, Apiananiri, pimereka. Apinanapanoka.

Ininiã Xesosi õkitikaua. Ipaniãtari ïtima, tsakati pakini iotokini:

—Hīotokako —itxa.

Iuasaakipeka ĭtima, tsakati pakini iotoka. Itsorĭkaāta. ²⁵ Iuasaaki Xesosi txari imoianariakori:

—Kinirepa hĭte !auikano nota?

Itsorĭkaākatana, ipĭkarauakatana. Ninoakakarika isākirauatana:

—Kinakaripa ia kiki? Iua paniātari ĭtima, tsakati pakini iotokini, ininiā ninoa kĭpitari isākire —itxakakana.

*Kiki Maerekani Matamatakoni Auaĭtotakiti
(Mateo 8.28-34; Marko 5.1-20)*

²⁶ Eereka ipoa ipiniā apokana Xesosi imoianariakorikata. Ninoa potorikiniātaā Karirĕia tōpa. Ninoa apokiniātaā Xerasa tōpa. ²⁷ Xesosi kanĭkiĭtakasaaki, kiki apoka iuamoni. Xerasa sitatxitikiri iua. Maerekani matamatakoni auaĭtotari iua. Okananipe !itakaikari imāka. !Inirekari aapoko āki ikaikotini. Akauariā auanāta. ²⁸ Atamatakasaakiri Xesosi, akiripoakata. Iriākata Xesosi apisatoō. Maerekati matamatakoti akiritari Xesosi:

—Xesosi, Teoso ākiri, Apiananiri ākiri, kiatokopa pitxanoko? Namanaāi !pimisiritapeno —itxa.

²⁹ Ikara atoko itxa isākire, kotxi Xesosi paniātana maerekani matamatakoni takanapiniri iua kiki. Mitxi inirimane ĭtxikapiimari ĭto imasikani ĭkapani. ĭtxikarina iuako, ikiti kohĕtxiā. Txamari maerekati matamatakoti itotapekari imaĭkiniri, ininiā iua kiki kapatakari kohĕtxi. Maerekati matamatakoti txĭkitakari iua kiki mitekini kākiti mauakaniātaā.

³⁰ Xesosi aōkitakasaakiri iua kiki, ipimaāri:

—Kipa piuāka?

Ininiā maerekati matamatakoti txari:

—Nota uāka “Itori,” ninaāka —itxa.

Ikara atoko iuāka, kotxi itori maerekani matamatakoni auaĭtotari iua kiki.

³¹ Maerekati matamatakoti amanaāri Xesosi:

—Aariko mamapotōkire irikotimoni !piokanatapeua ate —itxa.

³² Iuaātaā auari kaiāopokori irariakori piratakoni. Inipokonātana oxiratari nopini. Maerekati matamatakoni amanaāri Xesosi:

—Pauiritaua irariakori āki aĭroini —itxana.

Ininiā Xesosi auiritana. ³³ Ininiā ninoa takanapari iua kiki. Irariakori ĭto āki ĭroāna. Iuasaakipeka ikinika irari miteĕkata. Iokiriĭkatana oxiratari. Kāuaāriāmoni ikomoākatana, ipĭpe itxana irariakori.

³⁴ Kikiakori irari piratakani itikari irari mitekini, ininiā imitekana sitatximoni. Anikapĭretarina itikakitina sitatxi auakanimoni, sitatxi mapara auakanimoni apaka. ³⁵ Ininiākara kākiti sari Xesosimoni ikamakiti imarotinina ĭkapani. Ninoa apoka iuamoni. Atamatarina iua kiki mitxi maerekani matamatakoni auaĭtotakiti. Iitopākanāta Xesosi apisatoō. Kamākepekari. Kiĭkitepekari apaka. Ininiā iuasaaki ninoa kākiti pĭkari Xesosi posotiire. ³⁶ Xesosi kamakiti itikakani sāpĭretari ninoa kākiti, Xesosi erekapeka itxĭkitakiniri iua kiki. ³⁷ Eereka ikinimane kākiti Xerasa tōpa auakani paniātari Xesosi ātiātaā isini ipĭkarena xika. Ininiā Xesosi iereĕtaua kanaua āki ipoa iuaĭkana ĭpiriātini ĭkapani. ³⁸ Iua kiki mitxi maerekani matamatakoni auaĭtotakiti amanaāri Xesosi:

—Pauiritano pitekata nisini.

Txamari Xesosi iokanataru aapokomoni.

³⁹ —Pikanapiriā paapokomoni. Pisāpĭretari kākiti Teoso kamakiti pitemoni —itxa Xesosi.

Ininiā iua sari ikini aapokotxitimoni. Isāpĭretari ikinimane kākiti Xesosi kaminiri iua erekapeka inini.

Xáiro Amanaãkiti Pirena
(Mateo 9.18-19; Marko 5.25-34)

⁴⁰ Xesosi kanapiripe, ipoa ïpiriãtini. Apokitakasaaki, kãkitipokoni apakapari Xesosi ipoxokoniritikana. Ninoa iãtapanãtari iua, ipiniã iua auakasaaki.

⁴¹ Iuasaaki kiki Xáiro inakori apoka iuaã. Iua auïtetxi itxaua aiko Xoteo apotiitiniãtaãua. Apoka Xesosimoni. Ikapotoreëkaua Xesosi apisatoõ.

—Masa naapoko. ⁴² Nota ãkero imatonõkaro, tosi ano auakaro, opinanapanoka —itxari Xesosi.

Iuakata Xesosi sikasaaki, kãkitipokoni ãkitari iua, ininiã ikaiarikaãpotana kãkiti.

Xesosi Mãka Maãtakakaro
(Mateo 9.20-22; Marko 5.25-34)

⁴³ Kãkiti sauaki oãua sito amianatakaro. Tosi ano oamianata oãrëka ! iotokinaro. Otxineirote !auaika, kotxi okinika otxineiroteë oïkitxitapekari pinïtxi siãkani, txamari erekapeka otxïkitakakiri !auari. ⁴⁴ Kãkiti sauaki oãpoka Xesosi porikimoni. Omaãtakari imãka mapotomatare. Omaãtakasaakipeka, oãrëka iotoka. ⁴⁵ Ininiã Xesosi pimaãri kãkiti:

—Kipa maãtakano?

Ikinimane kãkiti:

—!Ateni —itxana.

Ininiã Petro:

—Apiananiri, kãkitipokoni ãkitai. Ikinimane kãkiti tikakai.

⁴⁶ Txamari Xesosi:

—Kãkiti maãtakapitikano, kotxi iuasaaki nitapara sari iuamoni.

⁴⁷ Iuasaaki oa sito imarotari Xesosi imarotiniro oa maãtakiniri. Ininiã osa Xesosimoni otitanakiniritika. Okapotoreëkaua iua apisatoõ. Ikinimane okiãtaã osãpiretari Xesosi:

—Notara maãtakai namianatiniã. Nimaãtakasaakii, iuasaakipeka erekapekano —otxari.

⁴⁸ Ininiã Xesosi:

—Namarite, pauikari niposotiire, ininiãkara erekapekai. Pisipiniikaua erekaxinirepeka pinini —itxaro.

Xáiro ãkero Õkitikiko
(Mateo 9.23-26; Marko 5.35-43)

⁴⁹ Xesosi sãkirauanãtakasaaki, Xáiro aapoko potoriãkari apoka Xáiromoni.

—Pamarite !oãuaika. Pauiritari Xesosi kanapiriini —itxa.

⁵⁰ Xesosi kenakotari iminapiretakiti, ininiã Xesosi txari:

—!Pipïkarauatape. Pauikari nisãkire, ininiã iuaïkana oãuapanikako pamarite —Xesosi txari Xáiro.

⁵¹ Xesosi apokasaaki Xáiro aapoko, auitana Petro, Xoão, Txiako, Xáiro, Xáiro ïtanoro pakini ïroini iuakata.

⁵² Iuaãtaã ikinimane kãkiti txiapanãta. Imatinaniuatana amarini ipinini xika. Ininiã Xesosi:

—!Hïtxiapatape. !Opina. Oimakanãta —itxa.

⁵³ Ininiã ninoa napetari Xesosi, kotxi imarotarina amarini ipinini. ⁵⁴ Ininiã Xesosi paniãtana ninoa porikiti ipokïkinina. Eereka Xesosi maïkaro oa ãtokoro uako, akirita itxaro:

—ãtokoro, põkitikaua.

⁵⁵ Iuasaakipeka iuaïkana oa auãkipeka otxa. Oõkitikaua. Xesosi paniãtana oïri, onoro pakini nipokori isikinirona. ⁵⁶ Oïri, onoro pakini tsorïkaãta. Xesosi sãpiretana apanakini imasãpiretakanina ïkapani.

9

Xesosi Iokanatanana Imoianariakori Kākitimoni
(Mateo 10.5-15; Marko 6.6-13)

¹ Xesosi akiritana imoianariakori tosi apotiitiniuana ĩkapani. Iuasaaki isikataparatanana. Isikaposotiiretana maerekani matamatakoni iokanatinina ĩkapani, amianari imakatzakinina ĩkapani. ² Eereka iokanatanana imoianariakori kākitimoni Teoso auĩtetxi ininiãua isãpiretinina ĩkapani, amianatakani erekapeka itxĩkitakinina ĩkapani. ³ Xesosi txana ninoa:

—Hĩsikasaaki, !hanikapiri hĩtii. Na hĩtsonere !hanikape. Na sakora, na nipokori, na txineiro, na ãti himãka, !hanikape. ⁴ Kãkiti apakapakasaakii, iuaã ninoa aapoko hĩkaikota iua sitatxiti hãuakasaaki. ⁵ Kãkiti mapakapakaniãi, hĩtakanapari iua sitatxiti. Hõsipikasaakiri, hĩkaxipokariko kipatxi hĩkitiãkiri. Ikara oerekana iua sitatxiti auakani Teoso misiritanako ninoa, kotxi ! inirekarina ikenakotinirina Teoso sãkire —itxa Xesosi imoianariakorimoni.

⁶ Eereka imoianariakori potorika. Ninoa sari ikinipoko aapokotxiti. Isãpiretarina Teoso iokanapirena erekari aapokotxiã auakanimoni. Erekapeka itxĩkitakana amianatakani ikini aapokotxiti auakani.

Erotxi Nirekari Xesosi Aõkitini
(Mateo 14.1-12; Marko 6.14-29)

⁷ Erotxi Kariréia tõpa auakani auĩte kenakopiretari Xesosi pirena. Maerekaxiniretinoka itxa, kotxi kãkiti sãpiretari:

—Xoão kapatxisareri iuaĩkana auãki itxapekautau. Iuara Xesosi txaua — itxana.

⁸ Apanakini sãpiretari:

—Eríasi iuaĩkana uatxa auãki itxapekautau. Iuara Xesosi txaua — itxana.

Apanakinipekana:

—Teoso sãkire sãpiretakari kitxakapirĩka auakari iuaĩkana uatxa auãki itxapekautau. Iuara Xesosi txaua — itxana.

⁹ Erotxi txari:

—Notara paniãtari Xoão nopi tsotakiko, ininiã Xesosi kona Xoãoni. Kiripitipa Xesosi? ãtipirika nikenakopiretari iposotiire — itxa Erotxi.

Kinirão aõkitaka itxari Xesosi.

Sĩko Mio Kãkiti Xesosi Sikakienatini
(Mateo 14.13-21; Marko 6.30-44; Xoão 6.1-14)

¹⁰ Ninoa Xesosi iokanatakini kanapiripeka iuamoni. Ikinika ikamakitinana isãpiretarina Xesosi. Eereka Xesosi anikana ninoa kãkiti mauakaniãtaã, Petsáita sitatxiti takote. Ninoanoka sari iuaã. ¹¹ Txamari apanakini kenakopiretari Xesosi sinimoni, ininiã kãkitipokoni sari iua tikini. Ninoa apokasaaki Xesosimoni, Xesosi apakapana ipoxokoniritika. Isãpiretana Teoso auĩtetxi ininiãua. Erekapeka itxĩkitakana amianatakani.

¹² Tinĩtikita imoianariakori tosi pakini apoka iuamoni:

—Piokanatanana kãkiti aapokotxi imatokotinimoni inipokotinina ĩkapani, imakinina ĩkapani, kotxi uai aapokotxi mauakaniãtaã — itxarina Xesosi.

¹³ Txamari Xesosi txana:

—Hĩtekarako sikakienatanana ninoa.

Ininiã ninoa:

—Poiãonoka nipokori aua atemoni, sĩkonoka komiri, ipinoka ximaki pakini-nokara aua. !Apakata aiamotiniri nipokori kaiãopokori kãkiti asikakienatini ĩkapani — itxarina Xesosi.

¹⁴ Iuaãtaã kikiakorinoka sĩko mio auakata. Xesosi paniãtana imoianariakori:

—Hīpaniātari kākiti topākini, uai sīkoēta, apikomoni iuaīkana sīkoēta, apikomoni iuaīkana sīkoēta, txaāpokata kākiti —itxa. ¹⁵ Ininiā imoianariakori paniātari kākiti ikara atoko iitopākinina. Ininiā ninoa topāka. ¹⁶ Iuasaaki Xesosi kosekari komiri sīko, ximaki ipi pakini. Iaxiti ionakaāta, misākireta itxari Teoso:

—Peerekari ia nipokori pisikakiti —itxa.

Iuasaaki ixanakari komiri, ximaki pakini, sika itxari imoianariakorimoni, ininiā ninoa sikari kākitemoni. ¹⁷ Ikinimane nikari, kamitopeka itxana. Eereka Xesosi moianariakori amari nipokori itetakori. Ixāpokakarina kotari tosi pakini.

Petro Auikari Xesosi Teoso Mereēkiti Ininiāua
(Mateo 16.13-20; Marko 8.27-30)

¹⁸ Āti ōti Xesosi iuanani misākiretari Teoso. Eereka imoianariakori apoka iuamoni. Ipimaāna:

—Kiripa kākiti uākatano nota? —itxa.

¹⁹ Ininiā ninoa:

—Apanakini xinikakiti pite Xoão kapatxisarereri pitxaua. Apanakinipekana xinikakiti pite Eríasi pitxaua. Apanakinipekana xinikakiti pite Teoso sākire sāpiretakari kitxakapirīka auakari iuaīkana auāki inakari pitxaua —itxarina Xesosi.

²⁰ Ininiā Xesosi:

—Hītepekana, kipa hīte uākatano nota? —itxa.

Petro apakapapiretari:

—Pite Teoso mereēkiti kākiti iātapanātakiti pitxaua —itxa.

²¹ Ininiā Xesosi iteene pinitari ikara apanakinimoni imasāpiretakani.

Xesosi Sāpiretari Ipinini
(Mateo 16.21-28; Marko 8.31-9.1)

²² Ininiā Xesosi:

—Nota hītari iaxitikiri iteene natatsiitariko nimisiritiko. Kiomātxiakori, sasetotxi auīteakori, kaiōkatsoparerini pakini ! inirekano nota, ininiā nokaākako. Ipi āti ōtisaaki Teoso ōkitikanoko nota iuaīkana auāki ninini ĩkapani —itxari imoianariakori.

Xesosi Moianari Atāo Inakari
(Mateo 16.24-28; Marko 8.34-38)

²³ Eereka isāpiretari ikinimane:

—Notakata kinirāo sika pinakasaaki, piteka pinireēkiti kona pixinikape. Notakata kinirāo sika pinakasaaki, nota misiritiko atokokana pimisiriti-
taākako. Ia atoko pinirekiniā ikiniōtika, notakata pisapitikako. ²⁴ Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata. ²⁵ Atxiīti papakapari ĩkinipoko tiitxi, ikini itixiti auakani tii, pinakiti ĩkapani. Atxiīti iua tiitxi xika kona pikīpitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiīti ĩkinipoko tiitxi auinii? Konapitini. Apiaerekata Teosokata ātipirika pikaikotini. ²⁶ Pipētatiniano nota, pipētatinianari nisākire, nota kākiti itari iaxitikiri pētataiko pite uai nikanapiriāksaaki. Peerekari iuasaaki uai nikanapiriini ōti. Iuasaaki kākiti imarotariko niposotiire, niri posotiire, initiriakori iaxitikini posotiire apaka. Teoso nitiriakori erekarini itxauana. ²⁷ Atāo nisāpiretai, apanakini hīte uatxa uai auakanii, hīpinini apisapanika himarotari Teoso auītetxi ininiāua —itxa Xesosi.

*Moisesi, Eríasi Pakini Xesosi Aõkitini
(Mateo 17.1-3; Marko 9.2-13)*

²⁸ Áti semanati napaka atoko, Xesosi anikana Petro, Xoão, Txiako pakini. Ikanĩkana oxiratari nopini Teoso imisãkiretini ìkapani. ²⁹ Teosokata isãkirauanãtakasaaki, itoõ ipinipo itxa, imãka ponika, kasarori. ³⁰ Iuasaaki ipi kiki tokiã iuaã, Moisesi, Eríasi pakini. Isãkirauatana Xesosikata. ³¹ Ninoa iotximere aua, kotxi ipotorikana Teoso tixine. Isãkirauatana Xesosikata, Xesosi ipinini pirena, mapa semanati napaka atoko Xerosareẽ ipinini Teoso paniãtakiti ikamini ìkapani. ³² Iuasaaki Petro, Xoão, Txiako pakini imakanãta. Eereka imerekana. Atamatarina Xesosi iotximere. Atamatarina ninoa ipi kiki iuakata itiminina. ³³ Moisesi, Eríasi, takapiretakasaakiri Xesosi, Petro akiritari Xesosi:

—Koerekareri, erekari uai akaikotini. Makamari papiri ipi áti pakini, pite ìkapani, Moisesi ìkapani, Eríasi ìkapani —itxa.

Txamari maxikatiĩka isãkirauata. !Imarotari amanaãkiti.

³⁴ Petro sãkirauanãtakasaaki, katxiãri apoka. Xesosi moianariakori pĩkarauata katxiãri ãki auakasaakina. Katxiãri ákitana. ³⁵ Katxiãri ãki ikenakotaãka sãkiretxi:

—Ere namarite, nitiretakiti. Hĩkenakotariko iua sãkire —itxa.

³⁶ Isãkirauataka atoko Xesosi moianariakori atamatari Xesosinani. Eereka ! isãpiretarina itikakitina apanakinimoni. Masãkirenika itxana.

*Amarini Maerekati Matamatakoti Auaĩtotakiti
(Mateo 17.14-20; Marko 9.14-29)*

³⁷ Katimatinĩkata iokiriĩtana. Iuasaaki kãkitipokoni apoka Xesosimoni. ³⁸ Ninoa sauaki kiki akiritari Xesosi:

—Koerekareri, patamatari nota ãkiri imatonõkari namarite. ³⁹ Átipirika maerekati matamatakoti mãkari iua. Iuasaaki akiripoakata, okarakataua. Isorikipekata inamamoni. Maerekati matamatakoti kamatsiitari namarite. Poiãonoka itakanapari. ⁴⁰ Iteene namanaãpekari pimoianariakori omitikiniri, txamari !iposotarina —itxa Xesosimoni.

⁴¹ Ininiã Xesosi txari kãkitimoni:

—!Kauikarei hĩte. Maerekati kamakanii hĩte. Kipakinikananipa Teoso nirekatari hĩtekata nauini? Kipakinikananipa Teoso nirekatari hĩte nimĩteenekini? —itxa.

Eereka ipaniãtari iua kiki:

—Pamarite pimina uai.

⁴² Iua amarini apokaãpotakasaaki, maerekati matamatakoti irikari ixiti. Amarini okarakataua. Xesosi paniãtari maerekati takanapiniri amarini. Erekapeka itxĩkitakari amarini, ininiã isika iua iuaĩkana irimoni. ⁴³ Ikinimane tsorĩkaãta Teoso posotiire itikasaakina.

*Xesosi Iuaĩkana Sãpiretari Ipinini
(Mateo 17.22-23; Marko 9.30-32)*

Ikinimane tsorĩkaãtakasaaki, Xesosi misãkiretari imoianariakori.

⁴⁴ —! Himaxinĩkaretapiri uatxa nisãpiretakiti. Nota hĩtari iaxitikiri mĩkapiritaãkako. Nisikaãkako kãkitimoni ninoaka nirekakiti ikaminina ìkapani —Xesosi txana ninoa.

⁴⁵ Imoianariakori kenakotari Xesosi sãkire, txamari ! imarotarina isãpiretakiti. Teoso !nirekari ninoa imarotiniri Xesosi sãpiretakiti iuasaaki. Ninoa pĩkari Xesosi ipimainina isãkire oerekinina ìkapani.

*Kiripa Kãkiti Apiatakari Txataua?
(Mateo 18.1-5; Marko 9.33-37)*

⁴⁶ Āti ōti Xesosi moianariakori !auikakauana isākirena, kotxi inirekarina imarotiniarina apiatakari ninoa sauaki auakari. ⁴⁷ Xesosi imarotari ninoa xinikakiti, ininiã iminari amarini ninoamoni. Xesosikata tima itxa amarini.

⁴⁸ Iuasaaki Xesosi txana:

—Papakapiniãri amarini ia atoko inakari, papakapano nota apaka. Papakapiniãno nota, papakapari niokanatakiri apaka. Iuaka poiãotakakariua hĩte sauaki, iuarako apiatakari txauako —itxa Xesosi.

*Kiki Maerekani Matamatakoni Omitiãkari
(Marko 9.38-41)*

⁴⁹ Xoão sãpiretari Xesosi:

—Koerekareri, ate kenakotari kiki omitikinina maerekani matamatakoni pite uãkaã. Ate sãpiretari iua kiki ikara atoko inakari imakamakani, kotxi kona pimoianarini iua —itxa.

⁵⁰ Ininiã Xesosi:

—!Hĩotokakapiri ikara atoko inakari ikamini, kotxi iua kiki !omanataua ate. Iua apamonĩkaua ate —itxa.

Samaria Auakani !Apakapari Xesosi

⁵¹ Teoso tixine iuaĩkana Xesosi kanapiriini ōti apokaãpota, ininiã Xesosi ãkixinireẽ txari:

—Nisapitikako Xerosareẽmoni.

⁵² Iokanatarari kãkiti iua apisa, imakiniãtaã initinina ĩkapani. Ipixinipokoriti ninoa kãkiti nitari imakiniãtaã aapokotxi Samaria auakani auiniãtaã.

⁵³ Txamari kãkiti iuaãtaã linirekarina Xesosi apakapinina, kotxi iua nirekari Xerosareẽmoni isini. Samaria auakani omanatana Xerosareẽ auakani.

⁵⁴ Txiako, Xoão pakini kenakopiretari ikara ene. Iuasaaki ipimaãrina Xesosi: —Apiananiri, pinirekatari aamanainiri Teoso xamina iaxitikiri iokanatinini ninoamoni ixipokinirina ĩkapani?

⁵⁵ Txamari Xesosi pinitana, isākirena maerekani xika.

⁵⁶ —Nota, hĩtari iaxitikiri kona kãkiti nixipokini ĩkapanini napoka uai. Kãkiti maerekani nimakatzakini ĩkapanira uaimoni nina —Xesosi txari Txiako, Xoão pakini.

Eereka ninoa sari apikoxiti apanakini kãkiti auiniãtaãmoni.

*Kãkiti Xesosi Imoianatinina Nireẽkani
(Mateo 8.18-22)*

⁵⁷ Xesosi imoianariakorikata saãpotakasaaki kimaporiã, kiki txari Xesosi:

—Apiananiri, pite sinimoni nota apaka sako.

⁵⁸ Ininiã Xesosi:

—Karikori aripa auini. Kakoari kotipiriki auini, txamari nota hĩtari iaxitikiri nimakiniãtaã !auari. Pimoianatininiãno, ikara atoko pimisiritiko pinireka atxiĩti? —itxa Xesosi.

⁵⁹ Xesosi txari ãti kiki:

—Notakata pisako.

Txamari iua kiki:

—Koerekareri, merepanika ninirekari niãtapiniri niri ipinini —itxa.

⁶⁰ Ininiã Xesosi:

—Ikara piparĩka pauiritari ãti kamini. Piparĩka apiari uatxa aua. Pite sari kãkitimoni. Pisãpiretanako Teoso auĩtetxi ininiãua —itxa Xesosi iuamoni.

⁶¹ Āti kikipekana txari Xesosi:

—Koerekareri, nota pimoianari nitxamauako. Mitxi pauiritano nikanapiriini nauinimoni. Nitakapiretanapana ninirimane —itxari.

⁶² Ininiã Xesosi:

—Teoso kimaporeë potoriākari nirekiniāri mitxi ikamakiti iuaīkana ikamini, !apakata iparīkauatini aāuīte Teoso īkapani —itxa Xesosi.

10

Xesosi Iokanatana Setēta Pakini Kākiti

¹ Ikara inaāka atoko Apiananiri mereēna setēta pakini kākiti. Iokanatana ipi, iuaīkana ipi, iuaīkana ipi, itxaāpotana iokanatinina. Iokanatana iua sini apisapanika ikini aapokotxitimoni. Ninoa īkiika. Apokana Xesosi apisa.

² Xesosi txana ninoa:

—Kaiāori kākiti iposope auikiniri nisākire, txamari !imarotarina nisākire, kotxi !ikenakotapanirina. Ninoa kikio erekari atoko itxana. Imakinika iposope iuaā. Txamari, poiāoka parīkauatakani aua nisākire isāpiretinina īkapani. Ininiākara himisākiretariko Apiananiri kakikioteri iokanatinina parīkauatakani iua sākire auiākani apotiitinina īkapani. ³ Hīsa. Soti auīte anaakori ākitimoni iokanatiko atoko, niokanatai hīte kākitemoni, kotxi pamonōkonina ninoa. ⁴ Txineiro !hanikape. Tiitxi !hanikape. Āti hīkiti mata !hanikape. Kimaporiāpoā kākiti akiritakasaakii, !hīotokaāpotape kākitekata hīsākirauatini īkapani. Hīsapitiporiko niokanatinimoni. ⁵ Kākiti aapoko hāpokasaaki, merepitipanika hītxariko: “Namanaāri Teoso, ikamaerekaxiniretinina kākiti uai auakani,” hītxako. ⁶ Kaapokori nirekiniāri Teoso ikara atoko inakari ikaminana ninoa, Teoso kamapitikari hamanaākiti. Kaapokori manirekakaniāri, hīsāpiretana Teoso kona kamaerekaxiniretana ninoa. ⁷ Kaapokori apakapiniāi hīte, hīkaikotako iua aapokonoka. Āti aapoko, eereka āti aapoko kona hītxaāpotapeko iua sitatxiti hāuakasaaki. Iuaā ninoa sikakiti hinikini īkapani, hiātini īkapani hāpakapariko. !Hīpētauatape hāpakapiniri, kotxi hīte nota īkapani parīkauatakani hītxaua. Apakatapitika hāpakapiniri hīparīka īki.

⁸ —Aapokotxiātaā hāpokasaaki hāpakapikoā, iuaā hīsikiko hinikako, hiāta hītxaāpotako. !Hīxinikapiri ninoa sikakiti mapitxiri ininiua. Hinikariko. ⁹ Erekapeka hītxīkitakanako amianatakani iuaā auakani. Hīsāpiretana ninoa, kaiaapekari Teoso ninoa auīte ininiua tīkane. ¹⁰ Aapokotxiātaā himapakapakoniā, hīsa kākiti napaāporetxiā. Hīsāpiretana kākiti iuaā auakani: ¹¹ “Hāuiniākiri pani akitiākiri akaxipoka, kotxi !erekari uai, kotxi maerekati hīkama ate himapakapakaniā. Hīxinikariko, ate apoka uai Teoso auītetxi ininiāua asāpiretinii īkapani, txamari !hinirekari.” Ikara atoko hītxa sākiretako ninoamoni. ¹² Kākiti misiritiko ōtisaaki Teoso misiritanako kākiti Sotoma sitatxiti auakani ninoa maerekani xika, txamari Teoso apia misiritanako iua aapokotxiti auakani hīte mapakapakani, kotxi hīte sāpiretana Teoso sākire, iuaritika !auikarina. Kitxakapirīka Teoso sākire sāpiretakani !isana Sotoma sitatxitimoni —itxa Xesosi.

Kākiti Sitatxi Auakani Maerekati Matakanapakani

(Mateo 11.20-24)

¹³ —Hīte Korasiī sitatxiti auakani inipitika atatsiitariko misirikaretxi. Hītepekana Petsáita sitatxiti auakani apaka atatsiitariko misirikaretxi, kotxi nota kamapekari posotiiretxi hīte sauaki, txamari !hītakanapari himaerekani. Ikara posotiiretxi Sitoō sitatxiti, Txiro sitatxiti pakini auaākamako, kākiti iuaā auakani uatxakapokoikamani itakanapamarinako maerekati ikamakitina. Ninoa sako mata ieretakamanako, atapani iītoāna itakamanako, imaerekanina itakanapinina oerekinina. ¹⁴ Kākiti misiritiko ōti apokasaaki, Teoso misiritariko Txiro sitatxiti auakani, Sitoō sitatxiti auakani pakini, txamari iua apia misiritaiko hīte Petsáita sitatxiti auakani, hīte Korasiī sitatxiti

auakani apaka. ¹⁵ Hītepekana Kapanaoō sitatxiti auakani apiarini hinireka hininiãua, txamari maerekani misiritikoãtaã iuamonirako hōkapeẽkako — itxa Xesosi.

¹⁶ Xesosi misãkiretana imoianariakori:

—Hīte sãkire kenakotakani kenakotari nota sãkire apaka. Hīte mapakapakani ! apakapano nota apaka. Nota mapakapakani ! apakapari nota uaimoni iokanatakari apaka —itxana imoianariakori.

Setēta Pakini Kãkiti Kanapiriini

¹⁷ Ninoa setēta pakini kãkiti kanapiriã. Poxokonoka itxakatana.

—Apiananiri, maerekani matamatakoni apaka kīpitari asãkire, pite uãkaã aiokanatakasaakina —itxarina Xesosi.

¹⁸ Ininiã Xesosi:

—Ari, nitikapekari Teoso patimari iokanatiniri Satanasi, okaratxirari patimari imẽkokini atoko itxa. ¹⁹ Hīkenakota. Nota sikaposotiiretai hīte imini, kaxipiro pakini hīkatxaratini. Kona ioãkai hīte. Amokaiakari Satanasi pataparari, iuaritika hīposota hīokanatiniri iua, kotxi nota sikataparatai hīte. ! Auari hīte karotakani. ²⁰ Hīpoxokoniuata, kotxi maerekani matamatakoni kamari hīpaniãtakiti. Apia hīpoxokoniuatako, kotxi hīuãka Teoso tixine aãtsopateẽ iōkatsopatapeẽkaika iuaã hīsini ãkapani —Xesosi txana ninoa.

Xesosi Iri

(Mateo 11.25-27; 13.16-17)

²¹ Iuasaaki Erekar Matamatakoti kamapoxokonitari Xesosi, ininiã Xesosi misãkiretari Teoso:

—Niri, pitixine auakani auĩte pitxaua. Uai ikini itixiti auakani auĩte apaka pitxaua. Peerekai pite, kotxi kimarorerini, iuikakaniua kona poereka pimarore. Poiãorini, miuikakaniua poereka pimarore. Ari niri, ikara atoko pinireka. Ikara atoko papokaerekata —itxari iri.

²² Eereka imisãkiretari kãkiti:

—Niri sikapekano ikinika. Kãkiti !imarotano nota Teoso ãkiri nininiua. Nirinokara atão imarotano nota. Apaka kãkiti na atão imarotari niri. Notanokara imarotari niri, kotxi iua ãkiri nitxaua. Kãkiti nirekiniãri imarotiniri niri, nota oerekari niri iuamoni —itxa Xesosi.

²³ Eereka Xesosi aua imoianariakorikata. Ninoanani aua iuakata. Imisãkiretana:

—Teoso sikari erekari hītemoni, kotxi hīte atamatari nota kamakiti, hīte kenakotari nota sãpiretakiti. ²⁴ Nota sãpiretai hīte. Kitxakapiriãka Teoso sãkire sãpiretakani, auĩtetxiakori pakini kinirão atamataka txari hīte atamatakiti, txamari ninoa !atamatari. Ninoa nirekari hīte kenakotakiti ikenakotinina, txamari !ikenakotarina —Xesosi txari imoianariakori.

Kiki Karotakori Tīretakari

²⁵ Kiki Moisesi sãkire oerekakari apoka Xesosimoni. Inirekamari Xesosi kerokiniri isãkire.

—Koerekareri, kiripa nikama Teosokata ãtipirika nauini ãkapani? —itxa.

²⁶ Ininiã Xesosi:

—Kiripa patatsopata Teoso aãtsopateẽ? Pisãpiretano Teoso paniãtakiti —itxari.

²⁷ Ininiã iua kiki apakapapireta:

—Teoso paniãtaua: “Pitiretariko Apiananiri piTeosone, ikinipoko pinireẽkitiã, ikini pãkixinireẽ, ikini pitaparaxinireẽ, ikinipoko pixinikakitiã pakini.” Apaka Teoso paniãtaua: “Piteka pitiretiniãua atokotxikana, pitiretariko ãti,” itxa.

²⁸ —Atãopitikara papakapapiretano. Ikara pikaminiã, pauapika ãtipirika Teosokata —itxa Xesosi.

29 Txamari iua kiki ! inirekari ikara atoko inakari ikamini, ininiã iua pimaãri Xesosi:

—Kiripa ãti nitiretini ïkapani?

30 Xesosi apakapapiretari, ia sãpirenatxi atão inakari oerekiko isãpiretini:

—Kiki potorika Xerosareẽ. Inirekari Xerikoo sitatxitimoni isini. Ipix-inipokoriti kiïtiririni maïkari iua. Iïtirïkarina imãka, itii pakini, noropata, karota, itxarina. Mauãkixiniretinoka itakanaparina iua kiki. 31 Iuasaaki sasetotxi iãpota iua kimaporiti. Iua atamatari iua kiki karotakori, txamari !imaãkatari. Iopiriãri, napa, ïkorape itxa. 32 Eereka kiki Arevii apika mekaniri, sasetotxiakori moianatakari apoka. Iua apaka atamatari iua kiki karotakori, txamari iua sasetotxi atokokana !imaãkatari. Iopiriãri, napa, ïkorape itxa. 33 Eereka kiki Samaria tãpakiri iãpota iua kimaporiti. Iua apoka iuaã. Atamatari iua kiki maïkapekori, ininiã iua amonïkari. 34 Iuamoni isa. Arokari ikaro ipiniã. Ipitari ikaro iïtxiã. Mãkatxi mataã iapirika itxari ikaro. Eereka õkitika itxari, ipira poho nopini taka itxari. Anikari kãkiti imakiniãtaã aikotimoni. Iuaã imoiaãri. 35 Katimatinïkata isikari txineiro kaapokorimoni. Ipi ota pirata kamakori isika. “Nisipekako. Pite moiaãriko ia kiki. Apikomoni-panika txineiro pinirekiniã ikiena ïkapani, nikanapiriãkasaaki niïkitxitai,” itxa Samariakiri, —itxa Xesosi Moisesi sãkire oerekakarimoni.

36 Xesosi pimaãri iua:

—Ipi ãti kikiakori iãpota iua kimapori. ïkiripa iua kiki kiïtiririni maïkakiti tiretakari? —itxa.

37 Ininiã iua Moisesi sãkire oerekakari:

—Ari, Samariakirinokara tiretari iua —itxa.

Ininiã Xesosi:

—Pisipe. Samariakiri kamakiti atoko inakari pikamako, kotxi iua tiretari ãti.

Xesosi Motikaẽtaro Mata, Maria Pakini

38 Xesosi imoianariakorikata sipeka. Apokana aapokotxiãtaã. Iuaã sito Mata inakoro apakapana oaãpoko. 39 Oïtaro Maria inakoro topãka Apiananiri takote isãkire okenakotini ïkapani. 40 Mata maerekaxiniretonoka otxa oparïka ito inini xika. Ininiã osari Xesosimoni.

—Apiananiri, nitaro topãkanãta ereẽ. Notanani parïkauanãta. Pitemoni erekari atxiïti? Pipaniãtaroko notakata nipokori okamini —otxa.

41 Ininiã Xesosi:

—Mata, Mata, maerekaxiniretonokai pitxa, kotxi piparïka ito inini xika.

42 ãtinoka pikamini tïkane ninireka. Maria mereẽri ikara. Omereẽri nota sãkire okenakotini. Oa mereẽkiti apiaerekata, ininiã !niotokakaro oa nisãkire okenakotini —itxa Xesosi.

11

Teoso Misãkiretiko Pirena (Mateo 6.5-15; 7.7-11)

1 ãti õti Xesosi misãkiretari Teoso. Ixipoka atoko ãtika imoianari txari:

—Apiananiri, Xoão oerekari imoianariakori Teoso imisãkiretinina. Iua atokokana poerekaua ate Teoso amisãkiretini. Natokopa itxa Teoso amisãkiretini?

2 Xesosi apakapapireta:

—Teoso himisãkiretakasaaki, ia atoko hïtxako:

“Aïri, iaxiti auakari, ate nirekari piuãka paxitiko. Anirekari ikini itixiti auakani auïtetinii pite. Pite tixine pinireẽkiti kamiko atokokana, anirekari pinireẽkiti kamiko ïkorapokoriti.

³ Nipokori ikiniōtika pisikauako.

⁴ Pimaxinīkaretariko maerekati akamakiti. Maerekati atemoni kamakori amaxinīkaretini atokokana, pimaxinīkaretariko. Kona panikapeua aātaerekatikomoni. Pisikakauako ate, maerekati sauaki aāuakasaaki.”

Ikara atoko hītxako Teoso himisākiretini —itxa Xesosi.

⁵ Eereka Xesosi oerekana imoianariakori:

—Atxiīti apanīkanōka pisa pimoianari aapokomoni nipokori pamanaini īkapani. Ininiā pakiritari iua: “Nimoianari, ipi āti pakini komiri pisikano.

⁶ Naōkimanere iāpotakari uatxaika apoka naapoko. Natxinoka itxape. Nipokori !auari nisikiniri,” atxiīti pitxari iua.

⁷ —Atxiīti pimoianari iroko āki apakapapiretai: “!Pakirinātapeno. Naapoko tore katoreri. Nota, namariteni apaka imakanātape. !Niposota nōkitikiniua, nipokori nisikinii.”

⁸ —Pimoianari itxaua iua, iuaritika atxiīti !inirekari ōkitikiniua. Iuaīkana, iuaīkana pakiritiniāri pimoianari, iua ōkitikapitika. Ikini nipokoriti pinirekakiti isikaiko, iuaīkana imakini īkapani. Iua pimoianari na atoko itxa Teoso. ⁹ Ininiākara pamanaāriko pinirekakiti, ininiā Teoso sikapitikai. Pinitariko pinirekakiti, ininiā papokapitikari. Pakiritariko Teoso, ininiā iua apakapapiretai. ¹⁰ Amanarauatakari apakapapitikari amanaākiti. Nitarauatakari apokapitikari initakiti. Teoso akiritakari apakapapiretaākapitika.

¹¹ —Hīte irītxiakori, hamariteni amanainiāi komiri, kaikani hīsikatana hamariteni? Ximaki amanainiāna, iminikani hīsikatana hamariteni? ¹² Patari naki amanainiāna, kaxipirokani hīsikatana hamariteni? Konapitini. ¹³ Hīte maerekati kamakani hītxaua, iuaritika himarotari erekari hamaritenimoni hīsikini, ininiā hīri iaxiti auakari, erekarinani kamakari, iua sikapitikariko Erekari Matamatakoti hītemoni hamanainiāri iua —itxa Xesosi.

*Maerekani Matamatakoni Omitikiko
(Mateo 12.22-32; Marko 3.20-30)*

¹⁴ Āti ōti Xesosi omitikari maerekati matamatakoti masākireti. Iua maerekati matamatakoti sipeka atoko, iua kiki mitxi maerekati matamatakoti auaiātotakiti posotari iuaīkana isākirauatini. Kākiti Xesosi kamakiti itikakani tsorīkaānāta. ¹⁵ Ātikaka ninoa txari:

—Satanasi, maerekani matamatakoni auīte, iuakara sikataparitari Xesosi maerekani matamatakoni omitikini.

¹⁶ Apanakinipekana nirekari Xesosi kerokiniri, ininiā itxarina Xesosi:

—Takaōtxikari, Teoso posotiire poerekaua ate, aātamatiniri īkapani, Teoso iokanatinii īkorapokoriti aimarotini īkapani —itxarina.

¹⁷ Xesosi imarotari ninoa xinikanātakiti, ininiā iua txana:

—Kākiti tixine auakani, ninoakakarika inaiatakakiniāuana, ! apakata. Ixipokakakauana. Iua atokokana kākiti aapokoā auakani inaiatakakiniāuana, ninoakakarika ixipokakakauana. ¹⁸ Iua atokokana Satanasi nitiriakori, ninoakakarika inaiatakakiniāuana, Satanasi tapara xipokako. Ikara atoko ininiā, kona atāo hīte sākire, nota iokanatinina Satanasi nitiriakori, maerekani matamatakoni, Satanasi taparaā. Ikara hīsākire kona atāoni. ¹⁹ Hīte sāpiretano, maerekani matamatakoni Satanasi taparaā nomitika, ininiākara kitaparaāpa hīte moianariakori omitikana maerekani matamatakoni? Ninoa omitikana maerekani matamatakoni Teoso taparaā, ininiā ninoakara oerekari !atāo hīsākire nota pirena. ²⁰ Teoso posotiireē nomitikari maerekani matamatakoni. Ikara atoko ininiā, Teoso oerekai iua apokapeka hītemoni hīauīte inini īkapani.

²¹ —Kiki pataparari ikeeko iposope inakari moiainiāri aapoko, kona kiīfrikikori itii. ²² Txamari āti kiki apiataparata inaiatiniāri, iriākata, ininiā

anikapitikari kaapokori ikeeko. Mitxi iua kaapokori sãkire: “Nikeeko auiniã, kona kamakatzakikori nitii,” itxama, iuaritika kiki apiataparatakari ïtirïkari itii. Eereka imoianariakorimoni ixanakari tiitxi.

²³ —Notakata maparïkauatakani omanatano nota. Imamoianatakaniãno, inirekari niparïka ixipokini —itxa Xesosi.

Maerekati Matamatakoti Kanapiriini Pirena
(Mateo 12.43-45)

²⁴ Iuaïkana Xesosi sãpirenauata:

—Maerekati matamatakoti omitikikosaaki, kãkiti itakanapakasaaki, isaãpota ãparaã makipakaniãtaã auiniãtaã initini ïkapani. Imapokakaniãri, “Tuaïkana nikanapiriãko mitxi nauinimoni,” itxa. ²⁵ Iuaã apoka. Iua aapoko mitxi inakari iuasaaki peereri. Oeretapeëkaika. ²⁶ Ininiã apana apikomoni setxi pakini maerekani matamatakoni, apia maerekanitakani. Ninoa ïkinikana ïroãtotari iua kiki. Iua ïtoã aua itxana. Iuasaaki oitope maerekani matamatakoni misiritari iua kiki, ininiã apiata itsii inikoriã. Mitxipe ãtinoka maerekati matamatakoti paniãtari iua maerekati ikamini. Eereka oito paniãtari iua —itxa Xesosi.

²⁷ Xesosi sãkirauataka atoko, sito iuaã kãkiti sauaki auakaro txari Xesosi:

—Pite auãkïtakakaro, pite axitakakaro, poxokoniuaata, kotxi Teoso sikari erekari oamoni —otxa.

²⁸ Xesosi apakapapiretaro oa:

—Ari, inipitikara. Iuaritika Teoso sãkire kenakotakani, isãkire auiaãkani, apia poxokoniuaatako, kotxi Teoso sikari apikomoni erekari ninoamoni — itxa Xesosi.

Xonasi Pirena
(Mateo 12.38-42; 16.1-4; Marko 8.11-13)

²⁹ Kaiãopokori kãkiti apokaãpota Xesosi takote. Iuasaaki Xesosi txari:

—Kãkiti uatxarini !erekana. Hïte nirekari noerekinii Teoso takaõtxikare, iposotiire. Konapitini. Kona noerekai hïte. Kitxakapirïka Teoso sãkire sãpiretakari Xonasini inakori auakasaaki, Teoso kamari posotiiretxi. Ikara atoko inakari posotiiretxi Xonasini auakasaaki, iuaïkana ikamapanikariko. Iua posotiiretxi Teoso takaõtxikare itxapanikaua hïte ïkapani. Iua takaõtxikarinoka Teoso takaõtxikare hïte ïkapani. ³⁰ Kitxakapirïka Nïnivi sitatxiti auakani imarotari Teoso iokanatiniri Xonasi ninoamoni. Iua atokokana kãkiti uatxa auakani imarotariko Teoso iokanatinino nota kãkiti itari iaxitikiri ninoamoni.

³¹ —Kitxakapirïka sito Sapaã auakani auïte sari õtakoxiti auïtetxi Saromão inakorimoni imarore okenakotini ïkapani. Kãkiti misiritiko õti apokasaaki, oa sito txitanako kãkiti uatxa auakani, kotxi uatxa uai aua Apiatakari. Iua Saromão auïtetxi itxaua, iuaritika uatxa uai aua auïtetxiakori auïte. Txamari kãkiti uatxa auakani !inirekari ikenakotinirina nota sãkire.

³² —Kãkiti misiritiko õti apokasaaki, kãkiti Nïnivi sitatxiti auakani txitaiko hïte ïkorasaaki auakani, kotxi ninoa kenakotari Xonasi sãkire. Iuasaaki itakanaparina maerekati ikamakitina. Uatxa uai aua Apiatakari. Xonasi poiãoka. Hïte kenakotapekari nota sãkire, txamari himaerekani !hïtakanapa —itxa Xesosi.

Tirikapi ïtotxiãkiri Pirena
(Mateo 6.22-23)

³³ Iuaïkana Xesosi sãpirenauata:

—Kãkiti iopotokakasaakiri tirikapi, itano itaka ïkinimane ïroãkani atamarauatini ïkapani. !Ikipatari tirikapi. !Iomaãtari tirikapi kopiti ãki.

³⁴ Poki tirikapi atoko itxa piïto ïkapani. Poki ereka inakasaaki ipinikare

aua pākixinireē. Poki maerekanisaaki, pākixinireē mapiāriko. ³⁵ Erepaniko. Atxiīti piuākatari ipinikare pākixinireē auini, txamari atxiīti ipiānoka auari pākixinireē. ³⁶ Ipinikarenoka pākixinireē auiniā, ipiā na xatiki auinii, tirikapi iopinikinii atoko itxa —itxa Xesosi.

Pariseoakori Maerekani
(Mateo 23.1-36; Marko 12.37-40)

³⁷ Xesosi sākirauataka atoko pariseo aiatarari Xesosi:

—Manipokota naapoko —itxari.

Ininiā Xesosi sari iuakata. Apokaāka atoko, iitopāka inipokotini ĩkapani.

³⁸ Iua pariseo tsorīkaānāta Xesosi marokauakotakaniāua inipokotini apisa, kotxi iuasaaki Xesosi ! ikamari Xoteo kiomaneakorini oerekakiti iaōka.

³⁹ Ininiā Xesosi:

—Hīte pariseoakori arokari hīto, txamari hākixinire patxikopiīri, kotxi maerekatnoka hīkama. Kapotxinaniri hītxaua. Iākoanatxi inopininoka arokiko atoko hītxa. Pirato inopininoka arokiko atoko hītxa. ⁴⁰ !Kiīkitei hīte. Teoso hīto kamakari kamari hākixinire apaka. ⁴¹ Iākoanatxi āki auakari iāriā hīsikako matxineirotenimoni. Hīpratone āki auakari nipokori hīsikako matxineirotenimoni. Hītiretariko apanakini. Ikara atoko hīkaminiā, Teoso atamatari hākixinire ereka inini.

⁴² —Hīte pariseoakori misiritaākako. Hīte sikari ipixini hītakare kiki auakari Teosomoni Moisesi paniātakiti iaōka. Apikomoni hīkama, kotxi ipixini takari kanaua āki hītakakiti apaka hīsika Teosomoni, oteraā, seporīa hīsika. Erekapitikamari hīte sikakiti Teosomoni, txamari himisirienetari kākiti. Teoso !hītireta. Erekarari ipixini hītii hīsikiniri Teoso. Iuakatikana erekarari atāo hīkaminari kākiti. Erekarari atāo hītiretiniri Teoso.

⁴³ —Hīte pariseoakori misiritaākako. Hīte potxitari hīitopākini kākiti apisatoō, aiko āki Xoteo apotiitiniātaāua kākiti atamatinii ĩkapaninoka. Nipokori sikaretikoātaā hāuakasaaki, hīte apokaerekatarari kākityokoni paxitinii hīte koerekareri hininiāua.

⁴⁴ —Hīte pariseoakori misiritaākako. Akauari matakaōtxiākotari atoko hītxa. Iua nopini kākiti napa imimarotakoniā, kotxi hīto peerekari, txamari hākixinire !erekari. Akauari āki arakakari atoko itxa hākixinire —itxa Xesosi.

Moisesi Paniātakiti Oereēkani Maerekani

⁴⁵ Ikara sākiretxiti kiki Moisesi paniātakiti oereēkari kenakotakasaaki, omanākarauata. Itxari Xesosi:

—Koerekareri, ikara atoko pisākirauatiniā, ate apaka “maerekati kamakani” pitxataua ate —itxari.

⁴⁶ Ininiā Xesosi:

—Hīte Moisesi paniātakiti oereēkanii hītekanerako misiritaākako. Hīte paniātari kākiti hīteka paniātakiti ikaminina. Ninoa ! iposotarari ikinika hīpaniātakiti ikaminina. Iminani ninoa porikiā hītakini atoko hīkamanāta hīte. !Iposotarina anikinirina. Hīte apaka !hīkamari hīteka paniātakiti.

⁴⁷ Hīte misiritaākako. Hīte kamari takaōtxikari peereri Teoso sākire sāpiretakanini ikatikoātaā hītakini. Txamari hīte atokiriakorinikara okapena ninoa Teoso sākire sāpiretakanini. ⁴⁸ Iuaritika hīte sāpiretari ikinimane hāpokaerekatniri hīte atokiriakorini kamakiti. Txamari ninoara okana Teoso sākire sāpiretakanini. Hītera takari takaōtxikari peereri ninoa Teoso sākire sāpiretakanini akauariātaā, ininiā kākiti uākatari hīpaxitinina ninoani, txamari !hīkamari ninoani paniātakiti.

⁴⁹ —Paimatireri Teoso, kotxi mitxipe imarotarari ninoa kamakiti tīkane. Mitxipe iua txari: “Nota iokanatanako nisākire sāpiretakani, niokanapirena

aniākani pakini ninoamoni, txamari ninoa okapanikana apanakini. Imisir-itapanikana apanakini,” itxa Teoso. ⁵⁰ Kākiti uatxa auakani misiritaākako, Teoso sākire sãpiretakanini okiko xika. Teoso itixi ikamakasaakipeka ipotorika Teoso sākire sãpiretakanini okiko. ⁵¹ Merepitipanika Apeo inakori okapeēka. Eereka apanakini okaãpotapeēka. Imapotōkire okakori Sakaria inakori. Teosomoni sikakori takikoãtaã takote, Teoso Auini Pakitaãtaã takote apaka, iuaã okapeēka Sakaria. Inipitikara nota sãpiretai h̄ite, uatxa auakani misiritaākako ninoa Teoso sākire sãpiretakanini okiko xika.

⁵² —H̄ite Moisesi paniãtakiti oereēkani misiritaākako. H̄ite kipatari atão inakari Teoso iokanapirena. H̄ite apaka !auikari ikara. !H̄auritari apanakini auikiniri —itxa Xesosi.

⁵³ Ikara Xesosi sākire xika, Moisesi paniãtakiti oereēkani, pariseoakori pakini tsoata, Xesosi omanatinina. Ātipirika ipimaãnãtapikarina Xesosi.

⁵⁴ Inirekarina Xesosi kerokiniri isākire, imaĩkiko ĩkapani.

12

Kipatakori !Auari

(Mateo 10.26-27)

¹ Kākitipokoni apotiitaua kinapokopeka, ininiã ikatxarakititakauana. Iuasaaki Xesosi merepanika òtākikana imoianariakori:

—Erepaniko pariseoakori sākire. Pamonōkoniri isākirena, kotxi ! ikamarina isākirena iaōka. Ikara imaerekanina kipataua pão tireēkari pani koketakori atoko itxaua. Eereka imarotaãka imaerekani. ² Ikinika seretakori oerekaākako. Ikinika kipatakori imarotaãkako. ³ Ininiã ipiãpokoã pisãpiretakiti, pokamara imarotaãkako. Aapokotxi katoreri āki pimaasakapiretakiti aapokotxi nopini akiritaākako ikinimane imarotiniri ĩkapani.

Kipa Apĩka?

(Mateo 10.28-31)

⁴ —Nimoianariakori nõtākikapanikai h̄ite. !H̄ipĩkapiri h̄ite okakani tĩkane. H̄iitonanira iposotana okinina. H̄ixinire !iposotana okinina. ⁵ Nisãpiretai h̄ipĩkakiti tĩkane. Teosora h̄ipĩkako. Iuara posotari h̄iito okini, eereka iposotari iokanatinii maerekani misiritikoãtaã. Ari, iuara h̄ipĩkako.

⁶ —Kiripa ipi ipi āti pakini kotipiriki karone? Poiãonoka txineiro, ota ipinoka. Iuaritika Teoso !imaxinĩkaretari ātika kotipiriki. ⁷ Kipakinipa piãko pikiiã auakari aua? !Pimarotari. Teoso imarotapitikari, kotxi iteene inĩkatai, ininiãkara !h̄ipĩkarauatape. Kotipiriki ĩki poião, iuaritika Teoso tiretari kotipiriki. Kaiãopokori kotipiriki auiniã, iuaritika h̄ite ĩki apiata, ininiã Teoso tiretapitikai h̄ite —itxa Xesosi.

Xesosi Nakitiakori

(Mateo 10.32-33; 12.31-32; 10.19-20)

⁸ Xesosi sãpirenauatapanika:

—Apikomoni nisãpiretai. Kākiti ikinimanemoni: “Xesosi nakiti nitxaua nota,” inakari, iua atokokana nota h̄itari iaxitikiri txako Teoso nitiriakorimoni: “Nota nakitipitikara iua,” nitxako. ⁹ Kākiti ikinimanemoni: “Xesosi nakiti !nitxaua nota,” inakari, iua atokokana nota h̄itari iaxitikiri txako Teoso nitiriakorimoni: “Kona nota nakitini iua,” nitxako.

¹⁰ —Kākiti misākirepiretiniãno nota h̄itari iaxitikiri, eereka amanainiãri Teoso ikara imaerekani imakatzakini, ininiã Teoso makatzakapitikari. Kākiti misākirepiretiniãri Erekari Matamatakoti, !kimakatzakikori ikara maerekati ikamakiti.

11 —Hanikikosaaki aiko Xoteo apotiitiniãtaãua hãpoĩtikoã, hanikikosaaki auĩtetxiakorimoni hãpoĩtikoã, mitxi !hĩxinikapiri hĩte apoĩtakani hãpakapapiretini. Maerekaxiniretinoka !hĩtxape. 12 Iuasaaki ninoa apoĩtakasaakii, Erekarì Mata-matakoti sãpiretaiko hĩte hãpakapapiretini ìkapani —itxa Xesosi sãkire.

Kiki Katxineiroteri Mũkiteti

13 Kiki kãkitipokoni sauaki misãkiretari Xesosi:

—Koerekareri, pipaniãtari nitari sikinino nota ipixini aĩrini tii ipĩkasaaki itakanapakiti —itxa.

14 Ininiã Xesosi:

—Naõkimanere, kona nota parĩkani pirini tii nixanakini —itxa Xesosi.

15 Ininiã Xesosi misãkiretana ikinimane:

—Erepaniko. !Erekarì tiitxi iteene pinirekini. Kapotxinani !hĩtxape. Itomaneri tiitxi !itxĩkitakai okanani pauini —itxa Xesosi.

16 Ininiã Xesosi sãpiretari ia sãpirenatxi atão inakari oerekiko:

—Kiki katxineiroteri aua kikio mitari. Itakare peerekari, kaiãopokori.

17 Ixinikaxitita ãkixinireẽ: “Nãpa ninĩkatari nikiena? Nikiena nĩkatikoãtaã xapitiki. !Apakata itomaneri nikiena ìkapani. Kipa nikama? 18 Ari, nimarotari nikamakiti tĩkane. Nõtìkariko nikiena nĩkatikoãtaã. Iuaĩkana nikamari ãti mitari. Iuaã ikinika nikiena, nitii apaka ninĩkata. 19 Eereka notaka nitxauako: ‘Peerekano nota. Kaiãopokori nikiena. Kaiãopokori nitii. Apakatapitikako kaiãopokori anokanani ìkapani. Ininiã !niparĩkauataika. Ninipokotako, niãtako, nipoxokoniuatako nitxako,’ ” itxa iua kiki. 20 Txamari Teoso misãkiretari iua: “Kĩĩkitei pite. Uatxa ia ìkanõkati pipinako, ininiã kipa apakapatari ikinipoko pikiena, pitii apaka?” itxa Teoso.

21 —Ikara atoko itxa kãkiti tiitxinoka xinikakari, Teoso maxinikati —itxa Xesosi ikara sãkiretxiti ixipokini.

Teoso Nĩkatiniua Ate
(Mateo 6.25-34)

22 Ininiã Xesosi misãkiretari imoianariakori:

—Ininiãkara nota sãpiretai hĩte, maerekaxiniretinoka !hĩtxape, hiniãkiti nire, mãkatxi hĩeretaãkiti nire. 23 Nipokori, mãkatxi pakiniinoka kona txĩkitakari pauini ereka inini. Nipokori, mãkatxi pakini poiãoka. 24 Hãtamatarì kotipiriki. Ninoa !itakarauata. !Amarina ikiena. !Ipotetarina ikiena. Iuaritika Teoso sikakienatana ninoa. Teoso nĩkatiniãri kotipiriki, inĩkatapitikai hĩte apaka. Hĩte ìki apiata. 25 Kinirepa maerekaxiniretinoka pitxa? Pimaerekaxinirene !itxĩkitakai apikomoni ãti oara pauini. 26 Pimaerekaxinirene kona txĩkitakai axapitiki apikomoni pauini, ininiã kinirepa maerekaxiniretika pitxa?

27 —Aãui pixinikako. Kona aãui parĩkauata. !Ikamari imãka, iuaritika aãui peereri. Kitxakapirĩka auĩtetxi Saromão inakori, iteene katiiri itxaua. Kaiãori imãka ereri, iuaritika apia ereri ikinika aãui. 28 Aãui !okanani aua. Uatxa aua. Katana ikatikata iõtikaãka. Iuaritika Teoso nĩkatari aãui. Ininiã apiata inĩkakai hĩte. Ikamamãkatapitikai. Poiãonoka hĩte auikari Teoso sãkire. Ikara xika maerekaxiniretinoka hĩtxa. 29 Ininiãkara maerekaxiniretinoka !hĩtxape. !Hĩxinikanãtapiri nipokori mauakanisaaki, iãriã mauakanisaaki. 30 Kãkiti Teoso sãkire mauĩãkani ikiniõtika maerekaxiniretinoka itxana imãkana ixinikinina xika, inipokore ixinikinina xika. Hĩri imarotari himãka hinirekini, hĩkiena hinirekini. 31 Merepitipanika pinirekariko Teoso piauĩte ininiãua. Iua nireẽkiti pikamako, ininiã, himãka, hĩkiena apaka Teoso sikaiko hĩte —itxa Xesosi sãkire.

Hīparīka Īki Nīkatiko
(Mateo 6.19-21)

³² —Ininiā hīte ninakitiakori !hīpīkarauatape, kotxi hīri apokaerekatari isikinii ikinipoko erekari iua auītetxi ininiātaāuakiri. ³³ Ikinika hītii hīvētxitako. Txineiro hīsikako matxineirotenimoni. Ikara atoko hīkaminiā, hīparīka ĩki auapitika Teoso tixine. Iuaā hīparīka ĩki !ixipoka. Kītiriri !ītirīkari. Kīiriki !inikari. Iuaā hinīkatariko hīparīka ĩki. ³⁴ Erekari hīparīka ĩki Teoso tixine auiniā, ininiākara iuaā pixinikapika. Iuaā pinirekari pauini —itxa Xesosi.

Nitiritxi Erekarini

³⁵ Xesosi sāpirenauatapanika:

—Himerekako, kamāka hītxako. Tirikapi hīopotokakako. Iposope hītxako nīparīka hīkamini ĩkapani. ³⁶ Nitiritxi ipatrāotena iātapakani atoko hītxako. Ipatrāotena sari ĩtanorouatakari kiiniritemoni. Initiriakori iātapari ikanapiriini. Apokasaaki, akiritakasaaki, pakoteri initiriakori matakakari itore ipatrāotena ĩroini ĩkapani. Ninoa nitiritxi atoko hītxako. ³⁷ Patrāo apokasaaki initiriakori merokapanika inakasaaki, iātapanātakasaakiri iua, ininiākara erekapitikari. Himarotatari patrāo kamakiti? Iua ieretakari imāka iparīkauatini ĩkapani. Ipaniātana ninoa topākini. Eereka isikakienatana initiriakori. ³⁸ Eerekapitikari ipatrāotena apokasaaki imirekiniāna. Atxiīti apanīkanōka apoka ipatrāotena. Atxiīti imaropirīkata apoka ipatrāotena, iuaritika iposope itxana, ininiā erekapitikari.

³⁹ —Hīxinikari ia. Kaapokori imarotaākamariko kītiriri apokini, !auritamarike iua aapoko ĩroini itii ĩtirīkini ĩkapani. ⁴⁰ Hītepekana, hīte apaka iposope hītxako, kotxi nota hītari iaxitikiri kanapiriāko. Iuasaaki, “!Apoka uatxa,” hinakasaaki, iua ōtipitika nota kanapiriā uai —itxa Xesosi.

Nitiritxi Erekari, Nitiritxi Maerekati Pakini
(Mateo 24.45-51)

⁴¹ Petro misākiretari Xesosi:

—Apiananiri, ikara sāpirenatxi atāo inakari oerekiko pisāpiretakiti, atenani poerekini ĩkapanikani? Ikinimane poerekini ĩkapanikani ikara pisāpireta? —itxa Petro Xesosimoni.

⁴² Ininiā Xesosi:

—Nitiritxi kimaroreri ipatrāote paniātakiti kamakari ia atoko itxako. Iuara apanakini nitiritxi auīte itxaua. Iuara sikakienatana apanakini nitiritxi nipokotiko manapi. ⁴³ Nitiritxi ipatrāote paniātakiti iaōka kamakari poxononiata ipatrāote apokasaaki, kotxi ipatrāote paniātakiti iaōka ikama. ⁴⁴ Ipatrāote auiritariko iua ikinika itii, aapoko, ikikiote pakini inīkatini.

⁴⁵ —Txamari atxiīti āti patrāo nitiri !inirekari ipatrāote paniātakiti iaōka ikamini, ipatrāote auapokotini xika. Atxiīti inoropatari apanakini ipatrāote nitiriakori, apanakini ipatrāote niteroakoro apaka. Atxiīti inipokota, kapoāro iāta, ipoāta. ⁴⁶ Ipatrāote apoka initiri mimarotakanisaaki, ininiākara initiri !iposopanika ipatrāote apakapini. Ikara xika ipatrāote misiritari iua. Eereka iokanataro iua Teoso sākire mauīākani misiritikoātaā.

⁴⁷ —Nitiritxi ipatrāote nireēkiti imarotakari makamakaniāri ipatrāote paniātakiti iposope inini ĩkapani, ixirokitataākako aāpitsaā. ⁴⁸ Nitiritxi ipatrāote nireēkiti mimarotakati kaminiāri maerekati, ixirokitataākako, txamari poiāonoka. Teoso sikari parīkatxi, imaroretxi pakini kākitimoni. Kaiāopokori parīkatxi, kaiāopokori imaroretxi isikiniāi pitemoni, ininiā Teoso nirekari pite iteene parīkauatini iua ĩkapani. Apikomoni parīkatxi, apikomoni imaroretxi isikiniāi pitemoni, ininiā Teoso nirekari pite apiata piparīkauatini iua ĩkapani —itxa Xesosi sākire.

Neenamatzxi Xesosi Sākire Auikiko Xika
(Mateo 10.34-36)

⁴⁹ Xesosi sākirauatapanika:

—Teoso misiritariko kākiti imaerekani xika. Xamina tirinini atoko itxa kākiti misiritiko. Ia itixi napoka ikara xamina tirinini nitxīkitakini ĩkapani. Ninirekari ikara niparīka nixipokini. ⁵⁰ Nota atatsiirauatako. !Erekaxinireno. Ninirekakari natatsiirauatini katima xipokaka inini. ⁵¹ Kona neenamatzxi niotokakini ĩkapanini napoka ĩkorapokoriti. Nota sākire auikiko xika neenamatzxi auapitikako. ⁵² Aapokotxi āki auakani sīko. Atxiīti ipi āti pakini naiatari ipi, atxiīti ipi naiatari ipi āti pakini, nota sākire auikiko xika. ⁵³ Irītxiakori omanatana ninoa ākiri nota sākire auikiko xika. Ninoa ākiri omanatana iriakori. Inorotxiakoro omanatana ninoa ākero. Ninoa ākero omanatana inoroakoro. Imakirotxiakoro omanatana otiroakoro. Otiroakoro omanatana oimakiroakoro nota sākire auikiko xika —itxa Xesosi sākire.

Iaxiti Imarotiko
(Mateo 16.1-4)

⁵⁴ Xesosi iuaīkana misākiretari kākiti:

—Atokatxi ereēkokinimoni ipiākaāpotakasaaki, “Āparaānapani,” hītxa. Ari, ikipapitikako. ⁵⁵ Ītima ikiitaā ĩkari apokasaaki ĩkorapokoriti, hīte: “Kamoīpani,” hītxa. Ari, kapatakapitikariko. ⁵⁶ Kamisirienererini hītxaua. Hātamatari iaxiti, itixi pakini, ininiā himarotapitikari āparaā, kamoī pakini. Kinirepa kona hātamatano nota? Kinirepa kona hīkenakotari nisākire Teoso kamaenetakiti himarotini ĩkapani? —itxa Xesosi sākire.

Pimisiritiko Mereēkarimoni Pimasikani Īkapani
(Mateo 5.25-26)

⁵⁷ —Kinirepa hīteka na xinikari atāo inakari hīkamini tīkane? ⁵⁸ Maerekati pikamakasaaki, āti nirekari anikinii pimisiritiko mereēkarimoni. Iua anikinii apisapanika, pisākirauata iuakata atāo pikamini ĩkapani, ininiā iua !anikaikai pimisiritiko mereēkarimoni. Pimamisākiretakaniāri, iua anikaiko pimisiritiko mereēkarimoni. Eereka pimisiritiko mereēkari sikaiko sotatomoni. Eereka sotato takai kateia āki. ⁵⁹ Atāo nisāpiretai, kona posipikari kateia ikinika pimisiritiko mereēkari paniātakiti pimiīkitxitakanisaaki —itxa Xesosi.

13

Himatakanapakaniāri Himaerekani, Hīpinako

¹ Xesosi sākirauatakasaaki, kākiti iuaā auakani sāpiretari iua Kariréia auakani okiko pirena. Ninoa Teoso misākiretiko aikotiā auakasaaki, ninoa okari ipirana imaerekanina Teoso makatxakini ĩkapani. Ininiā iusaaki Pirato sotatone apoka iuaā. Iusaaki ninoa okana. ² Xesosi imarotari kākiti ākixinire xiniākiti. Ininiā ia atoko itxa:

—Hīte uākatari ninoa Kariréia auakani maerekani apiata. Ininiā, “Ikara atoko inapeēkana ninoani,” hītxa. ³ Konapitini. Nota sāpiretai hīte, himaerekani himatakanapanakanisaaki, hīpinako ninoa atokokana hinaākako —itxa Xesosi.

⁴ Ininiā Xesosi sāpiretana ninoa apanakini ipinini pirena:

—Xerosareē aua Siroee inakori aapokotxiti. Iua aapokotxi ĩtanori irika. Irikasaaki, tesoito kikiakorini ipīpe. Hīte uākatana iuaā auakani apia maerekani itxauana? ⁵ Konapitini. Hītekanera himaerekani himatakanapanakanisaaki, ninoa atokokanera hīpina —itxa Xesosi.

Piko Mina Mariti Pirena

⁶ Ininiā Xesosi sāpiretari āti sāpirenatxi atāo inakari oerekiko:

—Aua kiki. Initirikata isari ikikiote atini ĩkapani. Iuaãtaã aua amãtiiri piko inakori mina. Iuaã apokasaaki, maritoka otxa itakare. ⁷ Ininiã itxari: “Ipikanani ãtikanani pakini ninapiima. !Kariro. Ininiã erekari otokiko, kotxi kona oĩriuata. Ininiã kona erekari uai okaikotini, kotxi oxipokari takari kiena kipatxi ãki auakari,” itxari initiri. ⁸ Ininiã initiri: “Kona pitokapero. Nota oeretariko opatapi. ãti kipatxi erekari patari tikakata nitakapatapitaroko. ⁹ ãtikanani inakasaakiaua karipeka oniniã, ereẽ oãua. Erekari okaikotini. Omiriuatakanisaaki, iusaaki erekapekari otokiko,” itxa initiri —itxa Xesosi.

Tomatiko Õtisaaki Xesosi Makananitiniro Sito

¹⁰ Tomatiko õtisaaki Xesosi auari aiko Xoteo apotiitiniãtaãua. ¹¹ Iusaaki sito apoka. Tesoito anokananipeka ina amianaretakaro. Ia atoko otxa amianareta. Okomĩkaãpota, kotxi maerekati matamatakoti amianari kamakari ĩroãĩtotaro. Kona oposota oõkitikaĩtotiniãua. ¹² Xesosi atamatakasaakiro, itxaro:

—Sito, erekapitikaiko uatxa —itxaro.

¹³ Ininiã itakari iuako onopini. Iusaakipeka oõkitikaĩtotaua. Ininiã iusaaki otxa:

—Peerekari Teoso. Erekari imakinika ikamakiti —otxa.

¹⁴ Iusaakipeka Xoteo apotiitiniãtaãua aikotiã auakani auĩte naiataua, kotxi tomatiko õtisaaki Xesosi makananitaro amianatakaro. Ininiã iua txitari kãkiti:

—Auari seisi pakini õti kãkiti parĩkauatini ĩkapani. Ininiã ĩkora seisi õti hina iua makananitinii ĩkapani. Kona hinape tomatiko õti erekapeka hĩtxĩkitakiko ĩkapani —itxana.

¹⁵ Ininiã Xesosi txari iua:

—Hĩsãkire atxiĩti erekari, txamari kona hĩkamari hĩsãkire iaõka. Tomatiko õtisaaki hĩte taretari hĩpiraakori, kotxi hanikari hĩpiraakori, kema auĩte iaãmoni ãparaã iãtinina ĩkapani. ¹⁶ Oia sito Apraãoni apika mekaniro otxaua. Satanasi kamaamianaretaro oa tesoito anokananipeka. Iaõpe. Apakatapitika tomatiko õtisaaki nitiretiniro oa, nimakananitiniro oa —itxa Xesosi.

¹⁷ Xesosi apakapapiretakasaakina, imokaiakariakori pẽtauata. Iusaaki apanakini iuaã auakani poxokoniuata, kotxi imarotarina erekari Xesosi kamakiti.

Mostata Pirena

(Mateo 13.31-32; Marko 4.30-32)

¹⁸ Ininiã Xesosi pimaãna:

—Natokopa itxa Teoso auĩtetxi ininiãua? Kiãtokopa itxa axinikiniri?

¹⁹ Teoso auĩtetxi ininiãua mostata iki atoko itxa. Kiki takaro mostata ikikioteẽ. Oa aneẽ. Mitape onakasaaki kotipiriki kamari ikoa okatiã. Ikara atoko itxa Teoso auĩtetxi ininiua —itxa Xesosi.

Merepanika poião kãkiti auĩtetari Teoso. Eereka kaiãopokori kãkiti auĩtetari iua. Txamari iusaaki Satanasi apoka ninoamoni kotipiriki apokini atokokana.

Pão Tirekakari Pirena

(Mateo 13.33)

²⁰ Iuaĩkana Xesosi pimaãna:

—Natokopa itxa ĩkorapokoriti Teoso auĩtetxi ininiãua? ²¹ Ia atokokana itxa: Sito kosekari pão tirekakari pani. Okoketari axapiti pão tirekakari pani kaiãopokori triko panikata, ãparaãkata. Eereka ikinika ipe tirekaãpota otxa.

Axapitiri Ironakikoãtaã

(Mateo 7.13-14, 21-23)

²² Ikara inaka atoko Xesosi potorika Xerosareẽ sitatxiti isini ìkapani. Isaãpotakasaaki, isãpiretari Teoso sãkire. Isãpiretari ãti sitatxitiã, ãti aapokotxitiã, ãti sitatxitiã, itxaãpota isãpiretiniri Teoso sãkire kãkitimoni.

²³ Oerekarauanãtakasaaki, kiki pimaãri:

—Niauũte, poiãokani satako Teoso auiniãtaã?

²⁴ Ininiã Xesosi apakapapiretari:

—Teoso tixine Ìronakikoãtaã axapitiri. Hinirekariko iuaã hiĩroini. Kaiãopokori kãkiti nirekari Ìroinina. Txamari, !iposotarina. ²⁵ Kaapokori totiniri aapoko tore atoko itxa. Itotakasaakiri, kãkiti iporikiti aritari itore: “Pimataakariko itore ate ìkapani.” Iuasaaki iua kaapokori txako: “Kona nimarotai hũte,” itxanako ninoamoni. ²⁶ Ininiã ninoa: “Ate nipokota pitekata. Sitatxi ate auiniãtaã pauakasaaki, pitekara oerekaua,” itxanako ninoa. ²⁷ Ininiã iuaĩkana itxako ninoamoni: “!Nimarotai hũte. Namonipa hãua hũte? Hĩsipiniikaua. Imakinika hĩkamakiti !erekari.”

²⁸ —Hãtamatakasaakina Apraõ, Isaki, Xakoo, ikinimane Teoso sãkire sãpiretakani pakini Teoso auĩtetxi ininiãtaãua, iuasaaki hĩtxiapatapitikako. Apanakini Ìroãpeka. Txama hĩtenoka kaikotape iporikiti himaerekani xika.

²⁹ Teoso auĩtetxi ininiãtaãua apokako kaiãopokori kãkiti, ikini itixiti ìkani. Atokatxi pokĩkinimoni ìkani, atokatxi ereẽkokinimoni ìkani, atokatxi pokĩkini sanaremoni ìkani, atokatxi pokĩkini kikomoni ìkani pakini apokako Teoso kiiniritimoni. ³⁰ Merepitipanika Xoteoakori kenakotari Teoso sãkire, txamari !imaãkatari. Eereka Xoteo minakaniua kenakotari Teoso sãkire, ininiã auikarina. Ininiã Xoteo minakaniua apokako Teoso auĩtetxi ininiãtaãua Xoteoakori apokini apisa —itxa Xesosi sãkire.

Xesosi Tiretari Xerosareẽ Auakani (Mateo 23.37-39)

³¹ Ikarasaakipeka ãtikaka pariseoakori apoka. Itxarina Xesosi:

—Pisipiniikaua, kotxi Erotxi okaenetai —itxarina.

³² Ininiã Xesosi apakapapiretana:

—Hĩsa iuamoni. Hĩtxariko iua aripa kamisirienereri: “Nota omitikari maerekati matamatakoti, apaka amianatakani erekapeka nitxĩkitaka. Uatxa, katana pakini niparĩkauatako. Ipi ãti õtisaaki nixipokariko niparĩka ìkorapokoriti.” Ikara atoko hĩtxariko iua. ³³ Ininiã uatxa niparĩkauatako. Katana niparĩkauatako. Ininiã katana eereka nisa Xerosareẽmoni, kotxi ãtiãtaã Teoso sãkire sãpiretakani okikoãtaã !auari. Xerosareẽnanira ninoa ipina. Ininiã nota sako iuaã.

³⁴ —Xerosareẽ auakanii, Xerosareẽ auakanii, hũte okapekana Teoso sãkire sãpiretakani. Kai soroã hĩkiporonakana ninoa hĩtemoni Teoso iokanatakini. Kaiãokatani ninirekamari ninĩkatini, patari oimiakori omĩkita patapi otakini atokokana nitxanakamaiko hũte. Txamari !hãuiritano nota nĩkatini. ³⁵ Ikara atoko inakari xika haãpoko asikaãkako. Teoso !auaika hĩtekata. Nisãpiretai. Ia õti hãtamatanano, eereka !hãtamataikano. “Teoso takari erekari uaimoni ìkarimoni, Apiananiri posotiireẽ ìkarimoni,” hinakasaaki, iuasaakinanirako hãtamatanoko nota —itxa Xesosi.

14

Xesosi Erekapeka Txĩkitakari Amianatakari

¹ Tomatiko õtisaaki Xesosi sari pariseoakori auĩtemoni, iuakata inipokotini ìkapani. Iuaã auakani mixinitari iua apoĩtinirina ìkapani. ² Iuasaakipeka apoka kiki amianatakari. Ikanoke, itapike, imakinika ananaĩtota. Iua apoka Xesosimoni. ³ Ininiã Xesosi pimaãna Moisesini sãkire oerekakani, pariseoakori pakini. Ipimaãna:

—Erekari atxiíti tomatiko òtisaaki amianatakari erekapeka nitxĩkitakini? — itxa Xesosi.

⁴ Ininiã ninoa tsoriãkaãnãta. !Apakapapiretarina. Ininiã iuasaaki Xesosi erekapeka txĩkitakari iua amianatakari.

—Pisipeka paapokomoni —itxa Xesosi.

⁵ Eereka ipimaãna pariseoakori:

—Hĩpira kema auĩte, hĩpira poho apaka aariko ãki irikiniã tomatiko òtisaaki, iuasaaki himakatzakatarari? Ari, himakatzakapitikari hĩpira tomatiko òtisaaki. Ininiã kinirepa kona hinirekatari erekari nikamini tomatiko òtisaaki? —itxa Xesosi.

⁶ Txamari kona ninoa apakapapiretari, kotxi atão Xesosi sãkire.

Kiiniri Kamakari Pirena

⁷ Iuasaaki Xesosi itikana kãkiti. Apanakini mereẽri kãkiti apiatakari takote iitopãkini. Ininiã isãpiretari ia sãpirenatxi atão inakari oerekiko.

⁸ Kãkiti ãtaniriuatini kiiniriti pirena isãpireta:

—Kiiniriã hĩsikasaaki, kona himereẽpiri kãkiti apiatakari topãkiniãtaã hĩitopãkini, kotxi atxiíti eereka kemaĩtxitakori apiatakari apoka. ⁹ Ininiã iua apiatakari apokasaaki, kakiiniriteri txaiko pite: “Ikiraã piitopãka. Ia kiki topãka nota takote.” Iuasaaki pipẽtauata. Ininiã pitakanapari iuaã. Maparapeka apanakinikata topãka pitxa. ¹⁰ Kiiniriã hĩsikasaaki, apanakinikata hĩitopãka. Ikara atoko ininiã, kakiiniriteri akiritai: “Nitari uaimoni pina. Piitopãka uai. Uaira erekari.” Ikara atoko pininiã, apanakini iuaã auakani imarotariko pite apiatakari pininiãua. ¹¹ ãtikaka kãkiti txari: “Nota apiari nitxaua.” Txamari Teoso txariko: “Poiãori itxaua.” ãtipekana txari: “Nota poiãori nitxaua.” Txamari Teoso txariko: “Iua apiari itxaua.”

¹² Xesosi txari ikemaĩtxitakiri:

—Kiiniri pikamakasaaki, kona pikemaĩtxitapiri pinirimane, pitariakori, paõkimaneri, paapoko takote auakani, katxineiroteni pakini, ninoa iuaĩkana kemaĩtxitini pite ãkapani. Ininiã ikara atoko ninoa ãkitxitai. ¹³ Apiaerekata kiiniri pikamakasaaki, pikemaĩtxitari kãkiti minakati mauakiniti, mokirini, matĩpokotakati pakini. ¹⁴ Ikara atoko pininiã, Teoso sikari erekari pitemoni, kotxi ninoa !iposotari kiiniri ikaminina, iuaritika kãkiti erekarini iuaĩkana õkitikasaakia, iuasaaki Teoso ãkitxitaiko pite —itxa Xesosi sãkire.

Kiiniri Mitari Pirena

(Mateo 22.1-14)

¹⁵ Ininiã ãti Xesosikata nipokotakari kenakotari ikara Xesosi sãkire. Ininiã iua txari:

—Teoso auĩtetxi ininiãtaãua sikani nipokotako iuaã. Ininiã iuasaaki Teoso sikapoxokonitana —itxari.

¹⁶ Ininiã Xesosi apakapapireta. Ia atoko itxa:

—Kiki kiiniri kamakari kemaĩtxitari itomaneri kãkiti. ¹⁷ Nipokori iposopeka inakasaaki, iokanatarari initiri ikemaĩtxitakinimoni: “Masa kiinirimoni. Iposopekari imakinika nipokori,” itxa.

¹⁸ —Txamari ikemaĩtxitakini kamari ãti sãkiretxi kiinirimoni imasikanina ãkapani. Ininiã kemaĩtxitakori txari: “Nota amotari itixi. Iua ninireka natini. Ininiã !niposotari nisini kiiniriã,” itxa.

¹⁹ —Ininiã ãti: “Nota amotari tesi kema auĩte parĩkauatakani. Ininiã nota sari ninoamoni. Ninireka nimarotiniri ninoa parĩka. Pauiritano nisini ninoamoni,” itxa.

²⁰ —ãtipekana: “Nota ãtanorouatape. Nĩtanoro auano nota. Ininiã kona niposota nisini pikiiniritemoni,” itxa.

21 —Ininiã initiri kanapiriã iauĩtemoni. Ikinipoko ikemaĩtxitakini sãkire isãpireta iuamoni. Ininiã iuasaaki iua auĩtetxi naiataua. Ininiã ipaniãtari initiri: “Sitatxi auakari kimaporitiã pisa. Katima pitxako. Piminana kãkiti minakati mauakini, matĩpokotakani, mokirini pakini pimina,” itxari. 22 Ininiã katimaritika ikamari ikinika auĩtetxi paniãtakiti. “Nikamapekari ikinika pipaniãtakiti, txamari auapanika nipokori. Apakatapanika kãkiti nikini ĩkapani,” itxa.

23 —Ininiã iuaĩkana, iua auĩtetxi paniãtari sitatxi mapara õtako isini. “Iuaã pakiritana kãkiti inini, naapoko kãkiti xãpokini ĩkapani. 24 Atãopitikara nitxai: ‘Mitxi nikemaĩtxitakini !inikapaniri nikiena,’ ” itxa.

Xesosi Moianari Pininiua (Mateo 10.37-39)

25 ãti õti itomaneri kãkiti moianatari Xesosi. Ininiã ikirioka sãpireta itxana ia sãkiretxiti:

26 —Nota kinirão moianataka hinakasaaki, apiata hĩtiretanoko nota. Merepanika hĩtiretanoko nota, eereka hĩtiretanoko hĩri, hinoro, hĩtaniri, hĩtanoro, hĩtari, hĩtaro, hamarite pakini. Hĩteka apaka poião hĩtiretauako. 27 Nota kinirão moianataka hinakasaaki, notakata hĩsa. Himamĩteenekakanisaakiri himisiritiko nota ĩkapani, ininiã ! apakata himoianatinino.

28 —Hĩnrekiniãri aapokotxi mitari sitatxi auakari atoko hĩkamini, merepanika hĩxinikaroko txineiro aapokotxi kamiko karone. Atxiĩti !apakata hĩtxineirote. Atxiĩti apakata. Ikara atoko hĩxinika merepanika. 29 Ikara maxinikati merepanika !ixinikari, ininiã atxiĩti itakari itsota, ininiã eereka txineiro !auaika, ininiã kona apakata imakinika ikamini. Ininiã apanakini napetari iua. 30 Ininiã ninoa txari: “Hãtamatariko ikamakiti. Iua kiki potorikamari ĩkora aapoko, txamari !iposotari imakinika ikamini.” Ikara atoko itxanako. Ininiã pikamakiti apisapanika iteene hĩxinikariko.

31 Ininiã eereka Xesosi sãpiretari ãti sãkiretxi:

—Auĩtetxi auari tesi mio sotato. Iua nirekari neenamatzxi ikamini ãti auĩtetxikata. Txamari ãti auĩtetxi auari vĩtxi mio sotato. Iua tesi mio sotato auakiti merepanika xinikari, atxiĩti iposota ineenamauatini vĩtxi mio sotatokata? Atxiĩti auĩtetxi vĩtxi mio sotato auakiti xipokari iua? Ininiã apisapanika ixinikari. 32 Imaposotakaniãri, vĩtxi mio sotato õtakopanika auakasaaki, iua auĩtetxi tesi mio auakiti iokanapireta ãti auĩtetximoni isãkirauatinina ĩkapani, neenamatzxi xipokini ĩkapani.

33 —Erekari iua auĩtetxi neenamatzxi takanapakari atoko hinini. Ininiã merepanika hãkixinireẽ hĩxinikariko: “Nota nirekatari nimoianatiniri Xesosi, kotxi pasãpaniri?” hĩtxa. Atão hĩnrekiniãri himoianatinino, ininiã imakinika hĩtakanapakato notakata hĩsini ĩkapani. Himanirekakaniãri hĩtakanapiniri imakinika, ininiã !apakata himoianatinino. Ininiã hĩxinikariko merepanika —itxa Xesosi.

Iõkira Matxoato Pirena (Mateo 5.13; Marko 9.50)

34 —Iõkira peerekaro. Omatxoaniã, !otxaika. Aua kãkiti iõkira potxoaro atoko inakani, ininiã erekapitikana ninoa. Apanakini kãkiti iõkira matxoato atoko itxana. !Kakamarena ninoa. 35 Iõkira matxoato ininiã, !apakata takari sikakienatiko ĩkapani. !Apakata hĩkoketiniri kipatxikata, pirãtxi tikakata takari sikakienatiko ĩkapani. Kona erekaro. Maparamoni oõkapeẽkaika. Ikara atoko itxa apanakini, kotxi ninoa !kakamarena.

—Kakenakokii hĩte, ininiã hĩkenakotariko ia nisãkire.

15

Soti Auïte Ereëkokakari (Mateo 18.10-14)

¹ Æti õti auïtetxiakori txineirote apakapakani, apanakini maerekati kamakani apaka apotiïtaua Xesosi sãkire ikenakotinina ïkapani. Ninoa kaiãopoko. ² Iuasaaki pariseoakori, kaiõkatsopareriakori pakini misãkirepiretari Xesosi. Itxana:

—Iua apakapari maerekani. Maerekanikata inipokota —itxana.

³ Ikara isãkirena xika Xesosi sãpiretari ipi, Æti pakini sãpirenatxi atão inakari oerekiko. ⁴ Ia atoko itxa Xesosi:

—Atxiïti pite aua seï soti auïte. Æti pïpinanakiniã, kipa pikama? Pitakanapari apanakini mapara inipokotiniãtaã apanakini nïkatini ïkapani. Ininiã eereka pisari pïpinanakakari pinitini ïkapani. ⁵ Papokasaakiri iua pïpinanakakari, pipoxokoniuaata. Piporikiãpotari pipira paapokomoni. ⁶ Papokaãka atoko pakiritana paõkimaneriakori, apanakini kãkiti pakini. Pitxana ninoa: “Hïpoxokoniuaatako notakata, kotxi napokapekari nipira pïpinanakakari,” itxa soti auïte pitikiri.

⁷ —Nisãpiretai hïte, Ætika maerekati kamakari takanapakasaakiri imaerekani, iaxiti Teoso auiniãtaã auakani poxokoniuatapitikako. Atxiïti novëta novi kãkiti iuikakaniua txari: “Peerekaua ate. !Akamari maerekati,” itxana. Txama kona atão isãkirena. Ninoa sãkire kona kamari iaxitikini poxokoniuatini —itxa Xesosi.

Ota Pirata Kamakoro Ereëkokakaro

⁸ Apikomoni Xesosi txari:

—Sito aua tesi ota pirata kamakoro. Pakaronero. Æto ereëkokiniã, ininiã onitakasaakiro oiopotokakari tirikapi. Oiatïïkaãpotari oaãpoko ota onitaãpotini ïkapani. ⁹ Oa apokasaakiro, apanakini oãkirita: “Hïpoxokonauatako notakata. Napokapekaro ota ereëkokakaro,” otxa.

¹⁰ —Kãkiti poxokoniuaata ota pirata kamakoro apokikosaaki. Nisãpiretai, iaxiti Teoso nitiriakori apiapoxokoniuaata, Æti maerekati kamakari imaerekani itakanapakasaaki —itxa Xesosi.

Imi Ereëkokakari Pirena

¹¹ Apikomoni Xesosi txari:

—Aua kiki. Ipi imiakori. ¹² Maneri takari amanaãri iri. Itxari: “Ninirekari pitakanapakito pipïkasaaki pisikini notamoni uatxa,” itxa. Ininiã iri xanakari inakiti imiakorimoni. ¹³ Eereka mapaõti inaka atoko, iua Ætokori apotiïtari iri sikakiti. Ininiã eereka isipeka. Õtakoxiti Æti tixini isa. Iuaã maerekati ikama. Iuaã xipoka itxari iri sikiniri.

¹⁴ —Ikinika ixipoka iuaã. Iuasaaki ãparaã !ikipa. Natxipokoni auari. Nipokori !auari. Ininiã iuasaaki iua minakati !auari. Imakinika xipope.

¹⁵ Ininiã iuaxiti auakarimoni isa, parïkatxi amanaini ïkapani. Ininiã ipatrãote paniãtari iririakori isikakienatini. ¹⁶ Iririakori isikakienatakasaaki, natxinoka itxa. Iuasaaki iua nirekari iririakori kiena inikini, kotxi iua sikakienatakari !auari.

¹⁷ —Iuasaakiika ixinikari iri aapoko: “Niri nitiriakori aua nipokori. Nipokori itetakori auapitika. Uai natxinoka txapeno nota. ¹⁸ Nikanapiriãko niri aapokomoni. Nitxariko niri: ‘Maerekati nikamapeka Teosomoni, pite-moni apaka. ¹⁹ Kona pamarite na pitxaikanoko, kotxi !erekano. Pitxïkitakano pinitiri nininiua.’ Ikara atoko nitxariko niri,” itxa. ²⁰ Ininiã iua aiamata, kanapiriã itxa iri aapokomoni. Iuasaaki iri iãtapanãtari iua ikiniõtika.

—Ininiã iua apokaãpotakasaaki, õtakopanika, iri atapari iua. Ininiã iri miteẽkata iuamoni. Ininiã iteene ipoxokoniuaata. ²¹ Iuasaaki imi txari iri: “Niri, maerekati nikamapeka Teosomoni, pitemoni apaka. Kona pamarite na pitxaikanoko, kotxi !erekano.”

²² —Iuasaakipeka iri akiritari initiriakori: “Katima hĩtxako, mãkatxi ereri himinini. Aneo ereri hĩtakako iuakokimoni. Ikiti mata hĩtakako ikitiã. ²³ Kema auĩte kiĩri hõkako. Kiiniri makamako. Manipokota. Mapoxokoniuaata, ²⁴ kotxi ia namarite ipĩkari atokopeka, uatxa iuaĩkana ikanapiripeka. Mitxi pĩpinanakakari atoko itxa, uatxa apokapeẽkaika,” itxa.

—Ininiã iuasaaki ninoamoni ipoxokoniuatini apopeka.

²⁵ Ninoa kiiniritauatakasaaki, imi aneẽkari tokoriã iparĩkauanãta. Ikanapiriãkasaaki aapokomoni, ikenakotari xikari, serẽkatxi ene pakini. ²⁶ Ininiã akiritari iri nitiri: “Kiripa ikara?” itxari. ²⁷ Iri nitiri apakapapireta: “Pitari apoka. Ininiã piri paniãtari kema auĩte okiko, kotxi erekapanikari pitari. Kona monõkari apoka iuamoni. Erekarĩ ikanapiriini,” itxari.

²⁸ —Ininiã ikara ikenakotakasaaki, inaiataua. Kona inirekarĩ ãroini kiiniriã. Ininiã iri iuamoni sa itxa. Akiritari: “Piĩroã,” itxari. ²⁹ Ininiã iua apakapapiretari: “Itori mitaãti niparĩkauatinapekai. Txama kona nota sipikapiretari pisãkire. Iuaritika kona pisikano potxi ãkiri nimoianariakorĩkata kiiniri nikamini ĩkapani. ³⁰ Iua pamarite xipokari pitxineirote. Sitokata isirĩka. Txama ikanapiriãkasaaki, pokari kema auĩte. Kiiniri pikama iua ĩkapani.” Ikara atoko itxitari iri.

³¹ —Iri apakapapireta: “Namarite, ãtipirika pauapika notakata. Ikinika nota nakiti pite nakiti txaua. ³² Erekapitikari kiiniri nikamini apoxokoniuatini ĩkapani, kotxi pitari ipĩkari atokopeka itxa. Uatxa auapanika. Pĩpinanakakari uatxa apokapeka,” itxari.

16

Nitiritxi Kamisirienereri

¹ Xesosi sãpiretana imoianariakori:

—Kiki ito tiitxi aua. Iua nitiri nĩkatari ikinika ipatrãote nakiti. Apanakini sãpiretari iua kiki, initiri iouanatiniri itxineirote. ² Ikara atoko ininiã, iua akiritari initiri: “Nikenakopiretari pite misirienetinino nota. Ininiã piminari tiitxi piamotiitini tsopa. Ikara pisikasaakino, niokanatai pisini. Kona apikomoni piparĩkauataika nota ĩkapani,” itxa.

³ —Ininiã initiri ãkixinireẽ: “Kipa nikama uatxa, kotxi nipatrãote paĩtiki iokanatanõ. !Kataparano nota, ininiã !niposotari atokatxi patapĩ niparĩkauatini. Nipẽtauata txineiro maxikatĩka namanainiri kãkiti. ⁴ Uatxaika nimarotari nikamakiti tĩkane. Ininiã niparĩka xipokasaaki uai, kãkiti apakapapanikano nota ninoa aapokoã,” itxa.

⁵ —Ininiã akiritana kãkiti ipatrãote mãkitxitakani. Ininiã ipimaãri ãti: “Kipakinipa !piĩkitxitapanika nipatrãotemoni?”

⁶ —“Seĩ kopiti iĩtxi auakiti kona niĩkitxitapanika,” itxari.

—Ininiã iua nitiritxi txari: “Pikosekarĩ pimaĩkitxitakinini tsopa. Pitakari sĩkoẽta kopitinoka,” itxari.

⁷ —Ininiã ãti ipatrãote mãkitxitakari ipimaã: “Kipakinipa kona piĩkitxitapanika nipatrãote?”

—Iua apakapapiretari: “Seĩ atarokiri kotarina,” itxa.

—Itxari iua: “Pimaĩkitxitakinini tsopa pikoseka. Oitẽta kotarinoka pitaka,” itxa. Ikara atoko ikama ninoa ĩkapani, ininiã iparĩka itakanapaka atoko, ninoa apakapari iua ninoa aapokoã.

8 —Ininiã iua patrãote ikara imarotakasaaki, itsoriãkaãta: “Ari, ninitiri paimatireri. Maerekati ikama, iuaritika ikamakasaakiri, paimatireri iua,” itxa.

—Teoso sãkire mauiãkani imarotapitikari ixinikinirina parĩkatxi katana ikamakitina. Atxiĩti Teoso sãkire auĩãkani !imarotari ixinikinirina parĩkatxi katana ikamakitina. ⁹ Nisãpiretai hĩte, ãkorapokoriti hãuakasaaki, hĩxinikari ikara nitiritxi. Hĩsikari hĩtii, hĩtxineirote pakini Teoso parĩka ãkapani, Teoso mimarotakani atão inakari imarotina ãkapani. Eereka atxiĩti Teoso mimarotakani moianatai. Eereka ninoa apaka imarotari aĩri iaxitikiri. Eereka ãti õti haõkitana ninoa iaxiti.

¹⁰ —Axapitiki parĩkatxi atão pikaminiã, ininiã kãkiti auikariko piposotiniri parĩkatxi apiatakari pikamini apaka. Axapitiki piĩtiriuata mitxi, ininiã eereka kaiãori piĩtiriuata. ¹¹ Txineiro uaimonipokoriti auakari himimarotakaniãri hinĩkatini, ininiã kona hĩposotari hinĩkatiniri erekari Teoso sikakiti. ¹² Apanakini tii pimanĩkatakaniã, ininiã kona kãkiti sikai tiitxi pinakiti inini ãkapani.

¹³ —!Apakata kãkiti parĩkauatini ipi iauĩtena ãkapani, kotxi atxiĩti ãti omanata, ãti itireta. Atxiĩti ãti apokaerekata, ãti inorita. Iua atokokana kãkiti kona posotari iparĩkauatini tiitxi ikinipoko iamotini ãkapani, Teoso ãkapani iparĩkauatakasaaki. !Apakata piauĩtetiniri Teoso, txineiro piauĩtetakasaaki — itxa Xesosi.

Teoso Sãkire Maxipokakani

(Mateo 11.12-13; 5.31-32; Marko 10.11-12)

¹⁴ Pariseoakori ikara ikenakotakasaakina, inapetarina Xesosi, kotxi ninoa iteene potxitaro txineiro. ¹⁵ Ininiã Xesosi sãkirauata ninoamoni:

—Hĩte txa apanakinimoni: “Ate !ikeroka. Peerekaua ate,” hĩtxa hĩsãkire. Txama Teoso imarotari hãkixinire. Kãkiti uãkatari erekari hĩkamini, txama Teoso omanatari hĩkamakiti.

¹⁶ —Kitxakapirĩka kãkiti auikari Teoso sãkire Moisesimoni sikakori, Teoso sãkire sãpiretakani sãkire pakini. Xoão kapatxisareri apoka. Iuasaaki Teoso iokanapirena erekari auĩtetxi ininiãua sãpiretaãka. Itomaneri iteene nirekari isini Teoso auĩtetxi ininiãtaãua ãroini.

¹⁷ —Teoso sãkire !ixipoka. !Ixipoka axapiti. Auapika imakinika isãkire. Itixi, iaxiti pakini xipokapitikako, iuaritika Teoso sãkire !ixipoka.

¹⁸ —Teoso sãkire iõkatakori kitxakapirĩkari auapanika uatxa. Ininiã ãtanorotxi asikakari ãto itakini ãkapani inakari, maerekati ikama. Apaka sito takanapakoro takakari maerekatikanera ikama. Ikara Teoso sãkire auapanika. Kona ixipoka ikara —itxa Xesosi.

Katiiri, Arásaro Pakini

¹⁹ Xesosi sãkirauatapanika. Ia atoko itxa:

—Aua kiki katiiri. Peereri imãka. Põkamarari imãka. Apiaerekata imãka. Ikiniõtika peerekari ikiena. Imakinika iua auakiti peerekari. Iua aapoko ikiniõtika kiinirisaaki auakari atoko itxapika ikiena.

²⁰ —Ãti kiki Arásaro inakori. Pamatinaniri. Minakati !auinari iua. Iua sirĩka katiiri aapoko patapi koa. Amianari aua iuamoni. Ininiã iũto imakinika kakaro. ²¹ Kinirão nika inakasaaki, ixiti okakorinoka inika. Iuaã anãpa amerokari ikaro.

²² —Ikara atoko ininiã, eereka ipĩpe. Ininiã eereka Teoso nitiriakori iaxitikini anikari iua Teoso auinimoni. Kitxakapirĩka Aprão sari iuaã. Iuaã iua Arásaro aõkitari Aprão.

—Eereka iua katiiri apaka ipĩpe. Ikataãka. Isari maerekani misiritikoãtaã.

²³ Iuaã maerekani misiritikoãtaã auakasaaki, õtakoxiti atamatari Aprão,

Arásaro pakini. ²⁴ Ininiã akiritari Apraão: “Toti Apraão, piamonĩkano. Pipaniãtariko Arásaro iãkiniri iuakoki iaã, tapikaka itxa ninamamoni. Ia xamina sikatsiitapitipono,” itxa.

²⁵ —Apraão apakapapireta: “Pixinikariko kãkitikata pauakasaaki, kaiãori pitii aua pitemoni. Arásaro auakasaaki, kona minakati auari iua. Arásaro auakasaaki, amianarinani, natxinani pakini auari. Uatxa iua poxokoniuanãtakasaaki, pite atatsiitari pimisiritiko. ²⁶ Patamata ereẽ sauana auĩte. Kona ate posotari hĩtemoni asini. Hĩte apaka kona posota uaimoni hãpokini,” itxa Apraão.

²⁷ —Iuaĩkana katiiri: “Toti, pikenakotano. Pipaniãtariko Arásaro niri aapokomoni isini. ²⁸ Iuaã aua sĩko nitariakori maneripanika inakaniua. Isãpiretanako: ‘Kona erekari uai. Erekari ia misirikaretxi auiniãtaã imĩkanina. Ininiã uatxa ikamarinako Teoso sãkire paniãtakiti,’ ” itxa katiiri.

²⁹ —Ininiã Apraão: “Ninoamoni auape Teoso sãkire, Moisesini sãpiretakiti, apanakini Teoso sãkire sãpiretakani sãpiretakiti apaka. Ininiã pitariakori posotari ikenakotinirina ninoã sãkire,” itxa Apraão.

³⁰ —Ininiã katiiri txari: “Toti Apraão, ikara atokonani !apakata. Ipĩkari kanapiriiniã ninoamoni, iusaakiikarako itakanaparina imaerekanina.”

³¹ —Ininiã Apraão: “Pitariakori !auikari Moisesini sãkire, apanakini Teoso sãkire sãpiretakani sãkire pakini. Ipĩkari kanapiriiniã ninoamoni, iuaritika ninoã !auikari Teoso sãkire. Ikara atoko ininiã, kona nipaniãtari Arásaro isini ninoamoni,” itxa Apraão.

Ikara atoko itxa Xesosi sãpiretakiti.

17

Maerekati Oerekakari (Mateo 18.6-7, 21-35; Marko 9.42)

¹ Xesosi txari imoianariakorimoni:

—Aua maerekati oerekakani. Ninoã kãkiti kamari maerekati. Ikara atoko inakani apokapitikako. Ninoã xika kãkiti kamari maerekati. Maerekati oerekakari misiritaãkapitikako. ² Teoso omanatari kãkiti maerekati oerekakani. Kãkiti txĩkitakiniãri amarini nota sãkire auiãkari maerekati ikamini !apakata. Erekamariko iua kãkiti maerekati oerekakari kai mitariã iaxirikanokitaãkamako, ipoa apanĩkakiã okaãkamako ipinini ĩkapani. ³ Erepaniko. !Pikamapiriko maerekati. Pitari Xesosi sãkire auiãkari kaminiãri maerekati pitemoni, põtãkikariko, imaerekani itakanapini ĩkapani. Itakanapiniãri, !pixinikapinikari ikara maerekati ikamakiti. ⁴ Atxiĩti ãti õti iua kamari maerekati pitemoni. Eereka iua pitemoni apoka. “! Erekari nikamakiti pitemoni. Pimaxinĩkaretariko maerekati nikamakiti. ! Nikamaikari,” itxa. Ininiã ĩkora õti iuaĩkana maerekati ikama pitemoni. Iuaĩkana amanaãi imaerekani pimaxinĩkaretini tĩkane. Atxiĩti ĩkora õti setxikata ikara atoko ikama pitemoni, ininiã pimaxinĩkaretariko ikinika maerekati ikamakiti —itxa Xesosi.

Xesosi Sãkire Auikiko

⁵ Xesosi iokanatakini txari Xesosi:

—Pitxĩkitakaua ate apikomoni aãuikiniri Teoso sãkire —itxana.

⁶ Ininiã Xesosi txana:

—Mostata iki axapitiki. Mostata iki atokokana nisãkire poião hãuikiniã, iuaritika hĩposotapitikari hĩpaniãtiniri ia uasini aamina: “Pikotsakatika pimaporokauako. Ipoamoni pitakauako.” Ininiã ikamapitikariko pisãkire iaõka —itxa Xesosi.

Nitiritxi Parĩka Pirena

⁷ Xesosi txari:

—Pinitiri tokoriã parĩkauatakari, pipiraakori inĩkatakari, apokasaaki paapoko, kona pitxa: “Pinipokota, pitomata.” Kona ikaraatoko pitxa.

⁸ Pitxari: “Auapanika parĩkatxi. Nipokori pikaminano. Xipoka atoko pisikakienatano. Piãtapari nota nipokotini, ininiã eereka pite nipokota.” Ikara atoko pitxa pinitiriakorimoni. ⁹ Pipaniãtakitinanira ikama, ininiã kona pitxa: “Erekapitikari piparĩka,” kotxi pipaniãtakitinani ikama.

¹⁰ —Ininiã iua atokokanera itxa ikinipoko Teoso paniãtakiti pikamakasaaki. Kona apakata: “Erekapitikano nota,” pinini. Ia atoko atão pinini: “Nitiritxinani nitxaua. Poiãori nitxaua, kotxi niauũte paniãtakitinani nikama.”

Xesosi Makananitinina Paiaka Matatakani

¹¹ Xerosareẽmoni Xesosi sikasaaki, inapari Samaria tõpa. Ipinimoni auari Kariréia tõpa. ¹² ãti aapokotxi apokaãpotakasaaki, aõkitana tesi kikiakori amianatakani paiaka matatakani. ¹³ Ikira atoko akiritarina:

—Xesosi, koerekareri, piamonĩkaua ate —itxana.

¹⁴ Xesosi atamatakasaakina, ipaniãtana ninoa Moisesini paniãtakiti iaõka ikaminina, sasetotximoni isinina, iĩtona oerekinina ïkapani.

—Sasetotximoni hĩsako. Hõerekariko hĩto iuamoni —itxa Xesosi.

Iuamoni isaãpotakasaakina, ikinipoko ninoa erekapeka itxana. ¹⁵ Ninoa amianatakani erekapeka, txamari ãtinani kanapiriã Xesosimoni. Itapararitika akirita:

—Peerekari Teoso —itxa iua paiaka matatakari.

¹⁶ Ininiã ikapotoreẽkaua Xesosi apisatoõ.

—Notamoni pikamakiti peerekari —itxa.

Samaria tõpakiri iua kiki. ¹⁷ Ininiã Xesosi txari:

—Nota makananitana tesi kikiakori. ïtapari apanakini? Auapanika novi kikiakori nimakananitakini. ¹⁸ Ia kiki Samariakiri. Ianokara kanapiriã, “Peerekari Teoso,” inini ïkapani. Ninoa Xoteo iua atoko !itxana —itxa Xesosi sãkire.

¹⁹ Ininiã itxari iua Samariakiri:

—Põkitikauako. Pisako. Pite auikari nisãkire, ininiãkara erekapekai —itxa Xesosi.

Kanatokopa Itxa Teoso Auĩtetxi Ininiãtaãua?

(Mateo 24.23-28, 35-44)

²⁰ ãti õti pariseoakori pimaãri Xesosi:

—Kirisakipa Teoso ikinimane auĩte inini õti apokatako? —itxana.

Ininiã Xesosi apakapapiretana:

—Teoso auĩtetxi inakasaakiua, kãkiti !atamatari iua apokini. Teoso kãkiti auĩte inakasaaki, iua kãkiti ãkixinireẽ apoka. ²¹ Iuasaaki kãkiti !akiritari: “Uaikarari Teoso auĩtetxi ininiãtaãua. Ikiraãrari Teoso auĩtetxi ininiãtaãua.” Ikara atoko !itxana, kotxi hĩxinire ãkirari Teoso auĩtetxi ininiãtaãua —itxa Xesosi.

²² Ininiã itxa imoianariakorimoni:

—Apokako ãti õti nota hĩtari iaxitikiri iteene kinirão hãtamatini. Txamari !hãtamatano. ²³ Apanakini sãpiretaiko hĩte: “Ikiraãrari iua.” ãti sãpiretari: “Uaikarari iua.” Iuasaaki kona himaãkatapiri ikara atoko inakari sãkiretxiti. !Hãuikapiri ikara atoko inakari. ²⁴ Hĩtari iaxitikiri kanapiriãkasaaki, mẽkokari ãtiãtaã potoricini, ãtiãtaã apokini, iua atokokana nikanapiriini. Katimaritika napokako. Mẽkokari atoko nitxako napokini. Iuasaakiika ikinimane kãkiti atamatano. ²⁵ Nikanapiriini apisapanika, nota hĩtari iaxitikiri iteene ninikoriãriko nimisiritiko, kotxi kãkiti uatxa auakani kona nirekano. ²⁶ —Nota hĩtari

iaxitikiri kanapiriākasaaki, Noee auakasaaki atokokana itxapaniko. ²⁷ Noee auakasaaki, ikinimane nipokota. Iāta. Ītanorouata. Ikara atoko itxapikana. Āti ōti Noee, inirimanekata maporo āki ĩroāna. Eereka imaiātapakinitipanika āparaā kipakata. Xāpoākata. Ininiā xirataātxi xipopena ikinimane. Ikara atokotxikana itxako nota kanapiriākasaaki.

²⁸ —Aroo inakori auakasaaki atokokana itxako nota kanapiriākasaaki. Iuasaaki ikinimane nipokota. Iātana. Iamotiitana. Isikatiitana. Itakaraumatana. Aapokona ikamana. ²⁹ Sotoma sitatxiti Aroo potorikini ōti, iuasaakipeka xamina āparaā kipini atoko itxa ikatxakini. Xamina miniki katxaka. Ininiā ikinipoko iuaātaā ariākata.

³⁰ —Iuasaaki kākiti !imarotari xamina katxakini ōti. Iua atokokana kākiti !imarotari nota hītari iaxitikiri apokini ōti. ³¹ Napokini ōti haāpoko mapara hāuiniā, kona hīkanapiripe haāpokomoni hīti hāpini ĩkapani. Tokoriā hāuiniā, kona !hīkanapiripe haāpokomoni. !Apakata hīkanapiriini iuaā. ³² Hīxinikaroko Aroo ĩtanoro. Kona oa atoko hītxape, kotxi oa ipina, kotxi !onirekari otakanapiniri sitatxi maerekani auiniātaā.

³³ —Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininiika txako Teosokata.

³⁴ —Nikanapiriākasaaki, ia atoko itxako. Nikanapiriini ĩkanōkati atxiīti ipi kākiti imakanāta imakiniātaāna. Iuasaaki Teoso sākire auīākari sari notakata. Teoso sākire mauīākati kaikota.

³⁵ —Iuasaakiko atxiīti ipi sito kamanātari atarokiri. Teoso sākire auīākaro sari notakata. Teoso sākire mauīākato kaikota.

³⁶ —Iuasaakiko atxiīti ipi kiki kikiio parīkauata. Āti sa notakata, āti kaikota —itxa Xesosi.

³⁷ Ininiā imoianariakori pimaāri:

—Namoniparako? —itxana.

Ininiā iua apakapapiretana:

—Aātamatakasaakiri maiori apotiitiniātaāua, ikinimane imarotari ipīkari iuaātaā auini. Iua atokokana ikinimane atamatariko kākiti apotiitiniua notakata nikanapiriākasaaki —itxa Xesosi.

18

Sito, Kākiti Misiritiko Mereēkari Pakini

¹ Xesosi misākiretari imoianariakori āti sāpirenatxi atāo inakari oerekiko, Teoso misākiretiko pirena. Ikara inakari oerekari kākiti ātipirika imisākiretiniri Teoso, Teoso misākiretiko imatakanapakani ĩkapani. ² Xesosi sāpiretari ia sākiretxiti:

—Sitatxi auari kākiti misiritiko mereēkari. Iua kona paxitari Teoso. Kona ipaxitari kākiti apaka. ³ Iuaā sito apaka aua. Ōtaniri ipīpe. Tikinitakoro otxaua. Oa nirekari iua atāo ikamini oa misiritakarimoni. Txamari iua kākiti misiritiko mereēkari !ipotxitari omokaiakari pirena ikenakotini. Osāpiretapikari iuamoni: “Pikenakotariko nisākire. Pikamariko atāo nota misiritakarimoni. !Nimīteenekaikari nota misiritakari apikomoni misiritinino,” otxa.

⁴ —Isāpakapekari ātipirika osākire ikenakotini. Ininiā eereka ixinikari: “Atāopitikara, kona nota paxitari Teoso, kākiti pakini. Iuaritika nikamariko onirekakiti, kotxi ⁵ ātipirika oa tikinitakoro amanaānātano, ininiā nika-maākaretxitaro. Ininiā nikamariko onirekakiti, kotxi nisāpakapekaro osākire. Ātipirika ikara atoko otxanātapikano. !Nimīteenekaikari,” itxa kākiti misiritiko mereēkari.

⁶ Ininiã Xesosi txana imoianariakori:

—Ikara kãkiti misiritiko mereẽkari kona erekari, iuaritika ikamari osãkire iaõka. ⁷ Teoso apiaerekata. Ininiã ikenakotapitikari imereẽkini sãkire poka-mara, ìkanõka. Ninoa amanaãri Teoso imoianatinina. Ininiã apiata Teoso kenakotari isãkirena. Patimari Teoso kenakotiniri imereẽkini amanaãkiti. ⁸ Nisãpiretai, patimari Teoso misiritinina ninoa misiritakani. Ia nipimaãi. Nota hĩtari iaxitikiri iuaĩkana nikanapiriãkasaaki, atxiĩti napokari nisãkire auĩãkani ìkorapokoriti? —itxa Xesosi.

Pariseo, Txineiro Apotiitakari Pakini

⁹ Iuikakaniua !apokaerekatari apanakini. Ninoamoni, ninoanokara kamari atão. ãti õti Xesosi sãpiretari ia sãpirenatxi atão inakari oerekiko, kãkiti ikara atoko inakanimoni atão imarotinina ìkapani:

¹⁰ —Ipi kiki sari Teoso misãkiretiko aikotimoni. ãti kiki pariseo itxaua. ãti kiki auĩtetxiakori txineirote apakapakari itxaua. Iteene iua misiritari kãkiti, kotxi kãkitimoni imakatzakaro apikomoni txineiro. Kona atão imakatzaka. Imisiritari kãkiti. ¹¹ Iuaã pariseo tima Teoso imisãkiretini ìkapani. Txama iuaka imisãkiretaua. Ia atoko itxa isãkire: “Teoso, nota poxokopítikano, kotxi nota apanakini atoko kona nitxa. Kĩĩtiriri !nitxaua. Kãkiti misiritakari kona nitxaua. Kona nota sirĩka ãti ìtanorokata. Kona nota ia txineiro apakapakari atoko na nitxa. Konapitini. ¹² Ikini semanati, ipi õti nitakanapari ninikini pite nimisãkiretini ìkapani. Txineiro nisikai. Tesi txineirota auiniãno, ãtoka nisikai, ininiã pipaniãtakiti iaõka nikama,” itxa iua pariseo.

¹³ —Iuasaaki txineiro apakapakari ikira atoko itima. Kona ionakaãta iaxiti. Iaritari itorota imaerekani oerekini ìkapani, kotxi maerekati ikamapeka. Itxari Teosomoni: “Teoso, piamonĩkano. Kona erekano nota, kotxi maerekati kamakarino nota,” itxa txineiro apakapakari.

¹⁴ Ininiã Xesosi txari:

—Atãopitikara nisãkire. Ikara inakari kiki Teoso kamaerekata. Isikasaaki iua aapokomoni, erekari itxapekaua. Iua pariseopekana, Teoso !ika-maerekatari iua.

—Iuikakariua, poiãori itxauako. Poiãoripekana, apiatakari itxauako —itxa Xesosi.

Amarini Apokini Xesosimoni (*Mateo 19.13-15; Marko 10.13-16*)

¹⁵ ãti õti kãkiti minari amarini Xesosimoni erekari ninoamoni itakini ìkapani. Txamari Xesosi moianariakori atapakasaakiri kãkiti imiakori mĩkani, isipikapana.

—Hĩkanapiripeka. Hĩsipeka —itxana.

¹⁶ Txamari Xesosi txari imoianariakori:

—Hãuiritanako amarini notamoni apokini. !Hĩsipikapapena amarini, kotxi nitiretapitikana ninoa. Nisãkire auĩãkani auikari nisãkire amarini auikini atoko. Kãkiti nisãkire amarini auikini atoko inakaninokara apoka Teoso auĩtetxi ininiãtaãua. ¹⁷ Amarini auikari iri sãkire. Ininiã hĩxinikariko ia: Amarini atoko himinakaniã, Teoso sãkire iteene himauikakaniã, ininiã Teoso auĩtetxi ininiãtaãua !hĩroã —itxa Xesosi.

Kiki Katiiri Pirena (*Mateo 19.16-30; Marko 10.17-31*)

¹⁸ Xoteo auĩte pimaãri Xesosi:

—Koerekareri erekari, kiripa nikama Teosokata ãtipirika nauini ìkapani? —itxa.

¹⁹ Xesosi txari iua:

—Kininiãpa “erekari,” pitxano? Kãkiti erekari !auari. Teosonanira erekari.
²⁰ Pite imarotapitikari Teoso paniãtakiti: “!Pisirĩkape ãti ïtanorokata. !Poka-niuatape. !Piĩtiriuatape. Apanakini !pimisirienetape. Piri, pinoro pakini pipaxitako.” Ikara atoko pimarotapeka —itxa Xesosi sãkire.

²¹ Ininiã iua kiki apakapapiretari:

—Nota axapitipanika ninakasaaki, nikĩpitari ikara atoko inakari sãkiretxiti Teoso paniãtakiti —itxa.

²² Xesosi kenakotakasaakiri iua kiki sãkire, itxari:

—Auapanika ãtinoka pikamini tĩkane. Ikinika pitii pivẽtxitako, eereka oa txineiro pisikanako minakati mauakinimoni. Eereka pisa notakata. Ikara atoko inakari pikaminiã, Teoso tixine papokasaaki ikinipoko erekari auini-iko pite —itxa Xesosi sãkire.

²³ Iua kiki ikara ikenakotakasaaki, imatinaniuata, kotxi iua iteene katiiri itxaua. ²⁴ Xesosi atamatakasaakiri iua matinaniuatini, itxari:

—Pamimari katxineiroteri auĩtetiniri Teoso. ²⁵ Atauako kamero napatari ãkorike sonakiã? Apia mimari kãkiti katxineiroterini auĩtetiniri Teoso —itxa Xesosi.

²⁶ Ikara inakari kenakotakani txari:

—Pamimari pisãkire. Ininiã kiripa apoka Teoso auiniãtaã? —itxana.

²⁷ Ininiã Xesosi txana:

—Kãkiti maposotakinini Teoso posota ikamini —itxa Xesosi.

²⁸ Ininiã Petro txari:

—Ate takanapapekari ikinipoko pitekata asini ïkapani —itxa.

²⁹ Ininiã Xesosi txari:

—Atãopitikara, ininiã ia atoko nitxai hĩte. Pauini pitakanapiniã, pĩtanoro, pitariakori, piri, pinoro, pamariteakori pakini pitakanapiniã, Teoso auĩtetxi ininiãua pirena pisãpiretini ïkapani, ³⁰ ininiã ïkorsaaki apiata erekari papakapa. Ininiã ãti õti pipĩkasaaki iaxiti papokasaaki, pauapininiika pitxako —itxa Xesosi.

Iuaĩkana Xesosi Sãpiretari Ipinini

(Mateo 20.17-19; Marko 10.32-34)

³¹ ãti õti Xesosi anikari imoianariakori ikira atoko, misãkireta itxana:

—Uatxa Xerosareẽmoni asa. Kitxakapirĩka Teoso sãkire sãpiretakani sãpiretapekari nota hĩtari iaxitikiri pirena. Ninoa sãkire iõkatsopatakinitina paĩtiki apokapitikako, ³² kotxi nisikaãkako Xoteo minakonimoni. Ninapetaãkako. Nimiãkirepiretaãkako. Nikiisokaãkako. ³³ Niaritaãkako. Eereka nokaãkako. Ipi, ãti pakini õtisaaki iuaĩkana nõkitikaua —itxa Xesosi.

³⁴ Xesosi moianariakori !imarotari isãkire. Ikara sãkiretxi kipatakori atoko itxa. Ininiã kona ninoa imarotari isãkire.

Mõsiãreti Xesosi Makananitini

(Mateo 20.29-34; Marko 10.46-52)

³⁵ Xesosi apokaãpota Xerikoo sitatxiti takote. Mõsiãreti kimapori tiniãpo iitopãkanãta. Amanaãnãtaro txineiro. ³⁶ Ikenakotari kãkiti kimaporiã napakani, ininiã:

—Kiripa ikara? —itxa.

³⁷ —Xesosi Nasaree sitatxitikiri, iuara napaãpota —itxana apanakini.

³⁸ Ininiã iua mõsiãreti akirikata:

—Xesosi, Taviini apika mekanirii, piamonĩkanoko —itxa.

³⁹ Ninoa ïkiikakani txitari iua:

—!Pakiripoatape —itxana.

Txama iteene iua akirikata iuaĩkana:

—Taviini apika mekaniri, piamonĩkano —itxari.

⁴⁰ Ininiã Xesosi iotoka. Amanaãna kãkiti:

—Ere kiki himina notamoni —itxa Xesosi.

⁴¹ Xesosi takote apokasaaki, Xesosi pimaári:

—Kipa pinireka nikaminii pitemoni?

—Kōsiārepeka ninini ninireka —itxari.

⁴² Ininiã Xesosi txari:

—Kōsiārepekai uatxa, kotxi pauikari nisãkire —itxa.

⁴³ Iuasaakipeka iua kiki kōsiārepeka itxa. Ininiã iua saãpota Xesosi tikini. Teoso ereka inini pirena isãpireãpota. Ikinimane kãkiti itikasaakiri Xesosi kamakiti iuamoni.

—Peerekari Teoso —itxana.

19

Sakeo Pirena

¹ Xesosi Xerosareẽmoni isikasaaki, Xerikoo sitatxiti apanĩkaki inapaãpota. ² Iuaã aua kiki, Sakeo inakori. Iua katiiri. Iua kãkiti txineirote apotiitakari auĩtetxiakori ĩkapani. Apanakini txineiro apotiitakani auĩte itxaua. Iua misirienetari kãkiti. Imakatzakari txineiro auĩtetxiakori ĩkapani. Txamari apikomoni imakatzaka. Kona atão ikamakiti. !Erekari iua.

³ Xesosi apokasaaki Xerikoo, iua Sakeo nirekari Xesosi atamatini. !Apakata atamatiniiri, kotxi paĩtiri iua. Itomaneri kãkiti Xesosi ĩtinikata auanãta. Ininiã !apakata mōtãnoti atamatiniiri iua. ⁴ Ininiã imiteka Xesosi apisa, aaminaã kanĩka itxa. Xesosi iuaã napakasaaki, iposotari itikiniri. ⁵ Xesosi apoka iua aamina patapi. Ionakaãta itxa. Itxari:

—Sakeo pikatzaka, katima pitxa. Uatxa, paapokomoni nisako, nianapokotini ĩkapani —itxa Xesosi.

⁶ Ininiã katxaka katimapeka itxa. Ipoxoniritika iua apakapari Xesosi.

⁷ Ikinimane iuaã auakani misãkireporetari Xesosi. Itxana:

—Xesosi sari maerekati kamakari aapokomoni. Kininiãpa iua sa iua aapokomoni? —itxana.

⁸ Ininiã iua aapoko apoãka atoko, Sakeo tima isãkirauatini ĩkapani. Ininiã itxari Xesosi:

—Ipixini ninakiti nisika matiinimoni. Niĩtirĩkakiti iuaĩkana nisikanako kãkiti. Txineiro niĩtirĩkiniã, ininiã iuaĩkana ipi ipi pakinikata nisikariko nimisiritakinimoni —itxa Sakeo.

⁹ Ininiã Xesosi:

—Ia kiki Apraão apika mekaniri apaka. Uatxa imaerekani makatzakaãka, kotxi itakanapari maerekati ikamakiti. ¹⁰ Kãkiti itari iaxitikiri apoka ĩkorapokoriti kãkiti pĩpinanaãkani inisini, imaerekani imakatzakini ĩkapani —itxa Xesosi.

Nitiritxi Erekari, Nitiritxi Maerekati Pakini (Mateo 25.14-30)

¹¹ Eereka Xesosi sãpiretari ia sãpirenatxi atão inakari oerekiko. Oerekari ia sãpirenatxi, kotxi Xerosareẽ ninoa apokaãpota. Kãkiti uãkatari paĩtiki Teoso ikinimane auĩte ininiua. ¹² Ia atoko itxa:

—Kiki aiamatapeka õtakoxiti isini, auĩtetxi ininiua ĩkapani. Iua nirekari isini, ininiã eereka inirekari ikanapiriini. ¹³ Ininiã isini apisapanika akiritari tesi initiriakori. Isikanapana txineiro tesi ota oro kamakoro. Ātoka isikaãpotana initiriakori. Itxa: “Nota ātiãtaã nauakasaaki, hiamotari tiĩtxi. Eereka pivẽtxitari apikomoni txineiro hãpakapini ĩkapani. Ikara atoko hĩtxako,” itxa.

¹⁴ —Isipeka atoko kãkiti iuaã auakani !nirekari iua auĩtetxi ininiua, kotxi omanatarina. Ininiã ninoa iokanapireta iuamoni: “Ate !nirekai pite aũũte pininiua,” itxana ninoa.

15 —Iuasaaki iua ātiātaā auītetxipeka itxaua. Ikanapiriākasaaki akiritana iniritiakori, txineiro isikanapakini. Ininiā iua txana ninoa: “Hōerekano txineiro apikomoni hāpakapakito,” itxa. 16 Āti iniriti apoka iuamoni. “Nipatrāote, pite sikanapano ātoka ota. Uatxa tesipeka ota aua notamoni,” itxa.

17 —Iuasaaki auītetxi txari iua: “Pite kamakiti peerekari. Pite ninitiri erekari. Ātonoka ota nisikapekai, iuaritika piparīka peerekari. Uatxa tesi pakini sitatxiti auakani auīte pitxauako,” itxa.

18 —Ātipekana apoka auītetximoni: “Āti ota pisikanapano nota. Uatxa sīkopeka ota aua notamoni,” itxa iniriti.

19 —Ininiā auītetxi txari: “Erekapitikari. Ininiā sīko pakini sitatxiti auakani auīte pitxauako,” itxari.

20 —Ātipekana apoka auītetximoni: “Oniā pinakito txineiro. Mākatxi mataā niapirikaro, poteta nitxaro pitxineirote. 21 Nota pīkai pite. Pataparaxinirei. Nimarotari pite amotari āti kamakiti. Piamotari pikiena āti kākiti kiena,” itxa.

22 —Ininiā iua auītetxi apakapapiretari: “Pite ninitiri maerekati pitxaua. Pite txano nota kiki kataparaxinireri nitxaua. Pimarotari niamotiniri āti kamakiti. Pimarotari niamotiniri āti kākiti kiena. 23 Ikara atoko ininiā, pimanirekakaniāri piparīkauatini, kinirepa kona pisikataro nitxineirote pākomoni? Pisikaākamaroko, napakapamaroko apikomoni nitxineirote nikanapiriākasaaki,” itxa auītetxi.

24 —Ininiā iua paniātana iuaā auakani: “Himakatzakaroko nitxineirote iuamoni nisikakito. Hīsikaro tesi ota auakitimoni,” itxa.

25 —“Auapeka tesi ota iuamoni,” itxarina.

26 —Ininiā auītetxi apakapapiretana: “Piparīkauatiniā, ininiā pinakiti itori aua, ininiā apikomoni papakapa. Pite iarinouatiniā, ininiā ikara xika pinakito poiāo. Āti ōti piarini xika ikara poiāori makatzakaākako apaka. 27 Uatxa himinana notamoni nimokaiakariakori, kotxi ninoa inirekano nota iauītena nininiua. Hōkana ninoa nota apisatoō,” itxa auītetxi.

Xesosi Xerosareē Apokaāpotini

(Mateo 21.1-11; Marko 11.1-11; Xoāo 12.12-19)

28 Ikara inaāka atoko, Xesosi sari imoianariakori apisa Xerosareēmoni. 29 Xerosareēmoni isikasaakina, apokaāpotana Petxipaxee, Petánia pakini aapokotxiti. Ninoa ipi aapokotxi Oriva inakori xirata takote. Iuaā auakasaaki, Xesosi iokanatana ipi imoianariakori aapokotximoni.

30 —Ikira aapokotximoni hīsa. Iuaā hāpokariko xomēta ākiri, iaxiriākori. Iua xomēta ākiri kākiti maitopākakotipanika inakori. Hīkoxiripatakariko iua. Himinari notamoni. 31 Ipitikiri akiritiniāi: “Kinirepa hīte koxiripatakari nipira?” inakasaakii, ia atoko hītxariko: “Apiananiri nirekari iua,” hītxako — itxana.

32 Iuaā apokasaakina, ikinika Xesosi sākire iaōka auapeka. 33 Ninoa koxiripatakasaakiri xomēta ākiri, ipitikiri apoka.

—Kinirepa nipira hīkoxirika? —itxa.

34 Ininiā ninoa:

—Apiananiri nirekari iua —itxana.

35 Ininiā anikarina xomēta ākiri Xesosimoni. Imoianariakori takari imākana xomēta nopini. Imoianatarina Xesosi xomēta nopini iitopākini ikapani.

36 Xesosi saāpotakasaaki Xerosareēmoni, apanakini kākiti matameēkari imākana kimaporiāpo Xesosi napini ikapani. 37 Ōtanoxiratari Oriva inakori

iokiriĩtakasaaki, ninoa imakinika ipoxokoniritikana akiripoakatana, kotxi itikapekarina itori Teoso posotiire.

³⁸ —Peerekari auĩtetxi, Apiananiri iokanatakiti kãkitimoni. Teoso takari erekari iuamoni. Ininiã Teoso !omanataikari kãkiti. Peerekari Teoso, iaxiti apiko nopinixiti auakari. Apiananiri itxaua —itxanãtana ninoa iuasaaki.

³⁹ Iuaã kãkiti itomaneri sauaki aua pariseoakori apaka. Ninoa txari Xesosi: —Koerekareri, piotokakana pimoianariakori ikara isãkirena.

⁴⁰ Ininiã Xesosi:

—Atão ninoa akiritakiti. Ininiã !nipinitana iotokakiniri. Nimauri-takaniãna isãkirena nota Apiananiri nininiãua, ininiã Teoso txĩkitakari kai soro sãkirauatini ikara sãkire isãpiretini —itxa Xesosi.

Xesosi Txiapata Xerosareẽkini Itiretini

⁴¹ Ninoa apokaãpotakasaaki Xerosareẽ, Xesosi Xerosareẽ atamatakasaaki, iua txiapata, kotxi iuaã aua mirikiniti kãkiti isãkire mauikakani.

⁴² Ixinikasaakina Xerosareẽ auakani itxa:

—! Himarotari hĩkamakiti tĩkane hãuini ereka inini ĩkapani, neenamtxi mauakani ĩkapani. Ninirekari himarotiniri, txamari uatxa ikara himarotini kipataãka himimarotakaniri ĩkapani. ⁴³ Āti õti himokaiakarini ãkitai hĩte. Ininiã kona kãkiti pokĩka sitatxi, kona ĩroã. Iuasaaki himitekini !auari. Hãkitapeẽkaikako. ⁴⁴ Himokaiakarini xipokariko ia sitatxi. Ikinimaneko okaãkako. Kai ãti kai nopini auakari !ikaikotaika. Imakinika xipope. Iua atoko inakari auako, kotxi hĩte !apakapari Teoso hĩtemoni apokasaaki.

Pirãtxi Vẽtxitakani Omitikiko

(Mateo 21.12-17; Marko 11.15-19; Xoão 2.13-22)

⁴⁵ Xesosi apokasaaki Xerosareẽ, isari Teoso misãkiretiko aikotiã. Iuaã auari kãkiti tiĩtxi vẽtxitakani, ininiã Xesosi omitikana. ⁴⁶ Xesosi txana ninoa:

—Teoso sãkire iõkatsopatakori txari:

Ia naapoko, “Teoso misãkiretiko aikoti” akiritaãkako, itxa. Txamari hĩte txĩkitakari ia aiko kiĩtiririni iomaãtiniãtaã ininiua —itxa Xesosi.

⁴⁷ Teoso misãkiretiko aikoti ãki ikiniõtika oerekarauata. Iuasaaki sasetotxi auĩteakori, kaiõkatsopareriakori, kãkiti auĩteakori pakini kinirão okaka txari Xesosi. ⁴⁸ Txamari itomaneri kãkiti potxitari Xesosi oerekakiti sãkiretixiti. Ininiã ninoa kaikotapika Xesosikata ikinika isãkire imarotinina ĩkapani. Ikara xika liposotarina okiniri iua iuasaaki.

20

Xesosi Paniãtakari Moerekakoni

(Mateo 21.23-27; Marko 11.27-33)

¹ Xesosi Teoso iokanapirena erekari isãpiretakasaaki Teoso misãkiretiko aikoti ãki, iuasaaki sasetotxi auĩteakori, kaiõkatsopareriakori, kãkiti auĩteakori pakini apoka. ² Ninoa pimaãri Xesosi:

—Pite omitikana tiĩtxi sikakani Teoso misãkiretiko aikotiã auakani. Kipaniãpa pikamari ĩkora pikamakiti? Kipa paniãtai? —itxana.

³ Ininiã Xesosi txana:

—Nota apaka pimarauatako hĩtemoni. Ātinoka nipimaãiko hĩte. Ininiã hãpakapapiretano. ⁴ “Kipa paniãtari Xoãoni ipatxisarauatini? Teosokani paniãtari Xoão? Kãkitikani paniãtari Xoão?” —itxa Xesosi.

⁵ Eereka ninoakakarini isãkirauatana:

—Kanatokopa atxa? “Teosora,” aniniã, ininiã ipaniãtamaua eereka: “Kinirepa kona hãuikatari Xoão sãkire?” itxamaua ate. ⁶ “Kãkitira paniãtari

Xoão,” aniniã, ininiã kãkiti kiporonakauako ate kai soroã, kotxi ninoamoni Xoão Teoso sãkire sãpiretakari itxaua. Ininiã kanatokopa atxa? — itxakakauana.

⁷ Ininiã eereka ninoa apakapapiretari Xesosi:

—Kona ate imarotari —itxana.

⁸ Eereka Xesosi txana:

—Ininiã nota apaka kona nisãpiretai nipaniãtakiri uãka —itxa Xesosi.

*Parĩkauatakani Maerekani
(Mateo 21.33-46; Marko 12.1-12)*

⁹ Eereka Xesosi sãpiretari kãkiti ia sãpirenatxi atão inakari oerekiko. Ia atoko itxa:

—Aua kiki. Itakari amãtiiri ova inakoro. Ovanoka itaka ikikioteẽ. Eereka iĩkitxitana kãkiti itakare nĩkatakani. Eereka isari ãti tixini. Iuaã mapakanani ikaikota. ¹⁰ Oamiko manapi iokanatarari initiri apakapiniri ipixini amãtiiri. Txamari amãtiiri nĩkatakani noropatari iua nitiri. Ininiã eereka iokanatarina iua. Kona axapiti amãtiiri anika ipatrãotemoni. ¹¹ Ininiã iuaĩkana ãti initiri iokanata. Iuaĩkana ninoa noropatari iua initiri. Imisiritarina. Eereka iokanatarari iua. Kona axapiti amãtiiri anika ipatrãotemoni. ¹² Iuaĩkana ãti initiri iokanata ikikiotemoni. Iuaĩkana ikarotarina, iokanata itxarina. Kona anikari axapiti amãtiiri iuamoni. ¹³ Iua katakareri txari: “Kipa nikamaã? Ari, uatxa nimarotapekari. Namarite nitiretakiti niokanatako ninoamoni. Ninoa paxitapitkariko iua,” itxama.

¹⁴ —Amãtiiri nĩkatakani atapari amãtiiri takakari ãkiri apokaãpotini. Ininiã itxana: “Katakareri ãkiri ina. Katakareri ipĩkasaaki, iua ãkiri apakapari ikinika. Ininiã maõkari iua. Ininiã ikinika itakare aua atemoni,” itxana.

¹⁵ —Ininiã ninoa kosekaĩtotari katakareri ãkiri, mapara okaĩtota itxarina. Ininiã okapirina.

Ininiã Xesosi pimaãri kãkiti iuaã auakani:

—Kiripa iua katakareri kamaã? ¹⁶ Iua okanako ikinipoko ninoa. Itakare apanakinimoni sika itxako —itxa Xesosi.

Kãkiti kenakotakasaakiri ikara pirena itxana:

—Ikara atoko inakari !anireka —itxana ninoa.

¹⁷ Ininiã Xesosi iteene atamatana.

—Ininiãkara natokopa itxa Teoso sãkire iõkatsopatakori oerekiniua?

Aapokotxi kamakani kona nirekari ãtika kai soro. Iua kai imanirekakiniti kai apiari itxapekaua. Apanakini kai soro maĩkakari itxaua.

Itxa Teoso sãkire iõkatsopatakori. ¹⁸ Kãkiti mãkititiniã iõkora kai xika, ikarotaãka. Iõkora kai irikiniã kãkiti nopini, pomoĩpeka itxana. Ininiã eereka aãpani itxaua —itxa Xesosi.

*Homano Auĩte Iĩkitxitiko
(Mateo 22.15-22; Marko 12.13-17)*

¹⁹ Iuasaaki Xesosi sãkirauatakasaaki, sasetotxi auĩteakori, kaiõkatsopareriakori pakini, nirekari maĩkiniri Xesosi, okinirina iõkapani, kotxi ninoamoni ikara Xesosi sãpiretakiti oerekari kãkiti ninoa nirekiniri okiniri Xesosi. Txamari ! imaĩkarina, kotxi ipĩkarina apanakini kãkiti. ²⁰ Ikinioĩtika ninoa itikapikarina Xesosi sinimoni imarotinina iõkapani. Ininiã ninoa iĩkitxitari kamĩkapirirerini Xesosi imisãkiretinina iõkapani. Ninoa nirekari Xesosi kerokiniri isãkire. Ikerokiniãri, iposotarina anikiniri auĩtetxiakorimoni okinirina iõkapani.

²¹ Ininiã ninoa kamĩkapirirerini apoka Xesosimoni.

—Koerekareri, ate imarotari atãopitikara pisãkire. Pite oerekari ikinipoko kãkiti atão Teoso nireẽkiti kamiko. Poerekakiti sãkiretxiti kãkiti apiarinimoni, iuatxikana poerekari kãkiti poiãorini. ²² Atãokani txineiro asikini

Homanoakori auĩtemoni, Sesa inakorimoni? Apakata amasikakaniro iua-
moni? —itxana ninoa.

²³ Xesosi imarotari ninoa nirekari ikerokiniri isākire, ininiã iua txana:
—Kinirepa hãtamakaerekatano nota? ²⁴ Poerekano txineiro ota. Kisanõkapa
ia? Kiuãkapa aua uai? —itxa.

Ininiã ninoa:

—Sesa sanõka, iuãka apaka aua —itxana.

²⁵ Ininiã Xesosi:

—Hĩsakariko Sesamoni iua nakiti. Hĩsakariko Teosomoni iua nakiti —itxa
Xesosi.

²⁶ Ninoa nirekari Xesosi kerokiniri isākire kãkiti apisatoõ, txamari !
ikerokari. Ininiã ninoa tsorĩkaãta Xesosi apakapapiretakiti ikenakotakasaak-
ina. Apikomoni !isãkirauataikana.

Ipĩkari Õkitikiniua Mauikakoni

(Mateo 22.23-33; Marko 12.18-27)

²⁷ Ikara inaãka atoko, apoka satoseoakori inakoni. Satoseo kona auikari
ipĩkari iuaĩkana õkitikiniua. Ninoa misãkiretari Xesosi. ²⁸ Itxana:

—Koerekareri, kitxakapirĩka Moisesini iõkatsopataria atoko inakari: “Kiki
meenetipanika ipininiã, iua itari takaroko tikinitakoro. Iua itari keene
ininiã, itakauãkatari amarini iua itarini ipĩpekarini uãka,” itxa Moisesini.

²⁹ Setxi itaritxiakori aua mitxi ĩkorapokoriti. Apia kiomanetakari ĩtaniriuata.
Meenetipanika ipina. ³⁰ Itari takaro iuani tikinitakito. Iua apaka ipina
meenetipanika. ³¹ Iuaĩkana ãti itari takaro oa. Iuaĩkana ipina meenetipanika.

Iua atokotxikana itxana imakinikana itariakori. ³² Eereka oanipekana opĩpe
apaka. ³³ Ipĩkani õkitikasaakiaua, kiripa oĩtaniri? Kotxi ikinikana takapekaro oa
—itxana.

³⁴ Ininiã Xesosi:

—Uatxa ĩkorasaaki kãkiti ĩtaniriuata. ³⁵ Teoso nakitiakori iuaĩkana
õkitikasaakiaua, !ĩtaniriuataikana. ³⁶ Ninoa !ipinaika, kotxi Teoso nitiriakori
iaxitikini atoko itxauanako. Iuasaaki Teoso anaakori atoko itxauana,

kotxi Teoso õkitikapekana ninoa. ³⁷ Hĩte kerokari hĩsãkire. Hĩte sãkire txari:
“Ipĩkani !õkitikaikaua.” Moisesini oerekaua ipĩkani iuaĩkana õkitikapanikaua.

Iua iõkatsopatakasaakiri aamina tirinakari pirena, isãpiretari Teoso sãpiretakiti.
Ia atoko itxa Teoso iuasaaki: “Nota Apraõ Teosone, Isaki Teosone, Xakoo
Teosone pakini nitxaua,” itxa Teoso. ³⁸ Ininiã ninoa Apraõ, Isaki, Xakoo
auapanika, kotxi Teoso !ipĩkani Teosoneni. Auãki inakani Teosonera iua,
kotxi iuamoni ikinimane auãkipanika —itxa Xesosi.

³⁹ Eereka ãtikaka kaiõkatsopareriakori txari:

—Koerekareri, atãopitikara pisãkire —itxana.

⁴⁰ Ikara inaãka atoko kãkiti pĩkarauata apikomoni ipimarauatini.

Teoso Mereẽkiti Tavii Apika Mekaniri Itxaua

(Mateo 22.41-46; Marko 12.35-37)

⁴¹ Ininiã Xesosi pimaãna:

—Kinirepa isãpiretaãka Teoso mereẽkiti Taviini apika mekaniri ininiua?
⁴² Kotxi Taviini iõkatsopata Xikari aãtsopateẽ. Itxari:

Apiananiri txari niauĩtemoni: “Nota kikomoni piitopãka.

⁴³ Piitopãkiniritika nixipokariko pimokaiakariakori. Nikamariko ninoa pikiti
pitakiniãtaã atoko ininiua.”

Itxa Taviini xikare. ⁴⁴ Taviini akiritari Teoso Mereẽkiti “Niauĩte.” Ininiãkara
kanatokopa iua Tavii apika mekaniri? —itxa Xesosi.

Kaiõkatsoparerini Maerekani

(Mateo 23.1-36; Marko 12.38-40)

⁴⁵ Eereka kākiti apisatoõ Xesosi õtākikana imoianariakori. ⁴⁶ Ia atoko itxa: —Erepaniko, kaiõkatsoparerini misirienetini. Ninoa ieretakari mākaxi ñtanori, peereri, apanakini atamatinina ñkapani. Tiitxi amotikoõtaã nino potxitari kākiti ninoakata sākirauatini apanakini atamatinina ñkapani. Ninoa potxitari iitopākinina auñtetxi topākiniãtaã aiko āki Xoteo apotiitiniãtaãua. Kiinirisaaki ninoa nirekari apiari topākiniãtaã iitopākinina. ⁴⁷ Kiki ipĩkasaaki, ninoa misiritaro tikinitakoro. Ninoa mixirikari oaãpoko, iuaritika imisākiretarina Teoso. Teoso imisākiretakasaakina, kaiãori sākiretxi isākiretana. Ininiã apanakini kenakotakasaakiri, ninoa xinikari: “Atão iua imarotari Teosokata isākirauatini,” itxana. Txamari Teoso kamaãkaretxitana, ininiã apiata imisiritããkanako.

21

Tikinitakoro Matxineiroto Sikakito (Marko 12.41-44)

¹ Xesosi sākirauatakasaaki Teoso misākiretiko aikoti āki, itikari katiirini takiniro itxineirotena kaixa āki Teoso ñkapani. ² Iusaaki oãua tikinitakoro matiito. Õtaniri !auaika. Oa sikaro ipi txineiro ota okinika oamoni auakaro. ³ Ininiã Xesosi txa: —Atãopitikara, okira sito sikari apiata. ⁴ Kotxi apanakini sikaro itxineirotena itetakito. Okira sikari okinika onakito —itxa Xesosi.

Teoso Misākiretiko Aikoti Irikiko (Mateo 24.1-2; Marko 13.1-2)

⁵ Āti õti Teoso misākiretiko aikoti āki aua Xesosi imoianariakorikata. Aiko ereri pirena isākirenãtana. —Uai peereri. Ere kai sorokiniri paretxiã auakari pakaronepokori. Patamatari kākiti sikakiti Teosomoni —itxana. ⁶ Ininiã Xesosi txana: —Ari atãopitikara peerekari. Txamari apokapitikako āti õti ia aiko irikiko ñkapani. Iusaaki kai āti kai nopini auakari !auaika. Ikinipoko irikaãkako —itxa Xesosi.

Misirikaretxi Apokaenetini (Mateo 24.3-14; Marko 13.3-13)

⁷ Ininiã ninoa pimaãri: —Koerekareri, kirisaakipa ikara atoko inakari auapani? Kiãtokopa itxa ia aiko Teoso misākiretiko irikini õti manapi aimarotini ñkapani —itxana.

⁸ Ininiã Xesosi apakapapiretana: —Erepaniko, xipokatxi õti apokaãpotakasaaki, kākiti nirekari imisirienetini hñte. Ito aãpirena auako. Kaiãopokori kiki sākire: “Teoso mereẽkitikarano nota. Nota apokapeka uai,” itxamana. Paxirari ninoa sākire. !Himaãkatapena ninoa. !Himoianatapena ninoa. ⁹ Neenamatiene hñkenakoenetakasaaki, !hĩpĩkarauatape. Iua atoko inakari merepanika auako. Iusaaki xipokatxi õti !apokapanika —itxa Xesosi.

¹⁰ —Āti uãka kamari neenamati ãti uãkakata. Āti auñtetxi sotatoneakori neenamauata ãti auñtetxi sotatoneakorikata. ¹¹ Iusaaki xipokatxi õti apisa, nota apokini apisa, itixi iakeẽkatakato. Natxi auako. Itori amianari auako. Apaka kākiti atamatakiti iaxiti kamapĩkaretana.

¹² —Ikara inakari apisa, apanakini maĩkaiko hñte. Himisiritaãkako. Xoteoakori anikaiko aiko Xoteo apotiitiniãtaãua Xoteoakori auñte apisatoõ apoñtiniina ñkapani. Hñtakaãka kateia āki. Ninoa anikaiko hñte itixi auakani auñteakorimoni hñte apoñtinina ñkapani. Iua atokokanerako hinaãkako nisākire hñuikini xika. ¹³ Iusaaki auñtetxiakori apisatoõ hñuakasaaki, hñsãpiretariko

Teoso iokanapirena erekari. ¹⁴ Ninoa himisākiretini apisa, maerekaxiniretika !h̄txape. Kona h̄p̄karauatape, ¹⁵ kotxi ninoa apisatoō h̄auakasaaki, nota sikaimaroretai h̄ite, ininiā himokaiakariakori !iposotari apakapapiretiniina h̄ite. !Iposotarina isāpiretiniina: “Kona atāo pisākire,” !itxana. ¹⁶ Hinoroma, h̄rima, h̄itariakorima, apanakini hinirimanema, haōkimanerema pakini sikaiko h̄ite himokaiakariakorimoni. Ātikaka h̄ite okaākako iuasaaki. ¹⁷ Ikinimane omanataiko h̄ite nisākire h̄auikini xika. ¹⁸ Iuaritika Teoso !auiritari ātika hiāko maporokiko, kotxi Teoso iteene n̄katapitikaiko h̄ite. ¹⁹ Himīteenekiniāri ikinika himisiritiko, ininiā Teoso tx̄ikitakaiko ātipirika iuakata h̄auapiniika hinini ĩkapani —itxa Xesosi.

Xerosareē Xipokiko Pirena
(Mateo 24.15-28; Marko 13.14-23)

²⁰ Apikomoni Xesosi txari:

—H̄tamatakasaakiri sotatoakori ākitiniri Xerosareē, iuasaaki himarotariko pakotapaniri sitatxi xipokini. ²¹ Iuasaaki h̄ite Xotéia tōpa auakani himitekako oxiratarimoni. Sitatxi h̄auiniā, ininiā himitekako. Mapara h̄auiniā, kona h̄ikanapiripe sitatximoni, ²² kotxi iuasaaki kākiti misiritiko ōti apoka. Teoso sākire iōkatsopatakori sāpiretapekari ikara ōti apokini. ²³ Iuasaaki !erekapaniri sito kamixiro ĩkapani, kaxitakarero ĩkapani, kotxi omitekini !apakata. Xoteo auiniātaā auapitikako iteene imisiritikona t̄kane, kotxi iuasaaki Teoso oerekari iua omanākare Xoteoakorimoni. ²⁴ Itomaneri kākiti okaākako saasara atoko inakaroā. Apanakini anikaākako ikini uāka tixinemoni. Xoteo minakanuia xipokariko sitatxi Xerosareē. Teoso auiritana ninoa kaikotini iuaā. Eereka Teoso xipokariko ninoa tapara. Eereka !auaikana —itxa Xesosi.

Kākiti Itari Iaxitikiri Kanapiriini
(Mateo 24.29-31; Marko 13.24-27)

²⁵ Apikomoni Xesosi txari:

—Nota uai apokini apisa, atokatxi, kasiri, iōriki pakini oerekariko kākiti nota iposope uai napokini. Apaka potxoari uiniti auari tsakati mitari. Iua tsakati miramaneri iene. Ikara xika itixi auakani kamaxirexinirepeka itxanako. ²⁶ Kākiti ākipa iotokako ip̄kare xika. Itixi misiritiko xika ip̄karauata, kotxi iōriki, ikinika iaxiti auakani iakeēkatakō. ²⁷ Iuasaaki nota, h̄itari iaxitikiri katxakaāpota katxiārikata. Iuasaaki ikinimane atapanoko nota. Iuasaaki kaposotiireno nota. Niotximerekata napoka uai. ²⁸ Ikara itixi misiritiko apokaāpotakasaaki, haiamatakō. Hionakaātako, kotxi paītiki nota kanapiriā h̄ite napini ĩkapani. Iuasaaki nimakatzakai h̄ite ikinika maerekati auiniātaā —itxa Xesosi.

Piko Mina Pirena
(Mateo 24.32-35; Marko 13.28-31)

²⁹ Xesosi sāpiretari āti sāpirenatxi atāo inakari oerekiko. Itxari:

—H̄ixinikari aamina piko inakori. Apanakini ātiāo aamina apaka h̄ixinika. ³⁰ Pooōporipeka onakasaaki, otomorekasaaki, “Kamoī apokanapanoka,” h̄itxa. ³¹ Iua atokokana ikara misirikaretxi mixikanani nisāpiretakiti h̄itikasaaki, iuasaaki himarotariko paītiki Teoso ikinimane auite itxauako.

³² —Ia nisākire atāo. Itixi auakani !ixipoka ikinipoko nisāpiretakiti mapokakani apisa. ³³ Iaxiti xipokapitikako. Īkoraxiti apaka xipokapitikako. Iuaritika nota sākire !ixipoka.

Iātapakori Ōti Pirena

³⁴ —Erepaniko, maerekaxiniretika kona h̄txape. !H̄isarauatape. !H̄ipoātape. H̄iparīkanoka ! h̄ixinikapeko, kotxi h̄isarauatiniā, h̄ipoātiniā, h̄iparīkanoka

hĩxinikiniã, ! hĩxinikari nikanapiriini õti, kotxi ĩkora õti himimarotakani õtisaaki, napokako. Erepaniko, kotxi txikatoro atoko itxa napokini. Kãkiti !imarotapaniri napokini õti. ³⁵ Imakinika kãkiti itixi auakani imarotariko napokini iuasaaki. ³⁶ Hiãtapariko nikanapiriini. ãtipirika himisãkiretariko Teoso. Hamanaãriko Teoso ikara inakari mamisiritakanii hĩte. Hamanaãriko Teoso himapẽtauatakani ĩkapani hĩtari iaxitikiri apokasaaki iua apisatoõ hĩtimakasaaki —itxa Xesosi.

³⁷ ĩkiniõtika Xesosi sari Teoso misãkiretiko aikotimoni Teoso sãkire oerekini ĩkapani. ĩkiniõtika mapiãnikata Xesosi sari õtanoxiratarimoni, Oriva inakori-moni. ³⁸ ĩkanõkapanika kãkiti apoka Teoso misãkiretiko aikotiã Xesosi sãkire ikenakotinina ĩkapani.

22

Satanasi ĩroã Xotasi Xinireẽ

(Mateo 26.1-5, 14-16; Marko 14.1-2, 10-11; Xoão 11.45-54)

¹ Kaiamapeka Pãskoã inakori kiiniriti apokini. Iua kiiniriti Xoteoakori nikari pão matireẽkati. ² Iuasaaki sasetotxi auĩteakori, kaiõkatsopareriakori pakini nirekari Xesosi okinina, txamari, ninoa pĩkari apanakini kãkiti, kotxi ninoa apokaerekatari Xesosi.

³ Iuasaaki Satanasi ĩroãtotari Xotasi Isikariotxi inakori. Iua Xotasi Xesosi moianarikamara, apanakinikata. ⁴ Iuasaaki iua sari sasetotxi auĩteakorimoni, Teoso misãkiretiko aikoti nĩkatakani auĩteakorimoni. Iuasaaki isãkirauata ni-noakata Xesosi imĩkapiritini ĩkapani. Iuasaaki ninoa xinikaxitita:

—Kiãtokopa itxatari Xesosi isikini atemoni?

⁵ Sasetotxi auĩteakori enenĩka. Ninoa txari Xotasimoni:

—Pisikasaakiri Xesosi atemoni, aĩkitxitaiko pite —itxana Xotasimoni.

⁶ —Ateeneka —itxa Xotasi.

Ikara atoko inaãka atoko Xotasi iãtapari isikiniri õti manapi. Inirekari kãkiti mauakanisaaki, Xesosi imĩkapiritini.

Pãskoã Kiiniriti Kamiko

(Mateo 26.17-25; Marko 14.12-21)

⁷ Iuasaaki kãkiti parĩkauata Pãskoã kiiniriti ikaminina ĩkapani. Iua kiiniriti auakasaaki, itotarina pão matireẽkati inikinina. Iuasaaki okarina soti auĩte akiri kiinirisaaki iniãkitina ĩkapani. ⁸ Xesosi paniãtana Xoão, Petro pakini:

—Hĩsako. Hãpotiitariko nipokori Pãskoã kiiniriti ĩkapani —itxa.

⁹ Ininiã ninoa:

—Namonipa akamatari kiiniri? —itxana.

¹⁰ Ininiã Xesosi:

—Xerosareẽmoni hĩsa. Iuaã hĩtikari kiki kaminiri sito parĩka. Iua apaãnãtari ãparaã. Kopiti ikiiã anikanãta. Iua aõkitaiko hĩte. Iuakata sa hĩtxako. Hĩĩroã aapokotxi iua ĩroiniãtaã. ¹¹ Himisãkiretari kauiniri. Hĩtxariko iua: “Koerekareri nirekari imarotiniri: ‘Namonipa ianapokotakani kaikotiniãtaã iriko? Iuaã inirekari inapiniri Pãskoã õti imoianariakorikata,’ hĩtxariko iua.” ¹² Iuasaaki kauiniri oerekai itanokiri koa mitari iuaã kiiniri ĩkapani. Imakinika tiitxi iposope. Iuaãrako hãpotiitari imakinika Pãskoã kiiniriti ĩkapani —itxa Xesosi.

¹³ Ininiã sa itxana. Apoka itxarina ikinika Xesosi sãkire iaõka. Ininiã iuaã ninoa maiamatari kiiniri.

Xesosi ĩto, Iarẽka Pakini

(Mateo 26.26-30; Marko 14.22-26; 1 Korĩto 11.23-25)

¹⁴ Ininiã Pãskoã kiiniriti potorikasaaki, Xesosi imoianariakorikata topãka.

¹⁵ Ininiã Xesosi txana:

—Iteene ninirekari hītekata ninikiniri ia nipokori Páskoa kiiniritisaaki, natatsiirauatini apisa. ¹⁶ Ia atoko inakari nipokori !ninikaikariko hītekata. Teoso ikinimane auīte inakasaakia, iusaakiikarako ninikapitikariko iuaīkana.

¹⁷ Eereka iua kosekari iāttxi koana ovaã iāriāti. Ininiã itxa:

—Niri, erekapitikari ia pisikakiti —itxari Teoso.

Eereka itxana imoianariakori:

—Ia iāriã hāpakapako. Hīkinika hiātariko. ¹⁸ Atão nisāpiretai. !Niātaikaroko ovaã, Teoso ikinimane auīte iminakanisaakia. Teoso ikinimane auīte inakasaakia, iusaakiikarako iuaīkana niātariko ovaã —itxa Xesosi.

¹⁹ Eereka ikosekari komiri:

—Erekapitikari ia komiri pisikakiti atemoni —itxari Teoso.

Eereka imapixinikaāpotari, sikaāpota itxana imoianariakori:

—Ia niīto okaāka hīte īkapani. Ia komiri hinikasaaki, hīxinikanoko nota. Hīxinikari nipinini hīte īkapani.

²⁰ Inikaākarina atoko, ikosekaro ovaã. Isikana imoianariakori. Ininiã itxa:

—Ia niarēka xiketakariki makatxakariko hīte maerekani. Teoso sāpiretapekari kākiti ikamaenetakiti amaneri kākiti īkapani. Ia niarēka oerekari kākiti, Teoso kamapekari ikamaenetakiti. ²¹ Iua nimīkapiritakiri uatxa uai topāka notakata. ²² Nota hītari iaxitikiri okaākako. Teoso sākire iōkatsopatakori sāpiretapekari nipinini tīkane. Nota hītari iaxitikiri mīkapiritakari iteene misiritaākako —itxa Xesosi.

²³ Xesosi moianariakori ninoakakarika isākirauatana:

—Kipa sikatari Xesosi imokaiakariakorimoni? —itxanātana.

Kiripa Apiatakari?

²⁴ Ikara atoko inaāka atoko Xesosi moianariakori misākiretakakaua.

—Kiripa apiatakari txatapaniuko ate sauaki? —itxana.

²⁵ Ininiã Xesosi:

—Xoteo minakaniau auīteakori itaparasākireritika ipaniātana Xoteo minakaniau iauītena nireēkiti ikaminina īkapani, iuaritika ninoa sākire, “Peerekaua ate. Ate moianatari kākiti,” itxana. ²⁶ Hīte kona ninoa atoko kona hīttxape. Atxiīti apiari pitxaua hīte sauaki, ininiã amarini atoko pitxauako. Auītetxi pininiāua, nitiritxi atoko pitxauako. ²⁷ Kiripa apiatakari txataua? Auītetxi nipokori nikakarikani, apiatakari txatauako? Initiri nipokori kamakarikani apiatakari txatauako? Ikinimane kākiti imarotari nipokori nikakari apiatakari itxaua. Txamari nota auakasaaki kākiti sauaki, nitiritxi atoko nitxaua, kotxi kākiti nimoianata.

²⁸ —Xoteoakori misiritakasaakino nota, kona hīte takanapano. Atão nimoianariakori hīttxaua. ²⁹ Niri, auītetxi txīkitakapekano nota. Ininiã iua atokokana nota txīkitakai hīte auītetxi hininiua. ³⁰ Nota auītetxi ninakasaaki, hinipokota, hiāta hīttxako notakata. Auako auītetxi topākini hīte īkapani. Ininiã iusaaki hīpaniātana tosi nirimanetxi Isaeo auakani ikamakitina tīkane —itxa Xesosi.

Xesosi Sāpiretari Petro Kipatiniri Iua

(Mateo 26.31-35; Marko 14.27-31; Xoão 13.36-38)

³¹ Xesosi sākirauata Simão Petromoni:

—Simão, Simão, Satanasi amanaāpekari Teoso pite, apanakini apaka atamakaerekatini īkapani. Ahoisi misiritiko atoko inirekari imisiritinīi pite. ³² Iuaritika, nota misākiretapekari Teoso isikataparatiniri pixinire Simão, nisākire atão pauikini īkapani. Pikerokariko pikamakiti, iuaritika pikanapiriāpitika nota sākire iteene iuaīkana pauikini īkapani. Eereka pisikataparaxiniretanako pitariakori nota sākire auiākani —itxa Xesosi sākire.

³³ Petro txari Xesosi:

—Niauïte, nota iposope nitxa kateiamoni nisini pitekata. Pitekata iposope nitxa nipinini —itxa.

³⁴ Xesosi txari:

—Atão nisãpiretai. Ia ïkanõkati patari sãkirauatini apisapanikako, ipi ãti pakinikata, “!Nimarotari iua,” pitxanoko —itxa Xesosi.

Xesosi Ôtãkikana Imoianariakori

³⁵ Eereka iuaïkana Xesosi sãkirauata imoianariakorikata:

—Mitxi nota iokanatai kãkitimoni. Iuasaaki kona nisikai txineiro. Kona nisikai sako mata. Kona nisikai sapato, iuaritika minakati auinii atxiïti? Erekari hĩsini ikinika hinirekakiti mauakanisaaki? —itxa Xesosi

—Minakati !auinaua ate —itxana.

³⁶ Ininiã Xesosi txana:

—Txamari uatxa pitxineirote, sakora pakini auiniãi, panika. Iouata mitaro mauakanisaakiï, pimãka inopinikiri pivẽtxitako iouata piamotini ïkapani.

³⁷ Teoso sãkire iõkatsopatakori kitxakapirĩka txari:

Imaïkaãka, kokaniri maïkiko atoko inaãkako.

Ininiã ikara nimaïkiko apokapitikako. Ikara nota pirena kitxakapirĩka atãopitika —itxa.

³⁸ Imoianariakori txari:

—Apiananiri, patamata. Uai aua ipi iouata aneenamauatini ïkapani.

Xesosi txari:

—!Apakata ikara atoko inakari hĩsãkire —itxa Xesosi.

Xesosi Misãkiretiniri Teoso Xetsẽmani Inakoriãtaã

(Mateo 26.36-46; Marko 14.32-42)

³⁹ Eereka ixirata auïte Oriva inakorimoni isa, kotxi itotapekari iuaã isini. Imoianariakori sari iuakata. ⁴⁰ Iuaã apokasaakina, Xesosi txana:

—Satanasi nirekari maerekati hĩkamini. Ininiã himisãkiretariko Teoso, iua sikataparatinii, Satanasi nirekakiti himakamakani ïkapani —itxa Xesosi.

⁴¹ Ininiã iuaã itakanapana imoianariakori. Apikoxãki axapiti sa itxa. Iuaã ikapotoreẽkaua, misãkireta itxari Teoso. ⁴² Itxari:

—Niri, !pauiritapeno païtiki natatsiirauatini, iuaritika kona pikamapiri nota nirekaãkiti. Pite nirekaãkiti ninireka nikamini —itxa Xesosi.

⁴³ Iuasaaki Teoso nitiri iaxitikiri apoka iuamoni isikataparaxiniretiniri ïkapani.

⁴⁴ Iuasaaki Xesosi xinire kamaxirepeka. ãkixinireẽ apokapeka itsii. Ininiã iteene imisãkiretari Teoso. Ininiã iinĩkakare arẽkatxikata tapika ixitimoni.

⁴⁵ Teoso imisãkiretaka atoko, õkitikaua, imoianariakorimoni isa. Iua apoka ninoamoni. Imakapoanãtana, kotxi isãpakapekana imatinaniuatinina xika.

⁴⁶ Ininiã akiritana:

—Kinirepa himakanãta? Hõkitikaua. Himisãkiretari Teoso, Satanasi nireẽkiti himakamakani tĩkane —itxa Xesosi.

Xesosi Maïkiko Pirena

(Mateo 26.47-56; Marko 14.43-52; Xoão 18.1-11)

⁴⁷ Xesosi sãkirauatakasaaki imoianariakorikata, itomaneri kãkiti Xotasikata apoka. Xotasi mĩkiiikana ninoa Xesosi oerekini ïkapani. Iua Xotasi Xesosi moianarikamara, apanakinikata. Xotasi apokasaaki apitxokari Xesosi. ⁴⁸ Ininiã Xesosi txari iua:

—Xotasi, pimĩkapiritatari pitari iaxitikiri papitxokasaaki? —itxa Xesosi.

⁴⁹ Xesosi moianariakori imarotakasaakiri kãkiti nirekiniri Xesosi imaïkini, itxana:

—Apiananiri, erekari atxiïti uatxa aneenamauatini, aiouataneẽ —itxana.

⁵⁰ Ininiã ãti Xesosi moianari sauakari sasetotxi auïte apiatakari nitiri kĩpita ikikomoni. ⁵¹ Ininiã Xesosi:

—Hiítoka ikara. Iaõpe.

Eereka Xesosi takapiotaua ikĩpitaã. Iuasaaki kakĩpitapeka itxa iuaĩkana.
⁵² Sasetotxi auĩteakori, kiomãtxiakori pakini ina Xesosi imaĩkinina ĩkapani.
 Xesosi txari ninoamoni:

—Kinirepa himinari iouata, piriri pakini himaĩkinino ĩkapani? ⁵³ Ikiniõtika hĩtekata naua aiko Teoso misãkiretikoã. Iuasaaki kona hĩte maĩkano. ĩkanõka hina, kotxi ipiaã hĩkamari maerekati —itxa Xesosi.

Petro Kipatari Xesosi Imarotini

(Mateo 26.69-75; Marko 14.54, 66-72; Xoão 18.15-18, 25-27)

⁵⁴ Ininiã ninoa maĩkari Xesosi, anika itxarina sasetotxi auĩte apiatakari aapokomoni. ĩroãna aapoko ãki. Ininiã Petro sari ninoa tikini. ⁵⁵ Sasetotxi aapoko takote apoka. Iuasaaki mapara xamina pokitakori aua. Kãkiti topãkanãta xamina takote. Irokanãtana. Ininiã Petro topãka ninoa takote.
⁵⁶ Iuasaaki ãtokoro atamatari iua xamina kamaraã. Ininiã itakote oãpoka.
 Omixinitari iua:

—Ia kiki Xesosikata auakari —otxa.

⁵⁷ Txamari Petro txari:

—Ãtokoro, kona nimarotari iua —itxa.

⁵⁸ Eereka ãti atamatari iua. Itxari iua:

—Pite Xesosi moianarikarai? —itxari.

Txamari Petro:

—Konapitini —itxa.

⁵⁹ ãti oara napa atoko ãti txari:

—Atãopitikara, ikira kiki Xesosi moianaripitikara, kotxi Kariréiakiri itxaua iua —itxa.

⁶⁰ Petro txari:

—Kona nimarotari ikara pisãpiretakiti.

Iuasaaki, isãkirauatakasaaki, patari sãkirauata. ⁶¹ Iuasaaki Xesosi sapotorika, atamata itxari Petro. Iuasaaki, Petro xinikari mitxi Xesosi sãpiretakiti: “Patari sãkirauatini apisapanikako, ipi ãti pakinikata, ‘!Nimarotari iua,’ pitxanoko” ininiri iaõka aua. ⁶² Ininiã eereka Petro sipe. Iteene txiapata itxa.

Sotatoakori Napetiniri Xesosi

(Mateo 26.67-68; Marko 14.65)

⁶³ Xesosi nĩkatakani napetari, noropata itxarina Xesosi. ⁶⁴ Iuasaaki iaxirikaokitarina iua, ninoa imatamatakani ĩkapani. Iuasaaki noropata itxarina.

—Kimarorei pite. Kiripa noropatai? —itxana.

⁶⁵ Itomaneri maerekati sãkiretxitiã itxitarina Xesosi. Inapetiniri !iotoka.

Xesosi Xoteo Auĩteakori Apisatoõ

(Mateo 26.57-68; Marko 14.53-65; Xoão 18.19-24)

⁶⁶ ĩkanõkapanika kiomãtxiakori, sasetotxi auĩteakori, kaiõkatsopareriakori pakini apotiitaua. Iuasaaki Xesosi minaãka ninoamoni.

⁶⁷ —Pisãpiretaua ate, Teoso mereẽkitikai pite? —itxarina.

Ininiã Xesosi apakapapiretana:

—Nisãpiretiniãi, !hãuikari nisãkire. ⁶⁸ Nipimarauatiniã, hĩte !apakapapiretano. Apaka !hãuiritari nisikakiko. ⁶⁹ Paĩtiki hĩtari iaxitikiri topãkako Teoso kaposotiireri kikomoni —itxa Xesosi.

⁷⁰ Ininiã iuaĩkana ninoa pimaãri:

—Teoso ãkirikai pite? —itxarina.

Ininiã Xesosi apakapapireta:

—Atãopitikara hĩsãkire. Iuapitikarano nota —itxa.

⁷¹ —Iaõpekara. Akenakotapekari isäkire. Ininiã apikomoni isäkire kenakotakani !anirekaika, kotxi ateka kenakotapekari iua säkire maerekati — itxana.

23

Xesosi Pirato Apisatoõ

(Mateo 27.1-2, 11-14; Marko 15.1-5; Xoão 18.28-38)

¹ Ininiã imakinika ninoa anikari Xesosi Piratomoni. ² Ininiã iuaã ikamarina aãpirena. Apoïtarina Xesosi:

—Ate kenakopiretari oerekiniri kãkiti maerekati ikamini, kotxi iua õtãkikari kãkiti, kãkiti miïkitxitakaniri Sesa, Homano auïte apiari. Apaka itxa: “Teoso mereëkitino nota. Auïtetxi apiatakari nitxaua,” itxa iua säkire.

Txamari na atãoni ikara atoko itxana ninoa. Ikara atoko ninoa apoïtari Xesosi. Kona atão ninoa sãpiretakiti. ³ Ininiã Pirato pimaãri Xesosi:

—Pitekani Xoteoakori auïte txataua? —itxari Xesosi.

—Iuapitikarano nota —itxa Xesosi.

⁴ Ininiã Pirato txana sasetotxi auïteakori, kãkiti pakini:

—!Napokari maerekati ikamakiti —itxa.

⁵ Iuaïkana apoïtarina:

—Iua oerekana kãkiti maerekati ikamini auïtetxiakorimoni. Kariréia tõpamonira ipotorika. Uatxa uaipekarari iua —itxana.

Xesosi Erotxi Apisatoõ

⁶ Pirato kenakotakasaakiri isäkirena, ipimaãna:

—Ia kiki Kariréiakirikani?

⁷ —Ari iuapitikara —itxana.

Ikara Pirato imarotakasaaki, iokanatarari Xesosi Erotximoni, kotxi Kariréia tõpa auakani auïte itxaua Erotxi. Iuasaaki iua ianapokota Xerosareë. Ininiã Pirato iokanatarari Xesosi Erotximoni, kotxi Xesosi Kariréiakiri.

⁸ Erotxi kenakopiretapekari Xesosi pirena. Ininiã iua aõkitakasaakiri Xesosi, poxokope itxakata, kotxi inirekari Xesosi oerekiniri iposotiire. ⁹ Ininiã iteene ipimaãri Xesosi, ikamakiti imarotini ïkapani. Txamari Xesosi !apaka-papiretari iua. ¹⁰ Iuasaaki sasetotxi auïteakori, kaiõkatsoparerini pakini iteene apoïtari Xesosi. Ikinika ninoa säkire aãpirenanoka. ¹¹ Eereka Erotxi, isotatoneakori pakini napetari Xesosi. Ieretakarina auïtetxi mãka maparakiri apiata inapetinirina ïkapani.

—Hãtamatarari ere. Auïtetxi itxaua —itxana.

Eereka iuaïkana iokanatarina Piratomoni. ¹² Mitxi Erotxi, Piratokata omanatakakaua. Ikara õti ninoa apokaerekatakakaua.

Xesosi Okiko Nirekiko

(Mateo 27.15-26, 11-14; Marko 15.6-15; Xoão 18.39–19.16)

¹³ Ininiã eereka Pirato apotiitari sasetotxi auïteakori, Xoteo auïteakori, apanakini kãkiti pakini. ¹⁴ Ininiã itxa:

—Hïte minari ia kiki notamoni. Hïte apoïtari iua imisirienetiniri kãkiti. Hïte apisatoõ nipimaãpekari ikamakiti pirena. Notamoni kona maerekati !ikama. ¹⁵ Erotxipekana !apokari maerekati ikamakiti, ininiã iokanatarari iua notamoni iuaïkana. Inipitikara iua erekari, txamari hïte nirekari okiko maxikatïïka. ¹⁶ Ininiã nota paniãtari inoropatiko aãpitsa aamata kamakoriã. Eereka niokanatarari isini.

¹⁷ Iuasaaki Pãskoã kiiniritisaaki, auïtetxiakori itotari isikakiniri ãtika kateia ãki auakari.

¹⁸ Ikara Pirato säkire ikenakotakasaakina, ninoa akirikata:

—Hõkariko ere kiki. Hïsikakariko Pahapasi —itxana.

¹⁹ Pahapasi kateia āki aua, kotxi iua apanakinikata naiatari auñtetxiakori. Kokaniri apaka itxaua.

²⁰ Pirato nirekari Xesosi isikakini, ininiã iuaĩkana isãkirauata kãkitimoni.
²¹ Txamari ninoa akiripoakata:

—Aamina ĩpiriãmitakari nopini hñtokakitariko. Hõkariko aamina ĩpiriãmitakari nopini —itxakatana.

²² Pirato mitxi isãkirauata ipikata. Iuaĩkana isãkirauata:
—Kixikapa? Maerekati !ikama. Ixika !auari ipinini ĩkapani. Nipaniãtariko inoropatiko, eereka nisikakariko —itxari.

²³ Txamari iuaĩkana akiripoakatana:
—Hõkariko aamina ĩpiriãmitakari nopini.
Ninoa akiripoakatini xika Pirato kamari ninoa nirekakiti. ²⁴ Ininiã Pirato:
—Xesosi ipinako hinirekakiti iaõka —itxa Pirato.

²⁵ Iuasaaki isikakari Pahapasi kateia āki auakari. Neenamatchi kamakari, kokaniri apaka itxaua Pahapasi. Eereka isikari Xesosi sotatoakorimoni aamina ĩpiriãmitakari nopini okiko ĩkapani.

*Xesosi Tokakitaãka Aamina ĩpiriãmitakari Nopini
(Mateo 27.32-44, 11-14; Marko 15.21-32; Xoão 19.17-27)*

²⁶ Ininiã sotatoakori anikari Xesosi okiko ĩkapanimoni. Iuasaaki kima-poriãpo aõkitarina Simão, Sireni sitatxitikiri. Iuasaaki iua apoka sitatximoni. Sotatoakori maĩkari iua. Aamina ĩpiriãmitakari itakana Simão tsotere nopini:
—Panika ia aamina ĩpiriãmitakari —itxarina.

Xesosi tikini sa itxa Simão. ²⁷ Xesosi tikini isa mirikiniti kãkiti. ãtokaka sitoakoro sari apaka. Imatinaniuatana, itxiapatana, kotxi imarotarina Xesosi paĩtiki ipinini. ²⁸ Xesosi kirioka ninoa sitoakoromoni. Itxana:

—Sitoãkini Xerosareẽ auakani anaakoro. Kona notani !himariaka. Hñtekara himariakaua. Hamariteni ĩkapani hñtxiapata, ²⁹ kotxi ãti õti apokasaaki, kãkiti sãkire: “Apiaerekata sito meeneto oniniua,” kotxi iuasaaki misirikaretxi apokasaaki, pamonõkoniri. ³⁰ Iuasaakiikarako kãkiti akiripoakatako ixirata auñtemoni: “Ate nopini pirika. Pipataua,” itxanako, kotxi iuasaaki ninoa mokaiakariakori apokaãpota ninoa xipokini ĩkapani. ³¹ Nota aamina amaneri atoko nitxa. Hñte aamina ĩsasaka atoko hñtxa. Nota !ikamari maerekati, iuaritika ia atoko nota ipina. Erepaniko aamina ĩsasaka atoko hñtxa, ininiã ãti õtirako apiata himisiritiko —itxa Xesosi sãkire.

³² Ninoa anikari ipi maerekati kamakani Xesosikata ipininina ĩkapani.
³³ Apokasaakina “Kñtãtatxi” inakoriãtaã, itokakitarina Xesosi aamina ĩpiriãmitakari nopini. Iua atokokanera itxana maerekati kamakani. ãti maerekati kamakari itakana Xesosi kikomoni, ãti isanaremoni.

³⁴ Iuasaaki Xesosi txari:
—Niri !pimisiritapena ninoa, maerekati ikamakitina xika, kotxi !imarotarina ikamakitina —itxa Xesosi.

Iuasaaki sotatoakori kamari sarauatxi. Eereka imakatzakarina Xesosi mãka. Sarauatxi kãiatakari apakapari imãka. ³⁵ Kãkiti iuaã auakani itikari Xesosi. Sasetotxi auñteakori napetari iua. Itxana:

—Iua makatzakapekari apanakini imapinakanina ĩkapani. Teoso mereẽkiti ininiãua, kinirepa iuaka !imakatzakaua? —itxana.

³⁶ Iuasaaki sotatoakori apaka napetari iua. Katxioãri isikarina Xesosi iãtini ĩkapani, txamari !iãtari. ³⁷ Itxana:

—Pite Xoteo auñte pininiãua, ininiã aamina ĩpiriãmitakariã pimakatzakaua. Piteka pimakatzakauako —itxarina.

³⁸ Iuasaaki iõkatakori takaãka ikii tanomoni:

—Xoteoakori Auíte —itxa iua iōkatakori. Homano sākireẽ aua. Kreko sākireẽ aua. Xoteo sākireẽ pakini aua iuaã iōkatakori.

³⁹ Maerekati kamakari Xesosi takote tokakitakori akiritari iua. Itxitari. Inapetari:

—Pite Teoso mereẽkiti pininiãua, ãteroa piposotiire? Piteka pimakatxakaua. Ate apaka pimakatxaka —itxa.

⁴⁰ Æti maerekati kamakari iuaã tokakitakori òtãkikari iua:

—Kona pite pĩkatari Teoso? Ate apaka apinako. ⁴¹ Atãopitikara ate misiritiko, kotxi maerekati akamapeka. Ere kiki !ikamari maerekati —itxa.

⁴² Eereka itxari Xesosi:

—Xesosi, auĩtetxi pininiãtaãua papokasaaki, pixinikano nota, kotxi ninirekari nisini pitekata iuaxiti —itxari.

⁴³ Xesosi apakapapiretari:

—Atãopitikara nitxai, uatxa ia òti, pite sariko notakata iaxiti Erekariãtaã.

Xesosi Ipinini Pirena

(Mateo 27.45-56; Marko 15.33-41; Xoão 19.28-30)

⁴⁴ Ininiã apaniãxiti takote atokatxi piãkapeka. Ipi ãti pakini oara ipiãka. ⁴⁵ Atokatxi !iponikaika. Iuasaaki mãkatxi mata mitari Teoso misãkiretiko aikotiã arōkakari matsorakitaãka. Ipi matapeka itxa. ⁴⁶ Iuasaaki Xesosi akirikata:

—Niri, nisikai nixinire pinĩkatini ãkapani.

Ikara atoko inaãka atoko, ipina. ⁴⁷ Sotato auíte itikasaakiri, ikenakotakasaakiri, itxa:

—Atãopitikara ikira kiki atão inakarínoka kamakari iua. Maerekati !ikama —itxa sotato auíte.

⁴⁸ Kãkiti iuaã apotiitakaniua ikara atamatakasaakina, itorotana iaritana ipĩkarauatini xika. Ininiã isipekana. ⁴⁹ Ikinika Xesosi aōkimanere, sitoakoro Kariréiakini, iua tikini sikani pakini aua iuaã. Ikira atoko itikanãtarina Xesosi okiko.

Xesosi Katiko Pirena

(Mateo 27.57-61; Marko 15.42-47; Xoão 19.38-42)

⁵⁰ Iuasaaki iuaã aua Xosee inakori. Xoteo auĩteakori òtãkikakari iua. Erekari iua. Erekarinoka ikama. ⁵¹ Arimateia sitatxitikiri iua. Arimateia sitatxiti, Xotéia tōpa aua. Iãtapapikari Teoso ikinimane auíte ininiua. Mitxipe apanakini Xoteo auĩteakori òtãkikakani nirekasaakiri Xesosi okinina, iuasaaki iua Xosee txari:

—Konapitini. !Apakata ikara atoko akamini —itxa.

⁵² Xesosi ipinaka atoko, Xosee sari Piratomoni. Amanaãri Xesosi ãto akauarimoni itakini ãkapani. Ininiã Pirato sikari Xesosi ãto iuamoni. ⁵³ Ininiã iua makatxakari Xesosi ãto itokakitikoãtaã. Iapirikari mãkatxi mataã, kai iriko ãki taka itxari. Mitxi ipĩkari !auapanika iua iriko ãki. ⁵⁴ Ikara òti sesta veira. Ikinika sesta veira, Xoteoakori tomatini òti apisa, Xoteoakori aiamata tomatiko òti ãkapani.

⁵⁵ Sitoakoro Kariréiakini Xesosikata ãkani sari Xosee tikini kai irikomoni. Ninoa nirekari imarotiniri Xesosi ãto takikoãtaã. ⁵⁶ Eereka ninoa kanapiriã aapokomonina. Kamariãro, aãtsopa ãtião pakini apotiitana Xesosi ãtoã itakinina ãkapani. Ininiã tomatiko òti tomata itxana, kotxi Teoso paniãtakiti iaōka ikamana.

24

Xesosi Iuaĩkana Auãki Inini

(Mateo 28.1-10; Marko 16.1-10; Xoão 20.1-10)

¹ Tomĩkosaaki ĩkanõkapanika, sitoakoro sari kai irikomoni, kamariãro Xesosi ĩtoã itakinina ĩkapani. ² Ninoa apokasaaki iuaã, atamatarina. !Katoreikari kai iriko. Kai tore makatxakapeẽkaika. ³ Ininiã ninoa ĩroã, txama kona apokarina Xesosi ĩto. ⁴ Ininiã sitoakoro:

—Ītapari Xesosi ĩto? Kanatokopa itxa? —itxanãtana.

Iuasaakipeka ipi kiki tokiã. Itimana sitoakoro apisatoõ. Pomẽkori mãkarini ninoa. Mẽkokari iotximere atoko itxa ninoa mãka. ⁵ Sitoakoro pĩkarauata, ininiã iãkana. Ixitipeka auakiitana. Ininiã ninoa kiki txana:

—Kinirepa hinitanãtari auãki inakari ipĩkani sauaki? ⁶ !Uaiikari iua. Õkitikapekava. Hĩxinikari isãkire Kariréia hĩtekata auakasaaki. ⁷ Ia atoko itxa isãkire: “Hĩtari iaxitikiri sikaãkako maerekanimoni. Eereka nipinako aamina ĩpiriãmitakari nopini. Eereka ipi ãti õtisaaki iuaĩkana nõkitikauako,” itxa Xesosi. Hĩxinikariko isãkire —itxana.

⁸ Ininiã ninoa sitoakoro:

—Ari ikara atokopitikara itxapeka isãkire —itxana.

⁹ Eereka ninoa sipeka. Õsi Xesosi moianariakorimoni isana. Apanakini kãkiti iuaã aua apaka. Iuaã ninoa sãpiretana ikinipoko itikakitina. ¹⁰ Maria Matarenama, Xoanama, Maria Txiako inoroma, apanakini pakini sãpiretari Xesosi moianariakori itikakitina. ¹¹ Txamari Xesosi moianariakori kona auikari ninoa sãkire.

—Paxirari hĩsãkire —itxana.

¹² Petronoka auikari ninoa sãkire, ininiã imiteẽkata kai irikomoni. Iãka, iriko ãki atamatini ĩkapani. Mãkatxi matanoka, Xesosi ĩtoã Xosee iapirikak-itinoka atamata. Eereka aapokomoni ikanapiriã. Isikasaaki, itsorĩkaãnãta, Atamatakiti ixinikanãta.

Emaoso Kimaporiti Sikani

(Marko 16.12-13)

¹³ Ikara õti ipi Xesosi sãkire auĩkani iãpota Emaoso inakori aapokotxiti-moni. Xerosareẽ pipotorikasaaki, ipi oara napa atoko papoka Emaoso.

¹⁴ Ninoa ipi sãkirauanãta isaãpotakasaakina. Isãkiretarina, ixinikarina Xesosi ipinini pirena. ¹⁵ Isãkirauanãtakasaakina, iuasaaki Xesosi ina ninoa tikini, ininiã iua sa ninoakata. ¹⁶ Txamari ninoa kona imarotari iua Xesosi ininiua.

¹⁷ Ininiã Xesosi:

—Kipa hĩte sãkirenãta? —itxa Xesosi.

Ininiã ninoa iotoka. Iuasaaki ninoa toõ oerekari imatinaniuatinina.

¹⁸ Kiropasi inakori apakapapiretari:

—Ikinimane Xerosareẽ auakani imarotari Xesosi okiko pirena. Atxiĩti pite ãtiãtaã ĩkarikai? —itxari.

¹⁹ Ininiã Xesosi txari:

—Natokopa itxa iua? —itxa.

Ininiã ninoa:

—Xesosi Nasaree sitatxitikiri iua. Teoso sãkire sãpiretakari itxaua. Teoso, kãkiti apaka apokaerekatari isãkire, ikamakiti pakini, kotxi paposotiireri isãkire, ikamakiti pakini. ²⁰ Sasetotxi auĩteakori, aãũteakori apaka sikari iua okiko ĩkapani, aamina ĩpiriãmitakari nopini ipinini ĩkapani. ²¹ Ate uãkatari iua kãkiti Isaeo auakani maerekani makatxaãkari ininiua. Kita mitxi iua ipina. ²² Mixikanani sitoakoro iua sãkire auĩkani sãkirauata atekata. Ininiã atsorĩkaãta. Isãpiretauana ĩkanõkapanika akauarimoni isinina. ²³ Txamari ninoa kona apokaikari Xesosi ĩto. Ninoa sãkire, aõkitana Teoso nitiriakori iaxitikini iuaã. Ninoa sãpiretana sitoakoro Xesosi iuaĩkana õkitikapekava. ²⁴ Eereka ãtikaka imoianariakori sari iuaã atamatinirina ĩkapani. Sitoãkini sãkire atãopitikara. Txamari !aõkitari Xesosi iuasaaki —itxa Kiropasi.

²⁵ Ininiã Xesosi txana ninoa:

—Míikiteni hĩtxaua. ! Hinirekari hãuikiniri Teoso sãkire sãpiretakani sãpiretakiti imakinika Teoso sãkire, ²⁶ kotxi ninoa txari: “Teoso nirekari imereẽkiti atatsiirauatini, Teoso tixine ikanapiriini apisapanika,” itxa Teoso sãkire —itxa Xesosi.

²⁷ Iãpotakasaakina, Xesosi sãpiretana ninoa Teoso sãkire iuaka pirena. Merepanika iuaka oerekaua Moisesi iõkatsopatakitiã, eereka Teoso sãkire sãpiretakani iõkatsopatakitiã. Iuaka oerekaua imakinika Teoso sãkire iõkatsopatakoriã auakariã.

²⁸ Iuasaaki ninoa apokaãpota Emaoso takote. Ninoamoni Xesosi nirekari apikomoni isini. ²⁹ Ininiã itxana:

—Kona pisipe apikomoni. Mapiãnikata, ininiã atekata pikaikota —itxarina.

Ininiã Xesosi ãroã aapokotxiã ninoakata ikaikotini ãkapani. ³⁰ Iitopãka ninoakata inipokotini ãkapani. Iuasaaki Xesosi kosekari komiri.

—Teoso, erekapitikari pisikakiti atemoni —itxa.

Iuasaaki imapixinikari komiri, sika itxana ninoamoni. ³¹ Iuasaakipeka ninoa imarotari Xesosi ininiua. Iuasaakipeka, ereẽkoka itxa. ³² Ininiã ninoa misãkiretakakaua:

—Atãopitikara, kimaporiã isãkirauaãpotakasaaki, Teoso sãkire oereka-
rauaãpotakasaaki, axinire poxokoniua iuasaaki —itxana.

³³ Iuasaakipeka ninoa aiamata. Ikanapiriãna Xerosareẽmoni. Iuaã apokana õsi Xesosi moianariakori, apanakinikata. ³⁴ Isãpiretana:

—Xesosi auãki inini pirena atãopitikara. Apiananiri õkitikapekaua. Petromoni oerekapekaua —itxana ninoa.

³⁵ Ininiã eereka Kiropasi imoianarikata sãpiretana kimapori isinina pirena. Isãpiretana komiri Xesosi mapixinikini pirena, kotxi iuasaakiika ninoa imarotari iua Xesosi ininiua.

Xesosi Oerekaua Imoianariakorimoni

(Mateo 28.6-20; Marko 16.14-18; Xoão 20.19-23; Átosi 1.6-8)

³⁶ Isãkirauatapanikana inakasaakina, Xesosi tokiã ninoa sauaki.

—Erekaxinire hĩtxako —itxa.

³⁷ Itikoãkatana. Ipĩkarauatana. Kamiri iuãkatarina.

³⁸ —Kinirepa hĩtikoka? Kinirepa kamaxirepeka hĩtxa iĩkiteta?

³⁹ Hãtamatariko niuako, nikiti pakini. Iuapitikarano nota. Himaãtakano. Kamiri !kaxiniri. Kamiri kona kapiri. Hãtamatano. Nĩitokara. Kamiri !nitxaua —itxa Xesosi.

⁴⁰ Ininiã oerekari iuako, ikiti pakini ninoamoni. ⁴¹ Ninoa iteene poxokoni-
uata, txamari !iteene !auikapanikarina atão Xesosi ininiua. Ininiã iuasaaki Xesosi pimaãna:

—Nipokori aua hĩtemoni? —itxa.

⁴² Ininiã ninoa sikari ipixini ximaki kimitakori. Mapaã apaka isikarina.

⁴³ Ininiã iua nikari ninoa apisatoõ. Iuasaaki ninoa imarotari atão Xesosi ininiua, kotxi kamiri !inikari nipokori. ⁴⁴ Eereka iua misãkiretana ninoa:

—Mitxi hĩtekata nauakasaaki, nisãpiretai ikinipoko nota pirena Teoso sãkire iõkatsopatakoriã. Noerekapekai hĩte Moisesini iõkatsopatakiti, Teoso sãkire sãpiretakani iõkatsopatakiti. Xikari iõkatsopatakori apaka noerekapekai. Imakinika ninoa sãpiretakiti nota pirena apokapeka.

⁴⁵ Iuasaaki isikaimaroretana ninoa Teoso sãkire iõkatsopatakori imarotinina ãkapani, ininiã iuasaaki ninoa imarotari atão. ⁴⁶ Itxari:

—Kitxakapirĩka iõkatsopatapeẽkaika:

Teoso mereẽkiti atatsiirauatako. Okaãkako. Ipi ãti õtisaaki õkitikauako.

⁴⁷ Kãkiti nisãkire auiãkani iaripiretariko niokanapirena erekari ikini itix-iti. Merepanika Xerosareẽ auakanimoni isãpiretaãkako, eereka ikini itix-iti auakanimoni isãpiretaãkako. Ninoa oerekariko kãkiti takanapiniri imaerekanina, ininiã iusaakipeka Teoso makatxakariko maerekati ikamakitina. ⁴⁸ Hĩkinika hĩte itikapekari nipinini. Hãtamatanano nota iuaĩkana auãki ninini. Ininiã iteene himarotari nota pirena apanakini hĩsãpiretini ĩkapani. ⁴⁹ Nota iokanatariko niri sikaenetakiti, Erekari Matamatakoti, hĩtemoni. Uai sitatxi hĩkaikotako. Hiãtapariko iua apokini. Ininiã hãpakapariko Teoso posoti-ire itano ĩkari —itxa Xesosi.

Xesosi Anikaãka Teoso Tixinemoni

(Marko 16.19-20; Átosi 1.9-11)

⁵⁰ Xesosi anikari imoianariakori Petánia sitatxitimoni. Iuaã apokasaakina, Xesosi õkitikauakotaua. Itxari Teoso:

—Niri, naia pinĩkata. Pitakari erekari niamoni —itxa.

⁵¹ Isãkirauatakasaaki, anikaãka Teoso tixinemoni. ⁵² Iusaaki ninoa:

—Peerekari Xesosi. Iuanoka Apiananiri —itxanãtana.

Eereka Xerosareẽ ikanapiriãna ipoxokoniritikana. ⁵³ Ikiniõtika isana Teoso misãkiretiko aikotimoni. Iuaã ninoa misãkiretari Teoso:

—Peerekai. Erekapitikari pikamakiti ate ĩkapani —itxanãtana ikiniõtika.

Ameẽ.

XOÃO

Xesosi, “Teoso Sãkire” Inakori

¹ Itixi kamiko apisa iua “Teoso Sãkire” inakori auapeka. Iua Teosokata aua. Iua Teoso txaua. ² Ikinipoko potorikikosaaki Teosokata auari iua “Teoso Sãkire” inakori.

³ Teoso paniãtari iua ikinipoko ikamini. !Auari iua makamakiniti. ⁴ Xesosi, “Teoso Sãkire” inakori, kamari itanapokoka auãki inini. Iuanoka sikari ikinipoko auãki inini, kotxi iuanoka auapika. Iua tirikapi atoko itxa, kotxi iopinikari kãkiti xiniremoni Teoso sãkire imarotini ïkapani, ãtipirika auini ïkapani. ⁵ Iopinikari ipiã. Ipiã kona xipokari iua tirikapi kamara.

⁶ Teoso iokanatarari isãkire sãpiretakari tïkane kiki Xoão inakori. Iokanatarari iua kãkitimoni, kãkiti xinire iopiniãkari isãpiretini ïkapani. ⁷ Isãpirenauata, Teoso sãkire ikinimane imarotini ïkapani, aukapiretinirina ïkapani. ⁸ Kona Xoãoni kãkiti xinire iopiniãkari txaua. Xoão iokanataãka kãkiti xinire iopiniãkari isãpiretini ïkapani. ⁹ Iua atão iopinikari kãkiti xinire. Apoka ïkoraxiti, ikinipoko kãkiti xinire iopinikini ïkapani.

¹⁰ Iua “Teoso Sãkire” inakori aua ïkoraxiti. Iua kamari itixi, iuaritika ïkoraxiti auakani kona aukapiretari iua sãkire. ¹¹ Iua apoka itixi ikamakitimoni, txamari kãkiti ikamakini kona nirekari iua. ¹² Iuaritika apanakini nirekari iua, ininiã aukarina isãkire. Ininiã iua sikaposotiiretana ninoa Teoso anaakori ininiuana ïkapani. ¹³ Aponaniãkasaaki, Teoso anaakori !atxaua. Ateka Teoso anaakori akaminiua !aposota. Kona kãkitini txïkitakaua Teoso anaakori aniniãua. Teosora kamari iua anaakori aniniua.

¹⁴ Kãkiti itxapekaua iua “Teoso Sãkire” inakori. Atekata aua. Ate itikari iua. Peerekari iua. Peerekari iposotiire. Ikinipoko erekari aua iuamoni. Isãkire atãonoka itxa. Ikara atoko itxa, kotxi iri Teoso. Teoso ãkiri imatonõkari itxaua Xesosi.

¹⁵ Xoão sãpiretari Xesosi kãkitimoni. Ia atoko isãpirenauata:

—Iua, hïtemoni nisãpiretakiti: “Nota tikinimoni apokakari, apiatako iua. Nota poiãoka, kotxi nota auini apisapanika auapeka iua.”

¹⁶ Ikinipoko erekari aua iuamoni, ininiã amakinika ate apakapari ikinipoko erekari iuamonikiri. Isikaãpotari erekari atemoni. ¹⁷ Aimarotari Teoso paniãtakiti sãkiretxiti, kotxi Moisesini oerekepekaua. Apiaerekata Xesosi Kristo oereëkiti, kotxi iua oerekaua Teoso iteene tiretiniua. Ikinipoko erekari isika atemoni. Maerekati kamakani atxaua, iuaritika Teoso tiretaua. Oerekaua atão inakari aimarotini ïkapani. ¹⁸ Teoso atamatakari !auari. Imatonõkari Teoso ãkiri, irikata auakari, iuara oerekaua Teoso aimarotini ïkapani, kotxi Teosotxikana iua.

Xoão Kapatxisareri Sãpiretakiti

(Mateo 3.1-12; Marko 1.1-8; Arókasi 3.1-18)

¹⁹ Xoteo auïteakori Xerosareë sitatxiti auakani iokanatanã kãkiti Xoãomoni. Iokanatanã sasetotxiakori. Iokanatanã sasetotxiakori moianatanã apaka Xoãomoni, ipimainirina ïkapani: “Kinakariparai pite?” ²⁰ Kona Xoão kipatarari isãpiretinina. Atão isãpiretana:

—Teoso mereëkiti kãkiti iãtapakiti, kona nitxaua nota —itxa.

²¹ Ininiã ipimaãrina:

—Ikara atoko ininiã kiriparai? Eríasikani? —itxana.

—Kona iuano —itxa.

—Teoso sãkire sãpiretakari aiãtapakitikani atxiïti? —itxana.

—Kona iuano —itxa.

²² —Ikara atoko ininiã, natokopa inakariparai pite? Ninoa ate iokanatakani nirekari imarotiniina pite. Natokopa inakaripa pite? —itxana.

²³ Ininiã Xoão:

—Teoso sãkire sãpiretakari Isaía inakori iõkatsopatakiti txari:

Auako kiki ãparaã makipakaniãtaã. Isãpirenauatako. Itxariko: “Hõeretariko kimapori Apiananiri apokini apisapanika. Itikaãpo erekari hĩkamako iua napini ĩkapani,”

itxa Isaía. Iua kiki ãparaã makipakaniãtaã kasãpirenari, iuakarano nota. Iua Isaía sãpiretakitakarano nota —itxa Xoão.

²⁴ Pariseoakorira iokanataka ninoa kiki Xoãomoni. ²⁵ Ipimaãrina Xoão:

—Iua Teoso mereẽkiti aiãtapakiti piminakanisaakia, Eríasi inakori piminakanisaakia, Teoso sãkire sãpiretakari aiãtapakiti piminakanisaakia, kinirepa pite patxisatari kãkiti? Kipaniãpa pite patxisarauata? —itxarina.

²⁶ —Ãparaãnanira nota patxisarauata. Hĩte sauaki aua kiki himimaro-takiniti. ²⁷ Iuara, nota tikini apokakari, apiatakari iua. Minakati nitxaua nota, ininiã kona apakata napokini iua takote. Kona apakata ikiti mata tsapitsa nikoxirikini, kotxi minakati nitxaua —itxa Xoão.

²⁸ Ikara atoko Xoão sãpiretana ninoa Xotão ipiniã Petânia sitatxiti, ipatxisarauatiniãtaã.

Soti Auĩte ãkiri, Teoso Nakiti

²⁹ Katimatinĩkata Xoão atapari Xesosi, iuamoni inini. Xoão sãpiretana apanakini itakote auakani:

—Hãtapari. Erenapani soti auĩte ãkiri Teoso nakiti, kotxi ikinimane maerekani makatxaãkari itxaua. ³⁰ Mitxi nisãpiretakitikara ere. “Kiki apokako nota tikini. Apiananiri iua, kotxi nota mauakanisaakipanika iua aua.”

³¹ Mitxi nota apaka kona nimarotari maerekanitxi makatxaãkari uãka. Nota patxisatari kãkiti ãparaã, kotxi iuasaaki nisãpiretari iua pirena Isaeo tixini auakanimoni —Xoão txana ninoa.

³² Xoão sãpiretana apanakini itikakiti:

—Nota itikari iua Erekari Matamatakoti Teoso tixinekiri katxakini. Kamoã katxakini atoko itxa iua. Isari Xesosimoni, kaikota itxa iuakata. ³³ Ikara apisa kona nota imarotari iuãka. ãparaã nipatxisarauatini paniãtakari sãpiretano: “Pitikariko Erekari Matamatakoti katxakini. Kikimoni apokini pitikariko. Iua kiki patxisarauatini ãtiã, kotxi isikari Erekari Matamatakoti patxisatakonomoni,” itxano. ³⁴ Notakara itikari ikara. Nota sãpiretari nitikakiti, ininiã nimarotapitikari ia kiki Teoso ãkiri ininiua —itxa Xoão.

Merepitpanika Xesosi Moianariakori

³⁵ Katimatinĩkata iuaĩkana Xoão auanãta iuaã ipi imoianariakorikata.

³⁶ Iuasaaki itikari Xesosi inapaãpotini, ininiã akiritari imoianariakori:

—Hãtapari. Ere kiki, soti auĩte ãkiri Teoso nakiti itxaua —itxa.

³⁷ Ikara ikenakotakana atoko ninoa ipi imoianariakori sari Xesosi tikini.

³⁸ Ininiã Xesosi sapotorika, atapana iua tikini ĩkani.

—Kipa hinireka atxiĩti? —itxana ninoa.

—Koerekareri, namonipa paua pite? —itxarina.

³⁹ —Masa, hãtamata —itxa.

Ininiã isana iuakata, atamata itxarina iua auiniãtaã. Iuasaaki kikatapeka. Eereka ĩkanõkapeka ikanapiriãna.

⁴⁰ Ninoa Xoão moianariakori, Xesosikata sikani, ãtree, ãtree moianari pakini. Simão Petro itari itxaua iua ãtree. ⁴¹ Eereka ãtree sari katimariã itari Simãomoni.

—Ate aõkitari Teoso mereẽkiti aiãtapakiti —itxa.

⁴² Ininiã ãtree anikari itari Simão Xesosimoni. Xesosi atamatari Simão.
—Pite Simão, Xoão inakori ãkiri. Uatxa pite Petro pinaãkako —itxa.
Kai sorotxikana iuãka Petro.

Piripi, Natanaeo Pakini Xesosi Akiritini

⁴³ Katimatinãkata Xesosi nirekari Kariréia tõpamoni isini. Iuaã aõkitari Piripi inakori.

—Notakata masa. Nimoianari pitxapekauako —itxari.

⁴⁴ Iua Piripi aapoko Petsáita sitatxiti. Iuaã apaka aua ãtree, Petro pakini aapoko. ⁴⁵ Iuasaaki Piripi nitari Natanaeo inakori. Apokasaakiri isãpiretari:
—Ate aõkitari kiki. Moisesini iõkatsopatakiti sãpiretakiti iua. Teoso sãkire sãpiretakani iõkatsopatakiti sãpiretakiti aaõkita. Iuakara Xesosi txaua. Nasaree sitatxitikiri iua. Xosee ãkiri iua Xesosi —itxari.

⁴⁶ —Nasaree sitatxitiã !auari erekari —itxa Natanaeo.

—Auapitika. Masa, maãpiãkatari iua —itxa Piripi.

⁴⁷ Xesosi atapari Natanaeo iuamoni inaãpotini.

—Ere kiki atão Xoteopitikara. Atãonoka ikama —itxa Xesosi.

⁴⁸ Ininiã iuasaaki Natanaeo kenakotari Xesosi sãkire. Ipimaãri Xesosi:

—Kiãtokopa ininiãpa pimarotano nota? —itxari.

Xesosi txari iua:

—Piripi akiritinii apisapanikara, nimarotari piko kati patapi piitopãkanãta.

⁴⁹ Ininiã Natanaeo apakapapiretari:

—Koerekareri, Teoso ãkiri pitxaua pite. Kãkiti Isaeo tixini auakani auãte pitxaua —itxari Xesosi.

⁵⁰ Ininiã Xesosi:

—Pite auikari nisãkire, kotxi nimitikakinitika nimarotari piko kati patapi piitopãkanãtini. Pite imarotapanikariko apia posotiiretxi. ⁵¹ Pite itikariko Teoso tixine osereẽkiko. Pitikariko Teoso nitiriakori kanãkini. Pitikariko ninoa katxakini, pitari iaxitikiri nopini apokinina. Atãopitikara ikara atoko nitxai pite —itxari Natanaeo.

2

Xesosi Inoãkari ãparaã, Iãriãpeka Itxãkitakini

¹ Ipi õti napaka atoko aua kiiniri tanirauatiko pirena kiiniriti Kanaa sitatxiti Kariréia tõpa. Xesosi inoro aua kiiniriãtaã iuasaaki. ² Kakiiniriteri kemaãtxitari Xesosi, imoianariakori pakini. ³ Iãriã xipoka atoko Xesosi inoro:
—!Auaika iãriã —otxari Xesosi.

⁴ Ininiã Xesosi:

—Kinirepa ikara atoko pitxano? Niposotiire manapi !apokapanika —itxaro inoro.

⁵ Ininiã Xesosi inoro txana kaapokori nitiriakori:

—Ipaniãtakiti iaõka hãkamako —otxa.

⁶ Iuaã kopiti aua, seisi pakini, mitari kopititi, kai kamakori. Naia kopiti ãki aua ãparaã Xoteoakori arokiniua ãkapani. Iuaãtaã ninoa arokaua. Kiomãtxiakorini oerekinina atoko ninoa arokaua Teoso imisãkiretinina apisa, ninoa Teoso apakapini ãkapani. ãtika iua kopiti maãkari ãparaã seã arãtro.

⁷ Xesosi paniãtana kaapokori nitiriakori:

—Hããpokakari naia kopiti ãki ãparaã —itxana ninoa.

Ininiã ninoa xãpokakari kopiti ãki ãparaã. Isonakatapeka apoka ãparaã.

⁸ Ininiã Xesosi:

—Hãsorokaãtari ãparaã, sika hãtxari kakiiniriterimoni iãtini ãkapani.

Ininiã ninoa anikari ãparaã kakiiniriterimoni. ⁹ Iua kakiiniriteri iãtari. Iuasaaki iãriãpeka itxapekaua ãparaã.

—Amonipa ina ia iãriã? —itxa.

!Imarotari. Ninoa nitiritxi ãparaã anikakani imarotari iua iãriã. Ininiã kakiiniriteri txari ãtanorouatakari:

¹⁰ —Kinirepa mixikanani ia iãriã apia erekari na pisikaua? Apanakini sikari iãriã apia erekari kiiniri potorikasaaki. Kãkiti kamitope inakasaakiika apanakini sikari iãriã poião erekari. Txamari uatxaika pite sikari apia erekari —itxari.

¹¹ Iuasaaki Xesosi mipotorikari iposotiire Kanaa sitatxiti Kariréia tãpa iua auakasaaki. Iposotiire oerekari Apiananiri ininiua. Ikara atoko ininiã, Xesosi moianariakori auikari Xesosi Teoso mereëkiti kãkiti iãtapakiti ininiua, kotxi ninoa itikari iposotiire.

¹² Ikara atoko inaãka atoko Xesosi, inoro, itariakori, imoianariakori pakini sari Kapanaoõ sitatxitimoni. Iuaã ikaikotana mapaõtipeka.

*Pirãtxi Omitikiko Pirena
(Mateo 21.12-13; Marko 11.15-17; Arókasi 19.45-46)*

¹³ Xoteoakori kiinirite Páskoa inakori apisapanika, Xesosi sari Xerosareẽmoni. ¹⁴ Isa Teoso misãkiretiko aikotimoni. Iuaã pirikeri ãki itikari pirãtxi vëtxitakani, kema auãte, soti auãte, kamoã pakini vëtxitakani. Itikari txineirota sikakani apaka. Amesa takote ninoa topãkanãta. Ivëtxitarona txineirota. Apakaparona ãti uãka txineirote, kotxi oa ãtoião, ininiã Xoteo txineirote isikana. ¹⁵ Ininiã Xesosi kosekari aãpitsa. Ñpatari. Aãpitsaã omitikenatana ninoa pirãtxi vëtxitakani. Omitikenatana kema auãte, soti auãte Teoso misãkiretiko aikoti takote auakani. Ikakanapiriãri amesa txineirota apakapikoãtaã. Txineirota xikepoakatani. ¹⁶ Ipaniãtana kamoã vëtxitakani:

—Himakatxakariko kamoã. Hanikariko mapara. Niri aapoko ãki hãvëtxirauatini !apakata. Kona uaini pirãtxi vëtxitiko —itxana ninoa.

¹⁷ Iuasaakipeka imoianariakori xinikari Teoso sãkire iõkatsopatakori: Nota iteene tiretari paapoko pite misãkiretiko aikoti. Iua xika nokaãkako, itxa Teoso sãkire iõkatsopatakori.

¹⁸ Eereka Xoteo auãteakori misãkiretari Xesosi:

—Teoso paniãtiniãi ninoa kãkiti iua misãkiretiko aikotiã auakani pomi-tikenatini, poerekaua posotiiretxi Teoso paniãtinii aãuikini ãkapani —itxana ninoa.

¹⁹ Xesosi apakapapiretari:

—Hãrikariko ia Teoso aapoko. Ipi ãti pakini õtisaaki iuaãkana nõkitikariko ia Teoso aapoko —itxa Xesosi.

²⁰ Ininiã ninoa:

—Anekani. Koarëta seisi anokanani iua aiko kamiko. Kiãtokopa pitxari ipi ãti pakini õtisaaki põkitikiniri iuaãkana? Kona kãkitei pite pisãkire ikara atoko pinini —itxarina Xesosi.

²¹ Txamari Xesosi sãkire “Teoso aapoko” ixinikari ãto. !Ixinikari Teoso misãkiretiko aikoti. ²² Xesosi ipinaãka atoko, õkitikaãkaua atoko, iuasaakipeka imoianariakori xinikari ikara Xesosi sãkire. Iuasaaki ninoa auikari Xesosi sãkire. Auikarina Teoso sãkire iõkatsopatakori sãpiretiniri Xesosi atão Teoso ãkiri ininiua.

²³ Xesosi Xerosareẽ auakasaaki, Páskoa kiiniriti auakasaaki, itomaneri kãkiti auikari Xesosi Teoso mereëkiti ninoa iãtapakiti ininiua. Ninoa itikari posotiiretxi ikamakiti, ininiã auikarina Xesosi sãkire. ²⁴ Txamari Xesosi !auikari kãkiti sãkire, kotxi imarotari ikinimane ãkixinire sãkire. ²⁵ Kãkiti ãkixinire sãkire !ipimaãri xatiki, kotxi imarotapekari kãkiti ãkixinire sãkire.

3

Nikotemo Pirena

¹ Āti ĩkanōkati Nikotemo inakori motika Xesosimoni. Iua Xoteoakori auĩte itxaua. Pariseo itxaua apaka. ² Iua misākiretari Xesosi:

—Koerekareri, ate imarotari koerekareri, Teoso iokanatakiti pininiua. Teoso pitekata mauakaniā, kona piposotari posotiiretxi pikamini, ininiā ate imarotari Teoso iokanatai pite kākitimoni —itxa.

³ Ininiā Xesosi:

—Iuaĩkana iponaniākarira sari Teoso auĩtetxi ininiātaāua. Iuananira sari iuaxiti. Atāopitikara ikara atoko nitxai pite —itxa.

⁴ —Kiātokopa pitxa auapekarikai iuaĩkana piponaniini? Kona piposotari pinoro āko āki iuaĩkana piĩroini. Kona piposotari iuaĩkana piponaniini —itxa Nikotemo.

⁵⁻⁶ Ininiā Xesosi:

—Atāopitikara ikara atoko nitxai. Piponaniākasaaki, piri, pinorokata ākirinanira pitxaua. Iua Erekareri Matamatakoti iponaniākitakiniāi, Teoso ākiri pitxaua. Kākiti, iua Erekareri Matamatakoti iuaĩkana iponaniākitaākitinanira, sari Teoso auĩtetxi ininiātaāua. ⁷ Koniko pitsorĩkaātapeko. Piponaniāko ipikata. Ipikata pimiponaniākaniā, kona pĩsari Teoso auĩtetxi ininiātaāua. ⁸ Ītima xōkarauata inirekiniātaā. Pikenakotari ixōkarauatini, iuaritika na pimarotari ĩtima sinimoni. Na pimarotari ĩtima ininimoni. Iua atokokana !kimarotikori Erekareri Matamatakoti iuaĩkana iponaniākitaākiniri kākiti —Xesosi txari Nikotemo.

⁹ Nikotemo apakapapiretari:

—Nota !imarotari ikara pisākire —itxa.

¹⁰ Ininiā Xesosi:

—Koerekareri apiari pitxaua. Kākiti Isaeo tixini auakani poereka. Txamari pite !imarotari ikara atoko nininii pite. ¹¹ Atāopitikara ikara atoko nitxanātai pite. Ate sāpiretari aimarotakiti, aĩtiākiti pakini. Txamari !hinirekareri hāuikapiretiniri asāpiretakiti. ¹² Īkorapokoriti pirena nisāpiretakasaakii, !pauikari nisākire. Atauako pauikatari nisākire Teoso tixine pirena nisāpiretakasaakii? ¹³ Kona kākiti sapanika Teoso tixine. Ātinoka sari iuaā, Teoso tixine potorikakarinoa, kākiti itari iaxitikirinoka sari iuaā.

¹⁴ —Kitxakapirĩka āparaā makipakaniātaā Moisesini ōkitikari imini metao kamakori aāke mapotōkireē. Itano itakari. Kākiti Teoso sākire auĩākani imini akatsatakinini amamatari Moisesini ōkitikakiti, ininiā kona ipinana. Iua atokokana kākiti itari iaxitikiri ōkitikaākako. ¹⁵ Ininiākara iua sākire auĩākari kona ipinaika. Auapikako.

¹⁶ —Teoso iteene tiretari ikini itixiti auakani, ininiā iokanatarari imatonōkari imi kākitimoni. Ininiā iua sākire auĩākanirako kona ipinaikako. Ātipirika auapikako. ¹⁷ Teoso iokanatarari imi kākitimoni ikini itixiti auakanimoni kona imisiritinina ĩkapanini. Iua iokanatarari imi kākiti maerekani imaktxakini ĩkapani, ninoa imapinakanini ĩkapani.

¹⁸ —Teoso ākiri sākire auĩākari kona iokanataāka kākiti misiritikomoni. Iua Teoso ākiri sākire mauĩākati, iuarako sako kākiti misiritikomoni. Teoso ākiri sākire imauĩākani xikara ikara atoko inaākanako. ¹⁹ Teoso ākiri sākire mauĩākani misiritaākako, kotxi atāo inakari oerekakari kākiti xinire iopiniākari apokapeka ĩkoraxiti. Iua oerekari atāo aimarotini ĩkapani. Tirikapi atoko itxa, kotxi oerekaua atāo. Ninoa mauikareni kona nirekareri tirikapi. Inirekarina ipiā, kotxi maerekati ikamanātana. ²⁰ Maerekati kamakari kona nirekareri tirikapi. Kona tirikapi takote kona aua, kotxi ipĩkari ikamara. Ipĩkari kākiti itikiniri maerekati ikamini. ²¹ Teoso sākire iaōka kamakarira sari

ikamaraã, kotxi ikamara oerekari apanakini iua kamakiti atão inini Teoso nireëkiti iaõka inini —Xesosi txari Nikotemo.

Xesosi Apiari, Xoão Poiãori Inini

²² Ikara atoko inaka atoko Xesosi imoianariakorikata sari Xotéia tōpamoni. Mapaõti ikaikota imoianariakorikata iuaãtaã. Imoianariakori patxisatari kãkiti iuaã. ²³ Xoão apaka patxisatari kãkiti Enõ inakoriãtaã, Sarĩ inakoriãtaã takote. Ipatxisarauata iuaãtaã, kotxi iuaãtaã ãparaã kaiãopokori. Ikiniõtika kãkiti sari iuamoni iuaãtaã, ininiã Xoão patxisatana. ²⁴ Iuasaaki Xoão kona takaãkapanika kateia ãki.

²⁵ Iuasaaki Xoão moianariakori sãkirauata apanakinikata kãkiti arokiniua pirena, Teoso misãkiretiko aikoti ãki iĩroinina apisa pirena. ²⁶ Apokana Xoãomoni.

—Koerekareri, Xotão ipiniã iua kiki pite patxisatakiti, atemoni pisãpiretakiti, uatxa iua patxisarauatapeka. Ikinipoko kãkiti sari iuamoni. Atemoni !erekari ipatxisarauatini —itxana.

²⁷ Xoão apakapiretana ninoa:

—Erekapitikari ipatxisarauatini, kotxi Teoso paniãtari iua. Teoso masikakaniãri posotiiretxi kãkitimoni, kona xatiki iposotari iparĩkauatini Teoso ãkapani. ²⁸ Nota kona Teoso mereëkitino. Kãkiti iãtapakiti kona nitxaua nota. Teoso iokanatanano nota Teoso mereëkiti apokini apisa. Ikara hĩte imarotapeka. Ikara atoko nitxapekai hĩte. Hĩsãpiretari ikara apanakinimoni.

²⁹ —Maxinikari kiki ãtanorouatakasaaki. Sito amanaãkito iua nakiti otxaua. Imoianari topãka iua takote. Ipoxononiua ãtanorouatakari sãkire ikenakotakasaaki. Iua atokokana nota poxononiua. Nota iua moianari atoko nitxaua. Xesosi iua ãtanorouatakari atoko itxaua. Kãkiti iua nakiti itxaua. ³⁰ Xesosi apiaãpotako. Nota poiãõpotako.

³¹ —Iaxiti ãkari Apiananiri. Itixi auakani imarore poiãonoka, kotxi itixinoka imarotana. Teoso tixine ãkari Apiananiri itxaua. ³² Iua sãpiretari itiãkiti. Ikenakotakiti isãpireta. Txamari kãkiti !auikari isãpirena. ³³ Kãkiti Apiananiri sãpirena auiãkani, imarotari Teoso sãkire atão inini, ininiã apanakini apaka imarotari Teoso sãkire atão inini. ³⁴ Iua Teoso iokanatakiti sãpiretari Teoso sãkire, kotxi Teoso sikari Erekari Matamatakoti iuamoni, ininiã ikinipoko Erekari Matamatakoti posotiire aua iua Teoso iokanatakitimoni. ³⁵ Aĩri Teoso tiretari imi. Isikari imi ikinipoko imoiaini ãkapani. ³⁶ Teoso ãkiri sãkire auiãkani auapikako Teosokata. Teoso ãkiri sãkire mauiãkani kona auapanina Teosokata. Teoso omanatapikanako ninoa ãtipirika —itxa Xoão ninoamoni.

4

Xesosi Misãkiretaro Samariakero

¹ Kãkiti sãpiretari pariseokori:

—Xesosi sãkire auiãkani, iua patxisatakini, itomaneri. Xoão patxisatakini poiãoka —itxana.

² (Ari, kona Xesosini patxisarauata. Imoianariakorira patxisatari kãkiti.)

³ Xesosi imarotakasaakiri pariseokori kenakopiretiniri iua, iuasaaki iua osipikari Xotéia tōpa. Kinirão kanapirikari Kariréia tōpamoni. ⁴ Inirekari Samaria tōpa ãpirixititini Kariréia tōpa apokini ãkapani.

⁵ Samaria tōpa ãpirixititakasaaki, apoka Sikaa sitatxiti takote. Iuaã aua itixi Xoseeni nakiti, iri Xakooni sikakiti kitxakapirĩka. ⁶ Iuaã aua aariko Xakooni kisakakiti ãparaã apaãtiko. Iuaã Xesosi apokasaaki, iotoka, kotxi isãpakapeka õtakori ãpirixititini xika. Ininiã iitopãka aariko takote. Iuasaaki apaniãxitipeka.

⁷ Iuasaaki sito Samaria auakaro apoka iuaã, ãparaã apaãtakaro. Oãpokasaaki, Xesosi amanaãro ãparaã:

—Ãparaã pisikano —itxaro.

⁸ Oa apokini apisapanika Xesosi moianariakori sari sitatximoni nipokori iamotinina ãkapani.

⁹ Oa sito apakapapiretari:

—Xoteo pitxaua pite. Samaria auakaro nitxaua nota. Kinirepa nãparaãte pamanaãno? —otxa.

Ikara atoko otxa, kotxi Xoteoakori kona sãkirauata Samaria auakanikata.

¹⁰ Ininiã Xesosi:

—Teoso sikakiti pimarotaãkamako, pitemoni ãparaã amanaãkari pimarotaãkamako, notamonimarako pamanaãri ãparaã, kotxi piãtiniãri ãparaã nota sikakiti, pauapika ãtipirika —itxaro.

¹¹ —Kona katiiui pite. Kiriãpa papaãtari ãparaã, kotxi paãtanoirikori. Namonipa papokatari ãparaã kãkiti ãtipirika auini inãkitaãkari? ¹² Kitxakapirãka aãtokirini Xakoo sikaua ate ia aariko. Iua, imiakori, ipiraakori pakini iãtari ia ãparaã ia aarikoãkiri. Pite apiata atxiãti? —otxa.

¹³ Ininiã Xesosi:

—Kãkiti ia irikoãkiri ãparaã iãtakari iuaãkana iposonatapanika. ¹⁴ Kãkiti nota siãkiti ãparaã iãtakari apikomoni !iposonataika. ãkixinire amomo atoko itxa ãparaã nota siãkiti. Iua ãparaã txãkitakari iua ãtipirika auini Teosokata —itxaro.

¹⁵ —Iua ãparaã pisikano nimaposonatakani tãkane, ininiã uai kona ninaika ãparaã napaãtini —otxa.

¹⁶ —Pakiritari pãtaniri. Uai piminari —itxa.

¹⁷ —Kona kãtanirino —otxa.

—Atãopitikara, “Kona kãtanirino,” pinini. ¹⁸ Sãko pakinipekara pãtaniri. Kiki uatxa pitekata auakari na atão pãtanirini. Inipitikara pisãkire —itxaro.

¹⁹ Ininiã oa:

—Teoso sãkire sãpiretakari pitxaua pite, kotxi pimarotari ikinipoko nika-makiti. ²⁰ Kitxakapirãka ate kiomaneakorini apotiitaua Teoso imisãkiretinina ãkapani ia oxiratari nopini. Txamari hãte Xoteoakori txari: “Xerosareãnaira aãpotiitauako Teosokata” —otxa.

²¹ Ininiã Xesosi:

—Pauikariko nisãkire. ãti õti apokako. Iuasaaki kona uai oxiratariãni, kona Xerosareãni kãkiti apotiitaua aãri Teoso imisãkiretinina ãkapani. ²² Hãte Samaria tãpa auakani apotiitaua Teoso himisãkiretini ãkapani. Txamari, kona atão himarotari iua. Ate Xoteoakori aimarotapitikari Teoso, kotxi Teoso sikakiti kãkiti maerekani makatxakakari Xoteo itxaua. ²³ Teoso keto apokapanika, ari apopeka, ininiã aãri Teoso misãkiretakani atão inakani misãkiretari iua ãkixinireãna. Ninoa sãpiretari atão inakarínoka iuamoni. Aãri nirekari kãkiti ikara atoko inakani misãkiretiniri iua. ²⁴ Teoso nirekari amisãkiretiniri iua aãkixinireã, kotxi Teoso ãto !auari. Inirekari kãkiti sãpiretiniri atão inakarínoka iuamoni —itxa Xesosi.

²⁵ Ininiã oa:

—Nimarotapitikari iua Teoso mereãkiti aiãtapakiti, Kristo inakori, apokapitikako ãkorapokoriti. Iua apokasaaki ikini sereti isãpiretauako —otxari.

²⁶ —Nota pimisãkiretakiti Teoso mereãkiti hiãtapakitikarano nota —itxaro.

ãti Takarauata, ãti Amarauata Inini Pirena

²⁷ Iuasaakipeka Xesosi moianariakori kanapiriã. ãkixinireãna ninoa tsorãkaãnãta:

—Kinirepa Xesosi sãkirauata oa sitokata?

Kotxi oa Samaria auakaro. Iuaritika !ipimaãrona: “Kiripa ìkai?” kona itxarona. Kona ipimaãrina Xesosi: “Kinirepa pimisãkiretataro oa?” kona itxarina.

²⁸ Iuasaaki oa sito takanapari oti, sitatximoni kanapiriã otxa. Oãkiritari kãkiti iuaã auakani,

²⁹ —Masa. Maãpiãkatari kiki ikinipoko nikamakiti imarotakari. Iua Teoso mereëkiti aiãtapakiti atxiiti? —oa txana ninoa.

³⁰ Ininiã iua sitatxi auakani sari Xesosimoni. ³¹ Ninoa apokini apisapanika imoianariakori akiritari Xesosi:

—Koerekareri, pinipokota —itxarina Xesosi.

³² —Nipokori auape nota niãkiti tìkane hìte mimarotakiniti —itxa Xesosi.

³³ Ininiã imoianariakori imisãkiretakakana:

—Kiripa sikatari nipokori Xesosi nikakiti? —itxana.

³⁴ Ininiã Xesosi:

—Nota kamari iua niokanatakiri nirekaãkiti. Ninirekari nikaminiri ikinipoko iua paniãtakiti. Ia niparìka. Niparìka nikiena atoko itxa, kotxi niokanatakiri paniãtakiti nikamini sikataparatanano, nipokori sikataparatinino atokotxikana. ³⁵ Kãkiti txari: “Ipi ipi pakini kasiriti auapanika takari iposope inini tìkane, ininiã uatxa kona niparìkauata.” Ia atoko kona hìtxape hìsãkire. Himereka. Hãtamatariko takari. Nisãpiretai hìte hìtakare iposope haãpoko hanikini tìkane. ³⁶ Iua atokotxikana Teoso sãkire takaãka kãkiti ãkixinireë. Katarareri miparìkatakari apakapari iparìka ìki. Iua anikari kãkiti Teoso aapokomoni, ãtipirika Teosokata auini ìkapani. Ininiãkara katarareri, iua miparìkatakari apaka poxokoniuatako. ³⁷ Aãtokirini txari: “Ãti takarauata, ãtipekana apotiitari takari.” ³⁸ Ia sãkiretxiti atão, kotxi nota paniãtai hìte mitxi himaparìkauatakaniãtaã hamarauatini. Apanakini parìkauatapeka iuaã. Ninoa takapekari Teoso sãkire kãkiti ãkixinireë. Pasãpaniri ninoa parìka. Ninoa parìkauata mitxi, ininiã uatxa hìte parìka poião kãkiti Teosomoni hanikini —itxa Xesosi.

Samaria Auakani Auikiniri Xesosi Sãkire

³⁹ Kaiãopokori Samariakini iua sitatxiti auakani auikari Xesosi sãkire, kotxi oa sito mitxi sãpiretana:

—Nikamakiti ikinika isãpiretano —otxana.

⁴⁰ Ininiã ninoa Samaria auakani apoka Xesosimoni.

—Atekata paua —itxarina Xesosi.

Ininiã Xesosi kaikota ipi õti ninoakata. ⁴¹ Xesosi sãkire ikenakotakasaakina, apikomoni ninoa auikapiretari.

⁴² Ninoa misãkiretaro oa sito:

—Uatxa ate auikapiretari Xesosi sãkire, kona pite sãpirenaãnanini, ate auikapiretari. Ateka kenakotapekari iua sãkire, ininiãkara ate auikapiretari iua sãkire. Uatxa ate imarotari atão inini Teoso mereëkiti ininiua Xesosi. Kãkiti itixi auakani maerekani makatxaãkari itxaua iua —itxarona.

Auãtetxi ãkiri Xesosi Makananitini

⁴³ Iuaã ipi õti inapaka atoko Xesosi sipeka. Kariréia tãpa isa. ⁴⁴ Mitxi Xesosi sãkire: “Teoso sãkire sãpiretakari paxitaãka, txamari Teoso sãkire sãpiretakari itixineë auakasaaki, kãkiti iuaãtaã kona auikari iua sãkire,” itxapeka Xesosi.

⁴⁵ Iuaritika Kariréia tãpa apokasaaki, kãkiti iuaã auakani ipoxokoniritika apakapari Xesosi, kotxi ninoa apaka sari iua Pãskoã kiiniriti Xerosareë sitatxitiã. Iuaãtaã itikarina Xesosi posotiire. Ininiãkara ipoxokoniritikana apakaparina Xesosi.

⁴⁶ Xesosi iuaãkana sari Kanaã sitatxitimoni, Kariréia tãpa. Mitxi Xesosi inoãkapekari ãparaã iãriã ininiua iuaã. Xesosi apokasaaki Kanaã, auãtetxi

ãkiri amianata Kapanaoõ sitatxitikiri. ⁴⁷ Iua auĩtetxi kenakopiretari Xesosi Kariréia tōpa apokini, Xotéia tōpa osipikini. Inakasaaki Xesosimoni isa, aõkita itxari Xesosi. Aiatari:

—Masa Kapanaoõmoni, naapokomoni. Namarite amianata. Pimakananitari iua. Ipinanapanoka —itxari Xesosi.

⁴⁸ Ininiã Xesosi:

—Nimakamakaniãri posotiiretxi, kona hĩte nirekari auikiniri nisãkire. Posotiiretxi hĩtikasaakinani, hĩte nirekari nisãkire hãuikini. Teoso takaõtxikare hĩtikasaakinani, hinirekari nisãkire hãuikini —itxa Xesosi iuamoni.

⁴⁹ —Masapoka naapoko. Pimasikanisaaki, namarite ipinapitikako —itxari.

⁵⁰ —Pisa paapokomoni. Pamarite kona ipina —Xesosi txari iua.

Iua kiki aukari Xesosi sãkire, ininiã isipeka. ⁵¹ Ipinipokoriti aõkitana initiriakori.

—Pamarite auapitikako —itxarina.

⁵² —Namonikitapa akananita? —itxana.

—Kita apaniãxiti apoomari iotoka —itxana.

⁵³ Iuasaaki iua kiki imarotari kita Xesosi sãkire manapikara: “Pamarite kona ipina,” ininiri manapikara iotoka apoomari. Ikara atoko ininiã, ikinimane iua aapoko auakani, iua pakini aukari Xesosi sãkire.

⁵⁴ Ininiã ipikatapeka Xesosi kamari posotiiretxi Kariréia tōpa auakasaaki, Xotéia tōpa osipikasaaki.

5

Matĩpokotakati Xesosi Erekepeka Inĩkitakini

¹ Ikara atoko inaãka atoko Xesosi sari Xerosareẽ sitatxitimoni, kotxi Xoteo kiinirite Teoso ĩkapani aua iuasaaki. ² Xerosareẽ sitatxiti apanĩkaki, soti auĩte vẽtxitikoãtaã takote aua ipoa xapitikiri. Sĩko ĩronakiko aua iuaãtaã. Xoteo sãkire Epiráiko. Epiráiko sãkireẽ iua ipoa uãka “Petésita.” ³ Ironakikoãtaã amianatakanipokoni sirĩkanãta. Mõsiãreni, motĩkakani, matĩpokotakani pakini iuaã auanãta. Iãtapanãtarina ãparaã tokĩkaãtini. ⁴ Teoso nitiri apokanaka iuaãtaã. Iua apokasaaki itokĩkaãtakari ãparaã. ãparaã tokĩkaãtakasaaki, ãtika amianatakari ĩkiika komokaãtakari erekepeka itxa. ⁵ Matĩpokotakati iuaã auanãtakari amiananãtakari trĩta oito pakini anokanani amianata. ⁶ Xesosi atamatari iua iuaã isirĩkanãtini. Imarotari iua uatxakapokoni amiananãta. Ininiã Xesosi pimaãri:

—Ereka pinini pinireka? —itxari.

⁷ Amianatakari apakapapiretari:

—Ari, ninirekapitikamari, txamari kona kanikikono kãuaãriã ãparaã tokĩkaãtakasaaki. Nĩkomokaaritakasaaki, ãti komokape napisapanika —itxari Xesosi.

⁸ —Põkitikaua. Pisirimata pikoseka, sipeka pitxa —Xesosi txari.

⁹ Iuasaakipeka erekepeka itxa iua amianatakari. Isirimata ikoseka, tĩpokota itxapeka. Iua õti kãkiti tomatini õti. ¹⁰ Ininiãkara Xoteo auĩteakori txitari amianatakari erekepeka inakari:

—Uatxa kãkiti tomatini õtisaaki pite anikanãtari pisirimata. ĩkora atoko ininiã, kãkiti !auritaãka —itxarina, kotxi ninoamoni iparĩkauata isirimata anikasaaki.

¹¹ Ininiã iua kiki:

—Erekepe ninĩkitaãkirira paniãtano: “Pisirimata pikoseka, sipeka pitxa,” itxano.

¹² Ininiã ninoã:

—Kiripa kiki paniãtai pisirimata pikosekini pisini ĩkapani?

¹³ —!Nimarotari iuãka —itxa.

Iuaãtaã ipoa xapitikiri takote kaiãopokori kãkiti auanãta, ininiã patimari Xesosi sipeka ninoa sauaki.

¹⁴ Eereka Xesosi aõkitari iua kiki Teoso misãkiretiko aikotiã.

—Uatxa pitãpokotapeka, ininiã maerekati pitakanapako. Iuaãkana maerekati pikamakasaaki, atxiãti amianari apiatakari inokai —Xesosi txari iua.

¹⁵ Eereka iua kiki sari Xoteo auãteakorimoni.

—Xesosira erekapeka txãkitakano nota —itxari.

Xoteo Omanatiniri Xesosi

¹⁶ Tomatiko õtisaaki Xesosi makananitari iua amianatakari. Ikara xika Xoteo auãteakori kinirão okaka txari Xesosi. ¹⁷ Xesosi imarotari Xoteo auãteakori sãkire, ininiã itxana:

—Niri Teoso kamari erekari ikiniõtika. Iua atokotxikana nota. Kona niotoka erekari nikamini tomatiko õtisaaki —itxa Xesosi.

¹⁸ Ikara Xesosi sãkire xika Xoteo auãteakori apiata omanatari Xesosi. Ninoa-moni Xesosi kamari maerekati tomatiko õtisaaki amianatakari imakananiti. Xesosi sãkire: “Niri Teoso,” inini xika, apiata omanatarina iua, kotxi iua: “Teosotxikana nota” itxanãta iua Xesosi.

Xesosi Irikata

¹⁹ Ininiãkara Xesosi misãkiretana Xoteo auãteakori:

—Atãopitikara nitxai hãte. Nota Teoso ãkiri nitxaua. Notanani !kakamareno. Nitikari niri kamanãtakiti, ininiã niri kamakiti iaõka nikama. Iuanokara nikama nota. Niri kamakitixikana nota kama apaka. ²⁰ Niri turetano nota, ininiã ikini sereti ikamanãtakiti oerekano. Oerekapanikariko posotiiretxi apiatapanikako nota kamini ãkapani, ininiãkara hãte tsorãkaãtako hãtikasaakiri. ²¹ Niri õkitikari ipãkani, iuaãkana aua inini tãkane. Iua atokotxikana nota txãkitakana kãkiti ninirekaãkini, iuaãkana auini ãkapani. ²² Teoso kona txari kãkitimoni: “Kona erekai pite, ininiã kãkiti misiritikomoni pisa,” kona itxa Teoso. Apanakinimoni kona Teoso txari: “Erekai pite, ininiã uai pina notakata pauini ãkapani,” kona itxa Teoso. Notakara iua ãkirikara txari ikara atoko inakari kãkitimoni, kotxi Teoso sikaposotiiretano nota ikara atoko inakari nisãpiretini kãkitimoni. ²³ Ikara atoko ininiãkara, kãkiti paxitano nota. Niri nirekari nota paxitiko, iua paxitiko atokotxikana. Nota mapaxitakani kona paxitari niri nota iokanatakari.

²⁴ —Atãoenepitikara nitxai hãte. Nisãkire kãpitakari, nota iokanatakari sãkire auããkari, auapika Teosokata. Kona Teoso misiritapaniriko iua. Kona ipinaika. Auapika Teosokata. ²⁵ Atãoene nitxai hãte. Kãkiti xinire ipãkari atoko itxa maerekati ikamakiti xika. Teoso ãkiri sãkire kãkiti kãpitini õti apokapanikako. Ari iketo apokapeka. Nota sãkire kãpitakani auapikako. ²⁶ Aãri Teosonoka posotari itxãkitakiniri ãkinipoko auãki inini, kotxi iuanoka auapika. Isikaposotiiretano nota apaka ãkinipoko nitxãkitakini auãki inini.

²⁷ —Aãri Teoso txano nota: “Kãkiti itari iaxitikiri pitxaua, ininiãkara pitxariko nisãkire mauiãkani: ‘Kona hãte kãpitari Teoso sãkire, ininiã kãkiti misiritikomoni hãsa,’ pitxako. Pitxariko nisãkire auããkani: ‘Hãte kãpitari Teoso sãkire ininiã uai hina Teosokata hãuini ãkapani.’ Ikara atoko pitxariko kãkitimoni,” Teoso txano nota.

²⁸ —Kona hãtsorãkaãtapeko, ikara sãkiretxiti hãkenakotakasaaki. ãti õti ipãkani, katakoni, kenakotariko Teoso ãkiri akiritinina. ²⁹ Iuasaaki õkitikauanako. Ninoa erekari kamakani auapikako Teosokata. Ninoa maerekati kamakani misiritaãkako.

³⁰ —Notanani kona nitxari kãkiti: “Pite sari kãkiti misiritikomoni. Pitepekana inari uai Teosokata pauini ãkapani.” Notanani kona ikara atoko

nitxari kãkiti. Teoso sãpiretakitinokara nitxa kãkitimoni, ininiãkara nisãkire kãkitimoni atãonoka, kotxi kona nota nirekaãkitini nikama. Niri nipaniãtakiri nirekaãkitinanira nikama —itxa Xesosi.

Xesosi Sãkire Atãoene Sãpiretakani

³¹ Apikomoni Xesosi sãpirenauata:

—Notaka sãpiretiniãua hĩtemoni, atxiĩti kona kauikikono. ³² Ātipekana nota sãpiretakari aua. Nimarotari atão inini iua sãpiretakiti. ³³ Hĩte iokanatapekari himoianariakori Xoãomoni nota himarotini ĩkapani. Iua sãpiretapekana nino atãoene nota sãkire. ³⁴ Kona ninitanãtari kãkiti nisãkire atão inini sãpiretakani. Nota sãpiretai hĩte Xoão sãpiretakiti sãkiretxiti, himaerekani Teoso makatxakini ĩkapani, himapinakani tĩkane.

³⁵ —Xoão tirikapi tirinakari poniãkari atoko itxa. Tirikapi iopinikari ikinipoko, tirikapi takote auakari aãtamatiini ĩkapani. Iua atokokana Xoão oerekari kãkiti atão inakari. Mapaõtinokara hĩte poxokiniuata iua sãkire hĩkenakotakasaaki.

³⁶ —Aua āti nota sãpiretakari. Iua Xoão poiãoka. Ātipekana apiata. Nota kamakitikara apiata. Nikamakiti sãpiretari nota sãkire atão inini. Nikamakiti, niri paniãtakiti kãkiti itikasaaki, imarotari niri uaimoni iokanatinino nota.

³⁷ —Niri, nota iokanatakari kãkitimoni, iua apaka nota sãpiretakari. Kona hĩte kenakotari Teoso sãkirauatini. Kona hĩte atamatari itoõ. ³⁸ Isãkire !auari hãkixinireẽ, kotxi kona hãuikari nota sãkire iua iokanatakiti sãkire.

³⁹ —Hĩte atatsopatapikari Teoso sãkire iõkatsopatakori, hãuini ātipirika Teosokata himarotini ĩkapani. Ia Teoso sãkire iõkatsopatakori nota sãpiretakari apaka itxaua. ⁴⁰ Txamari kona hinirekari nisãkire hãuikini. Kona hinirekari notamoni hinini, ātipirika Teosokata hãuini ĩkapani.

⁴¹ —!Ninitari niuikiko. ⁴² Iteene nimarotai hĩte. Kona xapiti hĩtaretari Teoso hãkixinireẽ. ⁴³ Niri iokanatanano nota uaimoni. Txamari kona hĩte apakapano nota Teoso iokanatakitino. Teoso maiokanatakinitira hĩte apakapa. ⁴⁴ Hĩte potxitari āti iuikinii. Txamari kona hĩkamari erekari Teosonoka iuikinii ĩkapani, ininiã kona hãuikari iua sãkire.

⁴⁵ —Kona notani sãpiretapaniri niri hĩte maerekani. Moisesira sãpiretariko himaerekani Teosomoni. Hĩte uãkatari iua sãpiretari hĩte ereka hinini, txamari iua sãpiretariko niri himaerekani. ⁴⁶ Moisesini sãkire iõkatsopatakiti hãuikaãkamako, nota sãkire apaka hãuikamako, kotxi Moisesini nota sãpiretakari apaka. Iua iõkatsopatapekari nota sãkire. ⁴⁷ Hĩte kona auikapiretari Moisesini iõkatsopatakiti. Isãkire iõkatsopatakiti himauikakaniã, kiãtokopa hĩtxa nota sãkire hãuikini? —itxa Xesosi.

6

Sĩko Mio Kãkiti Xesosi Sikakienatini (Mateo 14.13-21; Marko 6.30-44; Arókasi 9.10-17)

¹ Eereka āti õti Xesosi ĩpiriãtari Karirėia poa. Ia ipoa uãka apaka Txiperiatxi poa inaãka. ² Kaiãopokori kãkiti sari iua tikini, kotxi nino itikapekari Xesosi makananirauatini. ³ Xesosi kanĩka mitaxiratarimoni. Iuaã iitopãka imoianariakorikata. ⁴ Xoteoakori kiinirite, Pãskoa inakori kiiniriti apisapanika Xesosi sari iuaãtaã. ⁵ Iitopãkasaaki, Xesosi atapari itomaneri kãkiti apokaãpotini iuamoni. Ininiã ĩpimaãri Piripi:

—Amonipa aiamotatariko komiri nakira kãkiti asikakienatini ĩkapani?

⁶ Xesosi ikara atoko txari Piripi, kotxi inirekari imarotiniri: “Atauako atxiĩti Piripi auikari niposotiire?” Xesosi imarotapekari iuaka ikamakiti tĩkane. ⁷ Ininiã Piripi apakapapireta:

—Txineiropokoni, tosêtosi txineiro ota, kona apakata komiri aamotini, nakira kâkiti asikakienatini ïkapani. !Apakata —itxari.

⁸ Iuasaaki âti Xesosi moianari Simão Petro itari, Ætree inakori, txari Xesosi:

⁹ —Uai aua amarini. Auari ikiena. Sïko komiri sevata inakori kamakori auari iua. Ipi ximaki axapitiri apaka auari iuamoni. Txamari kâkiti ito-maneri sikakienatiko !apakata. Ia nipokori poiãoka —itxari.

¹⁰ Xesosi paniâtari imoianariakori:

—Nakira hïpaniãta iitopãkinina —itxana.

Sotonaiakiperi auari iuaãtaã. Iua nopini iitopãkana. Sïko mio apikomoni kikiakori aua. ¹¹ Xesosi kosekari komiri amarini nakiti. Iuasaakipeka imisãkiretari Teoso:

—Erekapitikari ia komiri auiniua ate.

Iua sikari imoianariakori. Eereka ninoa xanakari kâkiti topãkakanimoni. Iua atokokanera itxarina ximaki. Ikinikana inirekaka iaõka auana ninoa.

¹² Ikinimane kamitopeka inakasaaki, ipaniâtari imoianariakori:

—Itetakori komiri, ximaki pakini hãpotiita. Kona hiomatapiriko —itxa.

¹³ Ininiã apotiitarina komiri itetakori. Tosi kotarina ixãpokakana komiri itetakori.

¹⁴ Xesosi posotiire ninoa kâkiti itikasaaki, ninoakakarika isãkirauatana:

—Atãopitikara Xesosi aiãtapanãtakitikara, Teoso sãkire sãpiretakari inakorikara ere Xesosi —itxana.

¹⁵ Xesosi imarotapekari ninoa nirekiniri iauïtetinirina iua. Iua kona nirekari ninoa auïtetiniri iua. Ninoa mamaïkakaniri apisapanika, Xesosi sipeka iuanoka. Apikoxiti oxiratarimoni ikanïka.

Xesosi Ipoa Nopini Inaãpotini

(Mateo 14.22-23; Marko 6.45-52)

¹⁶ Kikatapeka imoianariakori iokiriïta ipoa tiniã. ¹⁷ Iereëtauana kanaua ãki. Ïpiriaãpotarina ipoa Kapanaoõ sitatxiti manapi. Ïkanõkapeka inakasaaki kona Xesosi apokapanika ninoamoni. ¹⁸ Kataparari ïtimati apoka, ininiã tsakatipokoni. ¹⁹ Iuasaaki imekoãpotana. Ipixiniãpeka apokasaakina, ataparina Xesosi ipoa nopini itïpokotini. Kanauamoni isaãpota. Ninoa pïkarauata, kotxi ninoa uãkatari kamiri.

²⁰ Xesosi akiritana:

—Notakara. Kona hïpïkarauatape —itxana.

²¹ Ininiã apakaparina Xesosi ipoxokoniritikana. Iua morõkokaua kanauaã. Iereëtakasaakiua, iuasaakipeka kanaua apoka imiriïpe Kapanaoõ manapi.

Kâkiti Nitiniri Xesosi

²² Katimatinïkata ipiniãmoni kaikotakani nitamari Xesosi. Ninoa imarotari ãtoka kanaua mitxi iuaã auini. Oa kanaua Xesosi moianariakori anikapeka. Ninoa imarotari Xesosi kona sari imoianariakorikata. Imarotarina ninoanani sini. ²³ Iuasaaki kanauaniri Txiperiatxi sitatxitikini apokita Xesosi merepani Teoso misãkiretiniãtaã takote merepani komiri nikikoãtaã.

²⁴ Iuasaaki kona ninoa apokari Xesosi, imoianariakori apaka. Ininiã ninoa iereëtaua kanaua ãki. Iuaïkana ikanapiriãna. Ipoa ïpiriãtana Kapanaoõ sitatxitimoni, Xesosi initinina ïkapani.

Komiri Kâkiti Auapininiika Inini Tïkane

²⁵ Ninoa apokari Xesosi ipoa ipiniã.

—Koerekareri, namonikitapa papoka uai? —itxarina.

²⁶ Ininiã Xesosi:

—Atão nisãpiretai hïte. Hïte nikari komiri nisikakiti. Kamitopeka hïtxa, ininiã nipokori ïkapaninokara hinitanãtano nota. Kona hãuikari Teoso posotiireë nikaminiri iua posotiiretxi.

²⁷ Xesosi pinitana:

—Nipokorinoka ! hĩxinikape, kotxi nipokori okanani mauakati itxaua. Hĩxinikariko ãtião nipokori, nota hĩtari iaxitiki siãkiti, kotxi nota sikari kãkiti, kãkiti auapininiika inini tĩkane. Teoso sikari ikinika iposotiire notamoni ninirekaãkiti nikamini ĩkapani —Xesosi txana ninoa.

²⁸ —Kiãtokopa atxatari Teoso nireẽkiti akamini? —itxana ninoa.

²⁹ —Ianoka Teoso nirekari hĩkamini. Iua nirekari hãuikiniri iua iokanatakiti sãkire —Xesosi txana ninoa.

³⁰ —Iuaĩkana posotiiretxi apiari pikaminiã, ininiãra aãuikari Teoso iokanatakiti pininiãua. Kinakaripa posotiiretxi pikamapanika?

³¹ Anirimaneni kitxakapirĩkarini ãparaã makipakaniãtaã auakasaakina, inikarina komiri iaxiti katxakakari. Teoso sãkire iõkatsopatakori txari:

Isikari komiri Teoso tixinekiri ninoamoni,

—itxarina Xesosi.

³² Ininiã Xesosi:

—Atão nisãpiretaiko hĩte. Kona Moisesini sikari komiri Teoso tixinekiri. Nirikara sikaãtari atão komiri iua tixinekiri kãkitimoni. ³³ Teoso tixine ĩkari, iua ãkiri, komiri atoko itxa, ikini itixiti auakani ĩkapani, kotxi iua sãkire auiãkani auapininiika Teosokata —itxana.

³⁴ —Ikiniõtika pisikaua ia komiri —itxarina.

³⁵ —Notakara iua komiri Teoso iokanatakiti nitxaua. Notakara sikari kãkiti auini ĩkapani. Iua nisãkire auiãkari !inatxitaika. !Iposonataika.

³⁶ —Hĩte aõkitapekano nota, txamari kona hĩte auikapanikari nisãkire. Ikara atoko nitxapekai hĩte. ³⁷ Imakinika kãkiti notamoni Teoso siãkini inapitikako notamoni. “Hĩsipeka,” kona nitxana notamoni apoãkani. ³⁸ Nitakanapari Teoso tixine. ĩkorapokoriti napoka, nipaniãtakiri nirekaãkitinoka nikamini ĩkapani. Notaka nirekaãkiti na nikama. ³⁹ Niri nipaniãtakiri !inirekari ãtika kãkiti notamoni isiãkini ereẽkokini. Itixi xipokini õtisaaki, inirekari nota õkitikinina ninoa auapininiika inini tĩkane. ⁴⁰ Iua nipaniãtakiri nirekari nota imarotakani, nisãkire auiãkani, auapininiika inini. Itixi xipokini õtisaaki nõkitikana ninoa iuaĩkana auãki inini —itxa Xesosi.

⁴¹ Ninoa Xoteoakori kona apokaerekatari Xesosi sãkire, kotxi iua txari: “Nota iua komiri Teoso tixine ĩkari komiriti nitxaua,” ininiã ninoa tsoata.

⁴² Ininiã ninoa:

—Iua kiki Xesosi Xosee ãkiri. Aaõkitapekari iri, inoro pakini. Kinirepa “Teoso tixine ĩkarirano” itxape iua? —itxana, itsoatinina.

⁴³ Ininiã Xesosi txana:

—Kona himaxirauatape. Kona hĩtsoatape. ⁴⁴ Niri nipaniãtakiri akiritakiti-nanira posotari inini notamoni. Niri makiritakiniti kona posota inini notamoni. Itixi xipokini õtisaaki nõkitikana notamoni apoãkani iuaĩkana auinina ĩkapani. ⁴⁵ Kitxakapirĩka Teoso sãkire sãpiretakani iõkatsopatari ia Teoso sãkire: Teosorako oerekariko ikinipoko kãkiti.

Niri sãkire kĩpitakani, niri oereẽkini, apoka notamoni. ⁴⁶ Kona aua kãkiti niri atamatakari. Nota Teoso tixine ĩkari, notanokara atamatapekari niri.

⁴⁷ —Nota sãkire auiãkari, iuara auapininiika Teosokata. Ia nisãkire atão.

⁴⁸ Nota iua komiri nitxaua kãkiti auapininiika inĩkitakakarino. ⁴⁹ Hinirimane kitxakapirĩkarini nikari komiri iaxiti katxaãkari ãparaã makipakaniãtaã. Iaxiti katxaãkari inikanimana, txanima ipĩpena. ⁵⁰ Kãkiti nikiniãri atão komiri Teoso tixine ĩkari kona ipina. ⁵¹ Iua komiri, Teoso tixine ĩkari nitxaua nota. Kãkiti auapininiika inĩkitakakarino nota. Ia komiri niãkari auapininiika itxako. Ia komiri nisikakiti ia niĩtokara. Niĩto nisika kãkiti ikini itixiti auakani auapininiika inini tĩkane —itxa Xesosi.

⁵² Ikara atoko ininiã ninoa Xoteoakori taparakienatakakaua:

—Natokopa itxa ia kiki iito isikiniua ate, anikiniri ikapani? —itxana.

⁵³ Ininiã Xesosi:

—Atãoenepitikara ikara atoko nitxai hite. Hītari iaxitikiri iito himanikakanisaaki, iarēka himiātakanisaaki, kona hīxinire auapani ātipirika.

⁵⁴ Iua niito niākari, niarēka iātakari, auapikako Teosokata. Xipokatxi ōtisaaki nōkitikariko iua iuaikana auini ikapani. ⁵⁵ Niito atão komiri itxaua. Niarēka atão iariã itxaua. ⁵⁶ Niito niākari, niarēka iātakari, aua nākixinireē. Nota aua iua ākixinireē. ⁵⁷ Niri, ātipirika auapika inakari, iokanatano nota ikorapokoriti. Iuara sikano nota ātipirika nauini ikapani. Iua atokotxikana nota sikari nota niākari ātipirika auini ikapani. ⁵⁸ Nota iua komiri Teoso tixine ikari nitxaua. Komiri hikiomaneakorini nikakiti ātião. Iua komiri nikakari ipipe. Nota siãkiti komiriti niākani, nisãkire auiãkani auapininiika Teosokata itxanako.

⁵⁹ Ikara atoko itxa Xesosi sãkire aiko āki Xoteo apotiitiniãtaãua Kapanaoõ sitatxiti oerekarauatakasaaki.

Apanakini Takanapiniri Xesosi

⁶⁰ Xesosikata sikani isãkire potxitakani, ikara isãkire ikenakotakasaakina, ipimarauatakakana:

—Pamimari ikara isãkire. Kipa imarotari ikara atoko inakari sãkiretxiti? —itxana.

⁶¹ Masãpiretakotika Xesosi imarotari ikara atoko itsoatinina. Ininiã iua:

—Hinirekatari hītakanapinino nota ia nisãkire xika? ⁶² Kiãtokopa hīxinikakiti hītikiniãno nota hītari iaxitikirino kanikini mitxi nauiniãtaã? Atxiiti iusaaki hãuikatarisãkire? ⁶³ Iua Erekaris Matamatakotinokara sikari kãkiti auini tīkane. Kãkiti iito tapara ! auari. Ikara sãkiretxi hītemoni nisãpiretakiti, iua Erekaris Matamatakoti sãkiretxikana. Nisãkire auikiko auãkitakari kãkiti, ātipirika Teosokata auini ikapani. ⁶⁴ Txamari auapitika hite sauaki nisãkire mauiãkani —itxa Xesosi.

Merepitipanika Xesosi imarotapekari iua sãkire mauiãkani tīkane. Xesosi imarotari apaka imikapiritakiri tīkane.

⁶⁵ —Niri Teoso masakaposotiiretakiniti kona iposota apokini notamoni —itxa Xesosi.

⁶⁶ Ikara isãkire xika itori Xesosikata sikani takanapari iua. Kona inirekaikarina iuakata isinina. ⁶⁷ Ininiã Xesosi pimaãna imoianariakori tosi:

—Hītepekana, hite apaka nirekatari hītakanapinino? —itxa Xesosi.

⁶⁸ Ininiã Simão Petro apakapapiretari:

—Apiananiri, kirimonipa asa atxiiti? Pitenanira sãpiretari kãkiti auapininiika inini. ⁶⁹ Ate imarotari Teoso merekiti pininiua. Teoso ãkiri, auapika inakari ãkiri pitxaua pite —Petro txari Xesosi.

⁷⁰ Ininiã Xesosi:

—Nota mereēi hite tosi kikiakori. Txamari hite sauaki aua Satanas nitiri —itxa Xesosi.

⁷¹ Iusaaki Xesosi xinikari Xotasi Isikariotxi inakori, Simão inakori ãkiri. Xesosi moianarikamara iua, txamari imikapiritariko Xesosi.

7

Xesosi Itariakori Mauikakaniri Isãkire

¹ Eereka Xesosi kaikotapanika Karirēia tōpa. Kona Xotēia tōpa !ikaikota iusaaki, kotxi iuaã Xoteo auiteakori nirekari okiniri. ² Iusaaki Xoteo kiinirite Papiri inakori kaiama atokopekari. ³ Ininiã Xesosi itariakori misãkiretari iua:

—Posipika uai. Pisãkire auiãkanimoni Xotēia auakanimoni pisa. Nino apaka nirekari itikiniri pikamakiti. ⁴ Kãkiti nirekiniãri iteene imarotaãka,

! ikipatari ikamakiti. Pite kamanãtari posotiiiretxi uai Kariréia tōpa. Pisa Xotéiamoni. Iuaã poerekari piposotiiire ikinimane imarotini ikapani —itxana.

⁵ Ikara atoko itxarina Xesosi, kotxi itariakori apaka iuasaaki kona auikaparikari isãkire.

⁶ Ininiã Xesosi apakapapiretana:

—Iuaã nisini keto kona apokapanika. Apakata ikiniõtika Xotéia tōpamoni hñte sini, ⁷ kotxi kãkiti ! omanatai hñte. Notananira omanataãka, kotxi nisãpiretari maerekati kãkiti kamakiti. ⁸ Erekari hñte sini kiinirimoni. Kona nota sapani uatxa. Nisini manapi apokasaaki nisa —itxa Xesosi.

⁹ Itariakorimoni ikara inaka atoko, ikaikotapanika Kariréia tōpa.

Xesosi Sari Papiri Kiiniritimoni

¹⁰ Itariakori kiinirimoni ãkika. Ninoa tikinimoni isa Xesosi. Iuasaaki ! kasãpirenari kiinirimoni isini tãkane. Ininiã kãkiti mimarotakinitika isa.

¹¹ Xoteo auñteakori nitapiimari Xesosi kiinirisaaki. Ipimaãri kãkiti:

—Itapari Xesosi?

¹² Kãkiti iuaã auakani sãkirauata Xesosi pirena. Apanakini txari:

—Peerekari Xesosi.

Apanakinipekana:

—Kona erekari. Imisirienetari kãkiti —itxana.

¹³ Kona kãkiti sãkirauata Xesosi uãka Xoteo auñteakori takote, kotxi ipãkana.

¹⁴ Mapaõtinoka kiiniri xipokini apisapanika, Xesosi sari Xotéia tōpamoni. Isari Teoso misãkiretiko aikotimoni. Iuaã oerekarauata. ¹⁵ Xoteoakori tsoriãkaãnãta Xesosi sãkire ikenakotakasaakina:

—Kininiãpa ere kiki paimatireri. Kona apaiaõkarauata —itxanãtana.

¹⁶ Ininiã Xesosi apakapapiretana:

—Na nota imaroreni noerekai hñte. Iua niokanatakiri imarorera noerekai hñte. ¹⁷ Kãkiti Teoso nirekaãkiti nirekaãkani imarotari noerekiniri Teoso imarorenoka. Ninoa imarotari nimoerekakaniri notaka nimarore.

¹⁸ Kãkiti iuaka isãkire sãpiretakari nirekari apanakini iuikiniri iua. Kãkiti Teoso sãkirenoka sãpiretakari nirekari iuikiniri Teoso ipaniãtakiri. Ikara atoko inakari kãkiti sãkire atãonoka. !Ikamari maerekati. ¹⁹ Moisesini oerekai hñte Teoso sãkire, ipaniãtakiti iõkatsopatakori. Txamari kona hñte kamari Teoso paniãtakiti. Kona ãtika hñte kamari ipaniãtakiti, kotxi hinirekari hõkinino nota —itxana ninoa.

²⁰ Ininiã ninoa apakapapiretari:

—Maerekati matamatakoti auaitotai pite. Kiripa kinirão okaka txai pite? Iua maerekati matamatakoti xika ikara atoko pitxa pisãkire —itxarina.

²¹ Ininiã Xesosi:

—Nota kamari posotiiiretxi tomatikoõtxitisaaki, iua kiki matãpokotakati ni-makananitakasaaki, ininiãkara hñte tsoriãkaãta. Hñuãkatari niparãkauatini.

²² Txamari hñte apaka parãkauata tomatiko õtisaaki, kotxi hñkamari Teoso takaõtxikare hamarite ãtoã tomatiko õtisaaki. Moisesini paniãtai Teoso takaõtxikare hñkamini hamarite ãtoã oito õti iua auakasaaki. Ari hinirimane kitxakapirãkarini, Moisesini apisapanika, oerekapekari ikara atoko inakari hñkamini. ²³ Ininiã hñte kamari Moisesi paniãtakiti tomatikoõtxitisaaki. Ikara atoko ininiã, kinirepa hñte omanatano nota, iua kiki erekapeka nitxãkitakini xika tomatikoõtxitisaaki? ²⁴ Iteene pimimarotakanisaakiri ãti kamakiti, kona pakiritapiri: “Iua kamari maerekati,” kona pitxape. !Papoñtapiri ãti. Atão inakarinnoka pinita, atão pimarotini ikapani —itxa Xesosi.

Xesosikani Teoso Mereẽkiti Txataua?

²⁵ Apanakini kãkiti Xerosareẽ auakani txanãtari:

—Ere kikikani ninoa kinirão okaenetakitikani? ²⁶ Hãtamatari. Iua sãkirauanãta kãkiti apisatoõ. Kona kapãkareri iua. Auñtetxiakori !kasãkirena.

Atauako aãũteakori auikatarisãkire atxiĩti? Atxiĩti auikatarina Xesosi Teoso mereẽkiti aiãtapanãtakiti ininiãua? ²⁷ Atão Teoso mereẽkiti aiãtapanãtakiti apokasaaki, kona kimarotikori iua ininimoni. Ate amakinika imarotapitikari iua Xesosi ininimoni. Kariréiakiri iua, ininiã Xesosi Teoso mereẽkiti aiãtapakiti itxaua —itxanãtana.

²⁸ Teoso misãkiretiko aikotiã Xesosi oerekarauanãtakasaaki, ita-parasãkireritika ipimaãna kãkiti iuaã auakani:

—Atauako hĩte imarotatano nota? Atauako himarotatari nota ininimoni? Kona notaka iokanataua kãkitimoni. Niokanataãka. Nota paniãtakari atãonoka isãkire. Kona hĩte imarotari iua. ²⁹ Nota imarotari iua, kotxi iua auiniãtaãkirikarano nota. Iuara iokanatanõ kãkitimoni —itxa Xesosi.

³⁰ Iuasaaki auĩtetxiakori nirekamari imaĩkinirina. Kona kamaĩkikori, kotxi imaĩkiko manapi kona apokapanika. ³¹ Ninoa auĩtetxiakori kona auikari Xesosi sãkire, iuaritika itomaneri kãkiti auikari Xesosi Teoso mereẽkiti kãkiti iãtapakiti ininiua.

—Iua kiki inipitikara Teoso mereẽkiti aiãtapakiti itxaua, kotxi ãti posotiretxi apiari kamakari !auari —itxanãtana.

Sotatoakori Iokanatiko Xesosimoni

³² Pariseoakori kenakotakasaakiri kãkiti sãkire ikara atoko inakari, ninoa, sasetotxi auĩteakori pakini iokanatarisotatoakori Xesosi imaĩkinina ĩkapani.

³³ Sotatoakori apokasaaki iuamoni, Xesosi txari kãkiti iuaãtaã:

—Mapaõtinoka hĩtekata nauako. Eereka nisa nipaniãtakirimoni.

³⁴ Hinitapiikamano, !hãpokapanino. Nisinimoni kona hĩte posotari hĩsini —itxa Xesosi.

³⁵ Auĩtetxiakori ninoakakarika isãkirauatana:

—Amonipa isa atxiĩti, ate mapokakaniãri iua? Atauako õtakoxiti isatako Xoteoakori iarikakanimoni, ãti uãka sauaki Xoteoakorimoni? Atauako oerekatarisoteo minakaniua? ³⁶ Kotxi iua sãkire: “Hinitanoko. !Hãpokano nota. Kona hĩte posotari nota sinimoni hĩsini,” itxa sãkireta. Ate !imarotari isãkire —itxanãtakakana.

Ãparaã Kãkiti Auãkitaãkari

³⁷ Kiiniri mapotõkire õti apiapoxokonita. Iua õti Xesosi tima kãkiti sauaki. Itaparasãkireritika isãpirenauata ĩkinimane kenakotiniri ĩkapani:

—Piposonatakasaaki, notamoni pinako piãtini ĩkapani. ³⁸ Teoso sãkire iõkatsopatakori txari:

Nota sãkire auĩãkari ãkixinireẽ aua amomo atoko inakari. Iua ãparaã txĩkitakari kãkiti auãki inini.

—itxa Xesosi.

³⁹ Iua Erekari Matamatakoti amomo atoko itxa. Xesosi sãkire auĩãkari apakapariko iua Erekari Matamatakoti. Iuasaaki Xesosi sãkirauatakasaaki, iua Erekari Matamatakoti kona siãkapanika kãkitimoni, kotxi Xesosi kona kanapiriãpanika Teoso tixinemoni.

⁴⁰ Ikara Xesosi sãkire ikenakotakasaaki itori kãkiti txari:

—Atãopitikara ikira kiki Teoso sãkire sãpiretakari aiãtapakiti itxaua.

⁴¹ Apanakini txari:

—Iua Teoso mereẽkiti aiãtapakiti itxaua.

Apanakinipekana:

—Teoso mereẽkiti aiãtapakiti, Kariréiakiri ! itxaua. ⁴² Teoso sãkire iõkatsopatakori sãpiretari Teoso mereẽkiti aiãtapakiti, Taviini apika mekaniri itxaua. Iua iponaniãko Pereẽ sitatxiti Taviini auiniãtaã —itxana.

Ikara atoko itxanãtana, kotxi kona imarotarina Xesosi iponaniiniãtaã Pereẽ sitatxiti.

⁴³ Iuasaaki apanakini auikari Xesosi sãkire. Apanakinipekana !auikari Xesosi sãkire. ⁴⁴ Apanakini nirekamari imaïkiniri Xesosi iuasaaki, iuaritika iua maïkakari !auari.

Sotatoakori Kanapiriã Xoteo Auïteakorimoni

⁴⁵ Ininiã sotatoakori kanapiriã sasetotxi auïteakorimoni, pariseoakori pakinimoni. Ininiã ipimaãna:

—Kinirepa kona himinari Xesosi uaimoni?

⁴⁶ —Apia imatiresãkireta iua. !Auari kãkiti iua atoko ina sãkiretakari, ininiãkara !apakata amaïkiniri iua —itxana sotatoakori.

⁴⁷ Ininiã pariseoakori omanãkarauata.

—Atauako iua misirienetai hïte apaka? Iua txïkitakai hïte isãkire hãuikini.

⁴⁸ !Auari auïtetxi iua sãkire auïãkari. !Auari pariseo iua sãkire auïãkari.

⁴⁹ Kãkiti miïkitetinaira auikari Xesosi sãkire. Xesosi sãkire auïãkari kona imarotari Moisesini paniãtakiti. Ininiãkara Teoso misiritanako ninoa —itxa pariseoakori sãkire.

⁵⁰ Iuasaaki Nikotemo inakori iuaãtaã aua. Pariseo itxaua. Iua ôti apisapanika iuara sari Xesosimoni ïkanõka imisãkiretiniri ïkapani. Ninoa ikara atoko isãkirauatakasaaki, Nikotemo misãkiretana ninoa:

⁵¹ —Kãkiti kamakiti isãpiretini apisapanika, “maerekati ikamakiti,” kona hïtxape. Ikara atoko itxa Moisesini oerekasaakia ate —itxana.

⁵² Ininiã ninoa pariseoakori:

—Atxiïti pite Kariréiakirikai apaka, Xesosi atoko? Iteene patatsopatariko Teoso sãkire iõkatsopatakori. Iua iteene patatsopatakasaaki, iuasaakiikarako pimarotariko !auari Teoso sãkire sãpiretakari, Kariréia tõpakiri —itxarina iua.

⁵³ Eereka ikinimane sari aapokomonina.

8

Sito Ôtaniri Minakotikatika Sirïkakarõ

¹ Iuasaaki Xesosi sari Orivanape Xiratamoni. Oriva txipokori.

² Katimatinïkata ikanapiriã Teoso misãkiretiko aïkotimoni. Iuasaaki ikinipoko kãkiti apotiitaua iuamoni. Ininiã Xesosi topãka, Teoso sãkire isãpiretini ïkapani. ³ Iuasaaki kaiõkatsopareriakori, pariseoakori pakini minaro sito iuamoni. Ninoa apokaro oa sito ôtaniri minakotikatika osirïkini. Itakarona oa ikinimane apisatoõ.

⁴ —Koerekareri, aãpokaro oia sito ôtaniri minakotikatika osirïkini.

⁵ Moisesini sãkire iõkatsopatakori paniãtaua ikara atoko inakaro kai soroã oõkaãka. Pitepekana, kiãtokopa atxataro oa? —itxana Xesosimoni.

⁶ Ikara atoko ipimaãrina Xesosi, kotxi inirekarina Xesosi kerokiniri isãkire. Inirekarina Moisesini paniãtakiti iaõka imakamakaniã, ininiã maerekati ikamapeka. Txamari !kasãkireri Xesosi. Iokirita, iõkata itxari kipatxi iuakokiã. Imakenakotakiniti atoko itxa. ⁷ Ipimarauatapanikana, ininiã Xesosi õkaõkitaua.

—Maerekati makamakaturako ïkiika kiporonakiniro aroa kai soroã —itxa Xesosi.

⁸ Eereka Xesosi iuaïkana iokirita, iõkata itxari kipatxi. ⁹ Ninoa ikaraene ikenakotakasaakina, iua apiata kiomãtxi inakariua sipeka. Eereka iua tikini auakari apaka sipeka. Ikara atoko itxaãpotana ikinikana isinina. Eereka Xesosinoka kaikota oa sitokata. ¹⁰ Xesosi õkaõkitaua, atamata itxaro oa sito. Oanõka kaikota iuaã.

—Ïtapari pimaerekani sãpiretakani? —itxaro.

¹¹ —Apiananiri, isipekana nimaerekani sãpiretakani —otxari.

—Nota apaka kona sãpiretari pimaerekani. Pisipeka. Maerekati kona pikamapinikako —itxaro.

Kãkiti Xinire Iopiniãkari

¹² Eereka Xesosi iuaĩkana oerekari kãkiti.

—Nota ikini itixiti auakani tirikapite atoko nitxaua, kotxi noerekari Teoso sãkire notakata sikani. Teoso mimarotakani ipiaã sikani itxauana. Notakata sikanipekana !itĩpokota ipiaã. Nota sikana ninoã ãtipirika auinina ĩkapani — itxa Xesosi.

¹³ Ininiã pariseoakori misãkiretari Xesosi:

—Kona ate auikapiretari pisãkire, kotxi pitenani sãpiretari pisãkire. Ikara atoko ininiã, kona aimarotari atãoene inini pisãkire. Āti sãpiretiniãri pite sãkire iaõka, aãuikari atxiĩti —itxarina Xesosi.

¹⁴ Ininiã Xesosi:

—Nota sãkirekara ikara atoko nitxai hĩte, iuaritika atãoenekara ikara atoko nitxai hĩte, kotxi nota imarotari nininimoni, nimarotari nisinimoni. Kona hĩte imarotari nota ininimoni. Kona hĩte imarotari nota sinimoni. ¹⁵ Kãkiti hĩtxaua, ininiã hãpoĩrauata, kotxi !himarotari atão. Kona nota txari kãkitimoni: “Pite, peerekai pite. Pitepekana, !erekai pite.” !Ikara atoko !nitxari kãkiti. ¹⁶ Iuaritika nisãpiretakasaakiri kãkiti kamakiti, atãonoka nitxa nisãkire, kotxi kona notananini sãpirenauata. Niri niokanatakiri sãpiretakitixikana nisãpireta. ¹⁷ Kitxakapirĩka hĩteka kiomaneakorini sãkire iõkatsopatakori txari:

Kãkiti itikakitixikana ãti itikakiti. Ninoã ipi sãkire ãtinoka auiniã, ininiã ninoã sãkire atãonoka itxa, itxa hĩkiomane sãkire. ¹⁸ Nota sãpiretari nota pirena. Niri niokanatakiri apaka sãpiretari nota pirena nisãkiretxikana, ininiã ipi auape —itxa.

¹⁹ —Naniparari piri? —itxarina.

—Kona himarotano nota. Niri apaka kona himarota. Nota himarotaãkamako, niri apaka himarotamako.

²⁰ Ikara atoko Xesosi sãkirauata. Txineiro Teoso ĩkapani sikikoãtaã takote Xesosi oerekarauata Teoso misãkiretiko aikotiã. Xesosi ikara atoko isãpirenauata, iuaritika kona kamaĩkikori, kotxi imaĩkiko manapi kona apokapanika.

Xesosi Sinimoni Kãkiti Masikani

²¹ Iuaĩkana Xesosi misãkiretari kãkiti:

—Nisipiriko. Eereka hinitapiimano. Nota sinimoni !hãuiritaãka hĩsini. Hĩpinakasaaki, himaerekanikatika hĩpinako —itxa Xesosi.

²² Xoteo auĩteakori napetari:

—Atauako iuaka okatauako? Kotxi iua txari: “Nota sinimoni kona hãuiritaãka hĩsini” —itxana ninoã.

²³ Iuaĩkana Xesosi sãkirauata ninoamoni:

—Īkoraxitikinirai hĩte. Nota itanokiri. Hĩte ĩkora itixikinirai hĩte. ! Īkoraxitikirino nota. ²⁴ Ikara atoko ininiãkara, nota txai hĩte: “Hĩpinakasaaki himaerekanikatika hĩpinako,” nitxai. Himauiakanisaakiri nisãkire nota pirena, hĩpinakasaaki himaerekanikatika hĩpinako. Kona Teoso makatxakinii himaerekani —Xesosi txana ninoã.

²⁵ —Kiriparai pite? —itxarina Xesosi.

—Merepitipanika nisãpiretakitikara iuakarano nota. ²⁶ Nisãpiretakiti tĩkane hĩte maerekani nisãpiretini tĩkane kaiãopokori. Nota iokanatakari atãoenekara isãkire. Iua sãpiretakitinokara nisãpiretari kãkiti itixi auakani —itxa Xesosi.

²⁷ Ninoã !imarotari Xesosi iokanatakari aĩri Teoso. ²⁸ Ininiã Xesosi txana:

—Nota hĩtari iaxitikiri hõkasaaki, niĩto itano hõkitikasaaki, iusaakiikarako himarotano kinakaripa nota. Iusaaki himarotariko notaka sãkire !

nisãpireta. Niri oereëkitinokara nisãpireta. ²⁹ Iua niokanatakiri notakata aua. Niri !itakanapano nota, kotxi inireëkitinoka nikama —itxa Xesosi sãkire.

³⁰ Xesosi ikara atoko ina sãkiretakasaaki, itomaneri kãkiti auikari isãkire.

Õpoïkakoni Pirena

³¹ Ininiã Xesosi sãkirauata Xoteoakorimoni iua sãkire auiãkanimoni.

—Nisãkire iaõka hĩkamakasaaki, atão nimoianariakori hĩtxauako. ³² Atão nimoianariakori hinakasaakiua, himarotari atãonoka inakari. Atãonoka inakari himarotakasaaki, õpoïkakoni atoko hĩtxaua.

³³ Ninoa apakapapireta:

—Apraõoni apika mekanirireua ate, ininiã anirekinimoni asa. Nitiritxi iamotakoni !atxaua. Kinirepa õpoïkakoni atoko pitxĩkitakaua? —itxana.

³⁴ Ininiã Xesosi:

—Atãonoka nitxai hĩte. Maerekanitxi nitiri atoko itxa kãkiti maerekati kamakari. ³⁵ Nitiritxi iamotakori ãtipirika !auari ipatrãote aapoko. Patrão ãkiri auapika ãtipirika iri aapoko. ³⁶ Nota Teoso ãkiri txĩkitakasaakiri kãkiti õpoïkakori atoko ininiua, maerekanitxi nitiri !itxaikauako. Iuasaaki iposotari erekari ikamini.

Apraõoni Apika Mekaniriakori

³⁷ —Nimarotari Apraõoni apika mekaniriakori hininiua, txamari hinirekari hõkinino. Nisãkire himauiãkani xika hinirekari hõkinino. ³⁸ Nota sãpiretai hĩte nota iri oerekakiti. Hĩte kamari hĩte iri paniãtakiti —itxa Xesosi.

³⁹ —Apraõoni ate iri —itxana ninoa.

Ininiã Xesosi:

—Apraõoni apika mekaniriakori hininiãua, Apraõoni kamakiti atoko hĩkamamako. ⁴⁰ Atãonoka nisãpiretai hĩte. Teoso sãpiretakitinokara nisãpiretai, iuaritika hinirekari hõkinino. Apraõoni !ikamari ikara atoko inakari. ⁴¹ Hĩte kamari hĩte iri kamakiti atoko inakari —itxa Xesosi.

—Teosonanira ate iri. Ate atãopitika iua anaakori atxaua —itxana.

⁴² —Teoso atão hĩri ininiãua, nota hĩtiretamako, kotxi Teoso auiniãtaã nota ina uaimoni. Kona notaka iokanataua. Teosora iokanatano nota uaimoni. ⁴³ Kininiãpa !hiĩkitetataru ikara atoko nininii? !Himarotari nisãkire, kotxi kona xatiki hinirekari nisãkire iaõka hĩkamini. ⁴⁴ Satanasira hĩri. Hĩte nirekari maerekati, Satanasu nireëkiti iaõka hĩkamini. Kitxakapirĩka itixi kamiko atokopanika kokaniri itxaua Satanasu. Iua !inirekari atãoene isãpiretini. ! Iposotari atãoene isãpiretini. Aãpirenanokara iua imarota, kotxi aãpirenaãri itxaua iua. Aãpirenaãri iri itxaua iua Satanasu. ⁴⁵ Nisãkire atão, ininiãkara hĩte !auikari nisãkire. ⁴⁶ Hĩte ãtika itikatari maerekati nikamini? ãtika !itikari maerekati nikamini, kotxi kona maerekati kona nikama. Ininiã kinirepa kona hĩte auikari nisãkire? ⁴⁷ Teoso anaakori kĩpitari iua sãkire. Hĩte kona kĩpitari iua sãkire, kotxi iua anaakori !hĩtxaua hĩte —Xesosi txana ninoa.

Xesosi Apraõo Apisapanika Auini

⁴⁸ Ininiã Xoteoakori txari Xesosi:

—Ate sãkire atão. Samariakiri pitxaua pite. Maerekati Matamatakoti auaĩtotai pite —itxana.

Ninoa akiriuãkatari Xesosi “Samariakiri,” kotxi Xoteoakori omanatana Samariakini. ⁴⁹ Ininiã Xesosi:

—Maerekati Matamatakoti kona auaĩtotano nota. Nota paxitari niri, txamari hĩte kona paxitano nota. ⁵⁰ Kona notani nitari kãkiti nota iuikakani tĩkane. Nirira nirekari kãkiti iuikinino nota. Nirira imarotari nisãkire atãonoka inini.

⁵¹ Nota sãkire iaõka kamakari !ipina. Ikara atãoene.

⁵² Xoteoakori apakapapiretari:

—Uatxa aimarotari maerekati matamatakoti auaĩtotai pite, kotxi Apraõoni ipĩpe. Teoso sãkire sãpiretakanini apaka ipĩpe. Kinirepa pite sãkire: “Nota sãkire iaõka kamakari !ipina,” pitxa? ⁵³ Aĩrini Apraõoni ipĩpe. Pite apiata atxiĩti? Teoso sãkire sãpiretakanini apaka ipĩpe. Kiriparai pite? —itxarina Xesosi.

⁵⁴ Ininiã Xesosi:

—Notaka niuikiniua !apakata. Nirira iuikano nota. Hĩte sãkire: “Ateosone iua,” txamari nota irira iua. ⁵⁵ Kona himarotari Teoso. Notananira imarotari Teoso. Nota “kona Teoso nimarota,” nininiã, hĩte atokokamarako nitxamako. Aãpirenaãri nitxamauako. Nota imarotapitikari iua. Nota kĩpitari isãkire. ⁵⁶ Hĩri Apraõo poxokoniuaata, nota uai apokini ikenakoenetakasaaki. Iua itikari nota uai apokini, ininiã iua poxokoniuaata.

⁵⁷ Ininiã ninoa Xoteoakori: —Pite sĩkoẽta anokanani !apokapanika, iuari-tika paõkitatari Apraõo? Paxirari pisãkire —itxarina.

⁵⁸ —Apraõo apisapanikara nota aua. Ikara atãoene nitxai hĩte —itxa Xesosi.

⁵⁹ Ikara isãkire ikenakotakasaakina, ikosekarina kai soro Xesosi ikiporon-akinina ĩkapani, okinina ĩkapani. Xesosi kipataua. Osipikari Teoso misãkiretiko aikoti. Inapaãpota ninoa sauaki.

9

Mõsiãreti Xesosi Erekepeka Inĩkitakini

¹ Xesosi tĩpokotakasaaki, itikari mõsiãreti. Iua ponaniãkasaaki, mõsiãreti itxapekaua. ² Xesosi moianariakori pimaãri iua:

—Koerekareri, kiripa kamari maerekati iua mõsiãreti inini? Iuakani? Irikani? Inorokani?

³ Ininiã Xesosi:

—Kona iua maerekani xikani mõsiãreti itxaua. Kona iri maerekani xikani, kona inoro maerekani xikani mõsiãreti itxaua. Kona maerekanitxi xikani mõsiãreti itxaua. Iua mõsiãreti Teoso posotiire kãkiti imarotini ĩkapanira.

⁴ Kãkiti parĩkauata pokamara. Mapiãpeka inakasaaki, kona kãkiti posotaikari iparĩkauatini. Iua atokokana akamariko niokanatakiri paniãtakiti aãuapanika anakasaaki. Apinaka atoko kona akamaikari Teoso paniãtakiti ĩkorapokoriti.

⁵ ĩkorapokoriti nauakasaaki, niopinikana ikinimane ãkixinire Teoso imarotina ĩkapani —itxa Xesosi.

⁶ Ikara inaãka atoko ienemaã ixiti oakaka Xesosi. Ikamari ãkape, minapa itxari mõsiãreti oki nopini. ⁷ Iokanatarari:

—Parokari poki Siroee poamoni —itxari mõsiãreti.

Iuaã auari ipoa xapitikiri kãkiti kamakiti. Iua ipoa uãka “Siroee.” Iua uãkatxikana “Iokanatakori” itxaua. Iua sari Siroeemoni. Arokatoõtaua. Iuasaakipeka kõsiãrepeka itxa.

⁸ Aapoko takote auakani, kãkiti mitxi mõsiãreti itikakani pakini, ninoa misãkiretakakaua:

—Ikira kiki mitxi iitopãkanãtapika inakarikani, kãkiti txineirote amanaãnãtapika inakarikani, ikira kiki? —itxana.

⁹ Apanakini apakapapiretari:

—Ari, iuapitikara.

Apanakinipekana apakapapiretari:

—Kona. Kona iuani. ãti kiki iua mõsiãreti atoko inakarira.

Iua mitxi mõsiãreti apakapapiretari:

—Ari, iuapitikanano nota —itxa.

¹⁰ Ininiã ninoa:

—Kiãtokopa pitxa uatxa kõsiãrepeka pitxapeka? —itxarina.

11 —Iua Xesosi inakori kamari ãkape, nokiã minapa itxari. Ipaniãtano: “Ãparaã Siroee inakorimoni pisa. Iuaã parokatoõtaua,” itxano nota. Ininiã nisa. Narokatoõtaua. Iuasaakipeka nota kõsiãrepekano —itxa.

12 —Namoniparari iua? —itxarina.

—A, meta —itxa iua mitxi mõiãreti.

Pariseoakori Mitxi Mõiãreti Inakarikata

13 Ninoa anikari iua mitxi mõiãreti pariseoakorimoni. 14 Iua õti Xesosi kamakasaakiri ãkape mõiãreti kõsiãrepeka inĩkitakini ĩkapani tomatiko õtisaaki iuasaaki. 15 Ninoa anikasaakiri iua mitxi mõiãreti inakari pariseoakorimoni, pariseoakori apaka pimaãri iua:

—Kininiãpa uatxa kõsiãrepeka pitxa? —itxana.

—Ãkapeẽra noki nopini iminapa. Eereka narokatoõtaua. Uatxa kõsiãrepeka nitxa —itxa.

16 Pariseoakori ãtikaka txari:

—Iua kiki, ãkape mõiãreti oki nopini minapakari, kona iua kamari Teoso paniãtakiti, kotxi iparĩkauata tomatiko õtisaaki. !Apakata ikamakiti.

Pariseoakori ãtikakapekana sãkirauata:

—Maerekati kamakari kona kamari ikara atoko inakari posotiiretxi, mõiãreti kõsiãrepeka inĩkitakini.

Ininiã pariseoakori taparakienatakakaua ikara xika. 17 Iuaĩkana pariseoakori misãkiretari iua kiki:

—Kiãtokopa inakaripa iua kiki pite makananitakari? —itxarina iua.

—Teoso sãkire sãpiretakari itxaua iua.

18 Xoteo auĩteakori kona auikari isãkire, mitxi mõiãreti eereka kõsiãrepeka inakari sãkire. Ininiã ninoa akiritari iri, inoro pakini.

19 —Hĩte sãkire hamarite auakasaaki mõiãreti itxapekaua. Hamaritekani ere? Kiãtokopa uatxa kõsiãrepeka itxa? —itxana.

20 —Ari, ate ãkiripitikara. Iponaniãkasaaki, mõiãretipeka itxaua. 21 Kona ate imarotari kiriãpareuako uatxa kõsiãrepeka itxa. Kona ate imarotari kiriuako kamari kõsiãrepeka inini. Hĩpimaãri iua, kotxi mitapekari iua. Iuaka apaka-papiretai hĩte —iri, inoro pakini txana ninoa.

22 Iri, inoro pakini ikara atoko itxana Xoteo auĩteakori ipĩkinina xika. Xoteo auĩteakori sãpiretpekari kãkiti: “Kãkiti Xesosi sãkire auiãkani, Teoso mereẽkiti ininiua auiãkani, kãkiti iãtapakiti ininiua auiãkani, kona auiritaãkaikana ĩroinina aiko Xoteo apotiitiniãtaãua.” 23 Ininiã pĩkaretxi xika iri, inoro pakini txari: “Hĩpimaãri iua. Mitapekari iua,” itxana ninoa.

24 Ininiã iuaĩkana pariseoakori akiritari iua kiki mitxi mõiãreti inakari.

—Atãonanira pisãpiretako Teoso apisatoõ. Ate imarotari maerekatinoka ikamini Xesosi, kotxi imakananirauata tomatiko õtisaaki —itxarina.

25 Ininiã iua:

—Kona nimarotari maerekati ikamini. Kona nimarotari erekari ikamini. Mitxipeka mõiãreti nitxaua. Uatxa kõsiãrepeka nitxaua. Ikaranoka nimarota —itxana ninoa.

26 —Kiãtokopa itxai kõsiãrepeka inĩkitakiniãi?

27 Iua mitxi mõiãreti inakari apakapapiretari:

—Nisãpiretpekai hĩte mixikanani, txamari !hãuikari nisãkire. Kinirepa hinirekatari iuaĩkana nisãpiretini? Atauako hĩte apaka nirekari iua sãkire hãuikini? —itxana.

28 Ininiã itxitarina:

—Pitera auikari iua sãkire. Ate auikari Moisesini sãkire. 29 Aimarotari Teoso misãkiretari Moisesini. Iua Xesosi kamari maerekati. !Aimarotari amonikiripa iua ina —itxana.

30 Iua kiki apakapapiretari:

—Anekani. Kona hīte imarotari amonikiriuaako iua ina. Iuara ka-maōsiāretano nota. ³¹ Teoso kona maākatari maerekati kamakari amanaākiti. Teoso teosonetakani amanaākiti imaākatapitika. Iua nirekaākiti kamakari amanaākiti imaākatapitika. ³² Mitxipeka mōsiāreti kōsiārepeka inīkitaākari kona auari. Itixi kamikosaakipanika !auari kōsiārepeka inīkitaākari. Uatxaikara auape. ³³ Xesosi Teoso iokanatakiti iminakanimauako, !ikamamariko posoti-iretxi —itxa iua.

³⁴ Ininiā pariseoakori:

—Pite maerekatipeka auakarikai. Ātipirika pite kamari maerekati. Maerekatinoa piikiteta. Iuaritika pinirekatari ate poerekini? Konapitini. Kona ate nirekari ikara pisākire. Pisipiniikaua. Kona uai pikanapiripinika. Ate kona nirekari pite uai kākiti apotiitiniātaāua aikoti pinini —ninoa txari iua.

Ininiā aiko porikiti iokanatarina.

Mitxi Mōsiāreti Inakari Auikiniri Xesosi Sākire

³⁵ Xesosi kenakopiretari iporikiti iokanatika mitxi mōsiāreti inakari, ininiā Xesosi nitari iua. Apokasaakiri, itxari:

—Atauako pauikatari Teoso ākiri sākire? —itxari.

³⁶ —Kipa iua? Nimarotiniāri, nauikapitikariko —itxa.

³⁷ —Pite aōkitapekari Teoso ākiri. Iuapitikara misākirenātai pite uatxa —itxa.

³⁸ —Apiananiri, nota auikari pite Teoso ākiri pininiua.

Ininiā iua kapotoreēkaua Xesosi apisatoō.

³⁹ —Īkorapokoriti napoka Teoso sākire auīākani ipinimoni nitakinina ĩkapani. Isākire mauīākani ipinimoni nitakinina ĩkapani napoka ĩkorapokoriti. Apanakini nisikaposotiiireta, Teoso sākire auikinina ĩkapani. Mitxi ninoa mōsiāreti atoko itxauana, kotxi mitxi ! imarotarina Teoso. Ninoa auikapiretakasaakiri Teoso sākire, kōsiāreri atoko itxapekauana. Apanakinipekana atāo minakati isākirena: “Nimarotapitikari Teoso.” Ninoa uākatari kōsiāreri atoko ininiuana. Txamari kona atāo ninoa nirekari imarotiniiri Teoso. !Nisikari posotiiiretxi ninoamoni, Teoso sākire auikinina ĩkapani. Kākiti iua atoko inakari mōsiāreti atoko itxaua —itxa Xesosi.

⁴⁰ Ātikaka pariseoakori Xesosi takote auakani kenakotari.

—Atauako atekani apaka mōsiāreti atoko atxaua? —itxana.

⁴¹ —“Mōsiāreni atoko atxaua,” hininiā hīsākire, ininiā atāo hīsākire. Txamari hīte txari: “Kōsiāreua ate,” hītxama. Iua atoko hininiā hīkamapitikari maerekati, kotxi kona hāuikari Teoso sākire —Xesosi txana ninoa.

10

Soti Auīte Pitikiri

¹ Xesosi sākirauatakasaaki, ia atoko itxa isāpirena:

—Atāopitikara ia atoko nitxapaniiko hīte. Soti auīte ĩroā pirikeri itoremoni. Itoremoni miīroākani kiītiriri itxauana, kotxi ātiātaā ikanīka ĩroini ĩkapani.

² Pirikeri toremoni ĩroākari soti auīte pitikiri. ³ Initiri osereēri pirikeri tore iua ĩkapani. Soti auīte kenakotari ipitikiri sākire. Ipitikiri imarotari ikinipoko ipiraakori uāka akiritinina ĩkapani. Iuara anikana inipokotinina ĩkapani.

⁴ Porikiti auakasaakina, iua saāpota ninoa apisa. Iua tikini isana ninoa. Ninoa imarotari iua sākire ene. ⁵ Ninoa kona sari kākiti imimarotakininitina tikini. Ipitikiri minakotika akiritakasaakina, imitekana. Kona imarotarina imapitikiritakininitina sākire.

⁶ Īkara sāpirenatxi atāo inakari oerekiko Xesosi sāpiretari pariseoakori. Txamari ninoa kona imarotari Xesosi ikara atoko inakari isāpirena.

Xesosi Soti Auīte Pitikiri Erekarī Itxaua

⁷ Xesosi iuaĩkana sãkirauata.

—Inipitikara nota pirikeri tore nitxaua, soti auĩte ĩroini ĩkapani. ⁸ Nota apisa apoãkani, atão minasãkiretakani kiĩtiririni itxauana. Soti auĩte kona maãkatari ninoa sãkire. ⁹ Nota itore nitxaua. Kãkiti ĩroiniãtaã tore nitxaua. Nota makatzakari uai ĩroãkari maerekani, auapininiika inini ĩkapani. ĩroã, ipokĩka itxapika. Kona kapĩkareri. Natxi !auari. ¹⁰ Kiĩtiriri apoka iĩtiriuatini ĩkapani, okaniuatini ĩkapani, imisirikarauatini ĩkapani. Notapekana apoka kãkiti auapininiika inini ĩkapani, kãkiti auini ereka inini ĩkapani.

¹¹ Pitikiritxi erekari nitxaua nota. Pitikiritxi erekari ipina ipiraakori mapinakani ĩkapani. ¹² Nitiritxi soti auĩteakori pitikiri !itxaua. Anãpa auĩte kaneenamari apokasaaki, iua miteka. Itakanapanako soti auĩteakori. Ininiã anãpa maĩkari soti auĩte, oxikepoata itxana. ¹³ Iua nitiritxi mitekako, kotxi txineiro ĩkapaninokara iparĩkauata. Kona atão itiretari soti auĩte.

¹⁴ —Soti auĩte pitikiri erekari nitxaua nota. Atão nimarotari nipiraakori. Ninoa apaka atão imarotano nota. ¹⁵ Iua atokokana niri imarotano nota. Nota apaka imarotari niri. Nota ipinako soti auĩteakori nota nakiti mapinakani ĩkapani. ¹⁶ Nota aua apanakini soti auĩteakori apaka. Uatxa ia pirikeri ãki !auapanikana. Niminanako ninoa apaka ia pirikeri ãki auinina ĩkapani. Ninoa auikariko nisãkire. Ininiã ninoa imakinika aua ãtika pirikeri ãki. ãtikarako ninoa pitikiri.

¹⁷ —Niri taretano, kotxi nauiritari nipinini, iuaĩkana nõkitikiniua ĩkapani. ¹⁸ Kãkiti !iposotari okinino nota nimanirekasaakiri nokiko. Nota sikariko niĩto nokiko ĩkapani. Ninirekasaaki manapi nipina. Ninirekasaaki manapi nõkitikaua. Ikara atoko niri paniãtano nota —itxa Xesosi.

¹⁹ Ikara Xesosi sãkire Xoteoakori kenakotakasaaki, itaparakien-atakakauana. Apanakini potxitari Xesosi sãkire. Apanakini kona potxitari.

²⁰ Apanakini txari:

—Satanasi nitiri auaĩtotari iua.

ãtipekana txari:

—Imapitxirita. Kinirepa hĩkenakotatari mapitxiritakari sãkire? —itxana ninoa.

²¹ Apanakini txari:

—Satanasi nitiri auaĩtotakiti !ikara atoko itxa sãkireta. Satanasi nitiri kona kõiãrepeka txĩkitakari mõiãreti —itxana.

Xoteoakori !Auikari Xesosi Sãkire

²² Mitaãsaaki Xoteoakori kamari kiiniri Xerosareẽ. Iuasaaki ixinikarina Teoso misãkiretiko aikoti merepaniko kamiko. ²³ Iuasaaki Xesosi tĩpokota aiko Teoso misãkiretikoãtaã, Saromãoni inakoriãtaã. ²⁴ Iuaã Xoteoakori apotiitaua iuamoni. Iuasaaki ninoa txari iua:

—Pite Teoso mereẽkiti pininiãua, pisãpiretaua. Akokaxiti anirekari aimarotiniri ikara —itxarina.

²⁵ Xesosi apakapapiretana:

—Nisãpiretapekai hĩte. Kona hãuikari nota sãkire. Niposotiire nikamakiti niri uãkaã oerekapekai hĩte. ²⁶ Nisãpiretapekai hĩte, txamari kona hãuikari nota sãkire, kotxi nisoti auĩtene kona hĩtxaua. ²⁷ Nisoti auĩtene imarotari nisãkire. Nota imarotana ninoa. Ninoa kapokitano nota. ²⁸ Nitxĩkitakana ninoa ãtipirika auinina. Nota kamari ninoa imipĩkanina tĩkane. Kona kamakatzakikona nota nĩkatakini. ²⁹ Niri sikana ninoa notamoni. Apiatakari itxaua iua. Ininiã ãti kona posotari imakatzakinina niri nĩkatakini. ³⁰ Niri, nota pakini ãtika atxaua.

³¹ Ikara atoko Xesosi inakasaaki, Xoteoakori morõkari kai soro ikiporon-akinirina ĩkapani. ³² Xesosi sãkirauata ninoamoni:

—Kaiãopokori erekari niri nakiti noerekapekai hïte. Kinakarixikapa hinireka hïkiporonakinino nota? —itxa Xesosi.

³³ Xoteoakori apakapapireta:

—Kona akiporonakai erekari pikaminiã. Akiporonakai, “Teosorano nota” pinini xikara. Pite kiki, iuaritika “Teosorano,” pitxa. Ininiã maerekati pikamapeka Teosomonikari.

³⁴ Xesosi apakapapiretana:

—Kitxakapirïka Teoso sãkire iõkatsopatakori txari:

Nitxai: “Teosoakori hïtxaua hïte.”

³⁵ Aimarotari Teoso sãkire iõkatsopatakori ãtipirika atão inini. Teoso akir-iuãkatana ninoa isãkire apakapakani “teosoakori.” ³⁶ Ininiã kinirepa hïte kamaãkaretxitano. Niri mereẽno nota inireẽkiti nikamini ïkapani. Iokanatano ïkorapokoritimoni. Ininiã kinirepa hãpoïtano Teoso nimisãkirepiretini, “Teoso ãkirirano” ninakasaaki? ³⁷ Nimakamakaniãri niri nirekaãkiti, iuasaaki kona hãuikari nota sãkire. ³⁸ Nikaminiãri inirekaãkiti, iuaritika himauikakaniãri nisãkire, hãuikariko niposotiire. Hïtikakiti hãuika. Ininiã himarotariko, hãuikariko, niri, nota pakini ãtika aniniua —itxa Xesosi.

³⁹ Iuasaakipeka pariseoakori omanãkarauata. Iuaïkana inirekarina imaïkinirina Xesosi. Txamari iuasaakipe isipe.

⁴⁰ Iuaïkana Xesosi kanapiriã Xotão ipiniãmoni. Iuaã ikaikota Xoão kapatx-isarerini patxisarauatiniãtaã. ⁴¹ Itomaneri kãkiti sari iuamoni. Ininiã ninoa txa:

—Xoão kona kamari posotiiretxi, iuaritika ikinika isãpiretakiti Xesosi pirena atão inakarínoka isãpireta.

⁴² Ininiã itori kãkiti iuaãtaã auikari Xesosi sãkire.

11

Arásaro Ipinini

¹ Kiki Arásaro inakori aua ipi itaro, Maria, Mata pakini. Ninoa aua Petãnia aapokotxiti. Iuasaaki Arásaro amianata. ² Xesosi ipinini apisa, oa Maria arokari Xesosi kiti kamariãroã, oiãkoã kaxipota otxari. Oa Maria itari Arásaro amianata. ³ Iua amianatakasaaki, Maria, Mata pakini iokanapireta Xesosimoni:

—Apiananiri, pitiretakiti amianata —otxari.

⁴ Ninoa iokanapirena ikenakotakasaaki, iua txa:

—Amianari inokari Arásaro kona ipinini ïkapanini. Teoso posotiire oerekini ïkapanira iua amianari inokari iua. Kãkiti: “Teoso ãkiri peerekari” iniko ïkapanira iua amianata.

⁵ Xesosi tiretari Mata, oïtaro Maria, Arásaro pakini. ⁶ Ikenakotakasaakiri Arásaro amianatini, iua napapanikari ipi õti iuaxiti. ⁷ Eereka itxana imoia-nariakori:

—Iuaïkana Xotéia tõpa masa.

⁸ Ininiã imoianariakori:

—Koerekareri, kitapani iuaã Xoteoakori nirekari kai soroã ikiporonakinii pite. Iuaritika pisatapanikako iuaãtaã? —itxarina.

⁹ Ininiã Xesosi:

—Pokamara tosi oara aua kãkiti parïkauatini ïkapani. Pokamara tïpokotakari kona mãkitita, kotxi atokatxi iopinikari ikinipoko. ¹⁰ Txamari ïkanõka tïpokotakari mãkitita, kotxi atokatxi kamara !auari.

¹¹ Ininiã Xesosi:

—Amoianari Arásaro imakanãta. Nota õpirïkariko iua —itxa Xesosi.

¹² Ininiã Xesosi moianariakori txa:

—Imakanãtiniã, erekaãpokekari uatxa —itxana.

¹³ Xesosi imarotari Arásaro ipinini, txamari imoianariakori uãkatari Arásaro atão imakini.

¹⁴ Ininiã Xesosi txana ninoa atão imarotinina ìkapani:

—Arásaro ipìpe. ¹⁵ Erekapitikari iuaã nimauakani, kotxi eereka hìte auikariko nota sãkire. Masa iuaxiti. Maõkitari iua —itxa Xesosi.

¹⁶ Tomee Txítximo inakori misãkiretana apanakini Xesosi moianariakori:

—Masa iuakata apinini tìkane.

Ikara atoko itxa isãkire, kotxi iuaxiti Xoteoakori nirekari okiniri Xesosi.

Kãkiti Auãki Inìkitaãkari

¹⁷ Xesosi apokasaaki iuaxiti ipi ipi pakini òti napapeka. Ininiã iusaaki Arásaroni katapeëkaika. ¹⁸ Petãnia Xerosareë takote. ¹⁹ Apanakini kãkiti apoka Mata, Maria pakinimoni. Ninoa moianatana, kotxi itarina !auaika.

²⁰ Mata kenakopiretari Xesosi apokaãpotini. Ininiã oa sari oaõkitiniri ìkapani. Maria kaikota oaãpoko ãki.

²¹ Xesosimoni Mata apokasaaki, otxari iua:

—Apiananiri, pite uai auaãkamako, kona nitari ipinamako. ²² Iuaritika nimarotapitikari, pamanaãkiti Teoso sikapitikai —otxa.

²³ Ininiã Xesosi txaro:

—Pitari iuaìkana auapanikako.

²⁴ Ininiã Mata:

—Nimarotari itixi xipokini òti nitari iuaìkana auapanikako. Ipìkani òkitikiniua òti, iua òkitikaua —otxa Mata.

²⁵ Ininiã Xesosi sãkirauata:

—Nota ipìkari òkitikakarirano nota. Kãkiti auãki inìkitaãkarirano nota. Nota sãkire auìãkari ipininiã, iuaritika iuaìkana auapanikako. Kona ipinaika.

²⁶ Nota sãkire auìãkari auapanikako iuaìkana. !Ipinaikako. Pauikatari ikara atoko nininii? —itxa Xesosi.

²⁷ Ininiã Mata:

—Apiananiri, nauikapitikari. Teoso mereëkiti pitxaua. Teoso ãkiri pitxaua. Teoso iokanatakiti itiximoni ìkari pitxaua. Ikara nauikapitika —oa txari iua.

Xesosi TxiaPATINI

²⁸ Eereka Mata sari oìtaromoni. Oãkiritaro oa, mapara omisãkiretini ìkapani.

—Koerekareri apope. Iua akiritai —otxa Mata.

²⁹ Maria kenakotari ikara inakasaaki, katimariã òkitikaua, iuamoni sa otxa oa. ³⁰ Iusaaki Xesosi !apokapanika aapokotxiãtaã. Ikaikotapanika mitxi Mata apokiniãtaã. ³¹ Maria katimaritika òkitikasaakiua, Xesosimoni osini ìkapani, Xoteoakori, oaãpoko ãki auakani, oa mìkapiritakani, sari oa tikini. Ninoa uãkatari akauarimoni osini otxiapatini ìkapani.

³² Maria apoka Xesosimoni. Oãtamatakasaakiri iua, iua apisatoõ okaportoreëkaua. Otxari:

—Uai pauaãkamako, kona nitari ipinamako —otxa.

³³ Xesosi atamataro otxiapatini. Xoteoakori oakata apokakani txiapata apaka, ininiã Xesosi iteene matinaniuata ãkixinireë. ³⁴ Iua pimaãna:

—Nanipa hìkatatari? —itxa.

Ininiã ninoa:

—Apiananiri, masa. Patariko iuaã —itxana.

³⁵ Iusaaki Xesosi txiapata.

³⁶ —Hãtamataro Xesosi. Iua tiretapitikari Arásaroni —itxa Xoteoakori.

³⁷ Ætikaka Xoteoakori txa:

—Mõsiãreti kõiãrepeka itxìkitakapeka. Atxiìti iua uai apokaãkamako, kona Arásaro ipinamako —itxana.

Xesosi Òkitikiniri Arásaroni

³⁸ Ininiã Xesosi iteene matinaniuata ãkixinireẽ. Iuasaaki isa akauarimoni. Ninoa takari ipĩkari kai auĩte ãki. Kai auĩte itotaãka.

³⁹ Ininiã Xesosi txari:

—Himakatzakari akauari tore —itxa.

Mata, Arásaroni itaro txari Xesosi:

—Apiananiri, ipaiakapeka. Ipi ipi õti pakinipeka ikatiko, ininiã pata-parasakari —otxari Xesosi.

⁴⁰ Ininiã Xesosi:

—Nota sãpiretapekai: “Nota sãkire pauikiniã, pitikariko Teoso posotiire” —itxaro.

⁴¹ Ininiã imakatzakarina kai. Iuasaakipeka Xesosi ionakaãta iaxiti.

—Niri. Erekai, kotxi pikenakotari nisãkire. ⁴² Nimarotari ãtipirika pikenakotiniri nisãkire. Ikara atoko nitxa sãkireta kãkiti uai auakani kenakotiniri ãkapani, kotxi ninirekari ninoa auikiniri pite iokanatinino nota uaimoni —itxa.

⁴³ Ikara atoko inaãka atoko akirikatari:

—Arásaro, põkitikaua. Pipokĩka.

⁴⁴ Ininiã iuasaakipeka Arásaro pokĩka. Imakinika iĩto mãkatxi mataã iapirikaãka. Itoõ apaka iapirikaãka mãkatxi mataã.

Ininiã Xesosi:

—Himakatzakari iapirikiko.

Xesosi Okaenetiko Pirena

(Mateo 26.1-5; Marko 14.1-2; Arókasi 22.1-2)

⁴⁵ Xoteoakori Mariamoni ãkani itikari ikara atoko inakari, ininiã auikarina Xesosi Teoso ãkiri ininiua. ⁴⁶ ãtikaka Xesosi kamakiti itikakani kanapiriã pariseoakorimoni. Isãpiretana Xesosi õkitikiniri Arásaro. ⁴⁷ Ininiã pariseoakori, sasetotxi auĩteakori pakini apotiitaua. Imisãkiretakakana:

—Kiripa ate kama? Ia kiki kamari itori posotiiretxi. ⁴⁸ Aãuiritiniãri iua ikara atoko ikamini, ikinipoko kãkiti auikari iua sãkire. Ininiã iua tikini isana. Ikara atoko ininiã, Homanoakori xipokari Teoso misãkiretiko aikoti ate nakiti, ate tixine apaka —itxana.

⁴⁹ Iuasaaki Kaipasi inakori sasetotxiakori auĩte apiatakari inakari iua. Itxana:

—Hĩte kona kimarorepanikai. ⁵⁰ Erekari ãti kiki ipinini ikinimane mapinakani ãkapani. Ikara atoko ininiã, kona ikinipoko anirimane ipinako —itxa Kaipasi.

⁵¹ ãkorakanani sasetotxi auĩte apiatakari itxaua Kaipasi. Ia atoko itxa: “Xesosi ipinako Xoteoakori mapinakani ãkapani. ⁵² Kona ninoa ãkapaninanini ipinako. Teoso anaakori iarikakani ãkapani apaka ipinako. Ininiã iuasaakirako iua apotiitari ikinipoko ninoa. Ininiã Teoso anaakori itxauanako,” itxa Kaipasi sãkire.

⁵³ Iuasaaki eereka imapapiretarina Xesosi okinina tĩkane. ⁵⁴ Ikara atoko ininiã, Xesosi kona saika Xotéia tõpamoni. Isari Eparaĩ sitatxitimoni, ãparaã makipakaniãtaã takote. Iuaã ikaikota imoianariakorikata.

⁵⁵ Iuasaaki imatokoãpotarina Páskoa kiiniriti. Iuasaaki itomaneri Xoteoakori Xerosareẽ tõpa auakani sari Xerosareẽ sitatxitimoni. Iua kiiniri apisapanika, isana iuaã oerexiniretiniuana ãkapani. Iuasaaki amanaãrina Teoso imakatzakiniri maerekati ikamakitina. ⁵⁶ Iuaã Xoteoakori nitari Xesosi. Ninoakakarika ipimaãkakana:

—Atauako kiinirimoni inapani atxiĩti?

⁵⁷ Sasetotxi auĩteakori, pariseoakori pakini paniãtapekari kãkiti:

—Himarotakasaakiri Xesosi auiniãtaã, hĩsãpiretauako ate, ininiã amaĩkariko iua.

12

Maria Takari Kamariãro Xesosi Kitiã (Mateo 26.6-13; Marko 14.3-9)

¹ Seisi õti Páskoa kiiniriti apisa, Xesosi sari Petánia sitatxitimoni. Iuaã aua Arásaro, Xesosi õkitikakiti Arásaro ipĩkasaaki. ² Iuaã ikamaãka nipokori Xesosi ãkapani. Mata sikari nipokori kãkitimoni. Iuasaaki Arásaro apanakinikata topãka Xesosikata. ³ Iuasaaki Maria kosekaro kamariãro koana. Oia atão nato kamakoro. Ipixini kiro ominani aua. Kona koketakoroni. Natonokara. Pakaronero, iuaritika okitakaro Xesosi kitimoni. Oiãkoã okaxipokari. Iuasaaki aapokotxi ãki omarinokara itxaua.

⁴ Txamari Xotasi Isikariotxi inakori !apokaerekatari kamariãro Xesosi kitiã okitakini. Iua Xotasi Simão ãkiri. Xesosi moianari itxaua, txamari inĩkapiritariko Xesosi.

⁵ Ininiã Xotasi txari:

—Kãkiti parĩkauata tresẽtosi pakini õti oia atoko inakaro kamariãro iamotiko ãkapani. Kinirepa kona ovẽtxitaãka? Kinirepa txineiro mauakiniti-moni !osika? —itxa Xotasi.

⁶ Ikara atoko itxa, kotxi kiĩtiriri itxaua. Iua nĩkataro ninoa txineirote. Iua itotapekari txineiro iĩtirĩkini. Iua !imaãkatana txineiro mauakiniti.

⁷ Xesosi apakapapiretari:

—Kona hĩtxitapero Mariapani. Onĩkataro kamariãro ia õti notamoni otakini ãkapani, kotxi oxinikari nikatiko õti ãkapani. ⁸ Minakati mauinakini auapikako hĩtekata. Txama nota !auaikako hĩtekata —itxa Xesosi.

Xoteo Auĩteakori Nirekari Okiniri Arásaro

⁹ Itomaneri Xoteoakori kenakopiretakasaakiri Xesosi Petánia sitatxitiã auini, ininiã iuaã isana Xesosi aõkitinina ãkapani. Kona iuananini ninoa nireka aõkitinina. Arásaro Xesosi õkitikakiti apaka ninoa nirekari atamatinina. ¹⁰ Ininiã sasetotxi auĩteakori nirekari Arásaro apaka okinina, kotxi kaiõpokori kãkiti auikari Xesosi sãkire Arásaro sãpiretakiti ikenakotakasaakina. Itakana-parina sasetotxiakori sãkire auikinina. ¹¹ Arásaro iuaĩkana auiniã, ininiã itomaneri Xoteoakori asikaãpotari iauĩtena, Xesosi sãkire auikinina ãkapani.

Xesosi Xerosareẽ Apokaãpotini

(Mateo 21.1-11; Marko 11.1-11; Arókasi 19.28-40)

¹² Katimatinĩkata, itomaneri kãkiti Páskoa kiiniritimoni sikani, kenakopiretari Xesosi apokaãpotini Xerosareẽmoni. ¹³ Ininiã Xerosareẽkini sari aõkitinirina iua. Kinari tape anikana, Xesosi apiãkatakasaakina. Akirikatana:

—Peerekari Teoso. Teoso takari erekari Isaeo auakani auĩtemoni, Api-ananiri uãkaã ãkarimoni —itxana.

¹⁴ Mitxipe Xesosi iokanataro imoianariakori xomẽta ãkiri initinina. Ninoa apokasaakiri, iminarina Xesosimoni. Ininiã Xesosi topãka iua nopini. Iua nopini Xesosi sari Xerosareẽmonikari. Kitxakapirĩka Teoso sãkire iõkatsopatakori txari:

¹⁵ Kãkiti Xerosareẽkini kona hĩpĩkarauatape. Erepani hĩauĩte. Xomẽta nopini iitopãkako, itxa Teoso sãkire kitxakapirĩka. Ikara iaõka apokapeka, kotxi Xesosi apoka xomẽta nopini.

¹⁶ Iuasaaki imoianariakori kona xinikari Teoso sãpiretakiti kitxakapirĩka auakari. Xesosi ipinaka atoko, õkitikaãkaua atoko, iuasaakiika ninoa xinikari ikara Teoso sãkire. Ininiã iuasaakiika imarotarina Teoso sãpiretakiti.

¹⁷ Mitxi kākiti akauari takote auakani, ninoa itikari Xesosi ōkitikiniri Arásaro. Ninoa iaripiretari Xesosi kamakiti. ¹⁸ Ininiã kākiti apiãkatari Xesosi, kotxi ninoa kenakoenetapekari Arásaro ōkitikini. ¹⁹ Ininiã pariseoakori misākiretakakaua:

—Hātamata. Kiripa aposota akamini? Ikinimane kākiti nirekari iua.
Ininiã pariseoakori xikotari Xesosi.

Ātikaka Krekoakori Nitari Xesosi

²⁰ Ātikaka Krekoakori apoka Xerosareēmoni Páskoa kiiniriti ĩkapani, kotxi ninoa nirekari Teoso imisākiretinina. ²¹ Apokasaakina iuaãtaã, isana Piripimoni. Iua Petsáita aapokotxitikiri, Kariréia tōpa auakari. Ininiã apokasaakina Piripimoni, ipimaãrina:

—Ate nirekari Xesosi aaōkitini.

²² Ininiã Piripi sari Ātreemoni, isāpiretiniri ĩkapani. Eereka isana Xesosimoni.

²³ Ininiã apokasaakina, Xesosi txana ninoa:

—Kaiamapekari nota hītari iaxitikiri sini niri tixinemoni ikinipoko erekari napakapini ĩkapani. ²⁴ Atão nisāpiretai. Nota kimi oki atoko. Kākiti matakakaniãro oa, ātika okinoka auapika. Pitakiniãro, opitxaka. Ininiã kaiãori oki aua. Ikara atoko nota. Nimapĩkaniã, ininiã notanokara auari. Nipininiã, ininiã itomaneri kākiti sari niri tixinemoni. ²⁵ Pite ātipirika kaminiãri piteka nireēkitinoka, ininiã pinireēkiti xipokapitikako pitekata. Pite nireēkiti xipokiniã, nota sākire pauikini xika, pite auapininiika txako Teosokata. ²⁶ Kākiti nirekiniãri iparĩkauatini nota ĩkapani, imoianatanoko. Iua atoko ininiã, nota auuniãtaã iua apaka auako. Kākiti parĩkauatiniã nota ĩkapani, ininiã niri paxitariko iua.

Xesosi Sāpiretari Ipinini

²⁷ Xesosi misākiretari Teoso:

—Uatxa kona erekaxinireno, ininiã kiãtokopa nitxa nisākire pitemoni? Atxiĩti nipaniãtai: “Niri, pimakatxakinanoko nimapinakanani ĩkapani.” Ikara atoko !nipaniãtai, kotxi nipinini ĩkapanira napoka ĩkorapokoritimoni. ²⁸ Ininiã niri, poerekari kākiti ikinimane auĩte pininiãua —itxa Xesosi.

Iuasaakipeka iaxitikiri txari:

—Noerekapekari kākiti ikinimane auĩte nininiãua. Eereka iuaĩkana noerekapanikariko ikara —itxa Teoso.

²⁹ Kākiti iuaãtaã auakani kenakotari iaxitikiri sākire. Txamari itxana:

—Ikarokirauata.

Apanakini txari:

—Teoso nitirira sākirauata iuakata —itxana.

³⁰ Xesosi txana ninoa:

—Ikara sākirauata kona nota ĩkapanini. Hĩte ĩkapanira isākirauata. ³¹ Iposope ikini itixiti auakani misiritiko imaerekanina xika. Iposope ikini itixiti auakani auĩte Satanasi inakori xipokiko. ³² Nota aamina ĩpiriãmitakari nopini nōkitikikosaaki, iuasaaki nikosekanako kākiti notamonikari.

³³ Ikara atoko itxa, kākiti imarotiniri aamina ĩpiriãmitakari nopini ipinini.

³⁴ Apanakini kākiti apakapiretari:

—Teoso sākire kitxakapirĩka iōkatsopatakori oerekaua Teoso mereēkiti ātipirika auini. !Ipinina. Txamari pite sāpiretaua ipinini aamina ĩpiriãmitakari nopini? Kipa iua aĩtari iaxitikiri pisāpiretakiti? —itxana ninoa.

³⁵ Ininiã Xesosi:

—Tirikapi kamara atoko nitxa. Hĩtekata nauakasaaki, noerekai hĩte atão inakari. Uatxa tirikapi kamara hĩtekata auapanika. Paĩtiki nota sipe. Tirikapi auakasaaki, pauapikako tirikapi kamaraã. Ininiã ipiã kona apoka hĩtemoni.

Kãkiti mauikakaniãri nota sãkire, ãkanõka tãpokotakani atoko itxana. !Imarotarina isinimonina. ³⁶ Tirikapi hãtemoni auakasaaki, hãuikariko iua sãkire. Ikara atoko ininiã, “pokamarari anaakori” hãtxaua —itxa Xesosi.

Ikara atoko inaka atoko isipeka. !Isãpiretari isinimoni.

Xoteoakori Kona Auikari Xesosi Sãkire

³⁷ Xoteoakori itikari ikinipoko posotiiretxi Xesosi kamakiti. Iuaritika kona ninoa auikari iua sãkire. ³⁸ Ikara atoko ininiã, kitxakapirãka Teoso sãkire sãpiretakari Isaía inakori iõkatsopatakiti, iuasaaki apopeka. Isaía txari:

Apiananiri, kãkiti !auikapiretari asãkire ninoamoni asãpiretakiti. !Auikari piposotiire poereẽkiti ninoamoni,

itxa Isaía. ³⁹ Iua atoko ininiã, Xoteoakori kona posotari auikiniri Xesosi sãkire, kotxi iuaãkana Isaía txari:

⁴⁰ Teoso mõiãretakana ninoa. Kaikokii itxãkitakana. Itikakitina kona iãkitetana ninoa. Ikiãna kona !imarotarina. Ininiã ninoa kona apokapaniko notamoni erekapeka ininina nitxãkitakini ãkapani,

itxa Teoso Isaía iõkatsopatakitiã.

⁴¹ Kitxakapirãka Xesosi uai apokini apisa Isaía iõkatsopataria sãkiretxiti. Iuasaaki Teoso oerekari Isaía Xesosi posotiire, apaka ikinika Xesosi kamakiti tãkane.

⁴² Iuaritika itomaneri Xoteo auãteakori auikari Xesosi sãkire. Txamari ! isãpiretarina apanakini, kotxi ninoa pãkari pariseoakori. Pariseoakori imarotakasaakiri Xesosi sãkire auããkani ininiuana, !auiritaikana ninoa ãroini aiko Xoteoakori apotiitiniãtaãua. ⁴³ Iua atoko ininiã, ninoa apia nirekari kãkiti iuikinina. Poiãoka ninoa nirekari Teoso iuikinina.

Xesosi Iuaãkana Sãkirauata Xoteoakorimoni

⁴⁴ Xesosi itaparasãkireritika txari:

—Kãkiti aukiniãri nota sãkire, kona nota sãkirenanini ninoa auika. Niri sãkire apaka aukana, kotxi iua iokanatanano nota uaimoni. ⁴⁵ Natamatakiri apaka atamataria niri. ⁴⁶ Tirikapi atoko nitxa nãkasaaki kãkitimoni. Nota sãkire auããkani kona kaikota ipiaã. ⁴⁷ Kãkiti nisãkire kenakotakani mauikakaniãri nisãkire, kona nimisiritari iua imaerekani xika. Kona kãkiti nimisiritini ãkapanini nina uaimoni. Nina kãkiti maerekani nimakatzakini ãkapanira.

⁴⁸ —Nota manirekakati, nisãkire manirekakati apaka, auapeka imisiritiko mereẽkari. Nisãpiretakiti, iuarako itixi xipokini õtisaaki sãpiretari imisiritiko.

⁴⁹ —Notaka sãkire !nisãpiretai. Niri sãkirena nisãpiretai. Niri iokanatanano nota uaimoni. Iua paniãtakiti isãpiretakiti nisãpiretai hãte. ⁵⁰ Nimarotari kãkiti aukiniãri niri paniãtakiti auapininiika itxako. Nota sãpiretari niri sikapiretinino iaõka.

13

Xesosi Arokari Imoianariakori Kiti

¹ Pãskoa inakori kiiniriti apisapanika, Xesosi imarotari paãtiki itixi itakanapini irimoni isini ãkapani. Iua tiretapikana kãkiti iua nakiti. Ninoa itiretiniritika ipinako Xesosi.

² Xesosi imoianariakorikata inipokotini apisapanika Satanasi sikanireõtapekari Xotasi Isikariotxi Xesosi imãkapiritini ãkapani. Iua Xotasi, Simão ãkiri. Eereka inirekari isikiniri Xesosi imokaiakarimoni. ³ Xesosi imarotapekari iri sakiniri ikinipoko posotiiretxi Xesosimoni. Imarotapekari Teosomoni ipotarikini. Imarotapekari iuamoni ikanapiriini. ⁴ Iuaritika inipokotaka atoko, õkitikaua. Imakatzakari imãka inopini auakari. Eereka ipomakitari mãkatxi mata nitiritxi parãka atoko ikamini ãkapani. ⁵ Eereka

itakari āparaã tiitxi āki. Ininiã arokana imoianariakori kiti. Eereka mākatzki mataã ikaxipokaãpotana.

⁶ Simão Petro takote apokasaaki, Petro txari:

—Konapitini, Apiananiri. Ninitiri !pitxaua. Ininiã kona parokapiri nikiti —itxari.

⁷ Ininiã Xesosi:

—Uatxa kona pimarotari nikamakiti. Pimarotariko āti ōti.

⁸ —Koniko pite arokapaniri nota kiti —itxa Petro.

Ininiã Xesosi:

—Pimauiritakaniãno pikiti narokini, ininiã kona nimoianari pitxaikauako —itxa Xesosi.

⁹ —Ikara atoko ininiã, kona nikitinani paroka. Niuako, nikii, imakinika paroka —itxa Petro.

¹⁰ Ininiã Xesosi:

—Kākiti kipaātakanuia poirepe itxana. Itīpokotakasaaki, iuaīkana itxiko apoka iuamoni. Iusaaki ikitinokara arokaāka. Hīte himakinika poirepeka, kotxi nimakatzakapekari himaerekani. Ātinokara kona poireri, kotxi imaerekani auapanika.

¹¹ Xesosi imarotapekari iua mīkapiritakari, ininiã itxa: “Himakinika poirepeka. Ātinokara kona poireri,” itxana.

¹² Ninoa kiti arokaāka atoko, ieretakari imāka inopinikiri. Ikanapiriã amesamoni. Ipimaãna:

—Kinirepa narokatari hīkiti? ¹³ Hīte akiriuākatano nota “koerekareri.” Apaka hākiriuākatano “Apiananiri.” Atāopitikara hīsākire, kotxi ikara inakari nitxaua. ¹⁴ Hīauīte, hōereēkiri nitxaua. Iuaritika narokari hīkiti. Hinitiri atoko niparīkauata. Ininiã hārokakititakauako, kākiti nitiri atoko hininiua. ¹⁵ Noerekapekai hīte erekari hīkamini. Uatxa hīkamariko nota kamakiti atokokana. ¹⁶ Atāo inakari nitxai. Nitiritxi iamotakori poiāori. Iauīte apiari. Apaka kākiti iokanatakari apiata. Iokanatakiti poiāori. ¹⁷ Uatxa hīte imarotari atāo inakari hīkamini. Hīkaminiāri, hīpoxokoniuata.

¹⁸ —Kona himakinikani ikara atoko nitxai. Nimarotari nimereēkini, txamari ia Teoso sākire iōkatsopatakori iaōka apokapitikako. Itxari:

Notakata komiri nikakari, iuakarako kamari maerekati notamoni. ¹⁹ Uatxa iua himarotini apisapanika nisāpiretai hīte. Ininiã nisākire iaōka apokasaaki, himarotariko Teoso ākiri nininiua nota. ²⁰ Atāo inakari nisāpiretai. Kākiti nota iokanatakiti hītemoni hāpakapiniã, nota apaka hāpakapa. Hāpakapiniãno nota, hāpakapari apaka nota iokanatakari hītemoni —itxa Xesosi.

Xotasi Mīkapiritiniri Xesosi

(Mateo 26.20-25; Marko 14.17-21; Arókasi 22.21-23)

²¹ Xesosi ikara isāpiretaāka atoko, ākixinireē imatinaniuata. Itxana:

—Ari, ātikara hīte sauaki mīkapiritano nota.

²² Ininiã imoianariakori atamatakakaua.

—Kiripa ikara atoko txatako? —itxana.

²³ Iusaaki Xesosi moianari itiretakiti papīkaītota iuamoni. ²⁴ Ininiã iusaaki Simão Petro ieki itxa isona iuamoni. Ininiã Petro:

—Pipimaāri iua: “Īkiripa ikara atoko txatariko iua?” —itxari.

²⁵ Ininiã Xesosi tiretakiti pimaāri Xesosi:

—Kiripa ikara atoko txatai? —itxari.

²⁶ Ininiã Xesosi:

—Komiri niākakiti nisikakitikarako ikara atoko txanoko.

Ininiã iuasaaki iãkari komiri. Eereka isikari Xotasi Isikariotximoni. Iua Xotasi Simão ãkiri. ²⁷ Xotasi komiri inikasaaki, Satanasi ãroã ixiniremoni. Ininiã Xesosi txari Xotasi:

—Kinirão kamaka pinakiti pikamapoka —itxari.

²⁸ Iuaã auakani ãkixinireẽ:

—Kinirepa ikara atoko itxatari Xotasi?

²⁹ Xotasi nĩkataro ninoa txineirote. Ininiã ninoa ãkixinireẽ:

—Atxiĩti iokanataro iua komiri iamotini ãkapani.

Ãtipekana:

—Atxiĩti iokanataro iua matiinimoni txineiro isikini ãkapani —itxanãtana ãkixinireẽna.

³⁰ Komiri apakapaãka atoko, inikaãka atoko isipe Xotasi. Mapiãpe inakasaaki.

³¹ Xotasi sipeka inaãka atoko, Xesosi txana ninoa:

—Uatxa kãkiti itikariko kãkiti itari iaxitikiri posotiire. ³² Kãkiti atamatariko Teoso posotiire imimoni auakari. Ininiã Teoso txari: “Erekapitikari namarite.” Iuasaaki Teoso oerekari kãkiti iua apokaerekatini imi. Ikara atoko ininiã, oerekari imi ereka inini.

³³ —Nitiretakini, paĩtikinoka nauini hĩtekata. Eereka hinitapiimano nota, txamari nota sinimoni kona hĩposotari hĩsini. Ikara atoko nitxapekana Xoteoakori. Iuatxikana uatxa nisãpiretai hĩte. ³⁴ Ininiã uatxa nisãpiretaiko hĩte Teoso paniãtakiti amaneri: “Hĩtiretakakaua, nota hĩte nitiretini atokokana.”

³⁵ Ikara atoko hĩkaminiã, ikinimane imarotariko nota moianariakori atão hininiãua.

Xesosi Sãpiretari Petro Kipatiniri Iua

(Mateo 26.31-35; Marko 14.27-31; Arókasi 22.31-34)

³⁶ Simão Petro pimaãri:

—Koerekareri, nanipa pisatako?

Xesosi apakapapiretari:

—Nota sinimoni kona uatxa apakata hĩsini. ãti õtirako hĩsa hĩte.

³⁷ Iuaãkana Petro:

—Apiananiri, kinirepa kona pitekata nisa uatxa? Nipinapitikamako pitekata —itxa Petro.

³⁸ —Atãopitikani notakata pipinini pinirekaka? —itxari.

—Atão nisãpiretai. Ia ãkanõkati patari sãkirauatini apisapanikako, “!Nimaro-tari iua,” pitxanoko ipi ãti pakinikata —itxa Xesosi.

14

Xesosi Pinitari Imoianariakori

¹ —Kona himatinaniuatape. Kona himaãkapeua. Hãuikariko Teoso sãkire. Apaka hãuikariko nota sãkire. ² Niri auiniãtaã aua kaiãopokori aapokotxi. Ikara atoko iminakanimako, nisãpiretapiimaiko hĩte. Iuaã nisa hãuiniãtaã nikamini ãkapani. ³ Iuaã nisa hãapoko nikamini ãkapani. Eereka nikanapiriã. Nanikai hĩte notakata hãuini ãkapani. Ininiã hĩte apaka aua nota auiniãtaã. ⁴ Hĩte imarotari nota sini kimaporiti —itxa Xesosi.

Teoso Kimapore Itxaua Xesosi

⁵ —Kona aimarotari pisinimoni. Natokopa ininiãpa aimarotatari pite sini kimaporiti? —itxa Tomee.

⁶ Ininiã Xesosi txari:

—Teosomoni sikari kimaporiti nitxaua. Atãonoka nisãkire. Atãonoka nika-makiti. Nitxĩkitakari kãkiti auapininiika inini. Notamoni apokakarinanira

sari nirimoni. ⁷ Atão nota himarotiniã, ininiã himarotariko niri apaka. Uatxa himarotapekari iua. Hãtamatapekari iua —itxa Xesosi.

⁸ —Apiananiri, poerekari piri atemoni. Ikaranoka anireka —itxa Piripi.

⁹ Ininiã Xesosi:

—Piripi, kona mixaikani hãtekata nauama nota, iuaritika kona himarotapanikano nota? Nota aõkitakari, aõkitapekari niri. Kinirepa, “Piri poerekaua,” pitxa? ¹⁰ Kona pite auikapanikari niri auini nota ãki? Nota apaka aua niri ãki.

—Hãtemoni nisãpiretakiti kona nota sãkirenanini. Niri paniãtakitira. Niri nota ãki auakari iuara kamari ikinipoko nikamakiti. ¹¹ Hãuikariko nisãkire niri ãki nauini. Niri nota ãki auini apaka hãuika. Himauikakaniãri nisãkire, ininiã hãuikari nikamakiti. ¹² Atão nisãpiretai. Nota sãkire auiaãkani kamariko nota kamakiti atokokana. Apaka ninoa kamakiti apiata, kotxi nirimoni nisako. ¹³ Nota uãkaã hamanaãkiti nota sikai hãte. Ikara atoko ininiã, oerekaãka niri ereka ininiua. ¹⁴ Ikinipoko nota uãkaã hamanaãkiti, nota sikapitikai hãte. ¹⁵ Nota hãtiritiniã, hãkamariko nipaniãtakiti —itxa Xesosi.

Erekari Matamatakoti Apokaenetini

¹⁶ —Namanaãriko niri ãti kõtãkikareri iokanatinini hãtemoni. Iuakara auapininiika txako hãtekata. ¹⁷ Iua Erekari Matamatakoti atãonani ina sãkiretakari. Kãkiti Teoso sãkire mauiãkani kona apakapari iua, kotxi kona atamatarina iua. Apaka kona imarotarina iua. Hãtepekana imarotari iua, kotxi hãtekata aua. Iua aua hãte ãkixinireẽ.

¹⁸ —Ininiã kona nitakanapai hãte. Nikanapiriãpanikako hãtekata nauini ãkapani. ¹⁹ Paãtiki atoko kãkiti ãkoraxiti auakani kona atamataikanoko nota. Hãte atamatanoko. Hãte auapanikako, kotxi nota apaka auapanikako. ²⁰ Iuaãkana auapanika ninakasaaki, himarotariko niri ãki nauini. Hãte apaka auako nota ãkixinireẽ. Nota aua hãte ãkixinireẽ apaka. Txapaniko.

²¹ —Iua nisãkire auiaãkarira nipaniãtakiti kamakarira turetano nota. Nota turetakari niri tureta. Nota apaka turetari iua nituretakiri. Ikara atoko ininiã, noerekariko apikomoni nisãkire iuamoni.

²² ãti Xotasi, kona Xotasi Isikariotxi inakorini, txari Xesosi:

—Kinirepa atenani poerekari Teoso ãkiri pininiua? Kinirepa kona poerekari ikara apanakinimoni? —itxa.

²³ Xesosi apakapapiretari:

—Kãkiti turetiniãno, ikamari nisãkire iaõka. Niri turetariko iua. Niri, nota pakini apokako iuamoni. Iuakata aãuako. ²⁴ Nota matiretakani kona nãkatari nisãkire. Nisãkire hãkenakotakiti kona nota sãkireni. Niri niokanatakiri sãkirera.

²⁵ —Hãtekata nauakasaaki, ikara sãkiretxi nisãpiretai. ²⁶ Niri iokanatariko kõtãkikareri, Erekari Matamatakoti inakori hãtemoni. Erekari Matamatakoti oerekaiko hãte ikinipoko niuãkaã. Himaxinãkaretakiti iuaãkanako iua oerekaiko. Ikinipoko nisãpiretakiti oerekaiko.

²⁷ —Nisini apisapanika nikamaerekaxiniretai. Nota xinire ereka inini atokotxikana nikamaerekaxiniretai. Nisãkire mauiãkani kona posotari kamaerekaxiniretiniri ãti nota kamaerekaxiniretinini atoko. Kona himaãkapeua. Kona hãpãkarauatape. ²⁸ Hãte kenakotapekari nisãkire ia atoko nininiã hãte: “Nisapitikako, iuaritika nikanapiriãpanikako hãtekata nauini ãkapani.” Hãtiritiniãno, hãpoxokoniuata nirimoni nisini ãkapani, kotxi poiãori nitxaua nota. Apiatakari itxaua niri. ²⁹ Ikara nisãpiretakiti apokini apisa nisãpiretai hãte. Ikara nisãpiretakiti iaõka apokasaaki, hãte auikari nisãkire. ³⁰ Apikomoni iteene nisãpiretinii ! apakata. ãkorapokoriti auakani auãte Satanasi inakori paãtiki apokako notamoni, iuaritika ! iposotari itxãkitakinino ipaniãtakiti nikamini. ³¹ Iteene ninirekari imakinika kãkiti imarotiniri nitiretiniri niri. Apaka nikamari ikinipoko niri paniãtakiti —itxa Xesosi.

Eereka Xesosi txari:
—Maõkitikaua. Masipeka.

15

Xesosi Atão Itĩkaretsa Itxaua

¹ Ininiã eereka Xesosi txari:

—Atão itĩkaretsa nitxaua nota. Itĩkaretsa nĩkatakari itxaua niri. ² Isauakaro otsa marito, kotxi kona kariro oa. Otsa iriuatakaropekana iua kisauakaro omapotõkirenoka, iteene oriuatini ĩkapani. ³ Hĩte poirepeka hĩtxa. Nisãkirenanira oeretai hĩte. ⁴ Okanotsa atokokana hĩtxaua. Nota itĩkaretsa atoko nitxaua. Ininiã hĩpitxaka notamoni. Ikara atoko hininiã, hĩkaikota notakata. Ininiã nota kaikotapika hĩtekata. Ikara atoko hininiã, hĩriuatapitika. Ikara atoko hininiã, erekarinanira hĩkama. Hĩriuatiniã, ininiã erekari hĩkama. Notamoni himapitxakakaniã, kona hĩposotari hĩkaminiri erekari. Kona hĩriuata, kotxi nota tapara !apokari hĩtemoni. !Karii hĩte. Okanotsanoka auiniã, kona kariro. Notakata hãuapininiika hininiã, amãtiiri auapitika.

⁵ —Nota itĩkaretsa nitxaua. Hĩte nikanotsa hĩtxaua. Notamoni pitakakari ãtipaniriko oripaniko. Notakata himauakaniã, kona xapitiki kona hĩposota hĩkamini. ⁶ Nota sãkire mauiãkati okanotsa ipinakari atoko itxa. Txiarokakari atoko itxa. Kãkiti apotiitari okanotsa ipinakari. Eereka okari xaminaã arikini ĩkapani. Iua atokokana aĩri Teoso misiritari isãkire mauiãkani. ⁷ Notamoni hĩpitxakiniã, hĩkenakotiniãri nipaniãtakiti, hinirekaãkiti hamanainiãno, ininiã nisikapitikai hĩte. ⁸ Ito hĩriuatiniã, kãkiti txariko niri: “Peerekai.” Hĩte iriuatiniã, ininiã hĩte atão oerekariko apanakinimoni atão nimoianariakori hininiua.

Hĩtiretakakiniua Pirena

⁹ —Niri tiretinino atokotxikana, nitiretai hĩte. Kona hĩtakanapapiri nitiraõki. ¹⁰ Hĩkĩpitiniãri nisãkire, ininiã nitiraõki kaikotapika hĩtekata. Nota atokokanerako hĩtxako. Nota kĩpitari niri sãkire, ininiã niri tiraõki kaikotapika notakata.

¹¹ —Ikara atoko nitxai hĩte, nipoxokoni hĩtemoni kaikotini ĩkapani. Ikara atoko ininiã, poxokonitxi xãpokako hĩxiniremoni. ¹² Ia nipaniãtakiti: “Nota tiretinii atokotxikana, hĩtiretakakauako.” ¹³ Pipininiã pimoianariakori mapinakani ĩkapani, ininiãkara iteene pitiretana ninoa. Ikara tiraõkitxi apiatakari. ¹⁴ Nipaniãtakiti hĩkaminiã, atão nimoianariakori hĩtxaua. ¹⁵ Uatxa !nixinikaikari nitiritxi hininiua, kotxi nitiritxi kona imarotari iauĩte xinikakiti. Uatxa atão nimoianariakori hĩtxaua, kotxi ikinipoko niri oerekakiti nisãpiretapekai hĩte. ¹⁶ Kona hĩteni mereẽno nota. Notara mereẽi hĩte hĩriuatini ĩkapani. Ninirekari hĩriuatini. Ninirekari kãkiti nota sãkire hĩsãpiretakini txipokori maxipokakati atoko ininina. Ikara atoko ininiã, hamanaãriko niri hinirekakiti nota uãkaã, ininiã niri sikapitikai hĩte. ¹⁷ Ia nipaniãtai hĩte hĩtiretakakiniua.

Xesosi Moianariakori Omanatakani

¹⁸ Iuaĩkana Xesosi pinitari imoianariakori:

—Apanakini omanataiko hĩte. Ininiã hĩxinikariko ia nisãkire. Merepiti-panika ninoa omanatano nota. ¹⁹ Teoso sãkire himauikakaniã, Teoso sãkire mauiãkani tiretapitikai hĩte, kotxi ninoa atoko hĩtxa. Txamari ninoa nakiti !hĩtxaua. Hĩte kona ĩkoraxiti auakani !hĩtxaikaua. Nimereẽpekai hĩte. Nimakatzakapekai ãtião parĩkatxi hĩkamini ĩkapani. Iua xika Teoso sãkire mauiãkani omanatai. ²⁰ Hĩxinikariko ia nisãpiretakiti. Nitiritxi poiãoka itxaua. Iauĩte apiatakari itxaua. Kãkiti misiritiniãno nota, nota atokokanerako imisiritai hĩte apaka. Nisãpiretapekai hĩte. Nota sãkire apamonĩkiniãna, ininiã hĩte sãkirekanera ninoa apamonĩka apaka. ²¹ Imisiritaina, kotxi hĩte auikari nota

säkire. Himisiritaãkako, kotxi kona imarotarina niokanatakiri. ²² Nota uai mapokakaniã, nimasäkirauatakaniã, kona imarotarina maerekati ikamakitina. ²³ Nota omanatakani apaka omanatari niri. ²⁴ Niposotiire nikamakiti apanakini kona posotari ikamini. Noerekari ninoa niposotiire, ininiã uatxa maerekati auari ninoamoni, kotxi !auikari nota säkire. Ikinika itikapekari posotiiretxi nikamakiti, iuaritika ninoa omanatano nota, niri apaka.

²⁵—Uatxa apopeka Teoso säkire iaõka. Teoso säkire iõkatsopatakori txari:

Maxikatiika ninoa omanatano.

²⁶ Kõtãkikareri kona apokapanika. Niokanatariko nirikata auakari, Erekari Matamatakoti. Iua potorika niri auiniãtaã. Atão ene sãkiretakari itxaua. Isãpiretariko nota sãpiretakiti, nikamakiti pakini. ²⁷ Ininiã hïte apaka sãpiretariko nota kamakiti, nisãpiretakiti pakini apanakinimoni, kotxi merepitipanika nipotorikasaaki hïte auapika notakata. Ininiã himarotapitikano nota.

16

¹ Xesosi sãkirauatapanika:

—Ikara atoko nitxai hïte atão himarotini ïkapani, ininiã kona hïtakanapari nisãkire. ² ãti õti Xoteo auïteakori omitikenataiko hïte aiko Xoteo apotitiniãtaãua. ãti õti apokapanikako ia nisãpiretakiti. Iuasaaki ninoa xinikariko hïte okiko ereka inini. Ninoamoni hïte okiko Teoso paniãtakiti iaõka. Txamari kona Teoso paniãtari ikara atoko inakari. ³ Ikara atoko inakari ikamanako, kotxi kona imarotano nota, niri pakini. ⁴ Ikara atoko nitxai hïte, kotxi ikara atoko inakari apokasaaki, hïxinikariko nisãkire. Merepanika nimoianatakasaakii, kona ikara atokoni !nitxai hïte, kotxi nota auapanika hïtekata —itxa Xesosi.

Erekari Matamatakoti Parïka

⁵ Xesosi sãkirauatapanika:

—Païtiki nisipekako niokanatakirimoni. Kona hïpimaãpeno: “Nanipa pisa?” Kona hïtxapeno. ⁶ Ikara atoko nisãpiretapekai, ininiã uatxa kona erekaxinirei hïte. ⁷ Iuaritika nitxai hïte atão nisãkire. Apiaerekata nota sini. Nota masikaniã, iua Kõtãkikareri kona apoka hïtemoni. Nisiniã, niokanatariko iua hïtemoni. ⁸ Iua Kõtãkikareri apokasaaki, oerekariko ïkorapokoriti auakani maerekani. Oerekariko Teosonoka txïkitakiniri kãkiti atão inakari ikamini. Oerekariko kãkiti misiritiko imaerekani xika. Iua Erekari Matamatakoti oerekariko ikara atoko inakari. ⁹ Iua oerekariko maerekati kãkiti kamakiti, kotxi ninoa !auikarina nisãkire. ¹⁰ Iua oerekariko Teosonoka txïkitakiniri kãkiti atão inakarinoka ikamini, kotxi nota sipekako nirimoni. Nota !auaika uai noerekarauatini ïkapani. Païtiki kona hïte atamataikanoko nota. ¹¹ Iua Erekari Matamatakoti oerekariko maerekati kamakani misiritiko, kotxi ïkorapokoriti auakani auïte Satanasi inakori misiritiko mereeëkapeka.

¹²—Auapanika apikomoni nisãpiretakiti tïkane hïtemoni. Txamari !apakata apikomoni nisãpiretinii, kotxi !himïteenekari apikomoni nisãpiretinii. ¹³ Iua Erekari Matamatakoti, atãoene sãpiretakari, iua ïkasaaki, iua oerekaiko ikinipoko atão sãkiretxiti. Kona iua sãkireni isãpiretaiko hïte. Iaxiti auakari sãkirera, niri sãkirera, isãpiretaiko. Isãpiretaiko hïte katana Teoso kamakiti tïkane apaka. ¹⁴ Erekari Matamatakoti oerekaiko ereka ninini, kotxi iua apakapariko nisãkire, eereka isãpiretaiko hïtemoni. ¹⁵ Ikini sereti niri nakiti nota nakiti apaka. Ininiã nota txai hïte, “Erekari Matamatakoti apakapariko nota nakiti. Ininiã eereka isikai hïtemoni himarotini ïkapani.”

Matinanitxi, Eereka Poxokonitxi Apoka Inini

¹⁶ —Paĩtiki kona hãtamataikanoko nota. Eereka iuaĩkana hãtamatanoko, kotxi nirimoni nisako —itxa Xesosi.

¹⁷ Imoianariakori txanãta:

—Kiripa itxanãta Xesosi? “Paĩtiki kona hãtamatanoko. Eereka iuaĩkana hãtamatanoko nota, kotxi nirimoni nisako.” Kiripitipa itxanãta Xesosi? —itxana imoianariakori.

¹⁸ —Kirisaakipa apokatako ikara inaãtakiti? Kiripa ikara isãkire: “Paĩtiki,” Xesosi sãkire atemoni? Ikara isãkire kona ate imarotari xatiki —itxanãtana.

¹⁹ Xesosi imarotari ninoa nirekari ipimainiri iua. Ininiã Xesosi txana:

—Hĩte nirekari hĩpimainino nota, kotxi nisãpiretai paĩtiki kona hãtamatinino, eereka iuaĩkana hãtamatanoko. ²⁰ Atãopitikara ia atoko nitxai hĩte. Hĩtxiapatako. Himatinaniuatako. Iuasaaki apanakini kãkiti ĩkorapokoriti auakani poxokoni uatako. Himatinaniuatako, eereka hĩpoxokoni apokapitikako.

²¹ —Hĩte sito atoko hĩtxauako. Sito oãuaenetanapanoka onakasaaki, oa omaãkapekaua. Imi auaka atoko, kona oxinikaikari otsii. Poxokope otxa, kotxi auapeka amarini. ²² Ikara atoko itxako hĩtemoni apaka. Uatxa kona erekaxinirei hĩte. Iuaĩkana naõkitapanikaiko hĩte. Iuasaakirako hĩpoxokoni uatako. Iuasaaki kãkiti kona posotari ixipokiniri hĩpoxokoni.

²³ ĩkora õti apokasaaki, kona hĩpimaãikano nota. Iuasaaki hamanaãri niri hinirekakiti nota uãkaã, ininiã iua sikai hamanaãkiti. ²⁴ Uatxapiima kona hamanaãpanikari hinirekakiti nota uãkaã. Hamanainiãri, hãpakapapitikariko. Ininiã hĩpoxokoni apokapitikako hĩtemoni.

Imoianariakori Auikari Xesosi Sãkire

²⁵ —Mĩtxi niomaãtari ipixini nisãkire, kãkiti mimarotakaniri ĩkapani. Āti õti kona niomaãtaikari atão. Nisãpiretaiko niri iteene himarotini ĩkapani.

²⁶ Iuasaaki hinirekakiti hamanaãno nota uãkaã. Kona nota amanaãri niri hinirekakiti isikinii. Hĩte amanainiãri, isikapitikai. ²⁷ Niri tiretai hĩte, kotxi hĩte tiretano nota. Hĩte auikari iua iokanatinino nota uaimoni. Ininiã iua tiretapitikai hĩte. ²⁸ Niri iokanatanoko ĩkorapokoriti. Paĩtiki nitakanapari ĩkorapokoriti nirimoni nisini ĩkapani —itxa Xesosi.

²⁹ Imoianariakori txari:

—Uatxa pisãkire atãoenepitika. Sãkiretxi piomaãtakiti kona auaiika, kotxi uatxa aimarotari pisãkire. ³⁰ Uatxa aimarotari pite imarotini imakinika. Kona apakata apikomoni apimarauatini, kotxi uatxa aãuikari Teoso auinimoni ĩkari pininiua pite —itxarina Xesosi.

³¹ Xesosi apakapapiretana:

—Uatxa hãuikari nisãkire —itxa Xesosi.

³² —Uatxa Teoso ketotini manapi apope hĩarikini ĩkapani. Imakinika hĩte takanapanoko. Notanani kaikota. Iuaritika kona notananini kaikota, kotxi niri aua notakata. ³³ Ikara atoko nisãpiretai, kotxi ninirekari erekaxinirepeka hinini. ĩkorapokoriti hãuakasaaki, kãkiti misiritapitikai hĩte. Iuaritika hĩpoxokoni uatako, kotxi nota tapara apiata. Maerekanitxi tapara poiãoka —itxa Xesosi.

17

Xesosi Misãkiretari Teoso Iuaka ĩkapani

¹ Xesosi ionakaãta iaxiti. Iuasaaki isãpiretari ia isãkire Teosomoni:

—Niri, piketotini manapi apopeka. Pisikariko piotximere iuaĩkana nota pamaritemoni, ininiãkara nota oerekari kãkiti pite iotximere, ² kotxi pite sikano nota piposotiire ikinimane auĩte nininiua ĩkapani. Ininiã nikamari ikinimane kãkiti pite sikakini auapininiika ininina ĩkapani. ³ Kãkiti imarotiniãri pite, imarotiniãno nota Xesosi Kristo piokanatakiti, ninoa auapininiika, kotxi pite

atão Teoso pitxaua. Pitenanira atão Teoso pitxaua. ⁴ Noerekari ïkorapokoriti auakani pite Apiananiri pininiua, kotxi nikamapekari parïkatxi pipaniãtakiti. ⁵ Ininiã niri, uatxa piotximere pisikano, pitemoni napokasaaki. Itixi kamiko apisapanika pitekata nauakasaaki, niotximere aua. Iua niotximeretxikana pisikano iuaïkana —itxa Xesosi.

Xesosi Misãkiretai Teoso Imoianariakori Ïkapani

⁶ Xesosi sãkirauatapanika irimoni:

—Nota sãpiretai piuãka kãkitimoni, ninoa itixi auakani notamoni pisikakini. Mitxi pite nakitiakori itxauana. Pite sikana ninoa notamoni, ininiã ninoa kamari pisãkire iaõka. ⁷ Uatxa imarotarina ikinika napakapakiti pite sikinino. ⁸ Nisãpiretapekana ninoa pisãkire, ininiã auikarina pisãkire. Imarotapitikarina pitemoni nipotorikini. Ininiã auikarina pite iokanatinino nota kãkitimoni.

⁹ —Nimisãkiretai pite ninoa ïkapani. Kona nimisãkiretai nota sãkire mauiãkani ïkapani. Nimisãkiretai ninoa notamoni pisikakini ïkapaninoka, kotxi pite nakitiakori itxauana. ¹⁰ Ikinika nota nakiti pite nakiti itxaua apaka. Ïkinika pite nakiti nota nakiti itxaua. Ninoa pisikakini oerekari apanakini Apiananiri nininiua. Ininiã iusaaki apanakini txari: “Peerekari Xesosi.”

¹¹ Uatxa !nikaikotaikako ïkorapokoriti. Txamari ninoa kaikotapanika uai. Nota sipekako pitemoni, ininiãkara pinïkatana ninoa notamoni pisikakini, kotxi pite niri pitxaua, erekarinoka kamakarii pite, kaposotiirei pite. Pite sikaposotiiretano nota. Ninirekari ninoa ãtika atoko ininiuana, nota pitekata ãtika atoko aniniua atokokana. ¹² Itixi ninoakata nauakasaaki, ninïkatana ninoa pite uãkaã, piposotiireẽ. Ninoa notamoni pisikakini ninïkatapitika. Kona ãtika nomaiãta. Xotasinoka pïpinanaka, kotxi pïpinanakakani ãkiri itxaua iua. Ipïpinanaka, kotxi kitxakapirïka Teoso sãkire iõkatsopatakori sãpiretapekari ikara apokini apisapanika.

¹³ —Uatxa nota sipeka pitemoni. Ikara atoko itxa nisãkire kãkitikata nauapanika ninakasaaki, nota poxokoni ninoa ãkixinire auini ïkapani. ¹⁴ Nisikapekari pisãkire ninoamoni, ininiãkara nisãkire mauiãkani omanatana ninoa, kotxi nisãkire auiãkani ïkorapokoriti auakani !itxaikauana ninoa. Iua atokotxikana kona ïkorapokoriti auakarino nota. ¹⁵ Nimisãkiretai pinïkatinina ninoa, Satanasi mamaïkakanina ïkapani. Kona ninirekari mauikareni sauaki auakasaakina pimakatxakinina. ¹⁶ Ïkorapokoriti auakani !itxauana. Nota iua atokotxikana. ¹⁷ Pimakatxakana ninoa pite nakitiakori ïkapani. Pisãkireẽ pimakatxakana, kotxi pisãkire atão. ¹⁸ Nota pisãkire mauiãkanimoni piokanatinini atokokana, niokanatanana ninoa pisãkire mauiãkanimoni. ¹⁹ Ninoa ïkapani notaka nisikaua pitemoni pinirekakiti nikamini ïkapani. Ininiãkara ninoaka apaka sikaua pitemoni pinirekakiti ikaminina ïkapani.

Xesosi Misãkiretai Teoso Isãkire Auiãkani Ïkapani.

²⁰ —Kona nimoianariakorinani ïkapanini nimisãkiretai pite. Apaka nimisãkiretai imakinika nisãkire auiãkani ïkapani, katana nimoianariakori sãkire auiãkani ïkapani apaka. ²¹ Nota amanaãi ninoa xinire ãtika atoko ininina ïkapani. Nota aua pite ãkixinireẽ. Pitepekana aua nota ãkixinireẽ. Iua atokotxikana ate aua ninoa ãkixinireẽ. Ikara atoko ininiã, nota sãkire mauiãkani ïkorapokoriti auikapanikariko pite iokanatinino nota. ²² Ininiã erekari notamoni pisikakiti, piotximere, nisikapekana ninoa. Ininiã ninoa xinire ãtika atoko itxauana, ate ãtika aniniua atokokana itxana ninoa. ²³ Nota aua ninoa ãkixinireẽ. Pite aua nota ãkixinireẽ. Ikara atoko ininiã peerekari, kotxi ãtika itxaua ixinirena. Ikara atoko ininiã nisãkire mauiãkani

imarotariko pite iokanatinino nota. Apaka ninoa imarotari nota pitiretini atokotxikana, pitiretinina ninoa apaka.

²⁴ —Niri, ninirekari ninoa notamoni pisikakini notakata auini ìkapani. Ninirekari ninoa atamatiniri ikinipoko erekari notamoni pisikakiti, niotximere pisikakiti, kotxi pite turetano nota itixi kamiko apisa. ²⁵ Niri, atão inakarínoka kamakarii pite. Kãkiti ìkorapokoriti auakani kona imarotai pite. Iuaritika nota imarotai pite. Ninoa imarotari pite iokanatinino nota kãkitimoni. ²⁶ Nisãpiretapekai pite kãkitimoni. Apikomoni nisãpiretapanikariko pisãkire. Ininiã pitiraõki notamoni auakari ninoamoni auako. Ininiãkara nota aua ninoa ãkixinireẽ.

18

Xesosi Maĩkiko Pirena

(Mateo 26.47-56; Marko 14.43-50; Arókasi 22.47-53)

¹ Teoso imisãkiretaka atoko, Xesosi ìpiriãtari sõtoãri Setorõ inakori. Iuaã aua amãtiirinape. Ininiã Xesosi sari iuaã imoianariakorikata. ² Xotasi, Xesosi mĩkapiritakari, imarotari Xesosi imoianariakorikata itotiniri iuaãtaã isinina. ³ Ininiã Xotasi sari amãtiirinapemoni ãtikaka sotatoakorikata, Teoso misãkiretiko aikoti nĩkatakanikata. Sasetotxi auĩteakori, pariseoakorikata sari iuaãtaã apaka. Ikeekotxi, tirikapi pakini anikana. ⁴ Xesosi imarotari ikinika iuamoni ìkamakitina tĩkane. Imarotapekari ninoa nirekakari okinirina iua. Iuaritika isari ninoamoni. Ipimaãna:

—Kiripa hinitanãta?

⁵ Ininiã ninoa:

—Xesosi Nasareekirira anita —itxana.

Ininiã Xesosi:

—Iuakarano nota.

Iuasaaki Xotasi, Xesosi mĩkapiritakari, aua ninoakata. ⁶ Xesosi “iuakarano nota” inakasaaki, osipikana, ixitipe irika itxana.

⁷ Iuaĩkana Xesosi pimaãna:

—Kipa hinitanãta?

—Xesosi Nasareekirira —itxana.

⁸ —Nitxapekai, iuakarano nota. Nota hinitiniã, hãuiritana nimoianariakori sini —itxa Xesosi.

⁹ Ikara atoko itxa, mitxi isãkire apokini ìkapani. Mitxi itxari Teosomoni: “Kona nomaiãtana nimoianariakori notamoni pisikakini. Kona ãtika !no-maiãta.”

¹⁰ Eereka Simão Petro inakori kosekari iouata auĩte. Isauakari Maoko inakori ìkikomoni ìkĩpita. Iua sasetotxi auĩte apiatakari nitiri.

¹¹ Xesosi txari Petro:

—Pitakaro iouata auĩte omata ãki. Apakatapitika nota kaminiri niri paniãtakiti. Niri nirekapitikari natatsiitiniri nipinini kãkiti ìkapani —itxa Xesosi.

Xesosi Anasi Apisatoõ

¹² Eereka sotatoakori, apaka sotatoakori auĩte, Teoso aikote nĩkatakani pakini maĩkari Xesosi. Iaxirika itxarina. ¹³ Merepanika anikarina Xesosi Anasi inakorimoni. Iua Anasi Kaipasi imatikiri. Iuasaaki iua Kaipasi sasetotxi auĩte apiatakari itxaua. ¹⁴ Iua Kaipasi õtãkikapekana Xoteo auĩteakori. Ia atoko itxa isãkire: “Apiaerekata ãti kiki ipinini ikinimane mapĩkani ìkapani,” itxa Kaipasi õtãkikare.

Petro Kipatari Xesosi Imarotini

(Mateo 26.69-75; Marko 14.54, 66-72; Arókasi 22.54-62)

¹⁵ Simão Petro, äti Xesosi moianari pakini asikatikinitari Xesosi Anasi aapokomoni anikikosaaki. Mitxipeka sasetotxiakori auíte apiatakari aõkitapekari iua äti Xesosi moianari. Ininiã iua ãroã sasetotxiakori auíte apiatakari aapoko Xesosikata. ¹⁶ Petro kaikota iporikiti itore takote. Eereka imoianari sari iporikiti. Imisãkiretaro ãronakikoãtaã tore nãkatakaro. Ininiã oãuiritari Petro ãroini.

¹⁷ Oa txari Petro:

—Pite ikira Xesosi moianarikai? —otxari.

—Kona —itxaro.

¹⁸ Iuasaaki katxãkareri aua, ininiã nitiritxiakori, Teoso misãkiretiko aikoti nãkatakani pakini kamari xamina. Xamina ãtinipoki irokanãtauana. Petro ninoakata aua iuasaaki.

Xesosi Sasetotxiakori Auíte Apisatoõ

(Mateo 26.57-68; Marko 14.53-65; Arókasi 22.54, 66-71)

¹⁹ Iroko äki Xesosi sasetotxi auíteakorikata aua. Ininiã sasetotxiakori auíte apiatakari misãkiretari Xesosi:

—Pisãpiretano pimoianariakori, pisãkire poerekakiti pakini —itxari.

²⁰ Xesosi apakapapiretari:

—Ätipirika nisãpiretapikai hãte. Nitotari noerekarauatini aiko Xoteo apotitiniãtaãua, Teoso misãkiretiko aikotiã apaka. Kona nikipatari nisãkire. Ikinipoko kenakotari noereëkiti. ²¹ Ininiã kinirepa hãpimaãno? Hãpimaãna nisãkire kenakotakani. Ninoara imarotari noereëkiti —itxa Xesosi.

²² Xesosi ikara atoko isãkirauatakasaaki, Teoso misãkiretiko aikoti nãkatakari aritoõtari Xesosi.

—Atokope. Kona ikara atoko pitxape sasetotxi auíte apiatakarimoni —itxari.

²³ Ininiã Xesosi:

—Nikerokiniãri nisãkire, pisãpiretano nikerokakiti, txamari kona nikerokari. Atão nisãkire, ininiã kinirepa piaritano? —itxa Xesosi.

²⁴ Eereka Anasi iokanãtari Xesosi iaxirikiko. Eereka anikarina sasetotxi auíte apiatakarimoni, Kaipasi inakorimoni.

Iuaãkana Petro Kipatari Xesosi Imarotini

(Mateo 26.71-75; Marko 14.69-72; Arókasi 22.58-62)

²⁵ Petro iporikiti aua iuasaaki. Ininiã apanakini pimaãri:

—Ikira kiki moianarikai pite? —itxarina.

Ininiã iua:

—Kona —itxa.

²⁶ Äti sasetotxi auíte apiatakari nitiri, Petro kisauakakãpitatakiti nirimane iua. Iua pimaãri Petro:

—Pitekani amãtiirinapeãtaã nitika iuakata? —itxari.

Iuaãkana Petro txari:

—Kona notani.

²⁷ Iuasaakipeka patari sãkirauata. Iuasaakipeka mitxi Xesosi sãpiretakiti iaõka auape.

Xesosi Pirato Apisatoõ

(Mateo 27.1-2; Marko 15.1-5; Arókasi 23.1-5)

²⁸ ãkanõkapanika ninoa takanapari Kaipasi aapoko, Anikarina Xesosi Homano auíte auinimoni, kãkiti misiritiko imarotiko pakitamoni. Xoteo auíteakori kona nirekari aiko äki ãroinina. Kona inirekarina äti uãka takote iitopãkinina. Äti uãka takote iitopãkiniãna, kona apakata nipokori inikinina Pãskoã kiiniritiã. ²⁹ Ininiã Pirato pokãka porikiti Xoteo imisãkiretini ãkapani. Ininiã Pirato txana ninoa:

—Kixikapa himinatari ikira kiki notamoni? —itxana.

³⁰ Ininiã ninoa txari:

—Maerekati imakamakaniã, kona ate minari iua pitemoni.

³¹ Ininiã Pirato:

—Hĩteka xinikari maerekati ikamakiti, ininiã ixika auiniã hĩteka misiritari iua. Hĩkiomaneakorini sãkire iaõka himisiritari iua —itxa Pirato.

Xoteoakori apakapapiretari:

—Kona apakata aõkiniri iua, kotxi hĩte Homanoakori ! auiritaua aõkiniri kãkiti. Pitenokara apakata okiniri iua —itxana.

³² Ikara atoko inaãka, mitxi Xesosi sãkire iaõka apokini ĩkapani, kotxi mitxi isãpiretpekari aamina ĩpiriãmitakari nopini ipinini.

³³ Pirato ĩroã kãkiti misiritiko imarotiko pakita ãki iuaĩkana. Ipĩkapiretari Xesosi. Ipimaãri:

—Pitekani Xoteoakori auĩte txataua? —itxari.

³⁴ Ininiã Xesosi txari: —Piteka sãkirekani ikara? Atxiĩti apanakini sãkire atokotxikana pipimaãno atxiĩti? —itxa Xesosi.

³⁵ Pirato apakapapiretari:

—Xoteokani nitxataua? Konapitini. Piteka nirimane, pinirimane auĩteakori pakini sikai pite notamoni pimisiritiko tĩkane. Kixikapa? Kipa maerekati pikamakiti? —itxa Pirato.

³⁶ Ininiã Xesosi:

—Auĩtetxi nininiãtaãua kona ĩkorapokoritini. Nitixine ĩkorapokoriti inaãkamako, ninitiriakori neenamauatamako, ininiã Xoteoakori kona maĩkamanoko. Auĩtetxi nininiãtaãua ãtiãtaãra —itxa Xesosi.

³⁷ Pirato txari Xesosi:

—Ininiã auĩtetxikani pitxataua?

Ininiã Xesosi: —Atãopitikara pisãkire auĩtetxi nininiua. Niponaniã ĩkorapokoriti auĩtetxi nininiua ĩkapani. Itixi napoka atãoene nisãpiretini ĩkapani. Atãoene nirekakani auikari nisãkire —itxa Xesosi.

³⁸ Ininiã Pirato:

—Kiripa atãoene txaua?

Xesosi Okiko Nirekiko

(Mateo 27.15-31; Marko 15.6-20; Arókasi 23.13-25)

Eereka Pirato iuaĩkana mapara isa Xoteoakori imisãkiretini ĩkapani. Itxari:

—Kona nota apokari maerekati ikamakiti. ³⁹ Hĩte itotari maerekati kamakari kateia ãki auakari nisikakini Páskoa kiiniritisaaki. Hĩte nirekatari nisikakiniri ikira Xoteoakori auĩte? —itxa Pirato.

⁴⁰ Ikinimanekana akiripoakatana:

—Kona iuani. Pahapasira anireka.

Txamari iua Pahapasi kokaniri. Iua naiatapekari Homanoakori.

19

¹ Ininiã Pirato paniãtari sotatoakori noropatiniri Xesosi. ² Ininiã sota-toakori kamari saporieãta atoko inakari, kotipiaro kamakori. Ieretakari Xesosi kiiã. Auĩtetxi mãka poporeri itakana Xesosi nopini. Ikara atoko ininiã, inapetarina Xesosi. ³ Ikara atoko itxana inapetinirina:

—Aãuĩte —itxarina Xesosi inapetinina.

—Xoteo auĩtekai pite —itxarina.

Ininiã iuasaaki iaritarina itoõ.

⁴ Iuaĩkana Pirato sari mapara iuaĩkana Xoteoakori imisãkiretini ĩkapani.

—Hĩtakaõtxikari. Hĩtemoni nimirari iua, kotxi ninirekari himarotiniri, ! napokari maerekati ikamakiti. ⁵ Ininiã Xesosi apoka mapara. Saporieãta kotipiaro kamakori ikiiã, auĩtetxi mãka pakini aua iuamoni. Ininiã Pirato txari:

—Hãtamatarari iua.

⁶ Sasetotxi auñteakori, Teoso misãkiretiko aikoti nãkatakani pakini atamatakasaakiri, ninoa akiripoakata:

—Hõkariko iua. Hõkariko iua. Aamina ãpiriãmitakari nopini hõtokakitariko — itxana.

Ininiã Pirato:

—Hõteka anikari. Hõteka okari iua aamina ãpiriãmitakari nopini, kotxi kona napokari maerekati ikamakiti.

⁷ Ininiã Xoteoakori:

—Akiomane sãkire paniãtari kãkiti iua atoko inakari okiko, kotxi iua sãkire: “Teoso ãkirirano nota,” itxa —itxana Xoteoakori Piratonomi.

⁸ Xoteoakori sãkire ikenakotakasaaki, apia pãkareta Pirato. ⁹ Ininiã iuaãkana ãroã kãkiti misiritiko imarotiko pakita ãki. Iprimaãri Xesosi:

—Nanipa pina?

Txamari !kasãkireri Xesosi.

¹⁰ Ininiã Pirato:

—Kona pinirekatari pimisãkiretinino? Pixinikariko ia nisãkire. Nota posotari nisikakinii. Apaka nota posotari nokinii aamina ãpiriãmitakari nopini — itxa Pirato sãkire.

¹¹ Xesosi apakapapiretari:

—Kona pite auari posotiiretxi pokinino ãkapani. Ikara inakari piposotiire auiniã, Teosonanira sikai ikara posotiiretxi. Nota sikanapakani pitemoni kamari apiata maerekati.

¹² Pirato ikara atoko inakari ene ikenakotakasaaki, iua ãkixinireẽ ixinikari: —Kiatokopa atxiñti nisikakari Xesosi?

Inirekari Xesosi isikakini. Txamari Xoteoakori akiripoakata:

—Pisikakiniãri ikira kiki, kona Sesa moianari !pitxaikauako. Iua sãkire: “Auñtetxi apiananiri nitxaua.” Sesanoka auñtetxi apiananiri —itxana Xoteoakori.

¹³ Pirato ikara atoko inakariene ikenakotakasaaki, iminari Xesosi iporikitimoni. Ininiã Pirato topãka. Iuaã kãkiti misiritiko isãpiretiniãtaã. Kãkiti takauãkatari iuaã “Kimapori kai kamakori” inaãka. Xoteo sãkireẽ “Kapataa.” Iuaã auñtetxi iokanatarari maerekati kamakari imisiritikomoni. ¹⁴ Iuasaaki apaniãxiti takote. Iua õti Pãskoã kiiniriti potorikinii õti apisa. Iuasaaki Pirato txari Xoteoakorimoni:

—Hãtamata, hãauñte.

¹⁵ Ininiã iuaãkana ninoa akiripoakata:

—Piokanatariko ere. Piokanatariko ere. Hõkariko aamina ãpiriãmitakari nopini —itxana sasetotxi auñteakori.

Ininiã Pirato:

—Hinirekatari nokiniri hãauñte aamina ãpiriãmitakari nopini?

Ininiã ninoa:

—Ãtikara ate auñte. Sesanokara ate auñte —itxana ninoa.

¹⁶ Ininiã Pirato sikari Xesosi sotatoakorimoni aamina ãpiriãmitakari nopini okiko tãkane.

Xesosi Tokakitaãka Aamina ãpiriãmitakari Nopini

(Mateo 27.32-44; Marko 15.21-32; Arókasi 23.26-43)

Ininiã anikarina Xesosi. ¹⁷ Xesosi anikari aamina ãpiriãmitakari iuaka okiko ãkapani. Isana ixirata “Kiitãtatxi” inakorimoni. Xoteo sãkireẽ, “Kóokota,” inakori.

¹⁸ Iuaã aamina ãpiriãmitakari nopini itokakitaãka Xesosi. Apaka ipi kiki tokakitaãka iua takote. ãti Xesosi kikomoni. ãti isanaremoni. ¹⁹ Pirato paniãtari iõkatsopari aamina ãpiriãmitakari nopini tokakitiko. Ia atoko itxa iõkatakiti: “Xesosi Nasareekiri, Xoteoakori Auñte.” ²⁰ Itomaneri Xoteoakori

atatsopatari iua, kotxi Xesosi okikoãtaã sitatxi takote. Sitatxi sikani na-paãpotakasaaki, atamatarina iua iõkatsopari. Ia iõkataãka Xoteo sãkireẽ, Kreko sãkireẽ, Homano sãkireẽ pakini ikinimane imarotiniri ìkapani. ²¹ Ininiã sasetotxi auñteakori txari Pirato:

—Kona piõkatsopatapiri, “Xoteoakori auñte.” Piõkatsopatariko iuanoka uãkatari Xoteoakori auñte ininiua —itxana.

²² Ininiã Pirato:

—Auape niõkatsopatakiti. Kona iuaĩkana niõkatsopatari —itxa Pirato.

²³ Xesosi itokakitakana atoko, sotatoakori kosekari Xesosi mãka. Imatsorakitarina. Imãka mata imatsorakitana ninoa ipi ipi pakini apakapini ìkapani. Æti sotato apakapari ipixini, Æti sotato apakapari ipixini, itxaãpota. Xesosi mãka, Æti imãka patapi auakari, !imatsorakitana, kotxi iotsare !auari. Peerekari. ²⁴ Sotatoakori itxakakana:

—Kona amatsorakitari ia. Sarauatxi atoko makama, imãka anikakari aimarotini ìkapani.

Ininiã iuasaaki Teoso sãkire iõkatsopatakori kitxakapirĩka iaõka apoka. Iua txari:

Ninoa xanakari nimãka. Isarauatana nimãka anikakari imarotinina ìkapani. Teoso sãkire iaõka sotatoakori kama.

²⁵ Iuasaaki aamina ìpiriãmitakari takote oãua Maria, Xesosi inoro oĩtarokata. Iuaã apaka oãua Maria Matarena inakoro. Iuaã apaka oãua Æto Maria, Krópasi inakori ìtanoro. ²⁶ Xesosi atamatakasaakiro inoro iua takote, atamatakasaakiri imoianari itiretakiti apaka, itxaro inoro:

—Nitiretakito, ere Xoão, pamarite itxaua.

²⁷ Imoianaripekana itxa:

—Aroa pinoro otxaua.

Ininiã eereka iua anikaro oa aapokomoni iuakata oãuini tĩkane.

Xesosi Ipinini Pirena

(Mateo 27.45-56; Marko 15.33-41; Arókasi 23.44-49)

²⁸ Eereka Xesosi imarotari iparĩka xipope. Ikinika Teoso sãkire iõkatsopatakori iaõka apokini ìkapani, itxari:

—Niposonata.

²⁹ Iuaãtaã aua tiitxi. Iua tiitxi Æki aua iãriã katxioãri. Ininiã iuasaaki iokomokarina mapoa atoko inakari iãriãmoni. Aãkeẽ itakarina, Xesosi namaã taka itxarina. Iua aãke isopo inakorike. ³⁰ Iãtaka atoko itxari:

—Ikinika niparĩka uatxapeka ixipopeka.

Inaãka atoko iokirikiita, iokanata itxari ixinire irimoni. Iuasaakipeka ipina itxa.

Sotato Iorotari Xesosi Iomĩtiã

³¹ Iua õti sesta veira, kãkiti tomatiko õti apisa. Xoteo auñteakori paniãtari Pirato aamina ìpiriãmitakariã auakani tapike kapatakiko, katima ipĩka ininina ìkapani, iĩtona makatxakiko ìkapani apaka. Tomatiko õtisaaki kona ninoa nirekari ipĩkari ìto kaikotini iuaã. ³² Ininiã sotatoakori sari iuaã. Ikapatarina Xesosi takote auakani tapike. ³³ Txamari sotato atamatakasaakiri Xesosi, !auaika. Ipĩpeka. Ininiãkara kona ikapatakari itapike. ³⁴ Sotato iorotari Xesosi itanapitaã iomĩtiã. Iuasaaki iarẽka, Æparaã pakini xiketa.

³⁵ Notara itikari Xesosi ipinini, ininiã atãopitikara nisãpiretakiti. Nisãpiretari ikinika nitikakiti. Nimarotari nisãkire atão inini, ininiã nisãpiretai ia atatsopatanii, hĩte apaka auikiniri ìkapani. ³⁶ Teoso sãkire iõkatsopatakori kitxakapirĩka txari:

Kona Ætika iua api !kapatakaãka.

Ininiãkara kona Xesosi api kapatakaãka, Teoso sãkire iõkatsopatakori iaõka apokini ìkapani. ³⁷ Æti Teoso sãkire iõkatsopatakori txari: Ninoa atamatariko iorotakitina.

Xesosi Katiko Pirena

(Mateo 27.57-61; Marko 15.42-47; Arókasi 23.50-56)

³⁸ Eereka Xosee, Arimateia sitatxitikiri, amanaãri Xesosi ìto Piratomoni. Iua Xosee auikari Xesosi sãkire, txamari ikipatari Xesosi sãkire auikini, kotxi ipìkari Xoteo auìteakori. Amanaãkasaakiri Xesosi ìto, Pirato txari:

—Ari, panikari iua.

Ininiã Xosee anikari Xesosi ìto. ³⁹ Iuasaaki imoianari Nikotemo inakori. Iua Nikotemo mitxipeka sari Xesosimoni ìkanõka imisãkiretiniri ìkapani. Iua moianatari Xosee, Xesosi ìto apakapakasaaki. Nikotemo anikari aãtsopa aroesi inakori, miha inakori pakini ìkoke Xesosi ìtoã taãkori tìkane. Trìta sìko kiro pakini iua ìkoke anika. ⁴⁰ Ninoa ipi iapirikari Xesosi ìto mãkatxi mataã ìkokekata. Ikara atoko Xoteo kamari ipìkari ìtoã ìkatiko apisa.

⁴¹ Xesosi aamina ìpiriãmitakari nopini takikoãtaã, iuaã takote aua amãtiirinape. Amãtiirinapeãtaã aua akauari amanepanika inakari. Kona ipìkari ìto takaãkapanika iuaã. ⁴² Iua akauari kona õtakori, ininiã itakarina Xesosi ìto iuaã, kotxi Xoteo tomatini õti apokanapanoka.

20

Akauariã Xesosi Ìto Mauakani

(Mateo 28.1-8; Marko 16.1-8; Arókasi 24.1-12)

¹ Tomìko ìkanõkapanika, Maria Matarena sari akauarimoni. Oãpokasaaki, oãtamatarì akauari tore kai auìte kamakori makatzakapeëkaika. ² Ininiã omiteka Simão Petromoni. Xesosi moianari itiretakitimoni apaka osa. Oãkiritana:

—Apiananiri ìto makatzakaãka akauariã. Kona aimarotari namonireuako itakapirina —otxana.

³ Ininiã Petro, ãti Xesosi moianarikata sari akauarimoni. ⁴ Imitekana. Iua ãti Xesosi moianari miteka katimaritika, ininiã inapari Petro. Ininiã iua apoka Petro apisa. ⁵ Iãka aariko ãki atamatini ìkapani. Atamatari mãkatxi mata, ipìkari iapirikiko. Kona ìroã. ⁶ Iuasaaki Petro apoka iua tikini. Ìroã aariko ãki. Atamatari mãkatxi mata. ⁷ Atamatari mãkatxi mata, mitxi Xesosi kiiã iapirikiko. Iporiãmatataãka. Ìkikomoni aua ãti mãkatxi mata. Isanaremoni aua ãti mata. ⁸ Ininiã iua mitxi apoãkari ìroã, atamata itxari. Ininiã auikari Maria sãkire. Iuasaakiika auikari Xesosi õkitikiniua. ⁹ Iuasaaki ninoa kona iteene imarotapanikari Teoso sãkire iõkatsopatakori kitxakapirìkari, kotxi Teoso sãkire sãpiretapekari Xesosi ipinini, eereka õkitikiniua. ¹⁰ Eereka Petro ãti Xesosi moianarikata kanapiriã aapokomonina.

Xesosi Oerekaua Maria Matarenamoni

(Mateo 28.9-10; Marko 16.9-11)

¹¹ Maria Matarena kaikota aariko iriko takote. Otxiapanãtakasaaki, amaãtiki opapìkakiita oiãkakiita aariko iriko ãki oãtamatinì ìkapani. ¹² Oãtamatana ipi Teoso nitiriakori iaxitikini. Imãkana kasarori. Iitopãkana mitxi Xesosi ìto auiniãtaã. Æti mitxi Xesosi kii auiniãtaã, ãti mitxi ikiti auiniãtaã. ¹³ Itxarona:

—Kinirepa pìtxiapanãta? —itxana.

Ininiã oa:

—Imakatzakaãka niauìte ìto. Kona nimarotari iito takikoãtaã —otxana.

¹⁴ Iuasaaki oporikimoni osapotorika. Oãtamatarì Xesosi, txamari !oimaro-tari.

¹⁵ Ininiã Xesosi:

—Kinirepa pitxiapanãta? Kiripa pinita? —itxaro.

Ouãkatari Xesosi amãtiirinape nĩkatakari ininiua. Ininiã otxari:

—Pite makatxakiniãri iua ãto, ininiã pisãpiretano ãto pitakiniãtaã. Ininiã nanikariko ãtiãtaã —otxari.

¹⁶ Ininiã Xesosi txaro:

—Maria.

Ininiã okirioka iuamoni. Otxari osãkireẽ:

—Haponii.

Popĩkari sãkireẽ, “Noereẽkiri,” otxa.

¹⁷ Ininiã Xesosi txaro:

—Kona pimaãtakapeno, kotxi nirimoni kona nisapanika. Pisa nitariakorimoni. Pitxanako: “Nota sariko nirimoni, hĩte iritxikana apaka. Nisariko niTeosonemoni, hĩTeosonetxikana apaka,” itxa.

¹⁸ Ininiã Maria Matarena sari Xesosi moianariakorimoni:

—Natamatapekari aãũte —otxana.

Ininiã osãpiretana ikinika Xesosi sãkire.

Xesosi Oerekaua Imoianariakorimoni

(Mateo 28.16-20; Marko 16.14-18; Arókasi 24.36-49)

¹⁹ Iua Tomĩko ãkanõkati Xesosi moianariakori apotiitaua. Iuasaaki itotarina ikinika aapokotxi tore, kotxi ipĩkana Xoteo aũteakori. Iuasaaki Xesosi tokiã aapokotxi ãki ninoa sauaki.

—Erekaxinire hĩtxako —itxana ninoa.

²⁰ Ikara inaka atoko oerekari iuako karo. Oerekari itanapita karo. Ininiã Xesosi atamatakasaakina, imoianariakori iteene poxokoniuata. ²¹ Iuaĩkana Xesosi txana:

—Erekaxinire hĩtxako. Niri iokanatinino atokotxikana, niokanatai hĩte niri nireẽkiti hĩkamini ãkapani.

²² Iuasaaki ixõkana. Itxana:

—Hãpakapariko Erekari Matamatakoti. ²³ Apakata pisãpiretiniri nota sãkire auiãkari, imaerekani makatxakaãkapeka. Apakata pisãpiretiniri nota sãkire mauĩkani, imaerekani !imakatxakaãka —itxa Xesosi.

Xesosi Oerekaua Tomeemoni

²⁴ Xesosi imoianariakorimoni oerekasaakia, Tomee Txĩtximo inakori kona aua ninoakata. ²⁵ Ininiã apanakini sãpiretari Tomee:

—Ate aõkitari Xesosi —itxana.

Ininiã iua:

—Iuako karo nimatamatakaniã, iuako karo nimakaaiakakaniã niuakokiã, kona nauikari hĩte sãkire. Itanapita karo nimakaaiakakaniã, kona nauikari hĩsãkire —itxa Tomee.

²⁶ ãti semanati napaka atoko, Xesosi moianariakori apotiitaua iuaĩkana aapokotxi ãki. Iuasaaki Tomee aua ninoakata. Aapokotxi tore itotaãka, iuaritika Xesosi tokiã ninoamoni:

—Erekaxinire hĩtxako —itxana ninoa.

²⁷ Iuasaaki itxari Tomee:

—Patamata niuako. Pikaaiakariko piuakokiã nitokakitiko karoã. Nitapita iorotikomoni pitakari piuakoki. Kona mauikaretika !pitxape. Pauikariko nisãkire —itxari.

²⁸ Ininiã:

—Niauũte, niTeosone —itxa Tomee.

²⁹ Ininiã Xesosi:

—Uatxa pite auikari auãki ninini, kotxi patamatano. Kãkiti nota maõkitakani auikiniãri nisãkire, apakapariko apiata erekari Teoso sikakiti —itxa Xesosi.

³⁰ Xesosi kamari apikomoni iposotiire imoianariakori sauaki. Iposotiire ikamakiti imakinika kona iõkatsopataãka ia iõkatsopariã. ³¹ Ia niõkatsopata Xesosi Teoso mereëkiti, Teoso ãkiri ininiua hãuikini ìkapani. Ikara atoko hãuikiniã, hãuapininiika hĩtxako Xesosi posotiireë.

21

Xesosi Oerekaua Setxi Imoianariakorimoni

¹ Äti õti Xesosi oerekaua iuaĩkana imoianariakorimoni ipoa Txiperiatxi inakori tiniã. Ia atoko iua oerekaua:

² Iuaã aua Simão Petro. Iuakata aua Tomee Txítximo inakori. Natanaeo, Kanaa aapokotxitikiri, Kariréia tõpa auakari apaka aua iuakata. Sepeteo anaakori apaka aua iuakata. Apikomoni ipi Xesosi moianariakori apaka aua iuaã. ³ Simão Petro txana:

—Nota okatsaãtako —itxa.

Ininiã apanakini:

—Ari, ate apaka okatsaãtako pitekata —itxana. Ininiã isana. Kanauaã iereëtauana. Ìkanõka okatsaãtana, txamari !imaĩkarina ximaki. ⁴ Ìkanõkapanika Xesosi ikipatxitemoni tĩpokonãta, txamari !imarotarina Xesosi iuaã auini.

⁵ Xesosi akiritana:

—Namariteakori, kaiomaãi ereë? —itxana.

—Kona kaiomaãua —itxarina.

⁶ Ininiã Xesosi paniãtana:

—Hĩtakariko hetxi hĩkikomoni. Ereë hãpokariko ximaki —itxa Xesosi.

Ininiã ninoa okari hetxi ikikomona. Eereka kona iposotaikarina ikosekinirina hetxi kanaua ãki, ximaki itori imaĩkinina xika. ⁷ Xesosi moianari itiretakiti txari Petromoni:

—Aãuĩtekara.

Ikara inakari sãkiretxiti ikenakotakasaaki, Petro ieretakari imãka, mitxi imakatzakakiti, oka itxaua ipoamoni Xesosimoni isini ìkapani. ⁸ Apanakini kanauaã ina. Ikosekaãpotarina hetxi. Iuasaaki ximaki xãpoka hetxiã. Itakoã !ĩtakori, atxiĩti seĩ metronoka. ⁹ Ikanĩkiĩtakasaakina, atamatarina xamina. Ximaki iropike nopini auape. Apaka auari komiri.

¹⁰ Xesosi txana:

—Himinari ximaki himaĩkakiti mapake.

¹¹ Ininiã Petro kosekari hetxi imiriĩ. Xãpoãkata ximaki. Sëtosĩkoëta tres ximaki mitapoakari aua. Kaiãopokori ximaki, iuaritika hetxi kona tsorakita.

¹² Xesosi akiritana:

—Uai hina. Manipokota.

Kona ãtika imoianari kona kataparaxinire ipimainiri iua: “Kiriparai” ininiri iua, kotxi ninoa imarotari iua Apiananiri ininiua. ¹³ Ininiã Xesosi apoka ninoamoni. Ixanakari komiri, ximaki pakini, sika itxana ninoamoni.

¹⁴ Ikara õti apisapanika, Xesosi ipinaka atoko, õkitikaua atoko, oerekapekaua ipikata imoianariakorimoni.

Xesosi Misãkiretari Petro

¹⁵ Inipokotaka atoko Xesosi pimaãri Simão Petro:

—Simão, Xonasi ãkiri, kipa apiata turetano nota, pitekani, nakirakani? —itxa Xesosi.

Ininiã Petro txari:

—Ari, Apiananiri, pimarotari nota apokaerekatini —itxa Petro.

Ininiã Xesosi:

—Poerekari nisãkire soti auĩte anaakorimoni, ninakitiakorimoni.

¹⁶ Iuaĩkana ipimaãri:

—Simão, Xonasi ãkiri, atão pitiretatano nota? —itxa Xesosi.

—Ari, Apiananiri, pimarotari napokaerekatini —itxa Petro.

Ininiã Xesosi:

—Pinĩkatana soti auĩte, ninakitiakori —itxa Xesosi.

¹⁷ Iuaĩkana ipimaãri:

—Simão, Xonasi ãkiri, pitiretatano nota?

Ininiã Petro matinaniuata ixinireẽ, kotxi Xesosi pimaãri ipi ãti pakinikata “Pitiretatano nota.”

Ininiã Petro:

—Apiananiri, pite imarotari ikinipoko. Pimarotapitikari nitiretinii pite.

Ininiã Xesosi:

—Poerekari nisãkire soti auĩte ninakitiakorimoni. ¹⁸ Atão nitxai. ãtokoripanika pinakasaaki, piteka pieremãkataua. Pisari pinirekinimoni. Kiomãtxi pinakasaaki, pitamẽkakanoketauako, ininiã ãti ieremãkatai. Eereka anikai pimanirekakanimoni —itxa Xesosi.

¹⁹ Ikara atoko Xesosi sãkire, kotxi ikara atoko itxako Petro ipinini. Petro ipinini iteene paxitariko Teoso, ininiã kãkiti txariko: “Peerekari Teoso.”

Ininiã Xesosi:

—Pikapokitano nota. Ninireẽkiti pikamako —itxa Xesosi Petromoni.

Xesosi Iteene Tiretakiti

²⁰ Petro kirioka. Atapari Xesosi moianari, itiretakiti ninoa tikini inini. Iuakara mitxi Xesosikata iitopãka Pãskoa kiiniritisaaki. Iuasaaki ipimaãri Xesosi: “Niauĩte, kiripa mĩkapiritai?” ²¹ Petro atapakasaakiri Xesosi tiretakiti ninoa tikini inini, ipimaãri Xesosi:

—Natokopa itxatako ere ipinini?

²² Ininiã Xesosi:

—Nota nirekiniãri iua auapanika inini nikanapiriãkasaaki, kona nisãpiretai pite. Kona pixinikapiri iua. Pixinikari piteka kaminiri nota nireẽkiti —itxa Xesosi.

²³ Ininiã iaripireta Xesosi sãkire auiãkanimoni, iua imoianari itiretakiti imapinakani Xesosi kanapiriini apisa. Txamari Xesosi !isãpiretari imapinakanani. Iua txari: “Nota nirekiniãri iua auapanika inini nikanapiriãkasaaki, kona nisãpiretai,” itxa Xesosi.

²⁴ Nota ikara Xesosi moianari itiretakiti nitxaua. Nota itikari imakinika Xesosi kamakiti. Ininiã nota iõkatsopatarikamakiti, isãkire pakini. Ininiã aimarotari atão nisãpiretakiti.

²⁵ Auapanika itori Xesosi kamakiti. Ikinika ikamakiti !kaiõkatikopanikari. Ikinika niõkatsopatinã, !apakata, kotxi itixi kona apakata kaiãopokori aãtsopa auini.

ÁTOSI Xesosi Iokanatakini Kamakiti Pirena

Xesosi Kanapiriini Iaxiti

¹ Erečkai Teópiro, Teoso tiretakari. Merepitipanika niőkatsopatakiti aätsopaã txari ikinipoko Xesosi kamakiti, isãpiretakiti pakini. ² Niőkatsopatakiti mapotökire auari Xesosi iaxiti sini pirena. Isini apisa isãpiretana iokanatakini Erekar Matamatakoti paniãtakiti.

³ Ipinaãka atoko iuaĩkana iuaka oerekaua ninoamoni, ininiã imarotarina atãopitika iua ökitikapekaua. Koarëta pakini öti iua auanãta ninoakata. Iuasaaki isãpiretana Teoso auĩtetxi ininiãua pirena. ⁴ Imakinika apotiitakasaakiua itxana ninoa:

—Kona hĩtakanapapiri Xerosareẽ sitatxiti. Aĩri iaxitikiri iokanaenetakiti hiãtapako. Iua mitxi hĩtemoni nisãpiretakiti. ⁵ Atãopitikara Xoãoni patxisatai hĩte ãparaaã. Mapaöti napaka atoko, Erekar Matamatakoti apokako hĩtemoni. Iuasaaki hĩpatxisataãkako Erekar Matamatakotiã —itxa Xesosi sãkire.

⁶ Ininiã imoianariakori apotiitakasaakiua Xesosikata, ipimaãrina iua:

—Aãuĩte, uatxa iuaĩkana pisikatari atixine atemoni, Isaeo apika mekaniri-akorimoni? —itxarina.

⁷ Ininiã Xesosi txana ninoa:

—Kona hĩte imarotiniri ĩkapanini. Aĩrinanira imarotapaniri hĩte tixine hĩtemoni isikini öti. ⁸ Erekar Matamatakoti apokasaakirako hĩtemoni, hãpakapariko posotiiretxi. Ininiã hĩte nota kamakiti atamatakani hĩtxauako. Hĩsãpiretariko hĩtiãkiti, himarotakiti pakini Xerosareẽ sitatxiti auakanimoni, imakinika Xotëia tōpa auakanimoni, Samaria tōpa auakanimoni, ikini itixiti auakanimoni pakini hĩsãpireãpotariko —itxa Xesosi ninoamoni.

⁹ Ikara atoko inaãka atoko, ninoa okiã atamatari iua anikiko iaxiti. Katxiãri ãki isa, ininiã kona ninoa itikaikari. ¹⁰ Iaxiti ionakaãtakasaakina, apoka ipi kiki katsopiri mãkatakani ninoa takote. ¹¹ Ninoa txana:

—Kiki Karirëiakini, kinirepa hionakanãta iaxiti? ĩkora Xesosi iaxiti sikari, isini atokotxikana ikanapiriini —itxana ninoa.

Itanokiri Koaã Apotiitakaniua

¹² Ininiã Oriva xirataãtaã ipotorikana. Ikanapiriãna. Xerosareẽmoni isana. Oriva kona ötakori. Kãkiti Oriva xirata potorikakani sini Xerosareẽmoni tako atokokanera Xoteo kiomaneakorini auiritari kãkiti sini tomatiko ötisaaki.

¹³ Xerosareẽ sitatxiti apokasaakina, ĩroãna aapokotxi ãki. Ininiã isana itanokiri koaã. Petroma, Xoãoma, Txiakoma, ãtreema, Piripima, Tomeema, Patoromeoma, Mateoma, Txiakoma (Aoepo ãkiri), Simãoma (Homano omanatakari), Xotasima (ãti Txiako itari) pakini aua iuaãtaã. ¹⁴ ãtipirika ninoa apotiitaua Teoso imisãkiretinina ĩkapani. Apaka sitoakoro Xesosi sãkire auiãkani, Maria Xesosi inoro, Xesosi itariakori pakini apotiitaua ninoakata. Ninoa misãkiretakasaakiri Teoso, ãtika kãkiti xinirenoka atoko itxana. Ininiã erekarinoka auana ninoamoni. Kona omanatakakauana.

Matxia Mereĩko Pirena

¹⁵ Iuasaaki sëtovĩtxi pakini Xesosi sãkire auiãkani aua. Petro ökitikaua ninoa sauaki. ¹⁶ Ininiã itxa:

—Nitariakori, hĩtakaötxikari Teoso sãkire kitxakapirĩka Taviimoni isãpiretakiti. Tavii iőkatsopatari Xotasini pirena, Xesosi mãĩkakani oerekakari pirena, kotxi Erekar Matamatakoti kamaimaroretari iua Tavii. Atão ikara

Teoso sãkire kitxakapirĩkari apokapeka uatxa. ¹⁷ Iua Xotasini atekata auakari iua. Ate parĩka atoko ikama.

¹⁸ —Iuaritika isikari Xesosi imokaiakariakorimoni. Txineiro apakapaki-toã iamotaãka itixi. Iuaã ipĩpe. Itano okaua. Ixiti apokasaaki, iokirikiita. Ixoreka itikako. Iuasaaki itikapitsa poãpekatani. ¹⁹ Imakinika Xerosareẽ auakani kenakopiretari Xotasini ipinini. Ininiã ninoa akiritari iuaãtaã itixi uãka “Aseotama.” Popĩkari akiritari “Arẽkatxi Tixini.”

²⁰ —Xikari iõkatsopatakoriã iõkatsopatapeẽkaika ia Xotasi pirena: Iua aapoko takanapaãkako. Kona auiritaãka kãkiti auini iuaãtaã. Iparĩka sikaãkako ãtimoni, itxa Teoso sãkire.

²¹ —Ininiã amereẽriko ãti kiki atekata sikari tĩkane. Amereẽriko kiki mitxi Xesosikata sikari, mitxi amoianari ikiniõtika Xesosikata aãuakasaaki. ²² Amereẽriko kiki Xoãoni patxisarauatini itiãkari, imakinika Xesosi kamakiti itiãkari, iaxiti isini itiãkari, kotxi anirekari iua amereẽkiti Xesosi õkitikiniua imarotakari ate atoko inakari —itxa Petro.

²³ Ininiã imereẽrina ipi kiki, Xosee Pasapasi inakori. Apanakini akiritari iua Xósito. ãti kiki uãka Matxia inakori. ²⁴ Iposo atoko imisãkiretarina Teoso: —Pite imarotari ikinimane kãkiti ãkixinire. Poerekaua ãkiripa naia kiki pimereẽkiti ²⁵ atekata parĩkauatakari tĩkane, Xesosi iokanatakiti tĩkane, kotxi Xotasini takanapari ikara parĩkatxi imaerekani xika, maerekani misiritikoãtaã isini ãkapani —itxana Teosomoni.

²⁶ Iposo atoko ikamarina sarauatxi atoko inakari imoianarina imarotinina ãkapani. Ikara atoko ininiã, imereẽrina Matxia. Ininiã Xesosi iokanatakiti itxaua. Ikara õti atoko, iua moianatari apanakini õsi Xesosi iokanatakini.

2

Pẽtekósitxi Kiiniriti Õti

¹ Pẽtekósitxi kiiniriti õti (takari merepitipanika nikiko õti) apokasaaki, Xesosi sãkire auiãkani ãtika kãkiti xinire atoko itxauana. Imakinika apotiitauana. ² Katimaritika iaxiti ãkari kataparari ãtimati atoko inakari xãpoka aapokotxi ãki Xesosi moianariakori topãkiniãtaã. ³ Ininiã iuasaaki xamina tirika atoko inakari tokiã. Imakinikana ikiiãna apoka. ⁴ Erekar Mata-matakoti ãroã ikinika ãkixinireẽ. Iuasaakipeka ninoa sãkirauata ãti uãka sãkireẽ, kotxi Erekar Matamatakoti kamaimaroretana.

⁵ Iuasaaki Xerosareẽ sitatxitiã auanãta ikini uãkaãti kãkiti Xoteoakori. Ninoa Teoso sãkire kĩpitakani. ⁶ Ikenakotakasaakirina iaxiti ãkari ãtima atoko inakari, apotiitauana mirikiniti kãkiti. Ininiã itikokitatana, kotxi ikenakotarina apanakini sãkirauatini isãkireẽna. ⁷ Itsorĩkaãtana:

—Kiãtokopa ininiãpa imarotatarina ate sãkire. Hãtamatana, Kariréiaklinikara sãkirauanãta ateka sãkireẽ. ⁸ Kiãtokopa itxa akenakotiniri ateka sãkire? —itxana ninoa.

⁹ Iuaãtaã auari kaiãopokori kãkiti ãti uãka. Auari Patxiakinima, Métxiakinima, Erãokinima, Mesopotãmiakinima, Xotéiakinima, Kapatósiakinima, Põtokinima, Ásiakinima, ¹⁰ Piríxiakinima, Pãpíriakinima, Exitokinima, Arípiakinima, Sireni takotekinima, Homakinima pakini aua. Apanakini Homakini atão Xoteoakori. Apanakini mamakaua, ininiã Xoteo itxapekauana. ¹¹ Kretakinima, Arápiakinima pakini aua iuaã.

Ininiã ninoa txa:

—Ate kenakotari Kariréiakini sãkirauatini ateka sãkireẽ. Isãpiretarina ikinipoko erekari Teoso Apiananiri kamakiti —itxana.

¹² Ininiã ninoa tsorĩkaãta. !Imarotarina.

—Natokopa itxana imarotinirina ate sãkire? —itxana.

¹³ Apanakini kãkiti napetana:
—Poãtakanira ninoa —itxana.

Petro Apakapapiretakiti Kãkitimoni

¹⁴ Iuasaaki Petro, õsi Xesosi iokanatakinikata misãkiretana iuaã apotiitakaniua. Itxari:

—Xotéia auakanii, ikinika Xerosareẽ sitatxiti auakanii, hõtakaõtxikariko nisãkire himarotini ìkapani. ¹⁵ Hñuãkatana naia kikiakori poãtini. Kona ipoãtana, kotxi atokatxi inaãpotapanika. ¹⁶ Ia uatxa hãtamatakiti kitxakapirïka Teoso sãpiretapekari Xoeomoni. Iua Xeo Teoso sãkire sãpiretakari sãpiretapekaua. Iua txari:

¹⁷ Teoso txari: “Xipokatxi õti iatokopeka inakasaaki, niokanitari Erekarì Matamatakoti ikini kãkitimoni. Pamariteakori sãpiretariko nisãkire apanakinimoni. Ætokoriakori atamatariko itapone atoko inakari Teoso sikakiti pokamarasaaki. Iuasaaki nisãkire nisãpiretana. Kiomãtxiakori taponetariko nota oerekakiti. Iuasaaki nisãpiretariko nisãkire ninoa-moni.

¹⁸ Ìkora õtisaaki ninitiriakori, niniteroakoro pakinimoni niokanitari Erekarì Matamatakoti. Ninoa sãpiretariko nisãkire.

¹⁹ Iaxiti noerekariko niposotiire kãkiti mimarotakiniti. Ìkorapokoriti apaka noerekariko niposotiire Apiananiri nininiua imarotinina ìkapani. Arëkatxi, xamina, katxiãri pakini apokako.

²⁰ Atokatxi piãkako. Kasiri arëkatxi atoko itxako. Apiananiri apokini apisapanikarako auako ikara atoko inakari. Peerekapaniri Apiananiri apokini õti. Ìkora õti apiatakari, kotxi iuasaaki Apiananiri oerekauako kãkitimoni.

²¹ Ininiã Apiananiri akiritakani makatxakaãkako imapinakani ìkapani,” itxa Apiananiri Xoeomoni.

²² Petro sãkirauatapanika:

—Kãkiti, Isaeokini, hñkenakotariko nisãkire. Hñte apisatoõ Teoso oerekepekari Xesosi, Nasaree sitatxitikiri. Teoso mereëkiti itxaua, kotxi ikamari Teoso posotiire kãkiti mimarotakiniti Teoso himarotini ìkapani. Himarotapekari ikara. ²³ Xesosi sikaãka imokaiakariakorimoni, kotxi Teoso nirekari ikara atoko iniko. Teoso imarotapekari ikara atoko inakari apokini õti. Hñtekara, apanakini maerekati kamakanikata maïkari Xesosi. Aamina ìpiriãmitakari nopini hñtokakitari, oka hñtxapiri iuani. ²⁴ Iuaritika ipinaka atoko, iuaïkana Teoso õkitikari iua. Teoso sikakari iua ipïkitxi mamisiritakaniri ìkapani. Ipïkitxi !iposotari ixipokiniri iua, kotxi Apiananiri itxaua.

²⁵ —Kitxakapirïka Tavii sãpiretari Xesosi pirena. Itxari:

Nota itikapikari Apiananiri nota apisatoõ. Iua aua nikikomoni. Ininiã !nimakatxaãka.

²⁶ Ininiã nixiniire poxokoniuatapeka itxa. Nisãkire poxokoni apaka aua. Niñto auãki inakasaaki, iãtapari Teoso sikaenetakiti.

²⁷ Apiananiri kona takanapano nota ipïkani auiniãtaã. Apiananiri !auiritano Erekarì Kamakari paiakini.

²⁸ Apiananiri oerekepekano mapïkani kimaporite. Iua notakata aua, ininiã nipoxokoniuata,

itxa Xesosi Taviimoni kitxakapirïka.

²⁹ Ininiã Petro sãkirauatapanika:

—Kikiakori, hñuiritano nisãpiretiniri Tavii pirena. Tavii anirimane kitxakapirïka auakari. Iuani ipïpe, ikatapeëka. Uatxa atemoni auapanika iua akauare. ³⁰ Iua Teoso sãkire sãpiretakari. Atão iua imarotari Teoso sãkire.

Teoso sãpiretapekari iua apika mekani Teoso mereẽkiti itxauako. Tavii imarotari Teoso mereẽkiti õkitikaãkapanikako auĩtetxi ininiua tĩkane. Teoso sãpiretari imereẽkiti topãka auĩtetxi itopanere nopini. Ininiã atão auĩtetxi itxaua.

³¹—Tavii imarotari ikara atoko inakari Xesosi apokini apisapanika, kotxi iõkatsopatari Xesosi ipinini pirena, iuaĩkana õkitikiniua pirena apaka. Iua txari: Ipĩkani auiniãtaã !ikaikota. Iĩto !ipaiaka, itxa Tavii kitxakapirĩka.

³²—Iua Xesosi ipinaka atoko, Teoso õkitikari iua. Ate amakinika Xesosi õkitikiniua itikakani atxaua. ³³Ininiã uatxaika Xesosi topãka Teoso kikomoni. Ikara atoko Xesosi Apiananiri itxaua. Apakapari Erekaru Matamatakoti, Teoso sikaenetakiti. Iposo atoko, iokanataru Erekaru Matamatakoti atemoni. Iuakara uatxa hãtamata ikamakiti. Hĩkenakotarui iua sãkire uatxa.

³⁴—Tavii !isari iaxiti auĩtetxi ininiua ĩkapani, iuaritika iõkatsopatari: Apiananiri misãkiretari niauĩte: “Nota kikomoni piĩtopãkiniritika ³⁵nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niauĩte.

³⁶—Ininiã Isaeo auakanii, himarotariko ia. Hĩte okari Xesosi, iuaritika Teoso kamari iua auĩtetxi ininiua. Teoso mereẽkiti itxaua —itxa Petro.

³⁷Iuasaaki Petro sãkire ikenakotakasaakina, ãkixinireẽna tsĩĩtxi apoka iouata iorotiniri tsii atoko itxa. Maerekaxiniretinoka itxana. Eereka itxana ninoa:

—Kiripa akama? —itxana.

³⁸Petro apakapapiretana:

—Himaerekani hĩtakanapa. Hĩte imakinika hĩpatxisataãkako Xesosi Kristo uãkaã, ininiã Teoso makatxakari himaerekani. Iuasaakiko hãpakapari Erekaru Matamatakoti Teoso sikakiti. ³⁹Kotxi ikara Teoso sikaenetakiti hĩte ĩkapani, hamarite ĩkapani, apanakini õtako auakani apaka ĩkapani. Ikara Teoso sikaenetakiti ikinimane kãkiti Teoso akiritakini ĩkapani —itxa Petro.

⁴⁰Petro iteene õtãkikana ninoa, kotxi inirekari atão ikaminina, ininiã itokata õtãkikana ia atoko:

—Īkorapokoriti auakani maerekati kamakani itxauana. Himakatxakaua. Hĩtakanapariko himaerekani. Hãuikariko Xesosi sãkire —Petro txana ninoa.

⁴¹Īkora õti, tres mio kãkiti ipoxokoniritikana auikari Petro sãpiretakiti. Iuasaaki ipatxisataãkana.

Xesosi Sãkire Auiãkani Moianatakakiniua

⁴²Eereka ikiniõtika apaiaõkarina Xesosi iokanatakini oerekakiti. Ātipirika itiretakakauana. Ātipirika ikamarina kiiniri komiri imapixinikinina Xesosi ipinini ixinikinina ĩkapani. Ātipirika imisãkiretarina Teoso. ⁴³Ikinimane tsorĩkaãnãta, kotxi Xesosi iokanatakini kamari ito posotiiretxi kãkiti mimarotakiniti, apanakini Teoso imarotini ĩkapani.

⁴⁴Teoso sãkire auiãkani apotiitapikaua. Ninoa xanakari ikinika inakitina. ⁴⁵Ivẽtxitarina itiina, ininiã tiĩtxi ĩki isikana matxineirotenimoni. ⁴⁶Ikiniõtika aiko ãki Teoso misãkiretikoãtaã apotiitapikauana. Ninoa aapoko ãki ikamarina komiri mapixinikiko kiiniriti. Ātipirika ninoa apotiitaua ipoxokoniritikana nipokori inikinina ĩkapani. Ākixinirena erekapitikari. ⁴⁷Ixikarauatana Teoso ĩkapani. Imakinika kãkiti apokaerekatana ninoa. Ininiã ikiniõtika Teoso makatxakari kãkiti maerekani. Ininiã Teoso sãkire auiãkani apiaãpota.

3

Petro, Matĩpokotakati Pakini

¹ Áti òti mapiātiki Petro, Xoão pakini sari Teoso misākiretiko aikotimoni Teoso imisākiretinina ĩkapani. ² Iuasaaki ikiniòtika kākiti anikari matĭpokotakati Teoso misākiretiko aikoti toremoni. Itore uāka “Peereri.” Iuaā matĭpokotakati amanaāri txineiro iuaā napakanimoni. Iponaniākasaaki matĭpokotakati itxaua iua. ³ Ininiā Petro, Xoão pakini ĩroākasaaki, iua amanaāri txineiro:

—Txineiro hĭsikano —itxa.

⁴ Ininiā Petro, Xoão apaka atamatari iua. Ininiā Petro txari:

—Patamataua.

⁵ Ininiā iua matĭkati atamatana ninoa. Iuākatari txineiro isikinina iuamoni. ⁶ Ininiā Petro:

—Kona auari txineiro atemoni. Kona pirata aua atemoni. Oro apaka ! auari. Iuaritika nota auakiti nisikapitikai. Xesosi, Teoso mereēkiti, Nasa-reekiri, iua uākaā pōkitikauako. Pitĭpokotako —Petro txari iuamoni.

⁷ Ininiā Petro maĭkari iuako ikikomnikiri òkitikiniua ĩkapani. Iuasaakipeka ikiti, ikitinota pakini kataparapeka itxa. ⁸ Ininiā okakataua, tĭpokota itxa. ĩroā Petro, Xoão pakinikata Teoso misākiretiko aikoti āki. Iroākasaaki, okaāpokataua. Itĭpokoāpokata.

—Ari, peerekari Teoso —itxanāta.

⁹ Ikinimane itikari iua tĭpokotini. Ikenakotari ixikarautini Teosomoni. ¹⁰ Ikinimane imarotari iua kiki aiko ĩronakikoātaā “Peereri” inakoriātaā topākanātakari, txineiro amanaānātakari iua. Ininiā ninoa:

—Anekani. Kiripa atxiĭti? Mitxi matĭpokotakati. Uatxa itĭpokotape. Kana-tokopa itxa? —itxana.

Petro Sāpiretakiti Kākitimoni

¹¹ Apanakini kenakopiretana ninoa, ininiā imitekana ninoamoni matĭpokotakati pirena imarotinina ĩkapani. Iuasaaki ninoa auiniātaā akiritaāka “Saromāo pakita.” Iuaā Petro, Xoão pakini aua mitxi matĭpokotakatikata. Iua maĭkakanokeāpotana Petro, Xoão pakini. ¹² Iua Petro atapana kākiti ninoamoni ĩkani. Itxana:

—Isaero auakanii, kinirepa hĭte tikoka ere kiki tĭpokotini hātamatakasaaki? Kinirepa hĭte itikaua ate? Na ate posotiireēni kamari iua tĭpokotini. Ate ereka anini kona kamari iua tĭpokotini. ¹³ Apraāoni, Isakini, Xakooni pakini Teosone, aĭriakorini kitxakapirĭkarini Teosone, iuara oerekapekua imi Xesosi ereka inini. Teoso ākiripitikara itxaua. Iua posotiire auapitika. Iuakara hĭsika okiko ĩkapani. Eereka Pirato inakori nirekasaakiri isikakiniri. Hĭte ! inirekari iua sikakiniri Xesosi. ¹⁴ Iuasaaki hĭte kona nirekari erekarinoka kamakari. !Hinarekari iua atāo inakarinoka kamakari. Hĭte amanaāri Pirato isikakiniri kokaniri hĭtemoni. ¹⁵ Ininiākara hĭte okapiri kākiti auāki inini kamakari. Iuaritika ipĭkani sauaki Teoso òkitikari iua. Ate itikari atāopitikara iua òkitikiniri.

¹⁶ —Ia kiki hĭtikakiti himarotakiti kataparapeka itxa, kotxi iua auikari Xesosi posotiire. Iua auikari Xesosi sākire erekapeka inini ĩkapani. Hātamatari hĭte apisatoō iua ereka inini.

¹⁷ —Ininiā uatxa nitariakori, nimarotari hĭte, hĭte auĭteakori pakini okapiri Xesosi atāo himimarotakani xika. ¹⁸ Kitxakapirĭka Teoso sākire sāpiretakani oerekapekua Kristo misiritiko. Ikara imisiritiko auapeka. ¹⁹ Ikara atoko ininiā, hĭtakanapariko himaerekani. Erekarini kimaporiti hinitako, ininiā Teoso makatxakari himaerekani. ²⁰ Iuasaaki Apiananiri kamapoxokonitai. Isikat-aparatai. Iuasaaki iua iokanatarini Xesosi imereēkiti hĭtemoni. ²¹ Merepanika iua Xesosi kaikota iaxiti. Teoso kamariko imakinika amaneri. Iuasaaki Xesosi apoka iuaĭkana. Iua atokokana itxana Teoso sākire sāpiretakani kitx-akapirĭka. ²² Kitxakapirĭka Moisesi txari:

Apiananiri hĩTeosone iokanatariko isãkire sãpiretakari hĩtemoni nota iokanatiniri atokokana. Hinirimane itxaua iua. Hĩkenakotariko ikinika isãpiretakiti hĩtemoni.

²³ Ikinimane iua sãkire makenakotakati xipokaãkako.

²⁴—Teoso sãkire sãpiretakari Samoeo inakori, eereka ikinikana Teoso sãkire sãpiretakani pakini sãpiretapekari Teoso iokanatiniri imereẽkiti kãkitimoni ĩkorasaaki. ²⁵ Teoso sãkire sãpiretakani anaakorirai hĩte, ininiãkara isãkire ninoamoni, iuatxikana isãkire hĩtemoni uatxa. Itxari Apraãoni:

Áti pimekaniri sikariko erekari ikini itixiti auakanimoni, itxa Teoso. Ininiã ikara Teoso sikaenetakiti hĩkiomaneakorinimoni, hĩtemoni apaka isikaeneta. ²⁶ Ininiã Teoso iokanataru iua ãkiri Xesosi hĩtemoni merepitipanika. Iokanataru iua hĩtemoni erekari hĩtemoni isikini ĩkapani, himaerekani hĩtakanapini ĩkapani —itxa Petro.

4

Petro, Xoão Pakini Xoteo Auĩteakori Apisatoõ

¹ Petro, Xoão pakini sãkirauatapanika kãkitimoni inakasaaki, sasetotxiakori, Teoso misãkiretiko aikoti nĩkatakari, satoseoakori pakini apoka ninoamoni.

² Ininiã ninoa naiataua, kotxi Petro, Xoão pakini sãpiretari kãkiti ipĩkani õkitikiniua pirena, kotxi ninoa txari:

—Xesosi ipinaka atoko, iuaĩkana iua õkitikaua, ininiã ipĩkani õkitikauako.

³ Ininiãkara ninoa maĩkana Xoão, Petro pakini. Iuasaaki mapiãnikata, ininiã itakana kateia ãki ĩkanõka iuaã inapinina ĩkapani. ⁴ Iuaritika itomaneri Petro sãkire kenakotakani auikapiretari iua sãkire. Sĩko mio kikiakori auikari Teoso sãkire Petro sãpiretakiti.

⁵ Katimatinĩkata Xoteo auĩteakori, kiomãtxiakori, kaiõkatsopareriakori pakini apotiimanetaua Xerosareẽ. ⁶ Sasetotxiakori auĩte apiatakari Anasi inakori iuaã aua. Inirimane Kaipasi inakori, Xoão inakori, Arexãtri inakori pakini aua iuaã apanakini sasetotxiakori auĩte nirimanekata. ⁷ Xoão, Petro pakini minaãka ninoa apisatoõ. Ipimaãrina:

—Kiposotiireẽpa hõkitikari matĩpokotakati? —itxana.

⁸ Erekari Matamatakoti moianataru Petro. Ininiã iua txana ninoa: —Aãuĩteakori, akiomaneakori, ⁹ hinirekari asãpiretinii uatxa erekari akamakiti matĩkatimoni. Hinirekari himarotiniiri erekapeka inini. ¹⁰ Ininiã ikinika hĩte, ikinika Isaeo tixini auakani apaka, himarotariko ia. Xesosi Nasareekiri posotiireẽra ia kiki hĩte apisatoõ timakari makananitaãka. Iuara hĩte oka aamina ĩpiriãmitakari nopini. Iuara Teoso õkitika iuaĩkana ipĩkani sauaki. ¹¹ Kitxakapirĩka Teoso sãkire iõkatsopatakori sãpiretari Xesosi hĩte manirekakani, kotxi itxari:

Kai aapokotxi kamakanii, !hinirekari áti kai soro. Iua kai himanirekakiniti apiari itxapekaua. Apanakini kai soro maĩkakari itxaua.

¹² —Xesosinokara makatxakari kãkiti maerekani. Kona áti maerekanitxi makatxakakari !auari ikini itixiti. Teoso sikari iuanokara kãkitimoni imaerekani imakatxakini ĩkapani —itxa Petro.

¹³ Ninoa tsoriãkaãnãtana Petro sãkire ikenakotakasaakina, kotxi Petro, Xoão pakini sãkirauata itaparaxinireritika. Mitxi kona ninoa apaiaõkarauata, iuaritika ninoa imarotari atão isãkirauatini. Ninoa xinikari:

—Ixi. Ninoa minakani. Iuaritika kiĩkitena, kotxi Xesosi moianariakori itxauana —itxana.

¹⁴ Ininiã !kasãkirena, kotxi matĩkati tĩpokotapeka ninoa apisatoõ. ¹⁵ Ininiã ipaniãtana Petro, Xoão pakini mapara isinina, ninoa auĩtetxiakori ininimoni-uana isãkirauatinina ĩkapani. ¹⁶ Ininiã auĩtetxiakori txari:

—Kanatokopa atxatana ninoa? Kotxi ikinimane Xerosareë auakani imarotari itxikitakinirina matĩkati erekape inini. Atãopitikara ninoa kamari posotiiretxi. !Aposotari akipatiniri ia sãkiretxiti, kotxi ikinipoko imarotapekari matĩkati tĩpokotini. ¹⁷ Kona anirekari ikara pirena apikomoni iaripiretini kãkiti sauaki. Ininiã atxanako ninoa: “Na apikomoni Xesosi pirena hĩsãpiretapinikariko.”

¹⁸ Ininiã iuaĩkana akiritana. Eereka itxana:

—Kona hĩsãpiretapinikariko apikomoni Xesosi pirena. Kona hõerekapiriko iuaĩkana Xesosi pirena —itxana.

¹⁹ Ininiã Petro, Xoão pakini apakapapiretana:

—Kiripa atão akĩpitini? Hĩtekani? Teosokani? Kipa erekari? Hĩte mereëri.

²⁰ Kona aposotari atakanapiniri asãpiretiniri aĩtikakiti, akenakotakiti pakini —itxana.

²¹ Ininiã iuaĩkana auĩtetxiakori txitana. Iposo atoko auiritana isinina, kotxi maerekati !ikamana. !Imisiritana, kotxi ipĩkarina kãkiti. Ikinimane kãkiti txari:

—Peerekari Teoso kamakiti matĩkati ĩkapani —itxana.

²² ĩkora kiki makananitakori koarẽta anope iusaaki.

Xesosi Sãkire Auiãkani Misãkiretiniri Teoso

²³ Xoão, Petro pakini sikakikosaaki, ninoa kanapiriã imoianariakorimoni. Ikinika sasetotxi auĩteakori sãkire, kiomãtxiakori sãkire pakini ikinika isãpiretana. ²⁴ Ikara ikenakotakasaakina, ikinikana misãkiretari Teoso. Ininiã itxana:

—Apiananiri, ikinika posotiiretxi auari pitemoni. Pitenanira Teoso pitxaua. Pite kamari iaxiti, itixi, potxoari uiniti pakini. Imakinika iaxiti auakani, itixi auakani, potxoari uiniti auakani pakini pikama. ²⁵ Kitxakapiriĩka Erekari Matamatakoti kamaimaroretari pinitiri aãtokiri Tavii. Ininiã itxari: Kinirepa kãkiti Teoso manirekaãkani omanãkarauata? Kinirepa kãkiti maxikatĩka xinikari maerekati ikamini ãtimoni?

²⁶ Auĩtetxiakori apotiitaua neenamtxi ikaminina ĩkapani. Ninoa apotiitaua Apiananiri inaiatinina ĩkapani, imereëkiti apaka inaiatinina ĩkapani, itxa Tavii.

²⁷ —Atãopitikara Erotxi, Põsio Pirato pakini apotiitaua Xoteo minakonikata, Xoteoakori pakinikata. Ninoa apotiitaua uai ia sitatxitiã. Isãkirauatana pamarite Xesosi okinina ĩkapani. Txamari pite mereëri iua erekarinoka kamakari. ²⁸ Mitxi pite imarotari imakinika ninoa kamakiti tĩkane. Kãkiti kamari pinirekakiti, kotxi kaposotiirei. ²⁹ Ininiã aãũte, pixinikariko ikara maerekapirentati. Pisikataparaxiniretaua ate pinitiriakoriua pisãkire asãpiretini ĩkapani. ³⁰ Pamarite erekari kamakari Xesosi posotiireë pi-makananitanako amianatakani. Kãkiti maposotakiniti pikamako. Posotiiretxi pikamako pisãkire aõerekini ĩkapani. Ikara pikamako pamarite Xesosi posotiireë —itxana ninoa Teosomoni.

³¹ Teoso imisãkiretaãkana atoko, ninoa apotiitiniãtaãua iakeka. Erekari Matamatakoti apoka ikinimanemoni. Ininiã itaparaxinireritikana isãpiretarina Teoso sãkire kãkitimoni.

Teoso Sãkire Auiãkani Moianatari Itariakori

³² Ikinika Teoso sãkire auiãkani ãtika kãkiti xinire atoko itxauana. Kona itxana: “Nota nakitira ia,” kona itxana. Kapotxinaniri !auari. Ninoa xanakari ikinika itiina. ³³ Xesosi iokanatakini itaparaxinireritikana txari ikinimanemoni:

—Xesosi Apiananiri iuaĩkana õkitikaua ipinaka atoko. Ate imarotari, kotxi ate aõkitari iua ipinaka atoko —itxana kãkitimoni.

Ininiākara Teoso sikari ikinika erekari ninoamoni. ³⁴ Ninoa sauaki tiitxi amonitakari !auari. Kikio ipi auiniāri, kakikioteri vētxitari ātika. Aapokotxi ipi auiniāri, kaapokori vētxitari ātika. Oa txineiro ninoa sika ³⁵ Xesosi iokanatakinimoni. Eereka ninoa xanakaro oa txineiro matiitinimoni.

³⁶ Iuasaaki aua Xosee. Sasetotxi, Arevii apika mekaniri itxaua. Xipri inakori pokomiriitkiri iua. Xesosi iokanatakini takauākatari iua Panapee inaāka. Popīkari sākireē iuāka: “Kasikapoxokoniri,” kotxi ātipirika isikapoxokonitari kākiti. ³⁷ Iua vētxitari ātika ikikiote. Iua kikio īki isika Xesosi iokanatakinimoni.

5

Ananíasi, Sapira Pakini

¹ Iuasaaki auari Ananíasi inakori, ĩtanoro Sapira inakoro pakini. Iua vētxitari kikio. ² Ikaikotakaro ipixini kikio īki. Ipixininoka isika Xesosi iokanatakinimoni. Sapira imarotari ōtaniri kamakiti. Txamari iua sikasaakiro oa txineiro Xesosi iokanatakinimoni, itxari:

—Ikinika kikio īki asika Teosomoni —itxa.

³ Iuasaaki Petro txari:

—Ananíasi, kinirepa pauiritari Satanasi misirienetini maerekati pikamini ĩkapani? Erekari Matamatakotira pimisirieneta, kotxi ipixini kikio īki kaikota pitekata. Kinirepa pisāpiretari ikinika txineiro pisikini Teosomoni? ⁴ Kikio pivētxitini apisapanika, ĩkora kikio pite nakiti. Eereka pivētxitakasaakiri, ōkora txineiro pite nakito. Ininiā kinirepa pitxari: “Ikinika nisika Teosomoni?” Kona kākitini pimisirieneta. Teosora pimisirieneta —Petro txari.

⁵ Iuasaakipeka Ananíasi iripe. Ipīpe. Ininiā ikara kenakotakani pīkarauakata. ⁶ Iuasaaki ātokoriakori iapirikari Ananíasini ĩto mākaxi mataā ĩkatinirina ĩkapani. Eereka anikarina, kata itxarina iuani.

⁷ Ipi oara, āti oara pakini napaka atoko iua ĩtanoro apoka. Kona oimarotapanikari ōtanirini ipinini. ⁸ Ininiā Petro txaro:

—Pisāpiretano. Oia txineironokani hīkikiote īki hāpakapakito aua? Atāo pisāpiretano? —itxaro.

Ininiā oa:

—Ari aroanokara ate apakapakito aua —otxari.

⁹ Ininiā Petro:

—Hīte uākatatari Erekari Matamatakoti auiritai himisirienetiniri iua? Uatxaika ĩronakikoātaā pītanirini katakani apokapeka. Ininiā ninoa anikapitiki pite apaka —itxaro.

¹⁰ Iuasaakipeka oīripe, pīpe otxa. Iuaīkana ninoa ātokoriakori ĩroā. Apokarona oani, ininiā anikarona. Ikatarona ōtanirini takote. ¹¹ Ininiā ĩkinipoko Xesosi sākire auīākani, apanakini ikara kenakoenetakani pakini pīkarauata.

Amianatakani Makananitiko

¹² Iuasaaki Xesosi iokanatakini kamanātari posotiiretxi, kākiti mimarotakiniti pakini kākiti sauaki. Ikiniōtika Xesosi sākire auīākani apotiitaua Teoso misākiretikoātaā, “Saromāo pakita” akiritakori. ¹³ Xesosi sākire mauīākani apokaerekatana ninoa, txamari ipīkarena xika !inirekarina imoianatinina. ¹⁴ Iuaritika apikomoni kākiti apotiiāpotaua ninoakata, kotxi kikiakori, sitoakoro pakini aukari Apiananiri sākire. ¹⁵ Iuasaaki Xesosi iokanatakini makananitana amianatakani, ininiākara kākiti anikana amianatakani kimaporimoni. Sirimatatxi nopini itakana ninoa kimaporiātaā. Ininiā kākiti xinikari: “Petro napakasaaki, isanōka amianatakanimoni apokiniā, imakananitaākana.” ¹⁶ Ininiā kaiāopokori kākiti Xerosareē takotekini apoka. Ninoa minana amianatakani, apaka kākiti maerekani

matamatakoni misiritakini pakini. Ininiã Xesosi iokanatakini makananitanana imakinikana.

Xesosi Iokanatakini Misiritiko

¹⁷ Iuasaaki sasetotxi auïte apiatakari, imoianariakorikata, satoseoakorikata xikotana Xesosi iokanatakini. ¹⁸ Ininiã ninoa maïkana. Eereka kateia ãki taka itxapena ninoa. ¹⁹ Iua ïkanõkati Teoso nitiri iaxitikiri matakakari kateia tore. Eereka anika itxana iporikiti. Itxana:

²⁰ —Hïsa Teoso misãkiretiko aikotimoni. Iuaã hïspiretariko Teoso sãkire kãkitimoni kãkiti auini amaneri inini ïkapani —itxa Teoso nitiri.

²¹ Ininiã ïkanõkapanika ninoa sari Teoso misãkiretiko aikotimoni. Teoso nitiri sãkire iaõka ikamana. Iuaã isãpiretarina Teoso sãkire kãkitimoni.

Iuasaaki sasetotxi auïte apiatakari, imoianariakorikata pïkapiretana Xoteoakori kõtãkikarerini, Xoteo kiomanekori pakini, ininiã imakinika ninoa apakïtakana Xesosi iokanatakini. ²² Ininiã apanakini sari kateiamoni apinina ïkapani. Txamari apokasaakina iuaã, !auaïkana Xesosi iokanatakini. Ininiã ïkanapiriãna auïtetxiakorimoni isãpiretinina ïkapani. ²³ Ininiã itxana:

—Ate apokasaaki kateia tore, itotaãkapanika. Kateia nïkatakani auanãta itore takote. Txamari itore amatakakasaaki, kãkiti !auaika iriko ãki —itxana.

²⁴ Ininiã sasetotxi auïte apiatakari, Teoso aikote nïkatakani auïte, sasetotxiakori pakini kenakoenetakasaakiri ikara sãkiretxiti:

—Anekani? Nãpa ninoa atxiïti? Kiripa apikomoni auatako? —itxana.

²⁵ Iuasaakipeka kiki apoka. Isãpiretana:

—Hïkenakotariko nisãkire. Ninoa kikiakori kateia ãki hïtakakini Teoso misãkiretiko aikoti ãki aua. Oerekanãtarina Teoso sãkire kãkitimoni —itxana.

²⁶ Ininiã Teoso misãkiretiko aikoti nïkatakani auïte, iniritiakorikata sari iuaã. Ninoa minana Xesosi iokanatakini iuaïkana auïtetxiakorimoni. Imaïkasaakina, kona iaritatana, kotxi ipïkarina kãkiti kai soroã kiporonakinina. ²⁷ Ninoa apokasaaki, ipaniãtana Xesosi iokanatakini Xoteoakori kõtãkikarerini apisatoõ itiminina. Sasetotxi auïte apiatakari txana:

²⁸ —Mïtxi ate paniãtai Xesosi sãkire himasãpiretakani kãkitimoni. Txamari hõerekapanikari iua sãkire ikinimane Xerosareë auakanimoni. Ate xika Xesosi ipina, hïtxanãta ikinimanemoni —itxa sasetotxi auïte.

²⁹ Ininiã Petro, apanakini Xesosi iokanatakinkata apakapapiretari:

—Ate kïpitari Teoso paniãtakiti. Kona kãkiti paniãtakitini akïpita. ³⁰ Teoso, akiomanekorini Teosone, õkitikari Xesosi iuaïkana auini ïkapani. Hïtera okari iua Xesosi aamina ïpiriãmitakari nopini. ³¹ Iuaritika Teoso takari Xesosi ikikomoni. Itxïkitakari iua auïtetxi ininiua. Kãkiti maerekani makatxaãkari itxaua. Ininiã Isaeo auakani takanapiniãri imaerekani, Xesosi makatxakari ninoa maerekani. ³² Ikara ate imarota. Apaka Erekar Matamatakoti imarotari ikara. Teoso sikari iua Erekar Matamatakoti isãkire kïpitakanimoni —itxa Petro ninoamoni.

³³ Ikara ikenakotakasaakina, iteene omanãkarauatana. Ininiã ninoa:

—Mãokana —itxana.

³⁴ Iuasaaki Kamarieo inakori õkitikaua kõtãkikarerini sauaki. Pariseo itxaua. Teoso paniãtakiti oerekakari itxaua. Ikinimane paxitari iua. Ininiã iua txari:

—Hanikana naia mapara atenoka asãkirauatini ïkapani —itxa.

³⁵ Ininiã eereka itxana:

—Isaeo tixini auakanii, hiïkitetariko hïkamakiti ninoa Xesosi moianariakorimoni. ³⁶ Akokaxiti auari Teota inakori. Iua txari: “Auïtetxi apiatakari nitxaua nota,” itxa. Iuasaaki koatrosëtosu kikiakori moianatari iua. Auikarina iua sãkire. Txamari okapeëka iuani. Eereka iuakata sikani iarikape. Iua auïtetxi ininiua xipope. Isãkire !auikaãkaika.

³⁷ —Teotani ipinaka atoko Xotasi Kariréiakiri apoka. Iuasaaki auñtetxiakori iañtari ikinimane kãkiti. Kaiãopokori kãkiti auikari iua Xotasi sãkire, ininiã ninoa moianatari iua. Iua Xotasi imoianariakorikata nirekari ixipokinina auñtetxiakori. Txamari iua apaka okapeëka, ininiã imoianariakori iarikape.

³⁸ —Ininiã uatxaikara nõtãkikai hñte: “Hñtakanapanako ninoa Xesosi iokanatakini. Hñsikakanako ninoa, kotxi atxiñti ninoa ! ikamari Teoso paniãtakiti, ininiã pañtiki ninoa sãkire apaka ! auaika. ³⁹ Txamari, ninoa kaminiãri Teoso paniãtakiti, erepaniko, kotxi atxiñti hinaiatari Teoso” —itxa Kamarieo.

Iuasaaki ninoa Xoteo õtãkikakani kñpitari Kamarieo sãkire. ⁴⁰ Akiritana Xesosi iokanatakini iuañkana iñroinina. Ipaniãtari ninoa xirokitatiko. Ininiã ninoa:

—Xesosi sãkire kona hñsãpiretapinikako —itxana.

Eereka sikaka itxana isinina ñkapani. ⁴¹ Isikasaakina, ipoxokoniuatana.

—Teoso apokaerekataua ate, kotxi auiritari amisiritiko Xesosi sãkire aãuikini xika —itxana.

⁴² Ininiã ikiniñtika oerekarauatana Teoso misãkiretiko aikoti ãki, kãkiti aapoko ãki apaka. Isãpiretarina erekari pirena Xesosi Teoso mereëkiti ininiua pirena.

6

Setxi Kikiakori Mereño

¹ Xesosi sãkire auñãkani apiaãpota. Iuasaaki Xoteoakori Kreko sãkire imarotakani taparakienatana apanakini Xoteoakori. Itxana:

—Atekata auakani sitoakoro tikinitakoni kona apakapari nipokori ikiniñtika apanakini tikinitakoni apakapiniri atoko —itxana ninoa.

² Ininiã Xesosi iokanatakini tosi pakini pñkapiretana ikinimane Xesosi sãkire auñãkani. Itxana:

—Kona erekari ate takanapiniri Teoso sãkire aõerekini asikakienarauatini ñkapani. ³ Ininiã setxi kikiakori himereëko, ikara parñkatxi ikaminina ñkapani. Himereëna Erekari Matamatakoti paniãtakitinoka kamakani. Himereëna kimarorerini. Ininiã asikana ia parñkatxi ikaminina, sitoakoro tikinitakoni isikakienatinina ñkapani. ⁴ Ininiã atepékana, Teoso amisãkireta. Isãkire aõereka. Ikaranoka akamako ikiniñtika —itxana.

⁵ Ikinimane Xesosi sãkire auñãkani apokaerekatari Xesosi iokanatakini sãkire, ininiã ninoa mereëri Estevão. Iua iteene auikari Teoso sãkire. Erekari Matamatakoti paniãtakitinokara ikama. Apaka imereëna Piripima, Porókoroma, Nikanooma, Tximoma, Pamenama, Nikoraoma pakini. Iua Nikorao Ætxiokiakiri itxaua. Mñtxi Xoteo minakatua iua, eereka imamakaua. Xoteopeka itxapekaua. ⁶ Xesosi sãkire auñãkani minana ninoa Xesosi iokanakinimoni. Ininiã Xesosi iokanatakini misãkiretari Teoso. Iuakona itakana ninoa nopini, ikara Teoso parñka ikaminina tñkane.

⁷ Ikara atoko ininiã, Teoso sãkire iaripireta apikoxiti. Ininiã mokatanitika kaiãori Xerosareë auakani auikari Xesosi sãkire. Ito sasetotxiakori apaka kñpitari Xesosi sãkire.

Estevão Mañkiko

⁸ Estevão iteene auikari Xesosi sãkire. Teoso posotiire aua iuamoni. Kaposotiireri iua, ininiã ikamari kãkiti mimarotakiniti. Ikamari posotiiretxi, Teoso posotiire oerekini ñkapani. ⁹ Txamari ãtikaka kikiakori !nirekari iua. Ninoa ãti Xoteo apotiitiniãtaãua aikoti sikani. Ninoa “Ninoaka nireëkiti kamakani” akiritaãkana. Ninoa Sireni sitatxitikini, Arexãtria sitatxitikini,

Sirísia tixinikini, Ásia tixinikini pakini. Ninoa iteene misākiretakakaua Estevãokata, kotxi !auikarina iua sākire. ¹⁰ Txamari Estevãõ sākirauataka atoko, !kasākireikana, kotxi Erekaru Matamatakoti sikaimaroretari iua Estevãõ. ¹¹ Ininiã ninoa sikari txineiro apanakini kikiakorimoni Estevãõ apoĩtinina ĩkapani. Ininiã ninoa txineiro apakapakani txari:

—Ate kenakotari iua, Moisesini imisākirepiretini, Teoso apaka imisākirepiretini —itxana.

Txamari na atãoni isākirena. ¹² Ikara isākirena xika, kiomãtxiakori, kaiõkatsopareriakori, apanakini kãkiti pakini naiataua, ininiãkara imaĩkarina Estevãõ, kõtãkikarerinimoni anika itxarina iua.

¹³ Eereka iminana apanakini, Estevãõ imisākirepiretinina ĩkapani. Ninoa txari:

—Ia kiki misākirepiretapikari Teoso misākiretiko aikoti. Apaka kona inirekaru Moisesi paniãtakiti. ¹⁴ Ate kenakotari iua sākire: “Xesosi Nasareekiru xipokariko Teoso misākiretiko aikoti. Ixipokariko akiomaneakorini sākire Moisesini paniãtakiti.”

Ikara atoko aãpirena ikamana ninoa. ¹⁵ Ikinimane ninoa kãkiti õtãkikakani atamatari Estevãõ toõ. Teoso nitiru iaxitikiru toõ atokokana itxa Estevãõ toõ.

7

Estevãõ Sākirauata Kõtãkikarerimoni

¹ Ininiã sasetotxiakori auĩte apiatakari txari Estevãõ:

—Atãokani ninoa sākire?

² Estevãõ txari:

—Nikiomaneakori, nitariakori pakini, hĩkenakotanoko. Teoso iaxitikiru oerekaua aãtokiriru Apraãonimoni. Mesopotãmia tixiru auakasaaki, Araã tixiru auiru apisapanika, Teoso motika iuamoni. ³ Iuasaaki Teoso txari iua: “Pitakanapariko pitixine, pinirimane pakini. ãti tixirimoni pisako. Noerekinimoni pisako,” itxa Teoso. ⁴ Ininiã sipe itxa Apraãõ. Itakanapari Kaotãia inakori tixiru. Araã tixirimoni iua sipe. Araã auakasaaki iriru ipĩpe. Iriru ipinaka atoko, Teoso mĩpiri iua uaimoni uatxa aãuiniãtaã. ⁵ Apraãõ auakasaaki, Teoso !isikari uai tõpa iuamoni iua nakiti iniru ĩkapani. Kona ipixiru metro isika iuamoni inakiti iniru ĩkapani. Isikaenetari uai tõpa iua, imekaniriarikori pakinimoni. Txamari !keeneri iua iuasaaki. ⁶ Teoso txari Apraãõmoni: “Pamaritenu, pimekaniriarikori, papika mekaniriarikori auako ãti kãkiti tixine. Iuaãrako imisiritapeẽkanako koatrosõtosi anokanani. Iparĩkauatana apanakini ĩkapani maxikatĩka. Ininiã iteene imisiritiko aua.”

⁷ —“Ininiãkara nimisiritariko ninoa misiritakani. Eereka Apraãõ apika mekaniriarikori takanapariko iuaã, uaimoni kanapiriã itxanako. Ininiã ĩkorapokoriti ninoa parĩkauatoko nota ĩkapani,” itxa Teoso. ⁸ Ininiã Teoso txari: “Hĩte kitsotakariko ikiru hamaritenu tsiki mata. Ikara nitakaõtxikare hãtamatakasaaki, hĩxinikariko nisikaenetakiti,” itxa Teoso. Eereka Apraãõ ãkiru aua, Isaki inakori. Oito õtipeka auiru õti inakasaaki, Apraãõ kitsotakariru itsiki mata. Isaki aneẽkasaaki, imi Xakoo inakori aua. Eereka Xakoo anaakori auapeka tosi pakini. Ikara tosi imiakori aãtokiriarikoriru iriakoriru itxauana.

Xosee Pirena

⁹ —Xakoo anaakori xikotari itarina Xosee inakori. Ininiã itariakoriru vẽtxitaru iua Exito sikanimoni. Iuaritika Teoso auapika iuakata. ¹⁰ Imisiritiko auakasaaki, Teoso moianataru iua imapinakanu ĩkapani. Iuasaaki Exito auakanu auĩte Paraoo inakori. Teoso sikaimaroretari Xosee, ininiã Paraoo potxitaru iua, ininiã Paraoo txari iua: “Exito auakanu auĩte pitxauako. Naapoko auakanu pinĩkata apaka,” itxa Paraoo Xoseemoni.

¹¹ —Eereka makienanitxi aua Exito tixiniã, Kanaaã tixiniã apaka, ininiã ikinimane natxita. Aãtokiriakorini apaka !auari nipokori. !Apokari nipokori.

¹² Ininiã Xakoo kenakoenetari triko auini Exito tixini. Ininiã ipaniãtana tesi imiakori Exito tixinimoni isinina. Mitxi lisana Exitomoni.

¹³ —Ininiã iuaĩkana ãti õti isana Exitomoni, kienatxi iamotinina ĩkapani. Iuasaaki Xosee oerekaua ninoamoni. Iuasaaki Paraoo imarotari Xosee nirimane. ¹⁴ Ininiã Xosee pĩkapiretari iri Xakoo, itariakorikata, inirimanekata. Setẽta sĩko pakini kãkiti sari Exito tixinimoni, kotxi aua ikinipoko nipokori iuaã.

¹⁵ —Ininiã Xakoo apanakinikata sari Exitomoni. Iuaã mapakanani atoko Xakooni ipĩpe. Eereka aãtokiriakorini ipina iuaãtaã apaka. ¹⁶ Ninoa ipĩkasaakina, iĩtona anikapeẽka Sikeẽ tixinimoni. Iuaãkiri akauaritiã ikata inapeẽkana. Apraõni auapanika inakasaaki, iamotari iua akauari Emoo ãkiriakorimoni.

Moisesi Pirena

¹⁷ —Itixi Teoso sikaenetakiti Apraõomoni kaimapeka Xoteoakorimoni inakasaaki, kãkiti Isaeokini kaiãopokoikana Exito tixiniã. ¹⁸ Itokanani napaka atoko, ãti Exito auakani auĩte Xoseeni mimarotakati aua. ¹⁹ Iua auĩtetxi misiritari anirimanekakorini. Ininiã sotatoakori mixirika itxapena amarini xapitiri. Eereka oka itxapena.

²⁰ —Iuasaakiikara Moisesi iponaniã. Moisesi amariniapanika inakasaakiua peerepatikiri. Ipi, ãti pakini kasiriti iri, inoro pakini nĩkatari iua ninoa aapoko. ²¹ Eereka ninoa takanapari iua Paraoo ãkero kipaãtiniãtaãua takote. Ininiã oa apokari iua amarini. Oanikari oaãpokomoni. ²² Exito auakani imarore ikinipoko oerekaãka iuamoni. Kasãkireri iua. Kakamareri iua.

²³ —Koarẽta anokanani inakasaaki, inirekari inirimane Isaeokini aõkitini. ²⁴ Inirimanemoni isikasaaki, itikari Exito auakari xirokitatiniri kiki Isaeokiri, ininiã ixikatxitari. Iua aritapiri Exito auakari, oka itxapiri iuani. ²⁵ Iuasaaki Moisesi uãkatari inirimane Isaeokini imarotiniri Teoso nirekari Moisesi makatxakinina ninoa, Exito auakani mamisiritakanina ĩkapani. Txamari ninoa !imarotari ikara. ²⁶ Apikomoni ãti õti, iua sari inirimanemoni. Iuaã iua apokana ninoa neenamauanãtini, inaiapoatakakauana. Ininiã Moisesi õtãkikana ninoa. Itxana: “Kikiakori hĩtaritakakaua. Kinirepa himisiritakakaua?”

²⁷ —Inirimane misiritakari katika txari Moisesi: “Kipa txai pite ate auĩte pininiua? Kipa txai pite ate õtãkikakari pininiua? ²⁸ Kita Exitokirini pokini atokokana pokatanoko nota?” itxa. ²⁹ Ikara sãkiretxiti ikenakotakasaaki, Moisesi takanapari Exito tixini. Mitxiaã tixinimoni isa. Iuaã ĩtanorouata. Ipi imiakori aua iuamoni.

³⁰ —Koarẽta anokanani ãparaã makipakaniãtaã iua aua iuasaaki. Teoso nitiri iaxitikiri motika Moisesimoni ixirata Sinai inakoriãtaã. Iuasaaki iua atamatari aanaia tirinini, txama !arika. !Ixipoka. ³¹ Ikara itikasaaki, Moisesi tsorĩkaãta, ininiã aanaia takote isa iteene atamatini ĩkapani. Iuasaakipeka ikenakotari Apiananiri sãkirauatini: ³² “Pikiomaneakori Teosonekarano nota. Apraõ, Isaki, Xakoo pakini Teosonekarano nota,” itxa Teoso. Iuasaaki Moisesi kikinana ipĩkare xika. Ipĩkari Teoso sãkirauatini manapi atamatini.

³³ —Ininiã Apiananiri txari iua: “Pikitimata pimakatxaka, kotxi uai piti-miniãtaã nota auanãta. ³⁴ Nitikana ninakitiakori Exito tixiniã. Exito auakani misiritapena ninoani. Nikenakotari oõkinina. Nota inari nisikakinina ĩkapani. Ininiãkarako Exito tixinimoni niokanatai pite,” Apiananiri txari Moisesi.

³⁵ —Iua Moisesi Isaeokini manirekakiniti, kotxi ninoa txari: “Kipa txai pite ate auĩte pininiua? Kipa txai pite ate õtãkikakari pininiua?” itxarina. Iuakara

Teoso iokanatakiti ninoamoni ninoa auíte ininiua ĩkapani, ninoa imakatzakini ĩkapani, kotxi Teoso nitiri aanaiaã tirinakariã auakari iokanataru iua ninoamoni.

³⁶—Eereka iua makatzakana ninoa Exito tixini. Oerekari Teoso posotiire kãkiti maposotakinu Exito tixiniã. Oerekari Teoso posotiire potxoari uinitu, Põkamarari inakoriã. Āparaã makipakaniãtaã apaka oerekari Teoso posotiire koarẽta anokanani iuaãtaã.

³⁷—Ia Moisesikara sãpiretana Isaeokini: “Teoso iokanatariko isãkire sãpiretakari hĩtemoni nota iokanatinu atokokana. Hĩte nirimankara iua. Hĩkenakotariko iua sãkire,” itxa Moisesi. ³⁸ Moisesi aua Teoso nakitiakorikata āparaã makipakaniãtaã. Aãtokiriakorini aua iuakata. Apaka Teoso nitiri iaxitikiri aua iuakata. Iua Teoso nitiri misãkiretari Moisesi ixirata Sinai inakoriãtaã auakasaaki. Iua apakapari Teoso sãkire, atemoni isikini ĩkapani. Iua Teoso sãkire txĩkitakari iua sãkire auĩãkani ātipirika auini Teosokata.

³⁹—Aãtokiriakorini kona nirekari inĩkaenetinirina Moisesi sãkire. !Inirekarina iua. Inirekarina Exitomoni ikanapiriinina. ⁴⁰ Iuasaaki ninoa paniãtari Arão: “Teosoakori kamakoni pikaminaua, ate mĩkiikakani tĩkane. ĩkora Moisesi Exito tixini amakatzakakiri, ĩtapari iua? !Aimarotari iua auiniãtaã,” itxarina Arãomoni. ⁴¹ Ininiã ninoa kamari kema auíte ãkiri atoko inakari oro kamakori iteosonetinina ĩkapani. Eereka okarina soti auíte teoso ikamakitina isikinina ĩkapani. Kiiniri ikamana. Ipoxokoniuatana, kotxi ninoaka kamari iteosonena. ⁴² Txamari Teoso atão inakari takanapana ninoa. Ininiã iteosonetarina iaxiti auakani iõriki, kasiri, atokatxi pakini. Teoso sãkire sãpiretakani kitxakapirĩka iõkatsopatari ia sãkiretxiti:

Hĩte Isaeokini, koarẽta anokanani āparaã makipakaniãtaã hãuakasaaki, !hõkari pirãtxi nota ĩkapani.

⁴³ Iuasaaki hĩte anikari papiri aamata kamakori hĩteosone Moroki inakori ĩkapani. Apaka iõriki atoko inakari hĩteosone Hẽpaã inakori hĩkamakiti hanika hĩtekata iuasaaki. Hĩte kamari Moroki, Hẽpaã pakini hĩteosonetini ĩkapani. Ikara xika nota iokanataiko hĩte āti kãkiti tixinemoni. Papirõnia sitatxiti apikoxiti niokanatai hĩte.

Teoso Papire Pirena

⁴⁴—Aãtokiriakorini auari papiri aamata kamakori Teoso misãkiretiko papire āparaã makipakaniãtaã auakasaakina. Moisesi kamari iua papiri Teoso paniãtakiti iaõka, kotxi Teoso oerekari Moisesi iua papiri kamiko. ⁴⁵ Moisesi ipinaka atoko apanakini aãtokiriakorini apakapari iua papiri irina sikakiti. Ininiã iuasaaki ninoa anikari iua papiri, Xosoeekata isikasaakina, āti uãka tixine imixirikasaakina, kotxi Teoso omitikana ninoa āti uãka, aãtokiriakorini apokasaaki iuaã. Iua papiri kaikota iuaã. Auapanika iuaã Tavii aãtokiriakorini auíte inakasaakia. ⁴⁶ Teoso apokaerekatari Tavii, ininiã Tavii nirekari Xakoo Teosone misãkiretiko aikoti ikamini. ⁴⁷ Txama Teoso !auiritari Tavii kaminiri. Ininiã Saromão, iua ãkiri kamari Teoso misãkiretiko aikoti.

⁴⁸—Teoso Apiananiri kona aua aapokotxi kãkiti kamakiti ãki, kotxi Teoso sãkire sãpiretakari kitxakapirĩka txari:

⁴⁹ Apiananiri txari: “Niitopãkiniãtaã iaxiti itxa. Itixi nikiti nitakiniãtaã. Ininiã kanatokopa itxa aapokotxi hĩkamini nota ĩkapani? Namonipa nauiniãtaã?

⁵⁰ Kotxi notakara kamari ikinipoko,” itxa.

Erekari Matamatakoti Manirekakani

⁵¹ Estevão sãkirauatapanika:

—Hĩte kona kinirão kenakotaka txari Teoso sãkire. Hĩtsiki mata kisauakaãkapitika, txamari kona hĩkenakotari Teoso sãkire hãkixinireẽ. Ātipirika

kona hinirekari Erekar Matamatakoti paniãtakiti hĩkamini. Hãtokiriakorini kitxakapirĩka atokotxikana hĩte. ⁵² Hãtokiriakorini misiritana ikinimane Teoso sãkire sãpiretakani. Ninoa okana iua sãkire sãpiretakani, Erekarinoka Kamakari sãpiretakani. Ninoa Teoso sãkire sãpiretakani sãpiretari Erekarinoka Kamakari ãti õti uai apokini. Īkorasaaki hĩtera mĩkapiritari iua. Hĩtera okari iua Erekarinoka Kamakari. ⁵³ Hĩtekara apakapapekari Teoso sãkire Teoso nitiriakori mĩkiti. Iuaritika !hĩkamari ipaniãtakiti —itxa Estevão.

Estevão Kiporonakiko

⁵⁴ Xoteoakori kenakotakasaakiri Estevão sãkire, omanãkarauatana. Akatsakatsiriĩtauana omanãkarena xika. ⁵⁵ Iuaritika Erekar Matamatakoti iteene sikataparaxiniretari Estevão. Iuasaaki iua ionakaãta iaxiti. Atamatari Teoso iotximere. Atamatari Xesosi timini Teoso kikomoni. ⁵⁶ Ininiã itxa:

—Hãtamata. Natamatari iaxiti xorekini. Aĩtari iaxitikiri tima Teoso kikomoni —itxa Estevão.

⁵⁷ Iuasaaki Xoteoakori totari ikenakokina iuakoãna. Iteene ninoa akiripoakata. Eereka ninoa ikinika miteka iuamoni. ⁵⁸ Imaĩkarina. Ikosekaãpotarina sitatxi mapotõkire. Iuaãtaã ipotorikana ikiporonakinirina iua kai soroã. Iuasaaki itikarauatakani takari imãkana Saoro inakori kiti takote inĩkatini ĩkapani. ⁵⁹ Ikiporonakasaakirina, Estevão akiritari Teoso. Itxari:

—Apiananiri Xesosi, papakapariko nixinire.

⁶⁰ Iuasaaki ikapotoreẽkaua. Itapasãkireritika akiritari Teoso:

—Apiananiri, pimaxinĩkaretariko ia maerekati ninoa kamakiti —itxa.

Iuasaakipeka ipĩpe.

8

Xesosi Sãkire Auiãkani Misiritiko

¹ Estevão ipĩkasaaki Saoro aua iuaã.

—Ari erekapitikari ipinini —itxa Saoro.

Estevãoni ipinini õtisaakipeka ipotorika Xesosi sãkire auiãkani misiritiko Xerosareẽ. Ninoa iteene misiritaãka, ininiã ikinimane Xesosi sãkire auiãkani Xerosareẽ auakani iarika itxapena. Xotẽia tõpamoni, Samaria tõpamoni pakini iarikana. Xesosi iokanatakininoka kaikota Xerosareẽ. ² Estevão ipinaka atoko kikiakori Teoso sãkire auiãkani katari iuani. Iteene itxiapatana. ³ Iuasaaki Saoro potorika ixipokinina Xesosi sãkire auiãkani. Ninoa aapokomoni isaãpota. Kikiãkini, sitoakoro apaka ikosekaĩtota, taka itxana kateia ãki.

Piripi Samariamoni Sini

⁴ Teoso sãkire auiãkani iarikasaaki, isãpiretarina Teoso sãkire ikini aapokotxitiã. ⁵ Piripi sari Samaria sitatxitimoni. Iuaã iua sãpiretari kãkiti Xesosi Teoso mereẽkiti ininiua. ⁶ Isãkire ikenakotakasaakina, posotiiretxi ikamakiti itikasaakina, iteene ikenakotarina isãkire. Imixinikarina isãpiretakiti. ⁷ Maerekani matamatakoni kãkiti auaĩtotakini takanapari kãkiti. Akiripoakatana ipokĩkasaakina. Kaiãopokori matĩpokotakani apaka makananitaãka. ⁸ Ininiã Samaria auakani iteene poxokoniuata.

Mĩti Simão Inakori

⁹ Iuasaaki Samaria sitatxitiã aua kiki Simão inakori. Mĩti itxaua iua. Imisirienetana kãkiti Samaria auakani. Ininiã ikinimane tsorĩkaãta, ikamakiti amatakasaaki. Iua iuikaua.

—Kimaroreno nota —itxa.

¹⁰ Ininiã ikinimane kĩpitari iua sãkire. Auĩtetxiakori, poiãorini pakini kĩpitari isãkire. Ininiã itxana:

—Iua Simão auari Teoso posotiire. Kaposotiireri iua —itxana.

¹¹ Ininiã ikĩpitarina isãkire, kotxi itokatapeka itikarina ikamakiti kãkiti mimarotakiniti. ¹² Ninoa auikasaakiri Piripi sãpiretakiti erekari pirena, Teoso auĩtetxi ininiãua pirena, Xesosi Kristo posotiire pirena pakini, kikiakori, sitoakoro apaka patxisataãka. ¹³ Iuasaaki Simão apaka auikari. Ipatxisataãka. Ininiã isari Piripi sinimoni, kotxi itsorĩkaãta, posotiiretxi kãkiti mimarotakiniti itikasaaki.

¹⁴ Xesosi iokanatakini Xerosareẽ auakani kenakopiretari Samaria auakani auikiniri Teoso sãkire. Ininiã ninoa iokanataro Petro, Xoão pakini Samariamoni. ¹⁵ Iuaã apokasaakina, imisãkiretarina Teoso, Erekarĩ Matamatakoti isãkire auĩãkani apakapini ĩkapani. ¹⁶ Erekarĩ Matamatakoti kona apokapanika ninoamoni iuasaaki. Apiananiri Xesosi uãkaãnanira ipatxisataãkana. ¹⁷ Ininiã Petro, Xoão pakini takari iuakona ninoa nopini. Iuasaakipeka apakaparina Erekarĩ Matamatakoti.

¹⁸ Simão itikasaakiri Erekarĩ Matamatakoti apokini kãkitimoni, kinirão sikaka itxaro txineiro Petro, Xoão pakinimoni. ¹⁹ Ininiã itxa:

—Īkora hĩposotiire hĩsikano, niuako kãkiti nopini nitakasaaki, Erekarĩ Matamatakoti ninoamoni apokini ĩkapani —itxa.

²⁰ Txamari Petro txari:

—Pite, pitxineirotekata samakauako, kotxi pite uãkatari pitxineirote iamotiniri Teoso posotiire. ²¹ Kona xapiti pitemoni auapani ia parĩkatxi, kotxi pãkixinire na atão Teoso apisatoõ. ²² Ininiã pitakanapariko ikara pimaerekani. Pamanaãri Apiananiri pimaerekani imakatzakini ĩkapani. Atxiĩti iua maxinĩkaretari pixinikakiti pãkixinireẽ. ²³ Nota imarotai pite. Pãkixinireẽ xãpoãkata maerekatinoka. Pimaerekani maĩkai. !Auiritai pisini pinirekinimoni —itxa Petro.

²⁴ Ininiã Simão apakapapiretari:

—Pimisãkiretariko Teoso nota ĩkapani. Ikara atoko pisãpiretakiti na ninireka —itxa Simão.

²⁵ Petro, Xoão pakini sãpiretari Xesosi kamakiti ninoa ĩkapani. Isãpiretarina Apiananiri sãkire. Eereka ikanapiriãna Xerosareẽmoni. Ikanapiriããpotakasaakina, isãpiretarina Teoso iokanapirena erekari kaiãopokori aapokotxi auakanimoni Samaria tõpa.

Piripi Etxiõpiakirikata

²⁶ Eereka Apiananiri nitiri iaxitikiri misãkiretari Piripi:

—Paiamatako. Atokatxi pokĩkinimoni pikikomoni pisako. Pisa kimaporimoni, ãparaã makipakaniãtaã. Iua kimapori Xerosareẽ Kasa tixinimoni sikari.

²⁷ Ininiã aiamata, sipe itxari. Ipixinipokoriti aõkitari Etxiõpia tixinikiri. Etxiõpia auakani auĩte õtãkikakari itxaua. Paimatireri iua. Ikinimane kamari iua paniãtakiti. Etxiõpia auakani auĩte sito Kãtasi inakoro. Kaiãopokoro otxineirote, otii pakini. Iua kiki parĩka ikinipoko oa nakiti inĩkata oa ĩkapani. Mitxi iua sari Xerosareẽmoni Teoso imisãkiretini ĩkapani. ²⁸ Ikanapiriãkasaaki, mitekaĩ ãki iitopãkasaaki, atatsopataro Isaía iõkatsopatakiti. Isaía Teoso sãkire sãpiretakari kitxakapirĩka. ²⁹ Iuasaaki Erekarĩ Matamatakoti txari Piripi:

—Pisa okira mitekaĩmoni. Pikaikota oa takote.

³⁰ Ininiã Piripi miteka iuamoni. Ikenakotakasaakiri Isaía iõkatsopatakiti atatsopatini, Piripi pimaãri:

—Pimarotataro ere patatsopatakiti? —itxari.

³¹ Ininiã iua:

—Natokopa ininiãpa nimarotari? Kipa oerekano? —itxari.

Ininiã aiatarí Pirípi mitekaĩ áki iuakata iitopãkini ìkapani. ³² Iua iõkatsopatari ia Teoso sãkire:

Soti auĩte okikomoni anikiko atoko itxa iua. Soti auĩte ákiri piti kisauakikosaaki, !kasãkireri iua. Iua soti auĩte ákiri atoko itxa iua, kotxi iua apaka !kasãkireri.

³³ Inapetaãka iua. !Atãoni kãkiti kama iuamoni. Okaãkape. !Auari iua ákiri. Ikara atoko itxa Teoso sãkire, Isaía iõkatsopatakiti.

³⁴ Ininiã iua Etxiõpiakiri pimaãri Pirípi:

—Pisãpiretano, natokopa itxa Teoso sãkire sãpiretakari sãkire? Kipa soti auĩte atoko inakari? Kipa okaãka? Iuakani? Átikani?

³⁵ Ininiã Pirípi oerekari ikara Teoso sãkire iõkatsopatakori.

—Xesosira ikara atoko inaãka —itxa.

Ininiã apikomoni isãpiretari Teoso iokanapirena erekari, Xesosi pirena.

³⁶ Isaãpotakasaakina, apokana ãparaã auiniãtaã. Ininiã iua kiki txari:

—Uai aua ãparaã. Apakata nipatxisatiko?

³⁷ Ininiã Pirípi txari iua:

—Apakatapitika pipatxisatiko iteene pauikiniãri Xesosi sãkire pãkixinireẽ.

Ininiã iua apakapapireta:

—Nota auikapitikari Xesosi Teoso mereẽkiti, Teoso ákiri ininiãua.

³⁸ Ininiã iua Etxiõpiakiri paniãtari mitekaĩ anikakari iotokini. Iuasaaki Pirípi, iua Etxiõpiakiri apaka katxaka, imaãta itxana. Ininiã Pirípi patxisatari iua kiki.

³⁹ Ikanĩkiĩtakasaakina, Erekari Matamatakoti anikari Pirípi. Ininiã iua kiki kona atamataikari Pirípi. Ininiã iãpotapitipo. Ipoxononoka itxa.

⁴⁰ Iuasaaki Asoto sitatxitipeka itokiã Pirípi. Isaãpotakasaaki, ikinika aapokotxitiã isãpiretari Teoso sãkire. Teoso sãkire isãpiretiniritika Sesaréia sitatxitimoni apokako.

9

Saoro Auikiniri Xesosi Sãkire

(Átosi 22.6-16; 26.12-18)

¹ Iuasaaki Saoro okaenetapikana Apiananiri sãkire auĩãkani. Ininiã iua sari sasetotxi auĩte apiatakarimoni. ² Amanaãri aãtsopa Saoro parĩka sãpiretiko aãtsopati. Iua nirekari sasetotxi auĩte iõkatsopatiniri ikara, Saoro anikini ìkapani. Inirekari isikiniri iua aãtsopa ikinika aiko Xoteo apotiitiniãtaãua nĩkatakanimoni Tamásiko sitatxiti, kotxi Saoro nirekari imaĩkinina Xesosi sãkire auĩãkani, kikiakori, sitoakoro pakini, Tamásiko sitatxitiã apokakini. Inirekari anikinina Xerosareẽmoni.

³ Iua apokaãpotakasaaki Tamásiko sitatxitimoni, katimaritika iotximeretxi iaxitikiri ákitari. ⁴ Irika xitipe. Ininiã ikenakotari sãkiretxi:

—Saoro, Saoro, kinirepa pimisiritano? —itxa ikenakotakiti.

⁵ Ininiã iua:

—Kiriparai Apiananiri?

Ininiã:

—Xesosira nota. Pimisiritakitikarano —itxa Xesosi.

⁶ Ikikinana, iteene ipĩkarauatiniã.

—Apiananiri, kipa pinireka nikaminii? —itxa.

Ininiã Apiananiri:

—Põkitikaua, sitatxi pisa. Iuaã áti sãpiretai pikamakiti tĩkane —itxa Xesosi.

⁷ Imoianariakori iotoka. Ipĩkarauatana. Masãkireninoka itxana. Ninoa kenakotari iaxitikiri sãkire, txamari !atamatarina.

⁸ Eereka Saoro òkitikaua, xorekaáta itxa, txamari imosiãretapeka iua. Ininiã imoianariakori anikari iua. Ikanõpiãpotarina Tamásikomoni. ⁹ Ipi, áti pakini òti mõiãretika itxa. Iuasaaki !inipokota. !Iáta.

Ananíasi Makananitiniri Saoro

¹⁰ Tamásiko sitatxiti aua kiki Xesosi sãkire auiãkari, Ananíasi inakori. Iuasaaki Teoso sãkirauata Ananíasikata itaponemoni. Itaponeë Apiananiri akiritari iua:

—Ereëkai Ananíasi —itxa.

Ininiã:

—Uaïkarano nota, Apiananiri —itxari Teoso.

¹¹ Apiananiri txari:

—Paiamatako. Kimapori Eretika ãpori kimaporitimoni pisako. Xotasi aapokomoni pisa. Iuaã pinitari Taaso sitatxitikiri Saoro inakori. Uatxiikara isãkirauanãta notakata. ¹² Saoro taponetai pite. Iua atamatai pite apokini iuamoni, piuako inopini pitakini ïkapani iuaïkana kõiãrepeka inini ïkapani — itxa Teoso.

¹³ Ininiã Ananíasi:

—Apiananiri, kãkitipokoni sãpiretano ikara kiki pirena. Pamonõkoniri iua. Imisiritapekana pite nakitiakori Xerosareë sitatxiti auakani.

¹⁴ Sasetotxiakori auïte paniãtari iua imaïkinina piuãka akiritakani uai Tamásiko sitatxiti auakani —itxa Ananíasi.

¹⁵ Ininiã Apiananiri txari:

—Pisako iuamoni. Nota mereëpekaru iua kiki, nota parïka ikamini ïkapani. Iua sãpiretariko nota sãkire Xoteo minakonimoni, auïtetxiakorimoni, Isaeo tixini auakanimoni pakini. ¹⁶ Noerekariko Saoro iteene atatsiirauatini nota sãkire auïkini xika —itxa Teoso.

¹⁷ Ininiã Ananíasi sari Xotasi aapokomoni. Iïroã. Eereka iuako itaka Saoro nopini.

—Nitari Saoro, Apiananiri Xesosi, paõkitakitira kimaporiã, iuara iokanatanano nota pitemoni kõiãrepeka iuaïkana pinini ïkapani. Iokanatanano nota pitemoni Erekari Matamatakoti papakapini ïkapani —itxa.

¹⁸ Iuasaakipeka oki nopini auakari katxaka. Ximaki tãta atoko itxa. Kõiãrepeka itxa. Eereka òkitikaua. Iuasaaki ipatxisataãka. ¹⁹ Inipokotaka atoko, itapara auapeka.

Saoro Tamásiko Sitatxiti Auakasaaki

Saoro kaikota Tamásiko mapaõti Xesosi sãkire auiãkanikata. ²⁰ Iua sari aiko Xoteo apotiitiniãtaãua. Iuaã oerekarauata. Oerekari Xesosi Teoso ãkiri ininiãua. ²¹ Isãkire kenakotakani tsorïkaãta.

—Iua Saoro okana Xesosi uãka akiritakani Xerosareë auakani. Iua ina uaimoni Xesosi uãka akiritakani imaïkini ïkapani, sasetotxi auïteakorimoni anikinina ïkapani —itxana.

²² Saoro oerekarauatakasaaki, imaroãpotari Teoso imarore. Teoso sika-posotiireãpotari iua. Ininiã iteene imarotari Teoso sãkire, apanakini oerekini ïkapani. Iua atoko ininiã, itaparaxinireritika oerekari Xoteoakori Tamásiko sitatxiti auakani Xesosi Teoso Mereëkiti ininiãua. Ininiã ninoa !imarotari apakapiretinirina iua.

²³ Mapaõti atoko Xoteoakori sãkirauatakaka Saoro okinina ïkapani. ²⁴ Saoro sãpiretaãka Xoteo aiamatapeka okinirina iua. Ninoa iãtapapikari sitatxi ïronakikoãtaã okinirina tïkane. ïkanõka, pokamara iãtaparina iua.

²⁵ Iuasaaki ïkanõka Xesosi sãkire auiãkani anikari iua sitatxi pirikeremoni. Iuaã Saoro ieretakaua kotari ãki. Pirikeri sonaã iokatxakarina Saoro kotari ãki sitatxi mapara. Iposo atoko imiteka Xerosareëmoni.

Saoro Xerosareë Apokini

²⁶ Saoro apokasaaki Xerosareë, inirekari Xesosi moianariakori imoianatini. Txama ikinikana pīkari iua. Kona !auiritarina iua moianatinina ninoa, kotxi !auikarina iua atāo auikiniri Xesosi sākire. ²⁷ Iuaritika Panapee anikari iua Xesosi iokanatakinimoni. Isāpiretana ninoa:

—Kimaporiā isikasaaki, Saoro aōkitari Apiananiri. Apiananiri misākiretari iua. Tamásiko sitatxiti auakasaaki, itaparaxinireritika isāpiretari Xesosi sākire kākitemoni —itxa Panapee.

²⁸ Panapee sākire ikenakotakasaakina, auikarina Saoro sāpiretakiti. Ininiā Saoro kaikota Xerosareë Xesosi sākire auīākanikata. Inirekinimoni isa Xerosareë. Isinimoni itaparaxinireritika isāpiretari Apiananiri Xesosi sākire. ²⁹ Isākirauata Xoteoakorikata, Kreko sākire imarotakanikata. Inirekarina ninoa imarotiniri Xesosi sākire. Txamari inirekarina okinirina iua. ³⁰ Iuasaaki Xesosi sākire auīākani imaropiretari ninoa okaenetiniri Saoro, ininiā anikarina sitatxi Sesaréia inakorimoni. Eereka iokanatarina iua Taaso inakori sitatxitimoni.

³¹ Iuasaaki Xesosi sākire auīākani !imisiritaākaika. Xotéia tōpa, Kariréia tōpa, Samaria tōpa pakini !auaika Xesosi sākire auīākani misiritiko iuasaaki. Erekari Matamatakoti sikataparaxiniretana ninoa. Kākiti itoāpotari auikiniri Xesosi sākire. !Ikamarina maerekati, kotxi iteene ipīkarina Apiananiri.

Enéias, Tókasi Pakini

³² Petro ianaxititakasaaki, iua sari Teoso sākire auīākanimoni Arita sitatxiti auakanimoni. ³³ Iuaā aōkitari kiki Enéias inakori. Iua matīpokotakati itxaua. Oito anokananipeka !ōkitikaua. ³⁴ Petro txari iua:

—Enéias, Xesosi Kristo makananitai. Pōkitikaua. Piapirikari pisirimata —itxari matīpokotakati.

Iuasaakipeka ōkitikaua. ³⁵ Ikinipoko Arita sitatxiti auakani, Sarō sitatxiti auakani pakini atamatari iua Enéias, ininiā itakanaparina imaerekanina. Inīkapiretarina Apiananiri sākire.

³⁶ Āti sitatxiti Xopi inakoriā oāua sito Teoso sākire auīākaro, Tapita inakoro. Kreko sākireē ouāka Tókasi otxaua. Oa kamapikari erekari. Omoianatana matxineiroteni.

³⁷ Arita auakani aukasaakiri Apiananiri sākire, oa Tókasi amianata. Eereka oani opīpe. Opīpeka atoko, arokañtotarona, taka itxarina oīto itanokiri kooā.

³⁸ Xopi sitatxiti Arita sitatxiti takote, ininiā Xesosi sākire auīākani Xopi sitatxiti auakani kenakoenetari Petro Arita sitatxiti auiniā, iokanatana ipi kiki Petromoni, apinirina ĩkapani. Iokanapiretana:

—Pinapokako uai. Katima pitxako —itxana.

³⁹ Ininiā Petro aiamata. Ninoakata isa. Iua apokasaaki, anikarina itanokiri kooā. Ikinipoko tikinitakoni txiapanāta Petro takote. Ninoa oerekari Petro mākaxi Tókasini kamakiti ninoa ĩkapani oāuakasaaki. ⁴⁰ Ininiā Petro iokanatana ninoa mapara. Eereka ikapotoreēkaua. Isākirauata Teosokata. Eereka oamoni ikirioka. Itxaro:

—Tapita pōkitikaua.

Iuasaakipeka xorekaāta otxa. Oātamatakasaakiri Petro, oitopāka. ⁴¹ Ininiā imaīkaro ouako oōkitikiniua ĩkapani. Eereka iua akiritana Xesosi sākire auīākani, tikinitakoni pakini, oa auāki onini oerekini ĩkapani.

⁴² Ikini Xopi auakani imaropiretari Tókasi iuaīkana auāki onini, ininiāra itomaneri kākiti aukari Apiananiri sākire. ⁴³ Petro kaikota iuaā Xopi sitatxiti mapaōti. Iua kaikota Simāo inakorikata. Iua Simāo aamata kamakari.

10

Konério Tapone Pirena

¹ Iuasaaki Sesaréia sitatxiti aua kiki Konério inakori. Áti uãka iua. Homano itxaua. Seĩ pakini sotato auĩte iua. Kãkiti akiritana ninoa sotatoakori Itáriakini. ² Iua Konério kamari Teoso sãkire iaõka. Iua, ikinipoko aapoko auakanikata paxitari Teoso. Imisãkiretapikari Teoso. Isikana matiitimoni inirekakitina. ³ Áti õti kikatapeka inakasaaki itaponeuata. Itaponeẽ itikari Teoso nitiri apokini iuamoni. Itxari:

—Konério —itxa.

⁴ Teoso nitiri atamatakasaaki, ipĩkarauata.

—Apiananiri, kipa pinireka? —itxa Konério.

Ininiã Teoso nitiri txari:

—Teoso kenakotapekari pisãkire iuamoni. Itikapekari pisikarauatini matiimoni. Teoso xinikapitikai. ⁵ Ininiãkara átikaka kikiakori piokanata Xopimoni Simão Petro uaimoni imininina ìkapani. ⁶ Iua kaikota áti Simãokata, aamata kamakarikata. Iua aapoko potxoari uiniti takote aua. Iua Simão Petro sãpiretaiko pikamakiti tĩkane —itxa Teoso nitiri.

⁷ Eereka iua Teoso nitiri sipe. Iposo atoko Konério akiritana ipi initiriakori, átika isotatone pakini. Iua sotato kamari Teoso sãkire iaõka. Iua auapika Konériokata, inireẽkiti ikamini tĩkane. ⁸ Ininiã Konério sãpiretana ninoa ikinipoko Teoso nitiri sãpiretakiti. Iposo atoko iokanatanana Xopimoni.

Petro Tapone Pirena

⁹ Katimatinĩkata Konério iokanatakini potorika. Apaniãxiti inakasaaki ninoa apokaãpota sitatxi Petro auiniãtaã. Iuasaaki Petro kanikauata aapokotxi nopini Teoso imisãkiretini ìkapani.

¹⁰ Iuasaaki Petro natxita. Inirekari inipokotini. Nipokori kamikosaaki, itaponeuata. ¹¹ Itaponeẽ atamatari iaxiti xorekini. Aamata mitamatari katxakaãpota iuamoni. Imapotomatara ipi ipi pakini iaxirikaãka. Iua aamata katxaka xitimoni. ¹² Iua aamata ãki aua ikini sereti kaxipirini. Aua pirãtxi. Aua ìtopa auakani. Aua imini. Aua araãkani. ¹³ Ininiã Petro kenakotari itanokiri sãkirauatini:

—Petro, põkitikaua. Pokari ia, pinikini ìkapani —itxari Petro.

¹⁴ Petro Xoteo itxaua, ininiã kona ikinika ìnika. Ininiã Petro txari:

—Konapitini Apiananiri. Kona ninikari ikinipoko naia kaxipirini. Manaiatini. Pamininiri —itxa.

¹⁵ Iuaĩkana itanokiri sãkirauata:

—Nota oeretakiti kona kamininiri kona pitxape —itxa.

¹⁶ Ipi, áti pakinikata iua aamata katxaka ikara atoko. Iposo atoko ikanĩkaxitita Teoso tixinemoni.

¹⁷ Ininiã Petro ãkixinireẽ ixinikaxitita:

—Kanatokopa itxa ikara nitapone?

Iuasaakipeka Konério iokanatakini apokapekari Simão aapoko. Apokana Simão aapoko toremoni. ¹⁸ Akiritana:

—Ereẽkai. Simão Petro uai aua atxiĩti? —itxana.

¹⁹ Iuasaaki Petro xinikapanikari itapone. Erekar Matamatakoti txari:

—Ikiraãkarana ipi, áti pakini kãkiti nitanãtai. ²⁰ Põkitikaua. Pikatxaka xitimoni. Pisa ninoakata, kotxi niokanatanana ninoa uaimoni —itxa Erekar Matamatakoti.

²¹ Ininiã Petro sari Konério iokanatakinimoni:

—Notakara hĩte nitanãta. Kipa ìkai hĩte?

²² Ninoa apakapapiretari iua:

—Konério, aãuĩte iokanataua ate. Erekaru iua. Ikamari Teoso sãkire iaõka. Ikinipoko Xoteo apokaerekatari iua. Teoso nitiri iaxitikiri paniãtari iua pite akiritini, pisãkire ikenakotini iƙapani —itxana.

²³ Ininiã Petro:

—Hiĩroã. Uai himaka —itxa.

Konério Aapoko Auakasaakina

Katimatinĩkata Petro sari ninoakata. Apanakini Xesosi sãkire auĩãkani Xopikini sari apaka. ²⁴ Katimatinĩkata apokana Sesaréia sitatxiti, Konério auiniãtaã. Iua Konério apotiitapekana inirimane, aõkimanere pakini Petro iãtapinina iƙapani. ²⁵ Petro iroãkasaaki Konério aapoko, iua aõkitari Konério. Iuasaaki Konério kapotoreẽkaua Petro apisatoõ. ²⁶ Txamari Petro txari iua:

—Põkitikaua. Kiki pite atoko inakarikarano nota.

²⁷ Isãkirauatakasaakina, Petro iroã. Aõkitari ito kãkiti apotiitakaniua. ²⁸ Ininiã itxana:

—Hĩte imarotari ate kiomanekakorini !auiritari Xoteo moianatiniri ãti uãka. !Auritaãka ate iroini hĩte atoko inakari aapoko. Iuaritika Teoso txano nota: “Na pakiritapiri ãti uãka kanaiari,” itxano. ²⁹ Ininiã hĩte pĩkapiretakasaakino nota, nimarotari atão nisini hĩtemoni. Ininiã, kinirepa hĩte apakĩtakano nota? —Petro txari Konériomoni.

³⁰ Konério apakapapiretari:

—Ipi, ipi pakini õti apisapanika nuanãta naapoko. Iuasaaki kona ninikari nipokori, Teoso nimisãkiretini iƙapani. Kikatapeka inakasaaki, nimisãkiretakasaakiri Teoso, katimaritika kiki tokiã nota apisatoõ. Pomẽkoriri imãka. ³¹ Itxano: “Konério, Teoso kenakotapekari pamanaãkiti. Ixinikari pisikarauatini matiinimoni. ³² ãtikaka kiki piokanata Xopi sitatxitimoni Simão Petro inakori uaimoni imininina iƙapani. Iua aua ãti Simãokata, aamata kamakarikata. Simão aapoko potxoari uiniti takote.” ³³ Iuasaaki nota apakĩtakai pite. Peerekari papokini atemoni. Uatxa ate uai aua Teoso apisatoõ Teoso paniãtakiti pitemonikiri akenakotini iƙapani. Ininiã pisãpiretauako —itxa Petromoni.

³⁴ Ininiã Petro txari:

—Uatxa nimarotari atão inakari. Teoso sikari erekari ikininapemoni. Inirekari ikini uãka apokini iuamoni, inakitiakori ininiuana iƙapani. ³⁵ Teoso apakapari ikini itixiti auakani, iua paxitakani, atão inakari kamakani. Apakapari Xoteoakori. Apakapari Xoteo minakaniua apaka. ³⁶ Himarotari Teoso iokanapirena Isaeo auakanimoni. Ikara erekari pirena sãpiretaua Xesosi Kristo xipokari Teoso omanatiniri kãkiti imaerekani xika, kãkiti erekaxinire inini iƙapani. Ikinimane auĩte itxaua Xesosi. ³⁷ Ikara Teoso iokanapirena himarota, kotxi iaripireta ikini Xotéia tõpa. Merepitipanika iaripireta Kariréia tõpa, Xoão patxisarauataka atoko. ³⁸ Himarotari Xesosi Nasareekiri pirena. Himarotari Teoso sikari Erekaru Matamatakoti iuamoni. Iteene isikaposotiiretari iua. Ikini tõpati isa erekari ikamini iƙapani. Imakananitana Satanasi misiritakini, kotxi Teoso aua iuakata. ³⁹ Ateka itikari ikinipoko ikamakiti Xoteoakori tixine iua auakasaaki, Xerosareẽ sitatxiti auakasaaki apaka. Eereka aamina iƙipiriãmitakari nopini ninoa okari iuani.

⁴⁰ —Iuaritika ipi ãti pakini õtisaaki Teoso õkitikari iua. Iuaka oerekaua kãkitimoni ipĩpekariika iuaĩkana aua inini. ⁴¹ Kona ikinipokoni atamatari iua. Teoso mereẽkininanira atamatari iua. Iuaritika kaiãori iua atamatakani. Ininiã ate atamatari iua. Iua õkitikaua atoko ate nipokota, iãriã aãta iuakata. ⁴² Iokanataua ate Teoso sãkire asãpiretini ikini kãkitimoni. Teoso mereẽri iua, kãkiti misiritiko mereẽkari ininiuana iƙapani. Auãkipanika inakani, ipĩkani pakini

misiritiko mereëkari itxaua. ⁴³ Ikinipoko Teoso sãkire sãpiretakani sãpiretari iua pirena. Ninoa txari: “Iua sãkire auiãkani maerekani makatxakaãka” — itxa Petro.

Xoteo Minakaniua Patxisatiko

⁴⁴ Petro sãkirauatapanika inakasaaki, Erekarri Matamatakoti apoka ikinika Petro sãkire kenakotakanimoni. ⁴⁵ Ininiã Petro moianariakori Xesosi sãkire auiãkani kisauakatsikimatatakoni tsorĩkaãta, kotxi Teoso sikari Erekarri Matamatakoti Xoteo minakonimoni apaka. Ninoa tsiki mata !ikisauakaãka, iuaritika Erekarri Matamatakoti apoka ninoamoni. ⁴⁶ Ikenakotarina Xoteo minakaniua sãkirauanãta ãti uãka sãkireë.

—Peerekari Teoso. Apiananiri itxaua —itxanãtana Xoteo minakaniua.

⁴⁷ Ininiã Petro txari:

—Ninoa Xoteo minakaniua apakapapekari Erekarri Matamatakoti ate apakapiniri atokokana. Ininiã apakatapitika ninoa patxisatiko ãparaaã. Kona kãkitini iotokakana ipatxisatikona.

⁴⁸ Ininiã iua paniãtana ninoa patxisatiko Xesosi Kristo uãkaã. Iuasaaki ninoa aiatarri Petro:

—Atekata mapaõti pikaikota —itxarina.

Ininiã Petro kaikota ninoakata.

11

Petro Sãpiretakiti

¹ Xesosi iokanatakini, Teoso sãkire auiãkani Xotéia tõpa auakani apaka kenakotari Xoteo minakaniua auikinirina Teoso sãkire. ² Ininiã Petro kanapiriãkasaaki Xerosareëmoni, kisauakatsikimatatakoni apoõtari iua.

³ —Pite imaka itsiki mata makisauakakoni aapoko ãki. Ninoakata pinipokota pitxa. !Apakata pikamakiti —itxarina.

⁴ Ininiã Petro sãpiretari ikinipoko itiãkiti, ikenakotakiti pakini.

⁵ —Xopi sitatxiti nauakasaaki, Teoso nimisãkiretakasaaki, nitaponemoni natapari mãkatxi mata atoko inakari iaxiti katxakaãpotini. Ipi, ipi pakini imapotomatare iaxirikaãka. Iua apoka nota takote. ⁶ Iteene nimixinitari mãkatxi mata ãki auakani. Natamatari ikini sereti kaxipirini. Aua pirãtxi. Aua ãtopa auakani. Aua imini, araãkani pakini. ⁷ Iuasaaki nikenakotari sãkiretxi iaxitikiri: “Põkitikaua. Oka, nika pitxako,” itxa. ⁸ Txamari nitxari iua: “Apiananiri, konapitini. !Ninikari nipokori mauiritakoti ia atoko inakari, kotxi pamininiri,” nitxari.

⁹ —Iuaãkana iaxitikiri sãkirauata: “Teoso oeretakiti kona kamininiri kona pitxape.” ¹⁰ Ipi ãti pakinikata iua aamata katxaka ikara atoko. Eereka ikinika kosekaãka iaxiti.

¹¹ —Iuasaakipeka ipi, ãti pakini kikiakori Sesaréiakini apoka aapokotxi nikaikotiniãtaã. Iokanataãkana notamoni. ¹² Ininiã Erekarri Matamatakoti paniãtano: “Pisa ninoakata. Kona pipĩkarauatape,” itxa. Naia seisi ãtariakori Xopikini moianatano nota iuasaaki. Ininiã ate ãroã Konéio aapoko. ¹³ Ininiã iua sãpiretaua ate, Teoso nitiri iaxitikiri apoka iuamoni aapoko ãki. Iua Teoso nitiri txari iua: “Piokanatarri kikiakori Xopimoni Simão Petro inakori apinina ãkapani. ¹⁴ Iua sãpiretaiko pite maerekani makatxakiko, paapoko auakani maerekani makatxakiko apaka.”

¹⁵ —Nipotorikasaaki nisãkirauatini, Erekarri Matamatakoti apoka ninoamoni merepanika atemoni apokini atokotxikana. ¹⁶ Iuasaaki nixinikari Apiananiri sãkire. Iua txari: “Xoão patxisarauata ãparaaã. Hĩte patxisataãkako Erekarri Matamatakotiã.” ¹⁷ Ininiã Teoso sikari Erekarri Matamatakoti ninoamoni, atemoni isikini atokotxikana Xesosi Kristo Apiananiri sãkire aãuikasaaki. Ikara atoko ininiã, !apakata Teoso ninaiatini —itxa Petro.

¹⁸ Petro sãkire ikenakotakana atoko, !itsoataikana.

—Peerekari Teoso —itxana.

—Ininiã Teoso auiritari Xoteo minakaniua apaka imaerekanina itakanap-inina, Teosokata átipirika auinina !kapani —itxana.

Teoso Auiãkani Átxiokia Sitatxiti Auakani

¹⁹ Estevão ipinaãka atoko, Xesosi sãkire auiãkani misiritaãka, ininiã ninoa iarika. Iariãkani sari maioakari. Penísia tixinima, Xipri pokomiriítima, Átxiokia sitatxitima pakinimoni isana. Ninoa oerekari Teoso sãkire Xoteomoninani. ²⁰ Ninoa átikaka Xiprikini, Sirenikini pakini sari Átxiokia sitatxitimoni. Iuaã isãpiretarina Teoso iokanapirena erekari, Xesosi Apiananiri pirena, Xoteo minakonimoni ninoa apaka imarotini !kapani. ²¹ Apiananiri sikaposotiiretana ninoa. Ininiãkara itomaneri kãkiti aukari Apiananiri sãkire. Maerekati itakanapana. Ikamarina Apiananiri nireëkiti.

²² Ikara apopireta Xesosi sãkire auiãkanimoni Xerosareë sitatxitiã. Ininiã ninoa iokanatari Panapee Átxiokia sitatxitimoni. ²³ Iuaã iua apokasaaki, imarotakasaakiri ninoa apakapiniri erekari Teoso sikakiti, ipoxokoniyata. Isikataparaxiniretana. Ötãkikana Apiananiri paniãtakitinoka ikaminina ikini itaparaxinireritikana. ²⁴ Erekari Panapee. Ikinika Erekari Matamatakoti paniãtakiti ikama. Aukari Xesosi sãkire ikini ixinireritika. Ikara atoko ininiã, itomaneri kãkiti aukari Apiananiri sãkire.

²⁵ Eereka Panapee sari Taaso sitatxitimoni, Saoro initini !kapani. ²⁶ Itaõkitakasaakiri, iminari iua Átxiokia sitatxitimoni. Áti anokanani ikaikotana iuaã Xesosi sãkire auiãkanikata. Oerekarina Teoso sãkire itomaneri kãkitimoni. Xesosi sãkire auiãkani Átxiokia sitatxiti auakani merepitipanika takauãkataãka, “Kristopiki.”

²⁷ Iuasaaki átikaka Teoso sãkire sãpiretakani Xerosareëkini sari Átxiokia sitatxitimoni. ²⁸ Ninoa átika Ákapo inakori õkitikaua. Erekari Matamatakoti sãkire isãpireta:

—Natxinoka auako ikini itixiti —itxa.

Ikara isãkire apokapeka Kráotxio Homano auíte inakasaaki.

²⁹ Ininiã ikinika Xesosi sãkire auiãkani nirekari txineiro iokanatiní itari-akorimoni Xotéia tõpa auakanimoni. Ito auinina, ito iokanatana. Poiãonoka auinina, poiãonoka iokanatana. ³⁰ Panapee, Saoro pakini anikari isikakitina. Isikaro oa txineiro Xotéia tõpa auakani ötãkikakanimoni.

12

Xesosi Sãkire Auiãkani Misiritiko Iuaãkana Apokini

¹ Iuasaaki auítetxi, Erotxi inakori, misiritana Xesosi sãkire auiãkani. Átikaka itaka kateia åki. ² Iua okapiri Txiako iouata mitaroã. Iua Txiako Xoõo itari. ³ Erotxi imarotakasaakiri Xoteoakori apokaerekatiniri Txiakoni okiko, ipaniãtari Petro maãkiko. Imaãkari Petro Xoteoakori kiiniritesaaki, pão miãtiãkati kiiniritisaaki. ⁴ Petro imaãka atoko itakari iua kateia åki. Ipaniãtari tesiseisi sotatoakori nãkatiniri iua. Kiiniri xipoka atoko Erotxi nirekari imereiniri imisiritiko ikinimane apisatoõ. ⁵ Ininiã Petro kateia åki kaikota. Iuasaaki Xesosi sãkire auiãkani átipirika misãkiretari Teoso Petro !kapani.

Petro Sikakaãka

⁶ !kanõka, imisiritiko imarotini õti apisapanika, kateia åki Petro imakanãta ipi sotato apanãkaki. Iaxirikiko tsapi metao kamakori ipi. Aua apaka apikomoni sotatoakori kateia toreãtaã, Petro mamitekakani !kapani.

⁷ Patimari Teoso nitiri tokiini. Tirikapi ponika kateia āki. Iuasaakipeka Teoso nitiri ōpirīkari Petro.

—Pōkitikaua. Katima pitxako —itxari.

Iuasaakipeka itsapi iaxirikiko iuakoākiri katxaka. ⁸ Teoso nitiri paniātari:

—Pimāka pieretaka. Pikiti mata pitaka, ininiā Petro takari. Pimāka pinopinikiri apaka pitaka, eereka pisa notakata —itxa.

⁹ Ininiā Petro sari iua tikini. Kateia ipokīkana. Iuasaaki Petro uākatari itaponeuatini. !Imarotari atāo Teoso nitiri mipokīkiniri iua. ¹⁰ Eereka inapari ipi sotatoakori auiniātaā, apoka itxana itore maparakiri metao kamakori. Iuaātaā napakari sari sitatximoni. Ikara itore iuaka matakakaua. Ininiā ninoa pokīka. Iua ahoa mapotōkire apokasaakina, katimaritika Teoso nitiri takanapari iua. ¹¹ Iuasaaki Petro imarotapekari:

—Na nitaponeni itxa. Atāopitikara Apiananiri iokanatarini ititiri itixinekiri nota imakatzakini ikapani. Pataparari Erotxi, iuaritika Apiananiri makatzakano. Xoteoakori nirekari okinino, iuaritika Apiananiri makatzakano —itxa.

¹² Ikara ixinika atoko, isari Maria aapokomoni. Xoão Marko inakori inoro oa Maria. Iuaā itomaneri kākiti apotiitapekaua, Teoso imisākiretinina ikapani. ¹³ Maria aapoko apokasaaki, akirita. Ātokoro Hotxi inakoro sari itoremone. Okenakotari Petro sākire. ¹⁴ Oimarotakasaakiri Petro mapara apokini, omiteka iriko āki aapokotxi āki auakanimoni. Opoxoniuata, txamari omaxinīkaretari itore omatakakini Petro ikapani. Ininiā otxari apanakinimoni:

—Aapokotxi toreātaāpekari Petro —otxa.

¹⁵ Ininiā ninoa:

—Pimapitxirita.

—Atāopitikara nisākire —otxa oa.

Ininiā ninoa:

—Petro kamiritekara.

¹⁶ Ninoa ikara atoko inaātakasaaki, Petro mapara akirinātapanikana ninoa. Eereka ninoa matakakari itore, atamata itxarina.

—Kanatokopa pitakanapari kateia? —itxarina.

¹⁷ Ininiā iuakoā ipinitana:

—Hīkenakotari nisākire —itxana.

Eereka isāpiretana:

—Apiananiri makatzakano nota kateia āki. Ikinika ikara hīsāpiretariko Txiako, apanakini aītariakori pakini —itxa.

Iuasaaki isipe. Ātiātaā isa.

¹⁸ Katimatinīkata sotatoakori kateia nīkatakani tsorīkaāta:

—Īteri iua Petro? Kanatokopa itxa Petro pokīkini? —itxana.

Initapiimarina Petro. ¹⁹ Ininiā Erotxi paniātana initiko, txamari !apokarina. Erotxi pimaāna sotatoakori Petro nīkatakani, Petro sinimoni imarotina ikapani, txamari ninoa !imarotari Petro sinimoni. Ininiā eereka ipaniātari ninoa sotatoakori okiko Petro mitekini xika.

Ikara atoko inaāka atoko Erotxi sipeka. Xotéia tōpa ipotorika. Sesaréia sitatxitimoni isa.

Erotxi Ipinini Pirena

²⁰ Erotxi omanatana Txiro sitatxiti auakani, Sitoō sitatxiti auakani pakini. Ninoa nirekari iua omanatinina xipokini, kotxi ninoa apakapari nīpokori Erotxi tixinekiri. Ininiā ninoa sākirauata Parásito inakorikata. Iua Parásito nīkatari Erotxi aapoko, itii pakini. Paimatireri iua. Ninoa sākirauatakasaaki iuakata, iua auikari ninoa sākire. Eereka Erotximoni isana neenamatzixipokini ikapani. ²¹ Erotxi ketotari ikinimane kākiti imisākiretini ikapani. Iketo

ōti apokasaaki ieretakari imāka ereri inakari, auñtetxi māka. Eereka iitopāka auñtetxi itopanere nopini. Iuañ iua misākiretana kākiti. ²² Ininiā kākiti txari:

—Teosora sākiraunāta. Na kākiti —itxana.

²³ Iuasaakipeka Teoso nitiri iaxitikiri okari Erotxi, kotxi iua auiritari kākiti iteasonetiniri iua. Ininiā tsoṃi sotakiperi nika txari iñto. Ikara atoko inikoā ipīpe.

²⁴ Iuasaaki Teoso sākire iaripireta. Ininiā itomaneri kākiti auikari Teoso sākire.

²⁵ Panapee, Paoro pakini parīka Xerosareē sitatxitiā xipokaāka atoko, Ātxiokia sitatxitimoni kanapiriā itxana. Anikarina Xoāo Marko ninoakata.

13

Panapee, Saoro Pakini Mereīko

¹ Xesosi sākire auñākani sauaki Ātxiokia sitatxitiā aua Teoso sākire sāpiretakani, Teoso sākire oerekakani pakini. Aua Panapee. Aua Simāo “Pomamari.” Aua Arósio Sirenikiri. Aua Manaeē. Auñtetxi Erotxi inakori xapitipanika inakasaaki, iua Manaeē xapitipanika inakasaaki, imakananitaāka Erotxikata. Apaka Saoro aua Ātxiokia sitatxitiā. ² Āti ōti Xesosi sākire auñākani iuaātaā takanapari inipokotinina Apiananiri imisākiretinina ĩkapani. Iuasaaki Erekar Matamatakoti txana ninoa:

—Himakatzakana Panapee, Saoro pakini parīkatxi ikaminina nota ĩkapani —itxa Erekar Matamatakoti.

³ Ininiā ninoa takanapari inikini Teoso imisākiretini ĩkapani. Iposo atoko itakarina iuakona Panapee, Saoro pakini nopini. Iokanatana ninoa Erekar Matamatakoti paniātakiti ikaminina ĩkapani.

Xipri Pokomirūti Pirena

⁴ Erekar Matamatakoti iokanatana Panapee, Saoro pakini, ininiā ninoa sari Sereósia sitatxitimoni. Iuañ ninoa iereētaua maporo āki. Isana Xipri pokomirūtimoni. ⁵ Saramina sitatxitiā apokasaakina, isāpiretarina Teoso sākire aiko āki Xoteo apotiitiniātaāua. Xoāo Marko inakori moianatana ninoa iuasaaki.

⁶ Xipri pokomirūti ĩpirixititana. Paposi sitatxitimoni isana. Iuañ itaōkitarina kiki Xoteo. Mīiti itxaua. Iuāka Paxesosi. Āti iuāka Erimasi.

—Teoso sākire sāpiretakarikarano nota —itxa iua.

Txamari na atāo isākire. ⁷ Iua moianatari Xipri auakani auñte Séxio Paoro inakori. Paimatireri iua Séxio Paoro. Iua akiritana Panapee, Saoro pakini iuamoni Teoso sākire ikenakotini ĩkapani. ⁸ Txamari Erimasi !inirekana ninoa. !Inirekar Séxio Paoro auikiniri atāo Teoso sākire.

⁹ Iuasaaki Erekar Matamatakoti iteene sikaimaroretari Saoro (āti iuāka Paoro,) ininiā iteene atamatari iua mīiti. ¹⁰ Itxari iua:

—Pite Satanasi ākiri pitxaua. Pite atāo kamakari mokaiakari pitxaua. Pite kamari ikini sereti maerekati. Ikara atoko ininiā, pimisirienetari kākiti. Atāo inakari Apiananiri sākire pite nirekar pimamakini. ¹¹ Ikara pimaerekani xika Teoso misiritaiko pite uatxa. Mōsiāreti pitxauako. Kona patamatapaniri atokatxi mapaōti.

Iuasaakipeka katxiāri atoko inakari, ipiā apaka apoka Erimasimoni. Ininiā iua nitari āti anikakiri ĩkapani. ¹² Séxio Paoro atamatakasaakiri Erimasi misiritiko, iua auikari Teoso sākire. Itsorīkaāta:

—Peerekari Paoro oerekakiti sākiretxiti Apiananiri pirena isāpiretakiti —itxa.

Ātxiokia Sitatxiti Pisíxia Tixini

¹³ Iposo atoko Paoro imoianariakorikata iereētaua maporo āki. Paposi itakanapana. Pexi sitatxitimoni, Pāpíría tixini isana. Pexi sitatxiti auakasaakina, Xoão Marko takanapana ninoa, Xerosareēmoni ikanapiriini ĩkapani.

¹⁴ Eereka iuaĩkana maporo āki iereētauana. Isana Ātxiokia sitatxitimoni, Pisítxia tixinimoni. Ātxiokia sitatxiti auakasaakina tomatiko ōtisaaki ĩroãna aiko Xoteo apotiitiniãtaãua. Iuaã iitopãkana. ¹⁵ Teoso paniãtakiti aãtsopateē, Teoso sãkire sãpiretakani iōkatsopatakiti aãtsopateē pakini atatsopataãka atoko auĩtetxiakori iuaãtaã auakani txana ninoa:

—Aĩtariakori, ate nirekari hĩsãkirauatini, hĩsãkire auiniã, naia kãkiti hĩsikataparaxiniretini ĩkapani —itxana.

¹⁶ Ininiã Paoro ōkitikaua. Ōkatari iuako ninoa sãkirauatini iotokakinina ĩkapani. Ininiã itxa:

—Nitariakori Isaeo auakanii, apaka hĩte Xoteo minakanuia Teoso paniãtakiti kamakanii, hĩkenakotariko nisãkire. ¹⁷ Isaeo auakani Teosone mereēna aãtokiriakorini Exito tixini auakasaakina, ãti uãkakata auakasaakina. Itxĩkitakana ninoa itomane ininina. Iuasaaki Exito auakani misiritana. Ininiã eereka Teoso makatxakana iposotiireē, ininiã itakanaparina Exito tixini.

¹⁸ —Eereka, koarēta ano Teoso mĩteenekana ninoa ãparaã makipakaniãtaã, kotxi ikamapikarina maerekati iuaã. ¹⁹ Eereka ixipokana setxi pakini ãti uãka Kanaã tixini auakani. Eereka isikari iua itixi ninoamoni ãtipirika iuaã auinina ĩkapani. ²⁰ Eereka Teoso sikana kōtãkikarerini Isaeo auakani auĩteakori tĩkane. Āti kōtãkikareri aua. Eereka iua ipina. Eereka ãtipekana kōtãkikareri aua. Eereka iua ipina. Itxaãpotana koatrosētosu sĩkoēta anokanani. Imapotōkire, Samoeo inakori Teoso sãkire sãpiretakari ninoa ōtãkikakari itxaua.

²¹ —Eereka ninoa nirekari auĩtetxi apiatakari ninoa auĩte ininiua ĩkapani. Ininiã Teoso sikana ninoa Saoo inakori, Kixi ãkiri. Iua atokiri kitxakapirĩka Pēxamiĩ inakori. Iua Saoo ninoa auĩte apiatakari koarēta anokanani. ²² Eereka Teoso makatxakari Saoo. Itxĩkitakari Tavii ninoa auĩte apiatakari ininiua. Teoso sãpiretari Tavii pirena: “Kãkiti Tavii Xesee ãkiri atoko inakari ninireka, kotxi iua kamari ikinika ninireēkiti,” itxa Teoso.

²³ —Teoso sikaenetari ãti, Tavii apika mekani Isaeo auakanimoni. Isaeo auakani maerekani makatxaãkari itxauako. Iua Xesosikara. Iua kãkiti maerekani makatxaãkari txaua. ²⁴ Xesosi parĩka ipotorikini apisapanika, Xoão sãpiretari ikinimane Isaeokini imaerekanina itakanapinina, eereka ipatxisataãkana. ²⁵ Xoão parĩka ixipokasaaki, ipimaãna ninoa: “Kipa hĩuãkatatano nota? Nota kona iua hiãtapakitini. Iuaritika iua ina nota tikini. Nota poiãori, ininiã !apakata iua takote napokini ikiti mata nimakatxakini ĩkapani, kotxi iua Apiananiri,” itxa Xoão.

²⁶ Paoro sãkirauatapanika:

—Nitariakori, Apraã apika mekaniriakorii, apaka hĩte Xoteo minakanuia Teoso paniãtakiti kamakanii, hĩkenakota. Hĩtemonikari Teoso iokanataru iokanapirena kãkiti maerekani makatxakiko pirena. ²⁷ Xerosareē auakani, ninoa auĩteakori pakini kona imarotari Xesosi Teoso ãkiri ininiua. Ninoa atatsopataru Teoso sãkire sãpiretakani sãkire ikini tomatiko ōti, iuaritika ! imarotarina ninoa sãkire. ²⁸ Ninoa kona apokari ixika Xesosi okiko ĩkapani, iuaritika ipaniãtari Pirato okiniri. ²⁹ Ninoa kamari Xesosimoni ikinipoko mitxi Teoso sãkire iōkatsopatakori iaōka. Iposo atoko imakatxakarina iua aamina ĩpiriãmitakariã. Ikata itxarina kai iriko āki. ³⁰ Iuaritika Teoso ōkitikari iua ipĩkitximonepeka auakaripeka. ³¹ Ōkitikaãka atoko, ito ōti kãkiti atamataru iua. Kariréiakini, iuakata Xerosareēmoni sikani aōkitari iua. Ininiã Xesosi iuaĩkana auini pirena sãpiretakani itxauana ninoa Xesosi aōkitakani. Isãpiretarina apanakini Isaeo auakani.

³² —Ininiã uatxa ate sãpiretari Teoso iokanapirena erekari hĩtemoni. Ikara sãkiretxiti Teoso kamaenetakiti aãtokiriakorinimoni kitxakapirĩka. ³³ Īkorasaaki Teoso kamapekari ikara ikamaenetakiti ate ĩkapani, ninoani apika mekanirirakori ĩkapani, kotxi iua õkitikari Xesosi ipĩkasaaki, iuaĩkana auãki inini ĩkapani. Kitxakapirĩka Teoso sãkire iõkatsopatakori Xikari ipiãtaã sãpiretari Xesosi õkitikiniua õti, kotxi itxari:

Pite namarite. Ia õti noerekari kãkiti pite iri nininiua nota.

³⁴ —Kitxakapirĩka Teoso sãpiretapekari iua õkitikiniri Xesosi ipĩkasaaki, iuaĩkana imapinakani tĩkane, kotxi isãkire iõkatsopatakori txari:

Nikamaenetakiti Taviimoni pitemonikara nikama. Ikara erekari nikamapitikako pitemoni.

³⁵ Teoso sãkire iõkatsopatakori Xikari tesiseisiãtaã txari:
Teoso kona auiritari Erekarĩ Kamakari ĩto paiakini.

³⁶ —Kitxakapirĩka Tavii auakasaaki, ikamari Teoso nireẽkiti, kotxi iniri-manẽ auĩte itxaua. Eereka ipĩpe. Ikatapeẽka. Inirimanekata ikatapeẽka, ininiã ĩto paiaka. ³⁷ Xesosipekana, Teoso õkitikari iua. Iua ĩto kona paiaka. ³⁸ Ininiãkara nitariakori himarotariko ia. ³⁹ Xesosi sãkire auĩãkani maerekani makatxakaãka. Erekarini ninoa. Moisesi paniãtakiti kamiko kona makatxakari kãkiti maerekani. ⁴⁰ Erepaniko. Kitxakapirĩka Teoso sãkire sãpiretakani sãkire iaõka atxiĩti apoka hĩtemoni, kotxi ⁴¹ ia atoko itxana:

Hĩkenakota, hĩte Teoso sãkire napetakanii. Hãtamatariko niposotiire, iuaritika hĩpinako, kotxi !hãuikari niparĩka hĩte sauaki. Āti sãpiretiniãri niparĩka, iuaritika !hãuikari.

Ikara atoko itxa Paoro sãkire ninoamoni.

⁴² Xoteoakori pokĩkasaaki Xoteo apotiitiniua aapokotxiti, iuasaaki Xoteo minakanuia aiatana Paoro, Panapee pakini iuaĩkana tomatiko õti ĩkari Teoso sãkire isãpiretinina ĩkapani. ⁴³ Kãkiti apotiitakanuia potorika atoko, itomaneri Xoteo, Xoteo minakanuia Teoso sãkire auĩãkani pakini sari Paoro, Panapee pakinikata. Paoro, Panapee pakini misãkiretana ninoa. Ōtãkikana ninoa, ĩkiniõtika atão ikaminina, kotxi Teoso iteene turetana ninoa.

⁴⁴ Ininiã ãti tomatiko õtisaaki ikinimane iua sitatxiti auakani apoka Apiananiri sãkire ikenakotinina ĩkapani. ⁴⁵ Xoteoakori atapari itomaneri kãkiti apokaãpotini Paoro, Panapee pakini sãpiretakiti ikenakotinina ĩkapani. Ininiãkara ninoa xikotana Paoro, Panapee pakini. Imisãkirepiretana ninoa:

—Na atão Paoro sãkire. !Apakata isãkire —itxanãtana.

⁴⁶ Iuasaaki Paoro, Panapee pakini itaparaxinireritikana isãkirauatana.

—Ate sãpiretari Teoso sãkire hĩte Xoteoakorimoni merepitipanika. Ikara atão. Txamari hĩte !inirekari. Hĩte atxiĩti !inirekari ãtipirika auãki hinini? Ikara atoko ininiã, ate sariko Xoteo minakonimoni, ⁴⁷ kotxi Apiananiri paniãtaua ate ia atoko:

Tirikapi atoko inakari hĩtxauako Xoteo minakanuia ĩkapani nisãkire atão ninoa imarotini ĩkapani, ninoa maerekani nimakatxakini ĩkapani, ikini itixiti auakani ikara imarotini ĩkapani,

—itxa Paoro.

⁴⁸ Xoteo minakanuia kenakotakasaakiri ikara Paoro sãkire, ipoxokoniuatana. Ininiã ninoa:

—Peerekari Apiananiri sãkire —itxanãtana.

Teoso mereẽri kãkiti ãtipirika iuakata auini ĩkapani, ininiã iuasaaki kãkiti kenakotakasaakiri Paoro sãkire, ninoa Teoso mereẽkini auikari iua sãkire.

⁴⁹ Iuasaaki Teoso sãkire iaripireta ikinipoko iua tixini. ⁵⁰ Txamari Xoteoakori !apokaerekatari Xoteo minakanuia auikiniri Xesosi sãkire. Ininiã isãpiretarina aãpirena sitoakoro apiatakani Teoso paxitakanimoni, sitatxi

auakani auíteakorimoni pakini. Ininiã ikara xika ninoa omanatana Paoro, Panapee pakini. Ininiã iokanatana ãtiãtaã isinina. ⁵¹ Ininiã Paoro, Panapee pakini takanapari iuaã. Itakanaparina kipatxi ikiti mataã auakari apaka, kotxi kona ninoa nirekaikari Teoso sãkire. Ininiã isana Ikónio sitatxitimoni. ⁵² Átxiokia sitatxiti auakani Xesosi sãkire auiãkani poxokoniua. Iteene ikamarina Erekar Matamatakoti nireëkiti.

14

Ikónio Pirena

¹ Paoro, Panapee pakini auakasaaki Ikónio sitatxitiã, isana aiko Xoteo apotiitiniãtaãua. Isãpiretarina Teoso sãkire kãkitimoni, ininiã kaiãopokori Xoteoakori, Xoteo minakaniu pakini auikapiretari Teoso sãkire. ² Txamari apanakini Xoteoakori Teoso sãkire mauíãkani kamaomanãkaretana Xoteo minakaniu. Ininiã ninoa omanatana Teoso sãkire auiãkani. ³ Xesosi iokanatakini Paoro, Panapee pakini okanani auana Ikónio sitatxiti. Ninoa sãpiretari Apiananiri pirena itaparaxinireritikana. Isãpiretarina Apiananiri sikiniri ikinipoko erekari maerekanimoni. Apiananiri oerekari isãkirena atão inini, kotxi isikaposotiiretana ninoa, posotiiretxi, kãkiti mimarotakiniti pakini ikaminina. ⁴ Kãkiti sitatxi auakani omanatakakana. Apanakini auikari Xoteoakori sãkire. Apanakini auikari Xesosi iokanatakini sãkire.

⁵ Ininiã Xoteo minakaniu, Xoteoakori pakini, ninoa auíteakorikata imisãkiretakakaua Xesosi iokanatakini imisiritinina íkapani, kai soroã ikiporonakinina íkapani. ⁶ Paoro, Panapee pakini kenakotakasaakiri ikiporonakikona pirena, imitekana. Arisítara sitatxitimoni, Tepi sitatxitimoni, Arikaónia tixini isana. ⁷ Iuaã isãpiretarina Teoso iokanapirena erekari kãkitimoni.

Arisítara Pirena

⁸ Arisítara sitatxiti aua kiki petokakititakari iuasaaki. Matípkotakati. Iponaniãkasaaki, ipetokakititapeka. ⁹ Ikenakotakasaakiri Paoro sãkire, Paoro atamatari iua. Iuasaaki Paoro imarotari iua kiki auikapiretiniri Xesosi sãkire erekape inini íkapani. Ininiã iteene atamatari iua. ¹⁰ Itapasãkireritika Paoro txari iua:

—Põkitikaua. Pitima —itxari.

Ininiã iuasaakipeka õkitikaua, tîpokota itxa. ¹¹ Iuasaaki kãkiti itikari Paoro kamakiti. Ininiã ninoa akirikata isãkireëna, Arikaónia tixini auakani sãkireë:

—Teosoakori apoka atemoni. Kikiakori atoko itxana ninoa.

¹² Ninoa takauãkatari Panapee, Xópite ininiua. Itakauãkatari Paoro Mekório ininiua, kotxi apiata isãkirauata. Panapee poiãoka isãkirauata. Xópite, Mekório pakini teosoakori kamakoni uãka. ¹³ Sitatxi íronakikoãtaã takote aua Xópite misãkiretiko aikoti. Xópite misãkiretakani auíte iuasaaki minari kema auíteakori, aãui kaiãori pakini sitatxi íronakikoãtaãmoni. Iuaã iua apanakini kãkitikata nirekari kema auíte okinina Paoro, Panapee pakini íkapani, iteosone íkapani okinirina atokotxikana. ¹⁴ Panapee, Paoro pakini imarotakasaakiri ikamakitina tîkane, imatsorakitarina ninoaka mãka, kotxi Teoso !itxauana.

Ninoa kãkiti itomanerimoni imitekana. Itapasãkireritikana itxana:

¹⁵ —Kãkiti, kinirepa íkora atoko hîtxa? Hîte kikiãkini atokokanera atxa ate. Ate uai apoka teoso kãkiti kamakiti hîtakanapini íkapani, atão Teoso himarotini íkapani, kotxi atão Teoso auapininiika inakari itxaua. Iua kamari iaxiti, iaxiti auakani, itixi, itixi auakani, potxoari uiniti, potxoari uiniti ãki auakani pakini. ¹⁶ Kitxakapirîka Teoso auiritana ikinipoko kãkiti inirekaãkitina ikaminina. ¹⁷ Iua Teoso ininiua sãpiretakari kaiãopokori auapika, kotxi erekari

Teoso sikakiti kãkitimoni oerekari iua Teoso ininiua. Teoso sikari ãparaã iaxitikiri kãkitimoni. Iua ãparaã oerekari iua Teoso ininiua. Takari kikiu auakari iua sikakiti erekari apaka oerekari kãkiti iua Teoso ininiua. Teoso sikari nipokori ikini sereti kãkitimoni. Ikara oerekari iua Teoso ininiua. Iua sikapoxokonitari aãkixinire. Ikara apaka oerekari iua Teoso ininiua.

¹⁸ Ikara atoko itxana Paoro, Panapee pakini, iuaritika kãkiti nirekapanikari okiniri kema auite Paoro, Panapee pakini ìkapani. Itapararitika Paoro, Panapee pinitana ninoa, ininiã !ìkamarina. ¹⁹ Eereka Xoteoakori Ìtxiokia sitatxitikini, Ikónio sitatxitikini pakini apoka Arisitara sitatxitimoni. Ninoa kãkiti misãkiretana Arisitara auakani. Imisãkirepiretana Paoro, Panapee pakini, ininiã Arisitara auakani auikari ninoa sãkire. Ininiã ikiporonakarina Paoro kai soroã. Eereka ikosekaïtotarina iua sitatxi mapotõkire. Ninoa uãkatari iua ipiãpe. ²⁰ Iuaritika Xesosi sãkire auiãkani apotiitakasaakia iuakata, Paoro õkitikaua. Sitatximoni kanapiriã itxa. Katimatinikata Paoro, Panapeekata sari Tepi sitatxitimoni.

Ikanapiriãna Ìtxiokiamoni, Síria Tixiniã

²¹ Paoro, Panapee pakini sãpiretari Teoso iokanapirena erekari Tepi sitatxiti auakanimoni. Ninoa oerekari kaiãopokori kãkiti. Eereka Arisitara, Ikónio, Ìtxiokia pakini sitatxitimoni ikanapiriãna. ²² Iuaã oerekana kãkiti Teoso sãkire iteene imarotina ìkapani. Ôtãkikana ninoa Teoso sãkire iaõka ãtipirika ikaminina. Ia atoko Paoro, Panapee pakini oerekana ninoa: “Teoso aãuïtetakasaaki, amisiritiko kaiãopokori amïteenekako.”

²³ Ikinipoko Xesosi sãkire auiãkani apotiitiniãtaãua Paoro, Panapee pakini mereẽna ninoa õtãkikakani. Ninoa kõtãkikarerini iteene auikari Apiananiri sãkire. Paoro, Panapee pakini misãkiretari Teoso ninoa ìkapani. Nipokori itakanapa Teosokata isãkirauatini ìkapani iusaaki.

²⁴ Eereka isipekana. Ìpirixitarina Pisítxia tixini. Eereka Pãpíria tixinimoni isana. ²⁵ Isãpiretarina Teoso iokanapirena erekari Pexi sitatxiti auakanimoni. Eereka isana Atária tixinimoni. ²⁶ Iuaã iereẽtaua maporo ãki Ìtxiokia sitatxitimoni isinina ìkapani. Iuaã Ìtxiokia sitatxitiã mitxipeka ninoa iokanataãka Teoso parika ikaminina ìkapani. Iuaãtaã Xesosi sãkire auiãkani misãkiretari Teoso ninoa ìkapani, Teoso iteene nãkatinina ìkapani. Ikara parikatxi iposope ninoa kamini.

²⁷ Ìtxiokia sitatxiti apokasaakina, Xesosi sãkire auiãkani imakinika apotiitaua ninoakata. Ininiã Paoro, Panapee pakini sãpiretari ikinika Teoso kamakiti. Isãpiretarina Teoso auiritinina Xoteo minakaniua apaka auikiniri Xesosi sãkire. ²⁸ Paoro, Panapee pakini auapokota iuaã Ìtxiokia sitatxitiã Xesosi sãkire auiãkanikata.

15

Teoso Takaõtxikare Pirena

¹ Ìtikaka kikiakori Xotéia tãpakini apoka Ìtxiokia sitatxitimoni. Ninoa oerekana Xesosi sãkire auiãkani:

—Moisesini paniãtaua Teoso takaõtxikare aïtoã atakini. Txamari hïte ! hïtakari, ininiã Teoso !imakatxakari himaerekani —itxana ninoa.

² Paoro, Panapee pakini txana ninoa:

—Na atão hïte sãkire. Teoso takaõtxikare ninoa ìtoã !auari, iuaritika Teoso makatxakapekari ninoa maerekani —itxana.

Ininiã itaparakienatakauana ikara sãkiretxiti xika, ininiã ninoa mereẽna Paoro, Panapee, ãtikaka Xesosi sãkire auiãkani Ìtxiokia auakani apaka Xerosareẽmoni isinina ìkapani.

—Iuaã hĩsãpiretariko ikara sãkiretxiti Xesosi iokanatakinimoni, kiomãtxiakori pakinimoni. Ninoa sãpiretaua atão —itxana.

³ Iuasaaki Xesosi sãkire auiãkani takapiretanapana ninoa, ininiã Paoro, Panapee, apanakini pakini potorika. Ninoa ĩpirixititakasaakiri Penisia tixini, Samaria tãpa pakini, Paoro sãpiretana ikinimanemoni:

—Xoteo minakaniua takanapapekari imaerekani. Inirekarina Teoso paniãtakitinoka ikaminina.

Ininiã Xesosi sãkire auiãkani poxokoniuata ikara pirena ikenakotakasaakina.

⁴ Eereka Paoro apanakinikata apoka Xerosareẽmoni. Xesosi iokanatakini, kiomãtxiakori, apanakini Xesosi sãkire auiãkani pakini apakapana ninoa. Paoro, Panapee pakini sãpiretari Teoso kamakiti Xoteo minakonimoni.

⁵ Iuasaakipeka ãtikaka pariseoakori, Xesosi sãkire auiãkani, apakapapiretana:

—Ninoa Xoteo minakaniua apakapapitkariko Teoso takaõtxikare. Ninoa kamapitkariko Moisesini paniãtakiti. Hĩsãpiretanako —itxana.

Xesosi Iokanatakini Kiomãtxiakorikata

⁶ Ininiã ninoa Xesosi iokanatakini, kiomãtxiakorikata apotiitaua, Xoteo minakaniua ĩtoã Teoso takaõtxikare takiko pirena isãkiretinina ĩkapani. ⁷ Ninoa iteene sãkirauataka atoko, iua Petro õkitikaua, misãkireta itxana ninoa:

—Nitariakori hĩte imarotari Teoso mereẽno nota. Hĩte sauaki uatxakapokoikani iua mereẽno nota, iua iokanapirena erekari nisãpiretini ĩkapani Xoteo minakonimoni, ikenakotinina ĩkapani, auikinirina ĩkapani. ⁸ Teoso imarotari kãkiti ãkixinire sãkire. Iua sikari Erekari Matamatakoti Xoteo minakonimoni. Ininiãkara aimarotari Teoso apakapari Xoteo minakaniua, kotxi isikari Erekari Matamatakoti ninoamoni, atemoni isikini atokotxikana. ⁹ Amaerekani ate ãkixinireẽ Teoso makatxakini atokokanera, Teoso makatxakari imaerekanina ãkixinireẽna, kotxi ninoa auikari Xesosi sãkire. ¹⁰ Hĩte txĩkitakari Teoso omanãkarauatini. !Erekari hĩkamakiti. Hĩte nirekari Xesosi sãkire auiãkani kaminiri ikinika Moisesi paniãtakiti, txamari akiomaneakorini kitxakapirĩka !iposotari ikaminirina Moisesi paniãtakiti. Ate apaka !aposotari. ¹¹ Moisesini paniãtakiti kamiko !imakatxakari kãkiti maerekani. Amaerekani makatxakaãka, kotxi Xesosi Apiananiri iteene tiretaua ate, ininiã aũikari isãkire. Ikara atokokana Xoteo minakaniua maerekani makatxakaãka apaka —itxa Petro.

¹² Panapee, Paoro pakini sãpiretana ninoa Teoso kamakiti Xoteo minakonikata auakasaakina, Teoso kamakiti kãkiti maposotakinini, posotiiretxi. Ikara isãpiretakasaakina, ikinimane iuaã apotiitakaniua tsorĩkaãnãta. Masãkireninoka itxana. ¹³ Panapee, Paoro pakini sãkirauataka atoko, Txiako txari:

—Nitariakori hĩkenakotari nota sãkire. ¹⁴ Simão Petro uatxananira isãpiretaua Teoso tiretinina Xoteo minakaniua, kotxi ninoa sauaki imereẽna kãkiti inakitiakori ĩkapani. ¹⁵ Teoso sãkire sãpiretakani kitxakapirĩkarini iõkatsopatapekari ikara atoko inakari sãkiretxiti. Ninoa iõkatsopatapekari:

¹⁶ Apiananiri txari: “Eereka nikanapiriã. Noerekai nisãpirena amaneri, notamoni hãpokini ĩkapani. Hĩauĩte Taviini auakasaaki, pamimari hãpokini notamoni. Ikara atoko inakari uatxa xipope, aapokotxi irikakari xipokakari atoko itxa. Aapokotxi amaneri atoko nikamako, ininiã apakatapitika kãkiti apokini notamoni.

¹⁷ Ininiã ikini uãkati nitanoko nota. Xoteo minakaniua nota akiritakini ninakitiakori nitanoko nota.”

¹⁸ Ikara atoko itxa Apiananiri kitxakapirĩka kãkiti imarotini ĩkapani, itxa Teoso sãkire iõkatsopatakori.

19—Ininiã notamoni, !erekari apaniãtinina ninoa Xoteo minakaniua, Teoso sãkire auiãkani, ate kiomaneakorini paniãtakiti ikaminina. Ikara atoko inakari pamimari. 20 Maõtãkikana ninoa. Maiõkatsopata ninoamoni: “! Hinikapiri nipokori teoso kamakorimoni siãkori. Hĩtanoro minakotokatika !hĩsirĩkape. Hĩtaniri minakotokatika hĩsirĩkape. !Hinikapiri nipokori manotsaãtakori xini. Arẽkatxi !hiãtape, !hinikape.” Ikaranokara maiõkatsopata ninoamoni. 21 Ikaranoka aiõkatsopata, kotxi apikomoni Moisesini paniãtakiti atatsopataãka aiko ãki Xoteoakori apotiitiniãtaãua ikini õti tomatiko õtisaaki. Moisesini sãkire sãpiretaãka ãtipirika ikininape sitatxiti, ninoa iteene imarotini ïkapani —itxa Txiako ninoamoni.

Iokanatsopatakitina Xoteo Minakonimoni

22 Ninoa Xesosi iokanatakini, kiomãtxiakori apaka, ikinimane Xesosi sãkire auiãkani apaka, ninoa apokaerekatari ãtikaka kiki imereinina ãtxiokia sitatxitimoni Paoro, Panapee pakinikata isinina ïkapani. Ninoa mereeri Xotasi inakori, Síراسi inakori pakini. Iua Xotasi uãka Pasapasi inaãka. Xesosi sãkire auiãkani iteene paxitana ninoa ipi. 23 Xesosi iokanatakini, apanakini pakini iokanatarari aãtsopa iõkatsopatakitina Xotasi, Síراسi pakini anikiniri. Ia atoko itxa iua iõkatsopari:

Ate hĩtariakori, Xesosi iokanatakini, kiomãtxiakori apaka, aiokanatsopata hĩte aĩtariakorimoni Xoteo minakonimoni, ãtxiokia sitatxiti auakanimoni, Síراسi tixini auakanimoni, Sirísia tixini auakani pakinimoni aiokanatsopata. Ereẽkai hĩte.

24 Ate kenakoenetari Xesosi sãkire auiãkani uai auakani sari hĩtemoni. Ninoa txai hĩte: “Hĩtakariko Teoso takaõtxikare hĩtoã. Hĩkamariko Moisesini paniãtakiti. Ikara himakamakanisaaki, Teoso !imakatxakapaniri himaerekani.” Ikara atokora itxaina hĩte. Ininiã hĩte kamaxirexinirenoka hĩtxa. Uatxa kona hĩte imarotari atão hĩkamini. Kona ateni paniãtana ninoa ikara atoko inakari isãpiretiniina hĩte. 25 Ininiãkara ate apotiitaua. Akinika ate apokaerekatari kikiakori amereẽkini hĩtemoni aiokanatinini Panapee, Paoro pakinikata. Panapee, Paoro pakini ate tiretakini. 26 Ninoa kikiakori amereẽkini sipeka monõkoriaãtaã Apiananiri Xesosi Kristo paniãtakiti ikaminina ïkapani.

27 Ate iokanatarari Xotasi, Síراسi pakini ninoakata hĩtemoni. Hãpisatoõ ninoa sãpiretaiko ate iokanatsopatakititxikana. 28 Erekari Matamatakoti apokaerekatakiti sãkiretxiti, ate apokaerekatakiti sãkiretxiti apaka asãpiretai hĩte uatxa. Paniãtakori apia mimari !apaniãtai hĩte. Ianokara apaniãtakiti sãkiretxiti hĩkamako: 29 “! Hinikapiri nipokori teoso kamakorimoni sikakori. Arẽkatxi !hiãtape, !hinikape. !Hinikapiri nipokori manotsaãtakori xini. !Hĩsirĩkape sitokata pĩtanoro minakotokatika. !Hĩsirĩkape kikikata pĩtaniri minakotokatika.” Iuanokara himakamakaniã, peerekari. Ereẽpiko, itxa ninoa iõkatsopatakiti.

30 Paoroma, Panapeema, Xotasima, Síراسima pakini iokanataãka ãtxiokia sitatxitimoni. Ninoa iuaã apokana. Apotiitana ikinimane Xesosi sãkire auiãkani, ninoamoni sika itxarina iua iõkatsopari. 31 Atatsopatakana atoko ipoxokoniuatana, kotxi erekapirenari ninoa iokanapirena. 32 Xotasi, Síراسi pakini Teoso sãkire sãpiretakani itxauana. Ninoa iteene sãkirauata ninoa Xoteo minakaniua isikataparaxiniretinina ïkapani. Ininiã ninoa Xoteo minakaniua apikomoni auikarina Xesosi sãkire. 33 Xotasi, Síراسi pakini kaikota iuaãtaã mapaõti. Eereka Xesosi sãkire auiãkani takanapapiretana, Xesosi iokanakinimoni ikanapiriinina ïkapani.

—Hīsipiniikaua erekaxinire hinini —itxana.

³⁴ Iuaritika Síyasi apokaerekatari iuaã ikaikotini. ³⁵ Paoro, Panapee pakini kaikotapanika Átxiokia sitatxiti. Ninoa apanakinikata oerekari Apiananiri sãkire iua sãkire auiãkanimoni. Isãpiretarina iua sãkire isãkire mimarotakanimoni apaka.

Paoro, Panapee Pakini Iarikini

³⁶ Eereka mapaõtipeka inapaka atoko, Paoro misãkiretari Panapee:

—Makanapiriã ikininape aapokotxitimoni mitxi Apiananiri sãkire asãpiretinimoni. Mamotikaëtana aítariakori atauako erekana atxiíti —itxari Panapee.

³⁷ Panapee nirekari Xoão Marko inakori anikini ninoakata. ³⁸ Txamari Paoro !nirekari anikiniri iua.

—Pãpíria tixini aãuakasaaki, iua Xoão Marko asikaua. !Nirekaikari atekata iparĩkauatini —itxa.

³⁹ Ikara xika itaparakenatakakauana. Eereka iarikana. Panapee anikari Xoão Marko. Maporo ãki iereëtauana Xipri inakori pokomiriítimoni isinina ïkapani. ⁴⁰ Paoro mereëri Síyasi, iuakata isini ïkapani. Iuaãtaã Xesosi sãkire auiãkani misãkiretari Teoso, Paoro, Síyasi pakini ïkapani, Teoso inĩkatinina ïkapani. Eereka Paoro potorika Sírasikata. ⁴¹ Ìpirixititarina Síria tixini, Sirísia tixini pakini. Aapokotxi apokasaakina, isãpiretari Xesosi sãkire iuaãtaã auakanimoni. Isikataparaxiniretana Xesosi sãkire auiãkani. Ininiã ninoa apia auikari Xesosi sãkire.

16

Tximótxio Moianatana Paoro, Síyasi Pakini

¹ Paoro sari Tepi sitatxiti. Eereka Arisitara sitatxiti isa. Iuaã aua kiki, Xesosi sãkire auiãkari, Tximótxio inakori. Inoro Xoteo otxaua. Oa apaka auikari Xesosi sãkire. Iri kona Xoteoni. Áti uãka Kreko itxaua. ² Xesosi sãkire auiãkani, Arisitara auakani, Ikónio auakani apaka sãkire: “Peerekari Tximótxio.”

³ Paoro nirekari anikiniri Tximótxio iuakata imoianari ïkapani. Ininiã iua takari Teoso takaõtxikare Tximótxio ïtoã, kotxi Xoteoakori iuaãtaã auakani imarotari Tximótxio iri Kreko ininiua. ⁴ Paoro imoianariakorikata saãpota ikininape sitatxitimoni. Kãkiti aapoko apokaãpotakasaakina, isãpiretarina nino Xesosi iokanatakini sãkire, kiomãtxiakori sãkire pakini. Isãpiretarina ikinimane kãkitimoni. Ninoa sãkire aãtsopaã iõkatsopatakori sãkiretxiti isãpiretana ninoa. Paoro imoianariakorikata õtãkikana ninoa ikara isãkirena auikinina ïkapani. ⁵ Ininiã ikiniõtika kãkiti apiaãpotape auikiniri Xesosi sãkire. Ito-manepaka auikari Xesosi sãkire.

Paoro Taponetari Masetónia Auakari

⁶ Paoro imoianariakorikata ïpirixitiãpotari Piríxia tixini, Karásia tixini pakini. Iuasaaki Erekari Matamatakoti !auritana ninoa Xesosi sãkire isãpiretinina Ásia tixiniã. ⁷ Ninoa apokasaaki Mísia tixini takote, inirekamarina Pitxínia tixini isinina. Erekari Matamatakoti !auritana isinina Pitxínia tixinimoni. ⁸ Ininiã ninoa ïpirixititari Mísia tixini. Apokana Tóatxi sitatxiti.

⁹ Iua ïkanõkati Paoro taponeuata. Itaponetari kiki Masetónia tixini auakari. Itimanãta. Amanaãnãtari:

—Uaimoni pina Masetónia tixini. Pimoianataua ate —itxari.

¹⁰ Ininiã Paoro taponeuataka atoko, ate xinikari:

—Masapoka Masetónia tixinimoni, kotxi atãoka Apiananiri akiritaua ate Teoso iokanapirena erekari kãkiti ikiraãkinimoni asãpiretini ïkapani.

Ininiã aiamata Masetóniamoni asini ïkapani.

Arítxia Auikari Xesosi Sākire

¹¹ Tóatxi ioporokote ate iereētua maporo āki. Asapitipo Samotirásia ipokomiriīti. Pokatimari ōti ate sari Niápori sitatxiti. ¹² Iuaã apotorika. Asari Piriposi sitatxitimoni, Masetónia tixiniã. Masetónia tixiniã iua sitatxi mitari. Piriposi atoko inakari !auari. Iuaã auana kaiãopokori kākiti Homa sitatxitikini. Ate napari mapaōti iuaã.

¹³ Tomatiko ōtisaaki sitatxi itinikata ate sari uini itinikata. Ate uākatari uini itinikata Xoteoakori apotiitiniãua Teoso imisākiretinina ikapani. Ininiã ate apoka iuaã. Atāopitika ate uākatakiti. Aāpokaro Xoteoakoro. Iuaã apotiitauana Teoso imisākiretinina ikapani, ininiã aītopāka, ninoakata asākirauatini ikapani. ¹⁴ Sito Arítxia inakoro aua ninoa sitokata. Oa txīta poporeri vētxitakaro otxaua oa. Txiatxira sitatxitikero oa. Teoso misākiretakaro oa. Iuasaakipekara okenakotari asākire. Iuasaaki Apiananiri iteene kamaimaroretaro oa Paoro sāpiretakiti, ininiã oa auikari isāpiretakiti. ¹⁵ Ininiākara oa, oaāpoko auakani apaka, patxisataāka. Eereka oa aiataua oaāpoko āki akaikotini:

—Masa naapoko, hīkaikotini ikapani. Hītemoni atāo nauikiniāri Apiananiri sākire, ininiã notakata hīkaikota —otxa.

Ikara atoko oa aiataua oakata akaikotini, ininiākara akaikota oaāpoko.

Paoro, Sírsi Pakini Kateia Āki Auini

¹⁶ Āti ōti Teoso misākiretiko aikotimoni asikasaaki, ataōkitaro ātokoro iamotakoro. Maerekati matamatakoti auaitotaro oa. Iua maerekati matamatakoti imarotari kākiti kamakiti apisapanika. Oa amotakani apakaparo ito txineiro oimarore īki. ¹⁷ Oa ātokoro osapika Paoro tikini, ate tikini apaka. Oākiritapika:

—Naia kikiakori Teoso nitiriakori. Apiananiri nitiriakori itxauana naia. Oerekauana amaerekani makatxakiko, Teosomoni asini ikapani —otxaāpokata.

¹⁸ Itanaōtika ikara atoko oākirināta. Ininiã Paoro maerekaxiniretinoka itxa oākiritakiti xika. Āti ōti isapotorika, paniāta itxari maerekati matamatakoti:

—Xesosi Kristo uākaā nota paniātai, pitakanapiniro aroa ātokoro —itxa.

Iuasaakipeka maerekati matamatakoti takanaparo. ¹⁹ Oa amotakani ikara imarotakasaaki, otsopa imapakapapekaniika oimarore īki, ininiã imaīkarina Paoro, Sírsi pakini. Ikosekaītotana, anikana sitatxi apanīkaki auītetxiakorimoni. ²⁰ Iuaã apokana. Isāpiretarina Homanoakori:

—Naia kikiakori Xoteo itxauana. !Erekari ninoa oerekapiretakiti, ininiã sitatxi auakani omanākarauata ninoa sāpiretakiti xika. ²¹ Ate amakinika Homano atxaua. Aimarotapekari aāuiākiti aāuīte paniātakiti. Txamari naia oerekaua ipinimonipo inakari akamini ikapani. Naia oerekaua āti uāka auīākiti sākiretxiti. !Auiritaāka aāuikiniāri naia oerekapiretakiti. !Auiritaāka akaminiri —itxana.

²² Iuasaaki kākitypokoni iuaã apotiitakaniua nirekari Paoro, Sírsi pakini iāsokinina. Ninoa auītetxiakori matsorakitari Paoro māka, Sírsi māka apaka, imakatxakinina ikapani. Ipaniātarina apanakini aāpitsaā ixirokitatiko.

²³ Ixirokitatapeēkana atoko, kateia āki okaākana Paoroni, Sírsini pakini. Auītetxiakori paniātari iua kateia nīkatakari, inapokopiretiniri imasikakakoni tīkane. ²⁴ Ininiākara kateia nīkatakari okaraītotana Paoro, Sírsi pakini kateia irikoākixiti. Ieretakari ninoa kiti isīkatatxi taopata kamapakotatakori āki, imakatxakakanina ikapani.

²⁵ Īkanōka Paoro, Sírsi pakini misākirenātari Teoso. Ixikarauanātana Teoso ikapani. Apanakini kateia āki auakani kenakonātari. ²⁶ Iuasaaki katimaritika itixi iakeēkata iteene. Kateia patapi apaka iakeēkata. Iuasaakipeka kateia tore takaka. Iītxikikona metao kamakori, pirikeri āki auakani itxikikona, karakitakata, katxaka itxa metao. ²⁷ Iuasaaki kateia nīkatakari mereka. Iua

atamadari kateia tore takakapeka, ininiã iuãkatari ikinimane kãkiti inĩkatakini mitekapeka. Ninoa mitekaãkamako, iua auĩte okamariko iua, iparĩka imakamãkani xika. Ininiã ikosekaro iouata mitaro iuaka iorotiniua ĩkapani.

²⁸ Okaaritakasaakiua, Paoro akirikata:

—Kona pokapeua. Uaikareua ate amakinika —itxa.

²⁹ Iua kateia nĩkatakari amanaãri tirikapi. Katimaritika ĩroã. Ipamaka Paoro, Sírsi pakini apisatoõ. Ikikinanaãkata. ³⁰ Eereka imipokĩkana ninoa. Iua:

—Kiatokopa nikama, nimaerekani Teoso makatzakini ĩkapani? —itxana ninoa.

³¹ Ninoa:

—Pauikariko Apiananiri Xesosi sãkire, ininiãkara Teoso makatzakari pimarekani, paapoko auakani marekani apaka —itxari.

³² Eereka Paoro, Sírsi pakini sãpiretari Apiananiri sãkire iuamoni, iua aapoko ãki auakanimoni apaka. ³³ Iuasaaki imaropirĩkata kateia nĩkatakari arokari ninoa karo. Eereka iua imiakorikata, ĩtanorokata patxisataãka.

³⁴ Eereka anikana Paoro, Sírsi pakini aapoko ãki. Isikakienatana. Iua imiakorikata, ĩtanorokata poxokoniua, kotxi iuasaaki ninoa auikari Teoso sãkire.

³⁵ Katimatinĩkata auĩtetxiakori iokanatana initiriakori kateiamoni, Paoro, Sírsi pakini isikakini ĩkapani. Ninoa apokasaaki, itxana kateia nĩkatakaronimoni:

—Pauritana Paoro, Sírsi pakini isinina.

³⁶ Ininiã iua kateia nĩkatakari sãpiretari Paoro:

—Niauĩteakori iokanapireta notamoni hĩte nisikakini ĩkapani. Ininiãkara hĩsipiniikaua erekaxinirepeka hinini —itxana.

³⁷ Txamari Paoro txari auĩtetxiakori nitiriakorimoni:

—Ari, Homanoakorikareua ate, iuaritika auĩtetxiakori Homanoakori iaritataua ate ikinimane apisatoõ. Maxikatĩka ninoa iaritataua ate. !Akamari marekati. Eereka kateia ãki ninoa okaua ateni. Uatxa ninoa nirekari iokanatinuia ate ikinimane mimarotakinitipanika. Konapitini. Ninoapitikarako inari uai. Ninoa makatzakaua ate uai —itxa Paoro ninoamoni.

³⁸ Ninoa kikiakori kanapiriã iauĩteakorimoni. Isãpiretarina Paoro iokanapirena. Ninoa auĩteakori imaropiretakasaakiri Paoro, Sírsi pakini Homano ininiuana, ninoa pĩkarauata, kotxi ninoa maxikatĩka misiritana Paoro, Sírsi pakini. ³⁹ Ininiãkara ninoa sari Paoromoni, Sírsi pakinimoni. Ninoa:

—Ate !imarotari hĩte Homano hininiua. Aimarotaãkamariko !amisiritamaiko —itxana.

Eereka ninoa auĩtetxiakori mipokĩkana Paoro, Sírsi pakini.

—Sitatxi hĩtakanapako —itxana.

⁴⁰ Ininiã Paoro, Sírsi pakini takanapari kateia. Arĩtxia inakoro aapokomoni isana. Iuaã aõkitana kãkiti Xesosi sãkire auiãkani. Paoro, Sírsi pakini sikataparaxiniretana ninoa. Eereka isipekana, iua sitatxiti itakanapinina.

17

Tesarónika Sitatxiti Pirena

¹ Paoro, Sírsi pakini napari Āpĩpori sitatxiti. Apikomoni inaparina Aporónia sitatxiti. Eereka apokana Tesarónika sitatxiti. Iuaã aua aiko Xoteo apotiitiniãtaãua. ² Paoro itotapekari Xoteo apotiitiniãtaãua aikotimoni isini. Ininiãkara iua sari iuaã. Ipi ãti pakini õti tomatiko õti, isari iuamoni. Iuasaaki Teoso sãkire iõkatsopatakori isãpireta kãkitimoni iuaãtaã auakanimoni. Ninoa pimaruata, ininiã iua sãpirenauata. ³ Ininiã Paoro txari:

—Teoso sãkire iõkatsopatakori oerekaua ate: Teoso mereẽkiti misiri-taãkapitikako, okaãkapitikako. Eereka õkitikapitikauako, iuaãkana auãki inini ãkapani. Ia Xesosi hĩtemoni uatxa nisãpirenãtakiti Teoso mereẽkitipitikara iua — Paoro txana ninoa.

⁴ Ætikaka Xoteoakori auikari Paoro sãkire, ininiã Paoro, Sírası pakini moianariakori itxapekauana. Kaiãopokori Akaia tixini auakani Teoso sãkire auiaãkani, auikari Paoro sãkire apaka. Kaiãopokoro sitoakoro, auĩtetxiakori ãtanoroakoro, auikari Paoro sãkire apaka.

⁵ Xoteoakori, Paoro sãkire mauiaãkani, xikotari Paoro. Ininiã ninoa apotiitana kãkiti kaneenamarini, maparĩkauatakani ahoaãtaã auakani. Apotiitana kãkitipokoni. Ininiã ninoa akiripoakata, imiteẽkatana. Ikinimane sitatxi auakani kenakotari. Neenamatzxi atoko itxakatana. Imitekana Xasão inakori aapokomoni. Æroãkatana itapararitikana, Paoro, Sírası pakini initinina. Inirekarina imipokĩkinirina ninoa kãkiti apotiitakanimoni apisatoõ.

⁶ Txamari Paoro, Sírası pakini !auari iuaã. Ininiã ikosekaĩtotarina Xasão. Apanakini Xesosi sãkire auiaãkani apaka ikosekaĩtotana. Iauĩteakorimoni anikana. Isãpiretarina iauĩteakorimoni:

—Paoro, Sírası pakini kamari maerekati. Ikini itixiti ikamarina maerekati. Ininiã ninoa uai ate sitatxineẽpekarana uatxa. ⁷ Ia Xasão apakapana ninoa. Iua aapoko ikaikotana ninoa. !Ikamarina aãũte Sesa inakori paniãtakiti, kotxi ninoa oerekari kãkiti ãti auĩtetxi ininiãua, Xesosi inakori —itxana iauĩteakorimoni.

⁸ Ikara sãkiretxiti ikenakotakasaakina, kãkiti apotiitakaniua akiripoakata. Auĩtetxiakori !imarotari ikamakitina tĩkane. ⁹ Eereka auĩtetxiakori misãkiretana Xasão, apanakinikata:

—Hiĩkitxitana hĩsikakiko ãkapani. Eereka auiritaina hĩsini.

Ininiã eereka auiritana isinina.

Peréia Sitatxiti Pirena

¹⁰ Kikatapeka inakasaaki, Xesosi sãkire auiaãkani iokanataka Paoro, Sírası pakini Peréia sitatxitimoni. Iuaã Peréia sitatxiti ninoa apoka atoko, Æroãna aikoã Xoteo apotiitiniãtaãua. ¹¹ Kãkiti iuaã auakani iteene nirekari Paoro sãpirena ikenakotinina. Tesarónika auakani !atokoni itxana ninoa. Ikiniõtika ninoa atatsopatari Teoso sãkire iõkatsopatakori, kotxi inirekarina imarotininina:

—Paoro sãkire atão atxiĩti? —itxana.

¹² Ininiã kaiãopokori Xoteoakori auikari Xesosi sãkire. Kaiãopokoro sitoakoro Akaia tixini auakani apaka auikari Xesosi sãkire. Naia sitoakoro auĩtetxiakori ãtanoroakorokara. Kaiãopokori kikiakori Akaia tixini auakani apaka auikari Xesosi sãkire. ¹³ Eereka Xoteoakori Tesarónika sitatxiti auakani kenakopiretari Paoro sãpiretiniri Xesosi sãkire Peréia sitatxitiã. Ininiã ninoa sari Peréia sitatxitimoni. Apokaãkana atoko, itxĩkitakarina kãkiti ahoaãtaã apotiitakaniua Paoro omanatinina ãkapani. ¹⁴ Ikara atoko ininiã, Xesosi sãkire auiaãkani iokanata Paoro potxoari uunitimoni. Sírası, Tximótxio pakini kaikotapanika Peréia sitatxiti. ¹⁵ Paoro moianatakani anikari iua Atena sitatxitimoni. Eereka ninoa kanapiriã Peréia sitatxitimoni. Paoro iokanapireta Sírası, Tximótxio pakinimoni:

—Katimariã hinako —itxa.

Atena Sitatxiti Pirena

¹⁶ Ininiã Atena sitatxitiã Paoro iãtapari Sírası, Tximótxio pakini apokini. Iuaaaki Paoro itikari kaiãopokori teoso kãkiti kamakiti. Sitatxi xãpoka kãkiti teosonenoka. Ia xika Paoro matinaniuata. ¹⁷ Ininiãkara Paoro oerekari

Teoso sãkire Xoteoakorimoni aiko ãki Xoteo apotiitiniãtaãua. Xoteo minakaniua, Teoso sãkire auiãkani apaka, Paoro oerekari Teoso sãkire iuaãtaã. Ninoa pimarauata, ininiã imisãkiretakakana Teoso sãkire ixinikinina ìkapani. Ikiniõtika Paoro oerekari Teoso sãkire kãkitimoni, nipokori iamotikoãtaã sikanimoni. ¹⁸ Kãkiti kaxinikaxitirerini, Epikoreo inakoni, Esitõiko inakoni apaka sãkirauata Paorokata. Paoro sãpiretana ninoa Xesosi pirena. Isãpiretana Xesosi ipinini, eereka õkitikiniua, iuaãkana auãki inini pirena. Ininiã ãtikaka:

—Natokopa itxa ikara inakari sãkiretxiti? Uuato sãkire atoko itxa. !Kikiteri iua —itxana.

Apanakinipekana txari:

—Isãpiretari ãti itixiti auakani teosone pirena.

Paoro Sãpirenauata Ariópako Inakoriãtaã

¹⁹ Eereka ninoa kaxinikaxitirerini anikari Paoro aiko kãkiti apotiitiniãtaãua, imiriã nopini Ariópako inakoriãtaã. Iuaã ninoa txari:

—Ate nirekari aimarotniri poerekakiti sãkiretxiti. Mitxi kona ate kenakotari ikara atoko inakari sãkiretxiti. ²⁰ Ipixini poerekakiti sãkiretxiti !aimarotapanika. Ipinimonipo itxa poerekakiti. Ininiã pisãpiretaua. Poerekaua, aimarotnini ìkapani —itxarina Paoro.

²¹ Ikara atoko itxana, kotxi ikiniõtika Atena sitatxiti auakani, apaka ãti itixiti ìkani Atena kaikotakani nirekari ãtiãtaãkiri sãpiretakiti imarotnina ìkapani, ininiã ikiniõtika amaneri sãkiretxiti ikenakonãtana.

²² Paoro ikinimane apisatoõ itima, imiriã Ariópako inakoriãtaã. Iua txana ninoa:

—Kikiakori, Atena sitatxiti auakanii, nitikapekari hõteosone kaiãopokori, ininiã nimarotari iteene hõpaxitiniri hõteosone. ²³ Ahoaãtaã ninapaãpotakasaaki, natamatari kaiãopokori hõteosone misãkiretikoãtaã. Iuasaaki natamatari ãti hõteosonemoni sikakori takikoãtaã. Iuaã natatsopatarari iõkatakori: “Uai Teoso mimarotakoti misãkiretikoãtaã.” Iua hõteosonetakiti, himimarotakiniti, iuapitikara uatxa nota sãpiretai hõte.

²⁴ —Iua Teoso kamari itixi. Ikinipoko itixi nopini auakari apaka ikama. Iua Apiananiri. Iua itixi auakani auõte itxaua iua. Iaxiti auakani auõte apaka itxaua iua. !Ikaikota kãkiti kamakiti aikotiã. ²⁵ Ikinipokokara auapeka Teosomoni, ininiã !inirekari kãkiti kamakiti iua auini ìkapani. Teosopitikara txõkitakari kãkiti auãki inini. Iuakara sikaxiniretari kãkiti. Teosokara sikari ikinipoko kãkiti auakiti. ²⁶ Merepitapanika kãkiti !auari, eereka Teoso kamari kiki Atão inakori. Ikini uãkaõti kãkititi atokiri itxaua iua Atão. Teoso iokanatana ninoa ikini itixitiã auinina. Kãkiti mauakani apisapanikara, imereẽri kãkiti iponaniini õti õtkane. Iaõtari kãkiti auiniãtaã õtkane. ²⁷ Ikara atokora itxa Teoso kamakiti. Teoso txõkitakari kãkiti nitiniri Teoso. Initaãpotakasaakirina, atxõiti ninoa apokari Teoso, kotxi kona õtakoni aua Teoso. ²⁸ ãti txapekari: “Teoso txõkitakaua auãki anini, atõpokotini ìkapani. Iua matxõkitakaniãua auãki anini, laãuari.” Kaxikarerini hõte sauaki auakani txapekari: “Teoso anaakori ate apaka txaua.” ²⁹ Teoso anaakori aniniãua, ininiãkara aimarotari kona kãkiti kamakiti atoko inakarini !itxaua Teoso. Kona oro kamakorini !itxaua. Kona pirata kamakorini !itxaua. Kona kai kamakorini !itxaua Teoso. Konapitini. ³⁰ Mitxipe kãkiti !imarotari atão inakari. Iuasaaki Teoso limisiritana kãkiti imimarotakanisaakina. Txamari uatxaika ipaniãtari ikininape kãkiti ikini itixiti auakani imaerekanina itakanapinina ìkapani. ³¹ Ikara atoko Teoso txari ikinimane kãkiti, kotxi iua ketotapekari ãti õti kãkiti misiritiko õti. Xesosi Teoso mereẽkiti iuakarako sãpiretariko kãkiti misiritiko ikara õti apokasaaki, kotxi iua imarotari atão inakari. Aimarotari

Xesosi Teoso mereĕkiti ininiãua, kotxi Teoso õkitikari iua, iuaĩkana auãki inini ĩkapani —Paoro txana ninoa.

³² Xesosi iuaĩkana auãki inini pirena ikenakotakasaakina, ãtikaka napetari Paoro. Apanakini:

—Ate nirekari pisãpirena iuaĩkana akenakotini —itxarina Paoro.

³³ Ininiã Paoro sipe. ³⁴ Apanakinipekana auikapitikari Paoro sãkire. Tx-ionísio inakori, Atena sitatxiti auakani auĩte, auikari isãkire. Apaka sito Tamari inakoro auikari isãkire.

18

Korĩto Sitatxiti Pirena

¹ Eereka Paoro takanapari Atena sitatxiti. Korĩto sitatxitimoni isa. Iua-moni apoka. ² Iuaã aõkitari kiki Ákira inakori. Iua Xoteo. Põto inakoriãtaã iua iponaniã. Itária tixini ĩkari. !Okanani apoka Korĩto sitatxiti. Apoka ĩtanorokata, Pirisira inakorokata. Ninoa takanapari Itária tixini, kotxi Itária auakani auĩte Kráotxio inakori paniãtana ikinimane Xoteoakori, Homa sitatxiti itakanap-inina. Paoro ianapokota Ákira, Pirisira pakinimoni. ³ Eereka ikaikota ninoakata, kotxi ninoa parĩka iua Paoro parĩkatxikana. Papiri aamata kamakori kamakani ninoa. Ininiã Paoro kaikota Ákirakata, iuakata iparĩkauatini ĩkapani. ⁴ Ikiniõtika tomatiko õti, Paoro sari aiko Xoteo apotiitiniãtaãua. Iuaã Xoteoakori, Krekoakori pakini apotiitaua. Paoro oerepiretana ninoa Xesosi sãkire, isãkire auikinina ĩkapani.

⁵ Síراسi, Tximótxio pakini takanapari Masetónia tixini. Korĩto sitatxiti apoãkana atoko, Paoro takanapari iparĩka papiri aamata kamakori ikamini, Teoso sãkire kãkitimoni ikiniõtika isãpiretini ĩkapani. Iua oerekana Xoteoakori Teoso mereĕkitipitikara iua Xesosi. ⁶ Txamari ninoa Xoteoakori omanatari Paoro. Ninoa misãkirepiretari Xesosi, ininiã Paoro kamaãkaretxitana ninoa Xesosi imisãkirepiretinina xika. Iõkokari imãka ninoa apisatoõ aãpani katxakini ĩkapani, omanãkare oerekini ĩkapani. Ininiã Paoro txana:

—Teoso !apakapai hĩte Xesosi sãkire himauikakani xika. Kona nota xikani, kotxi nisãpiretapedamai hĩte. Ininiã uatxaika nisãpiretariko Xesosi sãkire Xoteo minakonimoni. Xoteoakorimoni !nisãpiretaikariko —itxa Paoro.

⁷ Ininiãkara Paoro takanapana ninoa. Isari Txísio Xósito inakorimoni iua aapoko ikaikotini ĩkapani. Xoteo minakatiua iua. Teoso misãkiretakari iua. Iua aapoko aiko Xoteo apotiitiniãtaãua takote aua. ⁸ Aiko Xoteo apotiitiniãtaãua sikani auĩte Krispo inakori auikari Apiananiri Xesosi sãkire. ĩtanoro, imiakori apaka, auikari Xesosi sãkire. Kaiãopokori kãkiti Korĩto auakani kenakotari Paoro sãpirena, ininiã eereka ninoa auikapiretari. Ipatxisataãkana.

⁹ Āti ĩkanõkati Teoso txĩkitakari Paoro itaponeuatini. Itaponemoni Api-ananiri misãkiretari iua:

—!Pipĩkarauatape. Nisãkire pisãpiretapitipo kãkitimoni. !Piotokape. ¹⁰ Kotxi nota auapika pitekata. Pikarotakiri !auari, kotxi kaiãopokori kãkiti nota nakitiakori ĩkorapokoriti auari —itxa Paoromoni.

¹¹ Ininiã Paoro kaikota iuaã ãti ano, ipixini ano pakinikanani Teoso sãkire oerekini ĩkapani.

Xoteoakori Anikari Paoro Káriomoni

¹² Eereka iuaã Akaia tixini auakani auĩte ãti ĩroã, Kário inakori. Iua Homano itxaua. Homanoakori auĩtetari iua. Iuasaaki Xoteoakori apotiitaua. Ninoa maĩkari Paoro. Anikarina aiko kãkiti misiritiko sãpiretikoãtaã. ¹³ Iuaã ninoa txari Káriomoni:

—Ia kiki na atão oerekari kãkiti Teoso paniãtakiti kamiko. Ipinimonipo itxa iua oerekakiti. Na aãtokiriakorini oerekakiti atokoni itxa. !Auiritaãka Paoro oerekapiretakiti —itxana.

¹⁴ Paoro sãkirauatini apisapanika, Kãrio txana Xoteoakori:

—Nisãpiretai hïte Xoteoakori. Paoro kamaãkamariko maerekati, nota kenakotamariko apikomoni hïsakiremako. ¹⁵ Txamari !ikamari maerekati. Hïte taparakienatakakaua hãuikapiretakiti xika, hãtokiriakorini oerekapiretakiti xika. Hïte Xoteoakori. Nota ãti uãka nitxaua, ininiã hïtekara xinikari atão inakari. Kona notani sãpiretai hïte auiãkiti —itxa Kãrio.

¹⁶ Ininiã omitikana ninoa, aiko kãkiti misiritiko sãpiretikoãtaã õpõkikinina ïkapani. ¹⁷ Iuasaaki Krekoakori maïkari Sõseni inakori. Iuani Xoteoakori apotiitiniãtaãua sikani auïte. Krekoakori xirokitatari aãkeẽ aiko kãkiti misiritiko sãpiretikoãtaã apisatoõ. Txamari Kãrio !imaãkatari.

Paoro Kanapiriã Ætxiokia Sitatxitimoni

¹⁸ Eereka Paoro kaikotapanika mapaõti iuaã Korïto sitatxiti Xesosi sãkire auiãkanikata. Eereka iua takapiretanapana ninoa. Isipe Pisisira, Ákira pakinikata. Iereẽtauana maporo ãki, Síria tixinimoni isinina ïkapani. Sëkireia sitatxiti apokana. Iuaã Paoro sãpiretari Teoso ikamaenetakiti Teoso ïkapani. Eereka ikixatari ikii ikamaenetakiti ixinikini ïkapani. ¹⁹ Ninoa apoka Épeso sitatxiti. Iuaã Paoro takanapana Pisisira, Ákira pakini. Paoro ïroã aiko ãki Xoteo apotiitiniãtaãua. Iuaã apakapapiretakakaua Xoteoakorikata Teoso sãkire isãpiretinina. ²⁰ Ninoa misãkiretari Paoro ninoakata apikomoni ikaikotini ïkapani. Txamari Paoro !inirekari ikaikotini.

²¹ —Nisariko kiiniri Teoso misãkiretiko aikotiã Xerosareẽ. Eereka Teoso nirekiniãri, uai nikanapiriã hïtemoni —itxa Paoro.

Eereka isipe. Iereẽtaua maporo ãki. Épeso sitatxiti itakanapa. ²² Sesaréia sitatxiti apoka Paoro. Eereka isa Xerosareẽmoni. Iuaã apokasaaki, ianapokota Xesosi sãkire auiãkanimoni. Eereka isa Ætxiokia sitatxitimoni. ²³ Iuaã ikaikota mapaõti. Eereka isipe. Karásia tixini, Piríxia tixini apaka ïpirixitiãpota. Aapokotxi apokaãpotakasaaki, isikapoxokonitana ikinimane Xesosi sãkire auiãkani.

Aporo Pirena

²⁴ Iuasaaki Xoteo Aporo inakori sari Épeso sitatxitimoni. Iua iponaniã Arexãtria sitatxitiã. Paimatireri iua. Imarotari Teoso sãkire iõkatsopatakori imakinika. ²⁵ Iua oerekepeẽkaika Xesosi sãkire, ininiã atão Xesosi sãkire isãpireta kãkitimoni. Ipoxononiritika isãpirenauata. Txamari kãkiti patxisatiko pirena !iteene imarotapanika. Xoão kapatxisareri oerekapiretakitinanira imarota. ²⁶ Iua Aporo sãpirenauata itaparaxinireritika aiko ãki Xoteo apotiitiniãtaãua. Iuasaaki Pisisira, Ákira pakini kenakotari isãkire. Eereka anikarina aapokomonina. Oerekarina apikomoni Teoso sãkire imarotini ïkapani.

²⁷ Eereka Aporo:

—Ninirekari Akaia tixinimoni nisini —itxa.

Ininiã Xesosi sãkire auiãkani:

—Ari, erekapitikari pisini.

Ininiã Xesosi sãkire auiãkani, Épeso auakani, iokanatsopatari itariakori-
moni Akaia tixini auakanimoni. Itxana iõkatsopariã: “Hãpakapariko aïtari Aporo inakori.” Aporo apokasaaki Akaia tixini, ãteene imoianatana Xesosi sãkire auiãkani. Ninoa auikari Xesosi sãkire, kotxi Teoso ãteene turetana ninoa. ²⁸ Ikinimane apisatoõ Aporo oerekana Xoteoakori, Xesosi sãkire mauiaãkani, Xesosi atãopitika Teoso mereẽkiti ininiua. Teoso sãkire iõkatsopatakoriã iua oerekana Xesosi Teoso mereẽkiti ininiãua. Ininiã Xoteoakori !kasãkirena.

19

Paoro Épeso Sitatxiti Auakasaaki

¹ Aporo Korĩto sitatxiti auakasaaki, Paoro ĩpirixititari Épeso tōpa Épeso sitatxiti apokini ĩkapani. Iuaã aōkitana kākiti Xesosi sākire auiākani. ² Paoro pimaãna ninoa:

—Xesosi sākire hāuikasaaki, hāpakapatari Erekarı Matamatakoti? —Paoro txana ninoa.

Ininiã ninoa:

—Kiripitipa iua Erekarı Matamatakoti? !Aimarotari —itxana.

³ Ininiã Paoro:

—Kanatokopa inakariãpa hĩte patxisataãka, Erekarı Matamatakoti himimarotakani?

Ininiã ninoa:

—Ari, Xoão patxisarauatini atoko inakarıkanera ate patxisataãka —itxarina Paoro.

⁴ Ininiã Paoro:

—Xoão patxisatana kākiti maerekati takanapakani. Itxana ninoa: “Hĩteko iteene auikapiretarıko nitikini apokakari, Kristo Xesosi inakori,” Xoão txari kākiti —itxa Paoro.

⁵ Ikara ikenakotaãkana atoko, ninoa patxisataãka Xesosi Apıananiri uãkaã.

⁶ Iuasaaki Paoro takari imakinika iuako ninoa nopini. Iuasaakipeka ninoa apakapari Erekarı Matamatakoti. Iuasaaki ninoa sākırauata kākiti āti uãka sākireẽ. Isãpiretarına Teoso sākire kākıtımoni. ⁷ Ninoa kikiakori atxĩiti tosi pakini.

⁸ Ipi āti pakini kasiriti ikiniõtika aiko Xoteo apotiitiniãtaãua Paoro sãpirenauata itaparaxınırerıtıka. Apanakınıkata imısãkırınãtakakauana. Paoro nırekana ninoa auıkınırına Teoso sākire, Teoso auĩtetxi ininiãua pırena.

⁹ Txamari ātikaka ninoa !ınırekari auikapıretınırına, kotxi !ınırekarına ikara atoko inakari sākıretxiti. Ninoa misãkırıpiretari Xesosi sākire ikınımane kākiti apisatoõ. Ininiãkara Paoro takanapana ninoa. Anıkana Xesosi sākire auiākani iuakata. Ikınıõtıka Txırano inakori oerekarauatınıãtaã Paoro oerekari Teoso sākire kākıtımoni. Ninoa pımaaãpotakakaua Teoso sākire imarotınına ĩkapani. Apakapıreãpotakakauana. ¹⁰ Iuaã Paoro oerekarauata ipıkanani, ininiã ikınımane kākiti Ásia tixını auakani kenakotari Xesosi Apıananiri sākire.

Xoteoakori, Krekoakori pakini kenakotari.

Sepa Anaakori Pırena

¹¹ Teoso sikaposotiıretari Paoro posotiıretxi ipınımınıpo inakari ikamını.

¹² Ikara atoko ininiã ikii mata, imãka iparĩkauatını ĩkapani apaka anıkãka amıanatakınımını, ininiã Teoso txĩkitakana amıanatakani erekape inınına. Maerekani matamatakoni auaiťtotınıãrı kākiti, Paoro mãka ninoa kākiti apakapakasaaki, maerekani matamatakoni sıpe.

¹³ Iuasaaki apanakını Xoteoakori, mĩtiakori, maerekani matamatakoni omıtiãkani, sarı kākıtımoni maerekani matamatakoni omıtıkınına ĩkapani. Xesosi pırena ikenakotana. Ininiã eereka ninoa txari maerekani matamatakınımını:

—Apaniãtai hĩsipınııkaua Xesosi uãkaã, Paoro sãpiretakiti Xesosi uãkaã —itxana ninoa.

¹⁴ Iuasaaki aua kiki Xoteo, Sepa inakori. Sasetotxiakori auĩte itxaua. Iua anaakori kiki setxi pakini. Sepa anaakori panıãtana maerekani matamatakoni sıni Xesosi uãkaã. ¹⁵ Txamari āti õti maerekati matamatakoti apakapıretana ninoa:

—Nota imarotari Xesosi. Nimarotari Paoro. Hīte !nimarota. Kiniparai hīte? —itxa maerekati matamatakoti.

¹⁶ Iuasaakipeka kiki maerekati auaitotakiti okakataua ninoa nopini. Api-ataparata iua maerekati. Iuasaaki iua āsokitakatapena ninoani. Ininiā ninoa miteēkata, kasarapekana, kakaropekana itxapena.

¹⁷ Ikinimane kākiti Épeso sitatxiti auakani kenakopiretari ikara ene. Xoteoakori, Krekoakori apaka kenakopiretari ikara ene, ininiākara ipīkarauatana. Ikara atoko ininiākara Xesosi uāka apiata ipaxitaāka.

¹⁸ Kaiāopokori Xesosi sākire auīākani apotiitaua. Ikinimane apisatoō isāpiretarina maerekati mitxi ikamakitina. ¹⁹ Apanakini kasikapōererini apaka apoka iuaā. Iminarina sikapōerexi apaiaōkiko tsopa. Ikinimane apisatoō iotikarina. !Inirekaikarina maerekati ikaminina. Iaōtarina ikara aātsopa īki. Iki sīkoēta mio txineiro ota pirata kamakoro. Kaiāopokoro txineiro. ²⁰ Ikara atoko ininiāpanirako Apiananiri sākire iaripiretako ikini itixiti. Kaiāopokori kākiti apiata auikaāpotari Apiananiri sākire.

²¹ Eereka Paoro ākixinire txari:

—Nīpirixititariko Masetónia tixini, Akaia tixini pakini. Iposo atoko Xerosareēmoni nisako. Iposo atoko Homa sitatxitimoni nisako —itxa ākixinireē.

²² Iokanatana imoianariakori, Tximótxio, Erásito inakori pakini Masetónia tixinimoni. Paoro kaikotapanika Ásia tixiniā.

Neenamatzixi Épeso Sitatxiti Auini

²³ Iuasaaki Paoro Épeso sitatxiti auakasaaki, kākiti Xesosi oerekapiretakiti manirekakani misākirepireāpotari Paoro, kotxi !inirekarina Xesosi oerekapiretakiti. ²⁴ Iuasaaki kiki Temétxio inakori aua iuaā. Ikamari aiko axapitipikiri inakari. Krekoakori teosone Txiana inakoro misākiretiko aikoti atoko inakari ikama. Kaiāopokori ikama pirata kamakori ivētxitini īkapani. Iua, initiriakori apaka apakaparo txineiropokoni iparīkana īki. ²⁵ Iua Temétxio pīkapiretana ikinimane initiriakori, ninoa kamakitikana kamakani apaka. Temétxio txana:

—Kikiakori, hīte imarotari kaiāopokori txineiro aāpakapa aparīka īki. ²⁶ Hīte kenakotapekari Paoro sāpirenātakiti. Paoro txanāta: “Kākiti kamakiti kona teoso !itxaua.” Kona ia tōpananini, kona Épesonanini, ikara atoko itxa. Ikini itixiti Ásia tixini auakanimoni ikara atoko itxa. Kaiāopokori kākiti Paoro sākire auīākani auapeka. Kaiāopokori kākiti !inirekaikari teoso ate kamakiti. ²⁷ Atxiīti kākiti misākirepiretari ate kamakiti. Atxiīti !inirekaikari aparīka. !Ikarananini. Atxiīti kākiti !ipaxitaikari ateosone Txiana misākiretiko aikoti. Ininiā atxiīti kākiti misākirepiretaro oa Txiana. Ikinimane Ásia tixini auakani teosonetaro oa. Ikini itixiti auakani teosonetaro oa —itxa Temétxio ninoamoni.

²⁸ Ninoa kenakotakasaakiri ikara sākiretxiti, omanākarauatana. Ninoa akirikata:

—Txiana, Épeso auakani teosone. Apiananiro oa —itxanātana ninoa.

²⁹ Ikinimane kākiti sitatxi auakani miteēkata, akiriāpokatana. Imaīkarina Paoro moianariakori, Kaio inakori, Arisitako inakori pakini. Ninoa Masetónia tixinikini. Ikosekaītokatana. Imimiteēkatana. Kākiti apotiitiniātaāua aikotimoni anikaākana, mīroā itxana. ³⁰ Ikara Paoro imarotakasaaki, inirekari ĩroini kākitekata isākirauatini īkapani, txamari Xesosi sākire auīākani !auiritari iua ĩroini. ³¹ Ātikaka Ásia tixini auakani auīteakori, Paoro tiretakani, iokanapireta Paoromoni:

—Kona pīroāpeko kākiti apotiitiniātaāua aikoti āki —itxarina iokanapirena.

³² Aiko āki ikinimane akiripoananikata. Apanakini akirikatakiti ipinimonipo. Apanakinipekana akirikatakiti ipinimonipo itxanātana, kotxi kaiāopokori kākiti txari:

—Kixikapa aāpotiitaua?

!Imarotarina ixika. ³³ Xoteoakori iuaā apotiitakaniua katikari Arexātri inakori ikinimane apisatoō, isākirauatini ĩkapani. Iuasaaki ōkitikari iuako kākiti iotokini ĩkapani, isākire ikenakotinina ĩkapani. ³⁴ Txamari ninoa imarotakasaakiri Arexātri Xoteo ininiāua, akiripoakatana ipi oara:

—Txiana, Épeso auakani teosone, Apiananiro —itxanātapikana.

³⁵ Eereka auĭtetxi inakariua apoka ninoa apisatoō. Iua posotari ninoa iotokakini. Itxarina:

—Ikini itixiti auakani imarotari atenokara Épeso auakaninokara nĭkatiniri ateosone Txiana misākiretiko aikoti. Apiananiro oa. Ninoa imarotari atenokara nĭkatiniri kai oa ĩto atoko inakari iaxiti katxakakaro. ³⁶ Ikinimane imarotapekari ĩkara inakari, ininiākara hĭotokako. Iteene hĭxinikariko hĭkamakiti tĭkane. Maxikatĭka !hākirinātape. ³⁷ Kotxi hĭte minana naia kikiakori uaimoni, txamari !ĭtirĭkarina tĭtxi ateosone misākiretiko aikoti āki auakari. !Imisākirepiretarona ateosone. ³⁸ Temétxio, iuakata parĭkauatakani pakini, nirekiniāri naia kateiamoni isinina, auapitika aiko kākiti misirĭtiko sāpiretikoātaā. Auapitika aāuĭteakori. Iuaā erekari isāpiretinirina maerekati naia kamakiti. ³⁹ Iuaĭkana hĭtsoatiniā, sitatxi auakani auĭteakori apotiitakasaakiaua, hĭsāpiretana ninoa himapokaerekatakiniti ninoa ōtākikini ĩkapani. ⁴⁰ !Apakata mĭxikanani himitekini, hākiripoakatini atoko hĭkamini. Maxikatĭka hākiripoanāta. Ixika !auari. Atxiĭti Homanoakori auĭte txitaua maerekati akamakiti xika —itxana ninoamoni.

⁴¹ Eereka ipaniātana ninoa sini.

20

Masetónia Tixini, Akaia Tixini Pakini

¹ Ninoa kākiti apotiitakaniua aapokomonina ikanapiriāka atoko, Paoro pĭkapiretana Xesosi sākire auĭākani. Imisākiretana. Ikamapoxokonitana. Iposo atoko itakanapapiretana. Isipe Masetónia tixinimoni. ² ĩpirixititari Masetónia tixini. Aapokotxi apokaāpotakasaaki, isāpireāpotari Xesosi sākire kākitimoni. Isikataparaxiniretana. Eereka Akaia tixinimoni apoka. ³ Iuaā ikaikota ipi āti pakini kasiriti. Eereka Paoro kaiamapeka maporo āki iereētiniua Síria tixinimoni isini ĩkapani. Iuasaaki, ikenakopiretari Xoteoakori okaenetiniri iua. Ininiākara Paoro:

—Masetónia tixinimonikanerako nikanapiriāko —itxa Paoro.

⁴ Sópato inakori Peréia sitatxitikiri sari iuakata. Piho inakori ākiri itxaua. Arisitako inakori, Sekōto inakori, Tesarónika sitatxitikini, ninoa apaka sari Paorokata. Kaio inakori Tepi sitatxitikiri apaka sari Paorokata. Txíkiko inakori, Tópimo inakori Ásia tixinikini, Tximótxio inakori pakini moianatari Paoro.

⁵ Iuasaaki nota Arókasi inakori iuakata naua. Paoro imoianariakorikata ĭkiika isinina. Nota, nimoianariakorikata sari Paoro tikini. Tóatxi sitatxiti Paoro iātapaua ate. ⁶ Pāo miātiākati nikiko ōti napaka atoko, Piriposi sitatxiti aiereētaua maporo āki Tóatxi sitatxiti asini ĩkapani. Sĭko pakini ōti napaka atoko Tóatxi aāpoka. Iuaā aaōkitana Paoro imoianariakorikata. Iuaā anapari āti semanati.

Paoro Txĭkitakari Ipĭkari Iuaĭkana Auāki Inini

⁷ Tomatiko ōtisaaki Xesosi sākire auĭākani apotiitaua komiri ixanakinina ĩkapani, Xesosi ipinini ixinikinina ĩkapani. Iuasaaki Paoro oerekanātari Teoso

sākire. Apaïkanõkapeka isãpirenauatapanika, kotxi katimatinïkata isipe. ⁸ Ate apotiitiniãtaãua aiko inopinita auakari iriko ãki. Iuaã auari kaiãopokori tirikapi poniãkari, ininiãkara papatakari. ⁹ Iuasaaki ãtokori Etxiko inakori topãkanãta inopinita auakari sonaã. Paoro sãpirenauanãtapika, ininiãkara itapo inokaãpotari iua Etxiko. Eereka imaka. Iuasaaki ixipotorika. Xitipeka apoãkata. Ninoa miteëkata iuamoni isinina, txamari !auaika. ¹⁰ Ininiã Paoro katxaka, sa itxa iuamoni. Isirïka iua ipïkari nopini, imaarata itxari.

—!Hïpïkarauatape. Auãkipanikari —itxana ninoa.

Ininiã iuaïkana iua ãtokori auãkipeka itxa. ¹¹ Iposo atoko Paoro kanïka iuaïkana inopinita irikomoni. Komiri inika. Iposo atoko iuaïkana ninoakata isãkirauanãtiniritika katimata itxa. Ikatimataãka atoko isipe Paoro. ¹² Eereka anikarina iua ãtokori aapokomoni. Ninoa iteene poxokoniyata iua auãkipanika inini.

Miretomoni Sikiko Pirena

¹³ Iuasaaki Paoro paniãtaua ate:

—Hïte sari maporoã Asosi sitatxitimoni. Imiriïrako nota sari. Iuaã nota iereëtaua hïtekata —itxaua ate.

Ininiã ate sari iua apisa. ¹⁴ Asosi sitatxiti Paoro aõkitaua ate. Iereëtaua maporo ãki. Iposo atoko asa Mitxireni sitatxitimoni. ¹⁵ Iuaãtaã aãpokasaaki, iuaïkana apotorika. ãti õti napaka atoko, anapari Kio inakori takote pokomiriï. ãti õti napaka atoko, Samosi inakori pokomiriï aãpoka. Iuaïkana ãti õti napaka atoko, aãpoka Mireto sitatxiti. ¹⁶ Iuasaaki Paoro !inirekari Épeso ioporokoti apokitini, kotxi !inirekari auapokotini Ásia tixiniã. Ikati-maritaua, kotxi iposotiniãri, inirekari Xerosareë apokini. Pëtekósitxi kiiniriti apisapanika apokini inireka.

Xesosi Sãkire Auiãkani Auïteakori Ôtãkikiko

¹⁷ Ininiã Paoro Mireto sitatxiti auakasaaki, iokanapireta Épeso sitatxitimoni. Ipïkapioretana Xesosi sãkire auiãkani auïteakori. ¹⁸ Ninoa apokasaaki, Paoro misãkiretana ninoa:

—Himarotari merepitipanika Ásia tixini napokasaaki, eereka hïtekata nauakasaaki, himarotari ikiniõtika nauini hïtekata. ¹⁹ Iuasaaki niparïkauata Apiananiri nirekakiti nikamini. Na niuikaua. Iteene nitxiapata. Xoteoakori nirekari okinino, ininiã nimaxirexinire auapitika iuasaaki, iuaritika nikamari Apiananiri paniãtakiti. ²⁰ Himarotari na nikipatari ipixini Teoso sãkire. Nisãpiretapekai hïte imakinika Teoso sãkire hïte ereka hinini ïkapani. Kãkiti apotiitiniãtaãua noerekai Teoso sãkire. Apaka nisari ãti haãpokomoni, eereka ãti haãpokomoni, eereka ãti haãpokomoni, nitxaãpota Teoso sãkire noerekini. ²¹ Xoteoakori, Xoteo minakanuia apaka nisãpiretari nimarotakiti Teoso oerekakiti maerekanitxi itakanapinina ïkapani, Teoso paniãtakiti ikaminina ïkapani. Nisãpiretari nimarotakiti Teoso oerekakiti, Xesosi Apiananiri sãkire auïkinina ïkapani.

²² —Ininiã nota sariko Xerosareë, kotxi Erekar Matamatakoti paniãtano nota iuaã nisini. !Nimarotari kiatokouako ninaãkapaniko iuaã. ²³ Ikini sitatxiti nauakasaaki, Erekar Matamatakoti pinitano: “Piteniko takapeëkako kateia ãki iuaã. Iuaã pimisiritiko auapitikako,” itxano. Iuananira nimarota Xerosareë napokasaaki. ²⁴ Ikara nimisiritiko sãkiretxiti kona makari nixinikakiti, kotxi kona nitiretari nauini ïkorapokoriti. Xesosi Apiananiri paniãtakiti parïkatxiti ninireka nikamini. Nipoxokoniritika nauini mapotõkirepe nitxako. Xesosi paniãtano Teoso iokanapirena erekari Teoso tiraõki nisãpiretini kãkiti.

²⁵—Nisāpiretapekari Teoso auñtetxi ininiāua pirena hñte sauaki nauakasaaki. Uatxa nimarotari hñte hñkinika kona hñtamataikanoko nota. ²⁶ Ininiā hñxinikapikariko nisākire iaōka uatxa nisāpiretakiti. Kākiti hñte sauaki auakari pñpinanakiniā, Teoso kimapore imimarotakaniā, kona nota xikani. ²⁷ Kotxi nisāpiretapekai hñtemoni imakinika Teoso iokanapirena. ²⁸ Erepaniko, katokinani hñtxako maerekati apokini hñtemoni. Erekar Matamatakoti sikapekari kākiti hñtemoni Xesosi sākire hñerekini ĩkapani, ininiākara hinñkatana ninoa. Soti auñte nñkatakani atokokana hñtxauako. Ninoa hñpiraakori atoko. Ininiā hñtiretanako ninoa kākiti, kotxi Teoso nakitiakori itxauana. Teoso ākiri ipina ninoa ĩkapani, iua nakitiakori ininiuana ĩkapani. ²⁹ Nimarotari kākiti apokapitikako hñtemoni nota sini tikini. Ninoa nirekari ixipokinirina hñparñka Teoso ĩkapani. Xapakori patari imañkini monōkoni atoko itxako ninoa hñte sauaki imonōkoni apokini. Ininiā erepaniko. Katokinani hñtxako. ³⁰ Āti ōti kākiti hñte oereēkini sāpiretakiti na atāoni. Koketakori sākiretxiti isāpiretana apanakini Xesosi sākire auiākani. Ikara xika apanakini auikari ninoa sākire, ininiākara isanako ninoakata. !Auikaikarina hñte sākire. ³¹ Ininiākara erepaniko. Hñxinikariko ipi anokanani āti anokanani pakini nota ōtākikanātai hñte. Noerekanātai hñte Teoso sākire ĩkanōka, pokamara pakini. Ikiniōtika noerekai hñte. Nñtxiapata nñtākikasaakii, kotxi nñtiretai.

³²—Uatxa nisikai hñte Teosomoni, iua nñkatini ĩkapani. Nitakanapari Teoso sāpirena hñtekata, kotxi iua sāpiretari isikini ikinipoko erekari. Iuara sika-posotiiretai hñte. Iuara sikai hñte erekari inñkatakiti, inakitiakorimoni isikini ĩkapani. ³³ !Nixikotari apanakini. !Nimaākatari itxineirote, imākana pakini. ³⁴ Hñte imarotapitikari notaka parñkauata imakinika ninireēkiti, nimoianari-akori nireēkiti apaka niamotini ĩkapani. ³⁵ Ikara atoko aparñkauatiniā, atiretana kākiti maposotakaniua. Nota parñka oerekapekai hñte ikara atoko hñkamini. Maxinikari Xesosi Apiananiri sākire. Iua txari: “Teoso takari erekari kākitimoni iua amonitakiti apakapakasaaki. Teoso takari apia erekari sikarauatarimoni,” —Paoro txana ninoa Épesokinimoni, Teoso sākire auiākani auñteakorimoni.

³⁶ Iuasaaki Paoro kapotoreēkaua ninoakata. Imisākiretarina Teoso. ³⁷ Ninoa ikinimane txiapakata. Imaarākarina Paoro, apitxoka itxarina. Itakapiretanaparina. ³⁸ Apiata imatinanina, kotxi Paoro sāpiretana ninoa, !aōkitaikarina iua. Isana iuakata maporomoni.

21

Paoro Sari Xerosareñmoni

¹ Maporo aāpokasaaki, ate takapiretanapana ninoa Épesokini. Eereka asipeka. Kosi pokomiriñtimoni asakatapitipo. Iuaā aāpoka. Katimatinñkata asa Hotxi ioporokotemoni. Eereka Pátara sitatxitimoni asa. ² Iuaā aāpokaro āto maporo Penísia tixinimoni sikaro, ininiā aiereētaua atoko ate potorika asini. ³ Apaniāxiti apokasaaki, aātamatar Xipri pokomiriñti. Anapari Xipri pokomiriñti asanaremoni. Asari Síria tixinimoni. Aāpokita Txiro sitatxiti, kotxi iuaā tiitxi maporo āki auakari kaikota. ⁴ Iuaā ate aōkitari kākiti Xesosi sākire auiākani, ininiā akaikota ninoakata āti semanati. Ninoa txari Paoro:

—Xerosareñmoni !pisipe, kotxi Erekar Matamatakoti sāpiretapekaua ate pimisiritiko tñkane aua iuaātaā —itxarina.

⁵ Apotorikini ōti apokasaaki, ate sipe iuañkana maporomoni. Ninoa ikinika, ĩtanoroakorokata, imiakorikata, isana atekata sitatxi ĩtiniā ioporokomoni. Akinika akapotoreēkaua ikipatxiteē, misākireta atxari Teoso.

⁶ Atakapiretanapana iposo atoko, ate iereētaua maporo āki. Ninoa kanapiriā aapokomonina.

⁷ Ininiã Txiro sitatxiti atakanapa. Iuaĩkana apotorika. Eereka aãpoka Pitoremaita sitatxiti. Iuaã ate misãkiretana kãkiti Xesosi sãkire auiãkani. Akaikota ãti õti ninoakata. ⁸ Katimatinĩkata iuaĩkana apotorika asini. Eereka aãpoka Sesaréia sitatxiti. Iuaã Piripi inakori aapokomoni asa. Teoso sãkire sãpiretakari itxaua Piripi. Xesosi moianariakori Xerosareẽ auakasaakina, ninoa mereẽri iua Piripi, apikomoni kikiakori seisi pakini, ninoa imoianatinina ĩkapani. Ate kaikota Piripi aapoko. ⁹ Piripi auari ipi ipi pakini imiakoro ãtokoropanika. Ninoa apaka sãpiretari Teoso iokanapirena kãkitimoni. ¹⁰ Ate auanapa iuaã mapaõti. Iuasaaki Teoso sãkire sãpiretakari Ákapo inakori Xotéia tõpa potoriakari apoka Piripi aapoko. ¹¹ Ikosekari Paoro makiomatare. Ītxikari iuako ikitikata. Itxari:

—Erekari Matamatakoti txari: “Xoteoakori Xerosareẽ auakani iaxirikapiriko ia makiomataretxi nakititakari ia atokokanerako iaxirikiko. Eereka isikarina Xoteo minakonimoni” —Ákapo txaua ate.

¹² Ikara akenakotakasaaki, ate apanakini iuaã auakanikata txari Paoro:

—Paoro koniko !pisipe Xerosareẽmoni —atxari.

¹³ Txamari Paoro:

—Kinirepa hĩtxiapanãta? Hĩte kamamatinanitano nota. !Nimaãkatari ni-axirikiko Xerosareẽ. !Nimaãkatari nokiko apaka Apiananiri Xesosi nauikini xika —itxaua ate.

¹⁴ !Ikĩpitari asãkire. Ininiã ate:

—Iaõpe. Ikara atoko ininiã, ate nirekari Teoso nireẽkiti kamiko —atxa.

¹⁵ Mapaõti inapaka atoko, aãiamata Xerosareẽmoni asini ĩkapani. Eereka apotorika asini. ¹⁶ Apanakini Xesosi sãkire auiãkani Sesaréiakini sari atekata apaka. Menasõ inakori aapoko ninoa anikaua ate, kotxi iuaã anirekari akaikotini. Menasõ Xipri pokomiriĩtikiri. Okananipeka iua auikari Xesosi sãkire.

Paoro Apoka Xerosareẽ

¹⁷ Xerosareẽ aãpokasaaki, Xesosi sãkire auiãkani apakapaua ate ipoxokoniritikana. ¹⁸ Katimatinĩkata Paoro sari atekata Txiakomoni aianapokotini ĩkapani. Ikinimane Xesosi sãkire auiãkani auĩteakori aua iuaãtaã. ¹⁹ Paoro misãkiretana. Isãpiretana imakinika Teoso kamakiti Paoro parĩkaã Xoteo minakaniua sauaki iparĩkauatakasaaki. ²⁰ Ikara ikenakotakana atoko, ninoa txari:

—Peerekari Apiananiri —itxana.

Eereka itxarina Paoro:

—Aĩtari, pimarotari kaiãopokori Xoteoakori auikiniri Xesosi sãkire. Ninoa auikari Moisesini oerekakiti sãkiretxiti apaka. ²¹ Apanakini sãpiretapekana ninoa: “Paoro oerekanãtana Xoteoakori, Xoteo minakaniua sauaki auakani, Moisesini oerekakiti itakanapinina ĩkapani. Oerekanãtana ninoa Teoso takaõtxikare imiakori ĩtoã imatakakani ĩkapani. Oerekanãtana ninoa aãtokiriakorini oerekakiti itakanapinina ĩkapani.” Ikara atoko itxanãtana ninoa. ²² Ninoa !imarotapanikari pite uai apokini, ininiãkara natokopa atxatari akaminiri, kotxi anirekari ninoa imarotiniri apanakini sãpiretakiti poxiene inini. Anirekari ninoa imarotiniri pite auikapitikari Moisesini oerekakiti. ²³ Ininiãkara ia pikama. Naia ipi ipi pakini kikiakori misãkiretari Teoso. Isãpiretarina Teosomonikari ikamaenetakitina tĩkane. ²⁴ Ininiã pisa naiakata Moisesini oerekakiti iaõka hĩkamini ĩkapani, ininiãkara hĩkipaãtaua Teoso ĩkapani. Pite ĩkitxitari naia kii kixatiko ĩkapani. Ikara atoko ininiã, ikinimane imarotariko poxienetapa apanakini sãpiretakiti. Ninoa imarotariko Moisesini paniãtakiti pikamini. ²⁵ Ninoapekana, Xoteo minakaniua Xesosi sãkire auiãkanipekana, ate iokanatsopatapeka

ninoamoni. Asāpiretana ate xinikakiti: —!Hinikapiriko nipokori teoso kākiti kamakitimoni sikakori. !Hinikapiri arēkatxi. Manotsaātakori xini !hinikape. !Hīsīrkape pītanoro minakotokatika. !Hīsīrkape pītaniri minakotikatika. Ikara atoko atxa ate ninoamoni aiokanatsopatini —itxarina Paoro.

²⁶ Ininiā Paoro anikana ninoa kikiakori. Katimatinīkata ninoa kipaātaua Teoso ĩkapani Moisesini oerekakiti iaōka ikaminina ĩkapani. Eereka Paoro ĩroā Teoso misākiretiko aikotiā. Isāpiretari sasetotxi ninoa keto ĩfona arokiko xipokini ōti, kotxi iuasaakiko sasetotxi apakapari ninoa sikakiti Teosomoni.

Paoro Maīkiko

²⁷ Iua semanati kaiaapeka ixipokini inakasaaki, ātikaka Xoteoakori Ásia tixinikini atamatari Paoro Teoso misākiretiko aikoti āki. Ninoa misākirepiretari Paoro ikinimane kākiti iuaā apotiitakanimoni, ininiā ninoa sākire xika ikinimane omanatari Paoro. Eereka imaīkarina Paoroni. ²⁸ Ásia tixinikini akiripoata:

—Hīte Xoteoakori himoianataua ate. Ia kikirā oerekari ikini itixitiki omanatinina Xoteoakori. Iara oerekari kākiti Moisesi paniātakiti imakamakani. Oerekari kākiti mapaxitakaniri ia Teoso misākiretiko aikoti. ĩkorasaaki !ipaxitari ia aiko, kotxi imiīroāna Xoteo minakaniua aiko āki, ininiākara itxikotari ia aiko Teoso nakiti —itxanātana ninoa.

²⁹ Ikara itxana, kotxi mitxi itikarina kiki Xoteo minakatiua Tópimo inakori Épeso sitatxitikiri Paorokata tīpokotini sitatxi apanīkaki. Txamari Paoro !anikari iua aiko āki. Ininiā iuākatarina Paoro anikapekari iua aiko āki. ³⁰ Ininiā iua Paoro maīkiko pirena iaripireta. Ikininape sitatxi auakani kenakoenetakasaakiri ikara, imitekana aikomoni. Imaīkarina Paoro. Ikosekaītotarina. Teoso misākiretiko aikotiā imipokiākatarina Paoro. Iuasaakipeka aiko tore totaākapeka. ³¹ Kākiti iuaā apotiitakaniua nirekari okiniri Paoro. Sotatoakori Homano inakaniua ninoa auīte kenakoenetari ikinimane Xerosareē auakani neenamauatini. ³² Iuasaakipeka sotatoakori auīte anikana sotatoakori. Imitekana Paoromoni. Kākiti atapakasaakina sotatoakori auīte sotatoakorikata, iuasaakiika iotoka Paoro iaritatinina.

³³ Ininiā sotatoakori auīte maīkari Paoro. Ipaniātana sotatoakori Paoro iaxirikini ipi kohētxiā. Iposo atoko ipimaāna kākiti itakote auakani:

—Kiripa ia kiki? Kixikapa ia atoko inaāka? —itxana ninoa.

³⁴ Ininiā ātikaka iuaā auakani, ia xikara. Apanakinipekana āti xikara, itxaāponātana isākirena. Sākiretxi kaiāopokori ininiā, iua !imarotari atāo ixika. Ikara atoko ininiā, sotatoakori auīte paniātana sotatoakori, ninoa aapokomoni anikinirina Paoro. ³⁵ Sotato aapokokiri kanikoatxiā apokasaakina, sotatoakori ōtanōkari Paoro ĩto, kākiti mamaīkakaniri ĩkapani. ³⁶ Kotxi kaiāopokori kākiti itikini ĩkani akiripoakata:

—Hōkariko. Hōkariko —itxanātana.

³⁷ Paoro sotatoakori aapoko āki ĩroānapanoka inakasaaki, Paoro txari sotoakori auīte:

—Apakata pite nimisākiretini?

Ininiā sotato auīte tikoka.

—Pite imarotari Krekoakori sākire —itxari Paoro.

³⁸ —Kona piteni Exito tixinikiri pitxataua? Kona piteni kitatiki kamanātari neenamtxi auītetxiakori pomanatini? Kona piteni anikatana ipi ipi pakini mio kokanirini iexamakitekatanā āparaā makipakaniātaā? —ipimaāni Paoro.

³⁹ Ininiā Paoro:

—Kona notani. Xoteo nitxaua. Nota Taaso sitatxitikirirano nota. Taaso sitatxiti, sitatxi apiari inakari, Sirísia tixinikiri. Pauritano nakira kākiti nimisākiretini —itxari iua.

⁴⁰ Ininiã sotatoakori auíte:

—Ari, pimisãkiretana.

Inakasaakiri Paoro tima kanikoatxiã. Iuasaaki õkitikari iuako kãkiti akiritini iotokini ìkapani, isãkire ikenakotinina ìkapani. Ikinipoko iotokasaaki, iua sãkirauata ninoakata Xoteo sãkireẽ, Epiráiko sãkireẽ.

22

Paoro Misãkiretari Xerosareẽ Auakani

¹ Ininiã Paoro:

—Nitariakori, niriakori, hïkenakotariko nisãkire. Na maerekati na nikama. Erekarinokara nikama —itxa.

² Ninoa kenakotakasaakiri ninoaka sãkireẽ, Epiráiko sãkireẽ isãkirauatini, ! akiritaikana. Itsorïkaãtana.

³ Ininiã Paoro:

—Xoteopitikanano nota. Niponaniã Taaso sitatxiti, Sirísia tixiniã. Eereka uai Xerosareẽ sitatxiti napoka. Uaikara naneẽ. Iuasaaki koerekareri kimatireri Kamarieo inakori oerekano imakinika. Iua oerekano akiomaneakorini kitxakapirïkarini paniãtakiti imakinika. Nota parïkauata Teoso ìkapaninokara, hïte parïkauatini atokotxikana. ⁴ Mitxipeka nota kapokotana kãkiti Xesosi sãkire auiãkani, Xesosi kimaporeẽ sikani. Nimaïkana, kateia ãki oka nitxana. Kiki, sito pakini nimaïka. Nota xika ninoani ipïpe. ⁵ Sasetotxiakori auíte apiatakari, Xoteo auíteakori pakini imarotari atãopitika nisãkire. Ninoakara sikano aãtsopa iõkatsopatakittina auïtetxiakorimoni Tamásiko sitatxiti auakanimoni nanikini ìkapani. Iua aãtsopa auiritano Xesosi sãkire auiãkani nimaïkini. Ininiã nota sarï iuaã Xesosi sãkire auiãkani nimaïkini ìkapani, Xerosareẽmoni nimikanapiriinina ìkapani imisiritikona tïkane.

⁶ —Apaniãxiti Tamásiko sitatxiti takote napokaãpotakasaaki, patimari iotximere iaxitikiri apoka notamoni. ⁷ Xiti nirika. Nikenakotari nakiriuãkatiko: “Saoro, Saoro, kinirepa pite misiritano nota?” itxano.

⁸ —Ininiã nota: “Apiananiri, kiriparai pite?” nitxari.

—Ininiã iua: “Nota Xesosi Nasaree sitatxitikirikanano nota. Pimisiritaktikaranano nota,” itxano.

⁹ —Nimoianariakori atamatari iua iotximere, ininiã ipïkarauatana. Na ikenakotarina nota misãkiretakari. ¹⁰ Ininiã nota: “Apiananiri, kipa pinireka pitemoni nikamini?” nitxari.

—Ininiã Apiananiri: “Ereẽ pitima. Tamásikomoni pisa. Iuaãtaã pisãpiretaãkako imakinika Teoso nireẽkiti pikamini ìkapani,” itxa Apiananiri notamoni.

¹¹ —Iua iotximere xika mõiãreti nitxaua. Ininiã nimoianariakori kanõpiãpotano. Anikanona Tamásikomoni. ¹² Iuaãtaã aua kiki Ananíasi inakori. Iua kamapikari akiomaneakorini kitxakapirïkarini paniãtakiti. Ikini mane Xoteoakori Tamásiko auakani iteene paxitari iua. ¹³ Iua ina notamoni. Nota takote apoka itxa. Itxano: “Nitari Saoro, kõiãre pitxako,” itxano nota.

—Iuasaakipeka nota kõiãrepeka nitxa. Natamatari iua. ¹⁴ Iua: “Akiomaneakorini Teosone mereẽi pite inirekakiti pimarotini ìkapani. Teoso mereẽi pite Erekarinoka Kamakari patamatini ìkapani. Teoso mereẽi pite Erekarinoka Kamakari sãkire pikenakotini ìkapani. ¹⁵ Pitekarako sãpiretariko itanapoko kãkitimoni atão Xesosi pirena, patamatakiti, pikenakotakiti pakini. ¹⁶ Ininiã kona okanani pitxape. Põkitikaua. Pipatxisataãkako. Pakiritariko Apiananiri uãka, ininiã iua makatxakari pimaerekani,” Ananíasi txano nota.

¹⁷ Eereka nikanapiriã Xerosareẽmoni. Teoso misãkiretiko aikotimoni nisa. Iuaã Teoso nimisãkirenãtakasaaki, nitaponetari Apiananiri. ¹⁸ Natamatari iua.

Itxano nota: “Katima pitxako. Xerosareë posipika uatxapeka. Uai auakani ! auikapaniri nota pirena pisãpiretakiti,” itxa.

¹⁹ Ininiã nota: “Apiananiri, nota nitapekana kãkiti pisãkire auiãkani ikini aikoti Xoteo apotiitiniãtaãua. Niãsokapekana. Kateia ãki nitakapekana. Ninoa imarotapitikari ikara nikamakiti. ²⁰ Pite sãkire sãpiretakari Estevão inakori okikosaaki, nota aua iuaã. Iuasaaki ninĩkatari kokanirini mãka inopinikiri. Nota apokaerekatari okinirina iuani.”

²¹ —Ininiã Apiananiri: “Pisipeka. Ôtakoxiti niokanatai Xoteo minakoni-moni,” itxano —itxa Paoro kãkitimoni.

Paoro Homano Itxaua

²² Iuasaakipeka Xoteo minakonimoni isini xika, kãkiti iuaã apotiitakaniua !inirekaikarina Paoro sãkire ikenakotinina. Omanãkarauata. Akiripoakatana: —Hõkariko. !Erekari auapanika inini —itxana.

²³ Akiripoakatana. Iõkokarina imãkana inopinikiri. Kipatxi okarapekatana apaka, kotxi omanãkarauata. ²⁴ Ininiã sotatoakori auĩte paniãtana sota-toakori anikiniri Paoro aiko kaikori ãki, sotatoakori aapoko ãki. Ipaniãtana Paoro ixirokitatiko tĩkane, kotxi inirekari imarotiniri Paoro omanatiko xika. ²⁵ Paoroni iĩtxikasaakina ixirokitatiko ĩkapani, Paoro pimaãri sotato itakote timakari:

—Erekari atxiĩti hĩte xirokitatiniri kiki Homano inakori maxikatĩika? Homano nitxaua. Kixikapa hĩte nirekari hĩxirokitatinino? —Paoro txari iua.

²⁶ Ininiãkara sotato sari iauĩtemoni.

—Iua kiki amaĩkakiti Homano itxaua iua, ininiãkara erepaniko iuamoni pikamakiti tĩkane —itxari.

²⁷ Ininiã sotatoakori auĩte sari Paoromoni.

—Pisãpiretano. Homanokani pitxataua? —itxari Paoro.

Ininiã Paoro:

—Iuapitikarano nota.

²⁸ Sotatoakori auĩte txari:

—Nota Homano nitxaua, kotxi niĩkitxitari aãtsopa ĩki Homano nininiua ĩkapani. Pakaroneri.

Ininiã Paoro:

—Niponaniãkasaaki Homano nitxapekaua —itxa.

²⁹ Iuasaaki Paoro xirokaaritakani patimari isinina. Sotatoakori auĩte pĩkarauata, Paoro Homano ininiua imarotakasaaki, kotxi iua paniãtana sota-toakori iĩtxikiniri Paoro.

Paoro Xoteo Auĩteakori Apisatoõ

³⁰ Katimatinĩkata sotatoakori auĩte koxirikari Paoro. Inirekari imarotiniri Xoteo apoĩtiniri, ininiã ipĩkapiretana sasetotxi auĩteakori, Xoteo auĩteakorikata. Ipaniãtari Paoro itimini ninoa apisatoõ.

23

¹ Ininiã Paoro iteene mixinitoõtana Xoteo auĩteakori.

—Nitariakori, erekari nikaminiritika, uatxa uai naua. Teoso nireẽkitinoka ninireka nikamini. Teoso imarotari ikara, kotxi imarotari nixinikakiti nãkixinireẽ —itxa.

² Sasetotxiakori auĩte apiatakari Ananĩasi inakori !ipotxitari Paoro sãkire, ininiã ipaniãtari Paoro takote auakani aritiniri Paoro sona. ³ Ininiã Paoro:

—Teosokarako aritaiko pite. Aapokotxi tare txĩtatakori atoko pitxa pite, kotxi mapara peerekai, txamari pãkixinireẽ maerekatinoka. Pite topãkanãta ereẽ nota pikenakotini ĩkapani akiomaneakorini paniãtakiti iaõka pikamini ĩkapani, txamari pipaniãtari niaritiko. Akiomaneakorini na paniãtari ikara atoko inakari. Pite kona kamari ninoa paniãtakiti —Paoro txari iua auĩtetxi.

⁴ Paoro takote auakani txitari Paoro:

—! Erekari pimisãkirepiretiniri sasetotxi auïte apiatakari Teoso nakiti — itxana.

⁵ Ininiã Paoro:

—Nitariakori, !nimarotari iua sasetotxi auïte apiatakari ininiua, kotxi Teoso sãkire iõkatsopatakori txari: “Kona pimisãkirepiretapiri hïauïte.”

⁶ Paoro atamatana kãkiti iuaã apotiitakaniua. Apanakini satoseoakori itxauana. Apanakini pariseoakori itxauana. Ininiã itapararitika isãpiretana:

—Nitariakori, pariseokarano nota. Pariseo ãkirikarano nota. Uai nota minaãka hïte apisatoõ, kotxi nota auikari ipïkanipeka õkitikiniua, iuaïkana auãki ininina ïkapani —itxana ninoa.

⁷ Iuusaakipeka pariseoakori, satoseoakori pakini taparakienatakakaua, kotxi pariseoakori auikari Paoro sãkire. Satoseakori !auikari Paoro sãkire.

⁸ Kotxi satoseoakori !auikari ipïkari õkitikiniua, iuaïkana auãki inini ïkapani. Kona auikarina Teoso nitiriakori iaxitikini auini. Kona auikarina matamatakoni auini. Pariseoakori auikari ipïkari õkitikiniua, iuaïkana auãki inini ïkapani. Auikarina Teoso nitiriakori auini. Auikarina matamatakoni auini apaka. ⁹ Iuusaaki ikinimane apia akiripoakata. Itaparakenatakakauana. Pariseoakori, kaiõkatsoparerini inakoni, õkitikaua. Itapararitika itxana:

—Atemoni ia kiki !ikamari maerekati. Atxiïti matamatakoti, atxiïti Teoso nitiri iaxitikiri sãkirauata iuakata. Ininiãkara !apakata anaiatiniri Teoso — itxana.

¹⁰ Ninoa iteene taparakienatakakauana, ininiã ineenamauaaritana. Sotatoakori auïte pïkari ninoa okiniri Paoro, ininiã ipaniãtana sotatoakori:

—Hïsako kãkiti sauaki apanïkaki. Iuaã himakatzakariko Paoro. Hanikariko sotatoakori aapokomoni —itxana.

Ininiã anikarina iuaã.

¹¹ Äti ïkanõkati Apiananiri apoka Paoromoni. Paoro takote itima. Itxari:

—Kataparaxinire pitxako. Pisãpiretapekari nota pirenua uai Xerosareë. Apaka pisãpiretariko nota pirenua Homa sitatxiti —itxari.

Xoteoakori Nirekari Okinirina Paoro

¹² Katimatinïkata apanakini Xoteoakori apotiitaua. Ixinikarina Paoro okini ïkapani. Ninoa txari:

—!Anipokotapani, !aãtapani, Paoro aõkini apisa —itxana.

¹³ Ninoa Xoteoakori koarëta apikomoni. ¹⁴ Eereka ninoa sari sasetotxi auïteakorimoni, kiomãtxiakori pakinimoni. Ninoa txana:

—Ate okaenetari Paoro. !Anipokotapani iua aõkini apisa. ¹⁵ Ininiã hïte aãuïteakori amanaãriko sotatoakori auïte, imininiri Paoro uai. Hïsapiretariko sotato auïte, hinirekari apikomoni hïpimainiri Paoro. Iuusaaki ate iãtapariko kimaporiã aõkiniri ïkapani —itxana ninoa.

¹⁶ Paoro itaro ãkiri kenakoenetari Paoro okaenetiko, ininiãkara ïroã sotatoakori aapoko, sãpireta itxari iritanirimoni. ¹⁷ Ininiã Paoro misãkiretari sotato auïte poiãori.

—Panikari ia ätokori hïauïtemoni. Iminapiretakiti inireka isãpiretiniri iua — itxa.

¹⁸ Ininiã sotato auïte poiãori anikari iua auïtemoni.

—Ate maïkakiti Paoro misãkiretano nota, ia ätokori pitemoni niminini, kotxi inirekari isãkirauatini pitekata —itxari.

¹⁹ Ininiã apiari anikari iuakoã ninoanani auiniãtaã. Ininiã iua:

—Kipa pinireka pisãpiretinino? —itxari.

²⁰ Ininiã iua ätokori apakapapiretari:

—Xoteo auñteakori nirekari amanainii katana pokamara Paoro panikini ninoamoni. Isāpiretainako pite, inirekapanikarina apikomoni Paoro sākire ikenakotinina. Txamari paxirari ninoa sākire. ²¹ !Pauikapena, kotxi koarēta apikomoni kikiakori kipatauako kimaporiā Paoro iātapinina, okinirina ĩkapani. Ninoa kikiakori txapeka !inipokotaikana, !iātaikana, Paoro imokakinina apisa. Ninoa iposopeka kimaporiā iātapinirina Paoro. Ninoa iātapari ninoa nirekakiti pikamini —itxari sotato auñte.

²² Ininiā sotato auñte:

—!Pisāpiretapiri notamoni pisāpiretakiti apanakinimoni.

Ininiā iokanatarari ātokori ikanapiriini aapokomoni.

Paoro Iokanataāka Périsi Inakorimoni

²³ Iposo atoko sotato auñte pĳkapiretana ipi sotatoakori auñtetxi poiāoni inakaniu. Imisākiretana:

—Hāpotiitana tosētosi sotatoakori ikitiā sikani, setēta sotatoakori kavaro nopini sikani, tosētosi sotatoakori meretaua anikakani pakini. Iposope hĳtxako ia ĩkanōkati novi oara hĳpotorikini Sesaréia sitatxitimoni hĳsini ĩkapani.

²⁴ Kavaroakoro hĳsikari Paoro, oa nopini isini ĩkapani. !Hāuiritapiri Paoro okiko. Hanikari Paoro Homanoakori auñtemoni Périsi inakorimoni —itxana ninoa.

²⁵ Iposo atoko sotato auñte iōkatsopata:

²⁶ Nota Kráotxio Arísia inakorino iōkatsopata apiarimoni, pite Périsi aāuñtemoni. Ereēkai. ²⁷ Ia kiki Paoro inakori Xoteoakori maĳkakiti. Ninoa nirekari okiniri. Nota, nisotatoneakorikata makatxakari iua, kotxi Homano itxaua. ²⁸ Ninirekari nimarotiniri kixikapa ninoa nirekari okiniri Paoro, ininiākara nanikari iua Xoteoakori auñteakori apotiitiniātaāua.

²⁹ Iuaā nimarotari ixika !auari kateia āki ikaikotini ĩkapani. Ixika !auari ipinini ĩkapani. Ninoa apoĳtari iua ninoa atokiriakorini paniātakiti imakamakani xika. ³⁰ Nikenakopiretari Xoteoakori okaenetiniri Paoro, ininiā niokanatarari iua pitemoni. Nipaniātana Paoro apoĳtakani isāpiretiniina Paoro kamakiti. Iananirako niōkatsopata. Ereēpiko,

itxa sotato auñte sākire Pérिसimoni.

³¹ Sotatoakori auñte paniātiniri atokokana sotatoakori anikari Paoro. ĩkanōka anikarina Ātxipatiritxi sitatxitimoni. ³² Katimatinĳkata sotatoakori ikitiāna sikaninanira kanapiriā sotato aapokomoni. Kavaro nopini sikani anikari Paoro apikomoni. ³³ Anikarina Sesaréia sitatxitimoni. Isikarina Paoro iōkatsoparikata auñtetximoni, Périsi inakorimoni. ³⁴ Ininiā iua atat-sopatarari iua iōkatsopari. Iposo atoko ipimaāri Paoro:

—Kitixinepa paua? —itxari iua.

Ininiā Paoro:

—Sirísia tixinikirirano —itxa.

³⁵ Ininiā Périsi txari:

—Pikamapiretakini apokasaaki, nikemariko pisākire —itxa.

Ininiā ipaniātana sotatoakori:

—Erotxini kamakiti aikoti āki hinĳkatariko Paoro.

24

Paoro Apoĳtiko Pirena

¹ Sĳko ōti auakasaaki, sasetotxiakori auñte apiatakari Ananíasi inakori sari Sesaréia sitatxitimoni. Apoka iuaā kiomātxiakorikata, kiki Tétoro inakorikata apaka. Iua Tétoro kākiti ĩkapani kasākireri kākiti misiritiko mereēkari apisatoō. Ninoa apoka Périsi apisatoō Paoro apoĳtinina ĩkapani. ² Ninoa apokasaaki, sotato minari Paoro Périsi apisatoō. Iposo atoko Tétoro akiritaāka isākirauatini ĩkapani. Ininiā Tétoro apoĳtari Paoro:

—Périsi, apiari pitxaua. Auñtetxi kimatireri pitxaua, kotxi mapakanani atixine neenamatzxi !auari. Mitxi kaiãopokori maerekati kamakori. Uatxa maerekati poiãoãpota, kotxi pite kamari erekari kãkiti ïkapani. ³Erekapitikari pikamakiti ate ïkapani. Ate apokaerekatari. ⁴Kona ninirekari niomakotetini pite, ininiãkara nisãkire poiãoka apikomoni nisãpiretai, ininiã pikenakotari nisãkire.

⁵—Ia kiki !erekari. Pamonõkoniri. Itxïkitakari Xoteoakori neenamauatini ikini itixiti. Kiki Nasaree sitatxitikiri sãkire auïãkani auñte itxaua iua Paoro. ⁶Teoso misãkiretiko aikoti imapaxitakanisaaki, ate maïkari iua. Akiomaneakorini oerekini atoko atxamariko Paoro. ⁷Txamari iuasaakipeka sotatoakori auñte Arísia inakori apoka iuaã. Imakatzakari Paoro itapararitika ate sauaki. ⁸Eereka Arísia paniãtaua pitemoni ainini. Pite pimaãriko Paoro, ininiã pimarotari asãpiretakiti inipitika inini —Tétoro txari Périsi.

⁹Iuasaaki Xoteoakori iuaã auakani:

—Ari, inipitikara isãkire —itxarina Périsi.

Paoro Sãkire Périsi Apisatoõ

¹⁰Iposo atoko Périsi paniãtari Paoro isãpirenauatini. Ininiã Paoro: —Nimarotapitikari kona uatzakani ate tixine auakani misiritiko mereẽkari pitxaua. Ininiãkara nota apokaerekatari pitemoni nisãpiretiniri nikamakiti.

¹¹Tosi õti pakini napakari nisa Xerosareẽmoni Teoso nimisãkiretini ïkapani. Pipimaãri apanakini atãokani nisãkire. ¹²Nanera !ikenakotari nota txitiniri ãti Teoso misãkiretiko aikoti ãki. Ikininape Xoteo apotiitiniãtaãua aikoti ãki !atamatarina neenamatzxi nikamãkitakini. ãtiãtaã apaka !atamatarina nitxïkitakiniri kãkiti neenamatzxi ikaminina. ¹³Nanera maxikatiïka kamapiretano nota. !Itikanona nota maerekati nikamini. ¹⁴Nota auikari Xesosi sãkire. Ia atão. Naneramonï Xesosi sãkire na atão. Nota parïkauata ate atokiriakorini Teosone ïkapani Xesosi sãkire nikïpitakasaaki. Moisesini paniãtakiti apaka nauika. Teoso sãkire sãpiretakanini iõkatsopatakiti apaka nauika. ¹⁵Nanera auikari Teoso õkitikinina ikininape kãkiti ipïkani. Erekarini, maerekani apaka õkitikauako iuaïkana auãki ininina ïkapani. Nota apaka auikari ikara. ¹⁶Ikiniõtika ninirekari atãonoka nikamini Teoso ïkapani, kãkiti ïkapani apaka.

¹⁷—Ninapapekari mapakanani ãtiãtaã, eereka nikanapiriã Xerosareẽmoni. Iuaã nisa txineiro ninirimanemoni matxineirotenimoni nanikini ïkapani. Apaka iuaã ninirekari nisikaenetakiti Teosomoni nisikini. ¹⁸Nisikaenetakiti Teosomoni nisikasaaki Teoso misãkiretiko aikoti ãki, nikipaãtaua Moisesini oerekakiti iaõka. Iuasaaki Xoteoakori Ásia tixinikini itikano nota. Kãkiti apotiitakaniua !auari notakata iuasaaki. Neenamatzxi !auari iuasaaki. ¹⁹Ninoa itikano. Maerekati nikamaãkamako, kinirepa kona ninoa apoka uai uatxa pite isãpiretinina ïkapani? ²⁰Ninoa uai mapokakanisaaki, pipimaãna nanera ikenakotakitina, itikakitina nota Xoteo auñteakori apisatoõ nauakasaaki. Kipa atxiïti nimaerekani iuasaaki? Iuasaaki kona nikamari maerekati. ²¹Atxiïti iuasaaki nanera !apokaerekatari nisãkire, kotxi nitxana: “Nota auikari ipïkani õkitikiniua, iuaïkana auãki inini ïkapani. Ikara nauikakiti sãkiretxiti xika hñte maïkano nota.” Atxiïti nanera !apokaerekatari ikara nisãkire —itxa Paoro sãkire Périsimoni.

²²Périsi iteene imarotapekari Xesosi oerekakiti sãkiretxiti. Iua misãkiretana ninoa:

—Sotatoakori auñte Arísia inakori apokapanikako uai. Iuasaakiko nisãpiretari kiãtokopa nitxatari Paoro. Uatxa xipope asãkire —itxa Périsi.

²³Ipaniãtari sotato auñte poiãori inakari Paoro nïkatakari tïkane:

—Pinĩkatariko Paoro. Pauiritariko inirekiniãtaã isini. Pauiritariko iniri-manẽ apokini iuamoni. Pauiritariko inirekakiti isikinirina —itxa Périsi.

Paoro Sãkirauata Périsi, Tosira Pakinikata

²⁴ Mapaõti napa atoko Périsi ãtanorokata Tosira inakorokata apoka Paoro auiniãtaã. Xoteo oa. Périsi pĩkapiretari Paoro. Iua apokasaaki, Paoro sãpiretana ninoa Kristo Xesosĩ sãkire auikiko, ininiã ninoa kenakotari. ²⁵ Paoro sãpiretari Teoso sãkire atão inakari kamiko pirena. Isãpiretari Teoso sãkire ãtotxi nireẽkiti amakamakani. Isãpiretari kãkiti misiritiko itixi xipokini õti apokasaaki. Ininiãkara Périsi pĩkarauata.

—Iaõpe. Pisipe. ãti õti nipaãka mauakanisaaki, iuaãkana nipaãkapiretai —itxari.

²⁶ Périsi nirekari Paoro sikiniri txineiro iuamoni, isikakiniri ãkapani. Ininiãkara itokata ipĩkapiretari Paoro iuakata isãkirauatini.

²⁷ Ipikanani napa atoko Põsio Põsito inakori auãtetxi txapekaua, ininiã Périsi sipe. Périsi nirekari Xoteoakori apokaerekatini iua, ininiã isini apisa ! isikakari Paoro, ininiã Paoro kaikotapanika kateia ãki.

25

Paoro Amanaãri Sesakata Isãkirauatini

¹ Põsito aua Sesaréia sitatxiti ipi ãti pakini õti, eereka isari Xerosareẽmoni. ² Iuaã sasetotxi auãteakori, Xoteo auãteakori pakini kamapiretari Paoro Põsitomoni. ³ Ninoa iteene amanaãri Põsito:

—Pikamariko ate nireẽkiti. Piminariko Paoro uai Xerosareẽmoni —itxana. Ikara ninoa nireka, kotxi okaenatarina Paoro ipixinipokoriti. ⁴ Txamari Põsito apakapapiretana:

—Kona, Sesaréia sitatxitikarako aua Paoro. Mapaõti napa atoko nota kanapiriã iuamoni. ⁵ Hinirekiniãri, ãtikaka hãte sari iuamoni notakata. Iuaã hãspiretari Paoro kamakiti maerekati —Põsito txana ninoa.

⁶ Põsito napari ipi semanati Xerosareẽ. Eereka ikanapiriã Sesaréiamoni. Katimatinĩkata ãroã aiko kãkiti misiritiko sãpiretikoãtaã. Iuaã ipĩkapiretari Paoro. ⁷ Paoro apokasaaki, Xoteo Xerosareẽkini ãkitari iua. Apoãtarina iua maerekati kaiãopokori ikamakiti, txamari imaerekani itikakari !auari, kotxi !ikamari maerekati. ⁸ Eereka Paoro:

—Maerekati na nikama. Xoteoakori aãtokiriakorini paniãtakiti nikamapitika. Teoso misãkiretiko aikoti nipaãtapitika. Homano auãte paniãtakiti, Sesa inakori paniãtakiti nikamapitika —itxa.

⁹ Põsito nirekari Xoteoakori apokaerekatini iuaka, ininiã ipimaãri Paoro: —Pinirekatari Xerosareẽ pisini? Iuaãrako nota kenakotariko nanera sãkire, pite sãkire apaka —itxa.

¹⁰ Txamari Paoro: —Konapitini. Homano nitxaua. !Apakata Xerosareẽ Xoteoakori apisatoõ nisãkire kenakotiko. Uaikara Homanoakori auãte Sesa nirekari Homano sãkirauatini kãkiti misiritiko sãpiretakani apisatoõ. Erekari uai pikenakotini nisãkire. Pite iteene imarotari kona xatiki maerekati nikama Xoteoakorimoni. ¹¹ Ixika auiniã nipinini ãkapani, maerekati nikaminiã, ininiã apakata nipinini. Txamari nanera na atão apoãtano nota, ininiã naneramoni nisikanapakiri !auari. Ninirekari Sesamoni nisini —itxa Paoro sãkire.

¹² Ininiã Põsito sãkirauata iua õtãkikakanikata Paoro Sesamoni isini ãkapani. Eereka apakapapiretari Paoro:

—Pite nirekari Sesamoni pisini, ininiãrako iuamonirako pisa —itxari Paoro.

Põsito Sãkirauata Akiripakata

¹³ Mapaõti napa atoko auĩtetxi Akiripa inakori apoka Sesaréia itaro Perenisi inakorokata. Ninoa ianapokota Pésitomoni. ¹⁴ Mapaõti napa atoko Pésito sãpiretari Paoro Akiripamoni:

—Uai aua kiki kateia ãki Périsi takakiti Paoro inakori. ¹⁵ Xerosareẽ napokasaaki, sasetotxi auĩteakori, Xoteo auĩteakori apaka apoĩtari iua. Inirekarina nota paniãtiniri iua okiko. ¹⁶ Txamari nisãpiretana: “Homanoakori kona okari kãkiti ãti apoĩtakiti, iua apoĩtakiti sãkire imakenakotakani apisa. Merepanika erekari iua apokini iua apoĩtakanikata kãkiti misiritiko mereẽkari apisatoõ, ninoa sãkire kãkiti misiritiko mereẽkari kenakotini ïkapani,” nitxana.

¹⁷ —Paoro omanatakani uai apokasaaki, katimatinĩkata niĩroã kãkiti misiritiko sãpiretikoãtaã. Iuaã nipĩkapiretari Paoro, ininiã iua apoka iua omanatakani apisatoõ. ¹⁸ Ninoa sãkirauata. Apoĩtarina Paoro. Niuãkatari ninoa sãpiretiniri maerekati Paoro kamakiti. ¹⁹ Txamari ninoa auiãkiti sãkiretxiti xika ninoa omanatari Paoro. Kiki ipĩkari Xesosi inakori xikara apoĩtarina. Paoro auikari Xesosi iuaĩkana auãki inini. Ninoa !auikari Xesosi õkitikiniua.

²⁰ —Iusaaki na nimarotari nikamakiti tĩkane. Ininiã nipimaãri Paoro: “Na pinirekatari Xerosareẽ pisini? Iuaã pite apoĩtakani, pite pakini kenakotaãkako,” nitxari Paoro. ²¹ Txamari iua apakapapiretano: “Kona. Sesamonira ninireka nisini,” itxano nota. Ininiã notara paniãtari iua kateia ãki ikaikotiniritika niokanatariko Sesamoni —itxa Pésito.

²² Ininiã Akiripa:

—Nota nirekari nikenakotiniri iua kiki sãkire —itxa.

Ininiã Pésito:

—Katanarako pikenakotari iua sãkire —itxa.

Akiripa, Perenisi Pakini Apoka Pésitomoni

²³ Katimatinĩkata Akiripa, Perenisi pakini apoka, itomaneri initiriakorikata. Peeremãkapokona. Iĩroãna kãkiti apotiitiniãtaãua. Sotato auĩteakori, sitatxi auakani auĩteakori pakini iĩroã. Eereka Pésito pĩkapiretari Paoro, ininiã Paoro minaãka. ²⁴ Ininiã Pésito:

—Pite, Akiripa, hĩte atekata apotiitakaniua apaka, hãtamataria ia kiki. Ikini-mané Xoteoakori uai auakani, Xerosareẽ auakani apaka !apokaerekataria ia. Isãpiretanona ia maerekati ininiua. Ninoa amanaãno ia okiko. ²⁵ Notamoni maerekati !ikama ia. Notamoni ixika !auari ipinini ïkapani. Eereka ia amanaãno apiari Sesamoni isini, ininiã nota auiritari isini. ²⁶ Txamari !nimarotari ixika niõkatsopatini Sesamoni. Ininiãkara nimirari Paoro hĩte apisatoõ isãkire hĩkenakotini ïkapani. Akiripa, apiari pitxaua pite, ininiã ninirekari pite sãpiretinino nota niõkatsopatakiti tĩkane. Ia hĩkenakotaka atoko hĩsãpiretano Sesamoni niõkatsopatini ïkapani. ²⁷ !Apakata kateia ãkikiri Sesamoni niokanatinini ixika nimasãpiretakaniã, kotxi Sesa nirekari imarotiniri ikamakiti xika.

26

Paoro Sãkirauatini Akiripa Apisatoõ

¹ Eereka Akiripa paniãtari Paoro:

—Nauiritai pisãpiretininiua pimaĩkiko xika.

Ininiã Paoro õkatari iuako isãkire isãpiretini ïkapani. Iposo atoko Paoro sãkirauata, maerekati imakamakani ninoa imarotini ïkapani.

² —Aãũte Akiripa, notamoni erekari pite apisatoõ nisãpiretiniri Xoteoakori apoĩtinino. ³ Kotxi pite iteene imarotari ate atokiriakorini oereẽkiti, Xoteoakori paniãtakiti. Ininiã namanaãni pikenakotiniri nisãkire imakinika.

⁴ —Xoteoakori imarotano nota ãtokoripanika ninakasaakiua, nitixine nauakasaaki. Eereka Xerosareẽ nauakasaaki ninoa imarotano. Imarotarina ikiniõtika nauini. ⁵ Mixakapokoni ninoa imarotano nota. Imarotarina pariseo nininiãua. Ikara isãpiretaina, inirekiniãna. Kãkiti pariseo inakari iteene auikari ate atokiriakorini oereẽkiti sãkiretxiti.

⁶ —Xoteoakori uatxa omanatano nota, kotxi nauikari Teoso sikaenetakiti ate atokiriakorimoni apokapeka uatxa. ⁷ Ate nirimane, tosi pakini nirimanetxi, iãtapari ikara Teoso sikaenetakiti apokini õti. Ninoa parĩkauata Teoso ãkapani ãkanõka, pokamara pakini. Niauĩte Akiripa, ikara Teoso sikaenetakiti xika Xoteoakori maĩkano nota. ⁸ Kinirepa hĩte !auikari Teoso posotiniri ipĩkari õkitikini, iuaĩkana auãki inini ãkapani?

⁹ —Mitxipeka nota omanatari Xesosi Nasareekiri, hĩte omanatiniri atokokana, ininiã nikapokotari isãkire auiãkani. ¹⁰ Xerosareẽ nauakasaaki, nikapokotari isãkire auiãkani. Sasetotxi auĩteakori auiritano kãkiti Teoso nakitiakori kateia ãki nitakini. Kaiãopokori nitaka kateia ãki. Xoteo auĩteakori nirekasaakiri okinina, nota apaka nirekari. ¹¹ Nisari Xoteo apotiitiniua aikotimoni ikininape Xesosi sãkire auiãkani nimisiritini ãkapani. Ninirekari Xesosi sãkire auikiko xipokini. Itene nomanatana, ininiãkara nisari apanakini sitatxitimoni ninoa nikapokotini ãkapani.

¹² —Ikara xika nisari Tamásiko sitatxitimoni. Sasetotxi auĩteakori auiritano nisini. Ipaniãtanona Xesosi sãkire auiãkani nimaĩkani. ¹³ Ipixinipokoriti, apaniãxiti iotximere iaxitikiri apoka notamoni. Atokatxi iotximere poiãoka. Ikara iotximere apiata. Iua iotximere ãki nota nimoianariakorikata aua. ¹⁴ Ate iriãkata xitipe. Iuasaakipeka nikenakotari nakiritiko: “Saoro, Saoro,” itxano Epiráiko inakori sãkiretxitiã. “Kixikapa pimisiritano nota? Piteka pimisiritaua, nota pimisiritakasaaki. Atxiĩti kema auĩteka karotaua ipitikiri aãketeẽ. Iua kema auĩte atoko pitxa,” itxano.

¹⁵ —Ininiã nota: “Apiananiri, kiriparai pite?” nitxari.

—Ininiã iua: “Xesosira nota, pimisiritakitikarano nota. ¹⁶ Pitima. Nota oerekaua pitemoni, pite nimereini ãkapani, ninitiri pininiua ãkapani. Uatxa pitikakiti pisãpiretako apanakinimoni. Pisãpiretapanikariko ikinimane kãkiti apikomoni noerekakiti tĩkane. ¹⁷ Ninĩkataiko pite Xoteo sauaki pauakasaaki, Xoteo minakaniua sauaki pauakasaaki apaka. Xoteo minakonimoni niokanatai pisini. ¹⁸ Kãkiti ipiaã sikani atoko itxana, kotxi !imarotarina Teoso sãkire. Mõsiãreni atoko ninoa, kotxi !atamatarina Teoso kimapore. Ininiãkara pitekara oerekanako Teoso sãkire ikimapore imarotinina ãkapani, ipiã itakanapinina, ikamaramoni isinina ãkapani. Ininiãkara !ikamaikari Satanasi paniãtakiti. Teoso paniãtakitinoka ikamana eereka. Ininiã ninoa auikariko nisãkire, ininiãkara nota makatzakariko ninoa maerekani. Ininiã Teoso nakitiakori ninoa apaka txauana,” Xesosi txano nota.

¹⁹ —Niauĩte Akiripa, ikara atoko ininiãra, nikamapekari imakinika Xesosi paniãtakiti, iaxiti iotximere apokasaaki nikenakotakiti. ²⁰ Nisãpiretari Xesosi sãkire merepitipanika kãkiti Tamásiko sitatxiti auakanimoni, eereka nisãpiretari Xerosareẽ auakanimoni. Eereka nisãpiretari ikinimane Xotéia tõpa auakanimoni. Eereka nisãpiretari kãkiti Xoteo minakonimoni. Nisinimoni nisãpireãpotana ninoa: “Himaerekani hĩtakanapako. Hãuikariko Teoso sãkire. Erekarinoka hĩkamako, ininiãkara aimarotapitikari maerekati hĩtakanapini,” nitxana. ²¹ Ikara atoko nitxana ikinimane nisãpiretini. Ikara nisãkire xika Xoteoakori maĩkano nota Teoso misãkiretiko aikoti ãki nauakasaaki. Kinirão okaka itxanona. ²² Uatxa nauapanika, kotxi Teoso nĩkatano nota. Ininiã ia õti Xesosi sãkire nisãpireta hĩte apiarinimoni, hĩte poiãorinimoni apaka. Moisesini sãpiretakiti iaõka nisãpireta. Teoso sãkire

sāpiretakani sāpiretakiti iaōka nisāpireta. Ninoa sāpiretari Teoso mereēkiti apokini. ²³ Ninoa txari: “Teoso Mereēkiti apokako. Iua misiritaākako. Iuakarako ōkitikaua ipinaka atoko. Iuaīkana auāki itxako. Mitxi ipinakari !ōkitikaua. Merepanika iua ōkitikaua. Iuara sāpiretariko Xoteoakori maerekani makatxakiko, Xoteo minakaniua maerekani makatxakiko apaka,” itxana Teoso sākire sāpiretakani. Ninoa sāpiretakiti iaōka nota sāpiretai apaka —itxa Paoro.

²⁴ Paoro ikara atoko inakasaaki, Pésito akiritari:

—Paoro, !kiīkitei. Pimapitxiriāpota iteene papaiaōkarauatini xika —itxa.

²⁵ Ininiā Paoro:

—Niauīte Pésito, kona nimapitxirita nota. Atāopitikara nisākire nikama. Erekarī nisākire. ²⁶ Niauīte Akiripa, pimarotapekarī nota sāpiretakiti, ininiā kataparaxinireno nimisākiretinii. Pimarotari Xesosi pirena, kotxi Xesosi ipīkasaaki, kona kipatakoriātaāni ipina. ²⁷ Niauīte Akiripa, pite auikatari Teoso sākire sāpiretakani sākire? Nota imarotari pite auikiniri.

²⁸ Ininiā Akiripa:

—Pite sākire txīkitakaaritano nota Xesosi sākire nauikini —itxari.

²⁹ Ininiā Paoro:

—Teoso imarotari. Ninirekarī pite, hīte hīkinika uatxa nisākire kenakotakani pakini iteene hāuikiniri Xesosi sākire nota auikiniri atokotxikana. Txamari kona nota nirekai hīte kateia āki hāuini nota atoko —itxa Paoro sākire.

³⁰ Paoro sākirauataka atoko auītetxi Akiripa, itaro Perenisi, Pésito, ikinimane ninoakata īkani pakini, itimana. ³¹ Iporikiti ipokīkasaakina, imisākiretakakana: —!Auari ikira kiki okiko xika. !Auari kateia āki itakiko xika.

³² Ininiā Akiripa txari Pésito:

—Ikira kiki mamanaākaniāri Sesamoni isini, isikakaākapiimako.

27

Paoro Potorika Homamoni Isini

¹ Eereka Pésito sāpiretaua ate iketo apope Itária tixinimoni aīpiriātini. Paoro apanakini maīkakoni apaka sikaāka Xório inakorimoni. Iua Xório seī pakini sotato auīte itxaua. Sesa sotatone itxaua. ² Ate iereētaua maporo āki, Ataramítxio sitatxitikero āki. Ásia tixinimoni sikaro oa maporo. Kiki, Arisitako inakori sari atekata. Iua Tesarónika sitatxitikiri, Masetónia tixinikiri iua Arisitako. Ininiā ate sipe. ³ Katimatinīkata ate apoka Sitoō ioporokoti. Xório tiretari Paoro, ininiā auiritari iua aōkimaneremoni isini iuaā, inirekakiti apakapini īkapani. ⁴ Eereka ate potorika iuaā. Iuasaaki ītima inataparata aāpisamoni, ininiā maporo iopiriāri Xipri pokomiriīti ītima manapakaniātaā. ⁵ Ate īpiriātari potxoari uiniti. Sirísia tixini takote anapa. Pāpíría tixini takote anapa. Ate apoka Miha sitatxiti, Arísia tixiniā. ⁶ Iuaā sotato auīte apokaro maporo Arexātria sitatxitikero, Itária tixinimoni sikaro. Iua iereētakaua ate oa maporo āki.

⁷ Iuaīkana apotorika. Iuasaaki ītima inataparata aāpisatoō, ininiā ianaritika asaāpota mapaōtipeka, ininiā eereka aāpoka Sinito sitatxiti apisatoō. Ītima tapara xika !aposotaika apikomoni asini anirekinimoni, ininiā aiopiriāri Kreta pokomiriīti ītima manapakaniātaā. Iuaā anapari Saomona pokomiriīti. ⁸ Ianaritika asaāpota imiriī takote. Aāpoka ioporoko “Ioporoko Erekarī” akiritikoātaā, Araséa sitatxiti takote.

⁹ Iuaā aāuapokota. Pamonoōkoniri apikomoni asini. Kiiniri Teoso īkapani kākiti manipokotakani inapapeka, ininiā imarotaāka ītima kataparari ka-iamapeka apokini. Ininiā Paoro ōtākikana ninoa:

10 —Apikomoni asiniã, pamonõkoniri. Ìtima kataparari kasaikamaro maporo atiikata. Kãkiti ipinako —itxa Paoro.

11 Txamari sotatoakori auĩte !auikari Paoro sãkire. Iua auikapiretari kamaporoteri sãkire, maporo nĩkatakari pakini sãkire. 12 Kaiãopokori maporo ãki parĩkauatakani txari:

—Ia ioporoko kona erekari mitaã anapini. Masa apikomoni. Atxiĩti aposota Penisi sitatxitimoni aãpokini. Iuaã manapakakari mitaã —itxana.

Penisi sitatxiti Kreta inakori pokomiriĩti ioporokoti. Atokatxi ereẽkokini manapi aua Penisi sitatxiti.

Ìtima Kataparari Pirena

13 Iuasaaki ìtima poiãoka apokaãpota ate tikinimoni, ininiã ninoa uãkatari:

—Uatxaika erekapekari Penisi sitatxitimoni asini —itxana.

Ininiã õtanõkarina kai, maporo maĩkiko, ininiã potorika atxa. Kreta miriĩti takote anapaãpota. !Anirekari potxoari uiniti apanĩkakiã asini, kotxi pamonõkoniri iuaã. 14 Txamari patimari ìtima iteene inataparata Kreta pokomiriĩtikiri. Ìtima uãka “Atokatxi Pokĩkinimonikiri.” 15 Ininiã ìtima apoka maporomoni. Pataparari. !Aposotari ìtima ininimoni asini, ininiãkara aãuiritari ìtima anikiniro maporo ìtima sinimoni. 16 Aiopiriãri Kaota inakori pokomiriĩti. Iua pokomiriĩ xapitiri. Iua pokomiriĩti ìtima kimaporeẽ aua, ininiã iuasaaki pokomiriĩ anapakasaaki ìtima poião taparata, ininiãkara aõtanõkaro kanaua maporo kapokiãmonikiri. 17 Akosekaãpotari kanaua maporo ãki aeretakini ìkapani. Ininiã ninoa iapiripoataro maporo aãpitsaã ìtima katakakitapetiniri monõkoni. Ninoa pĩkari ìtima anikiniro maporo ikipatxite apanĩkakiãkirimoni. Iua ikipatxite Arĩpia tixini takote. Ininiã ikaxitikarina mãkatxi mata maporo aniãkari. Mãkatxi mata kaikotiniã maporo nopini, patimaua ìtima anikiniua. Ikara atoko ininiã, auiritarina ìtima anikiniua. 18 Ìtima inataparatanika, ininiã katimatinĩkata ninoa okaãpotari tiĩtxi maporo ãki auakari potxoari uinitimoni maporo sakikini monõkoni. 19 Katimatinĩkata okarina maporo tii potxoari uinitimoni.

20 Mapaõti !aãtamataikari atokatxi. !Aãtamataikari iõriki. Ìtima inataparatanika, ininiã auãkatari apinini.

21 Mapaõtipeka maporo ãki parĩkauatakani kona inikaikana. Ininiã Paoro misãkiretana:

—Kinirepa hĩte kona kĩpitari nisãkire? Kinirepa hĩte takanapari Kreta pokomiriĩti? Hĩkĩpitaãkamariko nõtãkikinii, tiĩtxi kona hõkamako. 22 Iuaritika kataparaxinire hĩtxako. Nisãpiretai, kona kãkiti ìlipina. Maporonanira sakika. 23 Nota Teoso nakiti nitxaua. Iua ìkapani niparĩkauata. Minipani iua nitiri iaxitikiri oerekaua notamoni. 24 Teoso nitiri akiritano: “Paoro, !pipĩkarauatape. Pite apokapitikako Sesa apisatoõ. Peerekari Teoso. Itiretai pite, ininiãkara ninoa pitekata sikani !ipinapani,” itxano. 25 Ininiã kataparaxinire hĩtxako, kotxi nota auikari Teoso sãkire. Ikamapitikariko nisãpiretinii iaõka. 26 Ìtima okaroko maporo ipokomiriĩ —itxa Paoro sãkire ninoamoni.

27 Ipi semanati ìtima inataparata. Anikaro maporo potxoari uiniti Metxiteháneo inakori ìpiriãtini. Eereka apanĩkanõka maporo ãki parĩkauatakani uãkatari imiriĩ takotepeka aãpokini. 28 Ininiã ninoa okari kai iokaritsaã ìpanaã imarotinina ìkapani. Trĩta seisi metro ìpanaã. Eereka apikomoni iaõtarina ìpanaã, vĩtxi setxi metronoka. 29 Ininiã ipĩkarauatana maporo kai mitarimoni oãpokini monõkoni. Ininiã maporo kapokiãmoni ikaxitikarina ipi ipi pakini

kai iokaritsaã maporo maĩkiko. Eereka imisãkiretarina Teoso paĩtiki ikatimatinini ĩkapani. ³⁰ Maporo ãki parĩkauatakani nirekari maporo itakanapinina. Iokatzakarina kanaua potxoari uinitimoni. Ninoa txaua:

—Iuaĩkana kai aiokatzaka uai maporo ĩkiinaã.

Txamari na atão isãkirena. Inirekarina maporo itakanapinina kanaua ãki.

³¹ Iuasaaki Paoro txana sotato auĩte, sotatoakori pakini:

—Nakira kikiakori maporo ãki makaikotakaniã, hĩte ipinako —itxa.

³² Ininiã sotatoakori tsotakari aãpitsa kanaua maĩkakari, ininiã ĩtima anikari iua kanaua.

³³ Iuasaaki imaropirĩkata. Paoro õtãkikana ikinimane inipokotini ĩkapani:

—Ipi semanati hiãtapanãtari ĩtima napini. Ipi semanati hĩteni kona xatiki hinipokota. ³⁴ Ininiã hinipokotako uatxa, hĩtapara apokini ĩkapani himapinakanani ĩkapani. Hĩkarotiko !auapani. Hiãko ãtika kona katxakapani —itxa.

³⁵ Eereka Paoro kosekari komiri. Ikinimane apisatoõ isãkirauata Teosokata. Iposo atoko imapixinikari komiri poriĩ, nika itxari. ³⁶ Ininiã ikinimane kataparaxinirepe itxana, ininiã inipokotana. ³⁷ Tosẽtosi setẽta seisi pakini kãkiti maporo ãki auakani iuasaaki. ³⁸ Iteene inipokotakana atoko, okarina triko potxoari uinitimoni maporo poana onini ĩkapani.

Maporo Sakikini Pirena

³⁹ Katimatinĩkata maporo ãki parĩkauatakani atamatari imiriĩ, txamari !imarotarina itixi uãka. Atamatarina ikipatxite, ininiã ninoa:

—Iuaã kipatxi nopini maanikaro maporo, aposotiniã —itxana.

⁴⁰ Ininiã itsotakarina aãpitsa maporo tsapi. Kai kaikota ipatapiã. Ikoxirikarona aãpitsa mekotxi maĩkiko, maporo oerekaãtiko. Iposo atoko õkitikarina mãkatxi mata maporo ĩkiiãtinimoni auakari, ikipatxitemoni maporo ĩtima anikini ĩkapani. Ininiã ikipatxitemoni asaãpota. ⁴¹ Txamari ipixinipokoriti maporo atxapaã ikipatxite nopini. Maporo ĩkiiãtinimoni atxapaã. !Osaika. Tsakati kataparari xika maporo kapokiãtinimoni txirakiãpota.

⁴² Sotatoakori kinirão okaka txana ikinimane maĩkakoni. !Inirekarina ninoa mitekini imiriĩmoni anokinina. ⁴³ Sotatoakori auĩte !inirekari Paoro okiko, ininiã !auiritana. Ipaniãtana ikinimane:

—Himarotiniãri hanokini, ininiã hĩte merepanika hĩkomokako. Hanoka ikipatxitemoni. ⁴⁴ Eereka, hĩte mimataanoreni hĩkomokako. Himaĩkariko maporo txirata, ininiã hanoka ikipatxitemoni —itxana.

Ikara atoko aniniã, amakinika aãpoka ikipatxitemoni.

28

Mãota Pokomiriĩti Pirena

¹ Imiriĩpekaua amakinika, eereka aimarotari Mãota inakori pokomiriĩti aãpokini. ² Iuaã auakani apakapaua ipoxokoniritikana. Iuasaaki ãparaã potorika ikipini. ãparaã kipini xika patxĩkareri, ininiã iuaã auakani kamari xamina, ate irokini ĩkapani. ³ Iuasaaki Paoro apaka apotiĩtari xamina. Xamina pokiã itakasaakiri, xamina pataka õpõkikari imini xamina iriko ãki auakari. Akatsatari Paoro uako. ⁴ Ninoa ipokomiriĩ auakani atamatari imini Paoro uakoã iarõkini. Ininiã imisãkiretakakana:

—Ikira kiki kokaniri atxiĩti. !Ipinã potxoari uiniti, iuaritika inapakakiniri !auari. Uatxaika ipinapitikako —itxakakana.

⁵ Paoro ĩkokari imini xamina pokimoni arikini ĩkapani. !Katsiiri iuamoni.

⁶ Ninoa iãtapanãtari iuako ananapoatini. Iãtaparina iua mokatanitika ipinini. Mapa oara napa atoko !ipina, ininiã ninoa:

—Kona kokaniri ikira. Teoso itxaua —itxanãtana.

⁷ Iuaãtaã takote aua kikio Pópirio inakori nakiti. Máota pokomiriĩti auakani auĩte itxaua. Iua apakapaua ate ipoxokoniritika. Akaikota iua aapoko ipi ãti pakini õti. ⁸ Iuasaaki iri sirĩkanãta. Apoomata. Itikanãta. Ininiã Paoro sari iuamoni. Akiritari Teoso iua ereka inini ĩkapani. Itakari iuako inopini. Iuasaakipeka erekapeka itxa iua. ⁹ Eereka amianatakani iua pokomiriĩti auakani sari Paoromoni, ininiã iua makananitana ninoa. ¹⁰ Ninoa sikaua tiitxipokoni. Apotorikasaaki ãto maporo ãki, isikauana imakinika anireẽkiti.

Paoro Homa Sitatxiti Isini

¹¹ Ate napari ipi ãti pakini kasiriti iuaã. Eereka aiereẽtaua maporo ãki, Arexãtria sitatxitikero ãki. “Itaritxi Ipi” akiritaãka maporo uãka. Mitaãsaaki oa maporo kaikota Máota pokomiriĩti. ¹² Apotorika iuaã. Eereka aãpoka Sirakosa inakori sitatxiti. Iuaã akaikota ipi ãti pakini õti.

¹³ Eereka iuaĩkana maporo potorika. Aãpoka Héxio sitatxiti. Katimat-inĩkata ĩtima atikinimonikari ina, ininiã patimari asini. Katimat-inĩkata aãpoka Posoori sitatxiti. ¹⁴ Iuaã aõkitana kãkiti, Xesosi sãkire auĩãkani. Ninoa amanaãua ãti semanati anapini ninoakata. Eereka iuaĩkana aiereẽtaua maporo ãki. Iuaĩkana apotorika. Homa sitatxiti aãpoka.

¹⁵ Xesosi sãkire auĩãkani, Homa auakani, kenakoenetari aãpokaenetini, ininiã inana ate aõkitinina ĩkapani. Apanakini aõkitaua ate kienatxi amotikoãtaã takote, Ápio inakoriãtaã takote. Apanakini aõkitaua ate kãkiti imakiniãtaã, “Ipi ãti Aapokotxiti” inakoriãtaã. Paoro aõkitakasaakina ninoa, ipoxokoniuata.

—Peerekari Teoso, kotxi naia inari notamoni —itxa Paoro.

Homa Sitatxiti Paoro Apokini

¹⁶ Homa sitatxiti aãpoka atoko, Paoro auiritaãka inirekiniãtaã auini. ãtika sotato kaikotapika iuakata isinimoni imarotini ĩkapani.

¹⁷ Ipi ãti pakini õti napaka atoko, Paoro pĩkapiretana Xoteoakori auĩteakori. Ninoa apotiitakasaakia, Paoro misãkiretana ninoa.

—Nitariakori, !nikamari maerekati Xoteoakorimoni. Nauikapitikari akiomaneakorini oerekakiti sãkiretxiti. Iuaritika nimaĩkaãka Xerosareẽ. Nisikanapaãka Homanoakorimoni. ¹⁸ Homanoakori pimaãno nimaĩkiko xika. Eereka inirekarina isikakinino, kotxi ninoa imarotari ixika !auari nipinini ĩkapani. ¹⁹ Txamari Xoteoakori !inirekari Homano sikakinino, ininiãkara nakiritari Sesa nisãkire ikenakotini ĩkapani. !Ninirekari nimisãkirepiretiniri ninirimane Xoteoakori. ²⁰ Ikara atoko ininiã, nipĩkapiretai hĩte nimisãkiretini ĩkapani. Teoso mereẽkiti sãkire, Xoteoakori iãtapakiti sãkire nauikini xika, nota maĩkaãka.

²¹ Ininiã ninoa:

—Ate ! apakapari iõkatsopari Xotéia tõpakiri pite maerekani pirena. Aĩtariakori iuaã ĩkani !iminapiretari maerekati pikamakiti pirena. ²² Ate nirekari akenakotiniri pite auĩãkiti sãkiretxiti, kotxi akenakoenetapekari apanakini sãkire: “Xesosi sãkire na atão” —itxana ninoa.

²³ Ininiã ninoa ketotari ãti õti Paorokata aõkitakakinuana. Iketotiniri manapi itomaneri kãkiti sari Paoro auinimoni. Paoro ĩkanõkapanika sãkirauatapitipo. ĩkanõkapeka auakapanika isãpirenauatini. Isãpiretana Teoso auĩtetxi ininiãua.

—Atão Teoso ãkiripitikara Xesosi —itxa Paoro sãkire.

Isãpiretana ninoa Moisesi iõkatsopatakiti, Teoso sãkire sãpiretakani iõkatsopatakiti apaka, atão Teoso ãkiripitikara Xesosi ininiua ninoa imarotini ĩkapani. ²⁴ Apanakini auikari Paoro sãkire. Apanakini !inirekari auikinirina

Paoro sākire. ²⁵ Ininiã ninoa taparakienatakakaua Xesosi sākire auikakani mauikarenikata. Ipotorikinina apisa, iuaĩkana Paoro misākiretana ninoa:

—Erekari Matamatakoti sākirauata atão hinirimanekata kitxakapirĩka. Ipaniãtari Teoso sākire sãpiretakari Isaía inakori isãpiretiniri Teoso sākire hinirimanemoni. ²⁶ Itxari:

Hĩsa kãkitimoni. Hĩsãpiretanako ninoa: “Hĩkenakotari nisākire ãtipirika, txamari !hinirekari himarotiniri nisākire. ãtipirika hĩtikari nikamakiti, txamari !hinirekari hãuikiniri nota kaminiri ia atoko inakari.”

²⁷ Kotxi kãkiti ãkixinireẽ ! inirekarina imarotinirina nisākire. ! Inirekarina ikenakotinirina nisākire. ! Inirekarina itikinirina nikamakiti. Inirekiniãrina, itikapitkarina nota kamakiti. Inirekiniãrina, atão ikenakotarina nisākire. ãkixinireẽna imarotaãkamariko nota sākire, inamanako notamoni, ininiã nota txĩkitakamanako ninoa ereka ininina, itxa Teoso sākire.

²⁸ Paoro sākirauata iuaĩkana ninoakata:

—Ninirekari himarotiniri Teoso iokanapirena erekari kãkiti maerekani makatxakiko pirena iokanapiretaãkapeka Xoteo minakonimoni. Ninoakara auikapitkariko Teoso sākire.

²⁹ Ikara Paoro sãpiretaãka atoko, ninoa Xoteoakori sipeka. Isikasaakina, iteene itaparakienatakakauana Paoro sākire ikenakotinina xika.

³⁰ Paoro kaikota iuaã ipi anokanani. Iĩkitxitari kaapokori iua aapoko Paoronoka auini ĩkapani. Paoro ipoxokoniritika apakapana ikinimane iuamoni sikani. ³¹ Isãpiretana ninoa Teoso auĩtetxi ininiãua. Oerekana ninoa Xesosi, Teoso mereẽkiti ininiãua, Apiananiri ininiãua. Isākirauata itaparaxinireritika kãkitimoni. Auiritaãka ikinipoko imarotakiti isãpiretini.

HOMANO Paoro Iokanatsopatakiti Homa Auakanimoni

¹ Nota Paoro iokanatsopata hitemoni. Xesosi Kristo nitirikarano nota. Teoso mereeno nota iua iokanatakiti kakitimoni nininiua ikapani. Iua akiritano nota, Teoso iokanapirena erekari kakitimoni nisapiretini ikapani. Ikara parikatxinoka inireka nikamini. ² Kitzakapirika Teoso sãkire sãpiretakani sãpiretaua Teoso sikaenetakiti, iua iokanapirena erekari. Teoso sãkire iokatsopatakoriã ikara atatsopataãka.

³ Ia Teoso iokanapirena erekari sãpiretaua aãuïte Xesosi Kristo Teoso ãkiri ininiua. Kãkiti itxapekaua. Iuasaaki Tavii apika mekaniri itxaua. ⁴ Iuaritika Teoso ãkiri itxaua. Erekari Matamatakoti oerekari kãkiti Teoso ãkiri ininiua Xesosi, kotxi õkitikari Xesosi ipikaripeka. Iuaïkana aua itxa. Ikara posotiiretxi apiari oerekari kãkiti Xesosi Teoso ãkiri ininiua. ⁵ Xesosi Kristo sikaua ikinipoko erekari. Ininiã iokanataua ikini itixitimoni, kãkiti isãkire asãpiretini ikapani, isãkire auikinina ikapani, isãkire iaõka ikaminina ikapani. Ikara atoko aparïkauata Kristo ikapani.

⁶ Hïtepekana, Teoso akiritai hïte apaka Xesosi Kristo nakitiakori hininiua ikapani. ⁷ Ininiã nota iokanatsopata hitemoni Teoso tiretakinimoni, Homa sitatxiti auakanimoni. Teoso akiritai hïte iua nakitiakori hininiua ikapani. Aïri Teoso, Apiananiri Xesosi Kristo apaka sikari ikinipoko erekari hitemoni. Ikamaerekaxiniretai hïte.

Paoro Nirekari Isini Homa Auakanimoni

⁸ Merepanika nitxari niTeosone: “Erekapitikai, kotxi Homa auakani iteene auikari pisãkire. Ikini tõpati auakani kenakopiretari ninoa auikiniri pisãkire,” nitxari Teoso Xesosi Kristo uãkaã. ⁹ Nisãkirauatakasaaki Teosokata, nimisãkiretari Teoso hïte ikapani. Ætipirika nimisãkiretari Teoso hïte ikapani. Teoso imarotari ikara nisãkire atão inini. Nota parïkauata Teoso ikapani. Iuanoka ninireka nikamini. Nisãpiretari iua iokanapirena erekari imi pirena kakitimoni. ¹⁰ Nimisãkiretakasaakiri Teoso, nitxari: “Pauiritiniãno, ninirekari païtiki Homa auakanimoni nisini. Mitxi !apakata ninoamoni nisini. Pinirekiniãri iuaã nisini, pimoianatano ninoamoni napokini ikapani,” nitxari. ¹¹ Iteene ninirekari naõkitinii hïte, kotxi ninirekari Teoso kamataparatiniri hãkixinire nisãkireẽ. ¹² Ininiã nota kamataparaxiniretaiko hïte, kotxi himarotari nota iteene auikiniri Xesosi sãkire. Apaka hïte kamataparaxiniretano nota, kotxi hïte apaka iteene auikari Xesosi sãkire.

¹³ Nitariakori, ninirekari himarotiniri itokatapiima naiamatama hitemoni nisini ikapani, txamari iuasaaki !apakata nisini. Itomaneri kãkiti Xoteo minakaniua ãtiãtaã auakani auikari Xesosi sãkire. Ininiã iua atokotxikana ninirekari kaiãopokori kãkiti hïte sauaki auakani apaka auikiniri Xesosi sãkire. ¹⁴ Nisãpiretari Teoso sãkire ikininapemoni. Nisãpiretari sitatxi auakanimoni. Nisãpiretari ïtopa auakanimoni apaka. Nisãpiretari iokatsopari imarotakanimoni. Nisãpiretari iokatsopari mimarotakanimoni apaka. Ikara nipaïka. ¹⁵ Ininiã iposope nitxa nisãpiretiniri Teoso iokanapirena erekari hïte Homa sitatxiti auakanimoni apaka. Ikinika nitaparaã nisãpiretai.

¹⁶ Na nipëtauata Kristo iokanapirena erekari nisãpiretinii, kotxi iua iokanapirena oerekaua Teoso posotiire iua sãkire auiãkani maerekani imaktxakini ikapani. Kaposotiireri iua, ininiã imaktxakari ikinimane maerekani, iua sãkire auiãkani maerekani. Ikara ikaminana Xoteoakori merepanika. Eereka ikaminana Xoteo minakaniua apaka. ¹⁷ Teoso

iokanapirena erekari sãpiretaua Teoso txĩkitakiniri kãkiti atão inakaranoka ikamini. Teoso sãkire auikikoãnokara, kãkiti txĩkitakaãka atão inakaranoka ikamini. Teoso sãkire iõkatsopatakori txari:

Kãkiti atão inakaranoka kamakani auini erekari, kotxi ninoa auikari Teoso sãkire.

Kãkiti Kamakiti Maerekati

¹⁸Teoso iaxiti auakari oerekaua iua omanãkarauatini kãkiti maerekani xika, ininiãkara iua misiritariko kãkiti, kotxi kãkiti !inirekari Teoso paniãtakiti ikamini. Ikamarina maerekatinoka. Maerekati ikamakasaakina, ikipatarina atão inakari. ¹⁹Kãkiti ikara atoko inakani Teoso misiritanako ninoa, kotxi apakata ninoa atamatiniri iua kamakiti. Teosora oerekapekari ikamakiti kãkitimoni iua imarotininina ãkapani. ²⁰Teoso kamari itixi, ininiã kãkiti atamatakasaakiri Teoso kamakiti, imarotari kiãtokopa itxa Teoso. Mata-matakoti itxaua Teoso, iuaritika kãkiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kãkiti imarotari ikara atoko inakari itxaua Teoso, iua kamakiti atamatakasaakina. Ininiãkara kãkiti imarotapitikari Teoso auini. Ininiãkara na atão kãkiti sãkire: “Na nimarotari Teoso auini inini.”

²¹Kãkiti imarotari Teoso auini, iuaritika !isãpiretarina Teoso: “Atão Teoso pitxaua,” !itxarina. !Isãpiretarina Teoso: “Erekapitikari pikamakiti ate ãkapani,” !itxarina. !Kiĩkitena. !Imarotaikarina atão inakari, kotxi ãkixinireẽna maerekatinoka aua. ²²Ninoa sãkire: “Kimaroreua ate,” txamari !kiĩkitena. ²³Teoso mapinakatimoni !itxana: “Pitenokara Teoso txaua,” !itxarina. Kãkiti ipinapitika, iuaritika kamakori kãkiti atoko inakari imisãkiretana: “Pite ateosone,” itxana. Kamakori kotipiriki atoko inakari, kamakori pirãtxi atoko inakari, kamakori imini atoko inakari pakini ninoa misãkireta: “Hĩte ateosone,” itxana.

²⁴Ininiãkara Teoso takanapana ninoa. Auiritana maerekati ikaminina ãkixinirena nirekaãkiti. Itxiko atoko itxa imaerekanina iĩtona nireẽkiti. Ninoaka na paxitauana iĩtona, kotxi ãti sirĩka ãtikata. ²⁵!Inirekarina auikinirina atão inakari Teoso sãkire. Inirekarina auikinirina atão minakati. Teoso kamakitimoni itxana: “Pite ateosone. Aparĩkauata pite ãkapani,” itxana. Ikinipoko kamakarimoni !itxana: “Pite aTeosone. Aparĩkauata pite ãkapani,” !itxana. Atão inakari kamakani ãtipirika txari ikinipoko kamakari: “Peerekai pite.” Ameẽ.

²⁶Ikara kãkiti maerekani xika, Teoso takanapana ninoa. Auiritana maerekati kãkiti kapẽta txĩkitaãkari, iĩtona nireẽkiti ikaminina. Ininiã sito na nirekaikari kikikata osirĩkini. Sito nirekari ãto sitokata osirĩkini. !Apakata. Ikara maerekati itxaua. ²⁷Iua atokokana kiki !inirekaikari sitokata isirĩkini. Kiki nirekari ãti kikikata isirĩkini. !Apakata. Ikara maerekati itxaua. Ininiãkara iĩtona misiritaãkako imaerekanina xika.

²⁸Ninoa imaroreẽ !inirekarina imarotininirina Teoso, ininiã Teoso takanapana. Auiritana ixinikinirina atão minakati. Maerekatinoka ixinikakitina, ininiã ikamarina atão minakati. ²⁹Ãkixinireẽna aua ikini sereti maerekati. Iĩtona nireẽkitinoka ikamana. ãtipirika ikamapikarina maerekati. Apanakini nakiti tiitxi atamatakasaakina, inirekarina. Ikamarina maerekati apanakinimoni. ãkixinireẽna ixikotarina ãti. Kokaniri itxauana. Ineenamauatapikana. Apanakini imisirienetana. Ixinikarina apanakini kamakiti maerekatinoka. Aãpirena ikamana. ³⁰Imisãkirepiretarina ãti. Omanatarina Teoso. !Ipaxitarina apanakini imisãkiretakasaakina. Iuikauana. ãtipirika: “Paimatireua ate,” itxanãtana. Ixinikapikarina: “Natokopa itxa apikomoni maerekati akamini.” !Ikĩpitarina iri paniãtakiti, inoro paniãtakiti pakini. ³¹!Kiĩkitena. !Ikamarina ikamaenetakitina. !Itiretarina inirimane. !Inirekarina neenamatzixi

ixipokinina. !Iamonĩkana apanakini. ³² Teoso sãkire txari: “Kãkiti ikara atoko inakani ipinapitikako. Ninoa ipinini atão.” Ikara Teoso sãkire imarotapiikamana, iuaritika ikamapanikarina ikara maerekati. Apaka apokaerekatarina apanakini, maerekati ikamakasaaki.

2

Teoso Misiritari Maerekati Kamakani

¹ Atxiĩti hĩte txari: “!Erekana ninoa, kotxi ninoa kamari maerekati,” hĩtxa. !Apakata ikara atoko hinini, kotxi hĩte apaka kamari maerekati ninoa kamakiti atokotxikana. Ininiã !apakata kãkiti akiritiniri ãti kãkiti maerekati kamakari ininiua. ² Apakatapitika Teoso akiritiniri kãkiti maerekati kamakari ininiua, kotxi iua imarotari atão. Ininiã maerekati kamakari apakapari atão imisiritiko imaerekani iaõka. ³ “Ninoa maerekati kamakani misiritããkako,” hinakasaaki, hĩxinikari hĩte apaka kamari maerekati ninoa kamakiti atokotxikana. Ininiã hĩte apaka !hinapakakapaniri Teoso misiritinii hĩte. ⁴ Atxiĩti na hĩte maãkatari Teoso, kotxi hĩte txari: “Teoso katiraõkiri itxaua,” hĩtxa. Atxiĩti na himaãkatari Teoso, kotxi iusaaki !imisiritapanikai hĩte. Atxiĩti na himaãkatari Teoso, kotxi Teoso ãtipirika mĩteenekai hĩte. Teoso nirekari hĩtakanapiniri maerekati hĩkamakiti, erekarinoka hĩkamini ĩkapani. Ininiã iua tiretai hĩte. Ikara hĩte imarotamako.

⁵ Txamari hĩte paikoxinirei. Na hinirekari himaerekani hĩtakanapini. Ininiã himisiritiko apiaãpotako. Kãkiti misiritiko õti apokasaaki, Teoso misiritapitikaiko hĩte. Iusaaki kãkiti imarotariko Teoso omanãkare imaerekani xika, kotxi Teoso atão imarotari kãkiti kamakiti. ⁶ Ikamakiti erekari ininiãua, Teoso sikari erekari iuamoni. Txamari ikamakiti maerekati ininiãua, Teoso misiritariko iua. ⁷ Aua kãkiti ãtipirika erekari kamakani. !Isãpaka erekari ikamini. Inirekarina Teoso: “Erekapitikai,” ininina. Inirekarina Teoso paxitinina. Inirekarina auinina ãtipirika. Kãkiti ikara atoko inakani Teoso txĩkitakana ãtipirika auinina ĩkapani. ⁸ Apanakinipekana kamari inireẽkitinoka. !Inirekarina atão imarotinina. Maerekatinoka inirekana ikaminina. Teoso omanatana kãkiti ikara atoko inakani. Teoso misiritanako ninoa. ⁹ Ikinipoko kãkiti maerekati kamakani maxikaãkako. Atatsiirauatako. Merepanika Xoteo misiritaãkako, eereka Xoteo minakaniuua apaka misiritaãkako. ¹⁰ Teoso txanako kãkiti erekari kamakani: “Erekapitikai hĩte.” Ikara atoko itxanako merepanika Xoteoakori, eereka Xoteo minakaniuua apaka. Teoso paxitanako ninoa. Ikamaerekaxiniretanako. ¹¹ Teoso misiritana ikini kãkiti maerekati kamakani. !Auiritari apanakini maerekati kamakani napakakiniri imisiritikona. Apanakini maerekati kamakani imisiritini atokokana, imisiritari ikinipoko maerekati kamakani.

¹² Xoteo minakaniuua !auari Moisesi sãkire Teoso paniãtakiti iõkatsopatakori. Ninoa kamari maerekati, ininiã Teoso paniãtakiti imimarotakanisaaki ipinana. Xoteoakori aua Teoso paniãtakiti iõkatsopatakori. Ninoa apaka kamari maerekati. Ininiã Teoso misiritana ninoa, isãkire iõkatsopatakori iaõka imakamakani xika. ¹³ Teoso kamaerekatari isãkire iaõka kamakani. Pike-nakotakasaakiri Teoso sãkire, txamari !pikamari isãkire iaõka, iusaaki Teoso !ikamaerekatai pite. ¹⁴ Xoteo minakaniuua !auari Teoso sãkire iõkatsopatakori. Iuaritika atxiĩti ikamarina Teoso paniãtakiti iõkatsopatakori iaõka, kotxi ikamarina ãkixinirena sãkire iaõka. !Auari Teoso sãkire iõkatsopatakori ninoamoni, iuaritika Teoso paniãtakiti auape ãkixinireña. ¹⁵ Teoso paniãtakiti iaõka ikamakasaakina, oerekarina imarotininina atão inakari ãkixinireña. ãkixinirena sãkire sãpiretana atão. ãtikata itxana: “Pite kamari maerekati. !

Apakata.” Ātikata erekari ikamakasaakina, “Pite kamari erekari. Erekapitikiari.” Itxa ākixinirena sākire. ¹⁶ Kākiti kamakiti imarotiko ōti apokako. Iuasaaki Teoso paniātariko Xesosi Kristo sāpiretiniri kākiti kamakiti. Kākiti kamakiti apanakini mimarotakiniti apaka isāpireta. Iuasaaki isāpiretari kākiti misiritiko imaerekani xika. Teoso iokanapirena erekari nisāpiretakiti oerekepekari ikara atoko inakari.

Xoteoakori Auari Teoso Paniātakiti Iōkatsopatakori

¹⁷ Hītepekana, hīte txari: “Ate Xoteo atxaua. Teoso apakapapitikaua ate, kotxi isikari ipaniātakiti iōkatsopatakori atemoni. Atenoka Teoso anaakori atxaua,” hītxa. Ininiā hīteka iuikaua. ¹⁸ Hīte imarotari Teoso nireēkiti hīkamini. Himarotari Teoso paniātakiti iōkatsopatakori, ininiā himarotari erekari apiari hīkamini. ¹⁹ Hītxari: “Atera oerekari Teoso kimapore, ikimapore mimarotakanimoni. Mōsiāreni atoko itxana ninoa,” hītxa. “Ate imarotari Teoso sākire, ininiā ate imarotari apanakini aōerekini. Ininiā ate tirikapi atoko atxaua. Apanakini ipiā sikani atoko itxana ninoa.” Ikara atoko hītxa hīte. ²⁰ Hītxari: “Koerekarerini atxaua. Kākiti miīkiteni oereēkani atxaua. Ate oerekari kākiti poiāo imarotakani. Ate imarotari ikinipoko. Aimarotari atāo, kotxi Teoso sākire iōkatsopatakori aua atemoni.” Ikara atoko hītxa hīte. ²¹ Hīte Xoteo inakanuia oerekari apanakini. Kinirepa kona hīteka oerekaua apaka? Hīte ōtākikari apanakini: “!Piūtiriuatape”. Kinirepa hīte na takanapari hīitiriuatini? ²² Hīte ōtākikari apanakini: “!Pisirīkape pītanoro minakotokatika.” Kinirepa hīte apaka sirīka hītanoro minakotokatika? Hīte omanatari teoso kamakori, ininiā kinirepa hītirīkari ninoa teosone aikoti tii? ²³ Hīte iuikaua, kotxi Teoso sākire iōkatsopatakori aua hītemoni, txamari apanakini na paxitari Teoso hīte xika, kotxi kona hīte kamari Teoso sākire iaōka. ²⁴ Teoso sākire iōkatsopatakori txari:

Hīte Xoteo xika, Xoteo minakanuia misākirepiretari Teoso, itxa Teoso sākire iōkatsopatakori.

²⁵ Teoso takaōtxikare aua hītoā. Teoso paniātakiti hīkaminiā, erekapitikari Teoso takaōtxikare hītoā auini. Teoso paniātakiti iōkatsopatakori himakamakaniā, Teoso takaōtxikare mauakiniti atoko hītxaua. ²⁶ Xoteo minakatiua, Teoso takaōtxikare iītoā mauakini, Teoso sākire iaōka ikaminiā, Teoso txariko: “Iua Xoteo atokotxikana itxa. Nitakaōtxikare iītoā auakiti atokotxikana itxaua.” ²⁷ Hīte Xoteoakorimoni aua Teoso paniātakiti iōkatsopatakori, iuaritika !hīkīpitari Teoso sākire. Teoso takaōtxikare auapitikama hītoā, iuaritika !hīkīpitari Teoso sākire. Xoteo minakanuia !auari Teoso takaōtxikare iītoāna, iuaritika ninoa kamari Teoso paniātakiti iōkatsopatakori. Ikara atoko ininiā, ninoa oerekai himaerekani.

²⁸ Kiripa atāo Xoteo? Kiripa Teoso nakiti txataua? Kirimonipa aua Teoso takaōtxikare atāo inakari? Teoso takaōtxikare iītoā auakini, na ikinikani atāo Xoteo itxauana. ²⁹ Teoso paniātakiti iōkatsopatakori !oerekaua Teoso nakiti aniniua. Xoteo atāo inakariua, Teoso nakiti itxaua ākixinireē. Teoso takaōtxikare aua iua ākixinireē. Erekari Matamatakoti takari Teoso takaōtxikare iua ākixinireē. !Inirekari kākiti iuikiniri. Inirekari Teoso iuikiniri.

3

Teoso Kamari Ikamaenetakiti

¹ Atxiīti hīte txano nota: “Teoso apakapari Xoteo. Teoso apakapari Xoteo minakanuia apaka, ininiā !apiaerekata Xoteo aniniua. !Apiaerekata Teoso takaōtxikare aītoā auini.” Atxiīti ikara atoko hītxa. Txamari na atāo. ² Apiaerekatapitika Xoteo aniniua, kotxi Teoso merepitipanika sāpiretari iuaka sākire Xoteomoni, ninoa iōkatsopatiniri ikapani, inīkatinirina ikapani. ³ Iuaritika apanakini Xoteo !auikari Teoso sākire. Ikara xika atxiīti Teoso !

ikamari ikamaenetakiti? ⁴ Ikamapitikari. Atxiiti paxirari ikinimane sākire. Iuaritika Teoso sākire atāonoka. Teoso sākire iōkatsopatakori txari:

Teoso sākirauatakasaaki, ikinimane imarotari isākire atāo ininiua. Isāpiretakasaakiri kākiti imisiritiko imaerekani xika, iuasaaki imarotaākako Teoso kamakiti atāo inini.

⁵ Atxiiti kākiti txano nota: “Atāo minakati akamakasaaki, apanakini apia imarotari Teosonoka kaminiri atāo inakari. Ininiā erekari akaminiri atāo minakati apanakini imarotiniri Teosonoka kaminiri atāo inakari. Ininiā ! apakata Teoso misiritiniua ate, maerekati akamini xika.” Atxiiti aua kākiti ikara atoko ina sākiretakani. ⁶ Apakatapitika Teoso misiritiniri maerekati kamakari. Iua kamari atāonoka, ininiā apakatapitika imisiritiniri ikinimane maerekati kamakani.

⁷ Atxiiti kākiti txaua: “Atāo minakati asāpiretakasaaki, apanakini imarotari Teoso sākirenoka atāo ininiua. Atāo aminasākiretakaniā, apanakini kākiti txari: ‘Teosonoka ereka,’ itxana. Ininiā ! apakata Teoso misiritiniua amaerekani xika.” Atxiiti aua kākiti ikara atoko ina sākiretakani. ⁸ Ikara atāo ininiā, maerekati makama erekari apokini ikapani. Txamari ikara sākiretxiti na atāo. Iuaritika apanakini apoitapekaua ate ikara atoko asāpiretini. Ininiā atāopitika ninoa misiritiko, isākirena xika.

!Auari Kākiti Erekar

⁹ Hixinikariko ikinika ikara nisāpiretakiti. Atauako Xoteo apiaerekata? Atauako Xoteo minakaniua poiāo ereka? Kona ikara atokoni itxa. No-erekapekai hīte, Xoteo minakaniua atokokana itxa Xoteo, kotxi ikinimane kamari maerekati. Akinika !aposotari atakanapiniri maerekati akamini.

¹⁰ Teoso sākire iōkatsopatakori txari:

!Auari atāo inakari kamakari. Ātika !auari.

¹¹ Teoso nireēkiti imarotakari !auari. Teoso nirekakari !auari.

¹² Ikinimane kaporīkikari Teoso. Ikinimane kerokari ikamakiti. Erekar kamakari !auari. Ātika !auari.

¹³ Kākiti sākire maerekati, itotxi arakakari saka atoko itxa. Itotarina imisirienetinirina apanakini. Kākiti sākire imini tsiiā atoko itxa.

¹⁴ Ātipirika imisākirepiretarina āti, kotxi inīkatarina omanākaretxi ākixinireēna.

¹⁵ Maxikatīka inirekarina okinirina āti.

¹⁶ Isinimonina imaxikana apanakini. Maerekaxinireninoka itxīkitakana apanakini.

¹⁷ !Imarotarina neenamatchi itakanapinina.

¹⁸ !Ipaxitarina Teoso. !Ipīkarina iua.

Itxa Teoso sākire iōkatsopatakori.

¹⁹ Aimarotari Teoso sikari ikinika ipaniātakiti iōkatsopatakori atemoni Xoteoakorimoni, inireēkiti aimarotini ikapani. Ininiā ! apakata ate, Xoteo minakaniua pakini: “!Nimarotari Teoso nireēkiti,” anini, kotxi isāpiretapekari inireēkiti akamini tīkane. Ininiā atāopitikara Teoso misiritinina ikinimane maerekati kamakani. ²⁰ Ikinika Teoso paniātakiti iōkatsopatakori !aposota akamini, ininiā Teoso kona kamaerekataua. Teoso paniātakiti iōkatsopatakori oerekaua maerekati kamakani aniniua.

Natokopa Itxa Teoso Kamaerekatiniri Kākiti?

²¹ Uatxa Teoso oerekapekaua itxīkitakiniri kākiti atāo inakari kamakani ininiua. Teoso paniātakiti ikinika ! ikama kākiti, iuaritika itxīkitakaākana atāo inakari kamakani ininiuana. Kitxakapirīka Moisesi, Teoso sākire sāpiretakani apaka sāpiretari ikara. ²² Teoso txīkitakari kākiti atāo inakari kamakani ininiuana, Xesosi Kristo sākire auikasaakina. Itxīkitakari Xoteo, Xoteo minakaniua pakini atāo inakari kamakani ininiuana, Xesosi sākire

auikasaakina. Xoteo minakatiua Teosomoni, Xoteotxikana itxaua. ²³ Kotxi ikinimane kamari maerekati, ininiã !aposota aãpokini Teoso iotximere-
 moni. ²⁴ Maerekati kamakaniua ate, iuaritika Teoso sikari ikinipoko erekari
 maxikatiïka atemoni, ininiã Teoso kamaerekataua ate, kotxi Kristo Xesosi
 iïkitxirauata ate ïkapani ipïkasaaki. Ininiã Teoso !imisiritaikaua amaerekani
 xika. ²⁵ Teoso sikari Xesosi ipinini kãkiti ïkapani. Xesosi ipïkasaaki, Teoso
 makatxakari maerekati akamakiti. !Imisiritaikaua ate, kotxi aãuikari Xesosi
 ipinini ïkitxitari Teoso, maerekati akamakiti. Teoso sikari Xesosi ipinini ate
 ïkapani. Ikara oerekaua atão inakarinoa ikamini. Mitxipitipanika Teoso !
 imisiritana kãkiti imaerekanina xika. Iãtapari iketo manapi apokini, kotxi
 iamoniãkari kãkiti. ²⁶ Teoso sikari Xesosi, ininiã ipïpe kãkiti ïkapani, ininiã
 uatxa Teoso misiritari kãkiti maerekati ikamini xika, ininiã aimarotari Teoso
 atão inakarinoa kamakari itxaua iua, kotxi !auiritari maerekati kamakari
 inapakakini. Erekari Teoso, ininiã iua posotari ikamaerekatiniã kãkiti
 Xesosi sãkire auiãkani.

²⁷ Ininiã !apakata aãuikiniua, kotxi !auari aparïka akamaerekatakiri, ininiã
 !apakata aãuikiniua Teoso paniãtakiti iõkatsopatakori akamakasaaki. Teosora
 kamaerekataua, Xesosi sãkire aãuikasaaki. ²⁸ Teoso paniãtakiti iõkatsopatakori
 kamakari atxiïti !ikamaerekataãka, kotxi !auikari Xesosi sãkire. Xesosi sãkire
 auikakarinoa ikamaerekataãka. ²⁹ Atauako Teoso Xoteo Teosonenanini
 itxataua? Konapitini. Xoteo minakaniua Teosonekanera apaka itxaua
 Teoso. ³⁰ Teoso ätinoka aua. Iua kamaerekatana Xoteo, Xesosi sãkire auiãkani.
 Iua kamaerekatana Xoteo minakaniua apaka, Xesosi sãkire auikasaakina.
³¹ Ikara atoko ininiã, atxiïti kãkiti txari: “Teoso kamaerekataua ate, kotxi
 aãuikari Xesosi sãkire, ininiã Teoso paniãtakiti iõkatsopatakori !itxaika. Ininiã
 !akamaikari,” itxa kãkiti sãkire atxiïti. Konapitini. Xesosi sãkire aãuikasaaki,
 anirekari iteene akaminiri Teoso sãkire paniãtakiti iõkatsopatakori.

4

Atão Inakari Kamakari Apraõ

¹ Maxinikari Apraõ aïri kitxakapirïkari. Natokopa itxa iua imaro-
 takiti, Teoso kamaerekatiniã kãkiti? ² Apraõ kamakiti erekari ka-
 maerekataãkamariko iua, ininiã iua iuikamauako. Txamari iua iuikiniua !
 auari Teoso apisatoõ. ³ Teoso sãkire iõkatsopatakori txari:

Apraõ auikari Teoso sãkire, ininiãkara Teoso txïkitakari iua atão inakari
 kamakari ininiua.

⁴ Parïkauatakari ipatrãote sikari iparïka ïki iuamoni. Maxikatiïka !iïkitxitari iua.
 Isikari, kotxi iparïkauata. ⁵ Kãkiti auikiniãri Teoso kamaerekatiniã maerekati
 kamakari, iua kãkiti !iuikari iuaka parïka. Imarotari iparïka !ikamaerekatari
 iua. Teoso txïkitakari ikara atoko inakari kãkiti atão inakari kamakari ininiua,
 kotxi iua auikari Teoso sãkire. ⁶ Kitxakapirïka Tavii txari ikara atoko. Iua
 sãpiretari kãkiti Teoso sikakiti erekari apakapakani. Teoso txïkitakari iua atão
 inakari kamakari ininiua. Na iparïkani txïkitakari iua atão inakari kamakari
 ininiua. ⁷ Tavii txari:

Teoso makatxakasaakiri kãkiti maerekani, !atamataikari maerekati ikamak-
 iti. Teoso takari ikinipoko erekari kãkiti ikara atoko inakarimoni.

⁸ Teoso !iaõtari iua kamakiti maerekati. Teoso takari ikinipoko erekari
 iuamoni.

Itxa Tavii kitxakapirïka.

⁹ Atxiïti pite txari: “Atauako ia erekari Teoso sikakiti, Tavii sãpiretakiti,
 kãkiti Teoso takaõtixikare auaïtotakiti ïkapaninanini?” Konapitini. Ia erekari
 Teoso sikakiti Teoso takaõtixikare mauaïtotakini ïkapani apaka. Nisãpiretapekai
 ia Teoso sãkire iõkatsopatakori:

Apraão auikari Teoso sākire, ininiākara Teoso txīkitakari iua atāo inakari kamakari ininiua,

itxa Teoso sākire iōkatsopatakori. ¹⁰ Kirisaakipa Teoso txīkitakari Apraão atāo inakari kamakari ininiua? Atauako Teoso takaōtxikare Apraão iōā auakasaakiikani? Konapitini. Takaōtxikari Apraão iōā takiko apisapanikara, itxīkitakari Apraão atāo inakari kamakari ininiua. ¹¹ Merepanika Teoso txīkitakari Apraão atāo inakari kamakari ininiua, eerekaikara itakari itakaōtxikare iōā. Ikara Teoso takaōtxikare oerekari, mitxipeka Teoso txīkitakari Apraão atāo inakari kamakari ininiua, kotxi iua auikari Teoso sākire. Apraão auikari Teoso sākire, Teoso takaōtxikare iōā auini apisapanika. Ininiā Apraão ikini Teoso sākire auīākani iri atoko itxaua. Atxiīti Teoso takaōtxikare iōāna !auari. Iuaritika ninoa iri atoko itxaua Apraão. Teoso txīkitakari ikinimane iua sākire auīākani atāo inakari kamakani ininiuana. ¹² Apraão Teoso takaōtxikare auāitotakini iri atoko itxaua, ninoa auikiniāri Apraão sākire Apraão auikiniri atokotxikana, kotxi Teoso auikari Teoso sākire Teoso takaōtxikare iōā auini apisapanika.

¹³ Teoso sikaenetari itixi Apraōmoni, imekaniriakori pakinimoni. Ikara atoko Teoso sākire, kotxi Apraão auikari Teoso sākire. Iua auikari Teoso sākire, ininiā Teoso txīkitakari iua atāo inakari kamakari ininiua. Apraão kamakiti erekari !itxīkitakari Teoso sikaenetiniri itixi Apraōmoni. ¹⁴ Kākiti erekari kamakari Teoso sākire mauīākati !apakapari Teoso sikaenetakiti, kotxi !auikari Teoso sākire. Teoso sikari isikaenetakiti iua sākire auīākanimoninani. ¹⁵ Teoso paniātakiti iōkatsopatakori makamakati misiritaākako. Teoso paniātakiti iōkatsopatakori mauakaniā, maerekati !auari. Txamari auapitika Teoso paniātakiti iōkatsopatakori.

¹⁶ Ininiā kākiti auikasaakiri Xesosi sākire, apakapari Teoso sikaenetakiti. Maerekati kamakani kākiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini kākitimoni. Ininiā ikinimane Apraão apika mekaniriakori apakapapitikari Teoso sikaenetakiti. Xoteoakori Teoso paniātakiti iōkatsopatakori auakini apakapari. Xoteo minakaniua Teoso sākire Apraão auikini atoko inakani apaka apakapari. Ate amakinika iri atoko itxaua Apraão. ¹⁷ Teoso sākire iōkatsopatakori txari:

Teoso txari Apraão: “Nota txīkitakaiko pite itori āti uāka iri pininiua.”

Ininiā Teosomoni iua aīri atoko itxaua, kotxi Apraão auikari Teoso sākire. Teoso txīkitakana ipīkani iuaīkana auāki inini. Iua kamari mitxi mauakati auini.

¹⁸ Apraão kiomātxipeka inakasaaki, kona keeneri. Iuaritika auikari Teoso sākire. Iātapari Teoso sikaenetakiti apokini. Ininiā apanakini āti uāka iri atoko itxapekaua Teoso sākire iaōka. Teoso sākire iōkatsopatakori txari:

Papika mekaniriakori kaiāopokopaniriko.

¹⁹ Apraão seī anokanani inakasaaki, imarotari iōto ipinanapanoka inini. Imarotari Sara !oposotakari keene onini. Iuaritika iteene auikari Teoso sākire. ²⁰ !Iotoka auikiniri Teoso sikiniri isikaenetakiti iuamoni. Iua auikari Teoso sākire itaparaxinireritika. “Teoso posotari ikinipoko ikamini,” itxa.

²¹ Iua iteene imarotari Teoso posotiniri isikiniri isikaenetakiti. ²² Apraão auikari Teoso sākire, ininiākara Teoso txīkitakari iua atāo inakari kamakari ininiua. ²³ Na Apraōnanani Teoso txīkitaka atāo inakari kamakari ininiua.

²⁴ Iua txīkitakaua ate apaka atāo inakari kamakani aniniua, aāuikiniāri Teoso sākire. Aāuīte Xesosi ipīkasaaki, Teoso ōkitikari iua iuaīkana auini īkapani.

²⁵ Teoso sikari Xesosi kākitimoni ipinini īkapani maerekati akamakiti xika. Teoso ōkitikari iua iuaīkana auāki inini īkapani, ate ikamaerekatini īkapani.

5

Teoso !Omanataikaua Ate

¹ Ininiã Teoso kamaerekataua, kotxi aãuikari isãkire, ininiãkara aãuïte Xesosi Kristo iotokakari Teoso omanatiniua ate. Teoso !omanataikaua ate. Uatxa apakapaua ate. ² Aãuikasaakiri Xesosi sãkire, iuasaaki aimarotari ikinipoko erekari Teoso sikakiti atemoni ikiniõtika. Iteene apoxokoniuaata, kotxi aiãtapari Teoso aaõkitini, iua iotximere aãtamatini ïkapani. ³ Apanakini misiritakasaakia, apoxokoniuaata apaka, kotxi Teoso oerekaua amïteenekiniri amisiritiko. ⁴ Amisiritiko amïteenekiniã, aimarore apiaãpota. Aimarore apiaãpotakasaaki, aiãtapariko erekari apokini atemoni. ⁵ Erekari apokini aiãtapiniã, aãpakapapitikariko erekari, kotxi aãkixinireë aimarotari Teoso iteene tiritiniua. Erekari Matamatakoti Teoso sikakiti atemoni, oerekaua Teoso tiraõki aãkixinireë.

⁶ Erekari akamini amaposotakanisaaki, Teoso amanirekakanisaaki, Kristo ipina ate ïkapani. Iua ipina iketo õti manapi. ⁷ Atxiïti kãkiti ipina atão inakari kamakari ïkapani iua mapinakani ïkapani? Atxiïti !ipina iua ïkapani. Atxiïti kãkiti ipina ãti erekari kamakari ïkapani, iua mapinakani ïkapani? Atxiïti ipina iua ïkapani. ⁸ Teoso oerekaua ate, iua iteene tiritiniua ate, kotxi Kristo ipina ate ïkapani maerekati akamapanika anakasaaki.

⁹ Kristo ipinini kamaerekataua ate, ininiã uatxa Teoso apakapaua ate. Apikomoni Kristo kaminaua, kotxi Teoso !omanataikaua. !Imisiritaikaua. ¹⁰ Ate Teoso omanatakani anakasaakia, Teoso ãkiri ipina ate ïkapani. Ininiã Teoso mokaiakari !atxaikaua. Iua apakapaua. Iua apakapaua, ininiã amaerekani imaktxaka, ininiã aãuapininiika, kotxi iua õkitikaua auapininiika anini ïkapani Teosokata, kotxi Kristo auini auapika. ¹¹ Teoso kamari ikara ate ïkapani. Apikomoni iua kaminapanikauako ate, kotxi iua kamapoxokoni-taua, kotxi aãuïte Xesosi Kristo mikanapiriãua ate Teosomoni.

Adão, Kristo Pakini

¹² Maerekanitxi apoka itixi kiki ãtika xika, Adão inakori xika. Maerekati ikamakiti xika ipina. Ininiã ikinimane kãkiti ipina, kotxi ikinimane kãkiti kamari maerekati. ¹³ Teoso paniãtakiti iõkatsopatakori apokini apisapanika, kãkiti kamari maerekati, iuaritika Teoso !imisiritana ninoa maerekati ikamakitina xika, kotxi iuasaaki !isãpiretapanikari ipaniãtakiti. ¹⁴ Adão auakasaaki atoko, Moisesi auakasaaki manapi, iuasaaki Teoso paniãtakiti iõkatsopatakori !apokapanika, iuaritika ikinimane ipina. Atxiïti kãkiti !ikamari maerekati Adão maerekani atoko, kotxi iua !ikamari Teoso paniãtakiti, iuaritika ikinimane ipina. Kiki Adão inakori axinikasaaki, aimarotari iua Xesosi atoko ininiua.

¹⁵ Txamari aimarotari iua na Xesosi !atokoni itxaua, kotxi ãtika kiki maerekani xika, itori kãkiti ipina. Iua sikari ipïkitxi kãkitimoni. Kiki ãtipekana, Xesosi Kristopekana, iua sikari erekari Teoso siãkiti itori kãkitimoni imapinakanina ïkapani. Teoso siãkiti iïki !auari. !Erekari Adão sikakiti. Peerekari Xesosi Kristo siãkiti. ¹⁶ Kiki ãtika Adão inakori kamari maerekati. Ætinoka maerekati ikama, ininiã eereka Teoso sãpiretari imaerekani. Eereka Teoso misiritari iua. Teoso siãkiti !ikara atokoni itxa. Kãkiti maerekati itori ikamakasaaki, kiki ãtipekana Xesosi sikari Teoso siãkiti kãkitimoni, ininiã ikamaerekatana kãkiti. Iuasaaki imaktxakari ninoa maerekani. ¹⁷ Kiki ãtika, Adão inakori maerekani xika, Teoso txïkitakari ikinimane ipinini. ! Erekari iua kiki kamakiti. Æti kiki, Xesosi Kristo inakori kamakiti peerekari. Iua txïkitakari kãkiti ãkixinire katapara inini maerekati imakamakani ïkapani. Kãkiti ikara atoko inakari Teoso sikari ikinipoko erekari. Itori isika. Itxïkitakari iua atão inakari kamakari ininiua. Ia iparïka iïki !auari.

¹⁸ Adão kamari ātinoka maerekati, iuaritika iua maerekati txīkitakari Teoso misiritinina ikinika kākiti. Iua atokokana Xesosi kamakiti ātika txīkitakari Teoso kamaerekatinina kākiti ninoa ātipirika auini ĩkapani. Iuasaaki atāonoka ikamakiti. ¹⁹ Kiki ātika Adão inakori na kamari Teoso sākire iaōka, ininiā itxīkitakari kākiti itomaneri maerekati ikaminina. Kiki ātipekana Xesosi inakori kamari Teoso sākire iaōka, ininiā itxīkitakari kākiti itomaneri atāo inakari kamakani ininiuana.

²⁰ Teoso sikari ipaniātakiti iōkatsopatakori Moisesimoni. Iuasaaki kākiti imarotari maerekati itori ikamakitina, ininiā maerekanitxi apiaāpota, kotxi Teoso paniātakiti iōkatsopatakori auape. Maerekanitxi apiaāpota, iuaritika erekari Teoso sikakiti kākitimoni apiata. ²¹ Maerekanitxi txīkitakari kākiti ipinini. Erekari Teoso sikakiti kākitimoni txīkitakari kākiti auini ātipirika imaxipokakani tīkane, kotxi aāuīte Xesosi Kristo txīkitakari kākiti atāo inakari kamakari ininiuana. Ininiākara kākiti auapininiika, kotxi Xesosi Kristo ka-maerekatana.

6

!Anirekaikari Maerekati Akamini

¹ Ininiā erekari atxiīti apikomoni maerekati akamini, ikinipoko erekari Teoso sikakiti apiata auini ĩkapani? ² Konapitini. Teoso makatxakapekari amaerekani, kotxi iuasaaki !anirekaikari apikomoni maerekati akamini. Anireēkiti maerekati akamini xipope, kākiti ipinini atoko itxa ixipokini. Ininiā !apakata apikomoni maerekati akamini. ³ Apatxisatiko oerekari Kristo Xesosi nakitiakori aniniuana. Iuakata apinini atoko itxa apatxisatiko. Himarotapekari ikara. ⁴ Apatxisatiko oerekari Kristokata ikatakoni atoko aniniuana, ininiā !anirekari apikomoni maerekati akamini. Kristo iri Teoso posotiire ōkitikari imi, iuaīkana auāki inini ĩkapani. Peerekari iposotiire. Ininiā apatxisatiko oerekari Xesosi ōkitikiko atokokana Teoso ōkitikaua ate aāuini amaneri inini ĩkapani.

⁵ Aāuapika Kristokata, ininiā ātika atoko atxaua iuakata aāuini, ininiā Kristo ipinini atokokana mitxi aāuini xipope. Kristo iuaīkana auini atokokana, aāuini amaneri. Peerekari, kotxi aāuapika Kristokata, ātika atoko aniniuana iuakata. ⁶ Mitxi anireēkiti xipope, kotxi Kristo makatxakari amaerekani aamina ĩpiriāmitakari nopini ipīkasaaki ate ĩkapani. Ininiā mitxi anireēkiti posotiire !auaika. Ixipokaākapeka, kotxi mitxi anireēkiti maerekatinoka. Ininiā maerekanitxi nitiriakori atoko !atxaikaua. Aimarotari ikara. ⁷ Maerekanitxi na paniātaikari kākiti ipīkari.

⁸ Kristokata ipīkani atoko aniniā, aimarotari iuakata aāuini apaka. ⁹ Ipīkasaaki ōkitikaāka, ininiā !ipinaika. Aimarotari ikara. Ipīkitxi na kaposotiireikari iuaīkana Kristo ipinini ĩkapani. ¹⁰ Iua ipina maerekanitxi posotiire ixipokini ĩkapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireēkitinoka ikamini ĩkapani. ¹¹ Iua atokotxikana anireēkiti maerekati xipope. Uatxa !anirekaikari maerekati akamini. Uatxa aāuapininiika Teosokata, iua nireēkitinoka akamini ĩkapani, kotxi Kristo Xesosikata aāuapika.

¹² Ininiā na hāuiritapiri hīto paniātinii maerekati hīkamini. Na hīkamapiri maerekati hīto nireēkiti. ¹³ Na hāuiritapiri hīto kaminiri maerekati. Na hāuiritapiri hōki kaminiri maerekati. Na hāuiritapiri hinama kaminiri maerekati. Na hāuiritapiri hūako kaminiri maerekati. Na hīkamapiri maerekati hīto nireēkiti. Hīteka hīsikauako Teosomoni, kotxi mitxi ipīkani atoko hītxaua, eereka Teoso txīkitakai auāki iuaīkana hinini, ininiā hīsikari hīto ikinika Teosomoni. Atāo inakarinnoka hīkamako hōkiā, hinamaā, hūakoā, imakinika hītoā. ¹⁴ Uatxa maerekanitxi apatrāote atoko !itxaikauako.

Uatxa amisiritiko !auaika, Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, iuasaaki imakatzakari amisiritiko.

Atāo Inakari Nitiriakori

¹⁵ Ininiā atxiīti hītxano nota: “Maerekati makama, kotxi amisiritiko !auaika Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, imakatzakari amisiritiko. Ininiā makamari maerekati,” atxa atxiīti. Konapitini. ¹⁶ Himarotari, hāuiritiniāri kākiti paniātinii iua nireēkiti hīkamini, ininiā iua hīpatrāote atoko itxaua. Iua nitiriakori atoko hītxaua, kotxi hīkamari iua paniātakiti. Maerekanitxi hīpatrāote ininiāua, hīkamari maerekati, ininiā hīpina. Ininiā kona hāua Teosokata ātipirika. Teoso hīpatrāote ininiāua, iua paniātakiti hīkama, ininiā atāo inakarionoka hīkama. ¹⁷ Nitxari Teoso: “Erekapitikari atemoni pikamakiti.” Ikara atoko nitxari Teoso, kotxi mitxi maerekanitxi nitiriakori atoko hītxaua. Uatxa maerekanitxi nitiriakori !hītxaikaua, kotxi iteene hīkīpitari hōerekiko. ¹⁸ Teoso makatzakapekai hīte, ininiā uatxa maerekanitxi nitiriakori !hītxaikaua. Uatxa Teoso nitiriakori hītxaua, ininiā atāo inakarionoka hīkama. ¹⁹ Ikara atoko nitxa sākireta hītemoni, kotxi himarotari nitiritxi, patrāo pakini pirena. Himarotakiti poiāoka. Mitxi hāuiritari hīto kaminiri maerekati inireēkiti. Hāuiritari hīto apikomoni maerekati ikamaāpotini. Apiaāpota maerekati hīkamakiti. Iuasaaki hīto maerekanitxi nitiri atoko itxaua. Uatxa hīsikari hīto Teosomoni atāo inakari nitiri ininiua īkapani, ininiā hīkamariko atāo inakarionoka. Ininiā Teoso nakitiakorionoka hītxaua.

²⁰ Maerekanitxi nitiriakori hinakasaakiau, atāo inakari nitiriakori na hītxaua, ininiā atāo inakari na paniātai hīte atāo inakarionoka hīkamini. ²¹ Īkiripa erekari hāpakapa, maerekati mitxi hīkamakasaaki? Kona kapakaparei. Uatxa hīpētauata maerekati mitxi hīkamakiti xika. Maerekati kamiko xika kākiti ipina, ininiā kona aua Teosokata ātipirika. ²² Uatxa maerekanitxi na paniātaikai hīte. Uatxa Teoso nitiriakori hītxapekiau, ininiā hīkamari ikinipoko Teoso īkapani. Ininiā hāuapininiika hītxako Teosokata ātipirika. ²³ Maerekanitxi kākiti patrāote atoko itxa. Īkitxitari kākiti parīkatxi īki, txamari ipīkitxi itxaua parīkatxi īki. Teoso sikakiti atemoni ātiāo. !Aparīkauata Teoso sikakiti aāpakapini īkapani, iuaritika isikaua aāuini ātipirika inini īkapani, kotxi aāuīte Xesosi Kristo ipina ate īkapani.

7

Tanirauatakarō Atoko Atxa

¹ Nitiriakori, hīte hīkinika imarotari paniātakori iōkatsopatakori, ininiā himarotari nisākire. Kākiti auapanika inakasaaki, ikīpitariko paniātakori iōkatsopatakori. ² Noerekaiko hīte. Paniātakori iōkatsopatakori paniātaro sito okaikotini oītanirikata iua auapanika inakasaaki. Iua ipininiā, iua paniātakori na paniātaikaro oa. ³ Ōtaniri auapanika inakasaaki, ātikata oāuiniā, kanokarero otxaua. Ōtaniri ipininiā, paniātakori iōkatsopatakori na paniātaikaro oa, ininiā apakata ātikata oītaniriuatini. Ikara atoko oniniā, kanokarero !otxaua.

⁴ Nitiriakori, oa sito atokotxikana ate amakinika. Kristo ipina ate īkapani, ininiā Moisesi paniātakiti iōkatsopatakori kona paniātaikaua, kotxi uatxa Kristo nakitiakori atxaua. Uatxa Teoso ōkitikakiti Kristo nakitiakori atxaua. Iua nakitiakori atxaua, ininiā erekari akama Teoso īkapani. ⁵ Mitxi anireēkiti maerekati paniātaua maerekati akamini. Aīto nirekari maerekatinoka ikamini, kotxi paniātakori iōkatsopatakori txari: “Kona hīkamapiri maerekati.”

Ininiã iusaaki apiata anirekari maerekati akamini, kotxi maerekati-noka kamakani atxaua. Ininiã apina, ininiã kona aãuapika Teosokata. ⁶ Mitxi paniãtakori iõkatsopatakori nirekari ipaniãtiniua. Uatxa paniãtakori iõkatsopatakori na paniãtaikaua. Ikara kitxakari. Uatxa amaneri, kotxi uatxa aparĩkauata Teoso ĩkapani. Erekaru Matamatakoti oerekaua aparĩkauatini Teoso ĩkapani.

Teoso Paniãtakiti Iõkatsopatakori

⁷ Ininiã natokopa itxa uatxa axinikakiti? Teoso paniãtakiti iõkatsopatakori maerekati itxaua atxiĩti? Konapitini. Maerekati !itxaua. Teoso paniãtakiti iõkatsopatakori mauakanimako, nota !imarotamariko maerekati nikamini. Teoso paniãtakiti iõkatsopatakori txari:

Kona pinirekapiri ãti nakiti,

ininiã ãti nakiti ninirekiniã, nimarotari nikaminiri maerekati. ⁸ Maerekati xika na nota nirekari ikara Teoso paniãtakiti nikamini. Ininiã iteene ninirekari apanakini nakiti. Ninirekari apanakini nakiti, kotxi Teoso paniãtakiti iõkatsopatakori txari:

Kona pinirekapiri ãti nakiti.

Teoso paniãtakiti iõkatsopatakori mauakaniã, iusaaki maerekati !auari.

⁹ Teoso paniãtakiti iõkatsopatakori nimimarotakanisaaki, na nimarotari maerekati nikamini. Niuãkatari nãkixinire auãki inini. Teoso paniãtakiti iõkatsopatakori nimarotakasaaki, nimarotari maerekati nikamini. Iusaaki nimarotari nipinini nimaerekani xika. ¹⁰ Iusaakipeka nimarotari nãkixinire ipĩkari atoko inini. Teoso paniãtakiti iõkatsopatakori oerekari kãkiti erekari ikamini, iua auini ĩkapani. Txamari Teoso paniãtakiti iõkatsopatakori oerekano nota nipinini nimaerekani xika. ¹¹ Maerekati ninireẽkiti misirienetano. Imisirienetano, ininiã na nikamari Teoso paniãtakiti iõkatsopatakori iaõka. Ininiã nikamari maerekati. Ininiã maerekati xika nipina.

¹² Teoso paniãtakiti iõkatsopatakori !auari maerekati, kotxi Teoso kamari. Atãonoka itxa Teoso paniãtakiti. Erekaru. ¹³ Atxiĩti erekari txĩkitakano nipinini? Konapitini. Maerekanitxi txĩkitakano nipinini. Maerekanitxi txĩkitakano Teoso paniãtakiti iõkatsopatakori erekari nimakamakani, ininiã nikamari maerekati, ininiã iua maerekanitxi txĩkitakano nipinini. Ininiã aimarotari maerekanitxi kona xatiki apakata. Maerekatinoka, kotxi maerekanitxi txĩkitakano nipinini. Teoso paniãtakiti iõkatsopatakori oerekaua ikara atoko inakari.

¹⁴ Aimarotari Teoso paniãtakiti iõkatsopatakori iaxiti ĩkari ininiua. Txamari nota uaikirino. Maerekanitximoni vẽtxitakori atoko nitxaua, maerekanitxi nitiri atoko nininiua ĩkapani. ¹⁵ Na nimarotari nikamakiti, kotxi na nikamari notaka nireẽkiti. Nikamari nimanirekakiniti, nomanatakiti. ¹⁶ Ininiã maerekati nimanirekakiniti nikamakasaaki, iusaaki nimarotari Teoso paniãtakiti iõkatsopatakori ereka inini. ¹⁷ Ininiã na notani kamari maerekati. Maerekati nãkixinireẽ auakarira txĩkitakari nikaminiri iua maerekati. ¹⁸ Nimarotari erekari !auari nãkixinireẽ. Maerekatinoka aua nãkixinireẽ, kotxi ninirekari erekari nikamini, txamari !niposotari. ¹⁹ Na nikamari erekari ninireẽkiti. Nikamapikari maerekati nimanirekakiniti. ²⁰ Ininiã nimanirekakiniti nikaminiã, kona notani kamari. Maerekati nãkixinireẽ auakarira txĩkitakano iua maerekati nikamini.

²¹ Ininiã ia sãkiretxiti atão: Ninirekasaakiri erekari nikamini, maerekati-noka niposota nikamini. ²² Nãkixinireẽ iteene ninirekari Teoso paniãtakiti iõkatsopatakori iaõka nikamini. ²³ Txamari aua ãti ninireẽkiti niĩto ãki. Iua niĩto nireẽkiti nirekari ixipokiniri nãkixinire nireẽkiti. Iua niĩto nireẽkiti xika nikamari maerekati nireẽkitinoka. !Niposotari erekari nikamini. Kateia

āki iaxirikakoni atoko nitxa. ²⁴ !Erekano nota. Maerekati kamakarino nota. Kipa makatxakano, maerekati niito nireēkiti nimakamakani ikapani? Niito txikitakano nipinini. Kipa moianatano? ²⁵ Aāuīte Xesosi Kristokara moianatano. Iuara makatxakano nimapinakani ikapani. Peerekari Teoso, kotxi iua kamari ikara atoko nota ikapani.

Ininiā uatxa ia atoko inakari nisāpiretai. Nākixinireē ninirekari Teoso paniātakiti iōkatsopatakori nikamini. Txamari niitoā maerekanitxi nireēkitinoka niposota nikamini.

8

Erekari Matamatakoti Txikitakari Aākixinire Auāki Inini

¹ Ininiā uatxa Teoso !itxaikaua ate: “Maerekati hīkamakiti xika nimisiri-taiko hīte,” !itxaikaua ate, kotxi Kristo Xesosi nakitiakori atxapekaua. !Akamaikari aīto nireēkiti. Erekari Matamatakoti sikaposotiiretaua iua nireēkiti akamini. ² Erekari Matamatakoti nireēkiti akama, ininiā iua txikitakari aākixinire auāki inini, kotxi Xesosi Kristo nakitiakori atxaua. Erekari Matamatakoti makatxakano maerekanitxi nireēkiti nikamini, ininiā na nipina. ³ Aīto maerekani xika Teoso paniātakiti iōkatsopatakori !iposotari imakatzakiniri amaerekani, kotxi !aposotari akaminiri iua paniātakiti. Iuaritika Teoso makatzakari amaerekani, kotxi iua iokanatarari imi atemoni. Imi īto ate īto atoko, maerekati kamakari īto atoko itxa. Teoso iokanatarari imi atemoni ipinini ikapani, amaerekani imakatzakinini ikapani. Ininiā ixipokari maerekati posotiire aītoā auakari. ⁴ Teoso kamari ikara, ininiā Xesosi kamari ikinika Teoso paniātakiti iōkatsopatakori iaōka ate ikapani, kotxi ipaniātakiti atāo inakarinoa. Ininiā !akamaikari maerekati aīto nireēkiti. Akamari Erekari Matamatakoti nireēkiti.

⁵ Itotxi nireēkiti kamakani xinikapikari iūtona nireēkitinoka. Erekari Matamatakoti nireēkiti kamakani xinikapikari Erekari Matamatakoti nireēkitinoka. ⁶ Kākiti xinikiniāri iūto nireēkitinoka, ixinikakiti txikitakari iua ipinini, ininiākara kona auapika Teosokata. Kākiti aūritiniāri Erekari Matamatakoti txikitakiniri ixinikiniri Erekari Matamatakoti nireēkitinoka, iua auapininiika Teosokata. Erekaxinireri iua. ⁷ Kākiti xinikiniāri iūto nireēkitinoka, Teoso mokaiakariakori itxauana, kotxi !inirekarina Teoso paniātakiti iaōka ikaminina. !Iposotarina Teoso paniātakiti iaōka ikaminina. ⁸ Itotxi nireēkitinoka kamakani !iposotari ikamapoxokonitininirina Teoso.

⁹ Hītepekana, Erekari Matamatakoti hākixinire auiniā, hīkamari iua paniātakiti. !Hīkamari maerekati hīto paniātakiti. Erekari Matamatakoti kākiti ākixinireē mauakanisaaki, na Kristo nakitiakori !itxauana, kotxi Erekari Matamatakoti Kristo nakiti itxaua. ¹⁰ Hīto ipinapitikako maerekati xika, iuaritika hīxinire auākiri itxaua Kristo hākixinireē auiniā. Hīxinire auākiri itxaua, kotxi Kristo kamari atāo inakarinoa ate ikapani. ¹¹ Teoso ōkitikari Xesosi, iua ipīkasaaki. Erekari Matamatakoti Teoso nakiti hākixinireē auiniā, Teoso Kristo ōkitikakari, txikitakariko hīto ipinakari iuaīkana auāki inini, kotxi Erekari Matamatakoti Teoso nakiti aua hākixinireē.

¹² Ininiā nitariakori, auapitika akamakiti tīkane Teoso ikapani. !Auari akamakiti tīkane aīto nireēkiti akamini ikapani. ¹³ Hīto nireēkiti hīkaminiā, hīxinire ipīkari atoko itxa, ininiā ātipirika kona hāua Teosokata. Hamanainiāri Erekari Matamatakoti maerekati hīto kamakiti ixipokini, iusaaki hāuapika ātipirika Teosokata.

¹⁴ Erekari Matamatakoti nireēkiti kamakani, Teoso anaakori itxauana, kotxi Erekari Matamatakoti Teoso nakiti. ¹⁵ Iua Erekari Matamatakoti Teoso sikakiti hītemoni. !Itxikitakai nitiritxi kapīkareri hininiua. Itxikitakai Teoso anaakori hininiua. Erekari Matamatakoti posotiireē aākiritari aīri Teoso:

“Papai, niri,” atxari. ¹⁶ Erekaru Matamatakoti sãpiretaua aãkixinireẽ Teoso anaakori aniniua. ¹⁷ Teoso anaakori aniniãua, aãpakapariko erekaru Teoso nãkatakiti ate ãkapani. Kristo apakapari erekaru Teoso nãkatakiti iua ãkapani, ininiã ate apakapari iuakata. Kristo misiritaãkapeka. Ate misiritiko apaka auiniã Kristo sãkire aãuikini xika, Kristo ikinimane auite inakasaakiaua, ate apaka aua iuakata iuasaaki. Aãtamataru iua iotximere. Peerekaru iuasaaki iuakata aãuini.

Aãpakapariko Ikinipoko Erekaru

¹⁸ Uai itixi aãuakasaaki, aãtatsiirauata. Eereka ! axinikaikaru mitxi aãtatsiirauatini, kotxi Teoso oerekauako ikinipoko erekaru. Iuasaaki peerekaru. ¹⁹ Ikinipoko Teoso kamakiti iãtaparu ipoxokoniritika Teoso keto õti. Iuasaaki aimarotaru Teoso anaakori. ²⁰ Kotxi ikinipoko Teoso kamakiti misiritaãkapeka, ixipokaãpotini tãkane. Ikinipoko Teoso kamakiti ixinireka ! ixipokaãpota. Teoso txãkitakaru ikinipoko xipokaãpotini. Iuaritika aimarotaru, ipãkitxi xipokini õti apokapitikako. ²¹ Ikinika Teoso kamakiti iãtaparu iua õti. Iuasaakiko itixi amaneri itxauako. !Ixipokaika. Iuasaaki ikinika amaneri. !Ixipokaika. Teoso anaakori misiritiko !auaika. Peerekaru iuasaakiko.

²² Aimarotaru uatxapiikama ikinika Teoso kamakiti atatsiirauata, amarini tsii sito atatsiitini atokokana. ²³ Na itixi Teoso kamakitinanini atatsiirauata. Aãkixinire apaka akiripireta, kotxi anirekaru Teoso keto apokini. Iuasaaki iua apakapaua ate iua anaakori. Iuasaakiko aito amaneri isikaua. Iuasaakiko aito !kaxiporeikaru. Merepanika Teoso sikakiti auapeka atemoni, kotxi iua sikapekaru Erekaru Matamatakoti atemoni. ²⁴ Teoso makatxakapekaru amaerekaru, aãuikasaakiri isãkire. Ininiã aiãtaparu apikomoni isikaenetakiti atemoni. !Aãtamatapankaru isikaenetakiti, ininiã aiãtapapanikaru. Aãuikapitikaru isikaenetakiti isikiniua, ininiã atão aãuikiniri. ²⁵ Aiãtaparu aãpakapakiti tãkane. !Aãpakapapanikaru, iuaritika aiãtaparu apoxokoniritika, kotxi aimarotapitikaru ikara apokini.

²⁶ Erekaru Matamatakoti moianataua, kotxi na kataparaxinireua. !Aimarotaru aamanaãkiti tãkane, Teoso amisãkiretakasaaki. Iuaritika, Erekaru Matamatakoti misãkiretaru Teoso ate ãkapani. Asãkireẽ !aposotaru asãpiretiniri Teoso ikinika anireẽkiti, ininiã Erekaru Matamatakoti misãkiretaru Teoso ate ãkapani. Ipinimoni itxa isãpiretiniri Teoso. Kãkiti sãkireẽ !isãkirauata Teosokata. ²⁷ Teoso imarotaru kãkiti ãkixinire, ininiã iua imarotaru Erekaru Matamatakoti xinikakiti, kotxi Erekaru Matamatakoti misãkiretaru Teoso, Teoso nakitiakori ãkapani. Erekaru Matamatakoti amanaãri Teoso, Teoso nireẽkiti ikaminana inakitiakori.

Teoso Iteene Tiretiniua

²⁸ Aimarotaru ikiniõtika erekaru ikaminaua ate, kotxi iua tiretakaru, iua mereẽkini atxaua ate. Iuaritika aãtatsiirauatini auapitika. Iuaritika iuasaaki apaka erekaru ikaminaua. Iua mereẽua, kotxi inirekaru imereiniua. ²⁹ Itixi kamiko apisapanika Teoso imarotapekaua ate. Iua mereẽpekaua ate, iua anaakori kaiãopokori aniniua ãkapani. Imereẽpekaua, imi Xesosi atoko aniniua ãkapani. Ininiã Xesosi aitaru apiaru. ³⁰ Teoso akiritana imereẽkini. Apaka ikamaerekatana iua mereẽkini. Apaka itanapoko erekaru isika ninoa ikamaerekatakinimoni.

³¹ Teoso kamaru ikinipoko ikara erekaru ate ãkapani, ininiã natokopa itxa axinikakiti? Teoso katapararu moianatapitikaua, ininiã ate omanatakaru tapara poiãoka. ³² Teoso sikaru ikinipoko atemoni. Imi apaka isika atemoni, kotxi ipina ate akinika ãkapani. Isikaru imi atemoni, ininiã aua atxiiti iua masakakiniti atemoni? !Auaru. Ikinipoko erekaru isikapitikaua atemoni. Ikarone !auaru. ³³ Aua atxiiti Teoso mereẽkini maerekaru sãpiretakaru? !Auaru.

Teosora sãpiretari ninoa maerekani mauakani, kotxi iua kamaerekatapekana ninoa. ³⁴ Aua atxiĩti Teoso mereẽkini misiritiko sãpiretakari? !Auari. Kotxi Kristora misãkiretari Teoso ate ĩkapani, kotxi Teoso ikikomoni auakari itxaua. Iua ipina ate ĩkapani, ininiã eereka Teoso õkitikari iua, auapika inini ĩkapani. Iuara misãkiretari Teoso ate ĩkapani. ³⁵ Ininiã kipa atxiĩti iotokakatari Kristo turetiniua? !Auari, kotxi amaxikikosaaki, Kristo turetapanikaua. Amauarenisaaki, Kristo turetapanikaua. Amisiritikosaaki, Kristo turetapanikaua. Natxi auakasaaki, Kristo turetapanikaua. Amamãkanisaaki, Kristo turetapanikaua. Monõkori auakasaaki, Kristo turetapanikaua. Neenamtxi auakasaaki, Kristo turetapanikaua. ³⁶ Teoso sãkire iõkatsopatakoru txari:

Pisãkire aãuikini xika, pamonõkoniri ikiniõtika. Aõkiko monõkoni auapika. Soti auĩte apanakini okini atoko, apanakini nirekari okiniua ate, itxa Teoso sãkire iõkatsopatakoru. ³⁷ Maerekati ikara atoko aua, iuaritika iteene akãiata, kotxi atiretakiri sikataparataua. ³⁸ Ia nimarota. Kristo turetiniua iotokakakari !auari. Apĩkasaaki, itiretapanikaua. Aãuapanika inakasaaki, itiretapanikaua. Teoso nitiriakori iaxitikini !iotokakari itiretiniua. Satanasi nitiriakori !iotokakari itiretiniua. ĩkorasaaki auakani, katana auakani apaka !iotokakari Kristo turetiniua. !Auari posotiiretxi, Kristo turetiniua iotokakakari. ³⁹ Iaxiti apiko nopinixiti auakani, iaxiti patapi auakani apaka, !iotokakari Kristo turetiniua. Hinitiniãri Teoso turetiniua iotokakakari, !hãpokari. Hinitiniãri ikinika Teoso kamakiti auiniãtaã, iuaritika kona hãpokari Teoso turetiniua iotokakakari. !Auari. Aãuĩte Kristo Xesosi oerekaua Teoso iteene turetiniua.

9

Teoso Mereẽna Xoteoakori Inakitiakori ĩkapani

¹ Atão nisãkire. Kristo nakiti nitxaua, ininiã na nisãpiretari misirieneretxi. Nãkixinireẽ nimarotari nisãkire atão inini, kotxi Erekari Matamatakoti oerekari nisãkire atão inini. ² Ia nisãkire atão. Iteene nimatinaniuatapika. Nãkixinireẽ maerekaxiniretinoka nitxa, ninirimane Kristo sãkire mauikakani xika. ³ Ninirekamari Teoso misiritinino nota, ninoa nitariakori imamisiritakani ĩkapani. Ninirekamari Kristo manirekakanino nota, ninirimane Kristo nakitiakori ininiua ĩkapani. Niposotiniãri ikara atoko nikamini, nikamari ninirimane ĩkapani. Txamari !niposotari. ⁴ Ninirimane Isaeo apika mekaniriakori itxauana. Teoso nirekana ninoa iua anaakori ininiuana. Teoso oerekari iposotiire ninoamoni. Isãpiretana ninoa ikamaenetakiti ninoa ĩkapani. Isikari ipaniãtakiti iõkatsopatakoru ninoamoni. Oerekana ninoa kiiniri atão ikaminina, iuakata isãkirauatakasaakina. Teoso sãpiretana ninoa ikamakiti tĩkane ikinimane kãkiti ĩkapani. ⁵ Ninirimane apika atokiriakorini Apraãoma, Isakima, Isaeoma pakini. Kristo uaimoni iponaniãkasaaki, ninoa apiko mekaniri itxaua, iuaritika Teoso itxaua. Ikinimane auĩte itxaua. “Peerekai,” matxari iua ãtipirika. Ameẽ.

⁶ Atxiĩti Teoso kona kamari ikamaenetakiti Isaeo apika mekaniriakori ĩkapani? Ikamapitikariko. Txamari kona ikinikani Isaeo apika mekaniriakori Teoso nakiti !itxauana. ⁷ Kona ikinikani Apraão apika mekaniriakori atão Teoso anaakori !itxauana, kotxi Teoso txari Apraão:

Papika mekaniriakori atão inakani Isaki mekaniriakori itxauana.

⁸ Teoso sãpiretari Isaki auini, iua auini apisapanika. !Isãpiretari ãti Apraão ãkiri Isimaeo inakori auini, iua auini apisapanika. Isimaeo iponaniã, kotxi Apraão sirĩka Isimaeo inorokata. Ininiã kãkiti Isimaeo atoko, Teoso anaakori !itxauana. Teoso sãpiretari Apraão iua keene inini, ininiã isikaenetakininoka

atão Apraão apika mekaniriakori itxauana. ⁹ Teoso sikaenetari Apraão keene inini. Itxari:

Niketo manapi nikanapiriãko. Iuasaaki Sara keeneroko. Kiki oenetako.

¹⁰ Apikomoni nisãpiretai. Hepeka anaakori iri ätika. Aãpika atokirini itxaua Isaki inakori. ¹¹⁻¹² Oa anaakori iponaniã ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sãpiretaro oa:

Merepanika iponaniãkari eereka iponaniãkari nitiri itxauako.

Ininiã Teoso mereëri iua eereka iponaniãkari Xakoo inakori apiari inini ïkapani, iua auini apisapanika. Ininiã na Xakoo kamakitini txïkitakari Teoso mereiniri iua. Teoso mereëri iua, kotxi inirekari ikara atoko inini. ¹³ Teoso sãkire iõkatsopatakori txari:

Xakoo nitireta. Isao nomanata.

¹⁴ Ikara atoko ininiã, kanatokopa itxa axinikakiti? Atauako Teoso na kamari erekari? Ikamapitikari erekari. Ätipirika Teoso kamari erekari.

¹⁵ Teoso txari Moisesi:

Ninirekiniãri äti niamonïkini, niamonïkari. Ninirekiniãri äti nimoianatini, nimoianatari.

¹⁶ Ikara atoko ininiã, anireëkiti !itxïkitakari Teoso mereiniua. Akamakiti ! itxïkitakari Teoso mereiniua. Imereëua, kotxi iamonïkaua. ¹⁷ Teoso txari Paraoo isãkire iõkatsopatakoriã:

Nota txïkitakai auïtetxi pininiua, niposotiire noerekini ïkapani, niuãka ikini itixiti auakani imarotini ïkapani,

itxa Teoso sãkire iõkatsopatakori. ¹⁸ Ininiã Teoso nirekiniãri iamonïkiniri äti, iua amonïkari iua. Apaka inirekiniãri, itxïkitakari äti äkixinire kaikoxinire inini, Teoso nireëkiti imanirekakani tïkane.

Teoso Omanãkare, Iamonïkare Pakini

¹⁹ Atxiïti hïte txano nota: “Teoso ikara atoko ininiã, na ate xikani kaikoxinireua ate. !Aposotari akaminiri Teoso manirekakiniti,” atxiïti hïtxano.

²⁰ Txamari !apakata ia atoko hinini. Kiriparai hïte ikara atoko ina sãkiretakani Teosomoni? Kãkiti hïtxaua. Teoso kamakiti pitxaua. Atauako kamakori posotatari ikamakirimoni: “Kinirepa pikamano nota ia atoko ninini?” ! Apakata ikara atoko hinini hïkamakirimoni. ²¹ Hïxinikari kiki tiitxi kamakari. Ikamari inireëkiti. Atxiïti äti poriï katsariã, ikamari ipi kopiti. Atxiïti ianaka ikamari äti kopiti, peereri inini, kiiniri ïkapani. Atxiïti ätipekana ikama patimari poião ereri, ikiniõtika iãriã iãtiko ïkapani.

²² Ikara atoko itxa Teoso kaminiri kãkiti. Teoso kamari apanakini kãkiti Teoso omanãkare imarotinina ïkapani imaerekanina xika. Iuasaaki oerekana iposotiire imarotininirina ïkapani. Teoso omanatana ninoa, iuaritika imïteenekana. Kona uatxa ixipokana ninoa. Txamari iketo manapi ixipokanako ninoa. Uatxa imïteenekapanikari ninoa maerekani. ²³ Apaka ikamari apanakini iua amonïkakini. Uatxa imïteenekari iua omanatakini maerekani, kotxi inirekari iua amonïkakini imarotininiri iua ereka inini, kotxi peerekari iua. Iteene itiretari iamonïkakini. Ikamana ninoa erekari isikakiti apakapinina ïkapani. ²⁴ Hïte, ate pakini, iua amonïkakini atxaua. Iua akiritakini atxaua. Na Xoteonanini akirita. Akiritana Xoteo minakanuia apaka. ²⁵ Teoso sãkire iõkatsopatakori, Oséia iõkatsopatakitiã, Teoso sãpiretari ikara. Itxari:

Kãkiti mitxi nota nakitiakori minakonimoni nitxako: “Uatxa nota nakitiakori hïtxapekauako.” Ninoa mitxi nimatiretakinitimoni nitxako: “Uatxa nota tiretakini hïtxapekauako,” nitxako.

²⁶ Mitxi Teoso txana ninoa: “Na nota nakitiakorini !h̄txaua.” Ikara Teoso s̄akiretiniātaā, iuaātaātxikana: “Teoso ātipirika auāki inakari anaakori h̄txaua,” inaāka ninoamoni, itxa Teoso s̄akire iōkatsopatakori.

²⁷ Apaka Teoso s̄akire iōkatsopatakoriā, Isaía txari: Isaeo apika mekaniriakori kaiāopokori, potxoari uiniti kipatxite atoko itxana, txamari poiāonoka makatxakaāka imapinakani ĩkapani.

²⁸ Patimari Teoso xipokiniri iparĭka imisiritiniri k̄akiti imaerekani xika, itxa Isaía. ²⁹ Mitxipeka Isaía txari:

Apiananiri kaposotiireri n̄katari apanakini aāpika mekaniriakori imapinakani ĩkapani. Ininiā atenape auapanika. Teoso manĭkatakanimauako, axipokapiimako k̄akiti Sotoma sitatxiti auakani xipokini atoko, k̄akiti Komoha sitatxiti auakani xipokini atoko atxapiimako, itxa Isaía s̄akire.

Xoteo Mauikakaniri Teoso S̄akire

³⁰ Ininiākara aimarotari ia: Xoteo minakaniua manitakanisaakiri Teoso txĭkitakinina atāo inakari kamakani ininiuana, iusaaki Teoso txĭkitakana atāo inakari kamakani ininiuana, kotxi auikarina Teoso s̄akire. ³¹ Txamari Xoteoakori nitaāpotari paniātakori ninoa atāo inakari kamakani txĭkitakakari, txamari !apokarina. ³² Kinirepa !apokarina ikara? Kinirepa Teoso na txĭkitakana ninoa atāo inakari kamakani ininiuana? Kotxi !auikarina is̄akire. Inirekarina iparĭkana txĭkitakinina atāo inakari kamakani ininiuana. !Inirekarina auikarinina Xesosi s̄akire. Ninoamoni Xesosi kai kimapori nopini auakari atoko itxa, kotxi kai xika k̄akiti mākitita. ³³ Teoso s̄akire iōkatsopatakori kitxakapirĭkari s̄āpiretari ia kai pirena. Itxari:

Pikenakotariko ia: Nota iokanatakiti k̄akitimoni kai atoko itxa. Nitakari iua kai Siāo sitatxitiā Xoteoakori kimaporeē. Iua kai xika k̄akiti mākitita. Iua kai xika k̄akiti irika. Iuaritika iua s̄akire auīākani !ipētauata nota apisatoō.

10

¹ Nitariakori, n̄kixinireē iteene ninirekari Teoso makatxakiniri niniriman maerekani, Isaeo apika mekaniriakori maerekani. Nimis̄akiretari Teoso ninoa maerekani makatxakiko ĩkapani. ² Nimarotari niniriman iteene nirekiniri iparĭkauatini Teoso ĩkapani. Txamari ninoa kerokari, kotxi !imarotarina atāo iparĭkauatini Teoso ĩkapani. ³ !Imarotarina Teoso txĭkitakiniri k̄akiti atāo inakari ikamini. Ninoaka nirekamari atāo inakari ikaminina, Teoso apakapininina ĩkapani. Ininiā !auiritarina Teoso txĭkitakinina ninoa atāo inakari ikaminina. ⁴ Kristo kamari ikinipoko Teoso paniātakiti iōkatsopatakori iaōka, ininiā iuanoka txĭkitakari ikinimane k̄akiti iua s̄akire auīākani atāo inakari ikaminina.

Apiananiri Akiritakani

⁵ Kitxakapirĭka Moisesi s̄āpiretari atāo inakari akamini Teoso paniātakiti. Iusaaki itxari: Ikinika Teoso paniātakiti iōkatsopatakori ikiniōtika pikaminiā, pauapininiiika pitxako,

itxa Moisesi s̄akire. ⁶ Txamari !aposotari ikara atoko akamini. Aāuikasaakiri Xesosi s̄akire, iua txĭkitakaua atāo inakari akamini. Ininiākara !apakata p̄kixinireē pixinikiniri: “Kipa atxiīti posotari iaxiti apiko nopinixitimoni isini, Kristo notamoni iminini ĩkapani?” ⁷ !Apakata p̄kixinireē pixinikiniri: “Kipa atxiīti posotari ipĭkani auiniātaā isini, Kristo notamoni iminini ĩkapani?”

⁸ Xesosi s̄akire auape h̄temoni. Na h̄sa ātiātaā iua s̄akire himarotini ĩkapani. Hinamaāpekari. H̄kixinireēpekari. Xesosi s̄akire auikiko as̄āpiretapikari k̄akiti.

Ia atoko asāpiretari kākiti: ⁹ Pinamaã, “Xesosi niauĩte” pininiã, pākixinireẽ pauikiniãri Xesosi ipinini Teoso õkitikiniri iua, iusaaki pimaerekani makatxakaãkako. ¹⁰ Kotxi aãkixinireẽ Xesosi sãkire aãuikiniã, ikamaerekataua. Anamaã “Maerekati kamakarino nota,” aniniã, iua makatxakari amaerekani.

¹¹ Teoso sãkire iõkatsopatakori txari:

Iua sãkire auiãkari pētauatini !auari.

¹² Iua Kristo sãkire auiãkari atxiĩti Xoteo itxaua. Atxiĩti Xoteo minakatiua itxaua. Xoteo auĩte itxaua Kristo. Xoteo minakaniua auĩte apaka itxaua. Ikinimane auĩte itxaua Kristo Apiananiri. Isikari itanapoko erekari ikinimane iua akiritakanimoni. ¹³ Teoso sãkire iõkatsopatakori txari:

Ikinimane akiritiniãri Apiananiri uãka imaerekanina imakatxakini ĩkapani, iusaaki imakatxakaãkako imaerekanina.

¹⁴ Kiãtokopa itxa ninoa akiritiniri iua, isãkire imauikakanisaaki? Kiãtokopa itxa ninoa auikiniri isãkire, imakenakotakanisaakirina? Kiãtokopa itxa ninoa kenakotiniri isãkire, imasāpiretakonisaakina? ¹⁵ Kiãtokopa itxa Teoso iokanapirena sãpiretiko, ate maiokanatakaniãri iua sãkire sãpiretakani kãkitimoni? Teoso sãkire iõkatsopatakori txari:

Erekapitikari Teoso iokanapirena erekari sãpiretakani apokini kãkitimoni, kotxi isãpiretarina Teoso kamaerekaxiniretiniri kãkiti. Isãpiretarina erekari Teoso sikakiti kãkitimoni. Ikara iminapiretakitina kamapoxokonitari kãkiti.

¹⁶ Txamari na ikinimane kãkitini auikari Teoso iokanapirena erekari. Kotxi kitxakapirĩka Isaía txari:

Apiananiri, asāpiretamari piokanapirena kãkitimoni, txamari !auikarina, itxa Isaía. ¹⁷ Kãkiti kenakotakasaakiri Teoso iokanapirena, Teoso txĩkitakari kãkiti auikiniri isãkire. Kristo sãkire akenakotakasaaki, akenakotari Teoso iokanapirena.

¹⁸ Txamari nota pimaã: “Atauako Xoteo kona kenakotari Teoso iokanapirena?” Ikenakotapitikarina, kotxi Teoso sãkire iõkatsopatakori txari: Iaxiti apiko nopinixiti auakari oerekari Teoso ikini itixiti auakani. Teoso sãkire atoko itxa iaxiti apiko nopinixiti auakari oerekakiti.

¹⁹ Iuaĩkana nipimaã: “Atauako Xoteo !imarotari Teoso iokanapirena?” Imarotapitikarina. Moisesi sãpiretapekari Teoso sãkire. Itxari:

Nimakatxakari Xoteo minakaniua maerekani, ininiã nitxĩkitakaiko hĩte hĩxikotinina ninoa mitxi nota nakitiakori minakaniua. Nitxĩkitakai hĩte homanãkarauatini, ninoa mitxi mimaroreni xika.

²⁰ Isaíapekana sãpiretari Xoteo minakaniua pirena. Isãpiretari Teoso sãkire itaparaxinireritika:

Teoso txari: “Ninoa nota manitakani aõkitano nota. Nimotika nota makiritakanimoni.”

²¹ Apikomoni isãpiretari Teoso sãkire Xoteo kamakiti:

Teoso txari: “Ikiniõtika namanaãri ninoa kanapiriini notamoni, txamari ! ikĩpitarina nisãkire. !Ikamarina nisãkire iaõka. Inireẽkitinoka ikamana.”

11

Xoteo, Teoso Sãkire Auiãkani

¹ Ininiã nipimaã: “Atauako Teoso !inirekaikari Xoteoakori?” Inirekapitikana. Nota apaka Xoteo nitxaua. Apraão apika mekaniri nitxaua. Pēxamiĩ apika mekaniri nitxaua. ² Teoso !itakanapari Xoteoakori. Iua mereẽna ninoa itixi kamiko apisapanika. Himarotari Teoso sãkire iõkatsopatakori, Eríasi tsoatakasaaki Teosomoni Xoteo maerekani isãpiretakasaaki. ³ Iusaaki Eríasi txari:

Apiananiri, ninoa okapekari kākiti pisākire sãpiretakani. Ikapirinikarina amesa pinakiti pitemoni sikakori takikoãtaã. Notanoka pisākire sãpiretakarino auapanika. Ninoa asikatikinitano nota okinino ïkapani, itxa Eríasi. ⁴Kanatokopa Teoso apakapapiretari Eríasi? Teoso txari:

Kona pitenanini auikari nisākire. Nota nĩkatari setxi mio kikiakori nota nakitiakori. Ninoa kona teosonetari kākiti kamakiti Pao inakori. Kona ikapotoreëkauana iua apisatoõ,

Teoso txari Eríasi. ⁵Ikara atokotxikana uatxa. Aua apanakini kākiti Teoso mereëkini. Imereëna ninoa, kotxi iua nirekari ikinipoko erekari ikaminina ninoa. ⁶Maerekati kamakani kākiti, iuaritika Teoso mereëua ate. Isikari ikinipoko erekari ate ïkapani maxikatiĩka. Aparĩka !itxĩkitakari iua sikiniri ikinipoko erekari atemoni. Aparĩka txĩkitakiniãri ikinipoko erekari isikiniua, ininiã kona maxikatiĩka isikarauata atemoni.

⁷Ininiã kanatokopa atxa asākire apikomoni? Xoteoakori kona apakapari inireëkitina. Inirekarina Teoso apakapinina ninoa erekarini ininiuana. Teoso mereëkininoka apakapari ikara inakari. Apanakinipekana Teoso ! auirita atão imarotinina. Mõsiãreni atoko itxana. ⁸Teoso sãkire iõkatsopatakori txari:

Teoso txĩkitakari ninoa ãkixinire imakakari atoko inini, iua sãkire imimaro-takanina ïkapani. Kokipitikamana, iuaritika !atamatarina Teoso kimapore. Kakenakokipitikamana, iuaritika !inirekarina Teoso sãkire ikĩpitinina. Uatxapiima ikara atoko itxapanika,

itxa Teoso sãkire iõkatsopatakori. ⁹Kitxakapirĩka Tavii txari Teosomoni:

Ninoa kiena kaiãopokori. Inipokotakasaakina, iuãkatarina pite apokaerekatina ninoa, kotxi kaiãopokori ikienana. Ikienana takapiri atoko itxa imaĩkinina ninoa. Itxĩkitakana ikerokinina. Ikara xika ninirekari pimisiritinina.

¹⁰Ninirekari ninoa mõsiãreni atoko ininiuana, ininiã na atão atamatarina pikimapore. Kākiti tiitxi minari porikitakani atoko pitxĩkitakanako ninoa ãtipirika,

itxa Tavii sãkire.

Xoteo Minakaniua Maerekani Makatxakiko

¹¹Iuaĩkana nipimarauata: “Atauako Xoteoakori maerekani xika Teoso xipokana ninoa?” Konapitini. Xoteoakori kamari maerekati, ininiãkara Teoso sãpiretari Xoteo minakaniua imaerekanina imakatzakini, Xoteo xikotinina ïkapani, iuaĩkana Teosomoni ikanapiriinina ïkapani. ¹²Xoteoakori kamari maerekati, ininiãkara Teoso sikari erekari kiĩkiri apanakini itixi auakanimoni. Xoteo mapakapakinini Xoteo minakaniua apakapa erekari kiĩkiri. Ininiã Xoteo kanapiriãkasaaki Teosomoni, iusaaki apiaerekata Teoso sikakiti kãkitimoni.

¹³Uatxa nota misãkiretai hĩte Xoteo minakaniua, kotxi Teoso iokanatano nota hĩtemoni isãkire nisãpiretini ïkapani. Niuikari hĩtemoni niokanatiko.

¹⁴Ikara atoko ininiã, atxiĩti ninirimane Xoteo xikotai hĩte, ininiã atxiĩti apanakini ninoa kanapiriã Teosomoni, imaerekanina Teoso makatzakini ïkapani. ¹⁵Teoso takanapakasaakiri Xoteo, iua apakapari Xoteo minakaniua, ininiã ninoa Xoteo minakaniua kanapiriã Teosomoni. Teoso iuaĩkana apakapakasaakiri Xoteoakori, iusaakiko peerekari. Ipĩkani iuaĩkana auãki inini atoko itxako.

¹⁶Komiri akamakasaaki, ipixini Teosomoni asikasaaki, aimarotari ikinipoko iua komiri iua nakiti ininiuua. Aamina kotsa Teoso nakiti ininiã, imina pori apaka iua nakiti. ¹⁷Xoteoakori oriva mina takakori atoko itxa, takakori Teoso nakiti. ãtikaka ipori kapatakaãka. Oriva itopakiri pori apaãka. Iapitaka inaãka ikapatakikoãtaã. Aneë takari katiã. Takari

sikakienatari itopakiri pori. Hite Xoteo minakaniua iua oriva itopakiri pori atoko hitxaua. Hāpakapari Teoso sikakiti, kotxi hite apotiitaua Xoteoakorikata, Teoso nakitiakorikata. ¹⁸ Hite Xoteo minakaniua, kona hūikapeua Teoso apakapinii hite. “Iua aāpori kapatakiko atoko, Teoso takanapana Xoteoakori, ate apakapini ikapani,” kona hitxape, kotxi aāpori atoko hitxaua. Na aāpori sikataparatarari aākotsa. Aākotsa sikataparatarari aāpori. Ininiā hite apakapari Teoso sikakiti, kotxi hāpotiitaua Xoteokata.

¹⁹ Atxiiti hite Xoteo minakaniua txano nota: “Iua aāpori kapatakaākori atoko Teoso takanapari Xoteoakori. Āti aāpori iapitakiko atoko, Teoso apakapaua ate,” hitxano atxiiti. ²⁰ Atāopitikara. Teoso takanapari Xoteoakori, kotxi ninoa !auikari isākire. Iua apakapai hite, kotxi hite auikari iua sākire. Iuaritika !hūikapeua ikara atoko hinakasaaki. Erepaniko. ²¹ Teoso takanapari Xoteoakori, takari pori sauakakori atoko. Ininiā erepaniko, kotxi itopakiri aāpori atoko hitxaua. Atxiiti āti ōti okanapai hite apaka.

²² Aimarotari katiraōkiri ininiua Teoso. Aimarotari apaka kataparaxinireri ininiua. Kataparaxinireri iua, kākiti kamakasaakiri maerekati. Kati-raōkiri iua, itiraōki hinirekasaaki. Itiraōki himanirekakaniā, hite apaka mapara hōkaāka, iua aāpori sauakakori atokokana. ²³ Xoteo takanapiniāri imauikakaniri Xesosī sākire, auikiniāri iuaikana isākire, Teoso iuaikana mikanapiriāna, kotxi Teoso kaposotiireri ikara atoko ikamini. ²⁴ Hite itopakiri pori sauakakori takarimoni iapitaākori atoko hitxaua. Kona ixinireka aua ikara atoko. Pamimari ikara atoko. Xoteo atāo oriva takakori atoko itxauana. Ininiā na kamimari mitxi auiniātaā iuaikana Teoso takinina ninoa, iuaikana imikanapiriinina ninoa iuamoni.

Xoteo Maerekani Makatxakaākapanikako

²⁵ Nitariakori ninirekari himarotiniiri apanakini mimarotakiniti, ininiā na hūikaua. Xoteo !inirekari auikiniri Teoso sākire uatxa, iuaritika na ikara atoko !itxapani ātipirika. Ikini itixiti auakani Teoso nireēkini Xoteo minakaniua kanapiriākasaaki Teosomoni, iusaakiko Xoteo kanapiriāko Teosomoni. ²⁶ Ininiā iusaaki ikinimane Xoteo kanapiriāko Teosomoni. Iusaaki Teoso makatxakari ninoa maerekani. Teoso sākire iōkatsopatakori kitxakapirīka auakari ikara atoko itxa. Itxari: Xoteo itxauako maerekanitxi makatxakakari. Imakatxakariko ikinika maerekati Xoteoakori kamakiti, Teoso manirekakiniti. Iusaaki Teoso nireēkitinoka inirekanako.

²⁷ Nimakatxakariko maerekati ninoa kamakiti, kotxi kitxakapirīka nika-maenetari ikara atoko inakari, itxa Teoso sākire iōkatsopatakori.

²⁸ Xoteoakori !inirekari Teoso iokanapirena erekari, ininiā Teoso takanapana ninoa. Ininiā Teoso iokanapirena erekari sāpiretaāka hite Xoteo minakonimoni. Uatxa Teoso mokaiakariakori atoko itxauana Xoteoakori, iuaritika Teoso mereēna ninoa. Apraāo, Isaki, Xakoo pakini apika mekaniriakori itxauana, ininiākara Teoso tiritapanikana ninoa. ²⁹ Teoso kona mamakari isākire. Kākiti iua mereēkini ātipirika iua mereēkini itxauana. Isiākiti erekari kākitimoni !imakatxaka iuaikana. ³⁰ Hite Xoteo minakaniua kitxakapirīka !hīkīpitari Teoso sākire, iuaritika uatxa Teoso amonīkai hite, kotxi Xoteo kona kīpitari Teoso sākire uatxa. ³¹ Uatxa Xoteoakori kona kīpitari Teoso sākire. Teoso amonīkapekai hite Xoteo minakaniua, ininiā Teoso iuaikana amonīkanako Xoteoakori apaka. ³² Ikinimane kākiti na kīpitari Teoso sākire. Kona aposotari akīpitiniri Teoso sākire. Teoso txīkitakaua ikara atoko anini, kotxi inirekari aimarotiniri maerekati kamakani aniniua, iuaritika !imisiritaua. Iamonīkaua.

Peerekari Teoso

³³ Peerekari Teoso. Atãonoka ikama. Paimatireri iua. Kãkiti !imarotari ikamakiti tĩkane. Kãkiti !imarotari inireẽkiti tĩkane. ³⁴ !Kimarotikori Teoso xinikakiti. !Kõtãkikikori Teoso. ³⁵ Teosomoni ikinipoko aua, ininiã kipa asika atxiĩti iuamoni? Asikiniri !auari. Ininiã !auari ate nakiti, iuaĩkana Teoso sikiniua ĩkapani. ³⁶ Kotxi Teosokara kamari ikinipoko. Ikinipoko aua Teoso posotiireẽ. Ikamari ikinipoko iua ĩkapani. Ātipirika matxariko Teoso: "Peerekai pite." Ameẽ.

12*Teosomoni Sikakori Auãkiri*

¹ Ininiã nitariakori Teoso amonĩkapitikaua. Ininiã nota iteene õtãkikai hĩte. Hĩteka hĩsikaua Teosomoni. Teosomoni sikakori auãkiri atoko hĩtxauako. Ininiã iua nakitinoka hĩtxaua. Ikara atoko hĩkaminiã, Teoso apokaerekatari. Ikara atoko inakari akaminari Teoso, ikara atão. ² !Hĩkamapinikariko Teoso sãkire mauĩãkani kamakiti atoko. Hãuiritariko Teoso txĩkitakiniri hĩxiniãkiti ereka inini, ininiãkara ipinipo hĩtxako. Iuasaakiko himarotari Teoso nireẽkiti. Himarotari Teoso nireẽkiti ereka inini. Himarotari hĩkamakiti tĩkane iua apokaerekatini. Himarotari atão hĩkamini.

³ Teoso sikari ikinipoko erekari notamoni, ininiã nisãpiretari iua sãkire hĩtemoni. Ininiã nota õtãkikai hĩte hĩkinika. Na hũikapeua. Hĩteka atão himarotauako. Hĩteka hãtamakauako. Teoso txĩkitakai hãuikiniri isãkire. Iteene hãuikiniãri iua sãkire, iteene hĩteka himarotaua. ⁴ Kãkiti ĩto ãtika, iuaritika ĩtotxiã auakari kaiãopokori. Aua ikanoke, itapike, oki, ikenakoki txaãpota. Ikinika iparĩka aua. Ikanoke parĩka ãtião. Oki parĩka ãtião. Itxaãpota. ⁵ Iua atokokana atxa. ĩtotxi ãtika atoko atxa, iuaritika itoua ate. Kanoketxi, tapiketxi, okĩtxi, kenakokitxi, ĩtotxiã auakari atoko ate. Kristokata aãpotiĩtaua. Anakititakakaua. ⁶ Nota parĩka Teoso ĩkapani ãtião. Āti parĩka Teoso ĩkapani ãtião. Āti parĩka Teoso ĩkapani ãtião, itxaãpota. Teoso sikari erekari ikini- napemoni, ikara iparĩka ikamini ĩkapani. Atxiĩti Teoso sikaimaroretai iua sãkire apanakinimoni pisãpiretini ĩkapani, ininiãkara Teoso sãkire pauikini iaõka pisãpiretari Teoso sãkire kãkitimoni. ⁷ Teoso sikaimaroretiniãi apanakini pimiparĩkatini, ininiã pimiparĩkatariko apanakini. Teoso sikaimaroretiniãi isãkire poerekini, ininiã poerekarauatako. ⁸ Teoso sikaimaroretiniãi ãti pisikataparaxiniretini, ininiã pisikataparaxiniretariko ãti. Teoso nirekiniãri pisikiniri apanakini amonitakiti ninoamoni, ininiã ito pisikako pipoxokonir- itika. Teoso sikaimaroretiniãi auĩtetxi pininiua, ininiã auĩtetxi erekari pitx- auako. Teoso nirekiniãi apanakini piamonĩkini, ininiã pipoxokoniritika piamonĩkanako.

Tiraõkitxi

⁹ Atão pitiretariko apanakini pãkixinireẽ. Pomanatariko maerekanitxi. Na piotokakapiri erekari pikamini. ¹⁰ Iteene hĩtiretakakauako, kotxi Kristo txĩkitakapekaua aĩtaritakakiniua. Piteka pipaxitiniua atokokana, apiata pipax- itariko ãti. ¹¹ Pitaparaxinireritika piparĩkauatako. Na piarinouatape. Pi- parĩkauatako Teoso ĩkapani pipoxokoniritika pãkixinireẽ. ¹² Pipoxokoniuatako, kotxi pimarotari Teoso kaminiri ikamaenetakiti. Pimĩteenekariko pimisir- itiko. Ātipirika pimisãkiretariko Teoso. ¹³ Nipokori kaamatiniã pitariako- rimoni, tiĩtxi kaamatiniã pitariakorimoni, auiniã pitemoni, pisikanako. Papakapanako pipoxokoniritika ikinimane Xesosi sãkire auĩãkani paapoko apoãkani, ãtiãtaã ĩkani.

¹⁴ Pamanaãri Teoso erekari ikaminina pite misiritakani. Ari, pa- manaãri Teoso erekari ikaminina ninoa. Na pamanaãpiri Teoso maerekati

isikinina ninoa. ¹⁵ Pipoxokoniuatoko poxokorinikata. Pitxiapata ka-matinanirinikata. ¹⁶ Āti pitiretini atokotxikana, ikinimane pitiretako. Na piukapeua. Pisākirauatoko kākiti matxineirotenikata, katxineiroteni pimisākiretini atokotxikana. “Kimaroreno nota,” na pitxape.

¹⁷ Kākiti kaminiāri maerekati pitemoni, na pikamapiri maerekati iua-moni. Atāonoka pikama ikinimane ĩkapani. ¹⁸ Pinirekariko pauini kākiti sauaki ereka inini, ininiā maxikatīka kona pitxitapiri āti. ¹⁹ Nitiretakini, na hīxikatxitapiri āti. Teosora xikatxitariko, kotxi Teoso sākire iōkatsopatakori txari:

Nota parīka āti nixikatxitini. Notara misiritari maerekati kamakari, itxa Apiananiri sākire. ²⁰ Ari, kona pixikatxitapiri āti. Pikamariko ātimoni ia Teoso sākire iōkatsopatakori iaōka:

Pomanatakiri natxitiniā, pisikakienatari iua. Iposonatinīā, pisikari iātini.

Ikara atoko pikaminiā, ipētauata maerekati pitemoni ikamini, itxa Teoso sākire iōkatsopatakori. ²¹ Na pauiritapiri maerekati piauīte atoko ininiua. Erekarī pikamakasaaki, maerekati iokanatapeēkaika.

13

Aāuīteakori Nirekakiti Akīpitini

¹ Akīpitariko aāuīteakori nirekakiti, kotxi Teosora auiritana ninoa auītetxiakori ininiuana. Teosora takari ninoa auītetxiakori aāuīteakori ininiuana ĩkapani. ² Aāuīteakori nirekakiti amakamakaniā, Teoso nirekakiti apaka !akama, kotxi Teoso txīkitakana ninoa aāuīteakori ininiuana. Ninoa paniātakiti amakamakaniā, amisiritaākako. ³ Erekarī kamakani ! ipīkari iauītena. Maerekati kamakaninani pīkana ninoa. Pinirekatari pimapīkakaniri piauīte? Ininiā erekarī pikamako, ininiā iua txaiko: “Erekai pite.” ⁴ Teoso nitiri itxaua piauīte, erekarī pitemoni ikamini ĩkapani. Txamari maerekati pikaminiā, erepaniko. Pipīkariko iua, kotxi iposotari imisiritinīi. Iua Teoso nitiri itxaua kākiti maerekati kamakani imisiritini ĩkapani. ⁵ Ininiākara pikamariko piauīteakori nirekakiti, kotxi pimakamakanisaakiri, pimisiritiko auapitika. Apaka pikamariko ninoa nirekakiti, kotxi pimarotari pākixinireē ikara atoko atāo pikamini.

⁶ Piauīteakori Teoso nitiriakori itxauana, ininiā erekarī apaka pisikiniri txineiro ninoamoni iparīkana ikaminina ĩkapani. ⁷ Ininiākara piīkitxitana ninoana amanaākiti, sitatxi pauini ĩkapani, pitii papakapini ĩkapani. Pipaxitanako ninoa. Pikamariko ninoa nirekakiti.

Hītiretakiniua ĩkapani

⁸ Piīkitxitariko ikinika piamotakiti. !Erekarī pimaīkitxitakaniri āti. Ātinoka tēpito erekarī. Ia tēpito na txineironi. Ia tēpito atiraōki. Ia atoko inakarī tēpito xipokini kona erekarī. Ātipirika hītiretakakauako. !Erekarī pixipokiniri pitiretiniri āti. Āti tiretakari kīpitapekarī Teoso paniātakiti iōkatsopatakori. ⁹ Teoso paniātakiti iōkatsopatakori txari: “!Pisirīkape pītanoro minakotokatika. Na pokaniuatape. Na piītiriuatape. Na pinirekapiri apanakini tii.” Akīpitari ikara Teoso paniātakiti iōkatsopatakori, apanakini ipaniātakiti apaka, ia Teoso paniātakiti ātika akīpitiniā. Ia Teoso paniātakiti paniātaua: “Piteka pitiretiniua atokotxikana, pitiretariko āti.” ¹⁰ Pitiretiniāri āti, maerekati !pikaminiri iua. Ininiā āti pitiretiniā, pikamari Teoso paniātakiti iōkatsopatakori ikinika.

¹¹ Matiretari āti, kotxi aimarotari kaiamapekarī Kristo kanapiriini. Ininiā pimerekako. Kona pimakapeko. Piparīkauatoko Teoso ĩkapani, kotxi itixine Xesosi anikiniua ōti apokaāpotanapanoka. Akokaxiti aāuikari Xesosi sākire. Uatxa paītiki ikanapiriā. ¹² ĩkanōkarī xipokaāpotanapanoka. Pokamara

apokaãpotanapanoka Kristo kanapiriãkasaaki. Maerekati ipiãkasaaki kamakori atoko itxa, ininiã maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiã maerekati ! imaïkaua. Pokamarari atoko itxa erekari akamakiti. ¹³ Pokamara kãkiti kamari atão inakarínoka apanakini apisatoõ. Makamari ikara atoko inakari ãtipirika. !Erekari kiiniri maerekati akamini. !Erekari apoãtini. !Erekari asirïkini sito aïtanoro minakotokatika. !Erekari akaminiri maerekati aïto nireëkiti. !Erekari aneenamauatini. !Erekari axikotiniri ãti. ¹⁴ Ikara atoko inakari akamini !erekari. Makamari ia atoko inakari: Maamanaãri Apiananiri Xesosi Kristo kapakinua, sotato mãka paikori sotato ïto kapakini atoko. !Hïxinikapiri: “Kanatokopa nitxa nikaminiri niïto nireëkiti?” Kotxi maerekatínoka aïto nireëkiti.

14

Kona Hïtaparakienatakakapeua

¹ Hãuiritariko Xesosi sãkire poiãonoka auiãkari hïtekata apotiitiniua. Na hïtxitapiri iua, ixinikakiti na hïte xinikakiti atoko iminakanisaaki. ² Kãkiti iteene auikiniãri Xesosi sãkire, atxiïti inikari itanapoko nipokori. ãti kãkiti poiãonoka auikiniãri Xesosi sãkire, atxiïti inikari takarinoka. ³ !Erekari ikinipoko niãkari sãpiretiniri takarinoka niãkarimoni: “Pikerokari” ininiri. Apaka !erekari takarinoka niãkari sãpiretiniri ikinipoko niãkarimoni: “Pikerokari” ininiri, kotxi Teoso apakapapekari iua. ⁴ Kinakariparai pite ãti nitiri pinitakarii: “Pikerokari” ãtimoni inakarii. Ikerokiniãri, iua patrãote pinitamariko. Maerekati !ikama, kotxi Apiananiri moianatari iua.

⁵ Atxiïti ãti sãkire: “Ia õti erekari iteene axinikiniri Teoso.” Atxiïti ãtipekana: “Ikiniõtika erekari iteene axinikiniri Teoso.” Hãkixinireë hïxinikariko: “Natokopa itxa atão nikamini?” ininiã eereka atão hïkamini tïkane himarotape. ⁶ Hïte: “Ia õti apiaerekata iteene axinikiniri Teoso,” hininiã, ininiã ikara atoko hïxinika Teoso hïpaxitini ïkapani, ininiã erekapitikari. Ikinipoko niãkari nikari ikinipoko, Teoso ipaxitini ïkapani, kotxi apisapanika itxari Teoso: “Erekapitikai ia nipokori pisikinino niniãkiti ïkapani,” itxari. Ikinipoko maniãkati apaka auikari Teoso nirekiniri iua nikiniri takarinoka. Iua apaka txari Teoso inipokotini apisapanika: “Erekapitikai ia kienatxi pisikinino niniãkiti ïkapani,” itxari. Ininiã iua apaka paxitari Apiananiri. ⁷ Kona ateka auïtetaua. Kona aãua ateka ïkapaninanini. Kona apina ateka ïkapaninanini. ⁸ Auapanika anakasaaki, aparïkauata Apiananiri ïkapani. Apïkasaaki, apina Apiananiri ïkapani. Ininiã auapanika anakasaaki, apïkasaaki apaka, Apiananiri nakiti atxaua. ⁹ Kristo ipina, eereka õkitikaua iuaïkana, auapanika inakani auïte ininiua ïkapani, ipïkani auïte apaka ininiua ïkapani. ¹⁰ Ininiã ! apakata pitxitiniri pitari. “!Kiïkitei,” kona pitxapiri, kotxi akinika aãpokako Teoso apisatoõ. Iuasaaki iua sãpiretariko akamakiti, erekari inini atxiïti, maerekati inini atxiïti. ¹¹ Teoso sãkire iõkatsopatakori txari:

Nota Apiananiri, ãtipirika auakari nitxaua. Ikinimane kãkiti kapotoreëkauako nota apisatoõ. Ikinimane txanoko nota Teoso nininiua.

¹² Ininiã iuasaakiikarako akinika asãpiretari Teoso ikinika akamakiti ïkorapokoriti aãuakasaaki.

Masikataparaxiniretakakaua

¹³ Ininiã hïotokakariko hïtaparakienatakakiniua. Hãkixinireë hïtxako: “! Nitxïkitakapaniri nitari kerokiniri ikamakiti. ! Nitxïkitakapaniriko nitari kaminiri maerekati,” hïtxako. ¹⁴ Xesosi Apiananiri nakiti nitxaua, ininiãkara nimarotari, apakatapitika Teoso sãkire auiãkari nikiniri ikinipoko nipokori, kotxi nipokori maerekati !auari. Iuaritika kãkiti auikiniãri iua nipokori

maerekati inini, !apakata inikiniri. ¹⁵ Hinikiniāri ikinipoko nipokori, atxiīti hītari ākixinire maxirauata, ininiā na atāo hītiretari iua. Kristo ipina iua hītari ĩkapani, ininiā hĭtakanapariko iua nipokori hinikini, kotxi atxiīti iua ! auikaikari Xesosi sākire, iua nipokori hinikini xika. ¹⁶ Erekaru auakasaaki, !hāuiritapiri āti sāpiretinii ikara erekaru maerekati inini. ¹⁷ Teoso aāuĭte ininiāua, kona nipokorinanini, kona iātakorinanini, axinika. Teoso aāuĭte ininiāua, axinikari Erekaru Matamatakoti sikakiti atemoni. Iua txĭkitakaua atāonoka akamini. Ikamaerekaxiniretaua. Isikapoxokonitaua. Teoso aāuĭte ininiāua, ikara atoko itxa aāuini. ¹⁸ Ikara atoko aparĭkauatiniā Kristo ĩkapani, Teoso apokaerekataua. Kākiti apaka apokaerekataua.

¹⁹ Ininiākara manirekaru kākiti auini ereka inini, neenamatchi mauakani ĩkapani. Masikataparaxiniretakakaua. ²⁰ Na himisiritapiri Teoso parĭka nipokori xika. Ikinipoko nipokori erekaru hinikini, txamari hĭte nikakiti txĭkitakiniāri āti takanapiniri Kristo, hĭkerokari. ²¹ Hītari kerokiniāri ikamakiti hĭte niākiti xika, apiaerekata himanikakaniri iua nipokori. Hītari kerokiniāri ikamakiti hĭte iātakiti xika, apiaerekata iua iāriā himiātakani. Na xatiki hĭtxĭkitakapiri hītari kaminiri maerekati. ²² Hĭtemoni ikinipoko nipokori nikiko erekaru, txamari na hĭsāpiretapiri apanakini. Erekaru Teosonoka imarotiniri. Hĭxinikasaakiri hĭkamakiti atāo inini, hākixinireē himarotakasaakiri hĭkamakiti atāo inini, iuasaaki hĭpoxokoniuata. Ininiā kona hĭteka apoĭtaua. ²³ Hinikasaakiri nipokori, hākixinireē: “Erekaru atxiīti ia nipokori ninikini?” hinakasaaki, iuasaaki Teoso txai: “Maerekati pikama,” kotxi kona pauikari pikaminiri erekaru. Himauikakaniāri hĭkamakiti ereka inini, ininiā maerekati itxaua hĭkamakiti.

15

Āti Nireēkiti Kamiko Pirena

¹ Atxiīti ikinipoko Teoso sākire aāuika, ininiā amoianatariko Teoso sākire poiāonoka auīākari, imaposotakinini ikamini ĩkapani. !Erekaru ateka nireēkitinoka akamini. ² Erekaru akaminiri aĭtari nireēkiti, iua amoianatini ĩkapani, Teoso sākire iteene auikini ĩkapani. ³ Kristo apaka !ikamari iuaka nireēkiti. Iua kamari Teoso nireēkiti, kotxi Teoso sākire iōkatsopatakoriā Kristo txari iri:

Kākiti misākirepiretakasaakii pite, notara ninoa misākirepireta.

⁴ Ikinika Teoso sākire iōkatsopatakori iōkatsopataāka ate oerekiko ĩkapani. Teoso sākire iōkatsopatakori aāuikasaaki, aiātapari apoxokoniritika erekaru apokini. Aimarotari erekaru apokapitikako. Teoso sākire iōkatsopatakori sikataparaxiniretaua.

⁵ Teoso sikataparataua, ininiā apoxokoniritika aiātapari erekaru apokini. Isikataparaxiniretaua. Ninirekaru Teoso txĭkitakiniri hĭte nireēkiti ātinoka inini, Kristo Xesosi nireēkiti iaōka hĭkamini. ⁶ Erekaru hinireēkiti hākixinireē ātinoka inini. Erekaru hĭsākire ātinoka inini. Ikara atoko hininiā, hĭkinika txari Teoso: “Peerekai pite,” kotxi iua aāuĭte Xesosi Kristo iri itxaua.

Xoteo Minakaniua Poxokoniuatini

⁷ Hāpakapariko āti, Kristo apakapini atokokana, ininiā kākiti txari Teoso: “Peerekai pite,” txariko. ⁸ Nisāpiretai. Kristo Xoteoakori nitiri atoko itxapekaua. Ikara oerekari Teoso sĭkiniri isikaenetakiti. Teoso sikaenetakiti Apraāomoni, Isakimoni, Xakoo pakinimoni, isikaenetakiti apokapeka Xesosi ĩkorapokoriti apokasaaki. ⁹ Kristo Xoteoakori nitiri atoko itxapekaua, ininiā Xoteo minakaniua txari: “Kaamonĭkareri Teoso. Peerekari iua,” itxana. Teoso sākire iōkatsopatakori txari:

Xoteo minakaniua auiniãtaã nitxariko Teoso: “Peerekai pite.” Nixikarauata pite ïkapani, kotxi peerekai pite.

¹⁰ Iuaïkana Teoso sãkire iõkatsopatakori txari:

Hïte Xoteo minakaniua hïpoxokoniuaatoko Xoteoakorikata, Teoso nakitiakorikata.

¹¹ Iuaïkana Teoso sãkire iõkatsopatakori txari:

Hïte hïkinika Xoteo minakaniua, “Peerekari Apiananiri” hïtxako. Hïkinika itixi auakanii hïxikarauatako Teoso ïkapani.

¹² Iuaïkana Teoso sãkire iõkatsopatakoriã Isaïa txari:

Auako Xesee apika mekaniri. Xoteo minakaniua auïte itxauako. Ninoa imarotariko isãkire iaõka ikamini, itxa Teoso sãkire iõkatsopatakori.

¹³ Teosora txïkitakai himarotini isãkire iaõka ikamini. Ninirekari iua iteene kamapoxokonitini hïte. Ninirekari ikamaerekaxiniretini hïte, kotxi hãuikari iua sãkire. Ininiã himarotari hãpakapapitikariko Teoso sãkire iaõka. Erekar Matamatakoti posotiireë himarotari ikara.

Paoro Teoso Iokanapirena Erekar Sãpiretakari Xoteo Minakonimoni

¹⁴ Nitariakori, nota imarotari ereka hinini. Nimarotari hïte iteene kimarore hinini hõerekakakiniua ïkapani. ¹⁵ Iuaritika ia niõkatsopatakitiã nõtãkikapekai hïte nitaparaxinireritika. Himarotakiti, iuaïkana nisãpiretai, iuaïkana hïxinikiniri ïkapani. Teoso sikari erekar notamoni, ininiã ikara atoko niõkatsopata hïtemoni. ¹⁶ Teoso sikari erekar notamoni, kotxi itxïkitakano Xesosi Kristo nitiri nininiua. Ipaniãtano nipaïkauatini Xoteo minakaniua ïkapani. Sasetotxi apakapari kãkiti mïkiti, ininiã sika itxari Teosomoni. Ikara atoko itxa sasetotxi païka. Nota sasetotxi atoko nitxaua. Nisãpiretari Teoso iokanapirena erekar Xoteo minakonimoni, ininiã ninoaka sikaua Teosomoni inireëkiti ikaminina ïkapani. Teoso apakapari ikara atoko inakari ninoaka iuamoni sikakaniua. Erekar Matamatakoti kamaerekatari kãkiti Teoso apakapinina ïkapani.

¹⁷ Ininiã Teoso ïkapani nipaïkauatakasaaki, niuikari Xesosi Kristo. ¹⁸ Nota kona iuikaua, kotxi Kristo posotiireë Xoteo minakaniua kamari Teoso nireëkiti. Kristo paniãtano nota iua sãkire nisãpiretinina Xoteo minakaniua. Ipaniãtano inireëkiti nikamini Xoteo minakonikata nauakasaaki, ininiãkara ninoa auikari nisãkire. Ininiã ikamarina Teoso nireëkiti. ¹⁹ Erekar Matamatakoti posotiireë noerekari Teoso takaõtxikare ninoamoni. Noerekari posotiiretxi kãkiti maposotakiniti ninoamoni. Ininiãkara ninoa kamari Teoso sãkire iaõka. Kristo iokanapirena erekar ikinika nisãpiretapekari kãkiti Xerosareë sitatxiti auakani. Eereka kãkiti apikoxiti auakani nisãpireta. Eereka kãkiti apikoxiti auakani nisãpireta. Nitxaãpota kãkiti nisãpiretini. Imapotõkire Iriria tixinipeka napoka, Kristo iokanapirena erekar nisãpiretini ïkapani.

²⁰ Ætipirika ninirekari nisãpiretiniri Kristo iokanapirena erekar Kristo mimarotakoniãtaã. Ininiã kona nipaïkauata Teoso ïkapani Æti païkauatiniãtaã, kotxi Æti sãpiretapekari Kristo iokanapirena kãkiti iuaãtaã. ²¹ Kotxi Teoso sãkire iõkatsopatakori txari:

Mitxi iua masãpiretakoni imarotariko iua sãkire. Mitxi iua sãkire makenakotakani imarotariko iua sãkire, itxa Teoso sãkire iõkatsopatakori.

²² Kaiãokataikani ninirekamari nisini hïtemoni, txamari kona apakata, kotxi iusaaki nisãpiretari Kristo sãkire Kristo sãkire mimarotakanimoni.

Paoro Seenetini Homamoni

²³ Itokanani ninirekamari naõkitinii hïte. Uatxaika apakata nisini hïtemoni, kotxi nixipokapekari nipaïka ïkorapokoriti. ²⁴ Nirekar Espãnia tixinimoni

nisini. Iuaã nisikasaaki, ninirekari naõkitinii h̄te. Ninirekari mapaõti nikaikotini h̄tekata, kotxi nipotxitari h̄tekata nauini. Ninirekari h̄te moianatinino Espániamoni nisini ìkapani, ininiã eereka Espánia tixinimoni nisa. ²⁵ Uatxa h̄temoni nisini apisapanika, nisa Xerosareẽmoni, kotxi ninirekari nanikiniro txineiro kãkiti Teoso nakitiakori iuaã auakani nisikini ìkapani. ²⁶ Kristo sãkire auiãkani, Xoteo minakaniua Masetónia tixini auakani, Akaia tixini auakani pakini sikaro oa txineiro. Inirekarina nisikiniro Teoso nakitiakorimoni, matxineirotenimoni, Xerosareẽ sitatxitiã. ²⁷ Ninoa poxokoniua oa txineiro isikinina Xerosareẽ auakanimoni. Erekarini oa txineiro isikinina, kotxi Xoteoakori Kristo sãkire auiãkani sikari Teoso sikakiti Teoso iokanapirena erekari Xoteo minakonimoni. Ininiã erekari Xoteo minakaniua sikiniri ipixini itxineirotena Teoso sikakito, Xoteoakorimoni. ²⁸ Ininiã oa txineiro nanika Xerosareẽ auakanimoni. Ninoamoni txineiro nisika atoko, ininiã eereka nipotorika Espániamoni nisini. Espánia napokini apisapanika nisako h̄temoni. ²⁹ Ereẽ napokasaaki, nisãpiretai ikini sereti erekari Kristo sikakiti h̄temoni.

³⁰ Nitariakori nota amanaã h̄te, himisãkiretiniri Teoso nota ìkapani. H̄ikenakotatari namanaãkiti? Himisãkiretariko Teoso nota ìkapani. Xesosi Kristo aãuĩte itxaua, ininiã namanaã himisãkiretiniri Teoso nota ìkapani. Erekarini Matamatakoti txìkitakaua atiraõkiuatini, ininiã himisãkiretari Teoso nota ìkapani. Ikara atoko h̄kaminiã, Teoso sikataparatanoni nimsiritiko auakasaaki. ³¹ Kristo sãkire mauĩãkani Xotéia tõpa auakani nirekari imisiritinino nota. Himisãkiretari Teoso ninoa mamsiritakanino ìkapani. Himisãkiretari Teoso, Teoso nakitiakori Xerosareẽ auakani apokaerekatiniro txineiro Xoteo minakaniua iokanatakito. ³² Ininiã Teoso nirekiniãri, napoka h̄temoni nipoxokoniritika. Ininiã asikapoxokonitakakaua. ³³ Teoso akamaerekaxiniretakiri aua h̄tekata. Ameẽ.

16

Paoro Akiriuãkaãpotana Ixinikakini

¹ Niokanataro aĩtaro Pepi inakoro h̄temoni. Peerekaro oa. Omoianatana Xesosi sãkire auiãkani Sẽkireia sitatxiti auakani. ² Apiananiri nakito otxaua, ininiã hãpakaparoko h̄poxokoniritika, kotxi iua nakitiakori apaka h̄txaua. Onirekiniãri himoianatiniro, himoianataroko, kotxi omoianatapekana itomaneri kãkiti. Omoianatapekano nota apaka.

³ H̄isãpiretanako Pisisira, oĩtaniri Ákira pakini nixinikamanapitinina ninoa. Ninoa parĩkauatapeka Kristo Xesosi ìkapani notakata. ⁴ Okaãkanapanokana nota imoianatinina xika. Peerekana, kotxi erekari ikaminanona. Xoteo minakaniua, ikini Teoso misãkiretikoãtaã apotiitakaniua apaka imarotari erekari Pisisira, Ákira pakini kamakiti nota ìkapani. ⁵ Xesosi sãkire auiãkani apotiitaua ninoa aapoko Teoso imisãkiretinina ìkapani, ininiã h̄isãpiretanako nixinikamanapitinina ninoa.

H̄isãpiretariko nitiretakiti Epeneto inakori nixinikamanapitiniri iua. Ásia tixiniã iua merepitipanika auikari Kristo sãkire. ⁶ H̄isãpiretaroko Maria nixinikamanapitiniro oa. Oa iteene parĩkauata ate ìkapani. ⁷ H̄isãpiretanako ninirimane Átoróniko, Xónia pakini nixinikamanapitinina ninoa. Mitxipe ninoa qua notakata kateia ãki. Teoso kãkitimoni iokanatakini iteene imarotana Átoróniko, Xónia pakini. Ninoa ipi auikari Kristo sãkire, iua sãkire nauikini apisapanika.

⁸ H̄isãpiretariko Ápirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. ⁹ H̄isãpiretariko Opano nixinikamanapitiniri iua. Iua parĩkauata Kristo ìkapani atekata. H̄isãpiretariko

nitiretakiti Esitaki nixinikamanapitiniri iua. ¹⁰ Hīsāpiretariko Aperi nixinikamanapitiniri iua. Imisiritiko sauaki iua ! ikipatari Kristo sākire auikini. Hīsāpiretanako Arisitóporo aapoko auakani nixinikamanapitinina ninoa. ¹¹ Hīsāpiretariko ninirimane Erotxião nixinikamanapitiniri iua. Hīsāpiretanako Apiananiri nakitiakori Nasiso aapoko auakani nixinikamanapitinina ninoa.

¹² Hīsāpiretanako sitoakoro Tipena, Tiposa pakini nixinikamanapitinina ninoa. Ninoa parīkauatapitipo Apiananiri ĩkapani. Hīsāpiretaroko nitiretakito Pesitxi nixinikamanapitiniro oa. Oa apaka parīkauatapitipo Apiananiri ĩkapani. ¹³ Hīsāpiretanako Hopo, inoro pakini nixinikamanapitinina ninoa. Apiananiri mereēri iua. Iua inoro taretano nota, ninoro taretinino atokotxikana. ¹⁴ Hīsāpiretanako Asīkiriti, Pirekōtxi, Émisi, Pataropa, Émasi, ikinika aĩtariakori ninoakata apotiitakaniua pakini nixinikamanapitinina ninoa. ¹⁵ Hīsāpiretanako Piróroko, Xória, Nereo, Nereo itaro, Orīpa, ikinika Teoso nakitiakori ninoakata apotiitakaniua pakini nixinikamanapitinina ninoa.

¹⁶ Himaaratakakauako, kotxi aĩtaritakakaua. Kristo nakitiakori ikini Teoso misākiretikoãtaã apotiitakaniua xinikamanapitai hĩte.

Paoro Ôtākikare Mapotōkire

¹⁷ Nitariakori iteene nōtākikai hĩte. Erepaniko kākiti neenamatzixi nireēkani. Ninoa nirekari Kristo sākire auĩākani omanatinina apanakini Kristo sākire auĩākani. Na atão ninoa oerekakiti sākiretxiti, ininiã atxiĩti kākiti takanapari Kristo sākire auikini ninoa oerekakiti xika. Kristo sākire nota oerekakiti hĩtemoni atão. Ninoa oerekakiti koketakori sākiretxiti. Ninoa moianariakori kona hĩtxapeua. ¹⁸ Kākiti ikara atoko inakani kona parīkauata aãũte Kristo ĩkapani. Ninoa parīkauata iĩtona nireēkiti ĩkapani. Imisirienetarina kākiti sākire auĩākani. Imisirienetarina kākiti ikara atoko inakani, kotxi kākiti potxitari isākirena. Kākitimoni peerekari ninoa sākire. ¹⁹ Ikinika kākiti imarotari hĩte kaminiri Kristo sākire iaōka, ininiã nota iteene poxokoniua hĩte ikara atoko hininiã. Ninirekari kiĩkite hinini erekari hĩkamini ĩkapani. Ninirekari himimarotakaniri maerekati hĩkamini. ²⁰ Teoso akamaerekaxiniretakiri, paĩtiki xipokariko Satanasi posotiire, ininiã hĩposotari hĩokanatiniri Satanasi isini.

Aãũte Xesosi Kristo aĩtipirika sikari ikinipoko erekari hĩtemoni.

²¹ Tximótxio, notakata parīkauatakari, xinikamanapitai hĩte. Ninirimane Arósio, Xasão, Sosipato pakini xinikamanapitai hĩte apaka.

²² Nota Tésio inakori iōkatsopari ia iōkatsopari Paoro ĩkapani. Nota apaka xinikamanapitai hĩte, kotxi Apiananiri nakiti nitxaua.

²³ Nota Paoro aua Kaio aapoko. Kristo sākire auĩākani apotiitaua iua aapoko Teosokata isākirauatinina ĩkapani. Iua nirekari himarotiniri iua xinikamanapitini hĩte. Erásito inakori apaka xinikamanapitai. Txineiro nĩkatakari iua. Sitatxi auakani sikakito inĩkata iua. Aĩtari Koato inakori xinikamanapitai hĩte apaka.

²⁴ Aãũte Xesosi Kristo aĩtipirika sikari ikinipoko erekari hĩtemoni. Ameẽ.

²⁵ “Peerekari Teoso,” matxako. Iua posotari ikamataparaxiniretinii hĩte, ininiã kona hĩotokakari hãuikiniri Kristo sākire. Teoso iokanapirena erekari nota sãpiretakiti, Xesosi Kristo sākire pakini sãpiretari ikara atoko inakari. Ikara Teoso sākire kitxakapirĩka ! kimarotikori. Uatxa imarotapeēkaika. ²⁶ ĩkorasaaki asãpiretapekari ikara Teoso sākire, Teoso sākire sãpiretakani iōkatsopatakiti kitxakapirĩka. Uatxa aimarotari ninoa sãpiretakiti. Teoso auapika inakari paniãtari isākire sãpiretiko ikini itixiti auakanimoni.

Ininiã apakata ikinimane auikiniri isãkire. Apakata ikinimane kaminiri inireẽkiti iaõka.

²⁷ Iuanani Teoso txaua. Iuanokara imarotari atão ikinipoko. ãtipirika matxariko iua: “Peerekai pite, kotxi peerekari Xesosi Kristo.” Ameẽ.

1 KORĪTO

Merepanika Paoro Iokanatsopatakiti Korīto Auakanimoni

¹ Nota Paoro, Xesosi Kristo iokanatakīto. Teoso akiritano iua iokanatakīto nininiua īkapani, kotxi inirekari iokanatinino kākitimoni isākire nisāpiretini īkapani. Aītari Sōseni inakori aua notakata uai. ² Niokanatsopata hītemoni, kākiti Xesosi sākire auiākani Korīto sitatxiti auakanimoni. Kristo Xesosi makatxakakini hītxaua Teoso īkapani. Teoso akiritai hīte iua nakitiakori hininiua īkapani. Apaka niokanatsopata ikini tōpati auakanimoni, aāuīte Xesosi Kristo uāka akiritakanimoni. Ate auīte Xesosi, ninoa auīte apaka itxaua. ³ Aīri Teoso, Apiananiri Xesosi Kristo pakini sikari ikinipoko erekari hītemoni. Ninoa kamaerekaxiniretai hīte.

Paoro Misākiretari Teoso Korīto Auakani Īkapani

⁴ Ātipirika nimisākiretari Teoso ia atoko: “Peerekai pite, kotxi Xesosi Kristo sikari ikinipoko erekari Korīto auakanimoni. Ikara erekari pite sikakiti. ⁵ Peerekai pite, kotxi pite kamaerekatari ninoa auini. Pite oerekana ninoa sākire atāo inini īkapani. Pite kamaimaroretana. Ininiā ninoa sākire api-aerekata. Ninoa imarore apiaāpota.” Ia atoko nimisākiretari Teoso.

⁶ Hītemoni asāpiretakiti Kristo pirena auapeka hākixinireē. Ininiā iteene hāuikari Kristo sākire. ⁷ Ininiā hiātapakasaakiri aāuīte Xesosi Kristo kanapiriini, ikini sereti erekari Teoso sikakiti aua hītemoni iua parīka hīkamini īkapani. ⁸ Hīte isikataparaxiniretiniritika ikanapiriini ōti apokako. Ininiā maerekati hītemoni !auari aāuīte Xesosi Kristo apokasaaki. ⁹ Teoso kamariko ikara hītemoni, kotxi ikinika isākire iaōka ikamako. Iuakara akiritai hīte, himoianatiniri imi aāuīte Xesosi Kristo.

!Homanatakakapeua

¹⁰ Nitariakori, aāuīte Xesosi Kristo posotiireē nōtākikai. Hīsākire ātinoka hītxako. !Ninirekari homanatakakiniua. Ninirekari ātika hīxinikakiti auini. Ninirekari ātika hinirekakiti auini. ¹¹ Nitariakori, Kroe aapoko auakani sāpiretano hītekakarika hinaiatakakiniua. ¹² Kotxi apanakini hīte txari: “Paoro sākirera nota kīpita.” Ātipekana: “Aporo sākirera nota kīpita.” Ātipekana: “Petro sākirera nota kīpita.” Ātipekana: “Kristo sākirera nota kīpita.” ¹³ !Apakata ikara atoko hīkamini. Kristo !īkaiarikaāka. Kona Paoro ipina aamina īpiriāmitakari nopini hīte īkapani. Kona Paoro uākaā hīpatxisataāka.

¹⁴ Nisāpiretari Teoso ereka inini, kotxi kona notani patxisatai hīte. Krispo, Kaio pakininanira nipatxisata. Apikomoni !nipatxisatari kākiti. ¹⁵ Ininiā kona kākiti sāpiretari nipatxisatiniri kākiti nota uākaā. ¹⁶ Ii. Nimaxinīkaretari. Nipatxisatari Esitēpana, iua aapoko auakani pakini. Apikomoni nipatxisatakini !nixinikaika. ¹⁷ Kristo kona iokanatanano nipatxisarauatini īkapani. Iokanatanano Teoso iokanapirena erekari nisāpiretini īkapani. !Ninirekari kākiti sākireē, kākiti imaroreē nisāpirenauatini, kotxi kākiti imarore !isāpiretari Kristo ipinini aamina īpiriāmitakari nopini amaerekani imakatxakini īkapani.

Teoso Imarore

¹⁸ Teoso sākire mauīākani uākatari !kiīkiteri kākiti Kristo ipinini aamina īpiriāmitakari nopini sāpiretakani. Atepekana, Kristo ipinini sāpiretiko oerekari Teoso posotiire, kotxi Kristo ipinini makatxakari amaerekani. ¹⁹ Teoso sākire iōkatsopatakori kitxakapirīka txari:

Nixipokariko îkorapokoriti kimarorerini imarore. Nixipokariko kîikiterini îikite.

Itxa Teoso kitzakapirîka. ²⁰ Îtapari kimaroreri? Îtapari apaiaõkarauatakari? Naniparari kaxinikareri îkorapokoritikiri? Teoso oerekapekari îkorapokoritikiri imarore miîkiteti imarore atokotxikana inini. ²¹ Paimatireri Teoso, kotxi ! auiritari îkorapokoriti auakani imarotini iua ninoaka imaroreê. Apanakinimoni Kristo sâkire sâpiretiko ! kîikiteri, iuaritika Teoso apokaerekatari imakatzakiniri kâkiti maerekani, Kristo sâkire sâpiretiko auikasaakina.

²² Xoteoakori nirekari atamatiniri Teoso takaõtxikare, isâkire auikinina îkapani. Krekoakoripekana nirekari imaroretxi apiari imarotini. ²³ Iuaritika ate sâpiretari Kristo ipinini îpiriâmitakari nopini amaerekani imakatzakini îkapani. Xoteoakori ! inirekari ikara asâkire auikinina. Krekoakoripekana uâkatari ikara asâkire miîkiteti sâkire inini. ²⁴ Iuaritika Teoso akiritakini aua Xoteoakori, Krekoakori pakini. Ninoamoni Kristo parîka oerekari Teoso posotiire. Iua parîka oerekari Teoso imarore. ²⁵ Kâkiti uâkatari Teoso imarore ! kîikiteri, iuaritika axapitiki Teoso imarore apiata. Ikinipoko kâkiti imarore poiãoka. Axapitiki Teoso tapara apiata. Ikinipoko kâkiti tapara poiãoka.

²⁶ Nitariakori, Teoso akiritakasaakii, hîxinikari kâkiti xinikakiti atokokana. Natokopa itxa hîte iuasaaki? Iuasaaki ! kimarorei. !Kaposotiirei iuasaaki. Auîtetxi ! hîtxaua iuasaaki. Itori hîte ikara atoko inakani iuasaaki. ²⁷ Teoso mereêri kâkiti. Îkorapokoriti auakani uâkatari ninoa kâkiti Teoso mereêkini miîkiteni ininiua. Imereêna ninoa, kimaroreni îkorapokoriti auakani pêtatuatini îkapani. Îkorapokoriti auakani uâkatari ninoa kâkiti Teoso mereêkini iõkapetakani ininiua. Imereêna ninoa, katapararini îkorapokoriti auakani pêtatuatini îkapani. ²⁸ Iua mereêri kâkiti. Îkorapokoriti auakani uâkatana ninoa Teoso mereêkini minakani ininiuana. Imereêri apanakini manirekakini. Imereêri kâkiti omanatakoni. Kinirepa Teoso mereêri kâkiti ikara atoko inakani? Teoso oerekari kâkiti, kâkiti uâkatakiti apiari inini na atão. ²⁹ Ikara atoko ininiã, kâkiti ! iposotari iuikiniua Teoso apisatoõ. ³⁰ Teosora txîkitakaua Xesosi Kristo nakitiakori aniniua. Kristo nakiti aniniãua, aimarotari imaroretxi atão inakari. Kristo txîkitakaua atão inakari akamini Teoso apakapiniua îkapani. Iua txîkitakaua Teoso nakitiakori aniniua îkapani. Îkitxirauata ate îkapani ipîkasaaki.

³¹ Teoso sâkire iõkatsopatakori txari:
!Apakata piuikiniua. Apakatapitika piuikiniri Apiananiri.

2

Xesosi Ipinini Îpiriâmitakari Nopini

¹ Nitariakori, napokasaaki hîtemoni, nisâpiretai Teoso sâpiretakiti. Kona nisâpiretai notaka sâkire nimatire. Iuasaaki kona noerekai notaka imarore. Teoso sâkirenoka nisâpiretai hîte. ² Hîtekata nauakasaaki, na ninirekari âti imaroretxi nimarotini. Ninirekari Xesosi Kristonoka nisâpiretinii. Apiata ninirekari nisâpiretinii iua ipinini kâkiti îkapani îpiriâmitakari nopini. ³ Hîtekata nauakasaaki kona kataparaxinireno. Nikikinanaka nipîkarauatini xika. ⁴ Iuasaaki kona kâkiti imaroreêni nisâkirauata. Kona kâkiti imaroreêni ninirekari hâuikiniri Teoso iokanapirena nisâpiretakiti iuasaaki. Teoso iokanapirena nisâpiretakasaaki, kâkiti imarotari Erekarî Matamatakoti posotiireê nisâkirauata. ⁵ Ininiã kona kâkiti imaroreêni hâuikari Teoso iokanapirena. Hâuikari Teoso iokanapirena Teoso posotiireê.

Erekari Matamatakoti Imarore

⁶ Teoso sâkire auîakani iteene âkixinireê aneêkani imarotari Teoso iokanapirena asâpiretakiti kimatireri inini. Ikara imaroretxi kona

Īkorapokoriti auakani imaroreni. Kona auĭtetxiakori imaroreni ikara imaroretxi. Kotxi ninoa imarore paĭtiki !auaika. ⁷ Asāpiretari Teoso imarore mitxi kākiti mimarotakiniti, kotxi Teoso kipatari. Itixi kamiko apisa Teoso nirekaua asāpiretiniri ikara imarore kākitimoni ate iotximere aāpakapini ĩkapani. ⁸ Auĭtetxiakori ĩkorapokoriti auakani !imarotari ikara Teoso imarore. Ninoa imarotaākamariko, ininiā !okamarinako Apiananiri kaiotximereri aamina ĩpiriāmitakari nopini. ⁹ Kitxakapirĭka Teoso sākire iōkatsopatakori txari: Kākiti oki !amatapanikari Teoso kamakiti tĭkane iua tirketakani ĩkapani. Kākiti kenakoki !ikenakotapanikari Teoso kamakiti tĭkane iua tirketakani ĩkapani. Kākiti !ixinikapanikari Teoso kamakiti tĭkane iua tirketakani ĩkapani.

¹⁰ Iuaritika Teoso oerekapekaua Erekarĭ Matamatakotiā. Ikinipoko imarotakari itxaua Erekarĭ Matamatakoti. Ikinipoko kipatakori Teoso imarore imarota. ¹¹ Kākiti ākixinirenoka imarotari iuaka ixiniākiti. Āti !imarotari iua xiniākiti. Iua atokokanera Erekarĭ Matamatakotinoka imarotari Teoso xiniākiti, kotxi Teoso itxaua iua. ¹² Kona ate apakapari ātiāo matamatakoti ĩkorapokoritikiri. Ate apakapari Erekarĭ Matamatakoti, Teoso iokanatakiti atemoni, ininiākara aposotari aimarotiniri Teoso sikakiti atemoni. Itori isikakiti.

¹³ Atemoni isikakiti asāpireta. Kona kākiti imaroreēni asāpiretari kākiti. Erekarĭ Matamatakoti oerekaua asāpirenauatini. Ate amatari Teoso oerekakiti isākire iōkatsopatakoriā, eereka ātiātaā isākire iōkatsopatakoriā aāmatari iua oerekakiti, ininiā iuasaaki aimarotari atāo. Ikara atoko aōerekai hĭte. ¹⁴ Erekarĭ Matamatakoti mauakiniti !apakapari Erekarĭ Matamatakoti oerekakiti, kotxi iuamoni ikara sākiretxi miĭkiteti sākire. !Iposotari imarotiniri Erekarĭ Matamatakoti sāpiretakiti, kotxi Erekarĭ Matamatakoti !auari iuamoni. ¹⁵ Erekarĭ Matamatakoti auakasaakiri kākiti, iuasaaki iposotari ataerekatiniri imakinika, ininiā kākiti Erekarĭ Matamatakoti mauakiniti !iposotari apoĭtiniri iua.

¹⁶ Teoso sākire iōkatsopatakori txari:
Kiripa imarotatari Apiananiri xiniākiti iua oerekini ĩkapani?
Iuaritika Kristo oerekaua iuaka xiniākiti.

3

Teoso Nitiriakori Atxaua

¹ Nitiriakori, hĭte !ikamari ikinipoko Erekarĭ Matamatakoti nireēkiti. Hĭkamari hĭteka nireēkiti ĩkorapokoriti auakani kamini atokokana. Ininiākara nisākirauata hĭtekata amarinikata nisākirauatini atoko, kotxi poiāonoka hāuikari Kristo sākire. ² Tinitxiā atoko inakari nisākire nisikai. Xinitxi atoko inakari nisākire kona nisikai, kotxi !himĭteenekari nisākire kamimari. Uatxapiĭma hĭte !iposopanika noerekakiti kamimari himarotini. ³ ĩkorapokoriti auakani xinikini atoko hĭxinikapanika. Ikara xika hĭxikotakakaua. Hinaiatakakaua. Homanatakakaua. Hĭteka nireēkiti hĭkama, ĩkorapokoriti auakani kamini atokokana. ⁴ Kotxi ātikaka hĭte txari: “Paoro sākire nikĭpita.” Apanakini txari: “Aporo sākire nikĭpita.” Ikara atoko hininiā, kākiti ĩkorapokoritikini sākire atoko hĭsākirauata. !Kiĭkitepanikai.

⁵ Kiripa Paoro? Kiripa Aporo? Kristo nitiriakorinoka atxaua. Iua sākire sāpiretakaninoka atxaua. Hĭte auikapekari Kristo sākire asāpiretakasaakii. Apiananiri sikari parĭkatxi ikininapemoni akamini ĩkapani. ⁶ Ia atoko itxa parĭkatxi Teoso sikakiti: Merepanika nota sāpiretari Teoso sākire kākitimoni, takariki nitakini atokokana. Eereka Aporo oerekari ninoa kākiti apikomoni Teoso sākire. Āparaā takari nireēkiti atoko itxa apikomoni Teoso sākire

isâpiretakiti. Nota, Aporo pakini parîkauata ikara atoko, iuaritika Teosonoka aneêkakari takari. Iuanokara txîkitakari kâkiti auikiniri isâkire. ⁷ Takariki taâkari, âparaâ siâkari pakini minakati ninoa, kotxi Teosonoka aneêkakari takari. ⁸ Teoso sâkire merepanika sâpiretakari nirekari iparîkauatini Teoso îkapani. Teoso sâkire apikomoni sâpiretakari apaka nirekari iparîkauatini Teoso îkapani. Ininiâ Teoso sikariko ninoa parîka îki ninoamoni iparîkana iaôka. ⁹ Teosokata parîkauatakani atxaua. Teoso kikiote atoko hîtxaua. Apaka Teoso aapoko atoko hîtxaua.

¹⁰ Teoso sikapekano ikinipoko erekari niparîka iua îkapani nikamini. Aapokotxi kamiko apisa aapokotxi kamakari kimaroreri takari kaikori, inopini aapokotxi ikamini îkapani. Iua aapokotxi kamakari kimaroreri atoko nitxaua. Merepanika nota parîkauata Kristo sâkire nisâpiretini. Kaikori aapokotxi kamakari takakiti atoko itxa ikara iua sâkire. Eereka apanakini oerekarauata apikomoni. Ninoa parîka aapokotxi kamiko kaikori nopini atokokana itxa. Erepaniko akamakasaakiri ikara parîkatxi. ¹¹ Kaikori, aapokotxi kamakari takakiti atoko itxa Xesosi Kristo sâkire. Âti kaikori kâkiti sâkire !uari. Auape kaikori Xesosi Kristo sâkire, kotxi kataparari. ¹² Xesosi Kristo sâkire aâuikasaaki, kaikori aâuini îkapani iposope. Aapokotxi iua kaikori nopini atoko itxa aparîka. Aparîka atxiîti oro atoko itxa. Atxiîti pirata atoko itxa. Atxiîti kai erekari atoko itxa. Atxiîti aamina atoko itxa. Atxiîti aâtsopa atoko itxa. Atxiîti katsotati atoko itxa aparîka.

¹³ Itixi xipokini ôti kâkiti imarotariko natokopa itxa iparîka, kotxi iuasaakiko arikatxi ataerekatari iparîka. ¹⁴ Iparîka marikakaniâ, apakapari iparîka îki. ¹⁵ Iparîka arikiniâ, !apakapari iparîka îki. Iuaritika Teoso auiritari iua auini âtipirika Teosokata, txamari iua xipokaarita.

¹⁶ Kona hîte imarotapanikari Teoso misâkiretiko aikoti hininiua? Kona hîte imarotapanikari Erekari Matamatakoti auini hîto âki? ¹⁷ Kâkiti xipokiniâri Teoso misâkiretiko aikoti, Teoso xipokariko iua. Teoso misâkiretiko aikoti iua nakiti. Hîtera Teoso misâkiretiko aikoti hîtxaua.

¹⁸ Kona hîteka misirienetapeuako. Atxiîti âtikaka kâkiti hîte sauaki uâkatari kimaroreni ininiua, kotxi imarotarina îkorapokoriti auakani imarore. Îkorapokoriti auakani uâkatari Kristo sâkire auîâkari miîkiteti ininiua. Ininiâ erekape kâkiti îkorapokoriti auakani akiritinii miîkiteti hininiua, kotxi iuasaaki kimaroreri atâo inakari hîtxaua. ¹⁹ Teosomoni !kiîkiteri îkorapokoriti auakani imarore. Teoso sâkire iôkatsopatakori txari:

Teoso maîkari kimarorerini îkorapokoriti auakani ninoaka imaroreê.

²⁰ Apaka Teoso sâkire iôkatsopatakori txari:

Apiananiri imarotari îkorapokoriti kimarorerini imarore !itxapõ.

²¹ Ininiâ !apakata kâkiti iuikiniua imarore xika. Ikinika aua hîtemoni. ²² Paoro aua hîtemoni. Aporo aua hîtemoni. Petro aua hîtemoni. Itixi aua hîtemoni. Hâuini, hîpinini apaka aua hîtemoni. Uatxa auakari, katana auakari apaka aua hîtemoni. Ikinipoko aua hîtemoni. ²³ Kotxi hîte Kristo nakiti hîtxaua. Kristo, Teoso nakiti itxaua.

4

Kristo Iokanatakini Kâkitimoni

¹ Erekari kâkiti imarotiniri auîtetxiakori aminakaniua. Kristo nitiriakori atxaua. Teoso iokanapirena nîkatakani atxaua. Iua sikari iokanapirena atemoni apanakini asâpiretini îkapani. Iua Teoso iokanapirena !imaro-taâka mitxi. ² Nitiritxi atâo inakari âtipirika kamari iauîte paniâtakiti. ³ ! Nimaâkatari hîte ataerekatino nota. ! Nimaâkatari apanakini ataerekatino apaka. Kona notaka ataerekataua apaka. ⁴ Nâkixinireê maerekati !

auari, iuaritika nikamapekari maerekati. Apiananirinokara ataerekatano.
⁵ Ininiā !hīsāpiretapiri: “Kona erekari iua parīka. Peerekari ikara parīka,”
 kona hītxape Apiananiri apokini apisa. Apiananiri apokini hiātapako. Iua
 oerekariko ipiāmoni iomaātakori. Oerekariko kākiti nirekakiti ākixinireēna
 iparīkauatakasaakina. Iuasaaki Teoso txariko kākiti: “Erekapitikari pikamak-
 iti,” itxa.

⁶ Nitariakori, ikara nota pirena, Aporo pirena pakini nisāpiretai atāo in-
 akari himarotini īkapani, āti apiata himiuikakani īkapani. Ininiā hīkamariko
 Teoso sākire iōkatsopatakori iaōka, kotxi !apakata kākiti iteene iuikiniri āti,
 ātipekana imanirekakani inini. ⁷ Pite apiananitakari !auari. Himapaka-
 pakiniti !auari. Kapakapare hininiā, kinirepa mapakapareni sākirauatini
 atoko hītxa? ⁸ Ikinipoko hinireēkiti auapeka hītemoni atxiīti? Katiipekai hīte.
 Ate ereē mauakanisaaki, atxiīti hīteka kamari auītetxi hininiua. Ninirekari
 auītetxi atāo hininiua, ininiā ate auītetxi atxaua hītekata. ⁹ Īkoraasaaki
 neenamatchi xipoka atoko, auītetxi kāiatakari kanapiriā isotatonekata. Ni-
 noa mapotōkire kākiti auītetxi maīkakini minaāka apanakini atamatinina
 īkapani, inapetinina īkapani. Eereka okaākana ninoa kākiti. Nota xinikari
 Teoso nirekari ate iua iokanatakini ikara kākiti maīkako ni atoko aniniua.
 Ikinimane atamataua. Kākiti, Teoso nitiriakori iaxitikini apaka ata-
 mataua apininimoni asini. ¹⁰ Hītemoni, miīkiteni ate txaua, Kristo īkapani
 aparīkauatakasaaki. Hītemoni, kimarorei hīte, Kristo īkapani hīparīkauatakasaaki.
 Hītemoni, !kaposotiireua ate. Hītemoni kaposotiirei hīte. Hīte paxitaāka,
 txamari ate omanataāka. ¹¹ Uatxapiima Kristo sākire ate auikini xika
 anatxita. Aposonata. !Kamākaua. Amisiritaāka. !Kaaokoua. ¹² Iteene
 aparīkauata anireēkiti aamotini īkapani. Kākiti takasaakiri maerekati atemoni,
 ate amanaāri Teoso erekari ninoamoni itakini īkapani. Amisiritikosaaki,
 iuasaaki amīteenekari. ¹³ Apanakini misākirepiretakasaakiaua, erekari ate
 apakapapiretana ninoa. Uatxapiima apanakinimoni īkorapokoriti txiko atoko
 atxaua. Kasakari atoko atxaua ninoamoni.

¹⁴ Kona niōkatsopata ikara hīpētauatini īkapani. Niōkatsopata ikara nipini-
 tinii īkapani monōkori apokini apisa, kotxi namariteni nota tiretakini atoko
 hītxaua. ¹⁵ Hītemoni tesi mio Teoso sākire oereēkani auaākamako, iuaritika
 poiāo hīri atoko inakari aua. Notara hīri atoko nitxapekaua, kotxi hāuikari
 Teoso iokanapirena erekari noerekasaakii Kristo Xesosi posotiireē. ¹⁶ Ininiā
 nōtākikai: Nota kamakiti atokotxikana hīkamako. ¹⁷ Ikara īkapani niokanatarī
 Tximótxio hītemoni. Iua namarite nitiretakiti atoko. Iua kamari Apiananiri
 paniātakiti iaōka. Iua txīkitakai hīxinikiniri nikamakiti ikiniōtika Kristo posoti-
 ireē. Ikini tōpati Kristo sākire auīākani apotiitiniātaāua, noerekari kākiti
 erekari ikamini ikiniōtika, erekari nota kamini atokotxikana.

¹⁸ Ātikaka hīte iuikaua, kotxi hīuākatari nota mapokakani hītemoni.
¹⁹ Txamari Teoso auiritiniāno, paītiki napokako hītemoni. Iuasaakiko !
 ninirekari nimarotiniri ninoa iuikakaniua sākire. Napokasaaki ereē,
 ninirekari nimarotiniri Teoso posotiire. ²⁰ Teoso auītetxi ininiātaāua
 kona sākiretxinani aua. Iposotiire apaka aua. ²¹ Kiripa hīte nireka?
 Hinirekatari ninoropatinii aīkeē, ereē napokasaaki? Hinirekatari nitiretinii,
 nimatxitakanii, ereē napokasaaki?

5

Maerekati Xesosi Sākire Auiākani Sauaki

¹ Isāpiretaāka kākiti ereē kaminiri maerekati itotxi nireēkiti āti kākitekata.
 Iua kākiti maerekani apiari, kotxi iua sirīka iri itanorokata. Teoso sākire
 mauīākani kamari maerekati, iuaritika ninoa !ikamari ikara atoko inakari

maerekati, kiki hîte sauaki auakari kamakiti atoko. Ninoa !inirekari isâkiretinirina ikara atoko inakari maerekati. ² Iuaritika hîte iuikaua. ! Himatinaniuata himaerekani xika. Apiaerekata îkora iri îtanorokata sirîkakari hîokanadini itakanapinii. ³ Niîto kona ereê aua, iuaritika nixinikakiti auapitika ereê hîtekata, ininiâ nota ereê hîtekata nauini atokokana, nimereêpekari iua maerekati kamakari misiritiko. ⁴ Aâuîte Xesosi Kristo uâkaâ hâpotiitakasaakia, nota aua hîtekata nixinikakitiâ. Iuasaaki himarotakasaakiri Xesosi Kristo posotiire, ⁵ hîsîkariko iua Satanasimoni iua îto ipinini îkapani, ixinire ereka inini Xesosi kanapiriâkasaaki.

⁶ ! Apakata hîuikiniua. Himarotari axapiti pão tireêkari tirekakari itori pão. Iua atokokana âtika maerekati kamakari txîkitakari kaiãopokori kãkiti kaminiri maerekati. ⁷ Ininiâ hõkanapariko maerekati mitxi hîkamakiti, amaneri hinini îkapani. Ininiâ pão miãtiãkati atoko hîtxaua, kotxi ikeke !auari. Kitxakapirîka kãkiti okari ipira soti auîte, ininiâ Teoso nitiri napaãpotakasaaki ninoa nopini, kona okana ninoa. Kristo, apira soti auîte atoko itxa. Iua ipina ate mapinakani îkapani. ⁸ Pãskoia kiiniritisaaki, Teoso !auritari pão âtikakari nikiko, kotxi maerekati pão tirekakari atoko itxa. Ininiâ maõkanapari maerekati mitxi akamakiti. Pão miãtiãkati atoko matxaua, ininiâ makamari erekari. Masâkiretari atão inakarínoka. ⁹ Niokanatsopatapeka hîtemoni himapotiitakaniua maerekati kamakanikata, îtotxi nireêkiti kamakanikata. ¹⁰ Na nixinikari îkorapokoriti maerekati kamakani. Maerekati îtotxi nireêkiti kamakani, kamanarerini, kamisirienererini, kamakori teosonetakani pakini îkorapokoriti auakani na nixinikanãta. ! Hîposota hîtakanapinina ninoa, kotxi auapikana. Hîpîkasaakinokara, hîtakanapana ninoa. ¹¹ Uatxa niokanatsopata hîtemoni, himapotiitakaniua maerekati kamakanikata, “Xesosi sãkire auiãkarirano” inakanikata. Îtanoro minakotokatika sirîkakani, kamanarerini, kamakori teosonetakani, âti misãkirepiretakani, ipoãtakani, kamisirienereri pakini hîtakanapako. Kona hinipokotape ikara atoko inakanikata.

¹² Kona nota parîkani Xesosi sãkire mauiãkani misiritiko nisãpiretini. Hîte parîkakara Xesosi sãkire auiãkani misiritiko hîsãpiretini. ¹³ Teosokara sãpiretariko Xesosi sãkire mauiãkani misiritiko. Hîte iokanatariko maerekati kamakari hîte sauaki auakari isini.

6

Âti Naiatakasaakiri Âti

¹ Xesosi sãkire auiãkari naiatiniãri âti Xesosi sãkire auiãkari, ! apakata Xesosi sãkire mauiãkani apisatoõ anikiko. Hanikana ninoa Xesosi sãkire auiãkanimoni maerekati kamakari misiritiko himarotini îkapani. ² Kona himarotapanikari Xesosi sãkire auiãkani mereêriko Xesosi sãkire mauiãkani misiritiko âti õti? Hîkamariko ikara atoko inakari xipokatxi õtisaaki, ininiâ hîposotapitikari uatxa himereiniri kãkiti misiritiko, âti naiatakasaakiri âti. ³ Atxiîti hîte kona imarotapanikari himereiniri Satanasî nitiriakori misiritiko âti õti? Ininiâ hîposotapitikari himereiniri kãkiti misiritiko îkorapokoriti uatxa. ⁴ Txamari neenamatzî hîte sauaki auiniã, hanikatari kãkiti Teoso sãkire auiãkani mapaxitakanimoni? ! Apakata, kotxi ninoa ! imarotari Teoso paniãtakiti. ⁵ Ikara atoko nitxai nikamapêtatinii îkapani. Atxiîti kona hîposotatari hâpokiniri kimaroreri hîte sauaki neenamatzî xipokini îkapani? Atxiîti kona âtika aua? ⁶ Txamari âti Xesosi sãkire auiãkari anikari âti Xesosi sãkire auiãkari Xesosi sãkire mauiãkani apisatoõ maerekati kamakari misiritiko himarotini îkapani. Ikara atoko !apakata.

⁷ Ininiā iteene hīkerokari, kotxi hanikari hītari kākiti misiritiko mereēkarimoni. Erekafe hāuiritiniri hītari kaminiri maerekati hītemoni. Erekafe hāuiritiniri hītari itirīkiniri hīti. ⁸ Txamari hītiriuata. Hīkamari maerekati. Hītariakorimonira hīkamari ikara. ! Apakata. ⁹ Kona himarotapanikari atāo minakati kamakani !isari Teoso auītetxi ininiātaāua? Kona hīteka himisirienetapeua. Ia atoko inakari kākiti !isari Teoso auītetxi ininiātaāua: maerekati itotxi nireēkiti kamakani, kamakori teosonetakani, itanoro minakotokatika sirīkakari, kiki sito ininiua nirekakari, kiki āti kikikata sirīkakari. Ninoa !isari Teoso auītetxi ininiātaāua. ¹⁰ Kītiririni, kamanarerini, poātakani, āti misākirepiretakani, kamisirienenererini pakini ! isari Teoso auītetxi ininiātaāua. ¹¹ Ikara atoko mitxi hītxaua hīte apanakini. Iuaritika himaerekani makatxakaākapeka. Teoso kamai hīte inakitiakori hinini. Apiananiri Xesosi kamaerekatai. Erekarī Matamatakoti, aTeosone nakiti, iua apaka txīkitakai hīte atāo inakari kamakani hininiua.

Maerekati Itotxi Nireēkiti

¹² Nota posotari ikinipoko nikamini, txamari kona erekarī ikinipoko nikamini. Nota posotari ikinipoko nikamini, txamari kona ninirekarī nikamakiti niauīte ininiua. ¹³ Nīpokori kamaāka tikakotxi īkapani. Tikakotxi nirekarī nīpokori. Txamari Teoso xīpokariko nīpokori, tikakotxi pakini. Teoso !inirekarī akaminiri maerekati aīto nireēkiti āti kākiti itokata. Apiananiri kamari aīto iua nireēkiti akamini īkapani. Aīto Apiananiri nakiti.

¹⁴ Teoso ōkitikari Apiananiri ipīkani sauaki. Iua atokokana iua ōkitikaua ate iposotiireē.

¹⁵ Ininiā !apakata Kristo ito hīsikini sito kanokareromoni. !Apakata. ¹⁶ Kiki sirīkasaaki kanokarerokata, iusaaki ātinoka itotxi atoko itxauana ninoa. Teoso sākire iōkatsopatakori sāpiretaua:

Kiki sirīkini sitokata, ātika itotxi atoko itxauana.

¹⁷ Kākiti moianatakasaakiri Apiananiri, ātika xiniretxi atoko itxauana ninoa xinire.

¹⁸ Ātokata hīsirīkini hinirekasaaki, himitekako. Kona hīkaikotape iuaā. Apanakini maerekati kākiti kamakiti !imisiritari hīto. Imisiritari hākixinire. Hīkamakasaakiri maerekati hīto nireēkiti sitokata, himisiritari hīto, hākixinire pakini. ¹⁹ Kona himarotapanikari hīto Erekarī Matamatakoti misākiretiko aikoti atoko ininiua? Hīte itoākarari iua. Teoso sikari iua hītemoni, ininiā hīto kona hīte nakiti. ²⁰ Teoso iamotapekai hīte Xesosi ipīkasaaki, ininiā hīto īki auapitika. Ininiā uatxa iua nakiti hītxaua. Ininiā uatxa hītoā hīpaxitariko Teoso.

7

Ītanorouatiko Sākiretxiti

¹ Uatxa napakapapiretariko mitxi hiōkatsopatakiti notamoni. !Erekarī kiki kaxirotiniro sito. ² Txamari inirekasaakiri sitokata isirīkini, erekarī kiki auini iuaka itanorokata. Erekarī sito auini oaka ōtanirikata. ³ Ininiā erekarī kiki sikiniri iito itanoromoni. Erekarī sito sikiniri oīto oītanirimoni. ⁴ Ītanorotxi ito kona oa nakitinanini. Ōtaniri nakiti apaka oīto. Apaka itaniritxi ito kona iua nakitinanini. Ītanoro nakiti apaka iito. ⁵ Kona hītxape: “Kona ninirekarī nisirīkini pitekata,” kona hītxape. Hinirekasaakiri nīpokori himanikakani Teoso himisākiretini īkapani, atxīti iusaaki !hinirekarī hīsirīkini hītanorokata. Hītanoro apaka kona nirekarī osirīkini hītekata iusaaki, Teosonoka hīxinikini īkapani. Ininiā ikara atoko hīkaminiā erekarī, txamari paītiki eereka iuaīkana hīsirīkako hītanorokata. Ininiā ikara atoko Satanasi kona sikanireōtai maerekati hīto nireēkiti hīkamini āto sitokata hīsirīkini. ⁶ Ikara nota ōtākikai

hīte. Kona nipaniātai ikara hīkamini. ⁷ Notamoni erekari nota atoko hinini. Iuaritika ikinimane aua Teoso siākiti iparīka kamini īkapani. Teoso sikari āti isikakiti ātimoni. Ātiāo isikakiti isika ātimoni.

⁸ Uatxa nimisākiretanako mītanirini, mītanoroni, tikinitakoni pakini. Erekari himītaniriuatakani, himītanorouatakani nota atoko hinini. ⁹ Txamari himaposotakaniāri hītakanapiniri hīto nireēkiti, erekari hītanorouatini, erekari hītaniriuatini, kotxi kapatakari atoko itxa hīto nireēkiti.

Hīkamari Atāo Hītaniriuatakasaaki

¹⁰ Ia nipaniātana kākiti ītaniriuatakani: !Apakata sito takanapiniri oītaniri. Kona notani paniātai. Apiananirira paniātai. ¹¹ Otakanapiniāri oītaniri, ! apakata iuaīkana oītaniriuatini. Erekari oītanirimoni iuaīkana okanapiriini. Iua atokotxikana !apakata kiki takanapiniro ītanoro. ¹² Nōtākikari apanakini. Apiananiri paniātakitī apanakini īkapani !auari, ininiā nota oītākikana ninoā ia atoko: Xesosi sākire auiākari auiniā ītanoro Xesosi sākire mauīākato, oa nirekiniāri okaikotini iuakata, !apakata iua iokanatiniro oa otakanapiniri iua. ¹³ Iua atokotxikana, Xesosi sākire auiākaro auiniā oītaniri Xesosi sākire mauīākati, iua nirekiniāri ikaikotini oakata, !apakata otakanapiniri iua. ¹⁴ Iuasaaki ītaniritxi Xesosi sākire mauīākati apakapari Teoso sākire ītanoro kamakiti ereka atamatakasaaki. Iua atokotxikana, ītanorotxi Xesosi sākire mauīākato apakapari Teoso sākire oītaniri kamakiti ereka oītamatakasaaki. Imakamakaniārīna ikara atoko, !erekana imiakori. Irītxi, inorotxi pakini kaminiāri nōtākikakiti iaōka, erekana imiakori. ¹⁵ Xesosi sākire mauīākati nirekiniāri itakanapiniri ītanoro, oa auiritariko isini. Xesosi sākire mauīākato nirekiniāri otakanapiniri oītaniri, iua auiritaroko osini. Ikara atoko ininiā, ninoā sikakapeēkaika. Ikara atoko ininiā erekari, kotxi Teoso !nirekari aneena-mauatini ikara xika. ¹⁶ Pite ītanorotxi, pimarotatari? Atxiīti pītaniri auikari Xesosi sākire imaerekani makatxakiko īkapani, Xesosi sākire pišāpiretakasaakiri iua. Pite ītaniritxi, pimarotatari? Atxiīti pītanoro auikari Xesosi sākire omaerekani makatxakiko, Xesosi sākire pišāpiretakasaakiro oa.

Teoso Akiritakasaakiri Kākiti

¹⁷ Ininiā ikininape kamariko iparīka Teoso sikakiti iuamoni, kotxi Apiananiri akiritaua ikara parīkatxi akamini. Ikara nipaniātari ikinimane Teoso mereēkini apotiitiniātaāua. ¹⁸ Teoso akiritakasaakiri kiki, Teoso takaōtxikare iītoā auiniā, !apakata Teoso takaōtxikare makatxakiko. Teoso akiritakasaakiri kiki, Teoso takaōtxikare iītoā mauakaniā, !apakata Teoso takaōtxikare iītoā takiko. ¹⁹ Teoso takaōtxikare hītoā auiniā, ikara kona txīkitakai Teoso anaakori hininiua. Teoso takaōtxikare hītoā mauakaniā, ikara apaka kona txīkitakai Teoso anaakori hininiua. Teoso nireēkiti iaōka kamiko txīkitakai Teoso anaakori hininiua. ²⁰ Teoso akiritakasaakii, iuasaaki mitxi hīparīka hīkamapanikako. ²¹ Teoso akiritakasaakii, nitiritxi amotakori hininiāua, ininiā kona maerekaxinireti hītxapeua nitiritxi hininiua xika. Iuaritika hīauīte sikakiniāi, ininiā hīsako. ²² Apiananiri akiritiniāri nitiritxi amotakori, Apiananiri sikakakiti itxaua iua. Apiananiri akiritiniāri nitiritxi minakatiua, Apiananiri nitiri iamotakiti itxaua iua. ²³ Xesosi amotakini hītxaua, ininiā iuaīkana kākiti nitiri iamotakoni !hītxapeuako. ²⁴ Nitariakori, Teoso akiritakasaakii, iuasaaki mitxi hīparīka hīkamapanikako.

Mitxitakani, Tikinitakoni Pakini

²⁵ Uatxa nōtākikai hīte mitxitakani. Apiananiri kona sāpiretano ipaniātakitī hīte īkapani, iuaritika nisāpiretai nixinikakiti, kotxi Apiananiri amonīkapekano, ininiā kākiti posota auikiniri nisākire. ²⁶ Īkorasaaki pamonōkoniri Xesosi sākire auiākanimoni, ininiā notamoni apiaerekata

kâkiti mîtanorouatakani. ²⁷ Hîtanorouatapeka hininiã, kona hîtakanapapero hîtanoro. Mîtanorouatakatipanika hininiã, kona hinitapero hîtanoro. ²⁸ Iuaritika hîtanorouatiniã, maerekati !hîkama. Kâkiti îtanorouatiniã, apokapitikako ninoa maxikiko. Kona ninirekari ikara atoko hîte îkapani.

²⁹ Nitariakori, poião ôtinoka aua aparîkauatini Apiananiri îkapani. Ininiã hîte kîtanororini parîkauatako Teoso îkapani mîtanoroni parîkauatini atokotxikana. ³⁰ Txiapatakari parîkauatako Teoso îkapani, kâkiti matxiapatakati parîkauatini atokokana. Poxokori parîkauatako mapoxokoniti parîkauatini atokokana. Tiitxi amotakari parîkauatako Teoso îkapani, tiitxi mauakiniti parîkauatini atokokana. ³¹ Îkorapokoriti tiitxi auakini ! ixinikapiriko itiina, kotxi îkorapokoriti kâkiti potxitakiti xipokaãpota.

³² Ninirekari erekaxinire hinini. Kiki mîtanoroti posotari ixinikiniri kana-tokopa iparîkauatini Apiananiri ikamapoxokonitini îkapani. ³³ Txamari kiki kîtanorori xinikari parîkatxi îkorapokoritikiri, kotxi inirekari ikamapoxokonitiniro îtanoro. ³⁴ Mîtanirito, mitxitakaro pakini nirekari oparîkauatini Apiananiri îkapani, kotxi onirekari oîto, oxinire pakini osikini iuamoni. Txamari sito kîtaniriro xinikari parîkatxi îkorapokoriti auakari, kotxi onirekari ôtaniri okamapoxokonitini. ³⁵ Ikara atoko nisãpiretai hîte, hîte ereka hinini îkapani. Kona ninirekari nimauiritakanii erekari hãpakapini. Ninirekari atãonoka hîkamini. Ninirekari hîparîkauatini Apiananirinoka îkapani.

³⁶ Ætokoro iri atxiîti ! auiritapanikaro oa îtaniriuatini, txamari oaneẽpeka. Ætokori nirekiniãri itakiniro oa, erekari iua auiritiniri iua. ! Ikamari maerekati. Erekari iua auiritinina ninoa îtaniriuatini. ³⁷ Atxiîti Ætokoro iri Ækixinireẽ ! inirekaro oa îtaniriuatini. Atxiîti ! isikaenetaro oa Ætimoni. Iua xinikakiti omîtaniriuatakani îkapani pataparari ininiã, Ækixinireẽ imarotiniãri inireẽkiti oa mîtaniriuatakani, ininiã iua kiki kamari erekari. ³⁸ Oa sikakari oîtaniriuatini îkapani kamari erekari. Iuaritika oa masikakati oîtaniriuatini îkapani kamari apiaerekata.

³⁹ Teoso paniãtakiti iõkatsopatakori paniãtaro sito kaikotini oîtanirikata iua auapanika inakasaaki. Iua ipininiã, apakata oîtaniriuatini onirekakitikata. Txamari Apiananiri sãkire auiaãkarikatanoka apakata oîtaniriuatini. ⁴⁰ Notamoni oa apia poxokoniuata omîtaniriuatakaniã iuaïkana. Ikara atoko inakari nõtãkikaro sito, kotxi nimarotari Erekari Matamatakoti Teoso nakiti aua notamoni.

8

Nipokori Teoso Kamakori Sikiko

¹ Uatxa nisãpiretai nipokori sikiko teoso kâkiti kamakitimoni. Amakinika aimarotari ikara. Ikara inakari aimarotapeka ate. Kâkiti imaroretxi auiniã iuikaua. Apiaerekata kâkiti auini tiraõkitxi, kotxi isikataparatarari kâkiti xinire.

² “Kimaroreno nota” inakari ! auari imaroretxi. Kaiãopokori imaroretxi imimarotakiniti aua. ³ Iuaritika kâkiti tiretiniãri Teoso, Teoso imarotari iua.

⁴ Maxinikari nipokori teoso kamakorimoni sikakori. Aimarotari teoso kâkiti kamakiti !kakamareri. Aimarotari Ætika Teoso atão inakari aua. ⁵ Aua kâkiti kamakiti. Kâkiti takauãkatari “teoso” itxaua. Kâkiti takauãkatari teoso iaxiti auakani, îkorapokoriti auakani apaka. Kaiãopokori ikara atoko inakari teosoakori aua. Kaiãopokori ikara atoko inakari auîtetxiakori aua. ⁶ Atemoni Ætika Teoso aua. Iua aïri iaxitikiri. Iua kamari ikinipoko. Aparîkauata iuanoka îkapani. Ætika aãuîte aua, Xesosi Kristo. Ikini sereti kamakari iua. Iua posotiireẽ aãuini aua.

⁷ Apanakini ! imarotapanikari kâkiti kamakiti teoso minakaniua, kotxi mitxi iteene itotarina teoso kâkiti kamakiti. Ininiã inikasaakirina nipokori

teoso kamakorimoni siākori, iuākatarina ikara nipokori teoso atāo inakarimoni siākori. Iuasaaki ninoa uākatari maerekati ikaminina, kotxi ākixinireēna !iteene imarotarina atāo inakari. ⁸ Txamari nipokori !itxīkitakaua Teosomoni asini. Ikara nipokori anikini !imisiritaua. Apaka !ikamari ereka anini.

⁹ Iuaritika erepaniko. Hinirekiniāri ikara nipokori hinikini, hīxinikariko apanakini Teoso sākire poiāonoka auiākani. Ninoa imarotiniāri hīte nikiniri ikara nipokori, ininiā ninoa apaka nikari, txamari iuasaaki ninoa kamari ākixinirena manirekakiniti. ¹⁰ Teoso sākire poiāonoka auiākari atamatiniāi Teoso sākire iteene imarotakari nikiniri nipokori teoso kamakori misākiretiko aikotiā, isikataparaxiniretari iua apaka nikiniri nipokori teoso kamakorimoni siākori. ¹¹ Ininiā pimarore xika, atxiīti pitari Teoso sākire poiāonoka auiākari sari imisiritikomoni. Kristo ipina iua ĩkapani apaka. ¹² Ikara maerekati hītarimoni hīkaminiā, hīkarotari ākixinire. Hīteri ākixinire hīkarotakasaaki, hīkamari maerekati Kristomoni. ¹³ Ininiā nipokori ninikini txīkitakiniāri nitari kaminiri maerekati, itixi auapanika inakasaaki kona ninikaikari iua nipokori, kotxi kona ninirekari nitari kaminiri maerekati.

9

Teoso Iokanatakini Kākitimoni

¹ Teoso iokanatakiti nitxaua. Ninireēkiti niposota nikamini. Naōkitapekari Xesosi Kristo aāuīte. Iparīka nikamakasaaki, hīte auikari Apiananiri sākire.

² Atxiīti apanakini !auikari Teoso iokanatakiti nininiua. Hītera auikari Teoso iokanatakiti nininiua. Hītera oerekari Apiananiri iokanatakiti nininiua, kotxi hīte auikari Apiananiri sākire, nota sāpiretakasaakii hīte.

³ Kākiti mauikakaniāri Teoso iokanatakiti nininiua, napakapapiretana nino ia atoko: ⁴ Apakata atxiīti aāpakapiniri nipokori, iāriā pakini aparīkauatini ĩkapani? ⁵ Apakata atxiīti ate anikiniro ātanoro Teoso sākire auiākaro atekata, apanakini Teoso iokanatakini, Apiananiri itariakori, Petro pakini anikinina ninoa ĩtanoro atokotxikana? ⁶ Atxiīti apakata Panapee, nota pakininoka parīkauatini anikakiti aāpakapini ĩkapani?

⁷ Sotato sikasaaki ineenamauatini ĩkapani, iuaka !iamotari anikakitina. Aua atxiīti ova takakari. Ova itakakiti matximakati aua? !Auari. Kona auari kema auīte piratakari ipira tiniā miātakati.

⁸ Ikara nisākire kona kākiti sākirenanini. Iua atokotxikana Teoso sākire. ⁹ Moisesi iōkatsopatapekari Teoso paniātakiti. Ia atoko itxa:

Kona hiītxikari kema auīte nama trikopani ikamakasaaki. Hāuiritariko inikini. Teoso tiretataru kema auīte? Itiretapitikari. ¹⁰ Apiata isāpiretari ikara kākiti parīkauatakani ĩkapani. Ininiā takarauatakari takarauata, kotxi inirekari ikiena inikini. Kienatxi apakari aparī ikiena, kotxi inirekari ikiena inikini.

¹¹ Katarareri takarauatini atokokana, ate takari Teoso sākire hākixinireē. Katarareri nikari ikiena itakakiti, ininiā atxiīti apakata ate apakapiniri kienatxi hīte sikakiti? Kotxi ate parīkauata hīte ĩkapani. ¹² Apakatiniā apanakini apakapiniri iparīkana ĩki hīte sikakiti, ininiā apiata apakata ate apakapiniri ate parīka ĩki, iuaritika kona aamanaāri hīsikiniāua ate parīka ĩki. Amīteenekari ikinipoko, kotxi !anirekari aiotokakiniri Kristo iokanapirena erekari hīkenakotini. ¹³ Himarotari Teoso misākiretiko aikoti āki parīkauatakani iuaātaā apakapari ikiena. Teosomoni sikakori takikoātaā parīkauatakani apaka apakapari ipixini iuaātaā siākori inikinina ĩkapani. ¹⁴ Iua atokotxikana Apiananiri paniātari iua iokanapirena erekari sāpiretakani apaka apakapiniri iparīkana ĩki.

¹⁵ Ikara atāopitikara, iuaritika kona nipaniātai ikara atoko hīkamini. Kona niōkatsopatarī ikara, niparīka īki notamoni hīsikini īkapani. Niparīka īki namanainii apisa erekape nipinini. Niuikari niparīkauatini hīte īkapani hītxineirote nimapakapakanisaaki. ¹⁶ Teoso iokanapirena erekari noereka, iuaritika ! apakata niuikiniua, kotxi Teoso sikari ia parīkatxi notamoni. Nimisiritiko auapitika, Teoso iokanapirena erekari nimasāpiretakaniā. ¹⁷ Teoso iokanapirena erekari nisāpiretiniāri kākiti, nākixinireē iteene ninirekiniāri ikara nikamini, ininiā napakapapitikariko niparīka īki. Nimanirekakaniāri ikara nikamini, iuaritika nikamari, kotxi Teoso sikari ikara parīkatxi notamoni nikamini īkapani. ¹⁸ Ia atoko niīkitxitiko: Teoso iokanapirena erekari nisāpiretakasaaki, kona minakati napakapa. Ikara atoko kamapoxokonitari nākixinire, kotxi maīkitika nisāpiretai Teoso sākire. Teoso iokanapirena erekari sāpiretakari nitxaua, ininiā niposotiire auapitika hīkitxitinino nota nipaniātiniāi hīte, iuaritika ! ninirekari ikara atoko nikamini nota nireēkiti napakapini īkapani.

Parīkatxi Ikinimane Īkapani

¹⁹ Ninireēkiti nikama. Kākiti nitiri iamotakori !nitxaua. Iuaritika notaka nitxīkitakaua ikinimane nitiri nininiua, Teoso sākire apikomoni kākiti auikini īkapani. ²⁰ Xoteoakori sauaki niparīkauatakasaaki, Xoteo auini atoko nitxa nota auini. Ikara atoko ininiā, Xoteoakori auikari Xesosi sākire. Moisesi paniātakiti iaōka kamakani sauaki nauakasaaki, ninoa auini atokokana nitxa nota auini, kotxi ninirekari Moisesi sākire auīākani auikiniri Xesosi sākire. ²¹ Xoteo minakaniua limarotari Moisesi paniātakiti. Ininiā ninoakata nauakasaaki, kona nipaniātari Moisesi paniātakiti ikaminina, Xesosi sākire auikinina īkapani. Iuaritika nikamari Teoso paniātakiti, kotxi iuatxikana Kristo paniātakiti nikamini. ²² Kākiti mataparaxinirenikata nauakasaaki, nota apaka kona kataparaxinireno, Xesosi sākire auikinina īkapani. Ikinī kākiti sauaki nauakasaaki, nikamari kākiti auini atoko nitxa nota auini, ininiā ikinipoko niposotakiti nikama apanakini maerekani makatxakiko īkapani. ²³ Ikara atoko nikama Teoso iokanapirena erekari nisāpiretini īkapani. Nikamari ikinipoko, Teoso iokanapirena erekari nisāpiretini īkapani. Ikara atoko ininiā, nota apaka apakapari Teoso iokanapirena erekari hītekata.

Saporiēta Apakapakari

²⁴ Himarotari mitekatxi. Kākiti miteēkani miteka, iuaritika ātinoka apakapari imitekini īki. Merepitipanika mitekatxi mapotōkire apokakarinoka apakapari imitekini īki. Ininiā miteēkari atoko hītxako. Hīsapitipo. Teoso parīka hīkamapitipo hīparīka īki hāpakapini īkapani. ²⁵ Ikinī miteēkari parīkauatapitipo iīto tapara iteene auini īkapani. ! Auiritari iīto misiritakari. Ikara atoko ikama, saporīeta imitekini īki apakapini īkapani. Ikara saporīeta kona okanani aua. Oxipokapitikako. Ate parīkauatapitipo ātiāo aāpakapakiti aāpakapini īkapani. Ikara aāpakapakiti !ixipoka. ²⁶ Miteēkari isinimoni mimarotakati atoko !nitxaua. Nimarotari nisinimoni. Nisapitipo mitekatxi mapotōkiremoni. Maxikatīka !nineenamauata. Na neenamauata nisanōkakata. ²⁷ Nitxīkitakari niūto ninitiri ininiua, nota nireēkiti ikamini īkapani, kotxi nisāpiretāpekari ikara apanakinimoni, ininiākara kona ninirekari nimapakapaniri notaka parīka īki.

¹ Nota nirekari hīxinikiniri kitxakapirīka, aātokiriakorini takanapakasaakiri Exito tixini, ikinika ninoa aua katxiāri patapi. Iua katxiāri oerekana isinimonina. Apaka ikinika ninoa napari potxoari uiniti āki. ² Ninoa sari Moisesikata, ininiā katxiāri patapi auakasaakina, potxoari uiniti patapi auakasaakina, iuasaaki ninoa patxisatiko atoko aua iuasaaki. ³ Ninoa ikinikana nikari xinitxi Teoso iokanatakiti. ⁴ Ninoa ikinikana iātari āparaā Teoso sikakiti. Ninoa iātari āparaā kai auīteākiriā. Kristo iua kai auīte āparaā potorikiniātaā atokokana. Iua sari ninoakata. ⁵ Txamari Teoso ! apokaerekatari kaiāopokori ninoa, ininiā ipinana. Iītona iarika āparaā makipakaniātaā.

⁶ Uatxa axinikana ninoa, ininiā aimarotari amanirekakaniri maerekati ninoa nirekiniri atoko. ⁷ !Hīteosonetapiri kākiti kamakiti, ninoa apanakini teosonetiniri atokokana, kotxi Teoso sākire iōkatsopatakori txari: Ninoa topāka inipokotinina īkapani, iātinina īkapani, eereka ōkitikauana isarauatinina īkapani teoso ikamakitina apisatoō.

⁸ !Apakata aanokarauatini ninoa apanakini anokarauatini atoko, kotxi āti ōtinokara vītxi tres mio ninoa okaāka īkora maerekati xika. ⁹ !Apakata aātamakaerekatiniiri Kristo ninoa apanakini kitxakapirīka atamakaerekatiniiri atoko, kotxi iua xika imini okana ninoa. ¹⁰ !Hītsoatape, ninoa apanakini kitxakapirīka tsoatini atokokana, kotxi eereka Teoso nitiri xipokana ninoa.

¹¹ Ikara imisiritikona apoka ninoamoni apanakini pinitiko īkapani. Ikara imisiritikona iōkatsopataāka ate pinitiko īkapani, kotxi itixi mapotōkire ōti apokaāpota. ¹² Hītemoni ereka hinini, ininiā erepaniko, kotxi atxiīti paītiki hīkamari maerekati. ¹³ Hīte atamakaerekataāka ikinimane atamakaerekataāka atokotxikana. Iuaritika Teoso !itakanapai hīte. Kona iua auiritari hātamakaerekatiko himamīteenekakiniti. Iuasaaki oerekai himitekini, ininiā hīposotari himīteenekiniri.

Teoso Kākiti Kamakiti

¹⁴ Ininiā nitariakori nota tirketakini, himiteka teoso kākiti kamakiti hītakanapini. ¹⁵ Hīte kākiti kimarorerini, ininiā iteene himixinikariko nisākire. ¹⁶ Iāriā aātakasaaki, akinika aāpotiitakasaakiua, axinikari Xesosi ipinini. Iuasaaki atxari Teoso: “Erekapitikai, kotxi Xesosi arēka xiketa ate īkapani.” Amaxiōpekitaakasaakiri komiri, anikasaakiri, aāpitiitakasaakiua, axinikari Kristo īto noropatiko ate īkapani. ¹⁷ Iuasaaki itomaneua ate, iuaritika ātika komiri atokokana atxaua. Ātika ītotxi atokokana atxaua, kotxi amakinika anikari ātika komiri. Ikara komiri Kristo īto atokokana itxaua.

¹⁸ Hīxinikanako kākiti Isaeokini īkorapokoritikini. Ninoa sikari Teoso xinitxi. Eereka ninoa nikari ikara xinitxi. Inikasaakirina ikara xinitxi, iuasaaki ninoa oerekari iTeosonetinirina iua. ¹⁹ Kiripa ninireka nisāpiretinii? Nisāpiretari teoso kākiti kamakiti kona kakamareri. Iua teoso siākori kona itxa. ²⁰ Iuaritika erepaniko. Ikara atāo maerekati. Xoteo minakaniua sikakiti teoso kākiti kamakitimoni ninoa sika Satanasi nitiriakorimoni. Kona Teoso atāo inakari isikana isiākitina. Ininiā na ninirekari hīte moianatiniri Satanasi nitiriakori. ²¹ Kona hīposotari Apiananiri iākoanaā hiātini, apaka Satanasi nitirini iākoanaā hiātini. Kona hīposotari Apiananiri kiena hinikini, apaka Satanasi nitirini kiena hinikini. ²² Atauako anirekatari akaminiri Teoso naiatinuia? Ate tapara apiata atxiīti?

Xesosi Auiākani Kamakiti

²³ Nota posotari ikinipoko ninireēkiti nikamini, txamari kona ikinika erekari nikamini. Ikinipoko ninireēkiti niposotapitika nikamini, txamari kona ikinipoko kamari nākixinire aneini. ²⁴ !Hinitapiriko hīteka nireēkiti hāpakapini. Himoianatariko āti iua nireēkiti apakapini.

²⁵ Hīposotari hinikiniri nipokori amotakoriātaā auakari. Iuasaaki kona hīpimaāpiri: “Ia nipokori sikaākapeka teoso kākiti kamakitimoni?” !hītxapeko. Kotxi himarotakasaakiri hinikiniri nipokori teoso kākiti kamakitimoni sikiko, hākixinire karotaāka atxiīti. ²⁶ Teoso sākire sāpiretaua: Itixi Apiananiri nakiti itxaua, ikinika itixi auakani pakini.

²⁷ Xesosi mauiākani aiatakasaakii hīte hinipokotini ninoakata, hinirekiniāri hīsa. Hinikariko isikakitina. Kona hīpimaāpiri: “Ia nipokori teoso kākiti kamakiti sikaākapeka?” kona hītxape, hākixinire himakarotakaniri īkapani.

²⁸ Txamari apanakini kākiti iuaā sāpiretakasaakii: “Ia nipokori sikaākapeka teoso kākiti kamakitimoni,” itxa. Iuasaaki kona hinikapiri, kotxi atxiīti hīkaroxiniretari ikara kākiti mataparaxinireti, kotxi:

Itixi Apiananiri nakiti itxaua, ikinika itixi auakani pakini.

²⁹ Na nitxai: “Kona hinikapiri ikara, hīteka ākixinire himakarotakani īkapani,” ! nitxai. Nitxai: “! Hinikapiri ikara, āti kākiti ākixinire himakarotakani īkapani.” Nota ākixinireē nota nireēkiti nikamini īkapani erekari. Āti kākiti ākixinireē nota nirekakiti nikamini īkapani !erekari, ininiā iuamoni ikara nikamakasaaki, nikamari maerekati. Kinirepa !apakata nikaminiri nota ākixinire auritakiti? ³⁰ Napakapakasaakiri nipokori, ininiā iuasaaki nimisākiretari Teoso erekari isikakiti. Ininiā kinirepa nimisākirepiretaāka?

³¹ Nisāpiretai hīte. Hinikasaaki, hiātakasaaki, ikinipoko hīkamakasaaki, hīkamariko ikinika Teoso ereka inini imarotiko īkapani. ³² Kona hītxīkitakapiri, Xoteoakori, Xoteo minakaniua, kākiti Xesosi sākire auiākani pakini kaminiri maerekati. ³³ Ninirekari ikinimane kākiti nireēkiti nikamini, ikinika nika-makasaaki. !Ninirekari erekari notanani īkapani. Ninirekari erekari ito-maneri īkapani, imaerekanina Xesosi makatxakini īkapani.

11

Sitoākini Xesosi Sākire Auiākani

¹ Hīkamariko nota kamakiti atoko inakari. Kristo kamakiti atoko nota kamini atokotxikana hīkamako. ² Nitariakori, peerekai hīte, kotxi iteene hīxinikano nota. Peerekai hīte, kotxi hīkamapanikari noereēkiti nisāpiretakiti iaōka.

³ Ninirekari himarotiniri ia: Kiki auīte Kristo itxaua. Sito auīte kiki itxaua. Kristo auīte Teoso itxaua. ⁴ Ininiā kiki ikii māka imamakatzakakaniā Teoso imisākiretakasaaki, apaka Teoso sākire oerekasaaki, kona ipaxitari iauīte Kristo.

⁵ Sito okii māka mauakaniā Teoso omisākiretakasaaki, apaka Teoso sākire oerekasaaki, kona opaxitari oāuīte oītaniri. Okii māka omatakakaniā, oa kii kixākakori atoko itxa. ⁶ Okii māka omanirekakaniā, ininiā ok-isauakaiākotaākako. Opētauatiniā, okii kixākiko xika, oiāko kisauakiko xika, ininiā iuasaaki okii māka otaka. ⁷ Kiki misākiretakasaakiri Teoso, kona erekari itakiniri ikii māka, kotxi Teoso atoko itxa iua. Ikamaāka Teoso ereka oerekini īkapani. Sito kamaāka oītaniri ereka oerekini īkapani. ⁸ Merepitipanika Teoso kona kamari kiki sito iōā. Teoso kamaro sito kiki iōā. ⁹ Kiki kona kamaāka sito īkapani. Sito kamaāka kiki īkapani. ¹⁰ Ininiā oa takari okii māka. Ikara atoko ininiā, oerekari oauītetiniri oītaniri. Iuasaaki Teoso nitiriakori iaxitikini apaka imarotari oauītetiniri oītaniri.

¹¹ Kiki, sito pakini Apiananiri sākire auikasaaki, sito nirekari kiki. Kiki nirekaro sito. !Apakata sitonoka auiniā. !Apakata kikinoka auiniā. ¹² Kotxi sito ina kiki iōā. Eereka ikinipoko kiki iponaniā sito iōā. Ikara atoko itxapitikama, Teoso kamari ikinipoko. ¹³ Hīteka hīxinikapiretari ia: Sito kii māka mauakaniā, iuasaaki atāokani Teoso omisākiretini? ¹⁴ Kākiti itotakiti oerekaua kiki itanoiākori pētatiko. ¹⁵ Sito auiniā oiāko paītanori, oūikari oiāko,

kotxi oiāko sikaāka okii ipatakari īkapani. ¹⁶ Kākiti nirekiniāri ineenamauatini iākotxi pirena xika, ininiā kona ate, ikinika Teoso sākire auiākani pakini !auari ikara. Ininiā !apaniātai ikara atoko inakari hīkamini.

Xesosi Ipinini Xinikiko Kiiniriti

¹⁷ Uatxa niōkatsopatakitiā kona niuikai, kotxi hāpotiitakasaakiua, apia erekari kona hīkama. Apiata maerekati hīkama. ¹⁸ Merepanika nikenakopiretari hāpotiitakasaakiua Teoso misākiretiko aikotiā hītaparakienatakakiniua. Nixinikari ipixini ikara nikenakopiretakiti atāo inini. ¹⁹ Apanakini oerekakiti atāo minakati auapitika hīte sauaki. Akenakotakasaakiri ninoa oerekakiti, aimarotari Teoso !apokaerekatana ninoa. Iua apokaerekatana iua sākire atāo inakari oerekakani. ²⁰ Hāpotiitakasaakiua, kona atāo hīkamari kiiniri, Apiananiri ipinini xinikiko kiiniriti. ²¹ Kotxi hinikasaaki, himixirikari hīkiena apanakini nikiniri apisapanika. Ininiā apanakini natxita, apanakini poāta iuasaaki. ²² Auapitika haāpoko hinikini īkapani, hiātini īkapani. Hāpotiitakasaakiua, homanataro apanakini Xesosi sākire auiākani. Hīkamapētataro aītariakori matini. Kiripa nitxai hīte? Atxiīti hinirekari niuikini? Kona xatiki niuikai hīte.

²³ Apiananiri sāpiretakiti notamoni, iua atokotxikana nisāpiretapekai hīte. Ia nisāpiretai: Īkanōka Apiananiri Xesosi mīkapiritiko ōtisaaki, iua kosekari komiri. ²⁴ Iuasaaki imisākiretari Teoso: “Erekapitikari ia komiri pisikakiti atemoni,” itxa. Iposo atoko imaxiōpekari iua komiri, sika itxari imoianari-akorimoni. Itxana: “Apakapa, nika hītxako. Ia niūto okaāka hīte īkapani. Ia komiri hinikasaaki, hīxinikanoko nota. Hīxinikari nipinini hīte īkapani,” itxa. ²⁵ Ninoa nipokotaka atoko, mitxi komiri ikosekini atokokana, ikosekari iākoanatxi. Iuasaaki itxana: “Ia iākoanatxi oerekari Teoso kamapekari ikamaenetakiti amaneri, kotxi niarēka xiketa hīte īkapani. Ia iāriā hiātakasaaki, hīxinikanoko nota. Hīxinikariko nipinini hīte īkapani,” itxa Xesosi.

²⁶ Ia komiri hinikasaaki, ia iākoanatxiākiri hiātakasaaki, hōerekari Apiananiri ipinini kākiti īkapani. Ikara hōerekiniritika iua īkorapokoriti kanapiriāko.

²⁷ Maxikatiīka kākiti nikiniāri ia komiri, maxikatiīka iātiniāri Apiananiri iākoanaākiri, ikamari maerekati, kotxi !ipaxitari Apiananiri īto, iarēka pakini. ²⁸ Ia komiri hinikini apisapanika, ia iākoanatxiākiri hiātini apisapanika, erekari hīxinikiniri hākixinireē auakari. Maerekati auakasaaki, hamanaāri Teoso imakatzakiniri īkapani. Eereka ia komiri hinika, ia iāriā hiāta. ²⁹ Maxikatiīka hinikiniāri, hiātiniāri, ininiā hīteka akiritari himisiritiko apokini, kotxi kona hīpaxitari Apiananiri īto. ³⁰ Ikara xika itomaneri hīte sauaki iōkapeta. Ikara xika apanakini amianata. Ikara xika apanakini ipīpeka.

³¹ Amaerekani anitiniā, aamanainiāri Teoso makatzakiniri amaerekani, ininiā amisiritiko kona apoka. ³² Txamari Apiananiri apokiniāri amaerekani, imisiritaua ate uatxa, amaerekani atakanapini īkapani, ininiā eereka !imisiritalkaua iua sākire mauīākanikata.

³³ Ininiā nitariakori, hāpotiitakasaakiua Xesosi ipinini xinikiko kiiniriti īkapani, hiātapana apanakini. ³⁴ Hinatxitiniā, hinipokotako hāapoko. Ininiā hāpotiitakasaakiua !hīkamari maerekati, ininiā Teoso !imisiritai. Apikomoni nōtākikai ereē napokasaaki.

12

Erekari Matamatakoti Sikakiti Kākitimoni

¹ Nitariakori, ninirekari himarotini Erekaro Matamatakoti sikakiti. ! Apakata himimarotakaniri. ² Mitxi Xesosi sākire mauīākani hinakasaakiua, himisirienetaāka, ininiā hāuikari teoso kamakori masākireti teoso atāo inakari ininiua. Ikara himarotape. ³ Kākiti sāpiretiniāi hīte: “Maerekati

kamakari itxaua Xesosi,” ininiã iuasaaki himarotari Erekarî Matamatakoti !auari iuamoni. Kãkiti sãpiretiniã hîte: “Apiananiri itxaua Xesosi,” ininiã iuasaaki himarotari Erekarî Matamatakoti auapitika iuamoni, kotxi ikara iua oerekakiti.

⁴ Erekarî Matamatakoti siãkiti ikini sereti aua, iuaritika Erekarî Matamatakoti âtinoka aua. ⁵ Ikini sereti parîkatxi Teoso îkapani aua, iuaritika Apiananiri âtinoka aua. ⁶ Ikini sereti Teoso kamakiti aua kãkiti îkapani, iuaritika Teoso âtinoka aua.

⁷ Erekarî Matamatakoti iuaka oerekaua kãkitimoni, ikinimane ereka inini îkapani. ⁸ Iua Erekarî Matamatakoti sikari apanakinimoni isãkire kiîkiterini ininiuana îkapani. Iua Erekarî Matamatakoti sikari apanakinimoni isãkire kimarorerini ininiuana îkapani. ⁹ Iua sikari apanakinimoni Teoso sãkire iteene auikinina îkapani. Isikari apanakinimoni amianatakani imakananitinina îkapani. Erekarî Matamatakoti âtinoka aua, iuaritika ikini sereti isika kãkitimoni. ¹⁰ Apanakini isikaposotiireta posotiiretxi ikaminina îkapani. Apanakini isikaimaroreta Teoso sãkire isãpiretinina îkapani. Apanakini isikaimaroreta Erekarî Matamatakoti sãkirauatakasaaki imarotininina îkapani, maerekati matamatakoti sãkirauatakasaaki imarotininina îkapani apaka. Apanakini isikaimaroreta ikini sereti kãkiti sãkire isãkiretinina. Apanakini isikaimaroreta ikara sãkiretxi mimarotakoti ikenakotakasaakina, isãpiretinirina iua kenakotakani ninoa sãkireẽ ninoa apaka imarotiniri îkapani. ¹¹ Âtinoka Erekarî Matamatakoti aua. Iuanokara parîkauata ikara atoko. Isikari ikara isikakiti kãkitimoni inireẽkiti iaõka.

Kristo Îto Pirena

¹² Kãkiti îto âtinoka aua, iuaritika aua ikii, ikanoke, iuako, itapike, ikiti, txaãpota. Itori ikara atoko inakari aua îtotxiã, iuaritika âtinoka îtotxi aua. Iua atokokana itxa Kristo îto. Xesosi sãkire auiãkani Kristo îto atoko itxauana. ¹³ Atxiîti Xoteoakori atxaua. Atxiîti Xoteo minakaniua atxaua. Atxiîti nitiritxi amotakoni atxaua. Atxiîti nitiritxi minakatiua atxaua. Iuaritika âtika îtotxi atoko atxaua, kotxi Erekarî Matamatakoti âtinoka inakari apoka atemoni. Iua apotiitaua âtika îtotxi atoko anini îkapani. Iua aua aãkixinireẽ.

¹⁴ Kãkiti îto âtinoka aua, iuaritika aua ikii, ikanoke, iuako, itapike, ikiti, txaãpota. Îtotxiã kaiãopokori aua. ¹⁵ Ininiã !apakata kitîtxi sãpiretiniã: “Uakõtxi !nitxaua, ininiã îtotxiã auakari !nitxaua.” Ikara atoko isãpiretiniã, iuaritika îtotxiã auakaripitikara kitîtxi. ¹⁶ Kenakokitxi sãpiretiniãri: “Okîtxi !nitxaua, ininiã îtotxiã auakari !nitxaua.” Ikara atoko isãpiretiniã, iuaritika îtotxiã auakaripitikara kenakokitxi. ¹⁷ Îtotxi okîtxinoka auiniã, kanatokopa itxa kãkiti kenakorauatini? Îtotxi kenakokitxinoka auiniã, kanatokopa itxa kãkiti imixikarauatini? ¹⁸ Teoso kamari ikinika îtotxiã auakari. Iua inireẽkiti iaõka ikaminana ninoa. ¹⁹ Âtinoka îtotxi auakiti auiniã, îtotxi !auari. ²⁰ Îtotxiã auakani itori aua, iuaritika îtotxi âtinoka aua.

²¹ Okîtxi kona posotari isãpiretiniri uakõtxi: “Kona nota nirekai pite.” Apaka kiîtxi kona posotari isãpiretiniri kitîtxi: “Kona nota nirekai pite.” ²² Kona ikara atoko itxa. Atxiîti auãkatari âti aïto auakari !itxa, kotxi !kataparari, iuaritika ikara mauakaniã, aïto !iparîkauata atão. ²³ Kãkiti tiretari iïtoã auakari poiãori kãkiti atamatakiti. Ipatari apanakini iïtoã auakari kãkiti matamatakani îkapani. ²⁴ Aïtoã auakari apiata apotxitakiti aua apaka. Kona apatari ikara. Apanakini aïtoã auakari Teoso takari aïtoã iteene apaxitini îkapani. ²⁵ Ininiã Teoso kamari îtotxi âtinoka inini. Ikamari îtotxiã auakani itiretakaniuana îkapani. Apanakini îtotxiã auakari naiatiniãri apanakini iïtoã auakari, !apakata. ²⁶ Âti îtotxiã auakari tsïka. Iuasaaki ikinika kãkiti

īto atatsiirauata. Āti ītotxiā auakari iuikaāka, ininiā ikinika ītotxi auakini poxokoniūata.

²⁷ Kristo īto atoko hītxaua hīte. Ītotxiā auakani atoko hītxaua Kristo ītoā. ²⁸ Teoso sākire auiākani ītotxiā auakani atoko itxauana. Ikini sereti parīkatxi aua ītotxi īkapani akamini īkapani. Merepanika Teoso mereēri iua iokanatakini. Eereka imereēri kākiti Teoso sākire sāpiretakani. Eereka imereēri kākiti Teoso sākire oereēkani. Eereka imereēri kākiti Teoso posotiire oereēkani, amianatakani makananitakani, kākiti moianatakani, auītetxiakori, kākiti sākire apanakini mimarotakiniti sākiretakani pakini. Teoso takari ikara atoko inakani parīkauatakani iua sākire auiākani imoianatinina īkapani. ²⁹ Kona ikinimaneni Teoso iokanatakini txaua. Kona ikinimaneni Teoso sākire sāpiretakani txaua. Kona ikinimaneni Teoso posotiire oereēkani txaua. ³⁰ Kona ikinimaneni amianatakani makananitakani txaua. Kona ikinimaneni imarotari isākiretiniri kākiti sākire apanakini mimarotakiniti. Ikinimane !iposotari isāpiretiniri ikara sākiretxi iua kenakotakanimoni ninoa sākireē ninoa apaka imarotini īkapani. ³¹ Auapitika ikara Erekarī Matamatakoti sikakiti aparīkauatini īkapani. Iuaritika hinirekariko isikakiti apiaerekatakari. Uatxa noerekaiko isikakiti apiaerekatakari.

13

Tiraōkitxi Pirena

¹ Atxiīti nimarotari ikini uāka sākire nisākiretini. Atxiīti nimarotari Teoso nitiriakori iaxitikini sākire nisākiretini, txamari iuasaaki nitiraōkiuatini !auari, ininiā !apakata nimarore. Metao āsokiko ene atoko nitxa. Ipi panera tore āsokiko ene atoko nitxa. ² Atxiīti nimarotari Teoso sākire nisāpiretini. Atxiīti nimarotari ikinipoko apanakini mimarotakiniti. Atxiīti ikinipoko imaroretxi aua notamoni. Atxiīti iteene nauikari Teoso posotiire, ininiā niposotari ōtanoxiratarī nipaniātini ātiātaā isini. Txamari iuasaaki nitiraōkiuatini !auari, ininiā minakati nitxaua. ³ Atxiīti nisikari ikinipoko nitii, nitxineirote pakini matxineirotenimoni. Atxiīti nauiritari niīto arikiko. Txamari iuasaaki nitiraōkiuatini !auari, ininiā !apakata.

⁴ Pitiraōkiuatakasaaki, piposotari piātapiniri pinirekakiti apokini. Pitiraōkiuatakasaaki, pikamari erekari ātimoni. Pitiraōkiuatakasaaki, kona pixikotari āti. Pitiraōkiuatakasaaki, kona pisāpiretari apanakini piuikiniri pikamakiti. Pitiraōkiuatakasaaki, !piuikaua. ⁵ Pitiraōkiuatakasaaki, kona pitxīkitakari āti pētauatini. Pitiraōkiuatakasaaki, kona pinirekari piteka nireēkitinani. Pitiraōkiuatakasaaki, !katimari pomanākarauatini. Pitiraōkiuatakasaaki, !pixinikapinikari maerekati apanakini kamakiti pitemoni. ⁶ Pitiraōkiuatakasaaki, kona pipoxokoniūata āti kamakasaakiri maerekati. Pitiraōkiuatakasaaki, pipoxokoniūata atāo inakari pikenakotakasaaki. ⁷ Pitiraōkiuatakasaaki, pimīteenekari ikinipoko. Pitiraōkiuatakasaaki, pauikari kākiti sākire. Pitiraōkiuatakasaaki, pauikari kākiti kamaenetakiti ikamini. Pitiraōkiuatakasaaki, !katimari pitakanapiniri piparīka pikamini. ⁸ Tiraōkitxi !ixipoka. Txamari kākiti sāpiretakiti xipokapitikako. Kākiti sākiretiniri āti uāka sākire xipokapitikako. Kākiti imarore ereēkokapitikako. ⁹ Kotxi poiāonoka aimarore. Poiāonoka Teoso sākire aimarota asāpiretini. ¹⁰ Āti ōti aimarotari ikinipoko atāo inakari. Iuasaaki atāo minakati !auaika. ¹¹ Amarini ninakasaakiaua, nisākirauata amarini sākirauatini atokokana. Iuasaaki nimarotakiti amarini imarotakiti atoko itxa. Nixinikakiti amarini xinikakiti atoko itxa iuasaaki. Txamari kikipe ninakasaakiaua, !ninarekaikari amarini atokokana nininiua. ¹² Uatxa aātamatakiti Teoso oerekakiti !aposota iteene aātamatinī. Ātakaāri katxikoroā atamatakori atoko itxa aātamatakiti, Teoso oerekakiti. Āti ōti Teoso apisatoō

aāpoka. Uatxa poiāonoka nimarota. Āti ōti Teoso apisatoō aāpokasaaki, nimarotari ikinipoko, Teoso imarotinino atokokana.

¹³ Ininiā aua ipi āti pakini erekari aākixinireē auakari. Aua Teoso sākire auikiko. Aua Teoso kamaenetakiti ikamini auikiko. Aua tiraōkitxi. Ikara tiraōkitxi apiaerekatakari.

14

Erekari Matamatakoti Siākiti

¹ Ininiā ikiniōtika hītiraōkiuatako. Hinirekariko Erekari Matamatakoti siākiti. Apiata hinirekariko iua sikinii Teoso iokanapirena hīsāpiretini. ² Kākiti sākire mimarotakoti sākiretakari misākiretari Teoso. !Imisākiretari kākiti, kotxi kākiti !imarotari isākire. Erekari Matamatakoti posotiireē isāpiretari atāo inakari Teoso oerekakiti. ³ Teoso sākire sāpiretakaripekana misākiretari kākiti. Iua txīkitakari kākiti apiata auikiniri Teoso sākire. Isikataparaxiniretana ninoa. Imīkapiritari ninoa ākixinire. ⁴ Kākiti sākire mimarotakoti sākiretakari, iuaka txīkitakaua apiata auikiniri Teoso sākire. Teoso sākire sāpiretakaripekana, txīkitakari ikinika Xesosi sākire auīākani apiata auikinirina Teoso sākire. ⁵ Erekari hīte hīkinika sākiretiniri kākiti sākire mimarotakoti. Iuaritika apiaerekata hīsāpiretiniri Teoso sākire, kotxi Teoso sākire sāpiretakari apiari itxaua. Kākiti sākire mimarotakoti sākiretakari poiāori itxaua. Iua sāpiretiniāri isākire kenakotakani ninoa sākireē ninoa apaka imarotiniri īkapani, iusaaki erekari, kotxi iusaaki itxīkitakari Xesosi sākire auīākani apiata auikiniri Teoso sākire. ⁶ Hītemoni napokasaaki, nisākiretiniāri kākiti sākire mimarotakoti, nitxīkitakatai hīte apiata hāuikiniri Teoso sākire? Konapitini. Ininiā kona itxa. Noerekiniāi Teoso oereēkiti notamoni, nisāpiretiniāi Teoso imarore, nisāpiretiniāi Teoso sākire, noerekiniāi Teoso sākire atāo hāuikini īkapani, iusaaki nitxīkitakai hīte apiata hāuikiniri Teoso sākire. ⁷ Maxinikari xikari moianatakari atxiīti viorāo, atxiīti xōkakori pakini. Kākiti mimatireni kaminiāri ikara, iusaaki xikari atāo inakari !imarotaāka. Ienenoka aua.

⁸ Ātipekana noerekai. Trōpetā ene atāo ininiā, sotatoakori kenakotakasaakiri, aiamatana ineenamauatini īkapani. Trōpetā ene na atāo ininiā, sotatoakori !imarotari neenamati manapipe inini.

⁹ Iua atokokana kākiti sākire imarotakiti himasākiretakaniā, kiriāpa ninoa imarotari hīsāpiretakiti? Ikara atoko hīsākirauatiniā, maxikatiika hīsākirauata.

¹⁰ Itori uākatī sākire aua ikini itixiti. Apakata ikinika imarotiko. ¹¹ Kākiti sākire nimimarotakaniā, ininiā notamoni iua āti tixinikiri atoko itxa. Apaka iuamoni nota āti tixinikiri atoko nitxa. ¹² Hīte iteene nirekari Erekari Matamatakoti siākiti hāpakapini, ininiā apiata hinirekariko isikini isikakiti Teoso sākire auīākani iua sākire iteene auikinina īkapani.

¹³ Ikara atoko ininiā, erekari kākiti sākire mimarotakoti sākiretakari amanainiri Teoso isikaimaroretiniri iua sāpiretiniri isākire kenakotakani ninoa sākireē ninoa apaka imarotiniri īkapani. ¹⁴ Teoso nimisākiretiniā kākiti sākire mimarotakotiā, nixinire misākiretari Teoso, txamari !nimarotari notaka sākire. ¹⁵ Ininiā kipa atāo nikamini? Ia atāo: Nimisākiretari Teoso nixinireē. Apaka nimisākiretari Teoso nīkitekē. Nixikarauata nixinireē. Apaka nixikarauata nīkitekē. ¹⁶ Kākiti sākire mimarotakotiā hīsāpiretiniāri Teoso ereka inini, kākiti ereē pisākire mimarotakani sauaki, liposotari “atāopitikara” inini, kotxi !imarotari pisāpiretakiti. ¹⁷ Atxiīti atāo hīsāpiretiniri Teoso ereka inini, txamari iusaaki kona pitxīkitakari iua kākiti apiata auikiniri Teoso sākire.

¹⁸ Peerekari Teoso, kotxi apiata isikaimaroretano nota nimisākiretiniri iua kākiti sākire mimarotakotiā. Poiāonoka hīte imarotari kākiti sākire mimarotakotiā himisākiretiniri iua. ¹⁹ Iuaritika, Xesosi sākire auīākanikata

nauakasaaki, apiaerekata nisāpiretinina sīkonoka sākiretxi ninoaka sākireē, kotxi apakata ninoa imarotiniiri nisākire. Niposotiniāri sīko mio sākiretxi kākiti sākire mimarotakotiā nisāpiretiniri kākiti, itori nisākire, iuaritika maxikatiīka nisākirauata, kotxi kākiti !imarotari.

²⁰ Nitariakori, !apakata himarore amarini xapitikiri imarore atokokana inini. Iuaritika amarini xapitikiri makamakaniri maerekati ātimoni, iua atokotxikana amarini xapitikiri atoko !hīkamapiri maerekati ātimoni. Aneēkari imarore atoko itxako hīte imarore. ²¹ Teoso sākire iōkatsopatakori txari:

Niokanatarī āti uāka hītemoni, hīte nimisākiretini īkapani. Āti tixinikini sākireē nimisākiretai hīte. Iuaritika kona hīkīpitari nisākire, itxa Apiananiri.

²² Ininiā Teoso sākire auīākari sākiretiniāri Teoso sākire mauīākani sākire, iua mimarotakinīti, Teoso sākire mauīākani iuasaaki imarotari Teoso posotiire. Teoso sākire auīākari sāpiretiniāri Teoso sākire apanakini Teoso sākire auīākanimoni, ninoa iuasaaki imarotari Teoso posotiire. ²³ Teoso sākire auīākani apotiitiniāua, ikinimane sākiretiniāri kākiti sākire mimarotakinani, iuasaaki kākiti Teoso sākire poiāopanika imarotakari īroiniā, Teoso sākire mauīākati atxiīti īroiniā, ininiā iua uākatai hīte mapitxiritakani hininiua.

²⁴ Txamari ikinimane sāpiretiniāri Teoso sākire iuasaaki, Teoso sākire mauīākati īroiniā, kākiti Teoso sākire poiāopanika imarotakari īroiniā, ininiā iua imarotari maerekati kamakari ininiua. Iuasaaki imarotari imisiritiko auapitika āti ōti. ²⁵ Iuasaaki ikinimane imarotari iua xinikakiti ākixinireē. Ininiā iuasaaki ikapotoreēkaua Teoso apisatoō. Itxari: “Atāopitikara Teoso aua hīte sauaki,” itxa.

Kākiti Apotiitakasaakia Teoso Apisatoō

²⁶ Nitariakori, kanatokopa itxa Teoso sākire auīākani apotiitakasaakia? Aāpotiitakasaakia, akinika aminari xikari Teoso īkapani. Akinika iposope Teoso sākire aōerekini atāo aimarotini īkapani. Akinika iposope Teoso oerekakiti asāpiretini. Akinika iposope kākiti sākire mimarotakoti asākiretini. Akinika iposope iua sāpiretakiti asāpiretini ikinimane imarotiniiri īkapani. Ikara atoko itxa aāpotiitakasaakia Teoso apisatoō. Iuasaaki makamari ikinika, Teoso sākire Teoso nakitiakori apiata auikini īkapani. ²⁷ Iuasaaki kākiti sākiretiniāri kākiti sākire mimarotakoti, ipinoka kākiti kamari ikara atoko inakari, atxiīti ipi āti pakini kamari ikara atoko inakari. !Apakata apikomoni kākiti sākiretiniri kākiti sākire mimarotakoti iuasaaki. Āti sākirauatakasaaki, apanakini kenakotari. Ātinoka sākirauata iuasaaki. Isākirauataka atoko, āti sāpiretari isāpiretakiti isākire mimarotakani sākireē, isāpiretakiti imarotiniiri īkapani. ²⁸ Iuasaaki isākire sāpiretakari mauakaniā, !apakata kākiti sākire mimarotakoti sākiretakari sākirauatini. Erekari ākixinireē isākirauatini Teosokata.

²⁹ Kākiti apotiitakasaakia Teoso apisatoō, iuasaaki ipi, atxiīti ipi āti pakini Teoso sākire sāpiretakani sāpiretariko Teoso sākire. Iuasaaki apanakini xinikariko iua sāpiretakiti, atāo inini imarotiniiri īkapani. ³⁰ Topākakari xinikasaakiri apikomoni Teoso oerekakiti, ininiā iuasaaki sākirauatakari iotoka, Teoso oerekakiti topākakari sāpiretiniiri īkapani. ³¹ Ikara atoko ininiā ikinimane posotari Teoso sākire isāpiretinina. Teoso sākire sāpiretakani āti sākirauata, eereka āti sākirauata. Ikara atoko itxaāpotana. Ininiā ikinimane oerekaākako. Ikinimane sikataparaxiniretaākako. ³² Teoso sākire sāpiretakani posotari iātapiniri Teoso oerekakiti isāpiretiniiri īkapani. ³³ Kotxi Teoso kona potxitari ienenoka auini. !Apakata kaiāopokori sākirauatini, kotxi apanakini !imarotari ninoa sāpiretakiti. Neenamtxi atoko itxa. Teoso nirekari inakitiakori kamakiti atāo inini apotiitakasaakia iua apisatoō.

³⁴ ! Apakata sito sākirauatini hāpotiitakasaakia Teoso apisatoō. ! Auir-itaāka osākirauatini iusaaki, kotxi Teoso sākire iōkatsopatakori paniātaro sito kaminiri kiki paniātakiti. ³⁵ Ninoa nirekiniāri ipimarauatinina imarotakinini imarotinina ĩkapani, ininiā ninoa pimaāna ĩtanirina aapokona apokasaakina. Sito sākirauatiniā kākiti apotiitakasaakia Teoso apisatoō, kākiti pētauata oa sākirauatini xika.

³⁶ Hīte kona apokaerekatitari nisāpiretakiti? Atxiīti hīte kamari Teoso sākire? Konapitini. Atxiīti Teoso sākire iokanataāka hītenanimoni? Konapitini.

³⁷ Teoso sākire sāpiretakani hininiāua, Erekari Matamatakoti siākiti auiniāi, ininiā iusaaki himarotari ikara nisākire niōkatsopatakiti Apiananiri paniātakiti inini. Hīsāpiretariko hāuikiniri ikara. ³⁸ Himamaākatakaniāri ikara nisākire, apanakini !imaākatari hīte sākire.

³⁹ Ininiā nitariakori, iteene hinirekariko Teoso sākire hīsāpiretini. Apaka hāuiritariko kākiti sākire mimarotakoti sākiretiko. ⁴⁰ Ininiā hīkamariko ikinika atāo hāpotiitakasaakia Teoso apisatoō, Teoso sākire ikinimane kenakotini ĩkapani.

15

Xesosi Ōkitikiniua Pirena

¹ Nitariakori, uatxa iuaīkana ninirekari hīte xinikiniri Teoso iokanapirena erekari hītemoni nisāpiretakiti. Hīte apakapapekari ikara nisāpiretakiti. Hīte iteene auikari ikara. ² Ikara Teoso iokanapirena erekari oerekai himaerekani makatxakiko. Ininiā atāo hīxinikariko ikara nisāpiretakiti. Itene hāuikiniāri Teoso iokanapirena erekari, himaerekani makatxakaāka. Atāo minakati hāuikiniā, ininiā maxikatīka hāuikari.

³ Nisāpiretapekai mitxi nota apakapakiti, kotxi ia himimarotakaniā ! apakata. Ia napakapakiti: Kristo ipina amaerekani imakatxakini ĩkapani. Teoso sākire iōkatsopatakori sāpiretaua ikara. ⁴ Eereka ikataāka. Ipi ōti, āti ōtisaaki iuaīkana ōkitikaua. Teoso sākire iōkatsopatakori sāpiretaua ikara. ⁵ Eereka Petro atamatari iua. Eereka ikinika Kristo moianariakori atamatari iua. ⁶ Eereka kiētosi aītariakori atamatari iua āti ōti apotiitakasaakia. Kaiāopanikani ninoa auapanika. Ātikaka ipīpe. ⁷ Eereka Txiako atamatari iua. Eereka ikinika Xesosi iokanatakini atamatari iua. ⁸ Imapotōkire nota apaka atamatari iua. !Natamatari Xesosi ĩkorapokoriti itīpokotakasaaki. Eereka iua apoka notamoni.

⁹ Xesosi iokanatakiti poiāori nitxaua. Apanakini iua iokanatakini apiata. Mitxi !erekari nikamakiti, kotxi nimisirītana Xesosi sākire auīākani Teoso nakitiakori, iuaritika Xesosi akiritano iua iokanatakiti nininiua. ¹⁰ Teoso sikari ikinipoko erekari notamoni, ininiākara iua iokanatakiti kākitemoni nitxaua. Kona maxikatīkani isikari ikinipoko erekari notamoni, kotxi iteene niparīkauata Teoso ĩkapani. Apanakini Xesosi iokanatakini iteene parīkauata, iuaritika nota parīkauata apiata. Kona nota posotiireēni niparīkauata. Ikinipoko erekari Teoso sikakiti notamoni sikaposotiiretano nota niparīkauatini ĩkapani. ¹¹ Atxiīti nota sāpiretai ikara Kristo sāpiretakiti. Atxiīti apanakini iua iokanatakini sāpiretai. Ikara Kristo sāpiretakiti ate sāpiretai. Ikara Kristo sāpiretakiti hīte auika.

Ipīkani Ōkitikiko Pirena

¹² Ate sāpiretai Kristo iuaīkana ōkitikiniua. Ininiā kinirepa ātikaka hīte txari ia? “! Auari ipīkani iuaīkana ōkitikiniua,” hītxa. ¹³ Ipīkani iuaīkana ōkitikiniua mauakaniā, ininiā Kristo apaka kona ōkitikaua. ¹⁴ Kristo mōkitikakaniāua, ininiā maxikatīka asāpiretai iua sākire. Kristo

mōkitikakaniāua, maxikatiīka hāuikari iua sākire. ¹⁵ Kristo mōkitikakaniāua, na atāo asāpiretai Teoso kamakiti, kotxi ate sāpiretapekai iua ōkitikiniri Kristo. Ipīkani iuaīkana ōkitikiko mauakaniā, Teoso kona ōkitikari Kristo. ¹⁶ Kotxi ipīkani iuaīkana mōkitikakaniāua, Kristo apaka kona ōkitikaua. ¹⁷ Kristo iuaīkana mōkitikakaniāua, maxikatiīka hāuikari iua sākire, kotxi !imakatzakari himaerekani. ¹⁸ Kristo iuaīkana mōkitikakaniāua, ipīkani iua sākire auīākani pīpinanaka. ¹⁹ Xesosi mōkitikakaniāua, iuaritika ikiniōtika ate auikari iua sākire ĩkorapokoriti aāuakasaaki, ininiā miīkiteni apiarini atxaua ate.

²⁰ Ikara na atāo. Uatxa maxinikari atāo inakari. Kristo ipīkaripeka ōkitikapeēkaika. Iua amātiiri merepitipanika auakari atoko itxa. Iua merepanika ōkitikaua, ininiākara aimarotari apīkasaaki ate apaka ōkitikaua. ²¹ Āti kiki kamakitiā ipīkitxi apoka ikinimanemoni. Iua atokokana āti kiki kamakitiā, ipīkani ōkitikiko apoka. ²² Adāo kamakitiā ikinimane ipina. Kristo kamakitiā iua sākire auīākani auapininiika ātipirika. ²³ Kākiti ōkitikaāka ia atoko. Kristo mitxi ōkitikaua. Iua merepanika ōkitikakariua. Ikanapiriākasaaki iua nakitiakori ōkitikauako apaka. ²⁴ Eereka itixi xipokaāka. Iuasaaki ikinika auītetxi maerekati, ikinika kaposotiireri maerekati pakini ixipokako. Eereka ikinika iua nakitiakori isika iri Teosomoni. ²⁵ Kristo ikinimane auīte itxauako. Iuasaaki ixipokari ikinika imokaiakari posotiire, kotxi ikiti patapi itakana ninoa. ²⁶ Imokaiakari atoko itxa ipīkitxi. Imokaiakariakori ixipokasaaki, imapotōkire ixipokari ipīkitxi. ²⁷ Teoso sākire iōkatsopatakori txari:

Teoso takapekari ikinika iua kiti patapi.

Ikara Teoso sākireē “ikinika” aua, iuaritika aimarotari iuaka !itakaua Xesosi kiti patapi, kotxi Teosora txīkitakari Xesosi ikinimane auīte ininiua. ²⁸ Kristo ikinimane auīte inakasaakiua, iua Teoso ākiri auītetariko Teoso, kotxi mitxi Teoso txīkitakari iua ikinimane auīte ininiua. Iuasaaki Teosonoka ikinimane auīte itxaua.

²⁹ Ipīkani mōkitikakaniāua, kinirepa apanakini patxisataāka ipīkani ōkitikinīua ĩkapani? ³⁰ Atepekana, ipīkani mōkitikakaniāua, kinirepa ikiniōtika amīteenekari monōkori? ³¹ Nitariakori, nimarotari ipīkitxi monōkori ikiniōtika. Ikara nisāpiretai, kotxi niuikai hīte. Niuikari aāuini aāuīte Kristo Xesosikata. ³² Uai Épeso sitatxitiā kākiti ākiti kaneenamari atoko inakani nirekari imaīkinino nota. Ipīkani mōkitikakaniāua, kinirepa nimīteenekari ikara atoko inakari? Ipīkani mōkitikakaniāua, ininiā atxari:

Manipokota, maiāta, kotxi katana apinako.

³³ Kona hāuiritapiri āti misirienetini. Kākiti erekari moianatiniāri maerekati kamakani, ninoa txīkitakari iua maerekati kamakari ininiua. ³⁴ Himerekako. Himarotariko atāo inakari hīkamini ĩkapani. Maerekati ! hīkamapinikako. Hīpētauatako, kotxi apanakini hīte !imarotari Teoso.

Kākiti Īto Ōkitikasaakiua

³⁵ Atxiīti āti txari: “Kanatokopa itxa kākiti ōkitikiko? Iuasaaki kanatokopa inakaripa iīto?” itxa. ³⁶ !Kiīkiteri kākiti pimarauatini ikara atoko. Takariki, pimatakakaniāri kipatxi āki !ipitxaka. ³⁷ Pitakarauatakasaaki, pitakari okinoka, atxiīti triko, atxiīti kimi. Takari aneēkari kona pitaka. Kona takariki atokoni itxa takari ipitxakasaaki. Ipitxere ipinimoni. ³⁸ Teoso kamari takari pitxere inireēkiti iaōka. Ikini takariki Teoso sikari ipitxere. ³⁹ Āti xinitxi kona āti xinitxi atokoni. Aua kākiti xini. Kaxipirini xini ipinimoni itxa. Kotipiriki xini ipinimoni itxa. Ximaki xini ipinimoni itxa.

⁴⁰ Aua iaxiti apiko nopinixiti auakani, aua itixi takote auakani apaka. Peereri ikinipoko, iuaritika iaxiti apiko nopinixiti auakani ipinimoni, itixi

takote auakani ipinimoni. ⁴¹ Peereri atokatxi. Peereri kasiri apaka, txamari kasiri ātiāo. Peereri iōriki apaka, txamari iōriki ātiāo. Apaka āti iōriki āti iōriki atokotxikana !auari.

⁴² Iua atokokana itxa ipīkani iuaīkana ōkitikikosaaki. Ītotxi ixiti taākori ! auaika. Iua ōkitikakori kona ipinaika. ⁴³ Ītotxi katikosaaki, !erekari. Ītotxi iuaīkana ōkitikikosaaki, peerekari. Ītotxi katikosaaki ! kataparari. Iuaīkana ōkitikikosaaki, kataparari. ⁴⁴ Aīto katikosaaki, aīto itixi auakani ĩto atokotxikana. Aīto iuaīkana ōkitikikosaaki ātiāo aīto. Ītotxi ĩkorapokoriti aāuini ĩkapani aua. Apaka aua ĩtotxi ipinimoni, Teoso sikakiti apīkasaaki. Ikara ĩtotxi !ipina. ⁴⁵ Teoso sākire iōkatsopatakori txari:

Teoso txīkitakari kiki merepitipanika auakari Adāo inakori auāki inini. Adāo imatonōkari auakari, Kristo inakori, txīkitakari kākiti auāki inini, apaka imapinakani ĩkapani.

⁴⁶ Teoso nireēkiti axinikini kona apoka merepanika. Merepanika axinikari ateka nireēkiti, eereka axinikari Teoso nireēkiti. ⁴⁷ Kiki merepitipanika auakari kipatxi kamakori itxaua. Āti kiki Apiananiri, Teoso tixinekiri iua. ⁴⁸ Ikinimane kākiti itixi auakani, iua Adāo kipatxi kamakori atokokana. Ikinimane kākiti Teoso tixine sikani, Kristo Teoso tixinekiri atokokana. ⁴⁹ Aponaniākasaaki, kipatxi kamakori aīto, Adāo ĩto atokokana itxa aīto. Iua atokokana Teoso tixinekiri ĩto, Kristo ĩto atokokana itxako aīto.

⁵⁰ Nitariakori, nisāpiretai hīte, !apakata kākiti ĩto, iarēka pakini sini Teoso auītetxi ininiātaāua. Ipinakari kona auapininiika !itxa. ⁵¹ Hīkenakotariko nisākire. Nisāpiretaiko kākiti mimarotakinīti mitxi. Kona ikinimaneni ipina. Iuaritika amakinika txīkitakaāka ipinipo aniniua. ⁵² Iuasaaki imapotōkire trōpetakero xōkaāka. Iuasaaki mēkokari katimari atoko itxa. Poki katimari matākaātini atoko itxa. Amakinika katimaritika txīkitakaāka ipinipo aniniua. Iua trōpeta xōkikosaaki, iuasaaki ipīkani ōkitikaāka. Kona ipinaikanako. Iuasaaki atxīkitakaāka ipinipo aniniua. ⁵³ Kotxi arakakani txīkitakaākako miarakakani ininiua. Ipīkani txīkitakaākako mipīkani ininiua. ⁵⁴ Arakakani txīkitakikosaaki miarakakani ininiua, apaka ipīkani txīkitakikosaaki mipīkani ininiua, iuasaaki Teoso sākire iōkatsopatakori apopeka. Ia atoko itxa Teoso sākire kitxakapirīka:

Ipīkitxi xipokaākako. Auape kāiatakari, ipīkitxi xipokakari.

⁵⁵ Ipīkitxi tsii !auaika. Maerekani misiritikoātaā anikakari kona kāiata.

⁵⁶ Ipīkitxi tsii mitxi aua amaerekani xika. Teoso paniātakiti iōkatsopatakori oerekaua amaerekani. Teoso paniātakiti iōkatsopatakori mauakaniā, !auari kākiti misiritiko. Txamari maerekanitxi tapara aua, kotxi Teoso paniātakiti iōkatsopatakori auapitika. ⁵⁷ Erekapitikari Teoso, kotxi aāuīte Xesosi Kristo txīkitakaua akāiatini.

⁵⁸ Ikara atoko ininiā, nitariakori nota tiretakini, kataparaxinire hītxako. Kona hāuiritapiri apanakini txīkitakinii maerekati hīkamini. Hīparīkauatako ĩkiniōtika Apiananiri ĩkapani, kotxi himarotari maxikatiīka !hīparīkauata iua ĩkapani. Hīparīka ĩki hāpakapapitikako.

16

Txineiro Sikiko Xesosi Sākire Auiākani Īkapani

¹ Uatxa nisāpiretai txineiro himakatzakini Teoso nakitiakori ĩkapani. Hīkamariko Karásia tixini auakani nipaniātini atokotxikana. Nipaniātana nino Teoso misākiretikoātaā apotiitakaniua ia atoko: ² Ikini Tomīko hīkinika hīte nīkataro txineiro nino ĩkapani. Txineiro Teoso siākiti iaōka, hinīkatari ipixini

ninoa ĩkapani. Ininiā ereē napokasaaki apikomoni txineiro kona apoti-itaāka. ³ Napokasaaki ereē, niokanatarī kākiti, txineiro hīsikakito anikakani Xerosareēmoni. Hīsāpiretano hīokanatsopatakitiā himereēkini hītxineirote anikakani ĩkapani. ⁴ Atxiīti erekari nota sinī apaka, ininiā ninoa moianatano nota.

Paoro Paniātakiti Pirena

⁵ Masetónia tixinimoni nisako, eereka napoka hītemoni, kotxi nisapitikako Masetóniamoni. ⁶ Iuasaaki atxiīti nikaikota hītekata. Atxiīti nikaikota mi-taāsaaki hītekata. Ininiā eereka hīte posotari himoianatinino nota naia-matakasaaki apikoxiti nisini ĩkapani. ⁷ Kona ninirekari mapaōtinoka nikaiko-tini hītekata uatxa. Apiananiri auiritiniāno, ninirekari apikomoni nikaiko-tini hītekata. ⁸ Txamari nikaikota uai Épeso sitatxiti Pētekósitxi kiiniriti manapi ōti. ⁹ Kotxi uatxa kaiāopokori kākiti ĩkorapokoriti auakani nirekari nisāpiretiniri Teoso iokanapirena erekari ninoamoni. Txamari kaiāopokori kākiti ĩnirekano.

¹⁰ Atxiīti Tximótxio sari hītemoni, ininiā hāpakapariko iua, imapīkarauatakani ĩkapani hīte sauaki, kotxi iua parīkauata Apiananiri ĩkapani nota parīkauatini atokokana. ¹¹ Ininiā kona apakata kākiti mamaākatakaniri iua. Ikanapiriākasaaki notamoni, iuasaaki hīokanatarī iua erekaxinire inini. Niātapari iua aītariakorikata.

¹² Iteene ninirekari aītari Aporo apokini hītemoni aītariakorikata. Txamari uatxa ĩnirekari isini hītemoni, iuaritika iposotakasaaki isapitikako hītemoni.

¹³ Araōkire hītxako. Iteene hāuikariko Teoso sākire. Hītaparaxinireritika hāuako. Hītapararitika hāuako Teoso ĩkapani. ¹⁴ Xesosi tiraōkiā ĩkinipoko hīkamako.

¹⁵ Hīte imarotari Esitépana, inirimane pakini. Ninoa Akaia tixini auakani. Iuaātaā ninoa merepitipanika auikari Xesosi sākire. Ninoa iteene parīkauata Teoso nakitiakori ĩkapani. Nitariakori, iteene nipaniātai hīte. ¹⁶ Hīkamariko kākiti ikara atoko inakani paniātakiti. Hīkamariko ĩkinimane amoianari paniātakiti, atekata parīkauatakani paniātakiti. ¹⁷ Esitépana, Potonato, Akaiko pakini apokasaaki uai, nipoxokoniuata, kotxi iminarina notamoni mauakati hīte masakakiniti. ¹⁸ Ninoa sikapoxokonitari nākixinire, hīte ākixinire apaka. Erekari ate iuikiniri kākiti ikara atoko inakani.

¹⁹ Teoso misākiretikoātaā apotiitakaniua Ásia tixini auakani xinikamanapitai hīte. Ákira inakori, Pisisira inakoro pakini iteene xinikamanapitai hīte, kotxi Apiananiri nakiti hītxaua. Apaka Xesosi sākire auiākani ninoa aapoko apotiitakaniua xinikamanapitai hīte. ²⁰ ĩkinimane aītariakori uai auakani xinikamanapitai hīte. Haōkitakakasaakiua, himaratakakauako, kotxi Teoso nakitiakori hītxaua.

²¹ Nota Paoro iōkatsopatari ia nitakapiretanapini niuakoā. ²² Kākiti matire-takaniāri Apiananiri Xesosi Kristo, maerekati takaāka iua nopini.

“Apiananiri, uai pina atemoni,” atxari Xesosi.

²³ Apiananiri Xesosi Kristo sikari ĩkinipoko erekari hītemoni. ²⁴ Nitiretai hīte hīkinika, kotxi Kristo Xesosi nakitiakori atxaua. Ameē.

2 KORĪTO

Paoro Iokanatsopatakiti Iuaīkana Korīto Auakanimoni

¹ Nota Paoro, Xesosi Kristo iokanatakitino. Teoso nirekari iokanatinino kākitimoni isākire nisāpiretini īkapani. Ia aātsopa niōkatsopata. Aītari Tximótxio aua notakata. Ia iōkatsopari niokanata kākiti Teoso mereēkinimoni, Korīto sitatxiti auakanimoni. Apaka ia iōkatsopari niokanata kākiti Teoso nakiti-akorimoni, Akaia tixini auakanimoni. ² Aīri Teoso, Xesosi Kristo Apiananiri pakini sikari ikinipoko erekari hītemoni. Ikamaerekaxiniretai hīte.

Teoso Mīkapiritiniua Pirena

³ Peerekari Teoso. Aāuīte Xesosi Kristo iri itxaua. Kaamonīkareri iua. Āti kākiti amonīkakari iua atoko inakari !auari. Amaerekaxinirenisaaiki, iua atekata aua. Amaerekaxinireni imakatzakinaua. Iuasaaki imīkapiritaua. ⁴ Imīkapiritaua amaerekaxinirenisaaiki, ininiā apanakini maerekaxinirenisaaiki, iua atokotxikana ate mīkapiritana ninoa apaka, kotxi aimarotari Teoso mīkapiritiniua ate. ⁵ Kristo iteene misiritaāka, ininiā ate misiritaāka apaka. Iua atokokana Teoso moianatari Kristo, ininiā iua moianataua ate apaka. ⁶ Apanakini misiritaua, kotxi anirekari Teoso mīkapiritinii hīte. Anirekari Teoso makatzakiniri himaerekani. Teoso mīkapiritaua ate, ininiā hīte apaka imīkapirita. Teoso mīkapiritakasaakii hīte, isikataparatai himisiritiko hīpoxokoniritika himīteenekini īkapani. Hīte misiritiko ate misiritiko atokokana. ⁷ Aimarotapitikari erekari Teoso sikinii hīte, kotxi himisiritaāka ate misiritiko atokokana, ininiā Teoso mīkapiritai hīte, ate imīkapiritini atokokana.

⁸ Aītariakori, anirekari hīxinikiniri ate misiritiko Ásia tixini aāuakasaaki. Iuasaaki iteene amaxikaāka. Kona amīteenekari. Auākatari aōkiko. ⁹ Iuasaaki aākixinireē atxa: “Apinapitikako,” atxa. Ikara atoko ininiā, aimarotari kona ate posotiire !auari. Aimarotari Teosonoka sikataparataua, kotxi iua posotari ōkitikiniri ipīkari. ¹⁰ Pamonōkoniri iuasaaki, iuaritika Teoso makatzakaua amapinakani īkapani. Iua makatzakapanikaua amapinakani īkapani. Ate auikari iua sākire, iuaīkana imakatzakiniiua tīkane. ¹¹ Hīte moianataua ate, kotxi himisākiretari Teoso ate īkapani. Ininiā Teoso kamari hamanaākiti iaōka, kotxi Teoso kamari erekari atemoni. Eereka kaiāopokori kākiti sāpiretari Teoso iua ereka inini, kotxi ikamari ninoa amanaākiti iaōka ate īkapani.

Paoro Masikani Korītmoni

¹² Ate poxokoniuata, kotxi ate kamari erekarinoka Teoso oerekakitinoka, kākitimoni, hītemoni apaka. Atāonoka anireka akamini kākitimoni. Aimarotari ikara aākixinireē, ininiā apoxokoniuata. Ikara atoko aāuini, kotxi ikinipoko erekari Teoso sikakiti sikataparataua. Kākiti imaroreē !iposotari ikaminiri iua auini ereka inini, kotxi !kiūkiteri kākiti. ¹³ Hātatsopatakasaakiri aiōkatsopatakiti hītemoni, himarotari axinikakiti aākixinireē. Axinikakiti, asākire pakini ātinoka itxaua. ¹⁴ Hīte na iteene imarotapanikaua ate, iuaritika ninirekari hīuikiniua ate, Apiananiri Xesosi uai ikanapiriini ōtisaaki, ate iuikinii atokotxikana.

¹⁵ Ikara nimarota, ininiā ninirekamari hītemoni nisini, ipikata hīpoxokoniuatini īkapani. ¹⁶ Masetónia tixinimoni nisini apisapanika, ninirekamari hītemoni nisini. Eereka nikanapiriākasaaki uaimoni, ninirekamari hītemoni iuaīkana nisini, ininiā iuasaaki ninirekamari hīte

iokanatinino nota Xotéia tōpamoni. Txamari na nisa. ¹⁷ Atxiïti hîte txano nota: “Pixinikasaakiri uai papokini, na iteene pinirekari uai papokini,” hîtxano. Txamari ninirekapitikari napokini hîtemoni. Na nota xinikari Teoso sâkire mauîâkani xinikakiti atoko, kotxi ninoa sâkire: “Ari, nisapitika,” txamari âkixinireê itxana: “Na nisapani,” itxana. ¹⁸ Nota sâkire hîtemoni ninamaâ: “Ari nisapitika,” ninakasaaki, nâkixinireê apaka txari: “Ari, nisapitika,” nitxa. Teoso atâonoka sâkirauatakari imarotari ikara nisâkire atâo inini. ¹⁹ Sîrasi inakori, Tximótxio inakori, nota pakini sâpiretapekai hîte Teoso âkiri, Xesosi Kristo sâkire. Xesosi sâkire inamaâ auakari, isâkire âkixinireê auakaritxikana isâkireta. “Nikamapitikariko,” inakasaaki, âkixinireê inirekapitikari ikaminiri. Ikamari isâkire iaôka. ²⁰ Teoso sikaenetakiti kâkitimoni kaiâopokori aua. Iua Kristo sikaua ikinipoko Teoso sikaenetakiti, ininiâkara atxari: “Ameê.” Peerekari Teoso, kotxi Kristo sikapitikaua Teoso sikaenetakiti. ²¹ Teosokara sikataparaxiniretai hîte, ate apaka, Xesosi Kristo amatakanapakani îkapani. Teosokara mereêua iua nakitiakori aniniua îkapani. ²² Apaka Teosokara sikaua Erekarî Matamatakoti, Teoso nakiti aniniua aimarotini îkapani. Iua Erekarî Matamatakoti aua aâkixinireê. Teoso takaôtxikare itxaua iua. Iua Erekarî Matamatakoti merepitipanika Teoso sikakiti atemoni, ininiâ aimarotari apikomoni isikapanikaua itanapoko inîkatakiti ate îkapani.

²³ Kona nisari hîte Korîto sitatxiti auakanimoni, kotxi kona ninirekari hîte matinaniuatini hîte maerekani nisâpiretini xika. Teoso imarotari ikara atâo inini. ²⁴ Hîâuîte kona ate txaua. Kona apaniâtai: “Ia atoko inakari hâuika. Kona ikara atoko inakari kona hâuikape.” Kona ikara atoko !atxai hîte, kotxi hîte auikapitikari Teoso sâkire atâo inakari. Aparîkauata hîtekata hîpoxokoniuatini îkapani.

2

¹ Nâkixinireê nitxari: “Na nisa iuaîkana ninoamoni nikamamatinanitinina îkapani.” ² Nota xika maerekaxinireninoka hininiâ, kiripa kamapoxokinitano nota? Hîtenoka aua nota kamapoxokonitakani. Ininiâ kona nota nirekari maerekaxinireni hinini nota xika. ³ Kona ninirekari hîtemoni napokini, maerekaxiniretikano ninini, hîte maerekani xika, ininiâkara nota iokanatsopatari îkora mitxi niôkatsopatakiti hîtemoni ereê napokini apisapanika. Kotxi nikamapoxokonitakini hîtxaua hîte. Nimarotari ia. Nota nienenîkasaaki, hîte himakinika enenîka apaka. ⁴ Niokanatsopatari îkora niôkatsopatakiti hîtemoni, kotxi himaerekani xika maerekaxiniretinoka nitxa. Nitxiapata. Niokanatsopatari îkora niôkatsopatakiti hîtemoni, iteene nitiretinii himarotini îkapani. Na ninirekari nikamamatinanitinii.

Maerekanitxi Maxinîkaretiko

⁵ Iua kiki maerekati kamakari maerekaxinireti txîkitakano. Iua apia maerekaxinireti txîkitakai hîte, maerekati ikamini xika. Na iteene ninirekari nitxitiniri iua. ⁶ Uatxa atokopeka homanatiniri. Iua txitaâkapeka imaerekani xika. ⁷ Uatxa himaxinîkaretariko maerekati ikamakiti, ininiâ hâpakapariko iua. Himisâkiretariko iua. Hîkamapoxokonitari iua. Ikara atoko himinakaniâri, iua kona erekaxinireri. Ikara atoko himinakaniâri, atxiïti itakanapari Teoso kimapore. ⁸ Ininiâkara nota ôtâkikai hîte nitapararitika. “Atiretapitikai,” hîtxariko iua, hîtiretiniri imarotini îkapani. ⁹ Ininiâ mitxi niokanatsopata hîtemoni, kotxi iusaaki nataerekatai hîte. Ninirekari nimarotiniri, hîkîpitatarî nôtâkikinii atxiïti? ¹⁰ Himaxinîkaretakasaakiri maerekati âti kamakiti, nota apaka maxinîkaretari. Maerekati âti ereê kamakiti auiniâ, nimaxinîkaretari, kotxi nitiretai hîte. Kristo nirekari nimaxinîkaretiniri maerekati

ikamakiti. ¹¹ Axinikasaakiri maerekati āti kamakiti, akamari Satanasi nireēkiti. Ininiākara !akamari Satanasi nireēkiti. Paimatireri iua. Inirekari akerokiniri. Aimarotari iua nireēkiti, ininiā apia imatirerini matxaua.

Txito Paoro Nitini

¹² Tóatxi sitatxiti napokasaaki Kristo iokanapirena erekari nisāpiretini tīkane, kākiti iuaā auakani nirekari nisākire imarotini, kotxi Apiananiri sikanireōtana nisākire imarotini ikapani. ¹³ Iuaritika !erekaxinireno, kotxi ninitapiimari aītari Txito inakori. Kona napokari. Ininiā nitakapiretanapana kākiti iuaā auakani: “Ereēpiko. Masetónia tixinimoni nisako,” nitxana.

Kamariāro Atoko Atxa

¹⁴ Peerekari Teoso kamakiti ate ikapani. Kristo nakiti aniniāua, Teoso txīkitakaua ātipirika akāiatini, ikinimane imarotini ikapani. Teosokata akāiata. Teoso paniāttaua Kristo pirena imarotiko ikini tōpati iaripiretini, kamariāro iarikatxiātini atokokana Kristo pirena iaripiretini ikapani. ¹⁵ Kristo sikaua Teosomoni, ininiā Teoso apokaerekataua, kotxi kamariāro arikiko Teoso ikapani atokokana atxa. Kamariāro arikasaaki omari samariāpota ikini tōpati. Iua atokokana asaāpota kākitemoni, kākiti apokakonimoni, kākiti pīpinanaākanimoni apaka. ¹⁶ Kākiti pīpinanaākanimoni kanaiatxiāri atoko atxa, kotxi asāpiretana Kristo sākire imauikakaniāna, ipinana. Kākiti Teoso apokakinimoni kamariāro eretxiāro atoko atxa, kotxi asāpiretana Kristo sākire auikiniāna, auapininiika itxanako Teosokata. Kiripa posotari ikara atoko inakari parīkatxi ikamini Teoso ikapani? ¹⁷ Ate posotari Teoso ikapani aparīkauatini, kotxi kona apanakini atokoni !atxa ate. Kaiāopokori kākiti sāpiretari Teoso sākire txineiro apakapini ikapani. Ninoamoni Teoso sākire tiitxi vētxitiko atoko itxa. Kona ikara atokoni !akama, kotxi Teoso iokanataua ate kākitemoni. Teoso atamataua, ininiā atāonoka asākirauata, kotxi Kristo nitiriakori atxaua.

3

Iōkatsopari Atoko Hītxa

¹ Atxiīti iuaīkana ate sāpiretatari erekari akamakiti asākire hāuikini ikapani? Atxiīti hinirekatari apanakini iōkatsopatiniri erekari ate kamakiti ate sākire hāuikini ikapani? Atxiīti ate nirekatari apanakini iōkatsopatiniri erekari hīte kamakiti hīte sākire ate auikini ikapani? Apanakini kamari ikara atoko. Ate kona kamari ikara atoko. ² Kona ninirekari iōkatsopari ikara atoko inakari, kotxi iua iōkatsopari atoko hītxa hīte. Ate ākixinireē iōkatsopari atoko hītxa. Ikinimane atatsopatari ikara iōkatsopari, ininiā imarotarina erekari hīte kamakiti. ³ Iōkatsopari Kristo iōkatsopatakiti ate mīkiti atoko hītxa. Kona txītaā iōkatsopataāka. Erekari Matamatakoti Teoso Mapinakati iōkatsopatari. Kona aātsopaā iōkatsopataāka. Kākiti ākixinireē iōkatsopataāka.

⁴ Ikara atoko atxai hīte, kotxi iteene aimarotari Teoso, Kristo nakitiakori aniniua. ⁵ !Kimaroreua ate. Ateka !aposotari aparīkauatini Teoso ikapani. Teosora sikaposotiiretaua. Isikari imarore atemoni. ⁶ Isikaposotiiretaua Teoso ikapani aparīkauatini ikapani, isākire amaneri kākiti asāpiretini ikapani. Ikara isākire amaneri oerekaua Erekari Matamatakoti aākixinireē auini. Isākire amaneri !oerekaua ipaniātakiti iōkatsopatakori Moisesimoni isikakiti. Ipaniātakiti iōkatsopatakori Moisesimoni isikakiti paniātari kākiti ipinini imaerekani xika. Erekari Matamatakoti aākixinireē auiniā, itxīkitakaua aāuapininiika anini.

Teoso Parīka Amaneri

⁷ Teoso paniātakiti tesi pakini iōkataāka kai nopini. Teoso sikasaakiri ikara Moisesimoni, Teoso iotximere iteene aua. Moisesi toō iuasaaki apakapari

Teoso iotximere. Iteene iotximere aua Moisesi toõ, ininiã kãkiti Isaeo auakani kona posotari atamatiniri. Iotximere poiãõãpotakasaaki, !iposotapanikarina itoõ atamatinina. Ininiã Teoso iotximere auakasaaki, isãkire iõkatakori apoka itiximoni kãkiti ipinini ïkapani. ⁸ Uatxa iua Erekarî Mata-matakoti txïkitakari kãkiti ãtipirika auini ïkapani, ininiã uatxa Teoso parïka apiata. Peerekari ikara iparïka. ⁹ Peerekari Teoso parïka ipaniãtakiti iõkatakori kãkitimoni isikasaaki, txamari iuasaaki oerekari kãkiti misiritiko imaerekani xika. Uatxa Teoso parïka apiaerekata, kotxi Kristo kamaerekatari kãkiti. ¹⁰ Uatxa Teoso parïka apiata. Peerekari. Iotximere apiari atoko itxa, ininiã iua parïka kitxakapirïka iotximere napakari atoko itxa. ¹¹ Kitxakapirïka Teoso parïka ipaniãtakiti iõkatakori isikasaaki peerekari, txamari ikara Teoso parïka xipope. ïkorasaaki iparïka kãkiti ikamaerekatini !ixipoka, ininiã api-aerekata.

¹² Ia Teoso parïka !ixipoka, ininiã ataparaxinireritika asãkirauata. ¹³ Moisesi atoko !atxaua, kotxi iua ipatoõtaua mãkatxi mataã, itoõ iotximere Isaeo auakani matamatakani ïkapani. Itoõ iotximere poiãota, iuaritika ! iposotarina atamatinirina. ¹⁴ Moisesi ipatoõtiniua atokokana ninoa Isaeo auakani oki ipataãka, kotxi !imarotarina atão Teoso nireëkiti. Uatxapiima okina ipataãkapanika atatsopatakasaakirina Teoso sãkire iõkatsopatakori, Xesosi apokini apisapanika auakari sãkiretxiti. !Imarotarina Teoso nireëkiti. Kristo sãkire auikikosaaki, iua ipatoõtiko makatxakaãka, ininiã iuasaaki kãkiti imarotari Teoso nireëkiti. ¹⁵ ïkorasaaki apaka Moisesi iõkatsopare atatsopatakasaakina, !imarotarina. Okina ipataãkapanika. ¹⁶ Kãkiti akiritakasaakiri Apiananiri, ipatoõtiko makatxakaãka. ¹⁷ Erekarî Matamatakoti itxaua Apiananiri. Erekarî Matamatakoti auiniã aãkixinireë, !aparïkauataika amaerekani makatxakiko ïkapani, kotxi Xesosi makatxakapekari amaerekani. ¹⁸ Xesosi sãkire auiãkani atxaua, ininiã atoõ kona ipataãka. ãtakaãri atoko atxaua. Kãkiti atamatakasaakiuua ate, atamatarî Apiananiri iotximere. Apiananiri Erekarî Matamatakoti aãkixinireë txïkitakaãpotaua ikara atoko aniniua, ininiã apiaãpota aiotximere.

4

Teoso Iokanapirena Erekarî Pokamara Atoko Itxa

¹ Teoso amonïkaua ate, ininiã iua paniãtaua ia parïkatxi akamini, iokanapirena erekarî apanakinimoni asãpiretini. Ikara atoko ininiã, isikataparaxiniretaua, ininiã !anirekarî atakanapiniri ikara parïkatxi. ² Kãkiti kipatari ikamakiti, maerekati ikamakasaaki, kotxi ipëtauata. Ikara atoko inakari maerekati !akamaika. Atakanapapekari. !Amisirienetari kãkiti. Kona akoketari ate sãkire Teoso sãkirekata. Teoso kenakotari asãkire, ininiã atãonoka asãkire, ininiã kãkiti ãkixinireë imarotari akamakiti atão inini. ³ Kãkiti mimarotakanisaakiri Teoso iokanapirena erekarî asãpiretakiti, kãkiti pïpinanaãkari atoko itxa. ⁴ Kãkiti pïpinanaãkari !imarotari Teoso iokanapirena, kotxi kãkiti teosone, Satanasi inakori, ipatari ninoa oki, ininiã !atamatarina pokamara ninoa iopiniãkari. Teoso iokanapirena erekarî pokamara atoko itxa. Peerekari ikara Teoso iokanapirena. Iua erekarî pirena sãpiretari Kristo Apiananiri ininiua, kotxi Teoso itxaua. ⁵ Ate kona sãpiretari kãkiti ateka pirena. Ate sãpiretari Xesosi Kristo Apiananiri ininiua. Ate hïte nitiriakori atxaua, kotxi Xesosi nirekarî hinitiriakori aniniua. ⁶ Kitxakapirïka ipiãnoka auakasaaki, Teoso txari: "Piopinikaxitita." Iuasaakipeka iopinikaxitita. Iua Teosotxikana iopinikari aãkixinire. Ikara iopinikare kamaimarorettaua Teoso

Apiananiri kaiotximereri ininiua. Kristo aãtamatakasaaki, aãtamatari Teoso iotximere.

Xesosi Sãkire Auiãkani Misiritiko

⁷ Kopiti maikoti atoko atxaua, kotxi atapara !auari. Iuaritika atemoni auari Teoso iokanapirena erekari katireri. Ininiã aimarotari Teosonoka kaposotireri, kataparari ininiua. Atepekana !aposotari. Atapara !auari. ⁸ Asinimoni amaxikakini aua, iuaritika !okaua ate. Atxiïti !aimarotari akamakiti tîkane, iuaritika kona aiotokakari Kristo sãkire aãuikini. ⁹ Amisiritiko aua, iuaritika Teoso kona takanapaua ate. Atxiïti akarotaãka, iuaritika kona aõkaãka. ¹⁰ Ikiniõtika aïto okiko monõkoni aua Xesosi sãkire aãuikini xika. Xesosi atatsiirauata. Ipina. Iua atokotxikana ate atatsiirauata. Atxiïti aïto ipina iua sãkire aãuikini xika. Xesosi auapika, kotxi ipïpe, eereka õkitikaua, ininiã iua atokokana aïto auapika. ¹¹ Auapanika anakasaaki, aõkiko monõkoni aua Xesosi sãkire aãuikini xika. Aïto ipinapitikako, iuaritika aãuapanika, kotxi Xesosi auapanika. ¹² Xesosi iokanapirena asãpiretini xika, apanakini nirekari okiniua ate. Xesosi iokanapirena asãpiretakasaakii, hïte auikari, ininiã hïte auapika himaxipokakani.

¹³ Teoso sãkire iõkatsopatakori txari:

Nota auikari Teoso sãkire, ininiã nisãpiretari kãkiti.

Iua atokotxikana ate auikari Teoso sãkire, ininiã ate sãpiretari kãkiti. ¹⁴ Teoso õkitikari Apiananiri Xesosi, iuaïkana auini ïkapani, ininiã aimarotari Teoso õkitikiniua ate apaka, iuaïkana aãuini ïkapani. Eereka Teoso anikauako ate hïtekata Xesosi aaõkitini Teoso apisatoõ. ¹⁵ Amïteenekari ikinipoko amisiritiko Xesosi sãkire hïtemoni asãpiretini ïkapani. Kãkiti apikomoni, apikomoni, apikomoni, txaãpota apakapari ikinipoko erekari Teoso sikakiti, ininiã ninoa kãkiti kaiãopokori txari Teoso: “Erekapitikari pisikakiti notamoni.” Ikara atoko ininiã, kãkitipokoni txari: “Peerekari Teoso,” itxako.

Maerekaxinireni !Atxaua

¹⁶ Ininiãkara maerekaxinireni ! atxaua. Aïto xipokaãpota, iuaritika aãkixinire ikiniõtika apiataparaãpota. ¹⁷ ïkorasaaki amaxikiko auapitika Xesosi sãkire aãuikini xika. Kona okanani aua amaxikiko. Eereka Teosokata aïtipirika aãuapika, kotxi aãuikari isãkire. Peerekari iuasaakiko. !Axinikaikari mitxi amaxikiko, kotxi iuasaakiko peerekari. ¹⁸ Kona amaãkatari aãtamatakiti. Am-atamatakiniti axinika. Atamatakori xipokako. Matamatakoti kona xipoka.

5

Aãuapoko Teoso Tixineẽ

¹ ïkorapokoriti aãuakasaaki, aïto aãuapoko itxaua aãkixinire ïkapani. Åti õti aïto xipoka. Ixipokasaaki, Teoso sikari aïtião aãuapoko. Iua aïto isikaua, itixine aãpokasaaki. Iua aïto kona xipokaika. Iua aãuapoko kona uakõtxiã kamakorini.

² ïkorasaaki aãtatsiirauatakasaaki, atxari: “Ninirekari aïtião niïto, niïto Teoso sikakiti itixine napokasaaki.” ³ Anirekari aïtião aïto, ininiã maïtotika !atxaua.

⁴ ïkorasaaki ia aïto auapanika inakasaaki, aãtatsiitari katsiiri. Kona kataparari ia aïto. Anirekapitikamari aïto. Anirekari aïtião aïto, ininiã aïto maxipoãkati makatxakari aïto xipoãkari. ⁵ Teoso kamari aïto maxipoãkani ïkapani. Isikapnikauako aïto ikara atoko inakari. Aimarotari ikara atão inini, kotxi isikapekari Erekar Matamatakoti atemoni. Ipixini Teoso sikaenetakiti isikapekaua, ininiã apikomoni isikaenetakiti isikapitikauako.

⁶ Ininiã kataparaxinirepitikaua ate. Aimarotari aãuapoko ia aïto ininiãua, kona aãpokapanika Apiananiri tixinemoni. ⁷ Xesosi sãkire auikiko oerekaua atão aãuini tîkane. Aõkinoka kona oerekaua atão aãuini tîkane.

⁸ Kataparaxinirepitikaua ate. Kona ate pīkari apinini. Apiaerekata apinini, kotxi iuasaakiko Apiananirikata aāua. ⁹ Anirekari amiinitiniri Apiananiri, ia aīto āki aāuakasaaki, ia aīto xipokasaaki apaka. ¹⁰ Āti ōti ate amakinika sariko Kristomoni. Iuasaaki Kristo sāpiretaua aparīka īki. Iua imarotari ikinipoko akamakiti ia aīto āki aāuakasaaki. Atxiīti akamari erekari. Atxiīti akamari maerekati. Akamakiti iaōka isikaua aparīka īki.

Kākiti Mikanapiriīko Teosomoni

¹¹ Aimarotari Apiananiri katapara inini, kotxi imisiritari kākiti imaerekani xika. Ininiā asāpiretari kākiti auīkiniri iua sākire. Aparīkauata, iua sākire kākiti auikini īkapani. Teoso iteene imarotaua. Imarotari axinikakiti aākixinireē. Ninirekari hīte apaka iteene imarotiniua ate hākixinireē. ¹² Kona ate nirekari iuaīkana asāpiretinii hīte ereka anini. Anirekari asāpiretinii, apakatapitika hīuikiniua ate, kotxi atāonoka akama. Ikara atoko inakari himarotiniā, himarotari kākiti hāpakapapiretini, ninoa misākirepiretakasaakiua ate. Ninoa kākiti ate misākirepiretakani iuikari atamatakorinoka. Kona imaākatari kākiti ākixinire ereka inini. ¹³ Atxiīti kākitimoni kona kiīkiteua ate. Ikara atoko atxa Teoso īkapani. Atxiīti paīkiteua ate. Ikara atoko atxa hīte īkapani. ¹⁴ Kristo iteene tiretaua, ininiākara anirekari iua nireēkiti akamini, kotxi aimarotari iua ipina ikinimane īkapani, kotxi ikinimane ipīkani atoko itxauana. ¹⁵ Kristo ipina ikinimane kākiti īkapani, kākiti mapinakani īkapani, kākiti ātipirika auini īkapani. Ininiā iua kākiti kona kamaikariko iuaka nireēkiti ikiniōtika. Ikamariko Kristo nireēkitinoka, kotxi Kristo ipina iua īkapani. Iuaīkana ōkitikapekaua.

¹⁶ Ininiā uatxa ! axinikaikari kākiti īkorapokoriti auakani xinikakiti atokokana. Mitxi axinikari Kristo ninoa xinikiniri atoko. Uatxa !axinikaikari Kristo ninoa xinikiniri atoko. ¹⁷ Kristo sākire auīākari ākixinire amaneri itxaua. Mitxi maerekati ikamakiti kona ikamaika. Amanerinoka ikama. ¹⁸ Ikara atoko inakari Teosora kaminaua. Mitxi amokaiakari atoko itxa Teoso, iuaritika imikanapiriāua ate iuamoni, kotxi Kristo ipina ate īkapani. Ipaniātaua ate asāpiretiniri ikinimane kākiti, Teoso nirekari imikanapiriinina ninoa iuamoni. ¹⁹ Teoso mikanapiriāri kākiti ikini itixiti auakani iuamoni, kotxi Kristo ipina kākiti īkapani. Teoso mikanapiriākasaakiri kākiti iuamoni, kona iaōtari maerekati ikamakitina. Kona ixinikaikari imaerekanina, ininiā kona imisiritana imaerekani xika. Ia pirena, kākiti imikanapiriini pirena, ipaniātaua asāpiretiniri ikinimane kākiti.

²⁰ Asāpiretari Kristo sākire kākitimoni. Asākirauata iua īkapani, ininiā Teoso iteene ōtākikai hīte ate sākireē. Kristo nireēkiti iaōka ate ōtākikai hīte. Hīkanapiriāko Teosomoni. ²¹ Kristo kona kamari maerekati, iuaritika Teoso misiritari iua maerekati kamakari imisiritini atokokana. Ininiā Xesosi sākire aāuikiniā, Teoso apakapaua ate, maerekati makamakani apakapini atoko, kotxi iua kamaerekataua ate.

6

¹ Ate parīkauata Teosokata, ininiā ate iteene ōtākikai hīte. Teoso sikari ikinipoko erekari hītemoni, ininiā !apakata mamaākatakinitika hininiri Teoso.

² Kotxi Teoso sākire iōkatsopatakori txari:

Erekari kākitimoni nisika. Niketo apokasaaki, iuasaaki nikenakotari hākiritinino nota. Kākiti maerekani nimaktxakini ōtisaaki, nimoianatai hīte.

Nisāpiretai. Uatxa apokapeka Teoso keto erekari kākitimoni isikini. Uatxa Teoso makatxakari kākiti maerekani.

Teoso Nitiriakori Atāo Inakani

³ Kona xatiki akerokari akamakiti kâkitimoni, ininiã kâkiti kona txari: "Ninoa kerokari ikamakitina, atão minakati isãpiretiniua," !itxana. ⁴ Teoso nitiriakori atão atxaua. Aãuini ikiniõtika oerekari kâkiti Teoso nitiriakori atão inakani aniniua, kotxi amîteenekari amaxikiko. Amîteenekari amisiritiko. Amîteenekari katsiiri. ⁵ Teoso nitiriakori atão atxaua, kotxi Teoso parîka akamini xika anoropataãkapeka. Kateia ãki atakaãkapeka. Ahoaãtaã kâkiti apotiitakaniua naiatapekaua. Teoso parîka akamini, pasãpaniri aparîka. Itokata !aimaka. Itokata anatxita. ⁶ Kâkiti imarotari ate Teoso nitiriakori aniniua, kotxi kona akamari maerekati. Aimarotari Teoso sãkire. Kona katimari aomanãkarauatini. Amoianatari kâkiti. Erekari Matamatakoti oerekaua atão akamini. Atão atiretari kâkiti. Ikara atoko aniniã, kâkiti imarotari Teoso nitiriakori aniniua. ⁷ Ate Teoso nitiriakori atão atxaua, kotxi atão inakarinoka asãpireta. Teosora sikaposotiiretaua. Erekari akamakiti aĩkeeko akikomoni, asanaremoni pakini atoko itxa, kotxi erekari akamakasaaki, maerekati iokanataãka. ⁸ Teoso nitiriakori atxaua, ininiã apanakini kâkiti paxitaua. Txamari apanakini kâkiti kona paxitaua. Apanakini sãkire: "Peerekana ninoa." Txamari apanakini sãkire: "!Erekana ninoa." Apanakini sãkire: "Kamisirienererini ninoa," iuaritika atão inakarinoka asãkire. ⁹ Minakaniua ate, iuaritika ikinimane imarotaua. Kaiãokatani apinaarita, iuaritika aãuapanika. Amisiritãka, iuaritika kâkiti kona okapanikaua. ¹⁰ Amatinaniuatakasaaki, Apiananiri kamapoxokonitaua ate. Kona katxineiroteua ate, iuaritika atxĩkitakari kaiãopokori kâkiti ikini sereti erekari Teoso sikakiti apakapinina. Minakani atxaua, iuaritika ikinipoko erekari Apiananiri sikakiti aua atemoni.

¹¹ Hĩte Korĩto sitatxiti auakani asãpiretai ikinipoko axinikakiti. Nikipatakiti !auari. Iteene atiretai hĩte. ¹² Ate nirekari atiretini hĩte, txamari kona hĩte nirekari hĩtoretiniua ate. ¹³ Uatxa nimisãkiretai hĩte namariteakori nimisãkiretini atokotxikana. Hĩtorettauako ate, ate turetini atokotxikana. Hõerekaua hĩtoretiniua ate.

Xesosi Sãkire Mauiãkani Moianariakori !Hĩtxapeua

¹⁴ Xesosi sãkire mauiãkani moianariakori !hĩtxapeua, kotxi !apakata erekari kaikotini maerekatikata. !Apakata pokamara ãkanõkarikata auini. ¹⁵ Kona Kristo moianatari Satanasi. Xesosi sãkire auiãkari nireẽkiti ãti. Xesosi sãkire mauiãkati nireẽkiti ãtião. Ininiã !apakata Xesosi sãkire auiãkari auini Xesosi sãkire mauiãkatikata. ¹⁶ Teoso misãkiretiko aikoti ãki !auari kâkiti kamakiti teoso. Aĩto Teoso misãkiretiko aikoti atoko itxa. Teoso ãtipirika auakari itxaua. Iua txari:

Nota auako ninakitiakorikata. Nitĩpokota ninoa sauaki. Ninoa Teosone nitxauako. Nota nakitiakori itxauanako ninoa.

¹⁷ Ininiãkara hĩtakanapanako nisãkire mauiãkani. Kona ninoakata !hãuape. ! Hĩkaikotape maerekati takote, ininiã napakapai hĩte.

¹⁸ Ininiã hĩri nitxauako. Namariteakori, namariteakoro hĩtxauako hĩte, itxa Apiananiri, Kaposotiireri sãkire.

7

¹ Nitiretakini ikara atoko itxa Teoso kamaenetakiti ate ãkapani. Ininiã matakanapari ikinipoko maerekati aĩto txikotakari, aãkixinire txikotakari pakini. Teoso nakitiakorinoka matxaua. Erekarinoka makama Teoso apaxitini.

Paoro Poxokoni

² Hĩtorettauako ate. Kona amisiritari kâkiti. Kona aõerekari kâkiti maerekati ikamini. Kona amisirienetari kâkiti. ³ Kona ikara atokoni nitxa hĩte nitxitini ãkapani. Kona nitxitai, kotxi nisãpiretipekai iteene atiretini hĩte. Ininiã ipĩkitxi kona oiarikaua. Auakari kona oiarikaua. Ate oiarikakari !auari.

⁴ Nimarotari hîte kaminiri nota ôtâkikakiti iaôka. Nota iuikai hîte. Hîte kamatapaxiniretano nota. Amaxikaâkapika, iuaritika iteene nipoxokoniua.

⁵ Masetônia tixini ate apokasaaki, kona aiotoka. Kona atomata, kotxi asinimoni aua kâkiti ate misiritakani. Kâkiti naiataua. Aâkixinireê apîkarauata.

⁶ Teoso, mîkapiritari kâkiti matinaniuatakani, ininiâ imîkapiritaua ate Txito apokasaaki. ⁷ Iua apokini kamapoxokonitaua. Apaka isâkire kamapoxokonitaua, kotxi isâpiretaua hîte kamapoxokonitiniri iua. Isâpiretaua ate hîte kinirâo aôkitaka ininino nota. Isâpiretaua, hîte maerekaxinireni, kotxi hîtxîkitakano maerekaxinire ninini. Isâpiretaua hîte âtipirika sâpiretiniri apanakini nota kamakiti ereka inini. Txito sâpirena nikenakotakasaaki, apia nipoxokoniua.

⁸ Mitxi niokanatsopatakiti hîtemoni maerekaxinireti txîkitakai hîte, iuaritika erekari niokanatiniri iua niôkatsopatakiti hîtemoni. Merepanika nota matinaniuata, kotxi nimarotari niokanatsopatakiti hâtatsopatini xika hîte matinaniuata. Mapaôtinoka maerekaxinireni hîtxaua. ⁹ Uatxa poxokopekano nota. Na nipoxokoniua hîte maerekaxinireni nitxîkitakini îkapani. Nipoxokoniua, kotxi maerekaxinireni hinini xika, hîtakanapari maerekati hîkamakiti. Iuasaaki hîkanapiriâ Teosomoni. Teoso apokaerekatari ikara atoko inakari himaerekaxinireni, ininiâ kona ate misiritai. ¹⁰ Erekari Teoso txîkitakiniri kâkiti matinaniuatini, kotxi iuasaaki kâkiti takanapari maerekati ikamakiti. Ikanapiriâ Teosomoni, ininiâ Teoso makatxakarî iua maerekani. Ikara atoko inakari matinanitxi erekari. Txamari kâkiti Teoso manirekakani matinani âtiâo, ininiâ ninoa ipinapikako. ¹¹ Hîte matinaniuata himaerekani xika, ininiâ Teoso kamaerekatai. Ininiâkara uatxa erekarinoka hinireka hîkamini. Uatxa iteene hinirekari hîkaminiri Teoso nireêkiti. Hinirekari ikinimane imarotiniri hîkamakiti ereka inini. Uatxa homanitari maerekati mitxi hîkamakiti. Maerekaxinireti hîtxaua himaerekani xika. Uatxa iteene hîtiraôki aua. Hinirekari himarotiniri nota pirenâ, nota ereka ninini himarotini îkapani. Uatxa hinirekari maerekati kamakari misiritiko. Ininiâkara kona hîkerokari, iua kiki maerekati ikamakasaaki.

¹² Iua iôkatsopari mitxi niokanatakiti hîtemoni, niôkatsopata hîte îkapanikara. Kona iua maerekati kamakari îkapanini niokanatsopata. Kona iua maerekati kamakari misiritakiti îkapanini niokanatsopata. Niokanatarî iua iôkatsopari hîtemoni atiraôki himarotini îkapani. Teoso imarotari atiretinii.

¹³ Ininiâ ate kamatapaxiniretaâka, kotxi hîte kamatapaxiniretaâka apaka. Apaka apoxokoniua, kotxi Txito poxokoniua. Iua poxokoniua, kotxi hîte himakinika kamapoxokonitari iua. ¹⁴ Txito hîtemoni isini apisapanika, nota sâpiretari iua niuikinii hîte, kotxi peerekai hîte. Atâo nisâkire, kotxi kona nipêtauata hîkamakiti xika, kotxi hîkamakiti atâo. Atâonoka asâkire hîtemoni. Atâonoka asâkire Txitomoni apaka ate iuikinii hîte. ¹⁵ Apiaâpota Txito tiretinii, kotxi hîkamari iua sâkire iaôka. Imarotari hâpakapiniri iua hîpaxitiniritika. ¹⁶ Nipoxokoniua, kotxi nimarotapitikari hîkaminiri nôtâkikinii iaôka.

8

Txineiro Apanakini Sikakito

¹ Nitariakori, anirekari asâpiretinii Teoso misâkiretikoâtaâ apotiitakaniua Masetônia tixini auakani. Peerekari Teoso kamakiti ninoa îkapani, kotxi ikinipoko erekari isika ninoamoni. ² Ninoa !iteene kauarena. Pasâpaniri nino misiritiko, iuaritika ienenîkana ninoa. Na katxineiroteni, iuaritika ipotxitarina itiina isikinina kâkiti kaamonirinimoni. ³ Nota imarotari ninoa minakati auiniâna, isikarauatana apanakinimoni. Iteene isikarauatana, ininiâ kaiâokatani inatxitana. ⁴ Nota kona amanaâri ninoa txineirote kâkiti Teoso nakitiakori Xerosareê sitatxiti auakani îkapani, iuaritika ninoaka txano:

“Ate nirekari txineiro asikini ninoamoni. Pauiritaua asikiniro ninoamoni. Asikiniāro apoxokoniuata, kotxi ikara atoko akamini amoiatari kākiti Teoso nakitiakori,” itxana. ⁵ Kona ikarananini ninoa nireka. Iteene ninoa kamapoxokonitaua ate, kotxi mitxipe ninoa txaua: “Ate nirekari Apiananiri nireēkiti akamini,” itxana. “Iua oerekiniāri inireēkiti hītemoni, ate nirekari hīte paniātakiti apaka akamini,” itxana Masetónia tixini auakani. ⁶ Txito amanaāpekai hīte txineiro hīsikini Xerosareē sitatxiti auakani ĩkapani, ininiā apaniātari iua sini hītemoni hīsikakiti apakapini ĩkapani, hītiraōki ninoa Teoso nakitiakori hōerekini ĩkapani. ⁷ Hīte iteene auikari Xesosi sākire. Apanakini poiāoka. Hīte imarotari Xesosi sākire hīsāpiretini kākitimoni. Apanakini na iteene imarotari. Hīte iteene imarotari Xesosi sākire. Apanakini poiāonoka imarota. Hīte iteene nirekari Teoso parīka hīkamini. Apanakini poiāonoka nirekari. Hīte iteene tiretaua ate. Apanakini poiāoka tiretaua. Hīte api-aerekata, ininiākara ninirekari hīsikakiti apaka apiari inini, kotxi ikara atoko hīkaminiā, hōerekari Xerosareē sitatxiti auakani hītiretinina.

⁸ Kona nipaniātai nitapararitika hīsikiniro hītxineirote ninoamoni. Nataerekatari hītiraōki. Atāo atxiīti hītiretari apanakini? Masetónia tixini auakani atāo tiretari apanakini. Hīte tiraōki ninoa tiraōki atoko atxiīti? ⁹ Himarotari Apiananiri Xesosi Kristo sikari ikinipoko erekari hītemoni. Itanapoko auiniri Xesosi Teoso tixine auakasaaki. Iuaritika itakanapari ikinipoko. Minakati mauakinitinoka itxapeka hīte ĩkapani. Ininiākara ikinipoko itakanapini xika, ikinipoko aua hītemoni.

¹⁰ Uatxa nota ōtākikai hīte, erekari hīkaminiri hīsākire iaōka, kotxi kita anokanani hīte merepanika xinikari: “Natokopa itxa akaminiri Xerosareē sitatxiti auakani ĩkapani?” hītxa. Hīte merepanika nirekari txineiro hīsikinina ninoa. ¹¹ Ininiā nōtākikai uatxa. Hīkamariko mitxi hīsākire iaōka. Hīpoxokoniritika hinirekariko hīokanatiniro txineiro ninoamoni, ininiā erekari hīpoxokoniritika hīkaminiri hīsākire iaōka. Ipixini txineiro hītemoni auakaro hīsikako ninoamoni. ¹² Hīpoxokoniritika hinirekiniāri hīsikarauatini Teosomoni, iua apakapapitikari hīsikakiti. Poiāoka auiniāi, ininiā erekapitikari poiāonoka hīsikini Teosomoni. Iua apakapapitikari. Iua imarotari !apakata apikomoni hīsikiniri.

¹³ Kona ate nirekari hīte kaamoni hinini, ikinipoko ninoamoni auini ĩkapani. Erekari ninoa auakiti hīte auakitixikana. ¹⁴ Uatxa hīte txineirote auapitika ninoa hīsikini ĩkapani. Āti ōti hīte txineirote mauakanisaaki, atxiīti ninoa txineirote aua, ininiā ninoa sikai hīte. Ininiā hīte moianatinina atokotxikana, ninoa moianatai hīte. Ikara atoko inakari atāo. ¹⁵ Teoso sākire iōkatsopatakori txari:

Kiki kaiāopokori apakapakari itetakori !auari. Kiki poiāoka apakapakari !kaamoniri.

Txito Iokanatiko Korītomoni

¹⁶ “Peerekai,” atxari Teoso, kotxi iua sikanireōtari Txito itiretinii hīte, nota tiretinii atokotxikana. ¹⁷ Txito nirekapitikari ate paniātakiti ikamini, hītemoni isini. Apaniātiniri apisapanika, inirekari hītemoni isini, ininiā ipoxokoniritika isa hītemoni. ¹⁸ Aiokanatarī āti aītari iuakata. Ikinimane Teoso misākiretikoātaā apotiitakaniua iteene apokaerekatari iua, kotxi isāpiretari Teoso iokanapirena erekari ikinimanemoni. ¹⁹ Ninoa mereēri iua aītari atekata isini Xerosareēmoni, oa txineiro aanikasaaki. Oa txineiro asikakito oerekana Xerosareē auakani Apiananiri ereka inini. Oerekana apoxokoniritika amoiatinina.

²⁰ Oa txineiro kaiāopokoro aua, ininiā iua aītari siniā atekata, iua imarotari atāo asikiniro oa txineiro Xerosareē auakanimoni. ²¹ Anirekari atāo akamini

oa txineiro asikasaaki ninoamoni. Anirekari Apiananiri imarotiniri atāo akamini. Anirekari kākiti apaka imarotiniri atāo akamini.

²² Iuaīkana aiokanatarī ātipekana aītari hītemoni. Aātaerekatapekari iua. Ipoxoniritika imoianatarī kākiti. Apiapoxokonita iua, kotxi imarotari hīte kaminiri mitxi hīsākire iaōka. ²³ Txitopekana, nota moianari itxaua. Iua miparīkatano nota, hīte amoianatini īkapani. Xesosi sākire auiākani mereēna aītariakori Txitokata sikani hītemoni. Kākiti imarotakasaakina nino, “Peerekari Kristo,” itxana kākiti. ²⁴ Ininiākara hōerekanako ninoa kikiakori atāo hītiretinina, ininiā ikinimane Xesosi sākire auiākani imarotari atāo hītiraōkiuatini. Iuasaakiko ninoa imarotari ate sākire atāo inini ate iuikinii hīte.

9

¹ Nisāpiretai hīte txineiro asikakito tīkane Teoso nakitiakorimoni, Xerosareē auakanimoni. Nimasāpiretakaniāi hīte, iuaritika hīte nirekari hītxineirote hīsikini ninoamoni. Nimarotari ikara. ² Nimarotari iteene hinirekari himoianatinina ninoa. Nitxapekana Masetónia tixini auakani: “Nota iuikana aītariakori Korīto sitatxiti auakani, Akaia tixini auakani, kotxi kita anokanani ninoa iposope txineiro iokanatinina Xerosareēmoni,” nitxana. Hīte poxokoni txineiro hīokanatinini, sikanireōtana Masetónia tixini auakani apaka iokanatiniro txineiro. ³ Uatxa niokanatanana ninoa aītariakori ipi āti pakini hītemoni. Hīte iposope hininiā hītxineirote hīokanatinini, erekapitikari, kotxi ikara nisākire iaōka. Ininiā atāo ate iuikinii hīte. ⁴ Masetónia tixini auakani siniā notakata, hītxineirote miposonitipanika, ininiā ate pētauata, kotxi ate auikari hīsākire. Hītepekana apia pētauata hīsākire iaōka himakamakani xika. ⁵ Ininiākara ninirekari ninoa aītariakori sini hītemoni nota ereē napokini apisapanika. Ninoa moianatai txineiro kaiāopokoro hīsikaenetakito hāpotiitini īkapani. Ininiā napokasaaki ereē, iposope hīsikakito nanikini. Ininiā iuasaaki aimarotariko kinirāo sikaenetaka hinakito txineiro. Iuasaaki aimarotariko hīpoxoniritika hīsikiniro hītxineirote.

Takari Itori Auini

⁶ Ia nisākire hīxinika. Poiāoka komiri pitakiniā pitakarauatakasaaki, poiāonoka iri pimaporoka. Kaiāopokori pitakiniā, kaiāopokori pimaporoka. ⁷ Ininiā pākixinireē pixinikari atāo pisikakiti ātimoni. Kona erekari pimanirekasikatakiniti pisikini. Āti itapararitika paniātiniāi pisikarauatini, ! apakata. Teoso apokaerekatarī kākiti ipoxokoniritika isikarauatini ātimoni. ⁸ Teoso posotari ikinipoko erekari isikinii hīte, ininiā ikinioṭtika ikini sereti hiamonitakiti auiniā, hāpakapari ikinika hinireēkiti. Ininiā ikinipoko erekari hīkama. ⁹ Teoso sākire iōkatsopatakorī txari: Teoso šikari itori erekari matxineirotenimoni. Teoso kamakiti atāo inakari ! ixipoka. Auapikako.

¹⁰ Teosora sikari takariki katakarerimoni itakarauatini īkapani, ininiā eereka iposope inakasaaki, auari kienatxi inikakiti īkapani. Iua atokokana Teoso sikari kaiāopokori takariki hītemoni. Iua anakakari hītakare, ininiā eereka iposope inakasaaki, kaiāopokori auari, ininiā kaiāopokori hīkamakiti atāo inakari apanakinimoni. ¹¹ Teoso sikai ikini sereti erekari, ininiā ikinipoko auape hītemoni. Ininiākara kākiti mauarenimoni hīsikariko kaiāopokori. Ate anikasaakiro hīsikakito apanakinimoni, ninoa txariko: “Peerekari Teoso, kotxi ninoa sikaua ate aamonitakiti,” itxanako.

¹² Ikara atoko inakari hīkaminiā, hīsikari Teoso nakitiakori amonitakiti ninoamoni. Apaka hīsikasaakiri hīsikakiti ninoamoni, ninoa kaiāopokori txari: “Peerekari Teoso,” itxanako. ¹³ Ninoa poxokoniuatako, kotxi hīte sikari kaiāopokori ninoamoni, apanakinimoni apaka. Ninoa txariko: “Peerekari

Teoso,” kotxi imarotarina erekari hīte kamakiti. Imarotarina hīte kaminiri Kristo paniātakiti iaōka. Imarotarina hīte atāo auikiniri Kristo iokanapirena erekari. ¹⁴ Ininiā ninoa misākiretari Teoso hīte ĩkapani, kotxi iteene ninoa tiretai hīte, kotxi Teoso sikari ikinipoko erekari hītemoni. ¹⁵ Matxari Teoso: “Peerekai pite, kotxi pite sikaua pamarite. Āti pisikakiti iua atoko inakari ! auari.”

10

Paoro Apakapapiretari Apoītiko

¹ Kataparaxinireri Kristo, iuaritika ianaka ōtākikari kākiti, ininiā nota Paoro ianaka nōtākikai. Txamari apanakini hīte sauaki auakani txari: “Paoro ĩtakoxiti auakasaaki, itapararitika itxitaua ate, atemoni iōkatsopatakasaaki. Txamari iua atekata auakasaaki, ipīkarauata amaerekani isāpiretiniua,” itxana. Ikara apanakini sākire na atāo, kotxi ĩtakoxiti nauanāta, iuaritika amaātiki nōtākikai hīte. ² Kona ninirekari noerekinii hīte apanakini nitxitini ereē napokasaaki. Niposotapitikari nitapararitika nitxitiniri apanakini ereē napokasaaki, kotxi ninoa txari: “Paoro kamakiti Teoso sākire mauīākani kamakiti atokotxikana,” itxana. Txamari na atāo ninoa sākire. ³ Aīto tapara poiāoka, kotxi kākiti atxaua, ininiā aīto taparaā !apakata anaiatiniri maerekati. Teosora sikataparataua aākixinireē, maerekati anaiatini ĩkapani. ⁴ Ate ikeeko kona Xesosi sākire mauīākani ikeeko atokoni. Teoso ikeeko isika atemoni. Kaposotiireri Teoso ikeeko, ininiā aposotari Satanasi kamakiti axipokini aiko kaikori axipokini atokokana. ⁵ Kākiti iuikaua. ! Inirekarina auikinirina Teoso imarore. “Paimatireua ate,” itxanātana. Teoso sikaimaroretāua ate, ninoa sākire paxirari inini aōerekini ĩkapani. Ikinipoko axinikakiti anireka Kristo nireēkiti iaōka axinikini, ininiā axinikakiti ātiāo auiniā, atxīkitakari iua axinikakiti imamakini Kristo nireēkiti iaōka inini ĩkapani. ⁶ Hīte iteene kamakasaakiri Kristo nireēkiti iaōka, ate misiritariko kākiti ereē Kristo nireēkiti imakamakanisaaki.

⁷ Hīte xinikari hātamatakitinoka. Kona hīxinikari kākiti ākixinireē auakari. Kākiti ereē uākatiniāri Kristo nakiti ininiuana, erekari imarotininirina ate apaka Kristo nakitiakori aniniua, ninoa Kristo nakiti ininiuana atokotxikana. ⁸ Atxiīti iteene niuikari Apiananiri sikaposotiiretiniua ate, iuaritika kona nipētauata niuikiniri ikara, kotxi Apiananiri sikaposotiiretaua ate, hīte akamataparaxiniretini ĩkapani. Kona ate nirekari hīte ākixinire tapara poiāoāpotini. ⁹ Kona ninirekari hīpīkarauatini, iōkatsopari niokanatsopatakiti hātatsopatini xika. ¹⁰ Apanakini txari: “Paoro txitaua itapararitika iokanatsopatakitiā, txamari iua atekata auakasaaki, isākire ātiāo. Iuasaaki kona kataparaxinireri iua. Iuasaaki ipīkarauata ate itxitini,” itxana apanakini. Na atāo ninoa sākire. ¹¹ ĩtakoxiti ate auakasaaki, asākire aiokanatsopatakiti iuatxikana asākireta, ereē hītekata aāuakasaaki.

¹² Ninoa ate misākirepiretakani iteene iuikaua. Atauako ninoa apiaerekata? Atauako !erekaua ate? !Kiīkitena ninoa. Ninoa uākatari ninoa kamakitinoka erekari inini, ininiā ninoa iaōtari apanakini kamakiti. Apanakini kamakiti ninoa kamakiti atoko ininiā, ninoa uākatari apanakini kamakiti apaka erekatxikana. Txamari na atāo. ¹³ Atepekana, kona ate iuikari ateka kamakiti. Ate iuikari parīkatxi Teoso sikakiti atemoni akamini ĩkapani. Iuanoka ate iuika. Iua paniātāua aparīkauatini hīte ĩkapani. Iua aparīka ate iuikapitika. ¹⁴ Teoso paniātakitinoka akama. Ia aparīka, ininiā ate sari hītemoni Kristo iokanapirena erekari asāpiretini ĩkapani. Ininiā apakatapitika ate iuikiniri ikara aparīka. ¹⁵ Apanakini parīka Teoso ĩkapani ate kona txari: “Iua parīkatxi ate kamakiti,” kona atxa. Ate nirekari hīte auikaāpotiniri Kristo

sākire, Kristo sākire iteene hāuikini ĩkapani, ininiā ate nirekari aparĩkauatini Teoso ĩkapani hĩte auiniātaā, Kristo sākire apanakini auikini ĩkapani. ¹⁶ Ate nirekari Kristo iokanapirena erekari asāpiretiniri kākiti, hĩte tixine apiko auakani Xesosi sākire masāpiretakotipanika ĩniniātaā. Ininiā kona aparĩkauata apanakini parĩkauatiniātaā. Ininiā apanakini parĩka: “Ate parĩkakara iua,” kona atxari.

¹⁷ Teoso sākire iōkatsopatakori txari:

Pinirekatari piuikarauatini? Pinirekiniāri, ininiā piuikariko Apiananiri kamakitinoka.

¹⁸ Teoso kona apokaerekatari kākiti iuaka, “Erekapitikano,” inakari. Teoso sāpiretiniāri: “Erekapitikari iua kākiti,” ininiā Teoso apokaerekatari iua.

11

Teoso Maiokanatakini

¹ Atxiĩti miĩkiteti sākirauatini atoko nimisākiretai hĩte, iuaritika hāuiritano nota. ² Teoso nirekinii hĩte iua nakitiakorinani hininiua, iua atokotxikana nota nirekai hĩte Teoso nakitiakorinani hininiua. Nisikaenetai Kristomoni hĩtaniri atoko ĩnini ĩkapani. Iuamoninani nisikaenetai. Ninirekari iua-moni nisikinii, ātokoro kikikata masirĩkakato atoko inakaro. ³ Kitxakapirĩka Satanasi auāĩtotari imini. Iua imini misirienetaro Eva, kotxi paimatireri Satanasi sākire. Nipĩkari Satanasi misirienetinii hĩte apaka, ininiā eereka hĩxinikakiti na atāoni. Nota pĩkari Xesosi hĩtakanapini. Mitxi iteene hĩtiretari iua. Iuananira hĩtireta. ⁴ Kotxi hĩte apakapari hĩpoxokoniritika ĩkinimane ereē apokakani, “Ate Xesosi sākire sāpiretakaniua” inakani, txamari Xesosi pirena ninoa sāpiretakiti na atāoni. Kona ate sāpiretari ĩkara atoko inakari, iuaritika hāuikari ninoa sākire. Hāuikasaakiri ninoa sākire, atxiĩti hāpakapari mata-matakoti, txamari kona hāpakapari Erekaru Matamatakoti ate sāpiretakiti. Ate sāpiretai hĩte atāo Kristo iokanapirena erekari, txamari hĩte auikari ātiāo.

⁵ Hĩtemoni, Teoso iokanataka ninoa kākitemoni. Hĩtemoni, ninoa Teoso iokanatakini apiarini. Nota poiāo atxiĩti? Ninoa apiata atxiĩti? Konapitini.

⁶ Atxiĩti kona nota iteene imarotari nisākirauatini, iuaritika nimarotapitikari Teoso sākire. Himarotapekari ĩkara atoko inakari, kotxi asāpiretapekai.

⁷ Teoso iokanapirena erekari nisāpiretakasaakii hĩte, maxikatĩka nisāpiretai. Kona ninirekari hiĩkitxitinino, ininiā nota poiāotakaua, hĩte atāo inakari himarotini ĩkapani. ĩkara atoko nikerokatari atxiĩti? ⁸ Hĩtekata nipa-rĩkauatakasaaiki, kākiti ātiātaā Xesosi sākire auĩākani iokanataro txineiro notamoni, txamari kona nota moianataka ninoa iuasaaki. Hĩtekara nimoianata iuasaaki. ⁹ Hĩtekata nauakasaaki, nota nirekamaro txineiro. Txamari kona nota amanaāi hĩtxineirote. Aĩtariakori Masetónia tixinikini mininano itanapoko niamonitakiti. Iua atokotxikana kona namanaāpaniro hĩtxineirote nota ĩkapani, kotxi atxiĩti nota minari atoko nitxa hĩporikiā. Kona ninirekari ĩkara atoko inakari nininiua. ¹⁰ Kristo atāonoka isākire. Isākire nākixinireē auape, ininiā nota sākire apaka atāo. Nisāpiretapanikari kākiti hĩtxineirote nimanirekakani pirena. !Auari ĩkara nisākire iotokakakari ĩkinika Akaia tixiniā. ¹¹ Kinirepa ĩkara atoko nitxa sākireta? Atxiĩti kona nitiretai hĩte? Teoso imarotari nota iteene tiritinii hĩte.

¹² Uatxa iuaĩkana nisāpiretai hĩtxineirote nimapakapakani. Nanera kākiti uatxa hĩtekata auakani Teoso maiokanatakini txari: “Ate kamari Paoro parĩkatxikana,” itxana. ĩkara atoko ininiā iuikauana. Txamari ninoa parĩka ātiāo, kotxi ninoa apakaparo hĩtxineirote. Ate kona apakaparo hĩtxineirote.

¹³ Teoso kona iokanataka nanera hĩtemoni. Na atāo Teoso iokanatakini ! itxauana. Imisirienetaina hĩte, “Aparĩkauata Teoso ĩkapani,” inakasaakina. Nanera txari: “Kristo iokanakiniraua ate,” itxana. Txamari na atāo nanera

sākire. ¹⁴ Ikara atoko inakari auapitika, kotxi Satanasi sari kākitimoni. Itxari: “Nota Teoso nitiri nitxaua. Nota oerekai atāo inakari.” Ininiā iua sākire auīākani auapitika. ¹⁵ Ininiākara nanera kikiakori Satanasi nitiriakori txari: “Atāo inakari kamakaniua ate. Teoso nitiriakori atxaua,” itxana. Xipokatxi ōtisaaki imisiritaākanako ninoa maerekati ikamakitina xika.

Paoro Misiritiko Pirena

¹⁶ Iuaīkana nisāpiretai. Miīkiteti !nitxaua, iuaritika hīte potxitari kākiti miīkiteni, ininiā miīkiteti atoko niuikaua, kotxi nota posotari niuikiniua. ¹⁷ Apiananiri kona sākirauata ia atoko. Miīkitetinoka sākirauata ia atoko iuikiniua. ¹⁸ Nanera kikiakori iuikaua, Teoso sākire mauīākani iuikiniua atokokana, ininiā nota apaka sāpiretari niuikiniua. ¹⁹ Hīte auiritari kākiti miīkiteni himoianarini ininiua, kotxi !kiīkitei hīte. ²⁰ Nanera hītekata auakani txīkitakai hīte initiriakorina hininiua. Hīte auiritari ikara atoko inakari. Nanera amanaaāpotari ikini sereti hīte nakiti. Ikamarina inireēkitina hītemoni. Ipaniātaina ikiniōtika inireēkitina hīkamini. Imisiritaina hīte. Hīte auiritari ikara atoko inakari ikaminina. ²¹ Erekari nipētauatini atxiīti? Kotxi kona kataparaxinireno nota nanera kamakiti atoko nikamini hītemoni. Kataparaxinirena nanera.

Ikamakitina iuikana, ininiā miīkiteti atoko kataparaxinireno nota. Nikamakiti niuikako. ²² Nanera Epireoakorikani? Ari. Nota apaka Epireo nitxaua. Nanera Isaeo apika mekaniriakorikani? Ari. Nota apaka Isaeo apika mekaniri nitxaua. Nanera Apraō apika mekaniriakorikani? Ari. Apraō apika mekanirikanarano nota apaka. ²³ Nanera Kristo nitiriakorikani? Atxiīti. Miīkiteti iuikiniua atoko nitxa: “Kristo nitiri apiarekatakari nitxaua nota.” Nota apia parīkauata Teoso ikapani. Apiata nimisiritiko, kotxi kaiāokatani kateia āki nitakaāka. Kaiāokatani nota noropataāka aāpitsaā. Kaiāokatani nipinaarita. ²⁴ Ipi ipi āti pakinikata Xoteoakori noropatano aāpitsaā. Iuasaaki inoropatanona trīta novi pakinikata. ²⁵ Ipi āti pakinikata Homanoakori noropatano aākeē. Ātikata kai soroā nikiporonakaāka. Ipi āti pakinikata maporoā nisikasaaki, maporo sakika apanīkakiā. Āti ikanōkati, āti pokamarariti pakini ninapa potxoari uiniti nipimakaātini. ²⁶ Nianaxititapika. Natamonōkonitari uini torōkani. Natamonōkonitari kiītiririni. Natamonōkonitari ninirimane. Natamonōkonitari ninirimane minakaniua. Natamonōkonitari sitatxi nauakasaaki, kākiti mauakaniātaā nauakasaaki, potxoari uiniti nīpiriātakasaaki pakini. Natamonōkonitari kākiti, “Xesosi sākire aūika” inakanikata nauakasaaki, kotxi na atāo ninoa sākire. ²⁷ Kaiāokatani nisāpaka itori parīkatxi xika. Kaiāokatani nitsii aua. Kaiāokatani kona apakata nimakini ikanōka. Kaiāokatani ninatxita, niposonata. Kaiāokatani nipokori !auari. Kaiāokatani nimīteenekari katxīkareri. Kaiāokatani nimāka !auari. ²⁸ Ikara atoko inakari monōkori auapika notamoni. Apaka niparīka kasāpaniri aua, kotxi ikiniōtika niparīkauata kākiti Teoso misākiretikoātaā apotiitakaniua ikapani. ²⁹ Āti iōkapetiniā, nota apaka niōkapeta. Āti txīkitakaāka maerekati ikamini, ininiā nota maerekaxiniretinoka nitxa.

³⁰ Hīte nirekiniāri niuikiniua, ininiā niuikari niōkapere. ³¹ Aāuīte Xesosi Kristo iri, Teoso imarotari nisākire atāo inini. Ātipirika matxari: “Peerekai.” ³² Tamāsiko sitatxiti nauakasaaki, kākiti auīte apiari Areta inakori auakasaaki, Tamāsiko auakani auīte paniātari sotatoakori kaikotini sitatxi kākiti iironakiniātaā nota imaīkinina ikapani. ³³ Txamari kona nota pokīka sitatxi toreātaā. Nīroā kotari mitari āki. Iuasaaki aītariakori iokatxakano aapokotxi sonaā sitatxi pirikere mapara. Ixitipe apoka nitxa. Ikara atoko itxa nimatekini, ininiā kona ninoa maīkano iuasaaki.

12

Taponetxi Teoso Sikiniri Paoro

¹ Hinirekatari apikomoni niuikiniua? !Apakata, iuaritika hinirekiniāri, niuikapanikauako, kotxi Apiananiri sikano taponetxi peereri. Iua oerekano imarore. ² Akokaxiti katosi anokanani inakasaaki, nanikaāka Teoso tixinemoni iaxiti apiko nopinixiti. Iuasaaki nitaponeuataako? Atxiīti niīto atāo anikaākauako? Kona iteene nimarotari. Teosonokara imarotari. ³ Ianoka nimarota. Nanikaāka Teoso tixinemoni nitaponeē atxiīti, atāo niīto anikaāka atxiīti. Teosonoka imarotari. ⁴ Iuaxiti nikenakotari sākiretxi erekari. Ikara kona nimarota iuaīkana nisāpiretini. Apaka !auiritaāka nisāpiretiniri kākiti. ⁵ Ninirekiniāri, niukari nitapone ikara atoko inakari, txamari !apakata notaka niuikiniua. Niōkaperenoka niuka. ⁶ Ninirekiniāri niuikiniua, atāonoka nisāpireta, kotxi kona miīkiteti !nitxaua. Txamari kona ninirekari niuikiniua, kotxi atxiīti kākiti uākatari nota apiari nininiua. Ninirekari kākiti atāo imarotinino. Erekari kākiti imarotinino nisākireē, nikamakitiā pakini.

Paoro Misiritiko Inako Tsii Atoko Inini

⁷ Peerekari nitikakiti Teoso tixine nanikikosaaki, iuaritika Teoso kona nirekari niuikiniua, ininiākara Teoso auiritari Satanasi misiritinino niītoā. Katsiiri. Inako atoko itxa niītoā, ininiā niuikiniua !auari. ⁸ Ipi āti pakinikata namanaāri Apiananiri ia nitsii imakatzakini. ⁹ Txamari itxano: “Kona nimakatzakari. Ikinipoko erekari nisikakiti sikataparatai. Iuanoka pinireka. Piōkapetakasaaki, nota tapara pākixinireē apiata,” itxano. Ininiākara nipoxokoniritika niukari niōkapere, kotxi iuasaaki nimarotari Kristo posotiire nākixinireē auini. ¹⁰ Niōkapetakasaaki, nipoxokoniua. Nixiniketikosaaki, nipoxokoniua. Nimaxikikosaaki, nipoxokoniua. Nimisiritikosaaki, nipoxokoniua. Nikamakiti tīkane nimimarotakanisaaki, nipoxokoniua. Ikara atoko inakari nimīteeneka nipoxokoniritika, kotxi Kristo nakiti nitxaua. Niōkapetakasaaki, nitapara nākixinireē apiata.

Paoro Nirekari Erekari Korīto Auakanimoni

¹¹ Miīkiteti sākirauatini atoko nisākirauata, txamari hīte xika nisākirauata miīkiteti sākirauatini atoko, kotxi hīte iulkaākamanoko nota, kona nota nirekamariko niuikiniua. Minakati nitxaua, iuaritika nanera Teoso maiokanatakini hītekata auakani kona apiaerekata. ¹² Hītekata nauakasaaki, nikamakiti oerekai atāo Teoso iokanatakiti nininiua, kotxi iuasaaki noerekai Teoso oerekakiti kākitimoni. Noerekai kākiti maposotakiniti. Noerekai posotiiretxi iuasaaki. !Asāpaka ikara atoko inakari aōerekinii hīte. ¹³ Atxiīti apiata nitiretari apanakini Teoso misākiretikoātaā apotiitakaniua ātiātaā auakani? Konapitini. Ninoa nitiretini atokotxikana nitiretai hīte. Namanaāna ninoa txineirote niamonitakiti īkapani. Hīte txineirote kona xatiki namanaāi, ininiā nikerokatari atxiīti? Himaxinīkaretariko ia nikerokakiti.

¹⁴ Ipikata nisipeka hītemoni. Naiamatapeka iuaīkana hītemoni nisini tīkane. Kona hītxineirote kona namanaāpanii. Hītxineirote kona ninireka. Hītera ninireka. Amarini kona nīkatana iri, inoro pakini. Iri, inoro pakinira nīkatana imiakori. Nota hīri atoko nitxaua. ¹⁵ Nipoxokoniua ikinika nota nakiti nisikinii hīte. Notaka nisikaua hītemoni. Nipoxokoniritika nisikai. Txamari nota tiraōki hīte īkapani apiaāpotakasaaki, hīte tiraōki nota īkapani poiāoāpota.

¹⁶ Atāokani ikara atxiīti? Iuaritika ia nimarota. Kona xatiki namanaāi hinakiti hīsinino. Atxiīti āti ereē auakari txari: “Paoro misirienetaua ate. Paxirari isākire,” itxa atxiīti. Txamari ikara na atāo. ¹⁷ Natokopa nitxa nimisirienetini? Atauako kikiakori hītemoni nota iokanatakini misirienetai hīte? !Imisirienetaina. ¹⁸ Nōtākikari Txito hītemoni isini tīkane. Nipaniātari āti aītari iuakata isini. Atauako Txito misirienetai hīte? Konapitini. Erekari

Matamatakotira anikano nota. Iua apaka anikari Txito. Nota sari Xesosi nirekinimoni. Txito apaka sari iua nirekinimoni.

Paoro Pīkare

¹⁹ Atxiīti hīte xinikari ikara asāpiretai, ate ereka anini himarotini īkapani. Konapitini. Ate sākirauata hītekata Kristo sākirauatini atokokana, kotxi Teoso atamataua. Ate tirketakini hītxaua hīte, ininiā ikinipoko akamakiti akaminii hīte, hīte ākixinire tapara auini īkapani. ²⁰ Nipīkarauata ereē napokini, kotxi atxiīti hīte kamari nimanirekakiniti. Atxiīti napokasaaki ereē, kona hīte apokaerekatano nota. Ereē napokasaaki, nipīkari nimarotiniri hīte txitakakiniua, hīxikotakakiniua, homanatakakiniua, hīpotxinani auini, himisākirepiretakakiniua, aāpirena hīsāpiretini, hīuikiniua, hineenamauatini. Ikara nimarotini nipīka, ereē napokasaaki. ²¹ Ininiā hītemoni napokasaaki, nipīkari Teoso kamapētatinino nota hīte maerekani xika. Nipīkari nitxiapatini maerekati hīkamakiti xika, kotxi kaiāopokori kamari maerekati akokaxiti, iuaritika !itakanapapanikari iua maerekati. Ixinikakitina maerekatinoka. Maerekati ikini sereti iītona nireēkiti aua. Ītanoro minakotokatika isirīkana. Ikara atoko inakari kona itakanapapanikana.

13

Paoro Sākire Imapotōkire Ōtākikare

¹ Iplikata nota sari hītemoni. Iuaīkana hītemoni nisako. Teoso sākire iōkatsopatakorī txari:

Ipi āti pakini kākiti atamatiniāri maerekati āti kamakiti, ninoa sākire auikaāka, ininiā iua maerekati kamakari misiritaākako. Ipi kākiti atamatiniāri maerekati āti kamakiti, ninoa sākire apaka auikaāka, ininiā iua maerekati kamakari misiritaākako,

itxa Teoso sākire. ² Akokaxiti hītekata nauakasaaki, nōtākikapekai himaerekani hītakanapini. Iuasaaki nōtākikana mitxi maerekati kamakani, apanakini apaka. Nitxana: “Ātikata uai napokasaaki, nimisiritapitikari ikinimane maerekati kamakani,” nitxapekana. Iuaīkana uatxa itakoxiti nauakasaaki, ikara nisākiretxikana nisāpiretai hīte. ³ Hīte nirekari himarotiniri: “Atāokani atxiīti Paoro sāpiretari Kristo sākire?” hītxa. Napokasaaki ereē, himarotapitikariko atāo nisāpiretiniri Kristo sākire. Kristo !iōkapeta. Oerekapekai iposotiire hīte sauaki. ⁴ Kristo okikosaaki aamina ĩpiriāmitakari nopini, iīto iōkapere aua. Uatxa kataparari iua, kotxi Teoso sikataparatarī iua. Ate ĩto apaka iōkapeta, mitxi Kristo ĩto iōkapetini atoko, iuaritika Teoso sikataparataua Kristokata aāuini hīte amoiānatini īkapani.

⁵ Hīxinikariko hākixinireē auakari. Atāokani hāuikatari Teoso sākire? Hīteka ataerekatauako. Himarotatarī Xesosi Kristo hākixinireē auini? Teoso sākire hākixinireē mauakaniā, Kristo Xesosi !auari hākixinireē. ⁶ Ninirekari himarotiniri Kristo Xesosi auini ate ākixinireē. ⁷ Ate misākiretari Teoso, maerekati hīte makamakani īkapani. Kona ate nirekari kākiti sākire: “Peerekari Paoro. Iua imarotapitikari Teoso sākire oerekini, kotxi Korīto sitatxiti auakani kamari Teoso sākire iaōka.” Ikara kona ate nireka, ate iuikiniua īkapani. Atxiīti kākiti uākatari Xesosi Kristo !auari ate ākixinireē, iuaritika ate nirekari hīte kaminiri atāonoka. ⁸ !Apakata aiotokakiniri atāo inakari. Atāo inakari auapika. Atāo inakari !ixipoka. Apakata aōerekiniri atāo inakari. ⁹ Atxiīti ate iōkapeta, iuaritika apoxokoniuata hītaparaxinire akenakoenetakasaaki. Ate misākiretari Teoso hīte atāonoka hīkamini īkapani ikiniōtika, Xesosi sākire iaōka hīkamini īkapani. ¹⁰ Ikara atoko inakari niōkatsopata hīte īkapani hītekata nimauakanisaaki, kotxi ereē napokasaaki, kona ninirekari nitxitinii hīte. Niposotapitikari nitxitinii, kotxi Apiananiri sikaposotiiretapekano atāo

nikamini hītemoni. Txamari kona ninirekari Xesosi sākire hītakanapini, nota txitinii xika. Ninirekari hīte kataparaxinire hinini, Xesosi sākire iteene hāuikini ĩkapani.

¹¹ Nitariakori, xipope niōkatsopare. Ereēpiko. Ikiniōtika atāonoka hīkamako. Xesosi sākire iaōka hīkamako. Hīkamariko nisāpiretakiti iaōka. Hīxinikakiti ātinoka itxauako. Kona hītxitakakapeua. Ininiākara Teoso katiraōkiri, kauaīreri, auapikako hītekata.

¹² Haōkitakakasaakiua, hīpoxokoniritika hāpakapakakauako, kotxi Apiananiri nakitiakori hītxaua.

Ikinimane Teoso nakitiakori uai auakani xinikamanapitai hīte.

¹³ Apiananiri Xesosi Kristo sikari ikinipoko erekari hītemoni. Teoso iteene tiretai. Erekari Matamatakoti moianatai hīte hīkinika. Ameē.

KARÁSIA **Paoro Iokanatsopata Karásia Auakanimoni**

¹ Nota Paoro iokanatsopata ia aãtsopa hĩtemoni. Nota Teoso iokanatakitino kãkitimoni Teoso iokanapirena nisãpiretini ĩkapani. Kona kãkitini iokanatanano nota. Xesosi Kristora iokanatanano nota. Aĩri Teoso, Xesosi ipinaãka atoko õkitikakarira, iuara iokanatanano nota kãkitimoni. ² Ikinika aĩtariakori notakata auakani, nota apaka xinikanãtai hĩte. Hĩte ikini aikoti Teoso misãkiretikoãtaã apotiitakaniua Karásia tixini auakani axinikanãtapika.

³ Aĩri Teoso, Xesosi Kristo aãũite pakini sikari ikinipoko erekari hĩtemoni. Ninoa kamaerekaxiniretai hĩte.

⁴ Xesosi ipina amaerekani imakatzakini ĩkapani. !Erekari uatxa auakani. Maerekati kamakani sauaki aãuakasaaki, Xesosi ipina ate imakatzakini ĩkapani, amapinakani ĩkapani. Xesosi ipĩpe ate ĩkapani, kotxi aĩri Teoso nirekari Xesosi ipinini ate maerekani imakatzakini ĩkapani. ⁵ Ikiniõtika: “Peerekai,” matxari Teoso. Aĩtipirika kãkiti txapikari Teoso: “Peerekai.” Ameẽ.

Ãti Iokanapirena Erekari !Auari

⁶ Nikenakopiretari Teoso hĩtakanapaãpotini. Iuasaaki nitsorĩkaãnãta. Kinirepa hĩtakanapari Teoso sãkire? Kotxi mapa kasiritinoka hĩte auikari Teoso iokanapirena erekari. Kristo iteene tiretai hĩte, ininiã akiritai hĩte inakitiakori hininiua ĩkapani. Kinirepa hãuikatari aĩti iokanapirena?

⁷ Atão nisãpiretai hĩte. Aĩti iokanapirena erekari !auari. Nikenakopiretari kãkiti hĩte oereẽkani. Ninoa nirekari ikoketinirina isãkirena Kristo iokanapirenakata. Uatxa !himarotaikari atão sãpirenatxi. ⁸ Atão asãpiretapekai Teoso iokanapirena erekari. Aĩtião sãkiretxiti asãpiretiniãi, Teoso iokanataua ate kãkiti misiritikomoni, aĩtipirika misirikaretxi auiniãtaã. Teoso nitiri iaxitikiri apaka sãpiretiniãi aĩtião iokanapirenatxi, Teoso iokanataru iua iniriti imisiritikomoni aĩtipirika misirikaretxi auiniãtaã. ⁹ Hĩte auikapekari Teoso iokanapirena erekari. Aĩtião iokanapirenatxi sãpiretakari sãpiretiniãi Teoso iokanapirena atão minakati, iokanataãkako imisiritikomoni aĩtipirika misirikaretxi auiniãtaã. Asãpiretapekai ikara inakari sãkiretxiti. Uatxa iuaĩkana nisãpiretai.

¹⁰ Ikara atoko nitxai hĩte, ininiã himarotari kona ninirekari: “Peerekari Paoro kamakiti,” niniko. Nota nirekari Teosonoka: “Peerekari Paoro kamakiti” ininino. Nanera atão minakati sãpiretakani txai hĩte: “Paoro nirekari kãkiti apokaerekatini iua.” Ikara na atãoni. !Ninirekari kãkiti apokaerekatini nota. Ninirekiniãri kãkiti apokaerekatini, kona Kristo nitiri !nitxaikaua.

Teoso Akiritari Paoro

¹¹ Nanera atão minakati sãpiretakani hĩte oereẽkani: “Paoro iokanapirena kona Teoso iokanapirenani,” itxana ninoa sãkire. Nitariakori atãopitikara nisãpiretai hĩte. Iokanapirenatxi hĩtemoni nisãpiretakiti kona kãkiti sãkireni. Teoso sãkirera. ¹² Kona kãkitini sãpiretano ia iokanapirenatxi. Kona kãkitini oerekano. Xesosi Kristora sãpiretano nota iua iokanapirenatxi.

¹³ Hĩte imarotari mitxi nauakasaaki, Xoteo kiomanearokini oerekakiti nauikasaaki, iuasaaki kona nitiretana Xesosi sãkire auiaĩkani. Iteene nimisiritana ninoa. Ninirekari nixipokiniri Xesosi sãkire kĩpitakani. ¹⁴ Iuasaaki nimarotari Xoteoakori kitxakapirĩkarini paniãtakiti. Nikamari imakinika ninoa paniãtakiti. Iuasaaki nimoianariakori apaka kamari ninoa kitxakapirĩkarini

paniãtakiti. Nota apiata kamari ninoa sãkire iaõka. Iteene ninirekari nikaminiri kitxakapirĩkarini paniãtakiti.

¹⁵ Teoso iteene turetano nota. Iua mereẽno nota nauini apisapanika. Iuasaaki akiritano nota initiri nininiua tĩkane. ¹⁶ Teoso keto manapi apokasaaki, oerekari imi notamoni, imi Xoteo minakonimoni nisãpiretini ĩkapani. Iuasaaki kona nisãpiretari kãkiti Teoso oerekakiti sãkiretxiti, ininiã na kãkitini sãpiretano nikamakiti tĩkane. ¹⁷ Iuasaaki kona nisari Xerosareẽ sitatxitimoni, ininiã nota apisapanika Teoso iokanatakini kona õtãkikano. Kona kãkitimonini nisa noerekiko ĩkapani. Arãpia tixinimoni nisapitipo. Eereka nikanapiriã Tamásiko sitatxitimoni.

¹⁸ Ipi anokanani, ãti anokanani pakinikanani napaãka atoko, nisa Xerosareẽmoni Petro nimisãkiretini ĩkapani. Ipi semanati ninapa Petrokata. ¹⁹ Apanakini Teoso iokanatakini isãkire sãpiretakani kona naõkita. Apiananiri itari Txiako inakorinoka naõkita. Ininiãkara kona kãkiti sãkireni nisãpiretai hĩte. Teoso iokanapirenakara nisãpiretai hĩte.

²⁰ Ia niõkatsopatakiti nisãpiretakiti hĩtemoni atão inakari. Teoso imarotari atão inakari nisãpiretinii.

²¹ Xerosareẽmoni nisaãka atoko, nisari Síria tixini, Sirísia tixini apaka. ²² Iuasaaki Kristo sãkire auiãkani, Xotéia tõpa auakani, !aõkitapanikano nota iuasaaki. ²³ Ninoa imarotari apanakini minapiretakiti. Apanakini sãkire: “Kiki mitxi ate misiritakari, uatxa sãpiretari Xesosi sãkire. Mitxi iua nirekari ixipokiniri Xesosi oereẽkiti sãkiretxiti, iuaritika uatxa inirekari oerekiniri Xesosi oerekakiti sãkiretxiti kãkitimoni,” itxana apanakini sãkire. ²⁴ Ininiãkara ninoa: “Peerekari Teoso,” itxana, kotxi nota auikapekari Xesosi sãkire.

2

Xesosi Iokanatakini Apakapari Paoro

¹ Katosi anokanani napaãka atoko, nikanapiriã Xerosareẽmoni nimoianari Panapee inakorikata. Nanikari nimoianari Txito inakori apaka notakata. ² Xerosareẽmoni nisa, kotxi Teoso oerekano nisini iuamoni. Iuaã napokasaaki, nisãkirauata Xesosi sãkire auiãkani auĩteakorikata. Ninoakatanoka nisãkirauata. Teoso iokanapirena erekari Xoteo minakonimoni nisãpiretakiti nisãpiretana ninoa. Nota nirekari ninoa imarotiniiri nisãpiretakiti atão inini. Apaka ninirekari ninoa imarotiniiri iuaĩkana katana nisãpiretakiti atão inini ĩkapani. Nisãpiretakiti ikenakotakasaakina, ninoa: “Atãopitikara pisãpiretakiti Xoteo minakonimoni,” itxana. ³ Txito nimoianari na Xoteo !itxaua. Krekora itxaua, ininiãkara Teoso takaõtxikare !auari iuamoni, iuaritika Xesosi sãkire auiãkani auĩteakori na paniãtari itsiki mata kisauakiko. ⁴ Mitxi apanakini kikiakori apoka iuaã. Ninoa sãkire: “Ate auikari Xesosi sãkire,” itxana ninoa. Txamari na atão ninoa sãkire. Ninoa apotiitaua Xesosi sãkire auiãkanikata. Inirekarina Txito ĩtoã Teoso takaõtxikare takiko. Ninoa nirekari imarotiniirina kitxakapirĩkarini Xoteo kiomaneakorini paniãtakiti atakanapini, kotxi atakanapapekari ipixini ninoa paniãtakiti, kotxi Kristo Xesosi nakitiakori atxapekaua. Ninoa nirekari imarotiniiri ikinika ate oerekakiti sãkiretxiti. Ninoa nirekari ate kaminiri ikinika kitxakapirĩkarini Xoteo kiomaneakorini paniãtakiti. Ninoa nirekari ikinika Xesosi sãkire auiãkani, Xoteo minakanuia apaka kaminiri Xoteo kiomaneakorini paniãtakiti. Ninoa nirekari nitiritxi amotakoni atoko aniniua. ⁵ Kona xatiki akamari ninoa nireẽkiti, kotxi inirekarina Teoso iokanapirena atão inakari akoketini Xoteo kiomaneakorini paniãtakitikata. Ate nirekari Teoso iokanapirena atãonoka inakari asãpiretinii.

⁶ Xesosi sãkire auiãkani auĩteakori txari notamoni: “Xoteo minakonimoni pisãpiretakiti erekapitikiari. Apikomoni ate sãkire !auari ninoa pisãpiretini ĩkapani,” itxana. Ninoa auĩtetxiakori itxauana, iuaritika Teosomoni ninoa apanakini kãkiti poiãorini atokotxikana itxauana, kotxi Teoso atamatari aãkixinire. Ininiãkara nota !nipĩkari auĩtetxi. ⁷ Ninoa Xesosi sãkire auiãkani auĩteakori apokaerekatari nipaĩka. Ninoa imarotari Teoso sikano nota ia paĩkatxi, ia iokanapirenatxi erekari nisãpiretinina Xoteo minakanuia. Iua atokotxikana Teoso sikari paĩkatxi Petromoni, iokanapirenatxi erekari Xoteoakori isãpiretini ĩkapani. ⁸ Teoso iokanataro Petro Xoteoakorimoni, ininiã isikaposotiiretari iua ninoa sauaki ipaĩkauatakasaaki. Iua atokotxikana Teoso iokanatanota nota Xoteo minakonimoni. Nota apaka isikaposotiireta ninoa sauaki nipaĩkauatakasaaki. ⁹ Iuasaaki ninoa auĩteakori Txiako, Petro, Xoão pakini imarotari Teoso sikinino notamoni ia paĩkatxi, ininiãkara imaĩkarina niuako, Panapee uako pakini, kotxi akinika aparĩkauata Teoso ĩkapani. Akinika aãpokaerekatari nota, Panapee pakini sãpiretiniri Teoso sãkire Xoteo minakonimoni. Akinika aãpokaerekatari Txiako, Petro, Xoão pakini sãpiretiniri Teoso sãkire Xoteoakorimoni. ¹⁰ Ninoa paniãtaua ate matxineiroteni atiretini. Iuanoka ipaniãtaua. Napokaerekatari ninoa sãkire, kotxi ninirekapitikiari matxineiroteni nitiretini.

Paoro Ôtãkikari Petro

¹¹ Eereka Petro motikaẽtaua ate ãtxiokia sitatxiti aãuakasaaki. Iuasaaki Petro kamakiti na atãoni. Ininiãkara nota sãkirauata Petro apisatoõ: “Petro, pite kerokari,” nitxari iua. ¹² Merepanika Petro nipokota ikiniõtika aĩtariakori Xoteo minakonikata. Eereka ãtikaka kikiãkini apoka Txiako iokanatakini. Iuasaaki Petro pĩkana ninoa, ininiã kona inikaika aĩtariakori Xoteo minakonikata, Xoteo kiomaneakorini sãkire xika, kotxi ninoa sãkire: “Kãkiti Teoso takaõtixikare iĩtoã mauakaniã, !pinipokotape ninoakata,” itxana ninoa sãkire. Petro pĩkana Txiako iokanatakini, kotxi ninoa nirekari Teoso takaõtixikare auini aĩtariakori iĩtoã, Xoteo minakanuia iĩtoã. ¹³ Apanakini Xoteoakori Xesosi sãkire auiãkani apaka kamari Petro kamakiti atokokana, ininiã ninoa apaka kerokari. !Inipokotaikana aĩtariakorikata, Xoteo minakonikata. Ninoa kerokiniri xika Panapee apaka kerokari. Iua apaka !inipokotaika aĩtariakorikata, Xoteo minakonikata. ¹⁴ Nimarotakasaakiri ninoa kerokiniri ikamakitina, nota misãkiretari Petro ikinimane õkiãtaã, kotxi ninoa !ikamari atão inakari. Teoso iokanapirena erekari iaõka !ikamana. Nitxari iua: “Xoteokarai, iuaritika pauanãta Xoteo minakanuia sauaki, ininiã Xoteo kamakiti atoko !pikamaika. Xoteo minakanuia atoko pitxaua. Ininiãkara kinirepa pite paniãtana Xoteo minakanuia: ‘Hĩkĩpitariko Xoteo kiomaneakorini sãkire?’ !Erekari,” nitxa Petromoni.

Xesosi Sãkire Auikiko Kamaerekatari Kãkiti

¹⁵ Ate Xoteo atxaua, kotxi aĩri, ainoro pakini Xoteo txaua apaka. Xoteo kiomaneakorini sãkire: “Xoteo minakanuia maerekati kamakani itxauana,” itxana isãkirena. Xoteo minakanuia !atxaua ate. ¹⁶ Aimarotari, aãuikiniãri Xesosi Kristo sãkire, iua kamaerekatari aãkixinire, ininiãkara Teoso apakapaua. Kitxakapirĩka Teoso sãpiretari Moisesi ipaniãtakiti kãkiti kamini tĩkane. Ininiãkara Moisesi iõkatsopatari ikara Teoso sãkire. Txamari !aposotari akaminiri imakinika Teoso paniãtakiti, Moisesi iõkatsopatakiti, ininiãkara !ikamaerekatari aãkixinire. !Apakapaua ate. Ate auikari Xesosi sãkire ereka anini ĩkapani, ininiã Teoso apakapapitikaute. Teoso paniãtakiti iõkatsopatakori ikinika !aposota akamini, ininiã Xesosi kamaerekatari aãkixinire Teoso

apakapiniua íkapani, Kristo sákire aãuikasaaki. ¹⁷ Anirekasaakiri Teoso kamaerekatinina, aãpoka Kristomoni. Iuasaaki aimarotari maerekati kamakani aniniua. Iuaritika Kristo makatxakari amaerekani Teoso apakapiniua íkapani. Ikara atoko ininiã, atxiíti Kristo nirekatari maerekati akamini, imaktxakiniri íkapani? Konapitini. ¹⁸ Atxiíti kãkiti imarotari Xoteo kiomaneakorini paniãtakiti kamiko na kamaerekatari kãkiti ãkixinire, ininiã itakanapari ninoa paniãtakiti ikamini. Atxiíti ãti õti iuaíkana ikamari ninoa Xoteo kiomaneakorini paniãtakiti iaõka, ininiã iuasaakiikarako ikerokari. ¹⁹ Moisesi iõkatsopatakiti oerekano nota ipíkari atoko nininiua, kotxi nota kona posotari ikinika Moisesi iõkatsopatakiti iaõka nikamini, ininiã nimisiritiko auapitikako. Ininiã nimarotari Moisesi iõkatsopatakiti kona makatxakari nimaerekani. Ininiã nimarotari Xesosi sákire auiãkarinokara auapininiika. Ininiã uatxa ikiniõtika ninirekari Teoso nireëkitinoka nikamini. ²⁰ Xesosi okaãka aamina ípiriãmitakari nopini. Aamina ípiriãmitakari nopini okakori atoko nitxaua, kotxi maerekati mitxi nikamakiti !ninirekaikari nikaminiri. Mitxi ninireëkiti kona auaika. Iuaritika auãkipanika nitxaua, kotxi Kristo aua nãkixinireẽ. Teoso ãkiri sákire nauikiniã, auãkipanika nitxa. Iua taretano nota. Iua ipípe nota íkapani. ²¹ Moisesi iõkatsopatakiti kamiko kamaerekatiniãua ate, kinirepa Xesosi ipina? Moisesi iõkatsopatakiti kamiko na xatiki kamaerekataua ate. Teoso tiraõkinokara kamaerekatari aãkixinire.

3

Natokopa Itxa Teoso Kamaerekatiniua?

¹ Híte Karásia tixini auakanii kona kíkitei híte. Kipa misirienetai híte atão inakari himakamakani íkapani? Kotxi himarotapitikari atão inakari. Himarotari Xesosi Kristo ipina aamina ípiriãmitakari nopini amaerekani imaktxakini íkapani. Ate oerekepikai ikara atão inini. ² Ianoka nipimaãi híte: Kisaakipa hãpakapari Erekari Matamatakoti? Hãpakapatari iua, Moisesi paniãtakiti hĩkamakasaaki? Konapitini. Hãpakapatari Erekari Matamatakoti Teoso iokanapirena erekari hãuikasaaki? Ari, Teoso iokanapirena erekari hãuikasaaki, iuasaakiikara hãpakapari iua Erekari Matamatakoti. ³ Kipa iomaiĩkitetai híte? Merepanika Teoso sikari Erekari Matamatakoti hĩtemoni, ininiã Erekari Matamatakoti sikaposotiiretai híte Teoso paniãtakiti hĩkamini íkapani. Uatxa hĩxinikatarari Teoso paniãtakiti hĩkamini hĩteka posotiireëkani? Konapitini. Kona híte posotari. ⁴ Himisiritapeëkaika Xesosi sákire hãuikini xika. Kinirepa himĩteenekatarari himisiritiko? Atauako uatxa kona hãuikaikari mitxi hãuikakiti Xesosi sákire? ⁵ Kirisaakipa Teoso sikari Erekari Matamatakoti hĩtemoni? Kirisaakipa Teoso oerekari iposotiire hĩtemoni? Atauako ikara atoko itxa Moisesi paniãtakiti hĩkamakasaaki? Konapitini. Isikai Erekari Matamatakoti, oerekai iposotiire, Teoso iokanapirena hãuikasaaki.

⁶ Hĩxinikariko Apraãoni. Apraão auikari Teoso sákire, ininiãkara Teoso kamaerekatari iua, ininiã Teoso apakapari iua. ⁷ Ininiã ninirekari himarotiniiri, kãkiti Teoso sákire auiãkani Apraão apika mekaniriakori atão inakani itxauana ninoa. ⁸ Teoso kamaerekatari Xoteo minakaniua, kotxi ninoa auikari Xesosi sákire. Kitxakapirĩka Teoso sákire iõkatsopatakori sãpiretapekari ikara Teoso iokanapirena erekari Apraãomoni. Ikara iõkatsopari txari: “Nota sikariko erekari ikinimane kãkitimoni, kotxi pite Apraão auikari nota sákire.” ⁹ Apraão kĩpitari Teoso sákire, ininiãkara Teoso takari erekari iuamoni. Iua atokotxikana Teoso takari erekari iua sákire kĩpitakanimoni.

¹⁰ Apanakini uãkatari Teoso apakapinina ninoa, kotxi ikĩpitarina Moisesini sákire. Txamari Teoso misirikare pamonõkonipaniriko ninoamoni, kotxi Teoso sákire iõkatsopatakori txari: “Teoso misiritariko kãkiti ikinika Moisesi

paniãtakiti ikiniõtika imakamakanisaaki.” ¹¹ Teoso sãkire iõkatsopatakori txari: “Teoso kamaerekatariko kãkiti, iua sãkire auiãkani. Ininiã isãkire auiãkani auapininiika itxako Teosokata,” itxa Teoso sãkire iõkatsopatakori. Ininiãkara aimarotari Moisesi paniãtakiti kãpitiko kona kamaerekatari kãkiti. ¹² Moisesini iõkatsopatakiti kona paniãtaua aãuikiniri Xesosi ipinini amaerekani imakatzakini ìkapani. Moisesi iõkatsopatakiti paniãtaua akaminiri ikinika Teoso paniãtakiti. Teoso sãkire iõkatsopatakori txari: “Kãkiti, Teoso paniãtakiti iõkatsopatakori ikinika makerokakatirako auapininiika itxako Teosokata,” itxa Teoso sãkire iõkatsopatakori.

¹³ Txamari ãtika Teoso paniãtakiti Moisesi iõkatsopatakiti akerokiniã, amisir-itaãkako. Kristo makatzakaua ate ikara misirikaretxi monõkori, kotxi Teoso misiritari Xesosi Kristo aamina ìpiriãmitakari nopini ate maerekani xika ate mapinakani ìkapani. Teoso sãkire iõkatsopatakori txari:

Kãkiti aamina nopini okakori Teoso misiritakiti itxaua.

¹⁴ Teoso sikaenetari erekari Apraãomoni. Kristo ipïpe hïte Xoteo minakanuia ikara erekari hãpakapini ìkapani. Ininiã Xesosi Kristo sãkire aãuikasaaki, aãpakapari mitxi Teoso sikaenetakiti. Aãpakapari aãkixinireẽ Erekari Mata-matakoti, Teoso sikaenetakiti atemoni.

Teoso Sikaenetakiti Sãkiretxiti

¹⁵ Nitariakori, ikinimane kãkiti imarotakiti nisãpiretaiko hïte, noereẽkiti sãkiretxiti iteene himarotini ìkapani. Ipi kãkiti aua ìtiina isikaenetakakana. Iuasaaki, iõkatarina iuãkana isikaenetakitina tsopaã. Eereka !auritaãkana imaxinïkaretinirina isikaenetakitina. Apaka !auritaãka sãkiretxi apikomoni itakinina isikaenetakitina tsopaã. Teoso sikaenetakiti inakitiakorimoni ikara atoko itxa. ¹⁶ Himarotariko ia. Teoso sikaenetari erekari Apraãomoni, Apraão apika mekanirimoni apaka. Teoso sãkire iõkatsopatakori na txari: “Apika mekaniriakori.” Teoso sãkire iõkatsopatakori txari: “Apika mekaniri.” Ininiã ãtika apika mekaniri. Kristo itxaua iua. ¹⁷ Ia ninireka nisãpiretinii. Kitxakapirïka Teoso sikaenetakiti Apraãomoni apokapeka. Koatrosëtosi trïta pakini anokanani Apraão auaka atoko, Teoso sãpiretari Moisesi ipaniãtakiti iõkatsopatini ìkapani kãkiti kamini ìkapani. Moisesi iõkatsopatakiti kona xipokari Teoso sikaenetakiti Apraãomonikari. ¹⁸ Teoso sikari Kristo kãkitimoni, kotxi mitxi isãpiretari isikaenetakiti Apraãomoni. Teoso sikasaakiri ipaniãtakiti sãkiretxiti Moisesimoni ikara iaõka kãkiti kamini ìkapani, isikaenetakiti auapeka iuasaaki. Ipaniãtakiti sikiko !ixipokari isikaenetakiti.

¹⁹ Ininiãkara kininiãpa Teoso sikari ipaniãtakiti Moisesimoni kãkiti kamini ìkapani? Teoso paniãtakiti iõkatsopatakori oerekaua maerekati kamakanuia ate, kotxi !aposotari ikinika ipaniãtakiti akamini. Kristo, Apraão apika mekaniri ìkorapokoriti apokini apisapanika, Moisesi iõkatsopatakiti oerekaua Teoso nireẽkiti akamini ìkapani. Teoso sikaenetakiti itxaua Xesosi Kristo. Teoso sikasaakiri ipaniãtakiti sãkiretxiti Moisesimoni, Teoso nitiriakori aua iuaãtaã. Teoso sãpiretari isãkire Moisesimoni. Eereka Moisesi sãpiretari kãkiti. ²⁰ Teoso sãpiretakasaakiri Apraão isikaenetakiti, ìpaniãtari ãti kãkiti sãpiretiniri Apraão. Teosonokara sãpiretari Apraão.

Moisesi Iõkatsopatakiti

²¹ Moisesi iõkatsopatakiti aãuikiniã, atxiïti !anirekaikari Teoso sikaenetakiti? Anirekapitikari. Akiomaneakorini paniãtakiti sãkiretxiti, kona txïkitakaua aãuapininiika anini tïkane. Ininiãkara akiomaneakorini sãkire kona kamaerekataua ate, ininiã Teoso kona apakapaua ate, ininiãkara kona

aãuapininiika !atxa Teosokata. !Auari mauiritakoti sãkiretxiti kãkiti auapinini-ika inini txĩkitakakari. ²² Teoso sãkire iõkatsopatakori txari: “Ikininape kãkiti kamari maerekati.” Kateia ãki auakani atoko atxaua, kotxi !aposotari erekari akamini. Teoso sikaenetakiti sikaãka Xesosi Kristo sãkire auĩãkanimoni.

²³ Xesosi Kristo sãkire auikiko apisa, kãkiti kateia ãki auakani atokokana itxauana. Kãkiti moiaãkari atoko itxaua Teoso paniãtakiti Moisesimoni sikakori. ! Aposotari anirekinimoni asini. Uatxara aposotapitikari anirekinimoni asini, kotxi Xesosi apokapeka ìkorapokoriti. Ipinapeka kãkiti ìkapani, ininiã uatxa aãuikiniãri iua sãkire, kona Teoso misiritaikaua uatxa.

²⁴ Kristo mapokakani apisa, ate oerekakari atoko itxaua Teoso paniãtakiti iõkatsopatakori. Kristomoni anikakari atoko itxaua ikara. Kristo apokasaaki, Teoso kamaerekataua ate, kotxi aãuikari Kristo sãkire. ²⁵ Uatxa apokapeka Xesosi Kristo sãkire auikiko. Ininiãkara Teoso paniãtakiti iõkatsopatakori ! imoiaãikaua ate.

²⁶ Teoso anaakori hĩtxaua, kotxi hãuikari Kristo Xesosi sãkire. ²⁷ Hĩte patxisatapeẽkaika, ininiãkara hĩpatxisatiko oerekari apanakini Kristo ãtipirika himoianatini ìkapani. Ininiãkara Kristo atokopeka hĩtxa. ²⁸ Ikara atoko aniniã, akinika Kristo Xesosi nakiti atxaua, kotxi akaikotapika iuakata. Xoteoakori, Xoteo minakaniua, nitiritxi, nitiritxi minakaniua, kiki, sito, amakinika Kristo nakiti atxaua. ²⁹ Kristo nakiti pininiãua, Apraõ apika mekaniri pitxaua apaka. Ininiã pite apakapapitikariko Teoso sikaenetakiti.

4

Teoso Anaakori

¹ Apikomoni nisãpiretaiko hĩte ãti sãkiretxiti. Amarini !apakapari irini tii itakanapakiti iua ìkapani, kotxi xapitipanikari. Ikinipoko irini nakiti imi nakiti txapekaua, iuaritika na apakapapanikari. Axapitipanika inakasaaki, nitiritxi atoko itxaua. ² Axapitipanika inakasaaki apanakini moiaãri iua. Ninoa nĩkatari itxineirote. Irini ketotiniri manapi apokasaaki, imi apakapari ikinika irini tii itakanapakiti. ³ Mitxi iua eenetxi atoko atxaua ate. Nitiritxi atoko atxaua ate. Akiomaneakorini paniãtakiti sãkiretxiti amoiaãkiri atoko itxaua, kotxi oerekaua akamakiti tĩkane. ⁴ Teoso iokanatarini imi kãkitimoni iketo manapisaaki. Sito ìto ãki aua merepanika, ikinimane kãkiti atoko. Iua kĩpitari ikinika Teoso paniãtakiti iõkatsopatakori. ⁵ Amakamakaniãri ikinika Teoso paniãtakiti iõkatsopatakori, amisiritiko auapitika. Xesosi makatxakaua ate amamisiritakoni ìkapani. Ininiã Teoso anaakori atxaua.

⁶ Teoso anaakori aniniãua, Teoso iokanatarini Erekari Matamatakoti imi nakiti aãkixiniremoni. Ininiã iua Erekari Matamatakoti aãkixinireẽ auiniã, aãkiritari Teoso: “Papai, niri,” atxariko. ⁷ Ininiã nitiritxi atoko !atxaikaua. Teoso anaakori atxapekaua. Iua anaakori aniniãua, ikini isikaenetakiti isikaua atemonikari, kotxi Kristo makatxakapekari amaerekani.

!Erekaxinireri Paoro Karásia Auakani Xika

⁸ Mitxi hĩte !imarotari Teoso. Iuasaaki nitiritxiakori amotakoni atoko hĩtxaua. Hĩparĩkauata teoso minakaniua ìkapani. ⁹ Uatxa hĩte imarotari Teoso. Ari, uatxa Teoso imarotari hĩte. Ininiã kinirepa hĩte nirekari hĩkanapiriini mitxi hĩauĩteakorimoni. Kona kaposotiirena ninoa. !Kĩkitena ninoa. Kinirepa hĩte nirekari iuaĩkana ninoa nitiriakori amotakoni atoko hininiãua? Kinirepa hĩte nirekatari iuaĩkana hãuikiniri ninoa oereẽkiti sãkiretxiti? ¹⁰ Hĩte nirekari Xoteo kamakiti atoko inakari hĩkamini. Hũãkatari Teoso apokaerekatini hĩte, kotxi ninoa kiinirite atokotxikana hĩte apaka kama. ¹¹ Ininiã !erekaxinireno nota ikara nikenakoenetini. Atauako maxikatiĩka nota sãpiretari Teoso sãkire hĩtemoni?

¹² Nitariakori, nota iteene òtākikai hēte. Hītakanapariko Xoteo kiomaneakorini paniātakiti hīkamini. Nota atoko hītako, kotxi hēte sauaki nauakasaaki nota hēte atoko nitxaua. Xoteo minakaniua atoko nitxaua. Hētekata nauakasaaki, !himisiritano nota. Hītiretano nota. ¹³ Hīxinikari merepiti-panika Teoso iokanapirena erekari hēte nisāpiretakasaaki, namianare xikara nisāpiretai hēte, hētekata nauakasaaki. ¹⁴ Iusaaki namianatakasaaki, hīparīkauatapitipo nota īkapani. !Hinaiakakano. !Hīokanatano nisini namianare xika. Hēte apakapano nota Teoso nitiri iaxitikiri hāpakapini atokokana. Hēte apakapano nota, Kristo Xesosi hāpakapini atokokana. ¹⁵ Iusaaki hēte iteene hīpoxokoniuata. Nimarotari ereka hinini, kotxi noki amianatakasaaki, hīposotaākamariko, himakatzakamariko hēteka oki notamoni hīsikini īkapani. ¹⁶ Atauako uatxa himokaiakari nitxataua nota, atāo inakari nisāpiretinii xika?

¹⁷ Ninoa kamisirienererini iteene tiretapitikamai hēte, txamari ninoa ākixinire nireēkiti !erekari hēte īkapani. Inirekarina hēte omanatiniua ate. Inirekarina hēte apokaerekatinina ninoanoka. ¹⁸ Erekari kākiti iteene tiretinii hēte, ākixinire inireēkiti erekari inakasaaki. Nota hētekata nimaauakanisaaki apaka, erekari kākiti iteene tiretinii, ākixinire inireēkiti erekari inakasaaki. ¹⁹ Hēte namariteni nota tiretakini atoko hītaka. Hinoro atokotxikana nitxa nota. Kaiamapeka auanetakaro atoko nitxa, kotxi nota atatsiirauata hēte xika. Kristo kamakiti atokotxikana hīkamakasaaki, iusaakinoka nitsii nākixinire auakari iotoka. ²⁰ Kinirāo auaka nitxa hētekata uatxa. Ninirekari aāpisatoōtakakiniua, ininiā nixinikakiti ipinimonipo itxa atxiīti. !Erekaxinireno nota hēte xika.

Akaa, Sara Pakini

²¹ Hēte Xoteo kiomaneakorini paniātakiti nireēkani, himarotatari ninoa sākire? ²² Teoso sākire iōkatsopatakori sāpiretaua, ipi Aprāo anaakori aua. Sito niterotxi iamotakitokata aua imi āti. Niterotxi minakotokata itanorokata aua āti imi. ²³ Akaa inakoromoni, niterotxi iamotakitomoni imi aua, kotxi Aprāo sirīka oakata. Imi aua Saramoni niterotxi minakotomoni, kotxi Teoso sikaenetari iua imi. ²⁴ Aprāo anaakori oerekaua Teoso parīka kākiti īkapani. Iparīka ipi aua, naia sito ipi atoko. Akaa inakoro ākiri nitiritxi amotakori itxaua. Teoso parīka otanoxiratari Sinai inakori iua auakasaaki, niterotxi Akaa atoko itxa. Teoso paniātakiti iusaaki amakamakaniā, amisiritiko auapitikako, nitiritxi amotakori atokotxikana. Nitiritxi makamakaniāri ipatrāote paniātakiti imisiritiko auapitikako. ²⁵ Ininiākara otanoxiratari Sinai inakori Arāpia tixini auakari Akaa atoko itxa. Apaka īkorsaaki Xerosareē sitatxiti oa atokokana itxa, kotxi Xerosareē auakani Akaa anaakori atoko itxana ninoa. Nitiritxiakori amotakoni atoko itxana. Ninoa Xerosareē auakani !ikamari ikinika Teoso paniātakiti, ininiā Teoso misiritapitikanako ninoa. ²⁶ Āti Xerosareē auapitika, iaxiti auakari Xerosareē, Teoso tixine. Xerosareē iaxiti auakari Sara atoko, kotxi Sara niterotxi amotakoro !otxaua oa. Ate inoro atoko otxaua oa. Sara ākiri atoko atxaua, kotxi amisiritiko !auaika. Aāuikiniāri Xesosi sākire, akiomaneakorini kona paniātaikaua ate ninoa nireēkiti akamini. ²⁷ Teoso sākire iōkatsopatakori txari:

Pite sito meenetoi pipoxokoniuatako. Pite sito pauākitakarauatini tsii mimarotakatoi, pixikarauata pipoxokoniritika, kotxi pite takanapakoroi, itori pamariteakori auako. Kītaniriro poiāoka oamariteakori auako, itxa Teoso sākire iōkatsopatakori.

²⁸ Ininiā nitariakori, Sara ākiri, Isaki inakori atoko atxaua, kotxi Teoso sikaenetari Aprāo imi Saramoni auini. Iuatxikana Teoso sikaenetaua Xesosi amaerekani imakatzakini īkapani, Teoso anaakori aniniua īkapani. ²⁹ Akaa ākiri Isimaeo inakori iponaniā, kotxi Aprāo nirekari imi, ininiā iua sirīka Akaakata. Sara ākiri Isaki inakori iponaniā Erekari Matamatakoti

posotiireē. Eereka Isimaeo misiritari Isaki. Iua atokokana itxa uatxa. Teoso anaakori minakaniuua misiritari Teoso anaakori. ³⁰ Teoso sãkire iõkatsopatakori txari:

Hïokanataroko niterotxi iamotakoro osipinini imikata, kotxi niterotxi ãkiri kona apakapapaniri ipixini iri tii. Niterotxi minakoto ãkirinoka apakapari iri tii,

itxa Teoso sãkire iõkatsopatakori. ³¹ Ininiã nitariakori, niterotxi amotakoro ãkiri atoko !atxaua. Niterotxi minakoto ãkiri atoko atxaua.

5

Takaõtxikari !Ikamaerekatari Kãkiti

¹ Nitiritxi kamari ipatrãote nireëkitinani. Ikara atoko uatxa !atxaika, kotxi aãuikari Kristo sãkire. Kristo makatxakapekaua amisiritiko monõkoni. Ininiãkara nitiritxi amotakoni atoko iuaïkana !hïtxapeua. !Hãuiritapiri kãkiti paniãtinii ninoa auiãkiti hãuikini.

² Hïkenakotako. Nota Paoro sãpiretaiko hïte. Hãuiritiniãri takaõtxikari takiko hïtoã Xoteo atoko, ininiã hãuikari takaõtxikari kamaerekatinii hïte Teoso apakapini ïkapani. Txamari na atão. Kristonoka kamaerekatari kãkiti Teoso apakapini ïkapani. Erepaniko, pinirekiniãri takaõtxikari, !pinirekaikari Kristo. ³ Iuaïkana nota õtãkikai hïte. Hãuiritiniãri takaõtxikari takiko hïtoã Xoteo atoko, ininiã Moisesi paniãtakiti ipixini hïkamapeka. Ikara atoko hininiã, ikinika ipaniãtakiti hïkamako. ⁴ Ætikaka hïte nirekari Moisesi paniãtakiti hïkamini Teoso kamaerekatinii ïkapani. Txamari ikara atoko hinirekiniã, hïtakanapari Kristo. Ininiãkara Teoso !iposotari ikinipoko erekari isikini. ⁵ Atepekana, ate auikari Xesosinoka txïkitakiniri kãkiti ereka inini ïkapani, Teoso apakapini ïkapani. Ikamaerekataua Erekari Matamatakoti posotiireē, kotxi aãuikari Xesosi sãkire. ⁶ Takaõtxikari hïtoã auiniã, iua takaõtxikari !ikamaerekatai hïte. Takaõtxikari hïtoã mauakaniã, takaõtxikari mauakani !ikamaerekatai apaka. Kristo Xesosi nakitiakori aniniãua, Teosora kamaerekataua, kotxi aãuikari Xesosi sãkire, ininiã atiretari iua.

⁷ Merepanika hïte auikapitikari Xesosi sãkire. Kipa xipokatari atão inakari Teoso sãkire hãuikini? Natokopa itxa Teoso sãkire atão inakari hïtakanapini?

⁸ Hïte akiritakari itxaua Teoso. Kona iuani xipokari hãuikiniri atão inakari isãkire. ⁹ Kãkiti sãkire txari: “Pão ãtikaãkari axapitiri ipani, iuaritika iãtikakakiti itori ipe.” Iua atokokana ãtika maerekati kamakari xika kaiãopokori kãkiti kamari maerekati. ¹⁰ Teoso kamaimaroretano nota hïte takanapiniri hïkerokakiti, atão inakari hïkamini ïkapani. Hïte nitariakori hïtxaua, kotxi Apiananiri nakitiakori atxaua, ininiãrako nimarotari nota õtãkikinii iaõka hïkamapanikako. !Nimarotari iua kiki himisirienetakiri. Ia nimarota. Teoso misiritapanikariko iua.

¹¹ Apanakini sãpirenãtari: “Paoro paniãtari Xoteo minakaniuua takiniri takaõtxikari iïtoãna.” Na atão ninoa sãkire. Nipaniãtaãkamariko takaõtxikari takiko, nimisiritiko !auamako. Kona nipaniãtari Xoteo minakaniuua takiniri takaõtxikari iïtoãna. Ikara xika nimisiritaãka. Nisãpiretari ia: Kristo aamina ïpiriãmitakari nopini ipïpe amaerekani imakatzakini ïkapani. Kristonoka kamaerekataua Teoso apakapiniua ïkapani. Ikara noerekakiti xika nimisiritaãka. ¹² Ninoa kamisirienererini nirekiniãri itsiki mata kisauakiko, erekari itsikipati tsotatiko apaka. Nomanãkarauata, ninoa misirienetinii xika.

¹³ Nitariakori, Teoso akiritai hïte iua nakitiakori hininiua ïkapani, ininiãkara uatxa hïposotari hïteka nireëkiti hïkamini. Iuaritika !hïkamapiri maerekati hïto nireëkiti. Ia hïkamako: Hïtiretakauako ãtipirika. Ikara atoko hininiã, himoianatakauako. ¹⁴ Teoso paniãtakiti txari: “Pitiretana apanakini

piteka pitiretiniua atokokana.” Ikara paniãretxi pikaminiã, pikamapekari ikinika Moisesi paniãtakiti. ¹⁵ Kaxipiri ãtopa auakani atoko !hãtxape. Ninoa karotakakaua, okakakaua itxana. Erepaniko. Kaxipiri ãtopa auakani atoko hininiã, hãxipokakauako.

Aãto Nireẽkiti

¹⁶ Nõtãkikare ia atoko itxapaniko: Hãuiritariko Erekarì Matamatakoti oerekinii iua kimapore ikiniõtika. Iua hãkimapore oereẽkari ininiãua, ! hãkamapiri maerekati hiãto nireẽkiti. ¹⁷ Aãto !inirekari Erekarì Matamatakoti nireẽkiti. Iuatxikana Erekarì Matamatakoti !inirekari hiãto nireẽkiti. Erekarì Matamatakoti mokaiakari itxaua aãto. Ininiã aãkixinire nireẽkiti !aposota akamini aãto nireẽkiti xika. ¹⁸ Iua Erekarì Matamatakoti oerekiniiã pikimapore ikiniõtika, pikaminiãri iua nireẽkiti, ininiã Xoteo kiomanekorini paniãtakiti !oerekaikari pikimapore.

¹⁹ Aimarotapitikari kãkiti ãto nireẽkiti. Inirekari ãtaniritxi minakotikatika osirãkini, ãtanorotxi minakotokatika isirãkini, mitxitakari ãtokata isirãkini. Kãkiti ãto nirekari kãkiti xinikaxititini maerekati ãto nireẽkiti. Kãkiti ãto nirekari ãti kãkiti ãto, maerekati ikaminina ãkapani. ²⁰ Kãkiti ãto nirekari teoso kãkiti kamakiti iteosone ãkapani. Kãkiti ãto nirekari maerekani matamatakoni paniãtakiti ikamini. Kãkiti ãto nirekari omanãkaretxi, neenamati, xikoretxi, norikaretxi, iuikaretxi. Kãkiti ãto nirekari kãkiti omanatiniri apanakini. ²¹ Kãkiti ãto nirekari ãti kãkiti tii. Inirekari okanitxi, poãtakatxi, maerekati kiiniriti ikamini. Ikara atoko inakari maerekati kãkiti ãto nireẽkiti. Uatxa nipinitai hãte, mitxi nipinitini atokotxikana. Ikara maerekati kamakani ! auapani Teoso auãtetxi ininiãtaãua.

Erekarì Matamatakoti Nireẽkiti

²² Iua Erekarì Matamatakoti aãkixinireã auiniã, !ikara atokoni itxa akamakiti. Iua Erekarì Matamatakoti aãkixinireã auiniã, atiraõkiuata. Apoxokoniua. Erekarì Matamatakoti aãkixinireã auiniã, atiraõkiuata. Apoxokoniua. Erekarì Matamatakoti aãkixinireã auiniã, atiraõkiuata. Apoxokoniua. Akamaenetakiti akamapitika. ²³ Ate !iuikaua. !Akamari maerekati aãto nireẽkiti. Ikara atoko atxa, Erekarì Matamatakoti aãkixinireã auiniãua. Ikara atoko aniniã, amisiritiko !auari. ²⁴ Kristo nakitiakori aniniãua, !anirekaikari akaminiri maerekati aãto potxitakiti, aãto nireẽkiti. Amanirekakiniti aõkini atokokana, aõkapekari maerekati aãto nireẽkiti. ²⁵ Erekarì Matamatakoti txãkitakari axinire auãki inini, ininiãkara makamari ikinipoko iua nireẽkiti ikiniõtika. ²⁶ !Apakata aãuikiniua. !Apakata aneenamauatini. !Apakata axikotakakiniua.

6

Himoianatakakiniua

¹ Nitariakori, hãte Erekarì Matamatakoti nireẽkiti kamakanii, himarotakasaakiri aãtari kaminiri maerekati, hõtãkikariko iua imaerekani itakanapini ãkapani. Hõtãkikariko hãtiraõkiritika. Iuusaaki erepaniko, kotxi atxiãti hãte apaka nirekari iua maerekani atokotxikana hãkamini. ² Himoianatakakauako hãtapara poiãonoka inakasaaki. Ikara atoko hininiã, hãkamari Kristo paniãtakiti apanakini hãtiretini. ³ !Erekarì ate iuikiniua. Kãkiti minakati: “Apiari nota,” inakari, iuanika misirienetaua. ⁴ Erekarì nataerekatiniri notaka kamakiti. Erekarì atxiãti? Nikamakiti ereka ininiã, nipoxokoniua. !Apakata nãkixinireã nixinikiniri: “Tua ãti kamakiti apiaerekata. Nota kamakiti poião erekarì.” !Apakata ikara atoko ninini. ⁵ Ikininape kãkiti aua iparãka kasãpaniri. Iuanoka posotari ikaminiri.

⁶ Teoso sãkire oereẽkari oerekiniiã pite Teoso sãkire, iuusaaki minakati auiniã pisikari iuamoni. Nipokori atxiãti, txineiro atxiãti, pisika iuamoni,

kotxi iua kikiote ! auari. ⁷ Piteka ! pimisirienetapeuako, kotxi ! piposotari Teoso pimisirienetini. Teoso misirienetakari ! auari. Pikikioteẽ mitxi pitakakiti iaõka papakapa. Iua atokokana pikamakiti ereka inini, papakapari erekari. Pikamakiti maerekati inini, papakapari maerekati. ⁸ Piõto nireẽkiti pikaminiã, papakapari piõto siãkitinoka. Piõto sikai ipĩkitxinoka. Teoso misiritapitikai. Erekari Matamatakoti nireẽkiti pikaminiã, papakapari iua siãkiti. Iua siãkiti Teosokata ãtipirika pauini ãkapani. ⁹ ! Apakata asãpakini erekari ikiniõtika akamini. Makamari erekari ikiniõtika, maiotokakanikaua anini. Erekari akamini amaiotokakaniã, erekari Teoso sikakiti aãpakapini apokapitikako. ¹⁰ Ininiã aposotakasaakiri, makamari erekari ikininapemoni. Merepanika makamari erekari aĩtariakorimoni Xesosi sãkire auiãkanimoni.

Imapotõkire Õtãkikaretxi

¹¹ Hãtamatariko ia niõkatsopare mitari. Ia iõkatsopari imapotõkire nota niuakoã niõkatsopatakiti. ¹² Apanakini hĩte sauaki nirekari ninoaka apokaerekatiko, ininiã isãpiretari kãkiti potxitakitinoka. Ninoakara paniãtai hĩtakiniri takaõtxikari hiõtoã. Kininiãpa ninoa nirekatari takaõtxikari hĩtakiniri? Ninoa misiritiko monõkoni xika, ninoa paniãtari Xoteo minakaniuã takiniri takaõtxikari iõtoãna, ininiã Xoteoakori potxitari ninoa oereẽkiti sãkiretxiti. Inirekarina Xoteoakori apokaerekatinina ninoa. Txamari Kristonoka kamaerekatari kãkiti, kotxi ipĩpe aamina ipiriãmitakari nopini kãkiti maerekani imakatzakini ãkapani. ¹³ Ninoa kamisirienenerini kamari Moisesi paniãtakiti takaõtxikari itakinina iõtoãna. Txamari ikinika Moisesi paniãtakiti ! ikamana. Ninoa nirekari hĩte takiniri takaõtxikari hiõtoã, ininiã eereka ninoa iuikaua, kotxi hĩte kamari ninoa paniãtakiti. ¹⁴ Kona ninirekari niuikiniua. Teoso !nirekari niuikiniua. Nota iuikari aãuĩte Xesosi Kristo. Iuanokara niuika, kotxi iua ipina aamina ipiriãmitakari nopini ate ãkapani. Ininiã nota !nirekaikari Xesosi sãkire mauĩakani nireẽkiti. Iuatxikana ninoa !nirekari nota nireẽkiti. ¹⁵ Takaõtxikari hiõtoã auiniã, iua takaõtxikari !ikamaerekatai hĩte. Takaõtxikari hiõtoã mauakaniã, takaõtxikari mauakani !ikamaerekatai. Teoso txĩkitakiniã iua anaakori hininiãua, iusaaki ikamaerekatai hĩte. Ininiãkara hãkixinire amaneri itxaua. Ininiã mitxi hinireẽkiti !hinirekaika. ¹⁶ Teoso kamaerekaxiniretai hĩte, ikara sãkiretxiti hãuikasaaki. Iua amonĩkai hĩte. Ikara atoko Teoso kamari kãkiti iua nakitiakori ininiuana, atão Isaeo mekaniriakori ininiuana.

¹⁷ Ixipope ia iõkatsopari. Nipinitana nota kamamaxiretakani. ! Hĩkamamaxiretapeno, kotxi nimisiritaãkapeka. Nikaro mata auapeka niõtoã. Auĩtetxi nitiri amotakori karo mata atoko itxa nikaro mata, kotxi Apiananiri Xesosi nitiri nitxaua.

¹⁸ Nitariakori, aãuĩte Xesosi Kristo sikari ikinipoko erekari hĩte ãkixiniremoni. Ameẽ.

ÉPESO

Paoro Iokanatsopatakiti Épeso Auakanimoni

¹ Nota, Paoro. Niõkatsopatari ia aãtsopa. Teoso nirekano Xesosi Kristo iokanatakiti nininiua. Ininiã niokanatsopata Teoso nakitiakorimoni Épeso sitatxiti auakanimoni. Kristo Xesosi sãkire auiãkanimoni, ipaniãtakiti kamakanimoni niokanatsopata. ² Añri Teoso, Apiananiri Xesosi Kristo pakini sikari ikinipoko erekari hñtemoni. Ninoa kamaerekaxiniretai hñte.

Teoso Mereẽua Itixi Kamiko Apisapanika

³ Masãpiretari Teoso, aãũte Xesosi Kristo iri: “Erekapitikai,” kotxi itakapekari ikinika erekari ate ãkixiniremoni, kotxi Kristo nakitiakori atxaua. Ikara erekari isikakiti Teoso tixinekiri. ⁴ Itakari ikara erekari ate ãkixiniremoni, kotxi itixi kamiko apisapanika Teoso mereẽpekaua Kristo nakitiakori aniniua. Imereẽua Teoso nireẽkitinoka akamini ãkapani, maerekati amakamakani ãkapani, atiraõkiuatini ãkapani. ⁵ Itixi kamiko apisapanika, Teoso mereẽua iua anaakori aniniua ãkapani. Xesosi Kristo ipĩpe ate ãkapani, ininiã iua txĩkitakaua Teoso anaakori aniniua. Teoso txĩkitakaua iua anaakori aniniua, kotxi iua potxitari ikara atoko ikamini. Inirekari ikara atoko ikamini. Erekari ipotxitakiti ikamini tĩkane.

⁶ Teoso txĩkitakaua iua anaakori aniniua, kotxi inirekari asãpiretiniri: “Peerekari ikinipoko erekari pisikakiti kãkitimoni.” Teoso sikaua ikara erekari, kotxi iua tirketakiti nakitiakori atxaua.

⁷ Xesosi iĩkitxitari amaerekani, kotxi iarẽka xiketa ate ãkapani, ininiã Teoso maxinĩkaretari amaerekani. Uatxa !imisiritaikaua amaerekani xika. Teoso kamari ikara ate ãkapani, kotxi ikinipoko erekari isika atemoni. !ixipoka ikara erekari Teoso sikakiti. Ikinipoko erekari aua iuamoni. ⁸ Kãkiti kona posotari iaõtiniri erekari Teoso sikakiti ate maerekati kamakanimoni. !Kaiãotikori. Ikinipoko imaroretxi aua iuamoni. Atão inakarinnoka imarota ikamini, ininiã ikara erekari ikaminiãua. ⁹ Mitxi !aimarotari Teoso inireẽkiti ikamini tĩkane. Uatxa ikamaimaroretãua. Ipotxitari oerekiniua inireẽkiti. Peerekari iua potxitakiti. ãkixinireẽ ixinikari ikara ikamini. ¹⁰ Teoso ketotini õti manapi, ikinipoko iposope inakasaaki, iua apotiitariko ikinimane itixine auakani, itixiã auakani pakini.

¹¹ Xesosi Kristo nakitiakori atxaua, ininiã aãpakapari ate ãkapani inĩkatakiti. Itixi kamiko apisapanika ixinikari ikamakiti ate ãkapani. Ikamari ikinika inirekakiti iaõka. ¹² Iua mereẽua ate, merepitipanika Kristo sãkire auiãkaniua, ikinimane asãpiretini ãkapani: “Peerekari Teoso. Erekapitikari ikamakiti.”

¹³ Hñtepekana auikari Xesosi sãkire, atão inakari hñkenakotakasaaki. Ikara atão inakari Teoso iokanapirena erekari itxaua, kotxi iua iokanapirena oerekai himaerekani makatzakiko. Xesosi sãkire hñuikasaaki, Erekari Matamatakoti apoka hãkixinireẽ. Iua Teoso takaõtxikare itxaua. Iua oerekai hñte Teoso nakitiakori hininiua. Xesosi sikaenetapekari Erekari Matamatakoti atemoni iokanatini. ¹⁴ Isikaenetakiti Erekari Matamatakoti atemoni auape, ininiã aimarotapitikari aãpakapiniri ikinika isikaenetakiti, inĩkatakiti ate ãkapani. Iuasaaki Xesosi apakapaua ate iua nakitiakori, iua iamotakini, kotxi imakatzakapekari amaerekani. Ikara atoko ininiã, ikinimane kãkiti txari iua: “Peerekai pite. Erekapitikari ikinipoko pikamakiti.”

Paoro Misãkiretiniri Teoso

15 Ikara atoko ininiã, nota kenakopiretakasaakiri Apiananiri Xesosi sãkire hãuikini, ikinimane Teoso nakitiakori hĩtoretini nikenakopiretakasaaki, 16 nimisãkiretapikari Teoso hĩte ĩkapani. Nitxari iua: “Erekapitikai, kotxi pite makatxakari ninoa Épeso sitatxiti auakani maerekani,” nitxa. 17 Teoso, aãũte Xesosi Kristo Teosone itxaua. Xesosi iri itxaua. Kaiotximereri iua Teoso. Nimisãkiretari Teoso hĩte ĩkapani ia atoko: “Pisikaimaroretana ninoa ãkixinire. Ninirekari Erekar Matamatakoti oerekinina pite iteene imarotini ĩkapani. 18 Piopinikariko ninoa ãkixinire atão inakari imarotini ĩkapani. Pite akiritana ninoa ikinipoko erekari apakapini ĩkapani. Ikara poerekana ninoa imarotini ĩkapani, iãtapinirina ĩkapani. Pikamaimaroretana ninoa pite nĩkatakiti pite nakitiakori ĩkapani. Ikara pinĩkatakiti, pisikaenetakiti, peerekari. Itori pinĩkatakiti. !Ixipoka pinĩkatakiti. !Kaiãotikori pinĩkatakiti pinakitiakori ĩkapani. 19 Pikamaimaroretana ninoa kaposotiire pinini. Ininiã piposotari iteene pisikaposotiiretiniua ate pisãkire auiãkani. Ikara piposotiire !auari ãtimoni. Pataparari pite posotiire.” Ia atoko nimisãkiretari Teoso hĩte ĩkapani.

20 Ikara Teoso posotiire õkitikari Kristo ipĩkani sauaki auakasaaki. Iposo atoko iposotiireẽ itakari Kristo apiari topãkiniãtaã, ikikomoni itixineẽ. 21 Ininiã Kristo Apiananiri itxaua. Iua posotiire apiata. Maerekani matamatakoni auĩteakori posotiire poiãoka. ĩkorapokoriti auĩtetxiakori posotiire poiãoka. Kristo posotiire apiata. ĩkorasaaki Kristo Apiananiri. Apaka katana Kristo atoko inakari !auari. !Auari ãti kaposotiireri Kristo atoko. Kristo apiata. 22 Teoso txĩkitakari Kristo ikinimane auĩte ininiua. Itakari ikinimane imokaiakariakori ikiti patapi, ininiã Xesosi paniãtakitinoka ikamana. Imokaiakari !auaika. Ininiã ikinipoko Teoso kamakiti auĩte itxaua Kristo. Teoso sikari iua isãkire auiãkani auĩte ininiua. Inakitiakori kii atoko itxa Xesosi. 23 Iua ĩto atoko itxa inakitiakori, ininiã ikinimane inakitiakori sauaki iua aua. Itxĩkitakari ikinipoko atão inini.

2

Mitxi Ipĩkani Atoko Atxaua

1 Hĩtepekana, Xesosi txĩkitapekari hĩxinire auãki inini. Mitxi, isãkire hãuikini apisapanika, ipĩkani atoko itxa hãkixinire, Teoso manirekakiniti hĩkamini xika, himaerekani xika. 2 Iuasaaki hĩte kamari ikini sereti maerekati, ĩkorapokoriti auakani maerekani atokokana. Iuasaaki hĩkĩpitari Satanasi sãkire, maerekani matamatakoni auĩte sãkire. Iua, initiriakorikata aua ĩtima auiniãtaã. Iua parĩkauata Teoso sãkire makĩpitakani xinire ãki. 3 Mitxipeka amakinika ate Teoso sãkire makĩpitakani atxaua, kotxi akamari maerekati aĩto paniãtakiti. Iuasaaki akamari maerekati aĩto nireẽkiti. Akamari maerekati axinikakiti iaõka iuasaaki. Ikinimane itixi auakani atoko, ate, apanakini apaka maerekati kamakani atxaua iuasaaki, ininiã Teoso omanãkarauata amaerekani xika. Iposope amisiritiko.

4 Iuaritika Teoso iteene amonĩkaua. Kaamonĩkareri Teoso atoko inakari !auari. Iua iteene tiretaua. Ate maerekati kamakani atxaua, iuaritika itiretaua. 5 Ipĩkani atoko anakasaaki, maerekatinoka akamakasaaki, iuasaaki itxĩkitakaua auãki anini, Kristo auãki inĩkitakini atoko. Iuasaaki imakatxakari amaerekani, kotxi inirekari ikinipoko erekari isikiniua. 6 Ininiã Teoso õkitikaua ipĩkani sauaki aãuakasaaki, Kristo õkitikini atokokana. Ininiã itixineẽ Teoso takaua ate aĩtopãkini Kristo Xesosikata, kotxi iua nakitiakori atxaua. 7 Ininiã katanarako ãtipirika inirekari oerekiniri ikinipoko erekari atemoni. Erekar isikakiti !ixipoka. !Kamapotõkireri. Kona erekaua, iuaritika iteene

itiretaua, kotxi Xesosi Kristo nakitiakori atxaua. ⁸ Atemoni erekari isikakitinokara makatxakari amaerekani, isäkire aäuikasaaki. Ininiã !aposota ateka maerekani amakatxakini, kotxi maerekati kamakani atxaua. Teoso sikakitinokara makatxakari amaerekani. ⁹ Akamakiti erekari !iposotari amaerekani imakatxakini. Ininiã kãkiti iuikiniua !auari. Teosonokara posotari imakatxakiniri kãkiti maerekani. ¹⁰ Peerekari Teoso parïka aãkixinireẽ, kotxi ikamaua ate ereka anini. Ininiã Xesosi Kristo nakitiakori atxaua. Ikara iparïka amaneri. Ikamaua ate amaneri anini, erekari akamini ïkapani. Ikara ikamini apisapanika Teoso xinikari ikara. Iuasaaki inirekari erekarinoka akamini.

Kristo Nakitiakori Ætika Nirimanetxi

¹¹ Xoteo minakaniua hïtxaua, kotxi ikara atoko hïponaniã. Teoso takaõtxikare auaïtotakini takauãkatai hïte: “Teoso takaõtxikare mauaïtotakini.” Xoteoakori auari ikara Teoso takaõtxikare, kotxi ikisauakarina amarini tsiki mata axapiti. Ikara oerekari Teoso nakitiakori ininiuana. ¹² Hïxinikariko mitxi, Kristo sãkire hãuikini apisa, Kristo ! auari hïtemoni. Iuasaaki maparakini atoko hïtxaua. Isaeokini !hïtxaua. Ætião hïtxaua. Ikara xika kona hïte posotari hãpakapiniri Teoso sikaenetakiti iuasaaki. Iuasaaki !himarotari Xesosi makatxakiniri himaerekani. Iuasaaki !himarotari Teoso.

¹³ Uatxa Kristo Xesosi apakapapekai hïte. Mitxi ïtakoxiti auakani atoko hïtxaua, iuaritika uatxa iua minai hïte Teosomoni, kotxi Kristo arëka xiketa hïte ïkapani.

¹⁴ Iuanokara kamaerekaxiniretaua, ininiã ixipokari Xoteo, Xoteo minakaniua pakini omanatakakiniua. Ikara omanãkaretxi paretxi atoko itxa. ! Auiritari Xoteo sini Xoteo minakonimoni. Uatxa Ætika nirimanetxi atxaua. ¹⁵ Kristo ipïkasaaki, ixipokari ikara omanãkaretxi, kotxi iuasaaki ikamari ikinika paniãtakori iõkatsopatakori ikinimane ïkapani. Ikara Xoteoakorimoni sikakori. !Isikaãka Xoteo minakonimoni. Ininiã Kristo ipïkasaaki, itxïkitakana Xoteoakori, Xoteo minakaniua pakini Ætika kãkiti amaneri atoko inini. Neenamatzxi !auaika, kotxi Kristo kamaerekaxiniretaua amakinika. ¹⁶ Ipina aamina ïpiriãmitakari nopini, ininiã iuasaaki iuaïkana iminana Xoteoakori, Xoteo minakaniua pakini Teosomoni. Ætika nirimanetxi atoko iminana Teosomoni. Iuasaaki ixipokari Xoteoakori, Xoteo minakaniua omanatakakiniua. ¹⁷ Xesosi apoka ïkorapokoriti Teoso iokanapirena erekari isãpiretiniri kãkiti. Isãpiretari kãkiti, Teoso omanatiniri kãkiti imaerekani xika xipope, Xesosi sãkire auikasaakina. Isãpiretai hïte Xoteo minakaniua. Apaka isãpiretari Xoteoakori. Mitxi õtakoxiti auakani atoko hïtxaua, kotxi iuasaaki !himarotari Teoso sãkire. Mitxi Xoteoakori imarotari Teoso sãkire, ininiã Teoso takote auakani atoko itxauana. ¹⁸ Erekari Matamatakoti Ætinoka aua. Kristo sãkire aäuikasaaki, iua Erekari Matamatakoti anikaua aïri Teosomoni. Anikari Xoteoakori, Xoteo minakaniua pakini iuamoni.

Teoso Aapoko Atxaua

¹⁹ Uatxa Teoso mimarotakani !hïtxaikaua. Uatxa Æti uãka !hïtxaikaua. Teoso tixine auakani hïtxaua, apanakini Teoso sãkire auïãkanikata. Iua aapoko auakani hïtxaua.

²⁰ Teoso aapoko atoko atxaua. Aapokotxi kamaãka kaikori nopini imirikakani ïkapani. Xesosi moianariakori tosi pakini, iua iokanatakini kãkitimoni, ninoa sãpiretakiti iua kaikori atoko itxa. Kitxakapirïka Teoso sãkire sãpiretakani sãpiretakiti apaka iua kaikori atoko itxa. Aapokotxi aua Ætika kai mitari, apanakini kai soro maïkakari. Xesosi Kristo iua kai mitari atoko itxa. ²¹ Ininiã iua maïkaua. Iuakata aãua, ininiã kãkiti itoãpotari auikiniri Xesosi sãkire. Apiananiri aapoko aneeãpotini atoko itxa. Iua Apiananiri

aapoko atoko atxa. Imisākiretiko aikoti atoko atxa. ²² Ininiã iua apotiitai h̄te h̄kinika iua aapoko hininiua ĩkapani, kotxi Teoso auiniãtaã h̄txaua. Erekarı Matamatakoti auiniãtaã h̄txaua apaka.

3

Paoro Sãpiretari Teoso Sãkire Xoteo Minakonimoni

¹ Ikara atoko ininiã, nota Paoro kateia ãki naua, h̄te Xoteo minakaniua Xesosi Kristo sãkire nisãpiretini xika. Kateia ãki naua, kotxi nauikari Xesosi sãkire.

² H̄ikenakopiretapekari parĩkatxi Teoso sikakiti notamoni, isãkire Xoteo minakaniua nisãpiretini ĩkapani. Ikinipoko erekari isika notamoni, h̄te nisãpiretini ĩkapani. ³ Teoso oerekapekano kãkiti mitxi mimarotakiniti. Mitxi axapitiki ikara Teoso oerekakiti niõkatsopatapeka h̄temoni. ⁴ Uatxa ia h̄tatsopatakasaaki, h̄posotari himarotiniri nimarotakiti, kãkiti mitxi mimarotakiniti, Kristo parĩka kãkiti ĩkapani. ⁵ Kitxakapirĩka kãkiti kona imarotari ikara Kristo parĩka kãkiti ĩkapani. Uatxa Erekarı Matamatakoti oerekari ikara Xesosi iokanakinimoni. Apaka oerekari ikara Teoso sãkire sãpiretanimoni. Teoso parĩkanoka ikamana ninoa. ⁶ Nisãpiretai h̄te kãkiti mitxi mimarotakiniti. Xoteo minakaniua apakapariko Teoso n̄katakiti itixineẽ, Xoteoakori apakapiniri atokotxikana. Xoteo minakaniua, Xoteoakorikata Kristo ĩto atoko itxauana. Xoteo minakaniua apakapariko Teoso sikaenetakiti, Xoteoakori apakapiniri atokotxikana. Teoso iokanapirena erekari sãpiretari kãkiti isikaenetakiti, kotxi isikari Kristo, Xoteoakori maerekani, Xoteo minakaniua maerekani apaka imakatzakini ĩkapani. Ikara kãkiti mitxi mimarotakiniti.

⁷ Teoso iokanatano nota kãkitimoni iua iokanapirena erekari nisãpiretini ĩkapani. Ikara parĩkatxi isikano, kotxi ikinipoko erekari Teoso sikano nota iposotiireẽ. ⁸ Itomaneri Teoso nakitiakori poiãorini, iuaritika nota poiãori nininiua atoko inakari !auari. Iuaritika Teoso sikano ikinipoko erekari, kotxi iokanatano Xoteo minakonimoni erekari Kristo auakiti nisãpiretinina ĩkapani. Ikara erekari !ixipoka. Itori. !Kimarotikori ikinipoko erekari Kristo auakiti. ⁹ Apaka Teoso nirekari noerekiniri ikinimane, ikara mitxi imimarotakiniti, Teoso nakitiakori tiretakakiniua. Itixi kamikosaaki, Teoso kipatari ikara kãkiti mimarotakiniti. Ikipatiniritika uatxa ikara noerekari ikinimane. Teoso kamakasaakiri itixi, Xesosi Kristokata ikamari ikinipoko. Mitxi kona xatiki !auari. ¹⁰ Uatxa Teoso nirekari imereẽkini oerekiniri ikinipoko Teoso imarore aūtetxiakori matamatakonimoni, Teoso tixine auakanimoni. ¹¹ Itixi kamiko apisapanika, ãtipirika Teoso nirekari aãũte Kristo Xesosi kaminiri ikinika inirekakiti kãkiti ĩkapani. ¹² Kristo kamakiti ate ĩkapani aãuikiniã, aposotapitikari aãpokini Teosomoni, ininiã !kapĩkareua Teosomoni aãpokini. Ataparaxinireritika asari iuamoni. ¹³ Ininiãkara nõtãkikai h̄te. !Himatina-niuatape nimisiritiko xika. Nimisiritãka h̄te ĩkapani, Xesosi sãkire h̄uikini ĩkapani, ininiã h̄uikariko nimisiritiko. Teoso auiritari nimisiritiko, kotxi iua iteene tiretai h̄te.

Iuaĩkana Paoro Misãkiretiniri Teoso

¹⁴ Teoso nirekakiti kãkiti ĩkapani nixinikasaaki, nikapotreẽkaua aãũte Xesosi Kristo iri apisatoõ, nimisãkiretiniri ĩkapani. ¹⁵ Ikinimane Teoso naki-tiakori, itixine auakani, apaka ikinimane ĩkorapokoriti auakani apakapari iua uãka. ¹⁶ Ia atoko nimisãkiretari Teoso h̄te ĩkapani: “Peerekai pite. Ikinipoko erekari aua pitemoni. !Ixipoka ikara erekari. Ininiãkara, pisikaposotiiretana Épeso auakani ãkixinire. Ninirekari Erekarı Matamatakoti iteene sikataparatinina ninoa ãkixinire. ¹⁷ Ninirekari iteene auikinirina Kristo sãkire, ininiã

Kristo auapika ākixinireēna. Ninirekari ninoa iteene imarotini pite tiraōki. Takari kotsa kipatxi erekari āki auini atokokana, ninirekari ninoa kaikotini pitekata pitiraōki sikataparatinina ĩkapani. Imarotiniārina pitiraōki, ! irikana. !Ikamarina maerekati. ¹⁸ Ninirekari ninoa, pinakitiakori, apanakini pinakitiakori pakini, imarotini Kristo tiraōki kākiti ĩkapani, kotxi Kristo tiraōki !ixipoka. !Kaiāotikori iua tiraōki. ¹⁹ Kākiti kona posotari imarotini ikinika Kristo tiraōki. Ninirekari ninoa Épeso auakani apakapiniri ikini sereti erekari pisikakiti ākixinireēna, pite atāo imarotini ĩkapani.” Ikara atoko nimisākiretari Teoso hīte ĩkapani.

²⁰ Ininiā uatxa maxinikariko iua. Kaposotiireri apiatakari itxaua. Ikinipoko iposota ikamini. Imaposotakiniti ! auari, ininiā ikinika aamanaākiti, ikinika axinikakiti pakini, iposota ikamini. Ari, apikomoni iposota ikamini ate ĩkapani. Axinikakiti, aamanaākiti poiāoka. Apiata iposotiire. Iua posotiire parĩkauata aākixinireē. ²¹ Ininiā Teoso mereēkini kitxakapirĩka auakani, uatxa auakani, katana auakani pakini ātipirika txariko Teoso: “Peerekai pite. Apiananiri pitxaua.” Ikara atoko itxana, kotxi Xesosi Kristo makatzakari amaerekani Teoso anaakori aniniua ĩkapani. Ameē.

4

Xesosi Auiākani Ātika Īto Atoko Itxauana

¹ Kateia āki naua, kotxi nauikari Apiananiri sākire. Ininiā nota iteene ōtākikai hīte ikiniōtika atāo hīkamini, kotxi Teoso akiritai hīte iua anaakori hininiua ĩkapani. Ikara atoko hininiā, iua kamakiti atokokana hīkamako. ² Ininiākara !hīuikapeua. !Hinarekapiri hinirekakinoka hīkamini. Hāuiritariko āti kaminiri iua nirekakiti. Katima homanākarauataka !hītxapeko. Himīteenekakakauako hīkerokasaakiri hīkamakiti. Hītiretakakauako. ³ Erekari Matamatakoti txikitakari axinikakiti, anireēkiti pakini ātinoka inini, kotxi iua kamaerekaxiniretaua. Ininiākara hīparĩkauatako ikara atoko auini ĩkapani. ⁴ Xesosi ĩto atoko atxaua. Ātika ĩto, ininiā ĩtotxi ātika atoko atxaua. Erekari Matamatakoti ātinoka aua. Teoso akiritakasaakii inakitiakori hininiua, hiātapariko hāpokini iua tixine iuakata hāuini ĩkapani. Ininiā ātinoka hiātapakiti. ⁵ Ātinokara Apiananiri aua. Ātinokara aāuiākiti sākiretxiti aua. Ātinokara apatxisatiko. ⁶ Ātika Teoso aua. Iua ikinimane iri ātika aua. Iua ikinimane apisatoō apiatakari itxaua. Ikini itixiti iua aua. Amakinika aākixinireē iua aua.

Teoso Sikakiti Atemoni

⁷ Kristo sikapekari iposotiire ate amakinimoni iparĩka akamini ĩkapani. Iposotiire isikaua aparĩka akamini ĩkapani. Aparĩka pamimari, ininiā apiata isika iposotiire atemoni. ⁸ Kotxi Teoso sākire kitxakapirĩka txari: Ikanĩkasaaki itixinemoni, imikanapiriāna kākiti mitxi imokaiakari maĩkakini. Iuasaaki isikari erekari kākitemoni.

⁹ Iua kanĩka, kotxi mitxipe iua katxaka itixi patapixiti ipĩkani auiniātaā. ¹⁰ Iua itixi patapixiti katxakakari, iuatxikana kanĩka iaxiti apiko nopinixiti, ininiā uatxa iua aua ikini itixiti, iaxiti, Teoso tixine pakini. ! Auari iua mauakaniātaā.

¹¹ Iposotiire isikasaaki isākire auiākanimoni, isikari ia atoko parĩkauatakani ininiuana ĩkapani: Kristo iokanatakini kākitemoni, Teoso sākire sāpiretakani, Teoso iokanapirena erekari sāpiretakani, Teoso nakitiakori ōtākikakani, Teoso sākire oerekakani pakini isikaua. ¹² Ikara atoko isikaua, kotxi inirekari ninoa oerekiniua inakitiakori iparĩka atāo akamini ĩkapani. Ikara atoko isikaua, kotxi ninoa sikataparaxiniretaua. ¹³ Ninoa sikataparaxiniretiniritika ātika aāuiākiti auako. Ipinimoni inakari aāuiākiti !auaika, kotxi atāo aimarotariko

Teoso ākiri sākire. Ininiā kiikiteua, kimaroreua iusaaki. Kristo atoko atxauako, kotxi paimatireri iua.

¹⁴ Ininiā iusaaki amarini atoko !atxaikaua, kotxi amarini !imarotari atāo inakari. Tsakati anikakiti atoko, itima anikakiti atoko itxana kākiti kamisirienereri sākire auiākani. !Imarotarina atāo Teoso sākire. Ninoa kamisirienereri xinikaxitita atāo minakati oerekini ikapani. ¹⁵ Atāo inakarinnoka asāpiretako kākiti atiraōkiritika. Ikara atoko akaminiā, aimarore aneeāpota. Kristo sākire iteene aūikaāpota. Erekarī akamakiti aneeāpota. Ininiā Kristo atoko atxaua, kotxi iua ito atokotxikana atxaua. Ate kii atoko itxaua Kristo. ¹⁶ Itotxi kamari ikii paniātakiti. Iua atokokana ate kamari Kristo paniātakiti. Ininiā aāpotiitaua. Amoianatakakaua Kristo parīka akamini ikapani, kotxi itotxi ātika atoko atxaua. Kristo sikataparataua amoianatakakiniua. Ininiā ikinika Kristo nakitiakori atāo parīkauatiniā iua ikapani, apiaāpota aimarotari iua imarore atāo akamini ikapani. Akinika atāo aparīkauatiniā Kristo ikapani, ikamataparaxiniretaua. Iusaaki atiretakakaua. Iusaaki itotxi erekari, mamianatakati atoko itxaua Kristo naki- tiakori.

Aāuini Amaneri

¹⁷ Ikara atoko ininiā, ia nisāpiretai. Apiananiri imaroreē iteene nōtākikai. !Hīkamapinikariko apanakini Xoteo minakaniua kamakiti atoko. !Kiikiteri ninoa kamakiti. !Kiikiteri ixinikakitina. ¹⁸ !Imarotarina atāo inakari. Mapiāri atoko itxa iikitenā. Ikara atoko ininiā, !kimarorena. Teoso !itxīkitakana auapininiika ininina, kotxi ākixinireēna !inirekarina atāo inakari imarotinina. ¹⁹ Ninoa ākixinire āpatapeka, ininiā lipētauatana maerekati ikamakasaakina. Ininiākara ninoaka sikaua Satanasimoni iitona nireēkitinoka ikaminina ikapani. Ininiā ikamarina ikinika maerekati. Itori maerekati inireka ikaminina. !Inirekarina iotokakinirina ikara maerekati ikaminina.

²⁰ Hītepekana, ikara maerekati !hōerekaāka, Kristo himarotakasaaki. ²¹ Iusaaki hīkenakotapitikari iua sākire. Iua oerekai atāo inakari, kotxi Xesosi imarotari ikinipoko atāo inakari. ²² Hōerekaāka hītakanapiniri maerekati mitxi hīkamakiti, hīxinikakiti pakini. Himāka kitxakari hōkini atokokana hītxapaniko himaerekani hītakanapini. Hītakanapariko ikara kitxakari hinireēkiti, kotxi ikara maerekati hinireēkiti misirienetai. ²³ Ininiā eereka hamanaāriko Teoso txīkitakiniri hīxinikakiti, hinireēkiti pakini amaneri inini. ²⁴ Ininiā himāka amaneri hīretakini atokokana, amanerinoka atāo inakarinnoka hīkamako, kotxi Teoso txīkitakai hīxinire amaneri inini, Teoso atoko hinini ikapani. Ininiā atāo inakari himarota. Erekarinnoka hīkama. Teoso ikapaninanira hīparīkauatako.

²⁵ Ininiā aāpirena kona hīkamape hītariakorimoni. Atāo inakarinnoka hīsākiretako, kotxi amakinika ate ātika itotxi atoko atxaua. ²⁶ Hinaiatakasaakiua, !hāuiritapiri homanākare txīkitakinii maerekati hīkamini. Himakini apisapanika, hīotokakariko homanākarauatini. ²⁷ Ikara homanākare himatakanapakanisaaki, hāuiritari Satanasi txīkitakinii maerekati hīkamini, ininiā !hāuiritapiriko iua.

²⁸ Atxiiti hītiriuatapeka, ininiā !hītiriuatapinikako. Hīparīkauatako. Erekarī parīkatxi hīuakoā hīkamako, hīparīka iki hāpakapini ikapani. Ininiā eereka aua minakati hītemoni, kākiti minakati mauinakinimoni hīsikini ikapani. ²⁹ Maerekati sākiretxiti !hīsāpiretapiri kākiti. Erekarinnoka hīsāpiretako, hīsākire kenakotakani hīsikataparaxiniretini ikapani, ikinipoko erekari Teoso sikakiti ninoa apakapini ikapani. ³⁰ Kona hīkamamatinanitapiri Erekarī Matamatakoti Teoso nakiti himaerekani xika. Erekarī Matamatakoti Teoso takaōtxikare itxaua. Teoso sikapekari iua atemoni, ininiā aimarotapitikari aāpakapiniri

ikinipoko Teoso sikaenetakiti Kristo uai kanapiriākasaaki. Iuasaaki imakatzakaua ikinika maerekati auiniātaā. ³¹ !Hinīkatapiri homanānkare hākixinireē. Katima naiataka !hītxapeko. Ātipirika apanakini homanadini, hītakanapako. !Hītxitapiri āti. !Himisākirepiretapiri āti. Ikini sereti maerekati ikara atoko inakari hītakanapako. ³² Erekarī hīkaminakakauako. Hiamonīkakauako. Himaxinīkaretariko maerekati āti kamakiti hītemoni, maerekati ate kamakiti Teoso maxinīkaretini atokotxikana. Teoso maxinīkaretari amaerekani, kotxi Kristo ipina ate īkapani.

5

Hītiraōkiuatako Ikiniōtika

¹ Teoso anaakori itiretakini hītxaua, ininiā hīkamariko Teoso kamakiti atokotxikana. ² Hītiraōkiuatako ikiniōtika, Kristo tiretiniua atokotxikana. Iuaka isikaua Teosomoni, kotxi ipina ate īkapani. Teoso apokaerekatari Kristo ipinini ate īkapani. Peerekari isikiniua Teosomoni.

³ Teoso nakitiakori hītxaua, ininiā kona ninirekari nikenakopiretiniri pītaniri minakotikatika, pītanoro minakotokatika pisirīkini. !Apakata maerekati hīto nireēkiti hīkamini. !Apakata maerekati hīto nireēkiti hīxinikini, hīsāpiretini. Ikara hīxinire txīkotakari hītakanapako. Txineiro potxitakani !hītxapeuako. ⁴ !Hīsāpiretapiriko sākiretxi maerekati. Sākiretxi mīlkiteti apaka !hīsāpiretape. !Hinapetapiri āti. Hīsākirauatakasaaki, hītxariko: “Peerekari Teoso, kotxi isikaua ikinipoko erekari.” ⁵ Aimarotari ia: Ītanoro minakotokatika sirīkakari, maerekati iito nireēkiti kamakari, txineiro potxitakani pakini !iteosonetari Teoso. Teoso kamakori misākiretakani atoko itxana. Ikara atoko inakani !apakapari Teoso sikaenetakiti iua anaakorimoni, Kristo, Teoso pakini auītetxi ininiātaāua.

⁶ Kona hāuiritapiri kākiti misirienetini hīte mīlkiteti sākiretxitiā. Kona !hāuikapiri ninoā sākire, kotxi ikara atoko inakari maerekati xika, Teoso misiritariko isākire makīpitakani. ⁷ Ininiā ikara atoko inakani moianariakori !hītxapeuako.

Pokamara Atoko Hītxaua

⁸ Mitxi hīte mapiāri atoko hītxa, kotxi !himarotari Apiananiri iuasaaki. Uatxa hīte imarotapitikari iua, ininiā pokamara atoko hītxaua. Ininiākara erekarinoka hīkamako ikiniōtika. ⁹ Erekarī Matamatakoti auakasaaki kākiti ākixinireē, erekarinoka inireka ikamini. Atāonoka ikama. Atāo inakarīnoka isāpireta. Ikara atoko inakari Erekarī Matamatakoti sikakiti. ¹⁰ Hīnitariko Apiananiri nireēkiti hīkamini īkapani. ¹¹ Ikara atoko ininiā, kona hīmoianatapiri kākiti maerekati kamakani, kotxi ikara parīkatxi ipiāā potorīkakari. Ikara atoko inakari parīkatxi !iminari erekari atemoni. Ininiā maerekati !hīkamape. Ia hīkamako. Hōerekariko kākiti maerekati makamakani. ¹² Apētauata asāpiretiniri Teoso sākire makīpitakani kamakiti ipiāā, kotxi apia maerekati īkora. ¹³ Ikinika tirikapi kamara auiniātaā atamataāka, ¹⁴ kotxi tirikapi iopinikari ikinika. Ininiā āti txari: “Himereka, imakakani atoko inakanii. Hōkitikauako ipīkani atoko inakanii. Ininiā iuasaaki Kristo iopinikariko hākixinire.”

Mīlkiteti !Hītxapeua

¹⁵ Erepaniko. Atāo inakari hīkamako ikiniōtika. !Hīkamapiri mīlkiteti kamakiti atoko. Hīkamariko kākiti kiīkiteri kamakiti atoko. ¹⁶ Hīkamariko erekari, kotxi poiāonoka hāuini. Hīkamariko erekari ikiniōtika, kotxi maerekati auapitika īkorasaaki. ¹⁷ Ininiā mīlkiteti !hītxapeua. Himarotariko Apiananiri nireēkiti.

¹⁸ Kona hiätapero iãriã kapoãro hïpoãtini ïkapani, kotxi itxïkitakai maerekati hïkamini. Hãuiritariko Erekarì Matamatakoti txïkitakinii erekarinoka hïkamini. ¹⁹ Hïsäpiretakakaua xikari Teoso ïkapani, xikari kitxakari, xikari ïkorapokoriti auakari pakini. Hïxikaretari ikara atoko inakari xikari Teoso ïkapani. Hãkixinireë apaka hïxikarauata Teoso ïkapani. ²⁰ Ætipirika hïtxariko aïri Teoso: “Erekapitikai pite, kotxi erekarì ikinipoko pisikakiti atemoni.” Xesosi Kristo aãuïte ininiua, asãpiretari Teoso ikara atoko inakari.

Tanorotxi Pirena.

²¹ Hïpaxitakakauako, äti nirekakiti hïkamini, kotxi hïpïkariko Teoso manirekakiniti hïkamini. ²² Ininiã hïte sitoakoro hïkamariko hïtaniri nireëkiti. Apiananiri nireëkiti hïkamini atokokana hïkamariko hïtaniri nireëkiti, ²³ kotxi pïtãniri pikii atoko itxaua. Ininiã iua piauïte itxaua. Iua atokokana Kristo inakitiakori kii atoko itxaua Kristo. Iua ïto atoko atxaua. Aãuïte itxaua. Amaerekani makatxakakari itxaua. Ininiã sito kamariko oïtaniri paniãtakiti. ²⁴ Ininiã kãkiti Kristo nakitiakori kamari Kristo nireëkiti. Iua atokotxikana sito kamariko ikinipoko oïtaniri nireëkiti.

Taniritxi Pirena

²⁵ Hïte taniritxi, hïtiretaroko hïtanoro. Kristo tiretinina inakitiakori atokokana, hïtiretaroko hïtanoro. Iua iteene tiretana, kotxi ipina inakitiakori ïkapani. ²⁶ Iua ipina, kotxi inirekari itxïkitakinia ate iua nakitiakori aniniua. Inirekari imaktxakiniri amaerekani. Æparaã makatxakiniri aïto txiko atokokana, iua säkire makatxakari amaerekani aãkixinireë auakari. ²⁷ Kristo ipina inakitiakori ïkapani, kotxi inirekaua iposope anini ate apakapini ïkapani. Iuasaaki peerekaua. Ätika amaerekani !auaika. Ätika akerokakiti !auaika. Ikara atoko inakari maerekati !auaika. Iuasaaki atão Teoso nakitiakori atxaua. Erekarinoka akama iuasaaki. ²⁸ Ikara atoko ininiã, kiki tiretaroko ïtanoro, iïto itiretini atokokana. ïtanoro tiretakari iuaka itiretaua. ²⁹ Kãkiti !omanatari iuaka ïto. Isikakienatari. Itiretari. Apiananiri tiretiniri inakitiakori atokokana, kãkiti tiretari iuaka ïto. ³⁰ Apiananiri ïto atoko atxaua. Ixini atoko atxaua. Api atoko atxaua. Ikanoke atoko atxaua. Iuako atoko atxaua. Itxaãpota. ³¹ Iua ïto atoko atxaua, ininiãkara kiki ïtanorouatakasaaki, itakanapana iri, inoro pakini ïtanorokata ikaikotini ïkapani. Ininiã ätinoka ïtotxi atoko itxauana. ³² Nisãpiretai mitxi !kimarotikori. Kristo inakitiakorikata ätika ïtotxi atoko itxauana. Kãkiti !imarotari ikara mitxi. ³³ Ininiã pitiretaroko pïtãnoro piteka ïto pitiretini atokokana. Pite tanorotxipekana, pipaxitariko pïtaniri.

6

Amarini Pirena

¹ Hïte amariniakori, hïkïpitanako hïri, hinoro pakini säkire, kotxi ikara Apiananiri paniãtakiti. Atão pikïpitanako ninoa säkire. ² Kitxakapirïka Teoso säkire paniãtaua:

Hïpaxitanako hïri, hinoro pakini.

Ikara Teoso paniãtakiti hïkaminiã, Teoso sikaenetakiti isika hïtemoni. Mitxi Teoso paniãtakiti !auari Teoso sikaenetakiti.

³ Hïri, hinoro pakini säkire hïkïpitiniã, ia isikaenetakiti apokapitikako hïtemoni. Hïkïpitiniãri ninoa säkire, erekarì hãuini. Hïkïpitiniãri ninoa säkire, hãuiniritika kiomãtxi hïtxauako.

Irïtxi Pirena

⁴ Hïtepekana irïtxiakori, kona hïtxïkitakapena hamariteakori omanãkarauatini atão minakati hïkamini xika. Hõerekanako Apiananiri nireëkiti ikaminina. Hõerekanako Apiananiri säkire imarotinina.

Nitiritxi Pirena

⁵ Hītepekana nitiritxiakori amotakoni, hīkamariko hīauīteakori īkorapokoriti auakani paniātakiti. Hīpaxitanako ninoa. Hīpīkariko ninoa manirekakiniti hīkamini. Hākixinireē hinirekariko ninoa nireēkitinoka hīkamini. Kristo paniātakiti hīkamini atokokana, hīkamariko ninoa paniātakiti. ⁶ ! Hīparīkauatapeko hīparīka erekari apanakini atamatini īkapani īkapani, kotxi iuasaaki hinirekari ninoa poxokotini. Kristo nitiriakori hītxaua, ininiā hīparīkauata Teoso nireēkiti hīkamini, kotxi hākixinireē ikaranoka hinireka hīkamini. ⁷ Hīkamariko hīparīka ikinika hīpoxokoniritika, hinirekiniritika. Apiananiri īkapani hīparīkauatini atokokana, hīparīkauatako hīauīte īkorapokoriti auakari īkapani. ⁸ Kotxi himarotari Apiananiri sikariko parīkatxi īki kākītimoni, īkinipoko erekari ikamakiti īki. Nitiritxi iamotakoni, apaka nitiritxi miamotakoni Kristo nakitiakori apakapariko erekari ikamakitina īki.

Patrão Pirena

⁹ Hītepekana patrão, ia atoko inakari hīkamako hinitiriakorimoni. !Hītxapiri hinitiriakori: “Ikinika nota paniātakiti himakamakaniā, iteene nimisiritai hīte,” kotxi hīte patrãoote aua apaka iaxiti. Iua Teoso. Teoso kamakiti poiāorimoni, iua atokotxikana ikamakiti auītetximoni.

Kākiti Xinire Tokapare

¹⁰ Nitariakori, ia nisākire mapotōkire: Katapara hītxako. Hīkosekataparatariko Apiananiri tapara, kotxi kaposotiireri iua. ¹¹ Sotato ieretakari iīto tokapare, neenamati ikamini apisapanika. Iua atokokana Teoso sikaua axinire tokapare, ininiā maeretakariko ikinika ikara axinire tokapare, kotxi neenamati auapitika Satanasikata. Iua paimatireri. Ixinikaxititapekari itxīkitakiniua maerekati akamini. ¹² !Aneenamauata kākītikata. Aneenamauata maerekani matamatakoni auīteakorikata, ikinika maerekani matamatakoni kaposotiirerinkata. Aneenamauata auītetxiakorikata īkorapokoriti ipiā auakanikata. Aneenamauata ikinipoko maerekani matamatakoni iaxiti auakanikata.

¹³ Ininiākara hīeretakariko ikinika Teoso sikakiti hīxinire tokapare. Ininiā maerekati apokasaaki, !inokai. Kona hīrika. Kona himiteka. Hīokanitari Satanasini. Hīte kāiata.

¹⁴ Sotato iposope ineenamauatini atoko hītxako. Sotato takari ipakiomatare. Ipakiomatare maīkari ikinipoko iīto tokapare. Sotato pakiomatare atoko itxa hīxinire tokapare maīkiko. Atāo inakari sākiretxiti itxaua iua. Ininiā hītakariko ikara hīpakiomatare.

Sotato takari itorota koana, itorota tokapare īkapani. Sotato torota koana atoko itxa hīkamakiti atāo inakarinoka. Ininiā hīeretakariko ikara hītorota tokapare.

¹⁵ Sotato kiti apaka iposope ineenamauatini, kotxi itakari ikiti mata ikiti tokapare īkapani. Sotato kiti mata atoko itxa Teoso iokanapirena erekari aanikapiretakiti kākītimoni. Ikara iokanapirena sāpiretaua Teoso !imisiri-taikaua, isākire aūikasaaki. Ininiā hīeretakariko ikara hīkiti mata.

¹⁶ Sotato maīkari itokapare, iīto imokaiakari xiripi minokakani īkapani. Xiripitxi tirinakari itokaparemoni apokasaaki, oaka. Iua tokaparetxi atoko itxa Teoso sākire auikiko. Iteene hāuikiniāri Teoso sākire Satanasini !iposotari inokinii maerekatiā. Ininiā himaīkariko ikara tokaparetxi.

¹⁷ Sotato takari ikii tokapare metao kamakori. Sotato kii tāta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. Ininiā hītakariko ikara hīkii tāta.

Sotato anikaro iouata mitaro. Oa iouata mitaro atoko itxa Erekari Mata-matakoti sāpiretiniua Teoso sākire. Ininiā himaīkaroko oa iouata mitaro.

¹⁸ Himisãkiretarikoko Teoso ãtipirika. Hamanaãriko, Erekariko Matamatakoti nireẽkiti iaõka hãpakapini. Araõkire hĩtxako. !Hĩtakanapapiri hĩsãkirauatini Teosokata. Hamanaãriko Teoso, ikinimane inakitiakori nireẽkiti isikinina.

¹⁹ Himisãkiretari Teoso nota ĩkapani apaka. Hamanaãri Teoso, isãkire isikinino nisãkirauatakasaaki, nitaparaxinireritika nisãkirauatini ĩkapani, kotxi ninirekariko Teoso iokanapirena erekariko nisãpiretiniri kãkiti. Mitxi Teoso iokanapirena erekariko !kimarotikori. ²⁰ Uatxa Teoso iokanatano nota kãkitimoni, iokanapirena erekariko nisãpiretini ĩkapani. Ikara nisãpiretini xika, kateia ãki naua nota uatxa. Hamanaãri Teoso, isãkire nitaparaxinireritika nisãpiretini, kotxi ikara inakari nĩparĩka.

²¹ Niokanatariko Txĩkiko inakori hĩtemoni. Aĩtari atiretakiti iua. Apiananiriko nitiri itxaua. Atão iparĩkauata Apiananiriko ĩkapani. Iua sãpiretaiko hĩte nota pirena. Ikara atoko himarotariko nauini, nikamakiti pakini. Iua sãpiretai ĩkinipoko nota pirena. ²² Ininiã niokanatariko iua hĩtemoni ate pirena himarotini ĩkapani, isikataparaxiniretinii hĩte ĩkapani. ²³ Nitariakori, aĩri Teoso, Apiananiriko Xesosi Kristo pakini kamaerekaxiniretai. Itiretaina hĩte. Itxĩkitakaina Teoso sãkire iteene hãuikini. ²⁴ Teoso sikariko ĩkinipoko erekariko aãũte Xesosi Kristo ãtipirika tirketanimoni. Ameẽ.

PIRIPOSI

Paoro Iokanatsopatakiti Piriposi Auakanimoni

¹ Nota Paoro, Tximótxio pakini, Kristo Xesosi nitiriakori iua amotakini atxaua. Niökatsopata ikini kākiti Kristo Xesosi nakitiakorimoni, Piriposi sitatxiti auakanimoni aiokanapireta. Niökatsopata hīte kōtākikarerinimoni, kotxi hīte ōtākikana Xesosi sākire auiākani. Hītepekana, kamiparīkarerini, niökatsopata hītemoni, kotxi hīte moianatana Xesosi sākire auiākani.

² Ereēkai hīte. Aīri Teoso, Xesosi Kristo Apiananiri pakini sikai ikinipoko erekari. Ninoa kamaerekaxiniretai.

Paoro Misākiretari Teoso Piriposi Auakani Īkapani

³ Hīte nixinikasaaki: “Erekapitikari aTeosone,” nitxa. ⁴ Teoso nimisākiretakasaaki hīte himakinika Īkapani, nipoxokoniritika nimisākiretari Teoso. ⁵ Nipoxokoniuata, kotxi hīte miparīkatano nota Teoso iokanapirena erekari nisāpiretini Īkapani, kotxi hīte iokanataro txineiro notamoni. Teoso iokanapirena erekari hāuikasaaki, hīpotorika himiparīkatinino. Eereka kona hīte iotokaika himiparīkatinino nota. Uatxa auapika himiparīkatinino nota. ⁶ Teoso sikari erekari hītemoni merepanika isākire hāuikasaaki, ininiā nota imarotapitikari Teoso sikari erekari hītemoni ikiniōtika. Ikara Teoso parīka hītemoni. Erekarī isikiniritika Xesosi kanapiriā Īkorapokoriti. ⁷ Atāopitika nixinikinii hīte nipoxokoniritika, kotxi iteene nitiretai hīte himakinika. Atxiīti kateia āki naua. Atxiīti mapara naua, kākiti Teoso iokanapirena erekari atāo ininiua noerekini Īkapani. Atxiīti nisāpiretari Teoso iokanapirena erekari, kākiti iteene imarotiniri Īkapani. Kateia āki nauakasaaki, mapara nauakasaaki, ikiniōtika hīte notakata apakapari ikinipoko erekari Teoso sikakiti. ⁸ Nota iteene tiretai hīte. Kristo Xesosi tiretinii atokokana nitiretai hīte. Teoso imarotari ikara nisākire atāo inini.

⁹ Nota misākiretari Teoso hīte Īkapani ia atoko: Ninirekari hītiraōkiuatini apiaāpotini ikiniōtika. Hītiraōki aneeāpotakasaaki, ninirekari himarore apaka aneeāpotini. Imaroretxi himaroāpotakasaaki, ninirekari atāonoka himarotini. ¹⁰ Ikara atoko hininiā, himereēri apia erekari hīkamini. Ininiā maerekati ! hīkama. Maerekati na apanakinimoni ! hīkama. Ikara atoko hininiā, iposopeka hītxa Kristo kanapiriāksaaki. ¹¹ Ikara atoko hininiā, ikinipoko hīkamakiti erekari. Xesosi Kristonokara kamaerekatai hīte hīkamakiti ereka inini Īkapani. Apanakini atamatakasaakiri erekari hīkamakiti, ninoa imarotari Teoso posotiire, ininiā eereka ninoa: “Peerekari Teoso,” itxanako.

Paoro Misiritiko Pirena

¹² Nitariakori, himarotari nota iteene misiritaāka. Iuaritika Teoso iokanapirena erekari iaripiretapeka. Ninirekari himarotiniri, nimisiritiko xika apikomoni kākiti imarotari Teoso iokanapirena erekari. ¹³ Ininiā nimisiritiko xika ikinika sotatoakori, Homanoakori auīte aapoko inīkatakani, ikinimane kākiti mapara auakani apaka imarotari nota uai kateia āki nauakasaaki Kristo sākire nisāpiretini xika. ¹⁴ Itori aītariakori Apiananiri sākire auiākani, sikataparaxiniretaāka, kotxi imarotarina Teoso nīkatinino nota kateia āki nauakasaaki. Ininiā ninoa sāpiretari Teoso sākire itaparaxinireritikana. Mapīkaretika itxana.

¹⁵ Ninoa sāpiretari Kristo sākire, kotxi inirekarina erekari ikaminina. Txamari apanakinipekana sāpiretari Kristo sākire nota xikotiko xika. Inirekarina kākiti auikiniri ninoaka sākire, nota sākire poiāoka auikinina Īkapani. Ninoa sāpiretari Kristo iokanapirena, kotxi ninoa potxitari kākiti

taparakienatakakiniua. ¹⁶ Aĩtariakori, erekarinani nirekakani, sãpiretari Kristo iokanapirena, kotxi ninoa turetano nota. Ninoa imarotari Teoso sikinino nota ia parĩkatxi, Teoso iokanapirena erekari atão inini noerekini ĩkapani. ¹⁷ Nota xikotakani sãpiretari Kristo sãkire, txamari inirekarina ninoaka nireẽkiti ĩkaminina. ! Inirekarina Teoso nireẽkiti. Inirekarina nota apia atatsiitiniri nimisiritiko uai kateia ãki nauakasaaki.

¹⁸ Atxiĩti Kristo iokanapirena sãpiretakani ãkixinire erekari. Atxiĩti ninoa ãkixinire kona erekari. Iuaritika erekapitikari, kotxi Kristo iokanapirena sãpiretapeẽkaika. Ininiãkara nipoxokoniuata nota. Ari, !niotokapani nipoxokoniuatini. ¹⁹ Nipoxokoniuata, kotxi nimarotari nitakanapiniri kateia, kotxi hĩte misãkiretari Teoso nota ĩkapani. Nimakatzakaãkako kateia ãki, kotxi Erekaru Matamatakoti Xesosi Kristokata auakarũ moianatano nota. ²⁰ Kona ninirekari nipẽtauatini, Kristo iokanapirena nisãpiretakasaaki. Ninirekari kataparaxinire ninini, Kristo apanakini nisãpiretini ĩkapani. Ikara atoko nininiã, apanakini imarotari Kristo Apiananiri ininiua. Ikiniõtika nauapanika ninakasaaki, ninirekari kãkiti imarotiniri Kristo Apiananiri ininiua. Ari, nipĩkasaaki apaka, ninirekari apanakini imarotiniri Kristo Apiananiri ininiua. ²¹ Auapanika ninakasaaki, ninirekari Kristo nireẽkitinoka nikamini. Erekapitikari nipinini, kotxi eereka Kristokata nauapika. ²² Auapanika ninakasaaki, niparĩkauatapitipo Teoso sãkire nisãpiretini, ininiãkara erekari niparĩka. Kipa ninireka? Nota auapanika nininikani? Nipininikani? ! Nimarotari ninireẽkiti. ²³ Ninirekari auapanika ninini. Apaka ninirekari nipinini. Apiata ninirekari nipinini Kristokata nauini ĩkapani. Ikara atoko apiaerekata. ²⁴ Txamari hĩte noerekini ĩkapani, ninirekari auapanika ninini, kotxi hĩte nirekapanikano nota. ²⁵ Ikara nimarotapitika, ininiã auapanika nitxa, himakinika noerekini ĩkapani, kotxi nota nirekari himaroãpotiniri Teoso sãkire. Ninirekari hãuikiniri hĩpoxokoniritika. ²⁶ Ininiã eereka hĩtxari: “Erekapitikari Kristo Xesosi, kotxi Paoro iuaĩkana apoka atemoni,” hĩtxapaniko. Ininiã iteene hĩpoxokoniuata iuasaaki.

²⁷ Atxiĩti auapanika nitxa, atxiĩti nipina, iuaritika ikiniõtika ereka hĩtxako hãuini. Erekarũ Kristo iokanapirena, ininiã hĩte apaka ereka hĩtxako hãuini. Atxiĩti nisa hĩtemoni. Atxiĩti kona nisa. Atxiĩti nikenakopiretai hĩte uai kateia ãki nauakasaaki. Iuaritika, hãuini ereka inakasaaki, nimarotariko hĩte himakinika iteene auikiniri Kristo sãkire iua iokanapirena erekari. Hãuini ereka inakasaaki, nimarotari hĩte himakinika sãpiretiniri Kristo iokanapirena iaõka apanakinimoni. ²⁸ Hãuini ereka inakasaaki, na hĩpĩkana hĩte omanatakani. Hĩtaparaxinireritika hãuiniã, ninoa hĩte omanatakani imarotari ixipokinina ãti õti. Hĩtaparaxinireritika hãuiniã, ninoa imarotari Teoso makatzakinii hĩte himapinakani ĩkapani. ²⁹ Ininiã Teoso sikari erekari hĩtemoni, kotxi iua auiritai hĩte auikiniri Kristo iokanapirena. Apaka erekari isikai hĩte, kotxi iua auiritai hĩte atatsiitiniri himisiritiko Kristo ĩkapani. ³⁰ Hĩte atamatapekarũ nota misiritiko, hĩte sauaki nauakasaaki. Hĩkenakopiretari nimisiritiko auapanika uatxa. Uatxa hĩte nota atoko, kotxi hĩte apaka misiritaãka.

2

Kristoka Poiãotakaua.

¹ Kristo sikataparaxiniretaua ate, iua nakiti aniniãua. Kristo mĩkapiritaua ate, amarini axapitiri inoro mĩkapiritini atoko itxa, kotxi iua turetãua. ãtipirika iua Erekarũ Matamatakoti amoianari itxãua. Kristo iteene turetãua. Iua amonĩkaua. ² Ininiãkara nota õtãkikai hĩte hĩkinika. Hĩxinikariko Teoso nireẽkitinoka hĩkamini, ininiã hĩxinikakiti ãtinoka txãuako. Hĩtoretakakãuako

Teoso tiretiniua atokokana. Hinireēkiti ātinoka txauako. Ikara atoko hininiā, iteene hīkamapoxokonitano nota. ³ Kona kapotxinaniri hītxapeua. !Hīuikapeua. Hīteka minakati hītxauako. Hīxinikariko: “Apanakini apiata, nota poiāoka”. ⁴ !Hīxinikapiri pite nireēkitinani. Himiparīkatanako apanakini, ninoa nireēkiti ikaminina ikapani.

⁵ Xesosi Kristo xiniākitikanerako hīxinikako. Kristo kamakitikanerako hīkamako. ⁶ Teoso itxaua Kristo Xesosi, ininiā iposotari ipaniātiniri ikinimane inireēkiti ikaminina. ⁷ Iuaritika itakanapari auītetxi ininiua. Nitiritxi atoko itxapekaua. Iuaka minakati itxīkitakaua, kotxi kākitipeka itxaua uai itixi iponaniākasaaki. ⁸ Iuasaaki kiki inakasaakia, iuaīkana iuaka ipoiāotakaua, kotxi ikīpitari Teoso sākire ipinini ikapani. Imarotari okiko tīkane, kokaniri okiko atoko inaākako aamina ipiriāmitakari nopini. Iuaritika ikīpitari Teoso sākire ipinini ikapani. ⁹ Ikara atoko ininiā, Teoso txīkitakari iua Apiananiri ininiāua. Āti iua atoko inakari !auari. Teoso takari iuāka. Āti uāka iua atoko inakari !auari, ¹⁰ kotxi kākiti ikininape kenakotakasaakiri iuāka Xesosi, ikapotreēkauako Xesosi apisatoō. Ikinimane Teoso tixine auakani, ikinimane itixi auakani, ikinimane ipīkani auiniātaā pakini kapotreēkauako Xesosi apisatoō, kotxi iauītena itxaua Xesosi. ¹¹ Ikinipoko kākiti txako: “Xesosi Kristo Apiananiri itxaua,” itxanako. Ikara atoko ininiā ikinimane: “Peerekari aīri Teoso,” itxanako.

Iōriki Atoko Hītxako

¹² Ininiā nota tiretakini, hīkīpitariko nisākire uatxa, mitxi hītekata nauakasaaki nisākire hīkīpitini atokokana hītxako. Uatxa kona hītekataikano, iuaritika ninirekari apiata hīkīpitiniri nisākire. Teoso makatxakapekari himaerekani itixine hīsini ikapani, ininiākara ikiniōtika hīparīkauatako Teoso ikapani. Hīpīkariko maerekati hīkamini. Erekarinanira hīkamapikako. ¹³ Hīposotari ikara atoko hīkamini, kotxi Teosokara moianatai hīte. Iua kamanirekaretai hīte iua nireēkiti hinirekini ikapani. Iua sikaposotiiretai hīte iua nireēkiti hīkamini ikapani.

¹⁴ Hīparīkauatakasaaki, !hītsoatape, !hītxitakapeua. ¹⁵ Ikara atoko hīkaminiā, hīkerokiniri !auari, himaerekani !auari, ininiā erekarinoka hīkama apanakinimoni. Ininiā Teoso anaakori erekarini hītxaua. Kākiti kamisirienererini sauaki hāuanāta hīte. Kākiti maerekani sauaki hāuanāta. Iōriki iopinikari iaxiti ikanōka. Iōriki atoko hītxako. Hīopinikariko maerekati auiniātaā, atāo inakari kākiti imarotini ikapani. ¹⁶ Hīte iopinikari ipiā, Teoso sākire apanakinimoni hīsāpiretakasaaki. Teoso sākire txīkitakari kākiti ātipirika auāki inini tīkane, Teosokata auini ikapani. Hīte Teoso anaakori erekarini hininiāua, nota iuikaiko hīte, Kristo uaimoni kanapiriākasaaki, kotxi hīte auikapekari Teoso sākire nisāpiretakiti. Kona maxikatīkani nīparīkauatapitipo hīte ikapani, kotxi hīte auikapekari Teoso sākire nisāpiretakiti.

¹⁷ Atxiīti nota okaāka Teoso sākire nisāpiretini xika. Atxiīti niarēka oxikepoakataāka, Teosomoni sikakori atoko inakari, Teoso sākire nisāpiretinii xika, Teoso sākire hāuikini xika. Nokaāka atxiīti, iuaritika nipoxokoniuaata. Nipoxokoniuaata hītekata. ¹⁸ Ininiā erekari hīte apaka poxokoniuatini. Erekarini hīpoxokoniuatini notakata.

Tximótxio Pirena

¹⁹ Xesosi Apiananiri nirekiniāri nota iokanatiniri Tximótxio hītemoni, ininiā mapaōtipeka inakasaaki niokanatarini iua. Ininiā eereka iua minapiretari hīte pirena, nota apaka poxokoniuatini ikapani. ²⁰ Āti Tximótxio atoko inakari uai !auari, kotxi iua iteene tiretai hīte. Iua nirekari hāuini ereka inini. ²¹ Apanakini kākiti xinikari ninoaka nireēkitinoka. !Ixinikarina Xesosi

Kristo nireēkiti. ²² Himarotari iua Tximótxio parīkauatape notakata, imi irikata parīkauatakari atoko itxa. Iparīkauata notakata Teoso iokanapirena erekari apanakini asāpiretini īkapani. Ininiākara himarotari Tximótxio atamakaākepeka, ininiā himarotari erekapitikari iua. ²³ Kiatokopa ninataāka? Uatxa !nimarotari. Nimarotakasaakiri, niokanatarī Tximótxio hītemoni. ²⁴ Apiananiri kamaimaroretano nota, Tximótxio tikinimoni nota apaka apoka ereē hītemoni.

Eparotxito Pirena

²⁵ Notamoni erekari iuaīkana niokanatiniri hīokanapirena mīkari, Eparotxito inakori. Hīte iokanatapekari iua notamoni nota itiretini īkapani. Iua nitari atoko itxa. Imiparīkatapitipono nota, Teoso iokanapirena asāpiretakasaaki. Iua, nota pakini sotato atoko atxaua, kotxi ate neenamauata Teoso īkapani. ²⁶ Iua ipiātai hīte hīkinika. Iua maerekaxiniretinoka itxa, kotxi ikenakopiretari hīte imaropiretiniri iua amianatini. ²⁷ Atāopitikara iua amianatapitika. Iua ipinaarita, iuaritika Teoso amonīkari iua. Itxīkitakari iua iuaīkana ereka inini. Ininiā Teoso amonīkano nota apaka, kotxi Eparotxito ipinaākamako, apia maerekaxiniretinoka nitxamako. ²⁸ Ininiākara iteene ninirekari niokanatiniri iua hītemoni, hīpoxokoniuatini īkapani haōkitakasaakiri. Ikara atoko ininiā, nota maerekaxiniretinoka ninini !auaika. ²⁹ Ininiā hīpoxokoniritika hāpakapariko iua, kotxi iua Eparotxito aītari itxaua, kotxi Apiananiri nakitiakori atxaua. Hīpaxitariko kākiti Eparotxito atoko inakari, ³⁰ kotxi Kristo īkapani iparīkauatini xika ipinaarita. Iuaka monōkorimoni isa nota imoianatini īkapani, kotxi iua imarotari hīte nirekapitikamari himoianatinino, txamari ! hīposota himoianatinino, ininiā iua iteene moianatano.

3

Kiatokopa Kākiti Atāo Ereka Inini?

¹ Nitariakori, apikomoni nisāpiretai. Hīpoxokoniuatako, kotxi Apiananiri nakitiakori atxaua. !Nisāpaka iuaīkana nisāpiretakitipeka nisāpiretinii hīte. Iuaīkana nōtākikai hīte, atāo minakati himauikakani īkapani. ² Erepaniko kākiti maerekati kamakani, atāo minakati sāpiretakani, kotxi ninoa sāpiretari kākiti: “Teoso takaōtxikare piītoā mauakaniā, kona Teoso nakiti !pitxaua,” itxana. ³ Ninoa auapitika Teoso takaōtxikare iītoāna, txamari kona Teoso nakitiakori !itxauana. Atera Teoso nakitiakori, kotxi atemoni aua atāo inakari Teoso takaōtxikare ate ākixinireē, kotxi Erekarī Matamatakoti oerekaua amisākiretiniri Teoso. Kristo Xesosinokara ate iuika. Aimarotari ateka kamakiti !itxa. Teoso kamakitinokara apakata.

⁴ Hīuākatari atxiīti hīte kamakiti ereka inini Teoso apakapinii īkapani? Konapitini. Nota kamakiti apiaerekata, iuaritika nikamakiti !txīkitakano Teoso apakapinino īkapani. Hīkenakotariko erekari nota kamakiti: ⁵ Teoso takaōtxikare niītoā takaāka oito ōti nauakasaaki. Nirini, ninoroni pakini Xoteo itxauana. Natokiri kitxakapirīka Pēxamiī inakori. Kitxakapirīka natokiriakorini, nakiroakoroni pakini ikinika Xoteoakori itxauana, ininiā atāo Xoteo nitxaua. Nota kīpitari aāuīteakori kitxakapirīkarini paniātakiti, kotxi nota pariseo nitxaua, ininiā Teoso sākire iōkatsopatakori oerekakari nitxaua. ⁶ Nota iteene nirekari Teoso nireēkiti nikamini, ininiā nimisiritari kākiti Xesosi sākire auiākani, kotxi niuākatari Teoso nirekari ikara nikamini. Aātokiriakorini paniātakiti ikinika nikīpita. !Nikerokari.

⁷ Mitxi niuākatari ikara atoko nininiā erekapitikari, ininiā, “Teoso apaka-papitikano nota,” nitxa. Uatxa nimarotari Kristo, ininiā nimarotari mitxipe

minakati nininiua nota. ⁸ Uatxa nimarotari niauïte Kristo Xesosi. Ikara api-aerekata. Xesosi nimarotini apisapanika, nikamakiti !itxa xatiki. Nitakana-papekari mitxi nikamakiti. !Itxaika. Mitxi nikamakiti itiki atoko, kotxi !niniurekari. Kristo nakiti uatxa nitxaua. ⁹ Nitakanapapekari mitxi nikamakiti Kristokata âtipirika nauini ïkapani. Nota kïpitari Moisesini paniâtakiti. Ikara atoko inakaranani kona ereka txïkitakano nota. Teosonokara ka-maerekatano nota, kotxi nauikari Kristo sâkire. ¹⁰ Ninirekari Kristo iteene nimarotini. Ninirekari nimarotiniri Teoso posotiire, kotxi iposotiireë ôkitikari Kristo, iuaïkana auâki inini ïkapani. Kristo atatsiirauatape, ininiâ nota apaka nirekari natatsiirauatini atâo imoianari nininiua ïkapani. Ninirekari nota nireëkiti ipinini, Kristo aamina ïpiriâmitakari nopini ipinini atoko. Ninirekari Xesosi nireëkitinoka nikamini, ininiâ iua atoko nitxaua. ¹¹ Ininiâ itixi xipokini ôti Teoso ôkitikanoko, iuaïkana auâki ninini tïkane.

Mitekakari Atoko Nitxa

¹² Ikara ikinika !nimarotapanika. Nimaroâpotapanikariko. Teoso kama-panikari iparïka nota âkixinireë. !Ixipokapanikari, ininiâ !niotokakari nipa-rika Teoso ïkapani. Niparïkauatapitipo. Mitekakari mitekini atoko, !niotoka. Mitekakari nirekari mitekaxi mapotökire apokini. Iua atokokana nota nirekari nipa-rika mapotökire napokini, kotxi Kristo Xesosi mereëno nota ikara atoko nikamini ïkapani. ¹³ Nitariakori, nipa-rika mapotökire !napoka-panika. Ia nikamako: !Nixinikaikari mitxi nikamakiti. Mitekakari masapo-torikakati atoko nitxa. Nitapararitika nisa apikomoni, nipa-rika mapotökire napokini ïkapani. ¹⁴ Mitekakari iteene nirekari mitekaxi mapotökire apokini imitekini ïki apakapini ïkapani, ininiâ imitekaxitipo. !Iotoka. Iua atokokana nota parïkauatapitipo Teoso ïkapani, nipa-rika mapotökire napokini ïkapani, nipa-rika ïki Teoso sikakiti napakapini ïkapani, kotxi Teoso pïkapiretano nota Kristo Xesosiâ itixine nisini ïkapani, nipa-rika ïki napakapini ïkapani.

¹⁵ Akinika ate Kristo iteene imarotakani xinikamariko nota oerekakiti atoko inakari. Ikara atoko himaxinikakanisaaki, Teoso oerekaiko hïte atâo inakari. ¹⁶ Mitekaxi kamakari paniâtakiti iaôka mitekakari kama imitekasaaki. Iua atokokana makamariko Teoso paniâtakiti. Uatxaika aka-makiti atokokana makama.

¹⁷ Nitariakori, hïkamariko nota kamakiti atoko inakari, kotxi ate oerekapekai hïte ikara atoko inakari hïkamini. Hïkïpitariko nota kamakiti atoko inakari kamakani sâkire. ¹⁸ Kaiâopokori kâkiti !auikari Kristo ipinini amaerekani imaktxakini ïkapani. Kristo omanatakani itxauana ninoa. Itokatapeka ikara nisâpiretai hïte, ininiâ iuaïkana uatxa ikara nisâpiretai. Iteene nimatinaniuata ninoa xika. ¹⁹ Itixi mapotökire ôtisaaki ninoa iokanataâkako maerekani misiritikoâtaâ. Iïtona iteasonena atoko itxana, kotxi iïtona nireëkitinoka ikamana. Ikamakitina !erekari, iuaritika iuikarina ikamakitina. !Ipêtauatana. Ninoa xinikapikari ïkorapokoriti. !Ixinikarina Teoso. ²⁰ Atepekana, Teoso tixine auakani atxapekua. Aiâtapari apoxokoniritika kâkiti maerekani makatxakakari iuaxitikiri uaimoni apokini. Iua Xesosi Kristo Apiananiri itxaua. ²¹ Iuasaakiko inoâkari aïto mataparati. Itxïkitakari aïto iua ïto erekari atoko inini. Iposotari, kotxi kaposotiireri itxaua iua. Ikinimane kamapitikariko ipaniâtakiti, kotxi kataparari iua Xesosi.

4

¹ Nitariakori, nota iteene tiretai h̄te. Nipiātai h̄te. H̄kamapoxokonitano nota. Niuikai h̄te, kotxi nipar̄ka ĩki atoko h̄txa. Nitiretakini, h̄xinikariko ikara nota ōtākikinii uatxa. Nota ōtākikinii h̄k̄ipitiniā, !h̄takanapari Apiananiri.

² Nota ōtākikai h̄te Epótxia inakoro, S̄txiki inakoro pakini. H̄k̄ipitariko Apiananiri s̄kire. H̄totokakariko h̄txitakakiniua. ³ Pitepekana nimoianari erekari, nota nirekai pite ōtākikinina naia sito ipi, kotxi ninoa par̄kauatapeka notakata Teoso iokanapirena erekari as̄āpiretakasaaki. Ninoa par̄kauata notakata, Krem̄txi inakori pakinikata, apanakini nimoianariakorikata apaka. Ninoa uāka Teoso aātsopateē iōkatapeēkaika, Teosokata auapininiika ininina t̄kane.

⁴ H̄ienen̄kapikako, kotxi Apiananiri nakiti h̄txaua. Iuaīkana nitxai. H̄ienen̄kako.

⁵ Erekari h̄kamako apanakinimoni. !H̄txitapena. Erekari apanakini imarotiniri h̄te ereka hinini. Apiananiri kaimapeka ikanapiriini uaimoni. ⁶ Na xatiki maerekaxiniretika !h̄txape. Maerekaxinireti hinakasaaki, himis̄ākiretariko Teoso. Hamanaāri hinireēkiti. Himis̄ākiretakasaakiri Teoso, h̄txariko: “Erekapitikari notamoni pikamakiti,” h̄txariko. ⁷ Ikara atoko aniniā, Teoso kamaerekaxiniretaua. Kiātokopa ininiāpa Teoso kamaerekaxiniretaua? !Kimarotikori, iuaritika peerekari. H̄ākixinire erekaxinirepeka ininiā, maerekati !iīroā h̄ākixinireē. !Hinirekaikari maerekati h̄xinikini. !Hinirekaikari maerekati, kotxi Kristo Xesosi nakiti h̄txapekaua.

⁸ Nitariakori, nis̄āpiretakiti xipokini apisa, nis̄āpiretapanikaiko h̄te. H̄xinikariko atāo inakari s̄ākiretxiti. H̄xinikariko atāo inakari h̄s̄āpiretini. H̄xinikariko atāo inakari h̄kamini. H̄xinikariko erekarinoka. H̄xinikariko tiraōkitxi. H̄xinikariko potxitakori. Ikara atoko inakaranoka h̄xinikako, kotxi erekapitikari ikara. Peerekari ikara. ⁹ H̄kamapikariko noerekakiti iaōka. H̄s̄āpiretanako apanakini h̄temoni nis̄āpiretakiti. H̄kamariko nota kamakiti h̄tiākiti atokokana. Ininiā Teoso k̄akiti kamaerekaxiniretakari kaikota h̄tekata.

Paoro Potxitari Ninoa Sikakiti

¹⁰ Apiananiri nakiti nitxaua, ininiā iteene nipoxokoniua. Iuaīkana h̄te oerekari h̄tiretinino, txineiro h̄s̄ikakito h̄ōkanatinano, ininiā nipoxokoniua. Ātipirika h̄xinikano, kotxi iteene h̄tiretano. Txamari mitxi !h̄posotari h̄s̄ikakiti h̄ōkanatini notamoni. ¹¹ !Namanaāi iuaīkana txineiro h̄ōkanatini notamoni. Ikinipoko ninireēkiti auakasaaki, nipoxokoniua. Ikinipoko ninireēkiti mauakanisaaki, iuaritika nipoxokoniua. ¹² Nota napapekari nimamākani, nimanipokoreni, nimatxineiroteni pakini. Apaka nimarotari ātikataā ninireēkiti ikinipoko auinano. Teoso oerekapekano ikiniōtika nipoxokoniuatini. Nienen̄ka nipokori auakasaaki. Nienen̄ka ninatxitakasaaki apaka. Nienen̄ka ikini sereti auinakasaakino. Nienen̄ka minakati mauinakanisaakino. ¹³ Ikinipoko niposota nikamini, kotxi Kristo sikano iposotiire.

¹⁴ Erekapitikai h̄te, kotxi nimatxineirotenisaaki, h̄ōkanatari txineiro notamoni. ¹⁵ Teoso iokanapirena erekari merepitipanika h̄ikenakotakasaaki, ereē Masetónia tixini nosipikasaaki, h̄te Piriposi auakaninokara iokanataro txineiro napakapini ĩkapani. Apanakini Xesosi s̄ākire auiākani ātiātaā auakani, !iokanatinano nota. Himarotapekari ikara. ¹⁶ Tesarónika sitatxiti nauakasaaki, ninirekakiti auakasaaki, itokata txineiro h̄ōkanatinano. ¹⁷ !Niātaparo txineiro h̄s̄ikinino. Niātapari Teoso sikinii erekari, kotxi h̄te tiretipekano nota. ¹⁸ Napakapapekari ikinipoko h̄ōkanatakiti. Kaiāopokori h̄ōkanatakiti. Epararotxito inakori mininano h̄s̄ikakiti, ininiā ikinika ninireēkiti uatxa auinano nota. Teosomoni sikakori kamariri atoko itxa

hĩte sikakiti notamoni. Teoso potxitari hĩsikakiti notamoni. ¹⁹ NiTeosone sikaiko hĩte hinireẽkiti ikini sereti, kotxi ikinipoko aua iuamoni. Isikaua, kotxi Kristo Xesosi nakitiakori atxaua. ²⁰ Ātipirika matxari Teoso: “Peerekai aĩri, aTeosone. Ameẽ.”

Takanapapirenatxi

²¹ Hĩsāpiretanako ikinimane ereẽ auakani Kristo Xesosi nakitiakori, nix-inikamanapitinina ninoa. Aĩtariakori uai notakata auakani xinikamanapitai hĩte apaka. ²² Ikinimane uai auakani Teoso nakitiakori iokanapireta hĩtemoni ixinikiniina. Homanoakori auĩte aapoko auakani, Teoso nakitiakori, iokanapireta hĩtemoni iteene ixinikiniina.

²³ Xesosi Kristo Apiananiri sikari ikinipoko erekari hĩtemoni. Ameẽ.

KOROSO

Paoro Iokanatsopatakiti Koroso Auakanimoni

¹ Nota Paoro. Niokanatsopata hitemoni. Teoso mereeno nota, kotxi inirekari nota Xesosi Kristo iokanatakiti nininiua. Aĩtari Tximótxio apaka iokanapireta hitemoni. ² Ininiã aiokanatarari ia iõkatsopari Teoso nakitiakori-moni, ikinika Teoso paniãtakiti kamakanimoni Koroso sitatxiti auakanimoni. Aĩtariakori hĩtxaua. Aĩri Teoso, Apiananiri Xesosi Kristo pakini sikari ikinipoko erekari hitemoni. Ninoa kamaerekaxiniretai hite.

Teoso Misãkiretiko Koroso Auakani Īkapani

³ “Erekapitikai,” atxari Teoso, aãũite Xesosi Kristo iri, iua amisãkiretakasaaki hite ĩkapani. Ātipirika amisãkiretari Teoso hite ĩkapani. ⁴ Ikara atoko atxari Teoso, kotxi ate kenakopiretari hite auikiniri Kristo Xesosi sãkire. Apaka akenakopiretari hite turetiniiri ikinika kãkiti Teoso nakitiakori. ⁵ Teoso iokanapirena erekari atão sãkiretxiti itxaua. Ikara hĩkenakotakasaaki, hĩkenakotari Teoso sikaenetakiti ipotetakiti itixineẽ hite ĩkapani, ininiã hiãtapari hãpakapiniri Teoso sikaenetakiti. Himarotari hãpakapiniri, ininiã Teoso sãkire hãuikini aua, hĩtiraõkiuatini pakini aua. ⁶ Teoso iokanapirena erekari hĩkenakotakiti iaripiretapeka ikini itixitimoni. Ikiniõtika apikomoni kãkiti kenakotari. Iuasaaki kãkiti auikaãpotari Teoso iokanapirena. Ikiniõtika kãkiti apakapari erekari Teoso sikakiti. Iua atokokana hite kenakotari Teoso iokanapirena erekari. Iuasaaki himarotari ikinipoko erekari Teoso sikakiti. Iuasaaki himarotari Teoso atão sikiniri ikinipoko erekari kãkitimoni.

⁷ Amoianari, atiretakiti, Epãpara inakori, iuara oerekai Teoso sikiniri ikinipoko erekari kãkitimoni. Iua Kristo nitiri itxaua. Ātipirika iparĩkauata Kristo ĩkapani, ininiã Ātipirika iparĩkauata hite ĩkapani. ⁸ Iua sãpiretaua ate hĩtiraõki, Erekari Matamatakoti siãkiti hitemoni.

⁹ Hite pirena akenakopiretakasaaki, Ātipirika amisãkiretari Teoso hite ĩkapani. Ate nirekari hite iteene imarotiniri Teoso nireẽkiti hĩkamini ĩkapani. Anirekari kiĩkiteni hininiãua. Anirekari himarotiniri Teoso imarore Erekari Matamatakoti siãkiti.

¹⁰ Ininiã ate misãkiretari Teoso hite atão hĩkamini ikiniõtika, kotxi Apiananiri anaakori hĩtxaua. Anirekari hĩkamakiti kamapoxokonitiniiri Teoso. Ininiã hĩkamakiti ikiniõtika erekarinoka, amãtiiri erekari atoko. Ininiã ikiniõtika himaroãpotari apikomoni Teoso nireẽkiti. ¹¹ Anirekari Teoso sikataparaxiniretini hite iposotiireẽ, kotxi kaposotiireri iua. Ininiã iuasaaki hiãtapari himisir-itiko xipokini. Iuasaaki !hinaiataua. Iuasaaki hĩposotari himĩteenekiniri himisiritiko hĩpoxokoniritika. ¹² Iuasaaki hĩtxariko aĩri: “Erekapitikai,” kotxi iua kamaerekataua. Ininiã aãpakapari iua potetakiti inakitiakori ĩkapani Teoso tixineẽ, ipiã mauakaniãtaã. ¹³ Iua sikakaua ipiã posotiireẽ aãuakasaaki, maerekati posotiireẽ aãuakasaaki. Iua anikaua imi itiretakiti auiniãtaã. Iuaãtaã auakani auĩte itxaua imi. ¹⁴ Imi Kristo iĩkitxitari Teoso amaerekani ĩki ipĩkasaaki, ininiã Teoso makatxakari amaerekani. !Ixinikaikari amaerekani.

Kristo Apiananiri

¹⁵ Kãkiti kona posotari atamatiniri Teoso. Teosotxikana itxaua Kristo, iuaritika aposotari Kristo aãtamadini. Ikinipoko kamiko apisa, Kristo aua Teosokata. ¹⁶ Iua kamari ikinipoko. Ikamari iaxiti auakani, uai itixi auakani apaka. Ikamari ikinipoko kãkiti atamatakiti, kãkiti matamatakiniti apaka. Ikamari ikinika kaposotiirerini, auĩtetxiakori matamatakoni, ikinika Teoso

nitiriakori pakini. Ikamari ikinika. Ikinika kamaāka iua ĩkapani. ¹⁷ Kristo aua ikinipoko apisa. Iua maĩkari ikinika imaxipokakani ĩkapani. Ikara atoko ininiā, ikinipoko auapanika. Iua mauakaniā, ikinika iarika. Iua mauakaniā, ikinipoko xipoka.

¹⁸ Kākiti Teoso mereēkini Kristo ĩto atoko itxauana. Teoso mereēkini kii atoko itxa Kristo. Merepitipanika ipĩkari ōkitikakariua iua. Ininiā ōkitikasaakiua, oerekari kākiti Apiananiri ininiua. Āti kaposotiireri iua atokokana inakari ! auari. ¹⁹ Teosotxikana iua. Ikinika Teosomoni auakari aua iuamoni. Ikara atoko Teoso apokaerekatari. ²⁰ Kristo arēka xiketakasaaki aamina ĩpiriāmitakari nopini, iuasaaki Kristo xipokari Teoso omanākarauatini kākiti maerekani xika. Kotxi Teoso nirekari Kristo mininiri ikinipoko iuaĩkana iuamoni, ĩkorapokoriti auakani, iaxiti auakani pakini. Ininiā uatxa Teoso apakapari Kristo sākire auiākani.

Kristo Kamakiti Koroso Auakani ĩkapani

²¹ Hĩtepekana, mitxi ! himarotari Teoso. Iuasaaki ! hāuari Teosokata. Maerekati hĩkamakiti xika homanatarari Teoso hākixinireē. Teoso mokaiakariakori hĩtxaua iuasaaki. Uatxa Teoso apakapai hĩte, ²² kotxi Kristo ĩto ipina hĩte ĩkapani. Ininiā iua anikai hĩte Teosomoni iua makatxakakini hininiua ĩkapani. Teosomoni himaerekani ! auaika, kotxi Kristo makatxakapekari imakinika himaerekani. Teoso apisatoō hāpokasaaki, kona āti posotari apoĩtini himaerekani xika. ²³ Ikara atoko aua hĩtemoni, iteene hāuikiniāri Kristo sākire ikiniōtika, Kristo sākirenoka hāuikiniā, isākire himatakanapakaniā. Ikara atoko hĩkaminiā, apanakini kona txĩkitakai hĩtakanapiniri hiātapiniri ikinika Teoso kamakiti hĩte ĩkapani. Teoso iokanapirena erekari sāpiretaua ikinika Teoso kamakiti inakitiakori ĩkapani. Hĩte kenakotapekari Teoso iokanapirena erekari. Isāpiretaākapeka ikinika itixi auakanimoni. Nota Paoro Teoso nitiri, iua iokanapirena erekari ikinimane nisāpiretini ĩkapani.

Paoro Parĩkauata Kākiti Teoso Mereēkini ĩkapani

²⁴ Uatxa nipoxokoniuata hĩte ĩkapani natatsiirauatini, kotxi natatsiirauatini xika hĩte auikari Kristo sākire. Natatsiirauata niĩtoā Teoso mereēkini ĩkapani. Kristo ĩto atoko itxauana kākiti Teoso mereēkini. Natatsiirauatapitika, iuaritika Kristo atatsiirauatini apiata. ²⁵ Teoso iokanatano nota imereēkini nitiri nininiua. Ipaniātano nisāpiretiniri ikinika isākire hĩtemoni. ²⁶ Ipaniātano nisāpiretinii mitxi kākiti mimarotakiniti. Okananipeka Teoso !oerekari ikara kākiti mimarotakiniti. Kristo ipinini apisa ikini itixiti auakani ! imarotari ikara. Mitxi kākiti mimarotakiniti uatxa oerekaāka Teoso nakitiakorimoni. ²⁷ Uatxa Teoso nirekari inakitiakori Xoteo minakaniua imarotiniri mitxi kākiti mimarotakiniti, kotxi peerekari. Natokopa itxa ikara kākiti mimarotakiniti? Nisāpiretai. Kristo posotari kākiti ākixinireē auini. Ia mitxi kākiti mimarotakiniti. Kristo aua hākixinireē. Ininiā himarotari hĩsini Teoso tixinemoni. ²⁸ Ininiā asāpiretari kākiti Kristo pirena. Aōtākikari ikinimane Teoso imaroreē. Aōerekari ikinimane Teoso imaroreē, kotxi Teoso sikaimaroretua. Iua aua ikinika imaroretxi. Ikara atoko aanikana Kristo nireēkitinoka kamakani Teosomoni. ²⁹ Ikara nikamini ĩkapani, niparĩkauatapitipo. Pasāpaniri. Kristo posotiireē niparĩkauata, kotxi kaposotiireri iua. Iua iteene sikataparatarari nākixinire, ininiā niposotari iteene niparĩkauatini iua ĩkapani.

2

Paoro Nirekakiti

¹ Ninirekari himarotiniri iteene nimisiritiko hĩte ĩkapani. Apaka iteene nimisiritāka Araotxiséia sitatxiti auakani ĩkapani. Nimisiritāka apanakini nimataōkitakini ĩkapani apaka. ² Ninirekari ikinimane ninoa kataparaxinire

ininina. Apaka ninirekana itiretakiniuana, ininiã ätika ninoa nireëkiti. Ikara atoko ininiãna, iteene imarotarina ikinika Teoso säkire. Iuasaaki imarotarina Kristo, mitxi kãkiti mimarotakiniti, mitxi aïri Teoso moerekakiniti. ³ Paimatireri Kristo. Iua mimarotakiniti !auari. Ikinipoko imarota. ⁴ Ikara atoko nisãpiretai hïte, apanakini mamsirienetakanii tïkane kãkiti imaroreë. ⁵ Niïto !auari hïtekata, iuaritika nixinikapikai hïte nãkixinireë. Nipoxokoniuta, kotxi nimarotari hïkamakiti atão inini. Apaka nipoxokoniuta, kotxi hïte iteene auikari Kristo säkire.

Atão Kristo Säkire Auiãkani Kamakiti

⁶ Hãpakapapekari Kristo Xesosi hãauïte ininiua ïkapani, ininiã hïkamariko inirekakiti ikiniõtika. ⁷ Iua taparanoka hïkosekako. Aãkotsa kosekiniri ãparaã atoko hïtxako. Ikara atoko hininiã, kataparari hïxinire. Ininiã atão hãuikari Kristo säkire mitxi aõerekakiti atoko, ininiã kataparaiko. Ininiã iteene hïtxariko Teoso: “Ikinika pikamakiti ate ïkapani peerekari,” hïtxako.

⁸ Erepaniko. Kona hãuiritapiri kãkiti makatxakinii Teoso kimaporeë. ! Hãuikapiri ninoa säkire, kotxi ätião ninoa säkire. Na atão isãkirena. Kãkiti imarorenoka imarotana. Kamisirienenererini niñoa. Maxikatïlka isãkirauatana. Kitxakapirïka auakani säpiretakiti ninoa säkire. ïkorapokoriti auakani nireëkiti maerekati isãpiretana kãkiti. Kona Kristo säkireni.

Apiananiri Itxaua Kristo

⁹ Kristo aua iïto, iuaritika Teosotxikana iua. Kristo aua ikinipoko Teoso posotiire, ikinipoko itiraõki, ikinipoko imarore, txaãpokata, kotxi Teoso itxaua. ¹⁰ Kristo aua hãkixinireë, ininiã ikinipoko aua hïtemoni. ! Auari apikomoni hinirekakiti, kotxi auïtetxiakori iaxiti auakani auïte itxaua. Apiananiri itxaua. Kaposotiireri iua atoko inakari !auari.

Kristo Kamakiti Hïte ïkapani

¹¹ Hãpakapapekari Teoso takaõtxikare kãkiti mataãkiniti. Hãkixinireë Teoso takari itakaõtxikare. Kristo makatxakasaakiri himaerekani hiïto nireëkiti, iuasaaki hãpakapari Teoso takaõtxikare. ¹² Hïpatxisatikosaaki, Kristokata ikatakoni atoko hïtxaua. Eereka hõkitikaãka Kristo õkitikiko atoko. Hïte õkitikaãkako, kotxi hïte auikari Teoso posotiire Kristo õkitikini ipïkasaaki.

¹³ Mitxi ipïkani atoko hïtxaua himaerekani xika. Xoteo minakaniua hïte, ininiã mitxi kona himarotari Teoso nireëkiti. Hïponaniãkasaaki, maerekati auape hïtemoni. Iuaritika Teoso txïkitakai auãki hinini Kristokata. Teoso makatxakari ikinipoko himaerekani. !Ixinikaikari himaerekani. ¹⁴ Iua oakari iõkatsopatakori amaerekani säpiretiko. Ikara iõkatsopatakori säpiretari amisiritiko amaerekani xika. Amitekini !auari. Amisiritiko auapitika. Iuaritika iua oakari ikara iõkatsopatakori. Imakatxakari ikara iõkatsopatakori. ïpiriãmitakari nopini Kristo tokakitikosaaki, ikara iõkatsopatakori tokakitaãka apaka iuaã, ininiã !itxaika. Iuasaaki amisiritiko !auaika. ¹⁵ Kristo ïpiriãmitakari nopini ipïkasaaki, iuasaaki imakatxakari ikinika Satanasi posotiire, iniritiakori posotiire pakini. Iua oerekari ikinimane !kaposotiirena ninoa. Iua õkitikasaakiua, oerekari ikinimane iuananira Apiananiri ininiua. Iuasaaki Kristo oerekari ikinimane ikãiatini.

¹⁶ Ininiã kona hãuiritapiri apanakini txitinii hinikakiti xika, hiãtakiti xika pakini. Kona hãuiritapiri apanakini txitinii kiiniri Teoso ïkapani hïkamini xika, kiiniri kasiri itopaïtakasaaki hïkamini xika, kiiniri tomatiko õti hïkamakiti xika pakini. ¹⁷ Kiiniri Teoso ïkapani ïkorasaaki sanõkatxi atoko itxa. Oerekaua atão inakari, txamari na iteene oerekaua. Iteene oerekaãka atemoni, Kristo aõkitakasaaki. ¹⁸ Erepaniko kãkiti ia atoko inakari: Ninoa iuikari

imiukakaniuana. Ninoa teosonetari Teoso nitiriakori matamatakoni. Ninoa sãpiretari kãkiti matamatakoni aõkitinina itaponeëna. Ixinikarina ninoaka nireëkitinoka. Ixinikarina kimarorerini ininiuana, ininiã iuikauana. Erepaniko kãkiti ikara atoko inakani. Hãuikiniãri ninoa sãkire, !auaika hãparĩka ìki. ¹⁹ Kãkiti ikara atoko inakani !inirekari Kristo iauũtena ininiua. Kotxi Kristo akii atoko itxa. Ate iua ìto atoko atxaua. Ikara atoko ininiã, isikataparataua. Aãpotiitaua. Asikataparatakakaua. Ætika ìtotxi atoko atxaua. Ikara atoko aniniã, aimaroãpotari isãkire. Aaneë, kãkiti ìto aneini atoko.

Apinini, Aãuini Pakini Kristokata

²⁰ Mitxi hinireëkiti itixi auakani nireëkiti atoko. Hãuikasaakiri Kristo sãkire, mitxi hinireëkiti !auaika. Ipĩpe. Txamari hãkamapanikari ìkorapokoriti auakani kamakiti atoko. Ninoa nireëkiti iaõka hãkamapanika. ²¹ Ninoa txari: “Kona pimaĩkapiri ikara. Kona pinikapiri ikara nipokori. Kona piouãtakapiri ikara.” Kinirepa hãkĩpitari ikara isãkirena? ²² Ninoa paniãtakiti xipokapitakako. Ikara atoko !itxa, kotxi ikara atoko inakari paniãtakori kãkitinoka paniãtakiti. Kãkiti oerekakiti sãkirexitinoka ikara. ²³ Kãkiti uãkatari ninoa paniãtakiti kimarorerini paniãtakiti atoko. Ninoa xinikakiti iaõka inirekarina Teoso. “!Erekanu,” itxana, txamari ãkixinireëna itxana “Peerekanu.” Ninoaka misiritaua iũtoãna. Ikamarina ikinika iũtona nireëkiti.

3

Atão Hãkamakiti Erekaru Hãuini Ìkapani

¹ Hãte õkitikaãka Kristokata hãuini amaneri inini ìkapani, ininiã hinirekariko hãkaminiri Teoso tixine auakani kamakiti iaõka. Iuaã Kristo topãkanãta Teoso kikomoni. Apiananiri itxaua Teoso kikomoni topãkakari. ² Hãxinikariko Teoso tixine. Kona hãxinikapiri ìkorapokoriti. ³ Ipĩkani atokopeka hãtxa, kotxi hãuini kitxakari !auaika, ininiã kona hãxinikaikari ìkorapokoriti auakari. Teoso sãkire mauiaãkani !imarotari hãuini amaneri Kristokata Teoso auiniãtaã. ⁴ Kristo txĩkitakari aãuini amaneri inini. Iua uai apokasaaki iuaĩkana atamataãka. Iuasaaki hãte apaka atamataãka iuakata. Iuasaaki hãtemoni auari Kristo iotximere atokokana. ⁵ Hãxipokariko hãito nireëkiti, kotxi ìkorapokoriti auakari nirekari ìtotxi nireëkitinoka. Hõkariko. Kipa aua aãkixinireë aõkini ìkapani? Auari anokaretxi. Auari aãto nireëkitinoka kamiko nirekiko. Auari ãti ìto nirekiko. Apaka auari ãti nakiti nirekiko aãkixinireë. Iteene anirekiniãri ãti nakiti, ateosone atoko itxaua anireëkiti. ⁶ Ikara maerekati xika, Teoso omanãkare apokapitakako Teoso paniãtakiti makĩpitakanimoni. ⁷ Mitxi hãte kamari maerekati ikara atoko inakari. Iuasaaki hãtotapekari ikara atoko inakari hãkamini. ⁸ Uatxa ia atoko inakari hãtakanapako: omanãkaretxi, ãti iteene txitiko, Teoso misãkireporetiko, maerekati sãkirexiti pakini. ⁹ Kona himisirienetakapeua, kotxi hãtakanapapekari maerekati mitxi hãkamakiti. Himãka kitxakari hõkini atoko, hãtakanapapekari ikara maerekati.

¹⁰ Uatxa hãkamakiti amaneri. Himãka amaneri hãretakini atoko, hãkamakiti uatxa amaneri. Teoso txĩkitakari hãkamakiti amaneri inini, ininiã himarotari atão inakari imaroretxi. Ininiã Teoso kamakiti atokokana hãkama, kotxi hãte kamakari itxaua. ¹¹ Uatxa kãkiti apiari !auari. Krekoakori, Xoteoakori, Teoso takaõtxikare auaãtotakini, Teoso takaõtxikare mauãtotakini, mimaroreni, kãkiti ìtopa auakani, nitiritxi amotakoni, kãkiti miamotakoni pakini !auari kãkiti apiari. Æti kãkiti ãti kãkititxikana, kotxi Kristonoka Apiananiri. Iua aua ikinimane isãkire auiãkani ãkixinireë.

¹² Ininiãkara hiamonĩkariko ãti. Hãkamariko erekari ãtimoni. !Hãuikapeua. Kaneenama !hãtxape. !Katimari homanãkarauatini. Ikara atoko hãuako, kotxi Teoso mereëkini, iua nakitiakori, itiretakini hãtxaua. ¹³ Himãteenekakakauako.

Himaxinĩkaretariko apanakini kamakiti, hĩte mapokaerekatakiniti. Kristo maxinĩkaretapekari maerekati hĩte kamakiti, ininiã iua atokotxikana himaxinĩkaretariko maerekati apanakini kamakiti hĩtemoni. ¹⁴ Ikara erekari hĩkamako. Erekari apiari hĩkamini, hĩtiraõkiuatini. Hĩtiraõkiuatako. Hĩtiraõkiuatakasaaki, ininiã iuasaaki ikinika hĩkamakiti atão.

¹⁵ Kristo kamaerekaxiniretai, ininiã erekari hãkixinire. Hãuiritariko ikara erekari kaikotini. !Hĩkamapiri ikara erekari makatxakiko ĩkapani. Hĩkinika ãtika ĩtotxi atoko hĩtxaua. Teoso akiritai hĩte hãkixinire ereka inini ĩkapani. Hĩtxariko Teoso ãtipirika: “Erekapitikari pikamakiti nota ĩkapani,” hĩtxako.

¹⁶ Hãuiritariko ikinika Kristo sãkire kaikotini hãkixinireẽ, ininiã iuasaaki himarore iteene aua. Hõerekakakaua. Hõtãkikakakaua. Hĩxikaretari xikari Teoso ĩkapani. Hĩxikaretariko xikari Teoso sãkire iõkatsopatakori xikariti. Hĩxikaretariko xikari kitxakari, amaneri pakini Teoso ĩkapani. Hĩxikarauatakasaaki, hãkixinireẽ hĩtxariko Teoso: “Erekapitikari pikamakiti nota ĩkapani.” ¹⁷ Ikinika hĩkamakiti hĩkamako Apiananiri Xesosi ĩkapani. Hĩsãkirauatakasaaki, hĩsãkirauata Apiananiri Xesosi ĩkapani. Iuasaaki hĩtxariko aĩri Teoso: “Erekapitikari pikamakiti nota ĩkapani,” hĩtxariko.

Kãkiti Aapoko Auakani Õtãkikiko

¹⁸ Hĩte ĩtanorotxi, hĩkĩpitariko hĩtaniri sãkire, kotxi Apiananiri nakiti hĩtxaua, ininiã ikara atão hĩkamini.

¹⁹ Hĩte ĩtaniritxi, hĩtiretaroko hĩtanoro. Kona hĩtxitapero oa. Kona homanatapero.

²⁰ Hĩte amarini, hĩkĩpitariko hĩri, hinoro pakini sãkire. Ikinika ninoa paniãtakiti hĩkamako, kotxi Teoso apokaerekatari ikara atoko inakari.

²¹ Hĩte irĩtxi, kona hĩkamaiaamanetapena hamariteakori, kotxi eereka maerekaxinireti aua ninoamoni, ininiã !inirekaikarina hĩte paniãtakiti ikaminina.

²² Hĩte nitiritxi, hĩpatrãote ĩkorapokoriti aua, ininiã hĩkamariko ikinika ninoa paniãtakiti. Apanakini iteene parĩkauata ipatrãote apisatoõ, iua apokaerekatiniri ĩkapani. Iua mauakanisaaki apaka iteene hĩparĩkauatako. Ikini hĩxinireritika hĩkamariko hĩparĩka. Ikara atoko ininiã, atão hĩpaxitari Teoso. ²³ Ikinika hĩkamakiti hĩkamako hĩtaparaxinireritika. Hĩparĩkauatakasaaki, parĩkatxi Apiananiri ĩkapani hĩkamini atokotxikana, hĩparĩkauata kãkiti ĩkapani.

²⁴ Hĩparĩkauatako ikara atoko, kotxi himarotari Apiananiri sikinii ipotetakitĩ iaxitikiri hĩparĩka ĩki. Itixine hãpokasaaki, hãpakapariko. Apiananiri Kristo nitiriakori hĩtxaua. ²⁵ Maerekati kamakari apakapariko imisiritiko. Teoso misiritari ãti maerekati kamakari, ãti maerekati kamakari imisiritini atokotxikana.

4

¹ Hĩte patrão, hĩkamariko atão inakari hinitiriakori ĩkapani. Kona himisirienetapena ninoa. Kotxi hĩte apaka aua hĩpatrãote Teoso tixineẽ.

Apikomoni Paoro Õtakikakiti

² Kona hĩtakanapapiri Teoso himisãkiretini. Araõkire hĩtxako maerekati mapokakani ĩkapani. ãtipirika hĩtxariko Teoso: “Erekapitikari ikinipoko pikamakiti nota ĩkapani,” hĩtxariko iua.

³ Apaka himisãkiretariko Teoso ate ĩkapani. Hamanaãriko Teoso, iua oerekiniua isãkire apanakinimoni asãpiretini ĩkapani, kotxi anirekari asãpiretiniri kãkiti Kristo pirena, mitxi kãkiti mimarotakiniti. Ikara nisãpiretini xika, kateia ãki naua.

⁴ Himisãkiretariko Teoso, Kristo pirena atão nisãpiretini ĩkapani, kãkiti atão imarotini ĩkapani.

⁵ Kimarorerini hĩtxauako Teoso sãkire mauĩãkani sauaki hãuakasaaki. Aãuini poião, ininiã ikiniõtika hinitari kãkiti Teoso sãkire hĩsãpiretini ĩkapani.

⁶ Teoso sikapekai ikinipoko erekari, ininiã hĩsãkirauatakasaaki, hõerekari kãkiti hĩsãkireẽ hĩtiretinina. Iõkira mauakaniã nipokoriã, !kaposeri. Iua atokotxikana erekari mauakaniã hĩsãkireẽ, kãkiti !inirekari ikenakotiniri hĩsãkire. Erekari hĩsãkire ininiã, himarotari hãpakapapiretiniri kãkiti.

Paoro Iokanapiretini Pirena

⁷ Txĩkiko inakori sãpiretaiko ikinika nota pirena. Aĩtari, atiretakiti itxaua. Iua parĩkauatapitipo Apiananiri ĩkapani. Apiananiri nitiri itxaua atekata.

⁸ Niokanatarari iua hĩtemoni, hĩte imaropiretini ĩkapani, hĩte isikataparaxiniretini ĩkapani. ⁹ Niokanatarari Onésimo inakori apaka iuakata. Koroso sitatxitikiri iua, hĩte atoko. Aĩtari atiretakiti itxaua apaka. Ātipirika atão iparĩkauata Kristo ĩkapani. Ninoa sãpiretaiko hĩte ikinipoko Kristo sãkire auĩãkani kamakiti uai.

¹⁰ Arisitako inakori, notakata kateia ãki auakari, xinikamanapitai hĩte. Panapee itaro ãkiri Marko, xinikamanapitai hĩte apaka. Nisãpiretapekai hĩte Marko pirena. Ininiã ereẽ iua apokasaaki, hĩpoxokoniritika hãpakapariko iua.

¹¹ Xosoe Xósito inakori xinikamanapitai hĩte apaka. Ninoa ipi ãti pakini Xoteoakori notakata parĩkauatakani itxauana. Ninoa parĩkauata notakata, Teoso auĩtetxi ininiua pirena asãpiretini ĩkapani. Isikataparaxiniretanona nota.

¹² Epápara inakori apaka xinikamanapitai hĩte. Ereẽkiri iua. Kristo nitiri itxaua. Ātipirika imisãkiretari Teoso hĩte ĩkapani, Teoso nireẽkitinoka hĩkamini ĩkapani, ikinika hĩkamakiti atãonoka hĩkamini ĩkapani. ¹³ Nota imarotari iteene iparĩkauatini hĩte ĩkapani. Apaka nimarotari iparĩkauata kãkiti Araotxiséia sitatxiti auakani ĩkapani. Apaka nimarotari iparĩkauata Ierapori sitatxiti auakani ĩkapani.

¹⁴ Aĩtari atiretakiti, amianari imarotakari Arókasi inakori apaka xinikamanapitai hĩte. Témasi inakori apaka xinikamanapitai hĩte. ¹⁵ Hĩsãpiretanako aĩtariakori Araotxiséia auakani nixinikinina ninoa. Hĩsãpiretaroko Nĩpa inakoro, Teoso mereẽkini oaãpoko apotiitakaniua pakini, nixinikinina ninoa.

¹⁶ Ia niokanatsopatakiti hãtatsopatako hĩkinika hĩkenakotini ĩkapani, eereka hĩpaniãtariko atatsopatariko Araotxiséia sitatxitiã, Kristo sãkire auĩãkani kenakotiniri ĩkapani. Apaka hĩte atatsopatariko Araotxiséia auakani iokanatsopatakiti. ¹⁷ Hĩtxariko Akipo inakori: “Pikamariko ikinipoko parĩkatxi Apiananiri paniãtakiti pikamini.” ¹⁸ Nota Paoro niõkatsopatarari ia niuakoã: Hĩxinikariko kateia ãki nauini. Teoso sikari ikinipoko erekari hĩtemoni. Ameẽ.

1 TESARÓNIKA

Merepanika Paoro Iokanatsopatakiti Tesarónika Auakanimoni

¹ Paoro, Síراسи, Tximótxio pakini iokanatsopata Teoso mereëkinimoni Tesarónika sitatxitiã. Aíri Teoso nakitiakori hĩtxaua. Apiananiri Xesosi Kristo nakitiakori hĩtxaua. Aíri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hĩte.

Paoro Misãkiretari Teoso Tesarónika Auakani Īkapani

² Amisãkiretari Teoso hĩte ĩkapani. Ātipirika atxari Teoso: “Peerekai pite, kotxi Tesarónika auakani auikari pisãkire,” atxari. ³ Aíri Teoso amisãkiretakasaaki, axinikapikari hĩte parĩka Teoso ĩkapani. Atão hĩparĩkauata, kotxi iteene hãuikari iua sãkire. Axinikari hĩparĩka Teoso ĩkapani, kotxi iteene hĩtiretari iua. Axinikari himarotiniri Apiananiri Xesosi Kristo sãkire iaõka hĩkamini. Hĩpoxokoniritika hiãtapari isãkire iaõka apokini.

⁴ Nitariakori, Teoso tiretapitikai hĩte. Iua mereëi hĩte iua nakitiakori hininiua ĩkapani. Aimarotari ikara. ⁵ Teoso iokanapirena erekari hĩtemoni asãpireta Teoso posotiireë. Ate sãkirenoka !kaposotiireri. Erekari Mata-matakoti oerekaí asãkire atão inini. Hĩte iteene imarotari asãkire atãonoka inini. Hãtamatarari aparĩka hĩte ĩkapani hĩte sauaki aãuakasaaki, ininiã himarotapitikaua ate. ⁶ Ininiã hĩte kamari ate kamakiti atokotxikana. Hĩkamari Apiananiri kamakiti atokotxikana. Himisiritiko aua, iuaritika hãuikari Xesosi sãkire. Himisiritiko aua, iuaritika Erekari Matamatakoti kamapoxokonitai. ⁷ Ininiãkara Masetónia tixini auakani, Akaia tixini auakani pakini nirekari hĩte atoko ininina. ⁸ Inirekarina hĩte atoko ininina, kotxi hĩte sãpiretari Apiananiri sãkire Masetónia auakanimoni, Akaia auakanimoni pakini. Apaka ikini itixiti iaripireta hĩte iteene auikiniri Teoso sãkire. Ininiã kona ate sãpiretari kãkiti iteene hãuikiniri Teoso sãkire, kotxi ikinimane imarotape. ⁹ Īkinimane sãpiretari hĩpoxokoniritika hãpakapiniua ate. Ninoa sãpiretari hĩte takanapiniri teoso kamakori. Isãpiretarina hĩparĩkauatini uatxa Teoso atão inakari ĩkapani, auãkipika inakari ĩkapani. ¹⁰ Ninoa sãpiretari, hĩte iãtapiniri Teoso ãkiri itixine auakari kanapiriini ĩkorapokoriti. Iua Xesosi. Ipĩkani sauaki Teoso õkitikakiti iua. Iua makatxakapekari amaerekani, ininiã amisiritiko ! auaika kãkiti misiritiko õti apokasaaki.

2

Paoro Parĩka Tesarónika Sitatxitiã (Átosi 17.1-9)

¹ Nitariakori, himarotari maxikatĩka kona ate sari hĩtemoni. ² Himarotari amisiritiko Piriposi sitatxiti aãuakasaaki, hĩtemoni aãpokini apisa. Iuaã auakani ãsokaua, kateia ãki taka itxauana. Iuaritika Teoso sikataparaxiniretaua asãpiretiniri Teoso iokanapirena erekari hĩtemoni. Itori kãkiti !nirekari asãkire, iuaritika ate sãpiretari Teoso iokanapirena erekari hĩtemoni. ³ Ate oerekakiti !akeroka. Teoso nireëkitinoka anireka akamini. Āti anireëkiti ! auari. !Anirekari amisirienetini hĩte.

⁴ Teoso auiritaua iua iokanapirena erekari asãpiretiniri kãkiti. Teoso auikari atão asãpiretiniri isãkire kãkitimoni, ininiã asãpiretari isãkire kãkitimoni. Asãkirauata, kona kãkiti akamapoxokonitini ĩkapanini. Anirekari akamapoxokonitini Teoso, kotxi iua ataerekatarari aãkixinire. ⁵ !Asãpiretai ereka hinini,

ate nireëkiti hīkamini īkapani. Asāpiretari Teoso sākire hītemoni, kona hīte nakiti anirekini īkapanini. Ikara himarotape. Teoso apaka imarotari ikara nisākire atāo inini. ⁶ Ate !anirekari kākiti iuikiniua ate. !Anirekai hīte iuikiniua ate. !Anirekari apanakini iuikiniua ate. Kristo iokanatakini-raua ate hītemoni, ininiā aposotari apaniātini ikinipoko anireëkiti hīsikiniua. Iuaritika !anirekari ikara atoko akamini. ⁷ Hīte sauaki aāuakasaaki iteene atiretai hīte. Sito tīretiniri oimi atokokana, ate tīretai hīte. ⁸ Iteene atiretai, ininiā anirekari asikini Teoso iokanapirena erekari. Kona iuananini anireka asikini hīte. Axinire, aīto pakini anireka asikini, kotxi ate tīretakini hītxapekaua. ⁹ Nitariakori, hīxinikari aparīka hīte sauaki. Pasāpaniri. Īkanōka, pokamara pakini aparīkauatapitipo, akiena, anireëkiti pakini aāpakapini īkapani, kotxi !anirekari aamanainii hīte aamonitakiti īkapani. !Anirekari hīte parīka apiatini ate īkapani, Teoso iokanapirena erekari asāpiretakasaakii.

¹⁰ Hīte Kristo sākire auiākani sauaki aāuakasaaki, hīte itikari aāuini ikiniōtika. Teoso apaka itikari. Himarotari Teoso nireëkitinoka akama iuasaaki. Himarotari erekarinoka akama iuasaaki. Himarotari !akamari maerekati iuasaaki. ¹¹ Hīri atoko atxaua iuasaaki, kotxi aōtākikai hīte. Amīkapiritai, imi iri mīkapiritini atokokana. Apaniātai atāo inakarinnoka hīkamini. ¹² Ikara atoko akaminii, kotxi Teoso anaakori hītxaua, ininiā anirekari hīte kaminiri hīri kamakiti iaōka. Iua akiritai hīte hīauīte inini īkapani. Inirekari hātamatini iua iotximere itixine hāuakasaaki. ¹³ Ininiā ātipirika amisākiretari Teoso: “Erekapitikai, kotxi Tesarónika auakani auikari pisākire, ninoamoni asāpiretakiti. Ninoa imarotari kona ate sākireni asāpiretana. Ninoa imarotari asāpiretana atāo pite sākire,” nitxari Teoso. Teoso sākire parīkauata hīte Xesosi sākire auiākani ākixinireē isākire hāuikini īkapani. ¹⁴ Xotéia tixini auakani, Kristo Xesosi nakitiakori, Teoso sākire auiākani, ninoa kamakiti atoko hīkamako hīte nitariakori. Xoteoakori misiritana ninoa. Iua atokotxikana hīte nirimane misiritapekai hīte. ¹⁵ Ninoa Xoteoakori okari Apiananiri Xesosi. Ninoa apaka okana ninoaka nirimane, Teoso sākire sāpiretakani. Ninoatxikana misiritapekaua ate. Teoso !apokaerekatari ninoa kamakiti. Ninoa omanatari kākiti. ¹⁶ Kotxi !auiritarina Xesosi sākire asāpiretini Xoteo minakaniua, imaerekanina makatxakiko īkapani. Uatxa ninoa maerekani xāpoka. Uatxa Teoso omanākare apokapeka ninoamoni.

Paoro Ipiātina Tesarónika Auakani

¹⁷ Ātiātaā ate auakasaaki, ātipirika axinikapikai. Aīto hītekata mauakanisaaki, aākixinire xinikapikai. Ate ipiātai. Iteene anirekari iuaīkana aōkitinii. ¹⁸ Anirekapitikamari hītemoni akanapiriini. Nota Paoro itokata nirekamari napokini hītemoni, txamari Satanasi !auiritaua asini hītemoni. ¹⁹ Aāuīte Xesosi āti ōti ikanapiriākasaaki, aāpotiitaua iua apisatoō. Iuasaaki aiātapakiti apokapeka. Kipa aiātapakiti? Hītera. Iuasaaki iteene apoxokoniuatako. Kinirepa apoxokoniuata? Kotxi hīte aua iuaā. Iuasaaki aāpakapari aparīka īki. Kinirepa aāpakapari aparīka īki? Kotxi hīte auikari Xesosi sākire ate sāpiretakiti. Ininiā peerekari iuasaaki. ²⁰ Atāopitikara nisākire. Ate iuikai hīte. Hīte kamapoxokonitaua ate.

3

¹ Iuasaaki !amīteenekari amimaropiretakani hīte, ininiā axinikari atenoka kaikota uai Atena sitatxitiā. ² Ininiā iuasaaki aiokanatari aītari Tximótxio hītemoni. Teoso nitiri itxaua. Imoianataua Kristo iokanapirena erekari asāpiretakasaakiri kākiti. Aiokanatari iua hītemoni, Xesosi sākire iteene hāuikini īkapani, isikataparaxiniretinii īkapani. ³ Ikara atoko ininiā, kona hīxinikari

Teoso sãkire hĩtakanapini, kãkiti misiritinii xika, kotxi himarotari amisiritiko apokapitikako. Teoso auiritari. ⁴ Hĩtekata aãuakasaaki, asãpiretapekai amisiritiko apokini. Uatxa himarotapitikari atão asãkire, kotxi uatxa apopeka asãkire iaõka. ⁵ Ininiã apikomoni !nimĩteenekaikari nimimaropiretakanii hĩte. Ininiã iusaaki niokanatarari Tximótxio hĩtemoni, Xesosi sãkire hãuikini nimarotini ĩkapani. Nipĩkari Satanasi sikanireõtini hĩte, Xesosi sãkire hãuikini hĩtakanapini. Nipĩkari maxikatĩka Xesosi sãkire asãpiretinii hĩte, hĩtekata aãuakasaaki.

Tximótxio Sãpiretakiti Ikanapiriãkasaaki

⁶ Uatxa Tximótxio kanapiripeka atemoni. Iua minapiretai hĩte. Erekarari isãpiretakiti. Iua txaua ate: “Tesarónika auakani iteene auikari Xesosi sãkire. Ninoa tiraõkiuatapika. Ipotxitarina ixinikiniina hĩte. Ipiãtaina hĩte, ninoa hĩpiãtini atokotxikana,” itxa Tximótxio atemoni. ⁷ Nitariakori, ate amaxikiko auapitika. Ate misiritiko auapitika, iuaritika hĩkamapoxokonitaua, kotxi iteene hãuikari Xesosi sãkire. ⁸ Uatxa peerekari ate auini, kotxi Apiananiri sãkire iaõka hĩkama. ⁹ Iteene apoxokoni uata Teoso apisatoõ, kotxi hãuikari iua sãkire. Axinikasaakii, apoxokoni iteene auapitika. Ininiã ãtipirika atxari aTeosone: “Peerekai pite, kotxi Tesarónika auakani iteene auikari pisãkire, ininiã ikamapoxokonitauana ate,” atxari. ¹⁰ ĩkanõka, pokamara pakini iteene aamanaãri Teoso hĩte iuaĩkana aaõkitini, kotxi anirekari apikomoni Teoso sãkire himimarotakinii aõerekinii.

¹¹ Anirekari aĩri Teoso, aãuĩte Xesosi Kristo pakini oerekiniãua aãpokini hĩtemoni. ¹² Anirekari Apiananiri txĩkitakinii himarotini hĩtiretakiniua. Anirekari hĩtiraõki aneini. Anirekari iteene hĩtiraõkiuatini. Anirekari ikini-manã apaka hĩtiretini, ate tiretinii hĩte atokotxikana. ¹³ Anirekari Apiananiri sikataparaxiniretinii hĩte. Ininiã Apiananiri Xesosi Kristo ikinika inakitiakorikata ĩkasaaki uai, iusaaki maerekati !auaika hĩtemoni aĩri Teoso apisatoõ. Iusaaki hĩte apoĩtakari !auari. Iusaaki erekai hĩte.

4

Akamakiti Teoso Apokaerekatakiti

¹ Nitariakori, apikomoni nisãpiretai. Asãpiretapekai hĩkamakiti tĩkane, hãuini Teoso apokaerekatini ĩkapani. Ikara atoko inakari hĩkamapitika uatxa. Erekarari hãuini uatxa, ininiã nõtãkikai Apiananiri Xesosi posotiĩreẽ, apikomoni iua apokaerekatakiti ikiniõtika hĩkamini ĩkapani. ² Himarotapitikari aõereẽkiti hĩkamini ĩkapani. Apiananiri Xesosi paniãtaua ikara aõerekinii hĩte.

³ Teoso nirekari himaerekani xipokaãpotini hãkixinireẽ. Ininiãkara hĩtaniri minakotikatika, hĩtanoro minakotokatika, !hĩsirĩkape. ⁴ !Hãuiritapiri hĩto nireẽkiti ikamini. Hĩto auĩte hĩtxauako, ininiã maerekati hĩto nireẽkiti !hĩkama. Atão hĩpaxitariko hĩteka ĩto, apanakini ĩto apaka. ⁵ !Apakata hĩxinikiniri ãtipirika maerekati hĩto nireẽkiti ãti ĩtokata hĩkamini. Xoteo minakaniua, Teoso mimarotakani, xinikari ikara atoko inakari. ⁶ !Apakata hĩtxĩkitakiniri ãti aĩtari maerekati ĩtotxi nireẽkiti ikamini, kotxi Apiananiri misiritariko kãkiti ikara atoko inakari maerekati ikaminiã. Asãpiretapekai ikara. Apinitapekai. ⁷ Teoso kona akiritaua iuamoni, maerekati aĩto nireẽkiti akamini ĩkapani. Akiritaua iua nakiti aniniua ĩkapani, erekarinoka akamini ĩkapani. ⁸ Ininiã ikara asãkire manirekakati, !omanataua ate. Omanatarari Teoso. !Inirekari Teoso sãkire, kotxi Teoso sikari Erekarari Matamatakoti kãkitimoni.

⁹ Hĩtariakori hĩtiretini pirena kona aiõkatsopata hĩtemoni, kotxi Teoso oerekapekai hĩtiretakiniua. ¹⁰ Nimarotari hĩtiretiniri ikinika hĩtariakori Masetónia tixini auakani. Iuaritika nitariakori, aõtãkikai apiata hĩtiretiniri

kākiti ikiniōtika. ¹¹ Hāpaiaōkariko hītsorīkaātini. Apanakini parīka ! himaākatape. Hīkamariko hīteka parīka hāuini īkapani. Ikara atoko asāpiretapekai hīte. ¹² Ikara atoko hīkaminiā, Xesosi sākire mauiākani paxitai. Ikara atoko hīkaminiā, !auari hiamonitakiti.

Apiananiri Kanapiriini

¹³ Nitariakori, anirekari himarotini atāo inakari ipīkani pirena. Kona anirekari himatinaniuatini Xesosi sākire mauiākani matinaniuatini atoko, kotxi ninoa ipīkasaaki, !imarotarina isinimonina. ¹⁴ Aāuikari Xesosi ipinini. Aāuikari iuaīkana ōkitikiniua. Ininiākara aāuikari ipīkani Teoso sākire auiākani apaka ōkitikiniua. Teoso minana ninoa Xesosikata ikanapiriākasaaki. ¹⁵ Iuasaaki ate auākipanika inakaniua Apiananiri kanapiriākasaaki, !asari ninoa mitxi ipīkani apisapanika. Mitxi ninoa sa. Iposo atoko ate sa Apiananirimoni. Apiananirira sāpiretapekaua ikara. ¹⁶ Iuasaaki Apiananiri potorika itixine. Iuaka katxaka uaimoni. Iuasaaki akiripoakata iua apokasaaki, ininiā kākiti kenakotariko Teoso nitiriakori auīte sākire. Teoso trōpetane xōkiko kenakotaāka. Iuasaaki mitxi ipīkani, Kristo sākire auiākani, merepanika ōkitikauako. ¹⁷ Eereka ate auapanika inakaniua anikaākako ipīkanikata Apiananiri aaōkitini īkapani. Aaōkitari iua itanoxiti katxiāriā. Ininiā eereka iuakata aāuapininiika. ¹⁸ Ikara sākiretxiti hīsāpiretakakauako, ininiā hīkamataparaxiniretakakauako.

5

Apiananiri Kanapiriini Ōti

¹ Nitariakori, kona asāpiretari Xesosi kanapiriini ōti. !Asāpiretari apokini kasiriti, ikanapiriinikanani pakini. ² Kotxi atāo himarotari, Apiananiri uai apokini, kiītiriri īkanōka apokini atokokana itxako. Ininiā kākiti !imarotari Apiananiri apokini ōti. ³ Iuasaaki kākiti sākire: “Neenamatchi !auari. Erekaua. Imonōkoni !auari,” inakasaaki, iuasaakipeka katimaritika Teoso xipokari ikinipoko. Katimari sito amarini tsiīkini atoko itxako. Oa sito tsii apokasaaki, omitekini !auari. Iua atokokana kākiti mitekini !auari iuasaaki Xesosi kanapiriākasaaki. ⁴ Nitariakori, kākiti ipiā auakani atoko !hītxaua. Himarotapitikiari āti ōti Apiananiri uai kanapiriini, ininiā hiātapari ikanapiriini ōti apokini, himatikokakani īkapani, kiītiriri tikokakiniri kākiti atoko himinakani īkapani ikanapiriākasaaki. ⁵ Hīte hīkinika kaiotximereri anaakori hītxaua. Pokamarari anaakori atoko hītxaua. !Akaikota ipiā. !Akaikota īkanōka, kotxi !anirekaikari maerekati akamini. ⁶ Ininiākara apanakini imakakani atoko !himapeko. Araōkire matxako, maerekati mapokakani īkapani. Aīto auīte matxaua. ⁷ Imakakani imaka īkanōka. Poātakani poāta īkanōka. !Iātapari Xesosi kanapiriini. Ikara atoko !hītxapeko.

⁸ Pokamarari anaakori atxaua, ininiā aīto auīte matxaua. Sotato takari itorota koana, itorota tokapare īkapani. Sotato torota koana atoko itxa Teoso sākire iteene hāuikini. Sotato torota koana atoko itxa apaka hītiraōki. Ininiā hāuikasaakiri Teoso sākire, hītiraōkiuatakasaaki, hākixinire tokapare auape. Sotato takari ikii tāta ikii tokapare īkapani. Sotato kii tāta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. ⁹ Teoso mereēua ate kona imisiritiniua īkapanini. Iua mereēua ate amaerekani aāuīte Xesosi Kristo makatxakini īkapani. ¹⁰ Iua ipina kākiti īkapani. Ipina iuakata aāuini īkapani. Ikanapiriākasaaki, isākire auiākani auākipanika inakani, ipīkani pakini aua iuakata. ¹¹ Ininiā hīsikataparaxiniretakakauako. Himoianatakakauako Teoso sākire iteene hāuikini īkapani. Uatxa ikara atoko inakari hīkamapeka.

Paoro Ōtākikare Mapotōkire

¹² Nitariakori, aōtākikai himarotinina hīte sauaki parīkauatakani, Api-ananiri sākire sāpiretakani, hīte ōtākikakani. ¹³ Ininiā iteene hīpaxitanako. Hītiretanako ninoa, kotxi ninoa iteene parīkauata hīte īkapani. !Hītixitakakapeua. !Hineenamauatape. ¹⁴ Nitariakori, iteene aōtākikai hīte ia atoko: Hīpinitariko kākiti paniātakiti makīpitakani. Hīsikataparaxiniretariko pīkarauatakani. Hīmoianatariko mataparani. Katima ! hītixapeko homanākarauatini kākiti kerokasaaki. ¹⁵ Kona hāuiritapiri misiritakori misiritiniri imisiritakiri. Ātipirika hīkamariko erekari hītariakorimoni, Xesosi sākire mauīākanimoni apaka.

¹⁶ Ātipirika hīpoxokoniatako. ¹⁷ Himisākiretapikariko Teoso. ¹⁸ Hīpoxokoniatakasaaki, hītixariko Teoso: “Erekari pikamakiti nota īkapani,” hītixako. Himatinaniuatakasaaki, iuaritika hītixariko Teoso: “Erekari pikamakiti nota īkapani,” hītixako. Ikara atoko Teoso nirekari ātipirika hīsāpiretiniri iua, kotxi Kristo Xesosi nakitiakori hītixaua. ¹⁹ !Hīotokakapiri Erekari Matamatakoti parīkauatini hākixinireē. Hīkamariko ipaniātakiti. ²⁰ ! Homanatapiri Teoso sākire kākiti sāpiretakiti. ²¹ Hātaerekatariko ikinika. Erekarinoka hīkamako. ²² ! Hīsipeko maerekati kamikoātaā, kotxi hīsiniā, apanakini xinikari atāo maerekati hinireka hīkamini.

²³ Anirekari Teoso, kākiti kamaerekaxiniretakari, iua iteene kamaerekatinii hīte iua nakitiakorinoka hininiua īkapani. Nimisākiretari Teoso hīte īkapani, hīxinire, hākixinire, hīto pakini ereka inini, ininiā aūiite Xesosi Kristo uai apokasaaki maerekati !auaika hītemoni, ininiā hīte apoītiko !auari. ²⁴ Hīte akiritakari kamari isākire iaōka.

²⁵ Nitariakori, himisākiretariko Teoso ate īkapani. ²⁶ Haōkitakakasaakiua, hītiraōkiritika hāpakapakakauako, kotxi hītariakori itxauana. ²⁷ Apiananiri posotiireē nipaniātai hātatsopatiniri ia niokanatsopatakiti ikinika ātariakori kenakotini īkapani. ²⁸ Aūiite Xesosi Kristo sikari ikinipoko erekari hītemoni. Ameē.

2 TESARÓNIKA

Paoro Iokanatsopatakiti Iuaĩkana Tesarónika Auakanimoni

¹ Paoro, Síراسи, Tximótxio pakini iokanatsopata Teoso mereēkinimoni Tesarónika sitatxitiã. Aĩri Teoso nakitiakori hĩtxaua. Apiananiri Xesosi Kristo nakitiakori hĩtxaua. ² Aĩri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hĩte.

Xesosi Kanapiriini Pirena

³ Nitariakori, ātipirika atxari Teoso: “Erekapitikari pikamakiti Tesarónika auakani ĩkapani,” atxa. Ikara atoko asāpiretari Teoso, kotxi ikiniōtika Teoso sākire hāuikini apiaāpota. Apaka hĩtiretakakiniua ikiniōtika apiaāpota. ⁴ Ininiã apanakini Teoso sākire auiākanikata aāuakasaaki, asāpiretana ninoa ate iuikinii hĩte. Ate iuikari himisiritiko himĩteenekini. Ate iuikari hāuikiniri Teoso sākire. Iteene himaxikiko, himisiritiko pakini, iuaritika himĩteenekari. Iteene hāuikari Teoso sākire.

⁵ Himisiritiko himĩteenekini oerekari Teoso misiritiniri maerekati kamakani, kotxi ikara atāo. Hĩte misiritaāka, kotxi hĩkamari hĩauĩte Teoso paniātakiti, ininiākara iuamoni apakatapitika hāuini Teoso auĩteti ininiātaāua. ⁶ Teoso kamari atāo inakaranoka. Ininiã imisiritariko hĩte misiritakani. ⁷ Ixipokariko hĩte misiritiko, ate misiritiko apaka. Iuasaaki hĩtomata atekata. Ikara atoko inakari ikama, Apiananiri Xesosi oerekikosaaki Teoso tixine ipotorikasaaki, initiriakori kaposotiirerinkata. ⁸ Xamina tirinakariã imisiritanako Teoso mimarotakani, aāuĩte Xesosi Kristo iokanapirena erekari makĩpitakani. ⁹ Ninoa misiritaākako ātipirika. Ikinipoko xipope ninoa ĩkapani. !Auritaākana Apiananiri auiniātaā apokinina. !Atamatarina iua iotximere. !Atamatarina iposotiire. ¹⁰ Ninoa misiritaāka, Apiananiri kanapiriini ōtisaaki. Iuasaaki inakitiakori, isākire auiākani, txariko: “Peerekai. Peerekai. Āti kaposotiireri pite atoko inakari !auari,” itxanako. Ikara atoko hĩte apaka sāpiretari iua iuasaaki, kotxi hĩte auikari asāpiretakiti hĩtemoni.

¹¹ Ininiã amisākiretapikari aTeosone hĩte ĩkapani. Ia atoko atxari iua: “Pite akiritari Tesarónika auakani pinakitiakori ininiuana ĩkapani, ininiã ninirekari pite apokaerekatiniri ninoa kamakiti pite ĩkapani. Pisikaposotiiretana ninoa ikinipoko inireēkitina erekari ikaminina ĩkapani. Ninoa auikari pisākire, ininiã iparĩkauatana pite ĩkapani. Ininiã pisikaposotiiretana ninoa ikara iparĩkana ikaminina ĩkapani.” ¹² Ikara atoko amisākiretari Teoso, kotxi apanakini atamatakasaakiri erekari hĩkamakiti, itxarinako aāuĩte Xesosi Kristo: “Peerekai pite,” itxanako, ininiã Xesosi uāka iuikaāka. Apaka Xesosi txaiko hĩte: “Peerekai hĩte,” itxaiko. Ikara atoko aua, kotxi aTeosone, Apiananiri Xesosi Kristo pakini sikari ikinipoko erekari hĩtemoni.

2

Apia Maerekati Apokini

¹ Nitariakori, maxinikari aāuĩte Xesosi Kristo kanapiriini. Maxinikari iuakata aāpotiitiniua. Ikara axinikasaaki, aōtākikai hĩte. ² Apanakini sāpiretai: “Apiananiri kanapiriini ōti apokapeka,” itxana. Maerekaxiniretika !hĩtxape. Ikara atoko inakasaakina, !hĩpĩkarauatape. Paxirari ninoa sākire. Atxiĩti ninoa txari: “Erekari Matamatakoti sāpiretano ikara.” Atxiĩti ninoa txari:

“Paoro sãpiretari ikara.” Atxiĩti ninoa txari: “Paoro iõkatsopatarari ikara.” Paxirari ninoa sãkire. Kona hãuikapiri ikara atoko inakari. ³ Kona xatiki hãuritapiri kãkiti misirienetini. Apiananiri kanapiriini apisapanika, kãkiti !inirekari Teoso sãkire ikĩpitini. Iuasaaki maerekati kamakari apiatakari apoka. Xipokatxi ãkiri akiritaãka. Iua xipokaãkapitikako. ⁴ Iua apia maerekati !inirekari Teoso paniãtakiti ikamini. Iuikauako. “Kãkiti teosonetakini posotiire poiãoka. Nota posotiire apiata,” itxako. Iuasaaki iitopãka Teoso misãkiretiko aikoti ãki. “Teosorano nota. Notanokara Teoso txaua. Æti Teoso !auari,” itxako iuasaaki. ⁵ Hĩtekata nauakasaaki, nisãpiretapekai ikara. Atxiĩti hĩte xinikapanikari nisãpiretakiti? ⁶ Uatxa kona apakatapanika iua apia maerekati apokini. Himarotari Teoso !auiritari iua apokini uatxa. Iketo õtinokara Teoso auiritari iua apokini. Iuasaaki iuaka oerekaua. ⁷ Maerekati kipatakorari posotiire auape uatxa, iuaritika maerekati mauiritakati !auiritapanikari iteene maerekati iarikini. Æti õti maerekati mauiritakati makatxakaãka. ⁸ Iuasaaki iua apia maerekati oerekaua kãkitimoni. Apiananiri kanapiriãkasaaki, okari iua. Ixõkare, isinanirenani xipokari iua. Iotximere xipokari iua apia maerekati. ⁹ Iua apia maerekati apokasaaki, Satanasi posotiire aua iuamoni. Ikamariko ikini sereti posotiiretxi kãkiti maposotakinini. Iua oerekari ikara, kãkiti imisirienetini ãkapani, isãkire kãkiti auikini ãkapani. ¹⁰ Ikini sereti maerekati ikama kãkiti pĩpinanaãkani imisirienetini ãkapani. Ninoa pĩpinanaãkani xipokapitikako, kotxi !inirekarina atão inakari itiretinina, ininiã imaerekanina makatxakiko !auari. ¹¹ Ininiã iuasaaki Teoso txĩkitakana auikinirina ninoa misirienetakani sãkire, ininiã auikarina atão minakati apiatakari. ¹² Ininiã atão inakari mauikakati misiritaãkako, kotxi iteene ipotxitari imaerekani.

Iteene Hãuikariko Teoso Sãkire

¹³ Nitariakori, Apiananiri tiretakini, ãtipirika erekari amisãkiretiniri Teoso hĩte ãkapani ia atoko: “Erekapitikai, kotxi pite mereẽna Tesarónika auakani imaerekanina pimakatxakini ãkapani.”

Itixi kamiko apisapanika, iua mereẽi hĩte. Imakatxakari himaerekani, kotxi Erekari Matamatakoti txĩkitakai Teoso nakitiakori hininiua. Imakatxakari himaerekani, kotxi hãuikari atão inakari. ¹⁴ Teoso iokanapirena erekari asãpiretakiti hĩtemoni hãuikasaaki, iuasaaki Teoso akiritai hĩte. Ininiã aãũte Xesosi Kristo iotximere hĩte apaka apakapako. ¹⁵ Ininiã nitariakori, iteene kataparaxinire hĩtxako. Itene hãuikariko Teoso sãkire asãpiretakiti, aiõkatsopatakiti pakini. !Hĩtakanapapiri.

¹⁶ Anirekari aãũte Xesosi Kristo, ãri Teoso pakini sikataparaxiniretinii hĩte. Ninoa iteene tiretaua. Ætipirika isikataparaxiniretaua. Isikaua erekari aiãtapini ãkapani. Aimarotari ikara erekari apokapitikako. Ikara atoko inakari ikama ate ãkapani, kotxi isikaua ikinipoko erekari. ¹⁷ Erekari hĩsãkiretakasaaki, erekari hĩkamakasaaki, anirekari isikataparaxiniretinii hĩte apikomoni erekari hĩkamini ãkapani.

3

Himisãkiretariko Teoso Ate ãkapani

¹ Nitariakori, nisãkire mapotõkire apoka. Himisãkiretariko Teoso ate ãkapani Apiananiri sãkire katima iaripiretini ãkapani. Himisãkiretariko Teoso Apiananiri sãkire auikiko ãkapani, hĩte auikiniri atokotxikana. ² Himisãkiretariko Teoso imakatxakiniua ate amapinakani ãkapani, maerekati kamakani sauaki aãuakasaaki, kotxi apanakini !auikari Teoso sãkire. ³ Apiananiri kamari ikinika isãkire iaõka. Iua sikataparaxiniretai hĩte. Itokapakeẽtai, ininiã

Satanasi !inokai. ⁴ Apiananiri txīkitakaua ate aimarotiniiri ate paniātakiti hīkamini. Ate imarotari, katana apaka hīkamapanikariko asākire iaōka. ⁵ Anirekari Apiananiri oerekinii Teoso tiraōki. Anirekari himīteenekiniri ikinika himisiritiko, Kristo imisiritiko imīteenekini atokokana.

Kākiti Paniātakiti Makīpitakani

⁶ Nitariakori, aāuīte Xesosi Kristo nireēkiti iaōka asāpiretai hīte, ininiā apaniātai ia atoko. Hītari kākiti paniātakiti makīpitakati, aōereēkiti iaōka imakamakaniā, ininiā iua moianari !hītxapeuako. Hītakanapariko iua. ⁷ Hīte imarotari akamakiti iaōka hīkamini, kotxi hītekata aāuakasaaki ate kīpitari kākiti paniātakiti. ⁸ Kona anikari nipokori amaīkitxitakiniti. Iuasaaki iteene aparīkauata. Īkanōka, pokamara pakini aparīkauata akiena aiamotini ĩkapani, kotxi !anirekari hīte kaamatini hīte kiena. ⁹ Apakatapitika kākiti ĩkitxitiniua aparīka ĩkapani, iuaritika !anirekari hīkitxitiniua, kotxi anirekari hīte parīkauatini ate parīkauatini atokokana. ¹⁰ Hītekata ate auakasaaki, ate paniātai hīte ia atoko: “Kākiti manirekakaniāri iparīkauatini, !inikapani.”

¹¹ Ate kenakopiretari hīte sauaki auari kākiti paniātakiti makīpitakani. !Iparīkauatana. Ātipirika ipotxitarina imarotiniirina āti kākiti kamakiti. ¹² Aāuīte Xesosi Kristo posotiireē, apaniātana kākiti ikara atoko inakani iparīkauatinina. Aōtākikana iparīkanoka ikaminina ikienana apokinina ĩkapani. !Himaākatapiri apanakini kamakiti. ¹³ Nitariakori, !hīsāpakape erekari hīkamini.

¹⁴ Kākiti ereē makamakaniāri ate oītākikakiti ia iōkatsopariā, erepaniko iua. Iua moianari !hītxapeuako. Hītakanapariko iua, ininiā iuasaaki atxiīti ipētauata. Iuasaaki atxiīti iuaīkana atāo ikama. ¹⁵ Imoianari !hītxapeuako, iuaritika himokaiakari !itxaua. Hīpinitariko iua, kotxi hītari itxaua.

Paoro Sākire Mapotōkire

¹⁶ Anirekari Apiananiri, kākiti kamaerekaxiniretakari, kamaerekaxiniretinii hīte ikiniōtika. Anirekari iua kaikotini hītekata.

¹⁷ Nota Paoro iōkatsopata nisākire mapotōkire niuakoā. Ia nitakaōtxikare, ininiā himarotari atāo ia nota iokanatsopatakiti. Ia atoko inakari niōkatsopata. ¹⁸ Aāuīte Xesosi Kristo sikari ikinipoko erekari hīte hīkinikamoni. Ameē.

1 TXIMÓTXIO

Merepanika Paoro Iokanatsopatakiti Tximótxiomoni

¹ Nota Paoro iokanatsopata pite Tximótxiomoni. Xesosi Kristo iokanapirena sãpiretakari nota. Teoso amaerekani makatxakakari itxaua. Aimarotari Xesosinoka anikaua Teoso tixinemoni. Apiananiri itxaua. Teoso, Xesosi Kristo pakini iokanatanano nota kãkitimoni, iokanapirena nisãpiretini ìkapani. ² Pite Tximótxio, nota ãkiri atoko pitxaua, kotxi merepitipanika pauikari Xesosi sãkire nota sãpiretakasaakii. Aãri Teoso, aãuïte Xesosi Kristo pakini sikai ikinipoko erekari. Iamonïkaina. Ikamaerekaxiniretaina pite.

Atão Minakati Oerekakani

³ Masetônia tixinimoni nisikasaaki, nipaniãtai pite Épeso sitatxiti pikaikotini. Uatxa iuaïkana nipaniãtai ereë Épeso pikaikotini. Ikara ninireka, kotxi apanakini ereë auakani oerekari Teoso sãkire kãkitimoni, txamari na atãoni ninoa oerekakiti. Ninirekai pite pinitinina ninoa atão minakati imoerekakanina ìkapani, ⁴ kotxi ninoa sãpiretapikari kitxakapirïkari pirena. Ninoa xinikapikari aãtokiriakorini uãka, ininiãkara kãkiti taparakienatakakaua iuãkana ixinikasaakina. Põtãkikanako ninoa ikara atoko inakari sãkiretxiti itakanapinina, kotxi ikara sãkiretxiti !oerekari kãkiti Teoso nireëkiti. Teoso sãkire aãuikiniã, aimarotari Teoso nireëkiti. ⁵ Nipaniãtai pite ikara atoko, kotxi ninirekari ereë Teoso sãkire auiãkani tiretakakiniua. Kãkiti ãkixinire maerekati mauakaniã, ininiã itiretakakaua. Kãkiti imarotakasaakiri ikamakiti ereka inini, itiretakakaua. Kãkiti ikara atoko inakari atão auikari Xesosi sãkire. ⁶ Kãkiti, Teoso sãkire atão masãpiretakani, takanapari ikara erekari kimaporiti. Pïpinanaãkani atoko itxauana, kotxi !imarotaikarina Teoso kimapore. Maxikatiïka isãkirauatapikana. ⁷ Ninoa kãkiti nirekamari Teoso paniãtakiti oerekakani ininiuana, txamari !imarotarina Teoso paniãtakiti. !Imarotarina isãpiretakitina, iuaritika ninoa: “Atãopitika asãkire,” itxanãtana.

⁸ Kãkiti atão sãpiretakasaakiri Teoso paniãtakiti iõkatakori, iuasaaki aimarotari ipaniãtakiti ereka inini. ⁹ Mauiritakoti aua, kona kãkiti atão inakari kamakani ìkapanini. Mauiritakoti aua, kotxi maerekati kamakani auapitika. Aua mauiritakoti manireëkani. Aua Teoso manireëkani. Aua maerekati kamakani. Aua erekari manireëkani. Aua Teoso paniãtakiti napetakani. Kãkiti aua iri okakani. Kãkiti aua inoro okakani. Aua kokanirini. Mauiritakoti aua, kãkiti ikara atoko inakari ìkapani. ¹⁰ Aua kãkiti ãti ìtanorokata sirïkakari. Aua kãkiti ãto tanirikata sirïkakaro. Aua kiki ãti kikikata sirïkakari. Aua sito ãto sitokata sirïkakaro. Aua kãkiti ãti kãkiti ìtiriãkani ivëtxitiniri ìkapani. Aua aãpirenaãri. Aua kãkiti ãti apoïtakani. Mauiritakoti aua ikara atoko inakari kãkiti ìkapani. Ninoa !auikari Teoso sãkire atão inakari. ¹¹ Ikara Teoso iokanapirena erekari sãpiretaua. Peerekari Teoso. Peerekari iua iokanapirena. Iua paniãtano nota iua iokanapirena nisãpiretini ikininapemoni.

Teoso Amonïkiniri Paoro

¹² Nitxari aãuïte Kristo Xesosi: “Erekari pite kaminano, kotxi pisikataparaxiniretano nota pite ìkapani niparïkauatini ìkapani. Erekari pauikiniri nisãkire. Erekari pimereinino nota pisãkire ikininapemoni nisãpiretini ìkapani,” nitxari Kristo Xesosi. ¹³ Meresaaki nota misãkirepiretari iua Xesosi. Nasikatikinitana iua sãkire auiãkani nokinina ìkapani. Kaneenamari nitxaua iuasaaki. Iuaritika Teoso amonïkano. !Imisiritano nota, kotxi iuasaaki !imarotari nikamakiti Xesosi sãkire nimauikakani xika. ¹⁴ Iuasaaki !erekano.

Maerekati nitxaua. Iuaritika aãuïte Kristo Xesosi sikari ikinipoko erekari notamoni. Kristo Xesosi nakiti nitxapekaua, ininiãkara nauikari isãkire. Iua nakiti nininiãua, nitiretari iua. Nitiretari apanakini apaka. Mitxi ! nimarotari nitiraõkiuatini. ¹⁵ Nisãpiretaiko ia sãkiretxiti atão inakari, pauikiniri ïkapani, ikinimane auikiniri ïkapani. Nitxai: “Kristo Xesosi apoka ïkorapokoriti maerekati kamakani maerekani imakatzakini ïkapani,” nitxa. Maerekati apiata kamakari nitxaua nota. ¹⁶ Maerekati apiata kamakari nitxaua, iuaritika Teoso !imisiritano. Iamonïkano, kotxi inirekari apanakini imarotiniri Kristo matima omanãkarauatakani kãkiti maerekani xika. Xesosi nirekari nota eereka auakani, isãkire auiaãkani imarotiniri Xesosi amonïkinina ninoa, kotxi iua amonïkano nota maerekati apiata kamakarino. Ninoa auikari isãkire, ininiãkara auapininiika Teosokata. ¹⁷ Nitxari Teoso: “Ari Teoso, peerekai. ãtipirika ikinimane auïte pitxaua. Pipinini !auari. Matamatakoti pitxaua. Pitenokara Teoso txaua. Pitenokara kimaroreri. Ikinimane paxitaiko ãtipirika. Ikinimane ãtipirika sãpiretaiko ereka pinini. Atãopitikara nisãkire. Ameẽ.”

Xesosi Sãkire Iteene Auikiko

¹⁸ Tximótxio, namarite atoko pitxaua. Nisãpiretai noerekakiti sãkiretxiti pikaminiri ïkapani. Pixinikariko akokaxiti Teoso sãkire sãpiretakani sãpiretakiti. Ninoa sãpiretai Teoso nirekakiti pite kamini tïkane. Nota sãkire uatxa ninoa sãkire atokotxikana. Ikara ninoa oerekakiti sãkiretxiti pikamapikako, ininiãkara pite sotato erekari atoko pitxaua Satanasi pinaiatini. ¹⁹ Pauikapikariko Xesosi sãkire. Ikara pikeeko atoko itxa. ! Pikamapiri pãkixinire mapokaerekatakiniti. Ikara apaka pikeeko atoko itxa. Apanakini kamapekari ãkixinirena mapokaerekatakiniti, ininiã eereka !auikaikarina Xesosi sãkire. Kanaua sakikini atoko itxa ninoa auikiniri Xesosi sãkire. ²⁰ Imeneo inakori, Arexãtri inakori apaka ikara atokokana itxana. Ninoa misãkirepiretari Teoso, ininiãkara nota sikanapana ninoa Satanasoni. Satanasi misiritakasaakina ninoa, atxiïti itakanaparina Teoso imisãkirepiretinina.

2

Teoso Misãkiretiko Ikinimane ïkapani

¹ Merepanika nõtãkikai pimisãkiretiniri Teoso ikininape kãkiti ïkapani. Pimisãkiretariko Teoso ninoa nireẽkiti ïkapani. Pamanaãriko Teoso sikiniri erekari ninoamoni. Pitxariko Teoso: “Peerekai pite, kotxi erekari pisikakiti kãkitimoni.” ² Teoso pimisãkiretako auïtetxiakori apiari ïkapani, auïtetxiakori poiãori ïkapani apaka. Pamanaãriko Teoso ninoa ïkapani, aãuini ereka inini ïkapani, neenamati mauakani ïkapani. Ikara atoko aniniã, akamari Teoso nireẽkiti erekarinoka. ³ Ikara akaminiã erekapitikari. Teoso, amaerekani makatzakakari, apokaerekatari asãkire ikara atoko inakari akamini. ⁴ Teoso nirekari imakatzakiniri ikinimane maerekani. Inirekari ikinimane imarotiniri atão inakari sãkiretxiti. ⁵ ãtinokara Teoso aua. ãti kikinokara mikanapiriãri kãkiti Teosomoni. Xesosi Kristonokara mikanapiriãri kãkiti Teosomoni, kotxi iuanoka misãkiretari Teoso kãkiti ïkapani. ⁶ Iua ipina ikinimane kãkiti ïkitxitini ïkapani. Teoso ketotini õti manapi Xesosi ipina. Xesosi ipinini oerekaua Teoso nirekiniri imakatzakiniri ikinimane maerekani. ⁷ Ininiãkara Teoso akiritano nota isãkire ikinimanemoni nisãpiretini ïkapani. Ininiã Teoso iokanatakiti kãkitimoni nitxaua nota. Ikara nisãkire atão. Kona paxirarini. Teoso akiritano Xoteo minakaniua noerekini ïkapani. Akiritano atão inakari sãkiretxiti noerekinina ïkapani. Akiritano noerekinina Teoso sãkire auikinina ïkapani.

⁸ Ininiã ninirekari kikiakori erekarinoka kamakani, ikini itixiti auakani, misãkiretiniri Teoso. Ninirekari Teoso imisãkiretakasaakina, iusaaki ninirekari isãkire auikinina apaka, ãti imomanatakanina.

Sitoakoro Xesosi Sãkire Auiãkani

⁹ Ninirekari sito mãka atão inini, kiki paxitiniro ãkapani. !Apakata oõukiniua omãka ereka inini xika. !Erekari sito ãtipirika oeretiniri oiãko kãkiti xikaueretiniro ãkapani. Oro, pãrora pakini otakiniã oiãko kãkiti xikaueretiniro ãkapani, !erekari. !Erekari mãkatxi kakaroneri oieretakini. ¹⁰ Sito Teoso nireẽkiti nireẽkaro kaminiãri erekari, erekapitikari. Mãkatxi peereri atoko itxa erekari okamakiti, kotxi kãkiti atamatari okamakiti. ¹¹ Teoso sãkire sãpiretakari oerekarauatakasaaki, erekari sito kenakotiniri. !Apakata iusaaki osãkirauatini. Erekari opaxitiniri iua, isãkire okãpitini ãkapani. ¹² Nota !auritaro sito oerekinina kikiakori, ikamakitina tãkane opaniãtinina. Erekari masãkiretoka onini. ¹³ Ikara atoko itxa, kotxi merepitipanika Teoso kamari kiki Adão inakori. Eerekaikara ikamaro sito Eva inakoro. ¹⁴ Kona Adãoni misirienetaãka. Sitora misirienetapeẽka. Oa kamari maerekati, kotxi !okamari Teoso paniãtakiti, ininiãkara !apakata sito paniãtiniri kiki ikamakiti tãkane. ¹⁵ Sito auikiniãri Teoso sãkire, otiretiniãri apanakini, maerekati omakamakaniã, omasarauatakaniã, Teoso makatxakari omaerekani, kotxi ãto sito eenetari Xesosi, amaerekani makatxaãkari.

3

Kõtãkikarerini Pirena

¹ Ia nisãkire atão. Kiki nirekiniãri kõtãkikarerini ininiua, Teoso sãkire auiãkani õtãkikini inirekiniã, iua nirekari parãkatxi erekari. ² Ia atoko kõtãkikarerini txauako: !Ikamari maerekati, ininiã iua apoõitiko !aui. ãtonanirako ãtanoro. Kiãkiteri itxauako. !Katimari omanãkarauatini. Ipaxitaãkako. Kãkiti ãtiãtaã ãkani apakapako aapoko. Imarotariko oerekarauatini. ³ !Ipoãtapeko. Kaneenamari !itxapeuako. Katiraõkiri itxauako. !Ipotxitapiriko neenamati. Txineiro iteene !ixinikaperoko. ⁴ Iua nãkatanako aapoko auakani, ninoa auini ereka ininina tãkane. Itxãkitakanako imiakori ipaniãtakiti ikãpitinina ãkapani, ininiã ninoa paxitari iua. ⁵ Ikara atoko itxako kõtãkikarerini, kotxi aapoko auakani imamimataniãkaretakaniã, ininiã !imarotari kãkiti Xesosi sãkire auiãkani inãkatini. ⁶ Kiki mapaõtinoka auikiniãri Xesosi sãkire, !apakata iua Xesosi sãkire auiãkani õtãkikakari ininiua. Xesosi sãkire auiãkani õtãkikakari ininiãua, iuikaua atxiãti. Iuikiniãua, Teoso misiritari iua, kitxakapirãka Satanasi iuikasaakiaua imisiritini atokokana. ⁷ Kiki Xesosi sãkire auiãkani õtãkikakari paxitaãkako, Xesosi sãkire mauiaãkani apaka paxitari iua. Ikara atoko ininiã, !ikamapaniri kãkiti kamapẽtatakari. Ininiã Satanasi !imaãkari iua itakapiremoni.

Kamiparãkarerini Pirena

⁸ ãtipekana, Xesosi sãkire auiãkani miparãkatakanipekana nisãpiretaiko: Iua kamariko erekari, ipaxitiko tãkane. ãtika isãkire itxauako. !Ipoãtapeko. !Apakata txineironoka ixinikini. ⁹ Kamiparãkarerini iteene auikariko Teoso sãkire atão inakari. ãkixinire imarotariko ikaminiri Teoso sãkire iaõka. ¹⁰ Xesosi sãkire auiãkani ataerekatariko kiki, kamiparãkarerini ininiua nireẽkari. Erekarinoka ikaminiã, ininiã iua auritaãka ninoa miparãkatakari ininiua. ¹¹ Iua atokokana kamiparãkarerini ãtanoro kamariko erekari opaxitiko ãkapani. Aãpirena !okamapeko. !Opoãtapeko. Okamariko okamaenetakiti iaõka. Ininiã kãkiti auikari osãkire. ¹² ãtonanirako kamiparãkarerini ãtanoro. Inãkatariko imiakori, kãkiti iua aapoko auakani apaka, ninoa auini ereka ininina

ĭkapani. ¹³ Kamiparĭkareri atāo parĭkauatiniā, iteene ipaxitaāka. Apanakini apokaerekatari iparĭka. Ininiā itaparaxinireritika isāpiretari Kristo Xesosi sākire auikiko kākitemoni.

¹⁴ Uatxa pitemoni niōkatsopatakasaaki, ninirekari paĭtiki nisini hĭtemoni. ¹⁵ Atxiĭti uai okanani nauapanika, ininiā ia iōkatsopari oerekaiko pite Teoso nakitiakori atāo auini ikiniōtika, kotxi Teoso aapoko atoko atxaua, iua auiniātaā ĭkapani. Teoso auāki itxapika. Kākiti iua nakitiakori nĭkatari iua sākire. !Auiritana apanakini koketiniri atāo minakati Teoso sākirekata. Isāpiretana ikinimane Teoso sākire atāo inakari. ¹⁶ Peerekari Teoso parĭka kākiti ĭkapani. Merepanika kākiti !imarotari, eereka Teoso oerekari iparĭka. Ia atoko Teoso kamināua ate:

Kākiti itxapekaua. Iua Xesosi. Erekari Matamatakoti oerekari kākiti Xesosi sākire atāo inini. Teoso nitiriakori iaxitikini atamatari iua. Isākire sāpiretaāka ikini itixiti auakanimoni. Kākiti auikari isākire. Eereka Xesosi anikaāka iaxiti Teoso tixinemoni. Ikara atoko inakari Teoso parĭka kākiti ĭkapani.

4

Atāo Minakati Oerekakani

¹ Iua Erekari Matamatakoti sāpiretaua, apanakini !auikaikari Xesosi sākire itixi mapotōkire ōti takote. Ikara atāo. Iuasaaki ninoa auikari maerekani matamatakoni misirienere. Auikarina Satanasi nitiriakori oerekakiti. ² Kākiti ikara atoko inakani sāpiretari atāo minakati. Ninoa sākire āti, txamari ninoa xinikakiti ipinimoni. Ninoa ākixinire sākire !auaika. !Isāpiretaikarina maerekati imakamakanina ĭkapani. Kapatakari arikakiti atoko itxa ninoa ākixinire sākire. ³ Kākiti ikara atoko inakani !auiritari kākiti ĭtanorouatini. “! Erekari kākiti ĭtanorouatini,” itxa ninoa sākire. Teoso kamari ikini nipokori kākiti nikini ĭkapani. Txamari ninoa kamisirienererini ! auiritari kākiti apanakini nipokori inikinina. Teoso nirekari Xesosi sākire auiaĭkani, atāo inakari imarotakani, nikiniri ikara nipokori Teoso imisākiretaka atoko: “Erekapitikai ia nipokori pisikiniāua.” ⁴ Ikinika Teoso kamakiti erekari. !Apakata kākiti manirekakaniāri apanakini nipokori. Ikinipoko nipokori hinikasaaki, himisākiretariko Teoso. Hĭtxariko: “Erekapitikai ia nipokori pisikiniāua.” ⁵ Teoso sākire sāpiretaua ikinipoko nipokori anikini. Nipokori anikasaaki, amisākiretiniāri Teoso, nipokori isikakiti ereka inini asāpiretiniāri, ininiā ikara nipokori erekari anikini.

Kristo Xesosi Nitiri Erekari Inakari

⁶ Aĭtariakori pōtākikiniā ikara atoko, Xesosi Kristo nitiri erekari pitxaua. Nipokori sikataparatarari kākiti ĭto. Teoso sākire aāuiākiti, oerekaretxi atāo inakari, nipokori atoko itxa, kotxi isikataparatarari axinire. Pite auikapikari oerekaretxi atāo inakari. ⁷ !Pimaākatapiri mĭĭkiteti sāpiretakiti, sākiretxi Teoso mapokaerekatakiniti. Ikiniōtika piteka poerekauako Teoso paniātakitinoka pikamini, ininiā Teoso nireēkitixikana pikama. ⁸ Piĭto parĭkauatakasaaki, piĭto tapara apiaāpota, ininiā erekari piparĭkauatini. Apiaerekata pixinire parĭkauatini pixinire auāki inini ĭkapani. Pixinire ĭkorasaaki auāki ininiā, pauapikako Teosokata ātipirika. ⁹ Ikara nisākire atāo. Erekari ikinimane auikiniri ikara. Erekari ikinimane kaminiri ikara. ¹⁰ Ininiākara iteene aparĭkauata Teoso ĭkapani. Pasāpaniri, iuaritika aparĭkauatapitipo, kotxi aāuikari Teoso sākire, Teoso mipĭkati sākire. Iua ikinimane kākiti maerekani makatxaākari itxaua. Iua makatxakari isākire auiaĭkani maerekani, maerekani misiritikoātaā imasikanina ĭkapani.

¹¹ Pipaniātariko kākiti noerekakiti sākiretxiti iaōka ikaminina. Poerekana noerekakiti.

¹² Pite ātokoripanika, iuaritika pimarotapitikari Teoso sākire, ininiā !pauir-itapiri kākiti napetiniri poerekakiti sākiretxiti. Atāo inakarinnoka pikamako Xesosi sākire auīākani atamatini īkapani, ininiākara ninoa auīkapitakariko pisākire, ininiā ninoa nirekari pite atoko ininina. Erekarinnoka pisāpiretako. Erekarinnoka pikamako. Kākiti pitiretako. Iteene pauikariko Teoso sākire. Maerekati !pikamapeko. Ikara atoko pininiā, ninoa nirekari pite atoko ininina. ¹³ Ereē nimapokakanisaakipanika, patatsopatariko Teoso sākire iōkatsopatakoru, apanakini kenakotiniri īkapani. Pisāpiretanako Teoso sākire. Teoso sākireē pōtākikanako. Poerekana Teoso sākire atāo imarotinina īkapani. Ikara atoko pītchapikanako, ereē napokini apisapanika. ¹⁴ Akokaxiti kōtākikarerini sāpiretai piparīka Teoso īkapani. Iuasaaki ninoa takari iuakona pite nopini, pite īkapani imisākiretakasaakirina Teoso. Ikara atoko ininiākara, pikamapikariko ikara piparīka Teoso īkapani. ¹⁵ Ātipirika pixinikariko ikara nōtākikinii. Ikiniōtika pikamariko piparīka Teoso īkapani. Ininiā apanakini imarotari Teoso sākire apiaāpota pauikini. ¹⁶ Erepaniko pikamakiti ereka inini īkapani. Erepaniko poerekakiti sākiretxiti Xesosi oerekakiti iaōka inini. Ikara ātipirika pikaminiā, piteka makatxakaua pimapinakanu īkapani. Apaka pimakatxakana pisākire auīākani imapinakanu īkapani.

5

Ōtākipirenatxi Pirena

¹ !Pitxitapiri kiki aneēkari. Pōtākikariko, piri pimisākiretini atokokana. Pōtākikariko kikiakori pite tikini auakani, pitariakori pimisākiretini atokokana. ² Pōtākikaroko sito aneēkaro pinoro pōtākikini atokokana. Pōtākikaroko ātokoro, pitaro pōtākikini atoko. Iuasaaki pipaxitaroko.

Sitoākini Tikinitakoni

³ Pinīkatanako sitoākini tikinitakoni onirimane matiretakini. ⁴ Tikinitakoro oimiakori auiniā, oītariakori anaakori auiniā, ninoa nīkatamaroko oa. Ikara ikaminiāna, erekari Teosomoni. Teoso poxokotana ninoa. Merepanika ninoa kaminiāri erekari ninoaka aapoko āki, aimarotari ninoa atāo auikiniri Teoso sākire, kotxi meresaaki irina, inorona pakini nīkatana ninoa. ⁵ Tikinitakoro minīkatakoto auikari Teoso inīkatiniro oa. Oa misākiretari iua pokamara, īkanōka pakini inīkatiniro īkapani. ⁶ Tikinitakoro osarauatininoka nireēkaro, ipīkaro atoko otxaua. ⁷ Pisāpiretanako ereē auakani, Xesosi sākire auīākani nīkatinina inorona, inorona itaro tikinitakoro pakini. Inīkatiniāna, !apoītaākana. ⁸ Xesosi sākire auīākani manīkatakaniāri inirimane, itakanaparina Teoso sākire auikinina. Apia maerekanita iua aapoko āki auakani imanīkatakaniā. Kākiti Teoso sākire mauīākati maerekati itxaua. Apia maerekati itxaua iua aapoko āki auakani manīkatakati.

⁹ Apanakini sito tikinitakoni moianatana Xesosi sākire auīākani. Pitakariko ninoa tikinitakoni uāka aātsopaā himoianatini īkapani. Sito ikara atoko inakaro sesēta ano apiko auakaro oa. Ātinoka oītanirini. ¹⁰ Oa imarotaāka, kotxi erekarinani okama. Atāo oōerekari oimiakori. Osikakienatana ātiātaā īkani. Oimarotaāka, kotxi oa arokakititari kākiti Teoso nakitiakori. Oimarotaāka, kotxi kākiti maerekaxinireni otireta. Oimarotaāka, kotxi ikini sereti erekari ātipirika okama. Tikinitakoro ikara atoko inakoro uāka aātsopaā pitaka himoianatini īkapani.

Tikinitakoni Ātokoropanika Inakani Ōtākikiko

¹¹ ! Pitakapiri tikinitakoro uāka iua aātsopaā, ātokoropanika inakaro, kotxi iuaīkana onirekari kikiata osirīkini, ininiā onirekari iuaīkana oītaniriuatini, ininiā !onirekaikari Kristo. ¹² Ikara atoko okaminiā, okamari

maerekati, kotxi mitxi osäkire: “Nikamariko parĩkatxi Teoso ĩkapaninani. !Nĩtaniriuataikako,” otxama. ¹³ Tikinitakoro ātokoropanika inakaro itotari oiarinauatini. Oianapokotapika. Apia maerekati okama, kotxi ototari aāpirena okamini. Onirekari ikinika apanakini kamakiti oimarotini, txamari ikara atoko !apakata. !Apakata āti kamakiti osāpiretini apanakinimoni. ¹⁴ Ikara atoko ininiā, !pitakapiri tikinitakoro ātokoro inakaro uāka iua aātsopaā. Nota ōtākikana ātokoroakoro tikinitakoni iuaĩkana taniriuatini. Erekarı keene ininina, aapokona iparĩkauatinina. Ikara atoko ininiā, Xesosi sākire mauĩākani kona misākirepiretana Xesosi sākire auĩākani. ¹⁵ Nota ikara atoko nisāpiretai, kotxi ātikaka tikinitakoni ātokoroakoro inakani takanapapekari Xesosi sākire auikinina, Satanasi paniātakiti ikaminina ĩkapani. ¹⁶ Xesosi sākire auĩākani inirimanena tikinitikoā, inĩkatanako ninoa. !Erekari imanĩkatakanirina inirimanena tikinitakoni. !Erekari inirekinirina apanakini Xesosi sākire auĩākani nĩkatinina inirimanena, kotxi ninoa nĩkatana kaiāopokori tikinitakoni manirimaneni. Pasāpaniri ninoa parĩka.

Kōtākikarerini Pirena

¹⁷ Kōtākikarerini atāo kaminiāri iparĩka Xesosi sākire auĩākani ĩkapani, erekari hĩsikinina iparĩkana ĩki apiata. Teoso sākire isāpiretiniāna apanakinimoni, Teoso sākire oerekiniāna, ininiākara erekapitikari apiata iparĩkana ĩki hĩkitxitinina. ¹⁸ Teoso sākire iōkatsopatakori txari:

!Hĩaxirikanamatapiri kema auĩte iparĩkauatakasaaki, triko ikatxaratakasaaki.

Pauiritariko inikiniri triko ĩki, iparĩkauanātakasaaki.

Teoso sākire iōkatsopatakori txari apaka:

Erekapitikari parĩkauatakari apakapiniri iparĩka ĩki.

¹⁹ Āti apoĩtiniāri kōtākikarerı, !pimaākatapiri isāpiretakiti. Ipi, atxiĩti ipi āti pakini kākiti atamatiniāri kōtākikarerı kamıniri maerekati, isāpiretiniāna pite, pikenakotapitikari ninoa sāpiretakiti. ²⁰ Pōtākikanako Xesosi sākire auĩākani maerekati kamakani apanakini Xesosi sākire auĩākani apisatoō, ininiākara apanakini pĩkari maerekati ikaminina.

²¹ Tximótxio, nota paniātai ikara noerekakiti iaōka pikamini. Teoso apisatoō, Apiananiri Xesosi Kristo apisatoō apaka, Teoso nitiriakori iaxitiki imereēkini apisatoō apaka, nipaniātai ikara noerekakiti iaōka pikamini. Ninoa kenakotari nisākire pitemoni. Ātinokarako pisākire txauako ikininape kākitimoni. Erekarı pikamako ikininape kākitimoni, kākiti pipotxitakinimoni, kākiti pimapotxitakinimoni apaka. ²² Atxiĩti aua Teoso sākire auĩākari iteene pimimarotakiniti. Ininiā !pimereēpiri iua Xesosi sākire auĩākani ōtākiākari ininiua. Atxiĩti ikamapanikari maerekati. Pimereiniāri iua, pite moianatari iua maerekati ikamini. Erepaniko maerekati pimakamakani ĩkapani.

²³ Pite itokata amianata. Pitsii iriko, ininiākara kona āparaānanini piāta. Ovaā poiāoka apaka piātako pipini ĩkapani.

²⁴ Apanakini !ikipatari maerekati ikamakiti, ininiā ikinimane imarotari. Apanakinipekana maerekati ikamakitina !atamataāka ikamakasaakina. Ninoa kipatari. Okananixiti atokoikara imarotaāka ninoa maerekani. ²⁵ Iua atokokana erekari apanakini kamakiti atamataāka. Erekarı apanakini kamakiti !atamataāka ikamakasaaki. Iuaritika okananixiti atokoikara imarotaāka.

6

Nitiritxi Amotakoni Pirena

¹ Nitiritxi amotakoni, Xesosi sākire auĩākani, iteenerako iparĩkauatana ipatrāotena ĩkapani. Ninoa paxitanako ipatrāotena. Ikara atoko ininiāna, Teoso

uāka !imisākirepiretaāka. Iua sākire ate oerekakiti apaka !imisākirepiretaāka iuasaaki. ² Nitiritxi patrāote Xesosi sākire auiākari ininiāua, initiri paxitariko iua, kotxi itari apaka itxaua iua. !Apakata poiāonoka ipaxitiniri ipatrāote, itari ininiua xika. Erekari iteene iparīkauatini ipatrāote ĩkapani, kotxi ipatrāote auikari Xesosi sākire. Teoso tirketakiti ipatrāote. Tximótxio, ikara noerekakiti sākiretxiti poerekariko apanakinimoni. Pōtākikanako ikara iaōka ikaminina.

Txineiro Potxitakani Pirena

³ Aua kākiti atāo minakati oereēkani. Ninoa !auikari aāuīte Xesosi Kristo sākire atāo inakari. !Auikarina atāo inakari oerekakori, Teoso sākire. ⁴ Kākiti ikara atoko inakari iuikaua, txamari !kimaroreri. Ipotxitari isākirauatini apanakinikata itaparakientakakiniuana ĩkapani. Ininiākara xikoretxi aua, neenamatchi aua, misākirepiretakatchi aua. Ininiā kākiti !auikari āti sākire. Iuākatari āti kaminiri maerekati. ⁵ Ninoa txitakakapikaua, kotxi ixinikakitina maerekatina. !Imarotaikarina Teoso sākire atāo inakari mitxi imarotakitina. Ninoa oerekari Teoso sākire kākitemoni txineiro ito apakapinina ĩkapani. Txamari na atāo ninoa oerekakiti sākiretxiti. !Pimaākatapiri kākiti ikara atoko inakari.

⁶ Teoso nireēkitinoka pinirekiniā, ikinipoko pinireēkiti auape, ininiā pākixinire poxokoniuata. Kipa apikomoni pinireka? !Auari. ⁷ Kiripa ate mina uai itixi aponaniākasaaki? !Kaminareua. Kiripa aanika atekata apīkasaaki? !Kanikareua. ⁸ Kamāka aniniā, kanipokore aniniā, apakatape. ⁹ Satanasi oerekari kākiti maerekati ikamini txineiro apakapini ĩkapani. Ininiā tiitxi nireēkari mokatanitika kamari Satanasi oereēkiti. !Erekari tiitxi nireēkari nireēkiti. !Kiūkiteri iua. Inireēkiti txikatoro atoko, kotxi imaīkari iua. Eereka !auaika itii, itxineirote, ipoxokonī pakini xipope. Inireēkiti xika Teoso iokanataru iua kākiti misiritikomoni. ¹⁰ Kākiti iteene potxitiniāri txineiro, ikamari maerekati. Takari aneē, kotxi ikotsa aua. Iua atokokana maerekati aua ikotsa. Txineiro potxitiko maerekati kotsa itxaua. Txineiro potxitiko auiniā, ikini sereti maerekati aneē. Apanakini txineiro potxitakani takanapaāpotari Teoso sākire, ininiākara txineiro potxitakari iuaka karotapekaua ākixinireē. Iuaka maerekaxinireti itxīkitakaua.

Paoro Ōtākikiniri Tximótxio

¹¹ Pitepekana Tximótxio, Teoso paniātakiti kamakari pitxaua, ininiākara ikara maerekati xatiki !pikamape. Atāo inakarinanirako ikiniōtika pikamako. Teoso nireēkitinoka pikamako. Itene pauikariko Teoso sākire. Katiraōkiri pitxauako. Pimisiritiko auakasaaki, pimīteenekariko. Teoso nireēkitinoka pinirekako. Kona pinirekapiri piteka nireēkiti. ¹² Pineenamauatako Teoso ĩkapani. Ikara neenamatchi erekari, Satanasi piokanatinu, kākiti Teoso sākire auikini ĩkapani. Papakapariko Teoso sikakiti, kotxi iua akiritai iuakata pauapininiika pinini ĩkapani. Kaiāopokori kākiti imarotari Xesosi sākire iteene pauikini, kotxi ikenakotapekari pisāpiretinina. Peerekari pisākire ninoamoni. ¹³ Tximótxio, nimisākiretai pite Teoso apisatoō, Kristo Xesosi apisatoō apaka. Ninoakara kenakotari nisākire uatxa. Teoso ikinimane auāki inini txīkitakakari iua. Kristo Xesosi Homano auīte Pōsio Pirato inakori apisatoō auakasaaki, isāpiretari atāo Teoso sākire. ¹⁴ Nipaniātai ikara noerekakiti sākiretxiti iaōka pikamini. !Pimamakapiri ikara noerekakiti. Ikara noerekakiti iaōka pikaminiritika aāuīte Xesosi Kristo kanapiriāko. ¹⁵ Teoso ketotari Xesosi kanapiriini ōti. Iuasaaki Teoso akiritari Xesosi ĩkorapokoriti ikanapiriini ĩkapani. Iuanokara kaposotiireri. Peerekari iua. Auītetxiakori auīte itxaua. Apiarini sauaki iuanokara Apiananiri txaua. ¹⁶ Iuanoka !ipina. Iuanokara ikinipoko auāki inini txīkitakakari. Iua auiniātaā iotximere auapika, ininiākara kākiti !iposota imatokotiniri Teoso.

!Katamatikori. Kākiti !iposotari atamatiniri iua. Iuanokara kaposotiireri ātipirika. Ātipirika maākiritari: “Peerekari Teoso.” Ameē.

Xesosi Sākire Auiākani Katxineiroterini

¹⁷ Pipaniātanako kākiti katxineiroterini: “Katii hininiā, !hūikaueuako. !Hīpoxokotapero hītxineirote, kotxi āti ōti atxiīti hītxineirote !auaika. Hīpoxokotariko Teoso, ātipirika auākiri, kotxi iuara sikaua ikinipoko apotxitakiti. Kaiāopokori isikaua. ¹⁸ Erekarī hīkamako. Hītxineirote kaiāopokoro auini atokokana, erekari kaiāopokori hīkaminanako apanakini. Kaiāopokori hīti auiniā, hīsika kākiti kaamonirimoni. Himarotakasaakiri, matxineiroteni amonitakiti hīsikanako ninoa. ¹⁹ Ikara atoko hininiā, hāpotiāpotari erekari Teoso tixinekiri. Iuaā apotiitakori lixipoka. Ipinaākana atoko, auinapanikana. Ikara atoko hīkaminiā, hāpakapari Teoso sikakiti. Iua txīkitakai hāuapininiika hinini Teosokata.”

Ikara pisāpiretako katxineirotenimoni.

Paoro Iōkatsopare Mapotōkire

²⁰ Ari, Tximótxio, atāo pikamariko parīkatxi Teoso sikakiti pitemoni pikamini īkapani. !Pimaākatapiri sākiretxi Teoso mapokaerekatakiniti. !Pimaākatapiri kākiti, “Kimaroreno nota,” inakari, kotxi !imarotari imaroretxi atāo inakari. ²¹ Ninoa sākire: “Imaroretxi auapitika notamoni,” itxa. Txamari na xatiki imarotari Teoso imarore. Ikara xika ninoa takanapaāpotari Teoso sākire auikinina.

Teoso sikai ikinipoko erekari. Ameē.

2 TXIMÓTXIO

Paoro Iokanatsopatakiti Iuaĩkana Tximótxiomoni

¹ Tximótxio, nota Paoro iokanatsopata pitemoni. Teoso mereẽno nota, Kristo Xesosi iokanatinino ĩkapani, isãkire nisãpiretini ĩkapani. Kãkiti Kristo Xesosi nakiti ininiãua, Teoso txĩkitakari ixinire auãki inini, kotxi Teoso kamaenetapekari ikara ikamini.

² Pite Tximótxio namarite nitiretakiti atoko pitxaua. Aĩri Teoso, aãũte Kristo Xesosi pakini sikai ikinipoko erekari. Iamonĩkaina. Ikamaerekaxiniretaina.

Paoro Ōtãkikiniri Tximótxio

³ Nota parĩkauata Teoso ĩkapani. Ninirimane kitxakapirĩkarini parĩkauatini atokokana niparĩkauata. Nãkixinireẽ nimarotari maerekati nimakamakani, Teoso ĩkapani niparĩkauatakasaaki. Nota txari Teoso: “Erekapitikari pikamakiti Tximótxio ĩkapani,” nitxa. Nimisãkiretapikari Teoso pite ĩkapani, ĩkanõka, pokamara, ĩkanõka, pokamara nitxapika. ⁴ Nipiãtai. Nixinikari pite txiapatini nitakanapakasaakii, ininiã ninirekari naõkitinii iuaĩkana nipoxokoniuatini ĩkapani. ⁵ Nixinikari pite atão auikiniri Teoso sãkire. Merepanika pakiro Aróitxi inakoro, pinoro Eonisi inakoro pakini atão auikari Teoso sãkire. Nimarotapitikari pite apaka auikiniri Teoso sãkire ninoa auikiniri atokotxikana. ⁶ Ininiãkara nõtãkikai. Akoka niuako nitakasaakiri pikiiã, Teoso sikai parĩkatxi iua ĩkapani pikamini. Iuasaaki isikaposotiiretai ikara parĩkatxi pikamini ĩkapani. Iteene pikamariko ikara parĩkatxi iua ĩkapani. ⁷ Teoso sikapekaua Erekari Matamatakoti, ininiã !kapĩkareua. Iua Erekari Matamatakoti sikataparatarari aãkixinire. Iua oerekaua atiraõkiuatini. Oerekaua maerekati aĩto nireẽkiti amanirekakani.

⁸ Ininiã !pipẽtatapiri aãũte sãkire pisãpiretini. Apaka !pipẽtatapeno nota, kotxi kateia ãki naua Xesosi sãkire nisãpiretini xika. Maãtatsiirauata, Teoso iokanapirena erekari asãpiretini xika, kotxi Teoso sikataparataua amisiritiko amĩteenekini ĩkapani. ⁹ Teoso makatxakapekari amaerekani. Iua akiritapekaua inakitiakori aniniua ĩkapani. Aparĩka kona txĩkitakari Teoso makatxakiniri amaerekani. Imakatxakari amaerekani, kotxi inirekari ikara atoko ikamini. Imakatxakari amaerekani, kotxi inirekari ikinipoko erekari isikiniua. Itixi kamiko apisapanika Kristo Xesosi sikari ikara erekari atemoni. Iuasaaki imakatxakari amaerekani. Iuasaaki akiritaua inakitiakori aniniua ĩkapani. ¹⁰ Uatxa Teoso oerekari ikara erekari kãkitimoni, kotxi amaerekani makatxakakari Xesosi Kristo apokapeka ĩkorapokoriti. Iua xipokapekari ipĩkitxi. Isãpiretari Teoso iokanapirena erekari, kãkiti mapinakanani ĩkapani, Teosokata ãtipirika auini ĩkapani.

¹¹ Teoso mereẽno nota ikara iokanapirenatxi sãpiretakari nininiua tĩkane. Imereẽno iua iokanatakiti kãkitimoni nininiua. Imereẽno Xoteo minakanuia oereẽkari nininiua. ¹² Teoso iokanapirena erekari nisãpiretini xika, natatsiirauata. Iuaritika !nipẽtauata, kotxi nimarotari Xesosi. Iteene nauikari iua sãkire. Nimarotapitikari iua nĩkatinino nota. Inĩkatiniritikano ikanapiriãko. ¹³ Teoso sãkire pitemoni noerekakiti iaõka poerekako apanakini, kotxi noerekakiti atão. Pauikapikariko Kristo Xesosi sãkire. Katiraõki pitxako, kotxi Xesosi nakiti atxaua. ¹⁴ Pimarotari Teoso iokanapirena erekari. !Pauiritapiri ikoketiko. Teoso sikari ikara iokanapirena pitemoni, apanakini pisãpiretini ĩkapani. Erekari Matamatakoti auaĩtotaua. Iua posotiireẽ pinĩkatariko Teoso iokanapirena pitemoni isikakiti.

¹⁵ Pimarotari kākiti Xesosi sākire auiākani Ásia tixine auakani takanapano nota. Aĩtariakori Pixero inakori, Emoxeni inakori pakini takanapano nota. ¹⁶ Onesíporo inakori !itakanapano. Ninirekari Teoso tiritinina iua aapoko auakani. Itokata ikamapoxokonitano nota. !Ipētatanó kateia āki nauakasaaki. ¹⁷ Homa sitatxiti apokasaaki, initaāpotano nota, eereka apokano. ¹⁸ Pite imarotari iua iteene moianatinino nota, Épeso sitatxiti nauakasaaki. Ininiā nitxari Apiananiri: “Ninirekari piamonĩkiniri Onesíporo itixi xipokini ōti manapisaaki.”

2

Misirikaretxi Mĩteenekiko

¹ Pitepekana namarite Tximótxio, kataparaxinire pitxako. Kristo Xesosi nakitiakori atxaua, ininiā iua sikari ikinipoko erekari atemoni. Ikara erekari sikataparatarari axinire. ² Pite kenakotapekari nisākire noerekakiti kãkitimoni. Ininiā poerekariko ikara iaōka apanakinimoni atão inakari kamakanimoni. Eereka ninoa posotari oerekiniri nisākire noerekakiti apanakinimoni apaka.

³ Sotato erekari mĩteenekari imisiritiko. Kristo Xesosi sotatone atoko atxaua, ininiā pimĩteenekariko pimisiritiko sotato erekari mĩteenekiniri atoko. ⁴ Sotato parĩkauatakasaaki, !ixinikaikari iparĩka mitxi ikamakiti sotato iminakanisaaki. Ixinikapikari sotato auĩte nireēkiti ikamini, iauĩte poxokotiniri ĩkapani. Ikaranokara ixinikanãta.

⁵ Ātipekana nisãpiretai. Miteēkari mitekaxi mapotōkire merepanika apoākari apakapari imitekini ĩki. Mitekaxi paniãtakari paniãtini iaōka imitekiniã, apakapari imitekini ĩki.

⁶ Ātipekana nisãpiretai. Katarareri poparĩkari nikari itakare merepanika, kotxi iteene iparĩkauata. ⁷ Pixinikariko ikara nisākire. Apiananiri kamaimaroretai ĩkara.

⁸ Pixinikariko Teoso iokanapirena erekari nisãpiretakiti kãkitimoni. Xesosi Kristo nisãpireta ikinimanemoni. Iua ipinaka atoko, iuaĩkana auãki itxĩkitakaãka. Iua Taviini apika mekaniri. ⁹ Natatsiirauata Teoso iokanapirena erekari nisãpiretini xika. Nota omanatakani iaxirikapekano kohētxiã, kokaniri iaxirikinina atoko, nota masikani ĩkapani. Teoso sākire !iaxiriãka. Iaripireta ikini tōpati. ¹⁰ Teoso mereēpekari kãkiti, imaerekani imaktxakini ĩkapani. Ininiā nota mĩteenekari nimisiritiko Teoso iokanapirena ninoa kenakotini ĩkapani, imaerekanina Kristo Xesosi maktxakini ĩkapani, ātipirika Teosokata auinina ĩkapani. Iuasaaki peerekari.

¹¹ Nisãpiretaiko ia sãkiretxi atão inakari:

Xesosi Kristo ipina ate ĩkapani, ininiā amanirekakaniãri mitxi anireēkiti, Xesosi nireēkitinoka anirekiniã, ininiã aãuapika iuakata ātipirika.

¹² Amĩteenekiniãri amisiritiko Xesosi sākire aãuikini xika, auĩtetxi atxauako iuakata. Akipatiniãri iua aimarotini, iua apaka kipatarari ate imarotini.

¹³ Atxiĩti !akamari akamaenetakiti. Xesosi kamapitikari iua kamaenetakiti, kotxi iua !iposotari maerekati ikamini.

Teoso Nitiri Atão Inakari

¹⁴ Ikara nisākire pikamaxinikaretana Xesosi sākire auiākani. Ninoa Apiananiri apisatoō apotiitakasaakiua, pōtãkikanako: “!Hĩtxitakapeua maxikatiĩka kãkiti sākire xika, kotxi !erekari,” pitxako ninoamoni. Kãkiti kenakotiniãri hĩtxitakakiniua, ininiã !inirekaikarina Xesosi sākire auikinina.

¹⁵ Tximótxio, pite Teoso nitiri pitxaua, ininiā iteene papaiaōkariko isākire iōkatsopatakori Teoso apokaerekatini ĩkapani. Ininiā !pipētauata, kotxi atão poerekari Teoso sākire iōkatsopatakori apanakinimoni. Teoso

säkire iökatsopatakori atão inakarínoka itxa. ¹⁶ Apanakini sãkirauatakasaaki, isãkiretarina sãkiretxi Teoso mapokaerekatakiniti. Ikara atoko !pisãkiretape. Kãkiti ikara atoko inakani takanapaãpotari Teoso. ¹⁷ Ninoa oerekakiti sãkiretxiti karõtxi arakakari atoko itxa. Ikara atoko inakari amianari iarikaãpota. Ikara amianari iarikini atoko, ninoa oerekakiti iarikaãpota. Itxĩkitakari kãkiti maerekati ikamini. Imeneo inakori, Pireto inakori pakini oerekakiti sãkiretxiti ikara atoko itxa. ¹⁸ Ninoa takanapapekari Teoso sãkire atão inakari. Ninoa sãkire: “Teoso õkitikapekana Xesosi sãkire auiaãkani ixinirena auãki inini ìkapani. !Õkitikapanina iĩtona itixi xipokini õti,” itxana. Ikara ninoa sãkire xika, apanakini !auikaikari Xesosi sãkire.

¹⁹ Aapokotxi tsota paikori inakasaaki, itsota iriko paĩtanori inakasaaki, iua aapokotxi !irika. Teoso sãkire ikara aãtsota atoko. Auapika. !Ixipoka. Teoso sãkire txari: “Apiananiri imarotari inakitiakori.” Apaka Teoso sãkire txari: “Kãkiti, ‘Nota Kristo nakiti’ inakari takanapariko imaerekani.”

²⁰ Ikini sereti tiitxi aua aapokotxi mitari ãki. Aua apiata karonetakari oro kamakori, pirata kamakori pakini. Apaka aua poião ìki aamina kamakori, kipatxi kamakori pakini. Apanakini tiitxi ãki kaapokori takari nipokori kiiniri ìkapani. Apanakini tiitxi ãki itakari nipokori ikiniõtika kãkiti nikini ìkapani. ²¹ Ikara tiitxi atoko itxa kãkiti. Kãkiti takanapiniãri imaerekani, tiitxi apiata karonetakari atoko itxa iua. Teoso nirekari iua. Imereẽri iua iparĩka erekari ikamini ìkapani. Ininiã kãkiti iua atoko inakani iposope Teoso parĩka ikamini ìkapani.

²² Ætokoripanika pinakasaakiaua, apanakini nirekiniãri maerekati pikamini, pimitekako, maerekati pimakamakani ìkapani. Pinirekariko atão inakarínoka pikamini ikiniõtika. Pinirekariko Xesosi sãkire iteene pauikini. Pinirekariko iteene katiraõki pinini. !Pinirekapiri neenamati. Ikara atoko kãkiti kaminiã, erekaxinireri. Iua akiritari Apiananiri imoianatiniri ìkapani.

²³ Tximótxio, kãkiti txitakakasaakiaua sãkiretxi miĩkiteti mimaroreti xika, !pikamapiri ikara atoko inakari, kotxi eereka ninoa neenamauata isãkirena xika. ²⁴ Apiananiri nitiri atão inakari ia atoko itxako: “!Itxitari ãti. Itiretari ikinimane. Koerekareri erekari itxaua. !Katimari omanãkarauatini. ²⁵ Õtãkikanako isãkire mauikakani momanãkaretika.” Ikara atoko Apiananiri nitiri ininiãua, atxiĩti Teoso oerekana isãkire mauikakani atão inakari imarotinina ìkapani, imaerekani itakanapinina ìkapani. ²⁶ Ininiã iuaĩkana kiĩkitekapa itxana. Teoso sikakana ninoa txikatoro Satanasi takakitiã, kotxi mitxi Satanasi maĩkana, iua nireẽkiti ikaminina ìkapani.

3

Itixi Xipokini Õti Apisa

¹ Tximótxio, pimarotariko ia nisãkire. Itixi xipokini õti apisa pamonõkopaniriko. ² Iuasaaki kãkiti ia atoko inakari: Kapotxinaniri iua. Txineiro tirketakani iua. Isãpiretari iposotiire ikinimanemoni. Iuikaua. Imisãkirepiretari Teoso, kãkiti pakini. !Ikamari iri paniãtakiti. Inoro paniãtakiti apaka !ikama. Æti kamakasaakiri erekari iuamoni, !itxari: “Erekapitikari pikamakiti nota ìkapani,” !itxari. !Inirekari Teoso. ³ !Itiretari inirimane. !Ikamari ikamaenetakiti. Imisãkirepiretari ãti maxikatĩka. !Iposotari erekari ikamini. Paneenamari. Omanatana erekari kamakani. ⁴ Imĩkapiritari ãti. Ikamakiti ikamini apisa, !ixinikari ikamakiti tĩkane. Iuaka ixinikapikaua. Isarauatininokara itireta. !Itiretari Teoso. ⁵ Iua sãkire: “Nauikari Teoso sãkire,” txamari !auikari Teoso posotiire. !Pauikapiri kãkiti ikara atoko inakari sãkire.

⁶ Kākiti ikara atoko inakari ianapokota sitomoni oaãpokomoni. Sito ikara atoko inakaro miĩkiteto. Maerekatnoka okama. Oĩto nireēkiti maerekati onirekapika. Iua ianapokotapika oamoni, ininiã oa auikaãpotari iua oerekakiti sākiretxiti. ⁷ Sito ikara atoko inakaro nirekari oimarotniri oerekaretxi, txamari !oimarotari oerekaretxi atão inakari.

⁸ Kitxakapirĩka Moisesi Exito tixine auakasaaki, Xani inakori, Xãpiri inakori pakini !inirekari auikinirina Moisesi sãpiretakiti. Ninoa atokokana kākiti itixi xipokini õti apisa auakani, !inirekari atão inakari. Ixinikapikarina maerekatnoka. Teoso !inirekari kākiti ikara atoko inakari, kotxi iua kākiti !auikari Teoso sākire. ⁹ Poiãonoka kākiti auikari ikara atoko inakari sākire, kotxi imarotari miĩkiteti iua. Iua atokokana kitxakapirĩka apanakini imarotari Xani, Xãpiri pakini miĩkiteni ininiua.

Teoso Nakitiakori Misiritiko

¹⁰ Pitepekana, pimarotapitikari noereēkiti sākiretxiti. Pimarotari nikamakiti ikiniõtika. Pimarotari ninireēkiti nikamini. Pimarotari iteene nauikiniri Xesosi sākire. Pimarotari nimĩteenekiniri nimisiritiko. Pimarotari nitiretiniri ãti. Pimarotari !katimari nomanãkarauatini. ¹¹ Pimarotari nimisiritiko. Pimarotari natatsiirauatini. Pimarotari nimĩteenekiniri nimisiritiko Ætxiokia sitatxiti nauakasaaki, Ikõnio sitatxiti apaka nauakasaaki, Arisitara sitatxiti apaka nauakasaaki. Iteene natatsiirauata, iuaritika Apiananiri makatzakano ikinika nimisiritiko. ¹² Ari, ikininape kākiti nirekiniãri Kristo Xesosi nakiti ininiãua, inirekiniãri Teoso nireēkitnoka ikaminiã, atatsiitariko imisiritiko. ¹³ Iuasaaki maerekati kamakani maerekani, kamisirienererini maerekani, apiaãpotako. Ninoa misirienetari apanakini. Apaka apanakini misirienetana ninoa.

Teoso Sākire Iõkatsopatakori

¹⁴ Pitepekana Tximótxio, pauikapikariko atão inakari poerekiko. Ikara pauikapitika, kotxi pimarotana pite oerekakani. Pimarotari atãonoka ninoa oerekakiti. ¹⁵ Pite axapitipanika pinakasaaki, pimarotari Teoso sākire iõkatsopatakori. Iua sākire iõkatsopatakori txĩkitakaua kimatire anini. Isākire iõkatsopatakori oerekaua Teoso makatzakiniri amaerekani Kristo Xesosi sākire aãuikasaaki. ¹⁶ Teoso oerekana isākire iõkatsopatakani atãonoka iõkatsopatinina, ininiã ikinika Teoso sākire iõkatsopatakori atãonoka. Ininiã apakata Teoso sākire iõkatsopatakori oerekiniua atão Teoso sākire aãuikini ïkapani. Oerekaua ikinipoko Teoso sākire iõkatsopatakori atão inini. Isākire iõkatsopatakori õtãkikaua amaerekani atakanapini. Oerekaua atão inakarinoka akamini. ¹⁷ Ininiã kākiti Teoso nakiti imarotiniãri Teoso sākire iõkatsopatakori, iposotari ikinika parĩkatxi Teoso paniãtakiti ikamini. Erekari iparĩka.

4

Tximótxio Õtãkikiko

¹ Tximótxio, nõtãkikai Teoso apisatoõ, Apiananiri Xesosi Kristo apisatoõ apaka, kotxi ãti õti Kristo Xesosi kanapiriãkasaaki, isãpiretari ikininape kākiti sinimoni. Isākire auiãkani sari Teosomoni ikaikotinina ïkapani. Isākire mauiãkani sari kākiti misiritikomoni ikaikotinina ïkapani. Isãpiretari kākiti auapanika inakani, kākiti mitxi ipĩkani apaka. Xesosi kanapiriã ikininape auĩte ininiua ïkapani, ininiãkara nipaniãtai ia: ² Pisãpiretariko Teoso sākire kãkitimoni. Iposope pitxako Teoso sākire ikiniõtika pisãpiretini kãkitimoni, piĩto tapara auakasaaki, pisãpakasaaki apaka. Põtãkikanako imaerekani itakanapinina, erekarinoka ikaminina ïkapani. Pisikataparaxiniretanako, Teoso sākire poerekinina. Pisãkirauatakasaaki, !katimari pomanãkarauatini.

³ Āti ōti apokako. Iuasaaki kākiti !inirekaikari oerekaretxi atāo inakari ikenakotinina. Ninoaka nireēkitinoka inirekana, ininiā apotiiāpotana ninoakata koerekarerini ninoa potxitakiti oerekaretxiti oereēkani. ⁴ !Inirekaikarina atāo inakari. Auikarina sākiretxi atāo minakati.

⁵ Pitepekana, ikinika pikamako piīkiteritika. Pimīteenekariko pimisiritiko. Pikamariko piparīka Teoso iokanapirena erekari pisāpiretini kākitemoni ninoa auikiniri īkapani. Teoso nitiri pitxaua, ininiā pikamariko ikinika piparīka Teoso paniātakiti.

⁶ Notapekana, nipinini ōti manapi apokaāpotape. Nipinako Teoso īkapani. Pirātxi Teoso īkapani okiko atokokana, notaka sikauako Teosomoni. Niketo apokapeka itixi nosipikini īkapani. ⁷ Neenamatziki erekari inakari nikamapeka Satanasi ninaiatini. Miteēkari mitekatxi mapotōkire apokini atokokana, nota apokapeka niparīka mapotōkire. !Nitakanapari Xesosi sākire nauikini. ⁸ Uatxa Teoso nīkatari niparīka īki nota kāiatakiti napakapini īkapani. Miteēkari merepanika mitekatxi mapotōkire apokakari apakapari imitekini īki. Apakapari saporīēta. Iua atokokana Apiananiri sikanoko niparīka īki, kotxi nota nirekari atāo inakaranoka nikamini. Apiananiri imarotari atāo, ininiā imarotari parīkatxi īki apakapakani. Imarotari imisiritiko apakapakani apaka. Niparīka īki isikano notamoni uai ikanapiriini ōtisaaki. Na notananini apakapari. Isikari parīkatxi īki ikininapemonei ikanapiriini nirekakanimonei.

Paoro Iōkatsopatakiti Mapotōkire

⁹ Piposotiniā, katima pitxako notamonei papokini. ¹⁰ Témasi inakori asikapekano, kotxi itiretari Xesosi sākire mauīākani nireēkiti. Isipeka Tesarónika sitatxitemonei. Kiresētxi inakori sari Karásia tixinimonei iparīkauatini īkapani. Txito inakori sari Taomásia tixinimonei iparīkauatini īkapani. ¹¹ Arókasinokara moianatano uatxa. Pakiritariko Marko. Piminari iua pitekata. Iua posotari imiparīkatinino, Xesosi sākire nisāpiretakasaaki kākitemonei. ¹² Txíkiko inakori nipaniāta Épeso sitatxitemonei isini. ¹³ Tóatxi sitatxiti nauakasaaki, nitakanapari nimāka āti nimāka nopini nitakakiti. Nitakanapari iua nimāka Kapo inakorikata. Pite uai īkasaaki piminari. Apaka piminari atatsopari ninakiti aātsopa kamakori. Apia ninirekari pimininiri atatsopari ninakiti aamata kamakori.

¹⁴ Arexātri inakori iteene misiritano. Iua Arexātri tiitxi kamakari iua. Tiitxi metao kamakorinoka ikama. Iua misiritinino xika, Teoso misiritari iua. ¹⁵ Erepaniko iua. Pamonōkoniri iua, kotxi iua iteene misākirepiretari aōereēkiti sākiretxiti.

¹⁶ Merepitipanika nota apoītakani anikasaakino auītetxiakori apisatoō, nisākire ikenakotinina īkapani, na āti nimoianari kaikota notakata iuasaaki. Ikinimane nimoianariakori takanapano, iuaritika na ninirekari Teoso misiritinina itakanapinino xika. ¹⁷ Ninoa takanapano, iuaritika Apiananiri kaikota notakata. Iua sikataparaxiniretano, ininiā niposotari Teoso iokanapirena ikinika nisāpiretinina ninoa Xoteo minakaniua ikenakotinina īkapani. Ininiā ākiti namaā takote nauakasaaki, Teoso tokapakeētano nota. ¹⁸ Nimarotapitikari Apiananiri tokapakeētanapanikano nota ikini sereti maerekati auakasaaki. Iua nīkatano. Anikano itixinimonei, iua auītetxi ininiātaāua. Ikinimane ātipirika sāpiretari iua: “Peerekai. Pitenokara erekari.” Ameē.

¹⁹ Pisāpiretana Pisisira inakoro, Ákira inakori pakini nixinikamanapitana. Apaka Onesíporo inakori aapoko auakani nixinikamanapita. ²⁰ Erásito inakori kaikota Korīto sitatxiti. Tópimo inakori nitakanapa Mireto sitatxitiā, kotxi iua amianata.

²¹ Tximótxio, piposotiniã, mitãã apisapanika papokako uaimoni. Eoporo inakori, Porotêtxi inakori, Arino inakori, Karáotxia inakori pakini ikini aĩtariakorikata iokanapireta pitemoni ixinikamanapitiniina.

²² Apiananiri Xesosi Kristo ãtipirika kaikota pitekata pãkixinireẽ. Ikinipoko erekari isika pitemoni. Ameẽ.

TXITO

Paoro Iokanatsopatakiti Txitomoni

¹ Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatanano kâkitimoni Teoso mereêkini auiâkiti sâkiretxiti nisâpiretini îkapani. Iokanatanano kâkitimoni atâo inakari imarotininina îkapani. Atâo inakari imarotiko oerekaua Teoso nireêkiti akamini îkapani. ² Aâuikari aâuapininiika anini Teosokata, kotxi kitxakapirîka itixi kamiko apisa Teoso kamaenetari ikara. Ininiâ apokapitikako, kotxi atâonoka iua sâkire. !Iposotari atâo minakati isâpiretini. ³ Iketotiniri manapi oerekari isâkire. Isâkire sâpiretakani sâpiretari isâkire. Ininiâ Teoso sâkire notamoni isikakiti nisâpiretai, kotxi Teoso amaerekani makatxakakari paniâtano nota nisâpiretiniri isâkire.

⁴ Niokanatsopata pite Txitomoni. Namarite atâo inakari atoko pitxaua, kotxi pite auikari Xesosi sâkire nota auikiniri atokotxikana. Aîri Teoso, aâuîte Xesosi Kristo amaerekani makatxakakari pakini, sikari ikinipoko erekari pitemoni. Ninoa iamoniîkai. Ikamaerekaxiniretaina.

Kõtâkikarerini

⁵ Nitakanapai pite Kreta pokomiriîti, kotxi aparîka iuaâtaâ kona xipokapanika, ininiâ ninirekari pite kaminiri ikara parîkatxi. Pimereêna kõtâkikarerini ikini sitatxitiâ Teoso sâkire auiâkani ôtâkikakani tîkane. Pimereêna mitxi nisâpiretakiti iaõka. ⁶ Ia atoko inakari kâkiti pimereê kõtâkikarerini îkapani: Iua kamari erekari, ininiâ maerekati auakasaaki, kona iua xikani maerekati apoka. Âtonokara îtanoro aua. Imiakori auikari Xesosi sâkire. Ninoa !neenamauata. Ikamarina iri paniâtakiti iaõka.

⁷ Teoso sikari iparîka kõtâkikarerimoni ikamini îkapani, ininiâ kõtâkikarerini kamari erekarinoka. Maerekati auakasaaki, kona iua xikani maerekati apoka. !Iuikaua. !Katimari omanâkarauatini. !Ipoâta. Kona kaneenamari. !Itiretaro txineiro. ⁸ Kõtâkikarerini atâo inakari potxitari apakapiniri kâkiti iua aapoko âki. Ipotxitari kâkiti erekari kamakani. !Katima omanâkarauatini. Erekarinoka ikama. !Ikamari maerekati. Erekari imarotakiti !itakanapari ikamini. ⁹ Kõtâkikarerini atâo inakari oerekaâkapeka Teoso sâkire. Imarotari Teoso kaminiri isâkire iaõka, ininiâ iteene inîkatari Teoso sâkire. !Imamakari Teoso sâkire. Ininiâkara imarotari ôtâkikiniri apanakini. Iteene imarotari Teoso sâkire, ininiâ imarotari oerekiniri apanakini Teoso sâkire manirekakani, Teoso sâkire auikinina îkapani.

Erepaniko, Atâo Minakati Oerekakani

¹⁰ Kaiâopokori kâkiti kona nirekari Teoso nireêkiti ikaminina. Maxikatiîka isâkirauatapika. Kamisirienererini ninoa. Ikara atoko inakani nirekari Teoso takaõtixikare Xoteo minakaniua îtoâ auini. ¹¹ Matxîkitakari ninoa iotokakiniri atâo minakati isâpiretinina, kotxi kâkiti aapoko âki auakani naiatakakaua ninoa oerekakiti sâkiretxiti xika. !Apakata ninoa oerekakiti sâkiretxiti. Iuaritika ninoa oerekari atâo minakati, txineiro apakapinina îkapani. ¹² Ninoa atokirini kitxakapirîka, koerekareri, uai Kreta pokomiriîti auakarini, txari: “Kreta auakani âtipirika misirienetari kâkiti. Maerekati kamakani itxauana. Kaneenamari îtopa auakari atoko ikamana. Iarinouatana. Paixonina,” itxa iua.

¹³ Isâpiretakiti atâopitikara. Ininiâ pitaparaxinireritika pipinitana ninoa imasâpiretananirina ikara atâo minakati, Xesosi sâkire atâo auikinina îkapani. ¹⁴ Ininiâ pisâpiretana: “!Himaâkatapiriko Xoteoakori kiomanekorini sâkire atâo minakati. !Himaâkatapena atâo inakari manirekaâkani paniâtakiti.”

15 Kākiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kākiti imaerekani auapanika inakari, Teoso sākire iaōka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani txikotari iua ākixinire, ininiā ākixinire !ōtākikari iua maerekati imakamakani ikapani. 16 Ninoa txa: “Ate imarotari Teoso,” txamari ikamarina Teoso manirekakiniti, ininiā !imarotarina Teoso. !Inirekarina Teoso. Arakakani atoko itxana, maerekati ikamakitina xika. !Ikamarina Teoso nireēkiti, ininiā !iposotarina erekari ikaminina.

2

Txito Ōtākikiko

1 Ininiā poerekariko ikinika atāo inakari Teoso oerekiko sākiretxiti.

Kiki Aneēkani Ōtākikiko

2 Ia atoko pōtākikana kiki aneēkani: “Hīxinikariko hīkamakiti tīkane hīkaminiri apisapanika. Erekariko hīkamako apanakini paxitinii ikapani. Kona hīkamapiri hīto nireēkiti. Iteene himarotariko hāuiākiti. Iteene hītiraōkiuatako. Katima omanākarauataka !hītxape.” Ikara atoko pōtākikana kiki aneēkani.

Sito Aneēkani Ōtākikiko

3 Ia atoko pōtākikana sito aneēkani: “Hīkamariko Teoso pīkakani kamakiti atoko. Maxikatiika !hāpoītapiri āti. Kona iteene hīatapiri iāriā kapoāro. Erekarinoka hōerekako.” Ikara atoko pōtākikana ninoa. 4 Apaka pōtākikana sito aneēkani ōtākikinina ātokoroakoro ia atoko: “Hītiretanako hītaniri, hamariteakori pakini. 5 Kona hīkīpitapiri hīto paniātakiti. Erekarinanira hīkamako. Hīkamariko hīparīka haāpoko āki. Erekariko hīkamako apanakini ikapani. Hītaniri nireēkiti hīkamako, ininiā iuasaaki Teoso sākire mauiākani !imisākirepiretari Teoso sākire.” Ikara atoko sito aneēkani oerekanako ātokoroakoro.

Ātokoriakori Ōtākikiko

6 Ininiā iua atokokana pōtākikana ātokoriakori ia atoko: “!Apakata hīkaminiri hīto nireēkiti.”

Txito Ōtākikiko

7 Txito, ikini pikamakiti pikamako kākiti erekari kamiko imarotini ikapani. Poerekarauatakasaaki, poerekariko kākiti pitiretiniri atāo inakari sākiretxitinoka. Poerekanako Teoso sākirenoka apiari inini. Poerekarauatakasaaki, poerekariko kākiti pimakoketakaniri atāo minakati pisākirekata. 8 Poerekariko atāo inakarinoka, ininiā !auari papoītiko, kotxi !pikerokari pisākire. Ikara atoko ininiā, pimokaiakarini pētauata, kotxi !iposotarina imisākirepiretinii.

Nitiritxi Amotakoni Ōtākikiko

9 Ia atoko poerekanako nitiritxi amotakoni: “Hīkīpitariko hīpatrāote sākire. Hīkamariko hīpatrāote apokaerekatakitinoka. Kapakapaenere !hītxape. 10 !Hītirīkapiri hīpatrāote tii. Hōerekariko hīpatrāote pisākire atāo inini. Ininiā hīpatrāote nirekari imarotinarina Teoso oerekiko, amaerekani makatxakakari oerekiko.”

Ikinipoko Erekariko Teoso Sikakiti

11 Ikinimanemoni Teoso oerekapekari erekari isikakiti kākiti maerekani imakatzakini. 12 Teoso sikakiti erekari oerekaua atakanapiniri Teoso manirekakiniti. Teoso sikakiti erekari oerekaua amanirekakaniri ikorapokoriti auakani ito nireēkiti. Teoso sikakiti erekari oerekaua aīto paniātakiti atakanapini, atāo inakarinoka akamini, Teoso nireēkiti akamini

Īkorapokoriti aãuakasaaki. ¹³ Īkorapokoriti aãuakasaaki, aiãtapari poxokonitxi òti Apiananiri aTeosone apokini òti. Iuasaaki Xesosi Kristo, amaerekani makatxakakari, motika atemoni. ¹⁴ Iuaka sikaua Teosomoni ate ĩkapani ipĩkasaaki. Iuasaaki ĩkitxitari Teoso, ininiã Teoso makatxakaua ikinika maerekanitxi sauaki. Ikara atoko ininiã, ikamaerekataua ate. Ininiã itxĩkitakaua inakitiakori aniniua, ininiã anirekari erekari akamini.

¹⁵ Auĩtetxi pininiua atoko pipaniãtariko kãkiti kĩpitiniri ikara nisãpiretakiti. Põtãkikana nisãkire makĩpitakani. Kona pauiritapiri kãkiti sãpiretiniri pisãkire atão minakati inini.

3

Teoso Nireẽkiti Kamiko

¹ Txito, ia atoko poerekariko kãkiti: “Hĩpaxitariko ĩkorapokoriti auĩtetxiakori paniãtakiti, poiãori auĩtetxiakori paniãtakiti apaka. Iposope hĩtxako ikinika erekari hĩkamini. ² Kona himisãkirepiretapiri apanakini. !Hineenamauatape. Merepanika hĩxinikariko apanakini, eereka hĩteka hĩxinika. Hõerekariko kãkiti, hĩxinireẽ hinirekiniri erekari hĩkamini ikinimanemoni.” Ikara atoko poerekana.

³ Teoso aimarotini apisapanika miĩkiteni atxaua. Kona akĩpitari kãkiti sãkire, Teoso sãkire apaka. Iuasaaki ate misirienetaãka. Iuasaaki akamari aĩto nireẽkitinoka. Ikinini sereti maerekati akama apoxokoniuatini ĩkapani. Iuasaaki ikiniõtika axinikari maerekati akamini. !Apakata akamakiti. Kaxikorerini atxaua iuasaaki. Ate omanataãka. Apaka ate omanatari apanakini iuasaaki.

⁴ Ininiã eereka Teoso tiraõki, amaerekani makatxakakari tiraõki, iua amonĩkare, apoka atemoni. ⁵ Ateka parĩka erekari !imakatxakari amaerekani. Iua amonĩkarenokara makatxakari amaerekani. Iuasaaki na atão akama, iuaritika imakatxakari amaerekani, kotxi itiretaua. Iuasaaki iua arokari aãkixinire. Itxĩkitakaua ate aponaniini iuaĩkana. Iuasaaki Erekari Matamatakoti kamari ikinika amaneri axinireẽ. ⁶ Teoso iokanatari Erekari Matamatakoti kaposotiireri atemoni, kotxi Xesosi Kristo, amaerekani makatxakakari, ipina ate ĩkapani. ⁷ Iua sikari ikinipoko erekari atemoni, ininiã ikamaerekataua. Ininiã itxĩkitakaua Teoso anaakori aniniua, ininiã aãpakapariko ipotetakiti ate ĩkapani. Iua atoko ininiã, aiãtapari ãtipirika Teosokata aãuini ĩkapani. ⁸ Atãopitikara ia nisãpiretakiti.

Ininiã ninirekari ãtipirika pisãpiretiniri ikinika nisãpiretakiti Teoso sãkire auĩãkanimoni. Ikara atoko Teoso auĩãkani itaparaxinireritika kamariko erekari apanakini ĩkapani. Kona maxikatĩika ikamarina erekari. Teoso atão ĩkitxitariko kãkiti. Ikara atoko kãkiti kaminiã, ininiã erekari ikinimane ĩkapani.

⁹ Kona pimaãkatapiri miĩkiteti sãkire. !Hĩtaparakienatakakapeua kitxakapirĩkarini uãka xika. Kona himaãkatapenako kãkiti kiomãtxiakori oerekakiti xika tsoatakani. Ikara sãkiretxiti !itxĩkitakai erekari hininiua. !Itxa ikara sãkiretxiti.

¹⁰ Kãkiti oerekiniãri atão minakati Teoso manirekakiniti, põtãkikari iua ipikata. Iposo atoko !pimaãkataikari. ¹¹ Ikara atoko inakari atão ĩkrite !auari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sãpiretakiti Mapotõkire

¹² Niokanatari Atemasi inakori, atxiĩti Txĩkiko inakori apaka pitemoni. Ninoa apokasaaki, paiamata pisini ĩkapani, katimari notamoni Nĩkõpori sitatxitiã hãpokini ĩkapani. Ninirekari ia mitaãti nikaikotini iuaã.

¹³ Pimoianatari Sena inakori, Aporo inakori pakini. Auñtetxiakori paniãtakiti imarotakari iua Sena. Pimoianatanako ninoa aiamatini. Iamonitakitina pisikanako. ¹⁴ Aĩtariakori Xesosi sãkire auiãkani apaiaõkariko erekari ikaminina, kãkiti minakati mauakiniti imoianatinina ĩkapani. Makamaretika hinini !apakata.

¹⁵ Notakata auakani xinikapikai pite. Pisãpiretanako ate tiretakani ereẽ Xesosi sãkire auiãkani nixinikamanapitana ninoa.

Ikinika erekari Teoso sikai hĩte hĩkinika. Ikara atoko niõkatsopata pitemoni. Ameẽ.

PIREMÕ

Paoro Iokanatsopatakiti Piremõmoni

¹ Nota Paoro. Kateia ãki naua, Kristo Xesosi sãkire nauikini xika. Nota, aĩtari Tximótxiokata aiokanatsopata pitemoni Piremõmoni. Ate iteene tiretai pite. Atekata parĩkauatakari pitxaua. ² Aiokanapireta Xesosi sãkire auiãkanimoni, paapoko apotiitakanimoni. Aiokanapireta aĩtaro Ápíamoni, Akipo pakini-moni. Iua Akipo Xesosi sotatone itxaua, ate Xesosi sotatone atokotxikana.

³ Aĩri Teoso, Xesosi Kristo Apiananiri pakini sikai ikinipoko erekari. Ika-maerekaxiniretaina.

Piremõ Tiraõkiuatini Pirena

⁴ Nitari Piremõ, Teoso nimisãkiretakasaaki, ãtipirika nisãkirauata pite ĩkapani. Nisãpiretari Teoso ereka inini, kotxi iua kamaerekatai pite. ⁵ ĩkara atoko itxa nisãkire, kotxi nikenakopiretari iteene pauikiniri Apiananiri Xesosi sãkire. Nikenakopiretari ikinimane kãkiti Teoso nakitiakori pitiretini. ⁶ Nimisãkiretari Teoso pite ĩkapani, kotxi ninirekari pisãpiretiniri pauĩãkiti sãkiretxiti ikiniõtika apanakinimoni, ininiãkara pimarotari ikini sereti erekari Teoso siãkiti Kristo nakitiakorimoni. ⁷ Ate poxokoniuata, kotxi pite tiretana kãkiti Teoso nakitiakori. Pitiraõki iteene sikataparaxiniretaua ate. Pite aĩtari kamapoxokonitana Teoso nakitiakori ãkixinire.

Paoro Amanããkiti Sãkiretxiti

⁸ Kristo sikaposotiiretano, ininiã nitapararitika niposotapitikari nipaniãtinii atão inakari pikamini. ⁹ Iuaritika nitapararitika na nipaniãtai atão inakari pikamini. Nõtãkikai Kristo tiraõkiã pikaminiri atão inakari. Nota Paoro kiomãtxipekano. Kateia ãki nauanãta, Kristo Xesosi sãkire nauikini xika. Notakara õtãkikai pite atão pikamini. ¹⁰ Nota amanaãi pinitiri Onésimo inakori piamonĩkini ĩkapani. Namarite atoko inakari iua, kotxi iua kĩpitari nisãkire uai kateia ãki nauakasaaki. Uatxa iua auikari Xesosi sãkire. ¹¹ Nimarotari iuãka poparĩkari uãka itxaua. Mitxi !iparĩkauata, pitekata auakasaaki. Paiariniri. Uatxa poparĩkari itxapekaua iuãka atokokana. Uatxa iparĩkauatapitikako pite ĩkapani, nota ĩkapani iparĩkauatini atokokana.

¹² Niokanatariko Onésimo, ikanapiriini pitemoni. Ininiã papakapariko iua. Nitiretari iua nota niĩto nitiretini atokokana. ¹³ Ninirekamari notakata uai ikaikotini, nota imoianatini ĩkapani, kotxi pite kona posotari pimoianatinino uai kateia ãki nauakasaaki, kotxi pite auini maioakari. Nota uai aua Teoso iokanapirena erekari nisãpiretini xika. ¹⁴ Ninirekamari Onésimo uai, txamari !ninirekari nikaminiri pite mauiritakiniti. !Ninirekari nitapararitika nipaniãtinii pauiritiniri Onésimo notakata ikaikotini. Pite nirekiniãri, imoianatano.

¹⁵ Akokaxiti Onésimo miteka. Mapakanani itakanapai. Atxiĩti Teoso auiritari poiãoka itakanapinii, ãtipirika pitekata iuaĩkana ikaikotini ĩkapani. ¹⁶ Iua pinitiri piamotakiti itxapanikaua. Uatxa apiaerekata iua. Pitari pitiretakiti itxapekaua, kotxi iua auikari Kristo sãkire. Iteene nota tiretari iua. Pite apia tiretariko iua, kotxi iua pinitiri itxaua. Apaka iua pitari itxaua, kotxi Apiananiri nakiti hĩtxaua.

¹⁷ Nota pimoianari nininiãua, nota papakapini atokokana pitxariko papakapiniri iua. ¹⁸ Akokaxiti maerekati ikaminiã, ĩtiriuatiniã, pisãpiretano. Nota ĩkitxitaiko. ¹⁹ Nota Paoro, uatxa niuakoã niõkatsopatari ia sãkiretxiti. Notakarako ĩkitxitai pite. Pite imarotari pite xinire auãki inini, kotxi notara

akokaxiti nisãpiretai Xesosi sãkire pauikini ïkapani. Ininiã atxiïti erekape pite ïkitxitinino nota? ²⁰ Ininiãkara nitari, pikaminano ninirekakiti, kotxi Api-ananiri nakitiakori atxaua. Pikamapoxokonitariko nãkixinire, kotxi Kristo nakitiakori atxaua. ²¹ Niõkatsopatari pite ïkapani, kotxi nimarotapitikari pikaminiri namanaãkiti. Ari, nimarotari apiata pikaminano.

²² Apikomoni nitxai. Poeretari ereẽ nimakiniãtaã ïkapani. Hïte misãkiretapekari Teoso kateia nitakanapini ïkapani, ininiã nimarotari Teoso auiritano iuaïkana nikanapiriini hïtemoni.

Itakapiretanapini Pirena

²³ Epápara inakori notakata kateia ãki aua, kotxi iua parïkauata Kristo Xesosi ïkapani. Iua xinikamanapitai hïte. ²⁴ Markoma, Arisitakoma, Témasima, Arókasima pakini notakata parïkauatakani, ninoa apaka xinikamanapitai hïte.

²⁵ Aãuïte Xesosi Kristo sikari ikinipoko erekari hãkixiniremoni. Ameẽ.

EPIREO

Teoso Ākiri Apiatini Pirena

¹ Teoso kitxakapirīka sãpiretari isãkire kaiãokataikani, isãkire sãpiretakanimoni. Ininiã ninoa sãpiretana aãtokiriakorini Teoso sãpiretakiti. Kiriãpa Teoso misãkiretana ninoa? Kaiãopokoriã imisãkiretana ninoa: Itaponeẽna, ixinireẽna, isãkire iõkatsopatakoriã, initiri itixine auakari sãkireẽ, txaãpota imisãkiretinina ninoa.

² Uatxa ĩkorasaaki, Teoso misãkiretaua iua ākiri sãkireẽ. Teoso mereẽri iua ākiri ikinipoko apakapini ĩkapani. Teoso ākiri kamari ikinipoko. Ikamari itixi, ikinipoko iaxiti apiko nopinixiti auakari apaka. ³ Iua iotximere Teoso iotximeretxikana. Teosotxikana iua. Kaposotiireri iua, kotxi isãkireẽnoka imaĩkari imakinika auini ĩkapani. Iuanokara makatxakari amaerekani. Amaerekani imakatzakasaaki, iusaaki iitopãka ikinimane auĩte Teoso kikomoni itixineẽ.

Teoso Ākiri Apiata, Initiriakori Poiãoka

⁴ Ininiã Teoso ākiri iteene apiaerekata. Apiananiri iua. Teoso nitiriakori iaxitikini poiãorini. Teoso mereẽri iuãka apiari. Ninoa uãka poiãorini itx-auana.

⁵ Teoso !isãpiretari initiriakori ia isãkire kitxakapirīkari:
Pite nota ākiri pitxaua. Uatxa pite iri nitxaua nota,
!itxa initiriakorimoni.

Apaka Teoso !isãpiretana ninoa ia isãkire kitxakapirīkari:
Nota iua iri nitxauako. Iua nota amarite itxauako,
!itxa initiriakori itixine auakanimoni.

⁶ Ātipekana. Teoso mĩkasaakiri iua ākiri imatonõkari ĩkorapokoritimoni, iponaniini ĩkapani, iusaaki Teoso txari initiriakori:
Ninitiriakori, hĩkapotoreẽkauako iua apisatoõ. Hĩteosonetariko iua,
itxa. Ikara atoko Teoso paniãtari initiriakori.

⁷ Teoso sãkire iõkatsopatakori, initiriakori pirena txari:
Itxĩkitakana initiriakori matamatakoni ininiuana, ĩtima atoko ininiuana.
Xamina tirinakari atoko itxauana ninoa, kotxi kaposotiirerini ninoa,
itxa. ⁸ Iua amaritemoni Teoso txari:
Teoso pitxaua. !Ixipoka auĩtetxi pininiãua. Ātipirika pite atão mĩkiikari pite auĩtetakani.

⁹ Pite tiretari atão inakari. Pomanatari maerekati. Ikara atoko ininiã,
nota piTeosone mereẽi pite apiari pininiuua ĩkapani, pimoianariakori
poiãorini ininiuana ĩkapani, kotxi apiata nikamapoxokonitai pite. Iĩtxiã
nimereẽkiti nopini nitakini atokokana, nitakari poxokonitxi pite
nopini. Nimereẽi pite auĩtetxi pininiãua.

Ikara atoko itxa Teoso kitxakapirīka. ¹⁰ Iuaĩkana Teoso sãkire iõkatsopatakori txari:

Apiananiri, merepitipanika pite kamari itixi. Apaka pikamari iaxiti piuakoã.
¹¹ ĩkorapokoriti, iaxiti pakini xipokapitikako. Iuaritika pite auapanika.
Mãkatxi kitxakariãpotakari atoko itxa ikinika.

¹² Mãkatxi atoko piapirikariko iaxiti, itixi pakini. Ininiã ipinimoni itxako.
Iuaritika pite mitxi atoko pitxapikako. !Pixipoka.

Itxa Teoso sãkire.

¹³ Teoso txari imi:
Nota kikomoni piitopãkiniritika nixipokariko pimokaiakariakori. Nika-
mariko ninoa pikiti pitakiniãtaã atoko ininiuua.

Ikara atoko !itxari initiriakori iaxitikini.

¹⁴ Ininiã kipa Teoso nitiriakori iaxitikini? Ninoa erekari matamatakoni. Iparĩkauatana Teoso ĩkapani. Teoso iokanatana ninoa imoianatinirina kãkiti iua sãkire auiãkani, kotxi Teoso makatxakari ninoa kãkiti maerekani.

2

Erepaniko

¹ Ininiã iteene mamixinikari ikinika atão sãkiretxiti mitxi akenakotakiti. Amakamakaniãri ikara atoko, kanaua tiokaãpotakari atoko atxaua. Ininiã iuasaaki !aimarotaikari atão. Maxinikari atão inakari. ² Kitxakapirĩka Teoso nitiriakori iaxitikini sãpiretari atão inakari ate apiko atokiriakori-moni. Kãkiti makamakaniãri ninoa paniãtakiti, ininiã ninoa kãkiti apakapari Teoso misirikare. Atão ninoa apakapiniri imisiritikona. ³ Ininiã uatxa amitekini !auari, amanirekakaniãri amaerekani makatxakiko. Peerekari Teoso makatxakiniri kãkiti maerekani. Merepitipanika Apiananiri sãpiretari ikara maerekanitxi makatxakiko. Iua sãkire kenakotakani apaka sãpiretaua ate iua sãpiretakiti atokotxikana. ⁴ Teoso apaka oerekaua ninoa sãkire atão inini, kotxi oerekari itakaõtxikare. Ikamari kãkiti mimarotakiniti. Ikamari ikini sereti posotiiretxi. Erekari Matamatakoti siãkiti isika inirekakinimoni. Kãkiti isika inirekaka iaõka. Ikara atoko Teoso oerekaua ninoa sãkire atão inini.

Xesosi Kãkiti Atoko Itxa

⁵ Teoso !itxĩkitakana initiriakori iaxitikini itixi amaneriã auakani auĩteakori ininiuana. Iua itixi amaneri ĩkari asãpiretai hĩte. ⁶ Kitxakapirĩka Teoso sãkire iõkatsopatakori Xikari oitoãtaã txari:

Kipa kãkiti? Kinirepa pite xinikana ninoa? Ate minakati. Kinirepa aĩtari iaxitikiri maãkatatari kãkiti?

⁷ Mapakanani pikamari kãkiti itari iaxitikiri poiãori ininiãua. Iuasaaki pinitiriakori iaxitikini apiatakani txaua. Eereka pitxĩkitakari iua auĩtetxi ininiuua. Pitxĩkitakari iua kaiotximereri ininiuua. Pitxĩkitakari ikinimane paxitiniri iua. Pitxĩkitakari iua ikinipoko auĩte ininiuua.

⁸ Pitxĩkitakari ikinimane kaminiri iua paniãtakiti. !Auari ãtika iua paniãtakiti makamakati.

Ikara atoko Teoso sãpiretaua ate itxĩkitakiniri ikinipoko auĩtetiniri iua. !Auari ãtika iua maauĩtetakati. Txamari kona ate atamatapanikari iua ikinipoko auĩte ininiuua. ⁹ Iuapitikara aãtamatakiti Xesosi. Mapakananinoka Teoso txĩkitakari iua poiãori ininiuua. Iuasaaki Teoso nitiriakori iaxitikini apiata. Teoso txĩkitakari iua poiãori ininiuua, kotxi iuasaaki Xesosi atatsiirauata. Iuasaaki ipina. Uatxa Teoso txĩkitakari iua auĩtetxi ininiuua. Itxĩkitakari iua kaiotximereri ininiuua. Itxĩkitakari ikinimane paxitiniri iua. Teoso kamari ikara atoko inakari, kotxi Xesosi ipina kãkiti mapinakani ĩkapani. Iuasaaki Teoso oerekari ikinipoko erekari isikini kãkitimoni.

¹⁰ Ikinika Teoso nakiti. Ikinika iua kamakiti. Apakata iua txĩkitakiniri kãkiti maerekani makatxakakari atatsiirauatini, kotxi iuasaaki iposope kãkiti maerekani makatxakiko, kotxi iuasaaki Xesosi kamari ikinipoko iri paniãtakiti. Ininiãkara Teoso anikari iua anaakori iotximere auiniãtaã. Kaiãori ninoa. ¹¹ Kãkiti kamaerekatakari iritxikana iua kamaerekatakini iri. Ikara atoko ininiã, Xesosi !ipẽtatari iua itariakori akiritiniua ate. ¹² Itxari Teosomoni:

Nisãpiretariko piuãka nitariakorimoni. Pitemoni apotiitakaniua sauaki nixikaretari ereka pinini.

¹³ Iuaĩkana kitxakapirĩka Teoso sãkire iõkatsopatakori txari: Nauikariko Teoso sãkire.

Iuaĩkana Xesosi txari Teoso:
Uai nota aua pamariteakorikata. Pite sikana ninoa notamoni.
itxa.

¹⁴ Kaĩtori Teoso anaakori. Ninoa aua ixini, iarẽka pakini. Ininiã kaĩtopekari Xesosi ninoa atokokana. Ininiã ipĩkasaaki ixipokari ipĩkitxi posotiire auakiti. Satanasi inakori iua. ¹⁵ Ikara atoko inakasaaki, isikakari kãkiti ipĩkitxi pĩkakani. Mitxi ninoa iaxirikakoni atoko itxana. ¹⁶ Aimarotari, iuasaaki !imoianatana initiriakori iaxitikini. Iuasaaki imoianatana Apraõ apika mekaniriakori. ¹⁷ Ikara atoko ininiã, Xesosi txĩkitakaãka itariakori atokokana ininiua, ininiã iposotari sasetotxi auĩte apiatakari ininiua kãkiti ĩkapani. Iparĩkauatakasaaki Teoso ĩkapani, ikamari ikinipoko ikamaenetakiti. Maerekati kamakani kãkiti, iuaritika iamoniĩkari kãkiti. Kãkiti itxapekaua Xesosi, ininiã iua ipina kãkiti maerekani imaktxakini ĩkapani, iuaĩkana kãkiti imikanapiriini Teosomoni ĩkapani. ¹⁸ ĩkorapokoriti Xesosi auakasaaki, imarotari Satanasi atamakaerekatini iua. Ininiã Satanasi atamakaerekatakasaakina kãkiti, iua posotari isikataparatinina ninoa.

3

Xesosi Apiatakari, Moisesi Poiãori

¹ Ininiã nitariakori, Teoso mereẽkini, hĩte akiritaãka Teoso tixine hãuini ĩkapani. Iteene hĩxinikariko Kristo Xesosi, kotxi iua Teoso iokanatakiti itxaua. Apaka iua sasetotxi auĩte apiatakari itxaua. Iuara asãpiretari apanakini. ² Moisesi kamari ikinika Teoso paniãtakiti inirimane apisatoõ, Teoso aapoko aamata kamakori ikamakasaaki. Iua atokokana Xesosi kamari ikinika iua mereẽkari paniãtakiti. ³ Apiaerekata Xesosi, ininiã iua apakapari apiata ipaxitiko, Moisesi poião, kotxi aapokotxi kamakari apakapari apiata ipaxitiko. Poião aapokotxi paxitiko aua. Iua atokokana, Xesosi aapokotxi kamakari atoko itxaua. Moisesi aapokotxi atoko itxaua. ⁴ Ikinika kãkiti aapokona kamakani auapitika, iuaritika Teoso ikinipoko kamakari itxaua. ⁵ Moisesi Teoso nitiri itxaua. Iua ãtipirika kamari ikinipoko Teoso nirekakiti inirimane apisatoõ. Ikara erekari ikamakiti oerekari Teoso sãkire iua sãpiretakiti atão inini.

⁶ Kristo Teoso ãkiri itxaua. Iua ãtipirika kamari ikinipoko Teoso paniãtakiti Teoso aapoko inĩkatini. Teoso aapoko atoko atxaua ate, iteene aãuikiniãri iua sãkire, apoxokoniritika ãtipirika aiãtapiniãri Xesosi kanapiriini õti.

Erepaniko, !Hĩtakanapapiri Hãuikakiti

⁷ Ininiã Erekari Matamatakoti txari:
Uatxa õti hĩkenakotakasaakiri nisãkire,

⁸ kona hĩkamapiriko hĩxinire paikori inini hãtokiriakorini atoko hinini. ãparaã makipakaniãtaã auakasaakina, iuaã ninoa !auikari nota sãkire. ! Ikamarina nipaniãtakiti. Iuasaaki ninoa ataerekatapikano nota.

⁹ Koarẽtakanani, ikiniõtika hĩte apika atokiriakori ataerekatapikano nota. Ninoa atamatari niposotiire. Txamari ikiniõtika ninoa ataerekatano nota. !Auikarina nisãkire.

¹⁰ Ikara xika nomanatana ninoa. Iuasaaki nitxa: “ãtipirika ninoa sapika apanakini sãkire tikini. !Imarotarina nixinikakiti, nikamakiti pakini.”

¹¹ Nomanatakasaakina ninoa imaerekanina xika, iuasaaki nitxako: “Atão nisãpiretana ninoa. Ninoa maĩroãpekaniikarako nikamakiti tomatikoãtaã,”

itxa Erekari Matamatakoti.

¹² Ininiã nitariakori, erepaniko. Atxiïti ãtikaka hïte aua hïxinire maerekati mauikareti. Ikara atoko inakasaaki, hïtakanapapekari Teoso ãtipirika auãki inakari, maerekati tikini hïsini ïkapani.

¹³ Ininiã ikiniõtika hïkamataparaxiniretakakauako. Uatxapanika inakasaaki hõtãkikakauako. Ininiã maerekanitxi kona misirienetai. !Ikamari kaikoxinire hinini. ¹⁴ Aãuini mapotökire manapi iteene aãuikiniãri Kristo sãkire merepiti-panika aãuikiniri atoktxikana, atão iuakata parïkauatakani atxaua. ¹⁵ Uatxa nisãpiretai kitxakapirïka iökatsopatakiti:

Uatxa ia õti hïkenakotakasaakiri iua sãkire, kona hïkamapiriko hïxinire paikori inini, hãtokiriakorini atoko hinini, ãparaã makipakaniãtaã auakasaakina. Ninoa !auikari nota sãkire.

¹⁶ Ninoa kenakotari Teoso sãkire, txamari !inirekarina ikaminirina isãkire iaõka. Kipa ninoa? Exito tixini Moisesi makatxakakinira ninoa. ¹⁷ Kikãkititipa kamari Teoso naiatiniua koarëtakanani? Ninoa maerekati kamakani. Ikara xika ninoa ipïpeka ãparaã makipakaniãtaã. ¹⁸ Kirimonipa Teoso txari ia? “Atão nisãpiretai hïte. Kona himaïroãpekaniikarako nikamakiti tomatikoãtaã.” Teoso sãpiretari ikara iua sãkire mauikakanimoni. ¹⁹ Ininiã aimarotari, ninoa !ïroã iuaã, Teoso sãkire imauikakanina xika.

4

Tomatikoãtaã Aua Teoso Nakitiakori ïkapani

¹ Auapitika Teoso kamaenetakiti kãkiti tomatiniãtaã Teoso kamakiti aïroini tïkane, ininiã erepaniko. Atão inakari hïkamako iuaã hïïroini ïkapani. ² Teoso iokanapirena erekari sãpiretaãka atemoni, kitxakapirïka Moisesi auakasaaki auakanimoni apaka. Txamari maxikatïlka ninoa kenakotari Teoso sãkire, kotxi ninoa !auikari ikenakotakitina. ³ Ate, Teoso sãkire auiaãkaniua, ïroã ikara Teoso kamakiti tomatikoãtaã. Ininiã Teoso sãpiretakiti iaõka auapeka. Ia atoko Teoso txari:

Nomanatakasaakina ninoa imaerekanina xika, iuasaaki nitxako: “Atão nisãpiretana ninoa. Ninoa maïroãpekaniikarako nikamakiti tomatikoãtaã,”

itxa Teoso. Ikara atoko itxama, iuaritika ikara tomatikoãtaã iposope iparïka ixipokasaaki, itixi ikamakasaaki. Ikara atoko ikama ate ïkapani. ⁴ Teoso sãkire iökatsopatakori sãpiretari itomatini õti pirena. Itxari:

Iparïkauata seisi õti, ininiã eereka apikomoni ãti õti inakasaaki itomata. Iuasaaki itakanapari ikinika iparïka,

itxa Teoso sãkire iökatsopatakori. ⁵ Teoso sãkire iökatsopatakori txari:

Ninoa maïroãpekaniikarako nikamakiti tomatikoãtaã.

⁶ Iuaritika apanakini ïroãpanikako iua tomatikoãtaã. Txama apanakini kitxakapirïka auakani !ïroã. Ninoa merepitipanika sãpiretaãka Teoso iokanapirena erekari, txamari !ïroãna, kotxi !ikamarina Teoso paniãtakiti.

⁷ Ininiã Teoso kamari iketo õti apanakini iuaãtaã apokini ïkapani. Iuasaaki Teoso akiritari iketo õti “uatxa.” Ikara atoko Teoso misãkiretari Tavii:

Uatxa õti hïkenakotiniãri nisãkire, ininiã kona hïkamapiriko hïxinire paikori inini.

⁸ Aãtokiri kitxakapirïka auakari Xosoe inakori, iuara anikari kãkiti itixi Teoso sikaenetakitimoni. Txamari !ïïroãna atão inakari tomatikoãtaã Teoso sikakiti, kotxi eereka Teoso sãpiretari ãti õti tomatikoãtaã ïroïko õti. ⁹ Ikara atoko ininiã, auapanikako Teoso kamakiti tomatikoãtaã inakitiakori ïkapani.

¹⁰ Ininiã kãkiti ïroãkasaaki Teoso kamakiti tomatikoãtaã, iotokakari iparïka, Teoso iparïka iotokakini atokokana. ¹¹ Ininiã nitariakori makamariko ikinika atão inakari iua tomatikoãtaã aïroini ïkapani. Erepaniko, kotxi

apanakini !ïroã, Teoso sãkire imauikakanina xika. Ininiã !hïkamapiri ninoa kamakiti atokokana.

¹² Teoso sãkire kaposotiireri. Isãkire auãki itxapika, kotxi Teoso ãtipirika auãki inakari sãpiretakiti. Saasara ipi auanaro auakaro, iteene kuanaro, ininiã iposotari ikisauakiniri inirekiniãtaã. Iposotari ikisauakiniri kãkiti pakaki, iua ãki auakari axïpe imakatzakini ïkapani. Apiata Teoso sãkire, kotxi Teoso sãkire posotari apokini kãkiti ïkite kãkiti xinirekata apotiitiniãtaãua. Teoso sãkire imarotari ïkinika axinikakiti, anireëkiti pakini aãkixinireë. Teoso sãkire atamakaerekatari ikara aãkixinireë auakari. ¹³ Teoso atamatari ïkinipoko akamakiti, ininiã !auari iomaãtakori. ïkinipoko !ipataãka. Aãuïte Teoso apisatoõ ïkinipoko kasarori.

Xesosi Sasetotxi Auïte Apiatakari

¹⁴ Ininiã atemoni auari sasetotxi auïte apiatakari, Xesosi, Teoso ãkiri. Apiananiri iua. Iua sari iaxiti Teoso auiniãtaã. Ininiã iteene maãuikari iua sãkire. ¹⁵ Ate nakiti sasetotxi auïte apiatakari imarotari ate ãkixinire iõkapetini. Imarotari ate maposotakiniti. Imarotari ate tsii. Ikara atoko inakari imarota, kotxi Satanasi iteene atamakaerekatari iua, ate atamakaerekatiko atoko. Iuaritika maerekati !ikama. ¹⁶ Ininiã ataparaxinireritika masa Teosomoni. Aãuïte topãkiniãtaã masa ïkinipoko erekari isikakiti aãpakapini ïkapani, iamoniãkiniua ïkapani. Isikaua ïkinipoko erekari. Isikataparataua amaxikiko auakasaaki.

5

Xesosi Sasetotxi Auïte Apiatakari Mereïko

¹ ïkinimane sasetotxi auïte apiatakari mereëka kãkiti sauaki. Iua misãkiretari Teoso kãkiti ïkapani. Isikari kãkiti sikakiti iuamoni. Kitxakapirïka iua okari pirãtxi Teoso apisatoõ kãkiti maerekani ïkitxitini ïkapani. ² Iamonïkari mimaroreni, Teoso takanapakani pakini, kotxi imarotari kãkiti ãkixinire iõkapetini, kotxi iua apaka kãkiti itxaua. ³ Sasetotxi apaka maerekati kamakari itxaua. Ikara xika merepanika iua okari pirãtxi Teoso apisatoõ iuaka maerekani ïkitxitini ïkapani. Eereka iua okari pirãtxi kãkiti maerekani ïkitxitini ïkapani.

⁴ Kãkiti paxitari sasetotxi, iuaritika ninoa kona mereëri sasetotxi parïka. Teosonoka mereëri kãkiti sasetotxi ininiua ïkapani, sasetotxi Arão inakori Teoso mereini atokokana kitxakapirïka.

⁵ Xesosi iuaka !ikamaua sasetotxi auïte apiatakari ininiua. Kona itxari: “Apakatapitika sasetotxi nininiua.” Iuaritika Teoso txari iua: Pite namarite. Uatxa noerekariko kãkiti nota pite iri nininiua, itxa Teoso.

⁶ Iuaïkana Teoso txari: ãtipirika sasetotxi pitxaua. Sasetotxi Meokisiteki inakori atoko inakari pitxaua, itxa Teoso Xesosimoni. ⁷ Xesosi ïkorapokoriti auakasaaki, iua iteene misãkiretari iri. Ipinini apisapanika iteene amanaãri iri imapinakani ïkapani. Imisãkiretakasaakiri iua, iteene itxiïta. Irinokara posotari itxiïkitakiniri imapinakani. Iri kenakotari isãkire, kotxi Xesosi txari: “Pinirekakitinokara ninireka.” ⁸ Xesosi Teoso ãkiri, iuaritika atatsiirauatakasaaki, imaroãpotari Teoso nireëkiti iaõka ikamini. ⁹ Iua kamari ïkinipoko iri paniãtakiti. Ikara atoko ininiã, kãkiti maerekani makatzakakari itxapekaua. Imakatzakari ipaniãtakiti kamakani maerekani, ininiã ninoa auapininiika itxanako Teosokata. ¹⁰ Teoso mereëri iua sasetotxi auïte apiatakari ininiua, Meokisiteki inakori sasetotxi ininiua atokokana.

Erepaniko, Atão Sãkiretxiti !Hĩtakanapape

¹¹ Aua apikomoni kaiãopokori ikara atoko inakari asãpiretinii hĩte, txamari pamimari ikara asãpiretinii hĩte, kotxi !katimari himarotiniiri Teoso sãkire. ¹² Akokaxiti hĩte auikari Xesosi sãkire, ininiã uatxa apiaerekata Xesosi sãkire oereẽkani hininiua. Txamari hĩte nirekari ãti oerekinii iuaĩkana merepitipanika atão inakari Teoso sãkire iõkatsopatakoriã auakari. Hĩte eenetxi xapitikiri atoko. Hinirekari Teoso sãkire tinitxiã atoko inakari. Teoso sãkire nipokori atoko inakari !hĩposotapanika hãpakapini. ¹³ Teoso sãkire imarotakari tinitxiãnoka nirekakari atoko inakari, iteene !imarotapanikari Teoso sãkire. ! Imarotari atão inakaranoka ikamini, kotxi iua eenetxi xapitiri atoko inakari. ¹⁴ Kãkiti aneẽkari nikari xinitxi. Kataparaxinireri nirekari Teoso sãkire, xinitxi aneẽkari nirekini atokokana. Kãkiti ikiniõtika kenakotiniãri Teoso sãkire, ininiã imarotari atão inakari. Imarotari atão minakati apaka.

6

Maãpaiaõkarauata Apikomoni

¹ ! Apakata ikiniõtika merepitipanika Kristo sãkire oerekakorinoka axinikini, kotxi aimarotapekari. Aimarotapekari atakanapiniri maerekati akamakiti. Aimarotapekari ateka kamakiti txĩkitakaua apinini. Aimarotapekari Teoso sãkire aãuikini. ² Aimarotapekari apatxisarauatini. Aimarotapekari atakauakotiniua ãti nopini. Aimarotapekari ipĩkani iuaĩkana õkitikiniua. Aimarotapekari Teoso misiritinina maerekati kamakani ãtipirika. !Apakata ikara ãtipirika aõerekini. ³ Apikomoni auapitika, ininiã maãpaiaõkarauata apikomoni. Teoso auiritiniãua, apikomoni maxinika. ⁴ Kãkiti takanapiniãri Teoso sãkire auikini, !apakataika ikanapiriinina Teosomoni. Mitxi ninoa imarotari Teoso sãkire atão inakari. Mitxi ninoa imarotari erekari iaxitikiri. Mitxi imarotari Erekari Matamatakoti parĩka ãkixinireẽna. ⁵ Mitxi imarotarina Teoso sãkire ereka inini. Mitxi imarotarina Teoso posotiire itixi amaneri apokasaaki. ⁶ Ikara atoko ninoa imarota, iuaritika ninoa takanapari Teoso. Ininiãkara !apakata iuaĩkana ikanapiriinina Teosomoni, kotxi iuaĩkana imisiritarina Teoso ãkiri aamina ĩpiriãmitakari nopini imisiritiko atoko. Iusaaki ninoa txĩkitakari kãkiti iuaĩkana napetiniri Xesosi.

Kikio Atoko Anini Pirena

⁷ Teoso takari erekari itixi ia atoko inakari nopini: ãparaã ikipa kaiãokatani iuaã, ininiã iminaua kienatxi katakareri nirekakiti. ⁸ Txamari itixi inako, aanaia pakini auiniã, !itxa. Ikara xika atxiĩti imisiritaãka. Ininiã arikaãkako. Ikara atoko inapeẽkanako kãkiti. Maerekati aniniãua, ininiã pamonõkoniri atemoni. Ikara atoko ininiã, imapotõkire õti Teoso !inirekaikaua ate. Ixipokaua aanaia xipokiko atoko.

⁹ Nitariakori, ikara atoko asãpiretai hĩte, iuaritika ate imarotari kona hĩte ikara atokoni. Aimarotari hãpakapiniri erekari, kotxi Teoso makatxakapekari himaerekani. ¹⁰ Teoso kamari ikinika atão. Iua !imaxinĩkaretari hĩparĩka iua ĩkapani. Hĩtiraõki iuamoni !imaxinĩkareta, kotxi himoianatapekari iua nakitiakori. Uatxa himoianatapanikana ninoa. ¹¹ Ate nirekari ikinika hĩkaminiritika Teoso ĩkapani imapotõkire õti manapi apokini. Ikara atoko ininiã, himarotari hiãtapakiti apokapitikako hĩtemoni. ¹² Kona apakata hĩarinauatini. Apanakini Teoso sãkire auĩkani kamakiti atoko hĩkamako, kotxi ninoa iãtapari Teoso sikaenetakiti apakapinina.

Teoso Sikapitkariko Isikaenetakiti

¹³ Kitxakapirīka Teoso sãpiretari isikaenetakiti Apraãomoni. Apiatakari Teosonokara aua. ãti apiatakari iua atoko inakari !auari, ininiã iuaka uãkaã isãpiretari isikaenetakiti isikini Apraãomoni. ¹⁴ Ininiã Teoso txari Apraão: “Nitakapitikari erekari pitemoni. Nisikaiko itomaneri papika mekaniriakori,” itxa. ¹⁵ Ininiã Apraão kenakotakasaakiri ikara, iteene iãtapari Teoso sãpiretakiti apokini. Eereka Apraão apakapari Teoso sikaenetakiti.

¹⁶ Kãkiti sãpiretakasaakiri isikaenetakiti ãti kãkitimoni, iuasaaki ninoa apoka ãti apiatakari apisatoõ isikaenetakiti isãpiretinina ĩkapani. Ininiã iuasaaki kãkiti imarotapitikari isãkire atão inini. Ikara atoko ininiã, aãpirena ! auari isikaenetakiti xika. ¹⁷ Teoso nirekari inakitiakori iteene imarotiniiri imatakanapananiri isikaenetakiti isikinina ninoa. Ininiã isikaenetakiti isãpiretakasaaki, isikari isãkire iuaka uãkaã. ¹⁸ Ininiã ipi aua: Teoso, Teoso sãkire pakini. Teoso mitxi atoko itxapikako. Teoso sãkire mitxi atoko itxapikako. Ininiã Teoso !iposotari atão minakati isãpiretini. Amiteka iuamoni, iua nĩkatiniua ĩkapani, aiãtapakiti aãpakapini ĩkapani. Ininiã asikataparaxiniretaãka.

¹⁹ Ikara atoko inakasaaki, aposotari iteene aãuikiniri Teoso sãkire. Aiãtapari ikinipoko iua sãkire iaõka apokini. Teoso sãkire aãuikini, minari maporo maĩkakari atoko itxa. Maporo maĩkakari !auiritari maporo tiokini. Teoso sãkire aãuikini maĩkari axinire. Isikataparatarari axinire. !Auiritaua atiokini maerekanitximoni. Teoso sãkire aãuikini anikaua Teosonani Auini Pakitaãtaã, mãkatxi mata arõkakari apikomoni auakari pakitamoni. Kitxakapirīka sasetotxiakori auĩte apiatakarinoka ĩroã iuaã. ²⁰ Iuaã Xesosi ĩroã ate ĩroini apisa. Iuaã imisãkiretari iri ate ĩkapani. Sasetotxiakori auĩte apiatakari itxapekaua ãtipirika ate ĩkapani. Meokisiteki inakori sasetotxi ininiua atoko itxa Xesosi.

7

Meokisiteki Pirena

¹ Meokisiteki inakori Sareẽ tixini auakani auĩte itxaua. Iuasaaki sasetotxi itxaua apaka. Teoso, Apiananiri, kamari iua sasetotxi ininiua. Kitxakapirīka Apraão kamari neenamatiã ãti tixini auakani auĩteakorikata. Iua kanapiriãkasaaki, aõkitari Meokisiteki. Iuasaaki Meokisiteki takari erekari Teoso sikakiti iuamoni. ² Iuasaaki Apraão sikari iua tiitxi imaktxakakiti ipixini. Tesi tiitxi auiniã, isikari ãti Meokisitekimoni. Meokisiteki akiritãka “Auĩtetxi Atão Inakari Kamakari.” Apaka akiritãka “Auĩtetxi Kãkiti Kamaerekaxiniretakari.” ³ !Kimarotikori Meokisiteki iri, inoro pakini. ! Kimarotikori apika atokiriakori. !Kimarotikori iponaniini, ipinini pakini. Teoso ãkiri atoko itxa. Sasetotxi ãtipirika itxaua.

⁴ Hĩxinikariko iua Meokisiteki. Apiatakari iua. Apraão iteene paxitari iua, ininiã isikari ipixini tiitxi iua makatxakakiti iuamoni. ⁵ Eereka ãti õti Apraão tikini Teoso paniãtari Arevii apika mekaniriakori, sasetotxiakori, apakapiniri ipixini kãkiti apakapakiti, txineiro, tiitxi pakini. Ninoa apakapari kãkiti sikakiti Teoso ĩkapani. Ikinimane ninoa Apraão apika mekaniriakori itxauana. Iuaritika sasetotxiakori apakapari inirimane sikakiti. ⁶ Iua Meokisiteki Arevii nirimane !itxaua. Iua aua kitxakapirīka Arevii apisapanika. Iuaritika iua apakapari ipixini Apraão makatxakakiti. Eereka Meokisiteki takari erekari Teoso sikakiti Apraãomoni, Teoso sikaenetakiti apakapakarimoni. ⁷ Iua Apraão poiãori. Apiatakari Meokisiteki, kotxi apiari takari erekari Teoso sikakiti poiãorimoni. ⁸ Ikinika Arevii apika mekaniriakori, Teosomoni kãkiti sikakiti apakapakani, ipinanipeka. ãtipirika auakari atoko itxa Meokisiteki. ⁹ Atxiĩti aposotari asãpiretiniri ia atoko: “Arevii sikari

isikakiti Meokisitekimoni Teoso ĩkapani, kotxi iua ina Apraõo ĩto ãki.” ¹⁰ Kotxi Apraõo aõkitakasaakiri Meokisiteki, iuasaaki Arevii kona auapanika. Ininiã iua auini apisapanika Apraõo ĩtoã aua, kotxi Apraõo apika mekaniri itxaua Arevii.

Xesosi Meokisiteki Atoko Inini

¹¹ Arevii apika mekaniriakori sasetotxiakori itxauana. Iua apika mekaniri Arão inakori. Arão apika mekaniriakori apaka sasetotxiakori itxauana. Teoso sikari ipaniãtakiti iõkatsopatakori ninoamoni, isãkire kãkiti imarotini ĩkapani. Iuaritika ninoa sasetotxiakori parĩka !oerekari kãkiti kamaerekatiko. Ininiã ãtião sasetotxi nirekaãka. Sasetotxi Arão atoko inakari !inirekaãkaika. Sasetotxi Meokisiteki atoko inakari nirekaãka.

¹² ãtião sasetotxi auakasaaki, ãtião Teoso paniãtakiti iõkatsopatakori aua iuasaaki. ¹³ Xesosi kona Arevii apika mekanirini. Iua Xotaa apika mekaniri. Xotaa mekaniriakori kona sasetotxiakorini. Ninoa kona okari pirãtxi Teoso ĩkapani. Kona iparĩkauatana Teosomoni sikakori takikoãtaã. ¹⁴ Ikinimane imarotari aãũte Xesosi Xotaa nirimane ininiua. Moisesi iõkatsopatakiti ! auiritana ninoa sasetotxi ininiuana. ¹⁵ Ate sãpiretapekari Meokisiteki pirena. Aimarotari auapitika ãti sasetotxi, Meokisiteki atoko inakari. Uatxa aimarotari Xesosi Meokisiteki atoko itxaua.

¹⁶ Kitxakapirĩka sasetotxi pitxaua, kotxi pikiomaneakori sasetotxi apaka itxauana. Teoso kamari Xesosi sasetotxi ininiua, kotxi iua auapikako. Kaposotiireri iua. !Ixipoka. ¹⁷ Teoso txari Xesosi isãkire iõkatsopatakoriã: ãtipirika sasetotxi pitxaua. Sasetotxi Meokisiteki atoko inakari pitxaua, itxa.

¹⁸ Ininiã mitxi auakari sasetotxiakori parĩka !auaika, kotxi itapara !auari. Xipope ikara. ¹⁹ Moisesi paniãtakiti iõkatsopatakori !ikamari kãkiti ereka inini. Uatxa apiaerekatakari aiãtapakiti apokapeka ĩkorapokoriti. Ininiã iua anikaua Teosomoni.

²⁰ Teoso isãkireẽ txĩkitakari Xesosi sasetotxi ininiua. ²¹ Teoso !isãkirauata ikara atoko kãkiti sasetotxipeka inakasaaki. Teoso txĩkitakari Xesosi sasetotxi ininiua isãkireẽ, kotxi itxari Xesosi:

Nota Apiananiri sãpiretapekari nikamaenetakiti. Ikara nikamapitikako, ininiã ãtipirika sasetotxi pitxaua, sasetotxi Meokisiteki atoko inakari pitxaua,

itxa Teoso. ²² Ininiã ikara Teoso sãkireẽ, aimarotari Teoso kamapitikariko ikamaenetakiti apiari, kotxi iposope isikiniua Xesosi.

²³ Auapeka itori sasetotxiakori. Ninoa kona posotari ãtipirika iparĩkauatinina, kotxi ikoriãpekana. ²⁴ Xesosi auapikako, ininiã ãtipirika sasetotxi itxaua. ²⁵ Ininiã iposotari imakatzakiniri ikinika amaerekani, Teosomoni anikasaakiua, kotxi ãtipirika aua, ininiã ãtipirika imisãkiretari Teoso ate ĩkapani.

²⁶ Ininiã ikara atoko inakari sasetotxi auũte apiatakari anirekapitika. Api-aerekatakari iua. !Kaneenamari. Ikerokakiti !auari. Itxiko ixinireẽ ! auari. Maerekati !ikama. Iaxiti apiko nopinixiti auakari, auũtetxi Apiatakari itxaua. Ikara atoko inakari sasetotxi anirekapitika. ²⁷ Apanakini sasetotxi auũte apiatakani ĩkorapokoriti auakani atoko !itxaua. Ninoa ikiniõtika okari pirãtxi, merepanika ninoaka maerekani makatzakiko ĩkapani. Eereka ninoa okari pirãtxi kãkiti maerekani makatzakiko ĩkapani. Kona ikara atokoni itxa Xesosi. ãtikatanokara Xesosi oxiketari iarẽka kãkiti ĩkapani. Iuaka ipina kãkiti ĩkapani. ²⁸ Mitxipe sasetotxi auũte apiatakani mereeẽka Moisesi paniãtakiti iõkatsopatakori iaõka. Ninoa tapara !auari. Moisesi sãkire tikini Teoso mereẽri imi ãtipirika sasetotxi ininiua ĩkapani. ãtipirika erekarinoka kamakari iua.

8

Xesosi Sasetotxi Auñte Apiatakari

¹ Ia atoko asãpiretakiti: Atemoni auapitika atão sasetotxi auñte apiatakari. Iaxiti iua topãka aãuñte Teoso kikomoni, auñtetxi auiniãtaã. ² Iuaã Teoso auiniãtaã, imisãkiretari iua ate ïkapani. Iuaã aua atão inakari Teoso aapoko, Apiananiri kamakiti. Kona kãkiti kamakitini.

³ Ikinika sasetotxi auñte apiatakari auari iparïka. Isikari kãkiti siãkiti Teosomoni. Isikari pirãtxi okakori Teosomoni. Ininiã Xesosi parïka apaka aua isikarauatini. Iuaka isikaua Teosomoni. ⁴ ïkorapokoriti Xesosi auakasaaki, sasetotxi !itxaua, kotxi auape ïkorapokoriti sasetotxiakori kãkiti siãkiti sikakani Teosomoni. Moisesi iõkatsopatakiti atokotxikana ikamana. ⁵ Sasetotxi ïkorapokoriti auakani kamakiti atão, txamari ninoa parïka !inirekaãkaika. Ninoa parïka sanõkatxi atoko itxa, Xesosi parïka iaxitikiri aimarotini ïkapani.

Kitxakapirïka Teoso paniãtakasaakiri Moisesi Teoso aapoko aamata kamakori ikamini ïkapani, Teoso txari Moisesi: Pikamariko naapoko nipaniãtakiti iaõka ixirata auñte nopini aãuakasaaki noerekakiti. Ipinimoni inakari !pikamape, itxa Teoso.

⁶ Xesosi parïka Teoso sikakiti apiaerekata. Kitxakapirïka sasetotxiakori parïka poião erekari. Iua atokokana Teoso kamaenetakiti amaneri apiaerekata. Kitxakapirïka ikamaenetakiti poião erekari. Xesosi txïkitakari Teoso kamaenetakiti amaneri apokini kãkiti ïkapani, kotxi iua ipina kãkiti ïkapani. Teoso kamaenetakiti amaneri apiaerekata, kotxi ikamaenetari kaiãopokori erekari apiaerekatakari.

⁷ Teoso kamaenetakiti Moisesimoni apakatiniã maerekati imaktxakini ïkapani, ininiã kona ikamari ãti ikamaenetakiti apiatakari. ⁸ Txamari Teoso !apokaerekatari kãkiti, kotxi kãkiti kamapanikari maerekati. Ininiã Apiananiri txari kãkiti:

Ãti õti nisãpiretariko nikamaenetakiti amaneri Isaeo nirimanemoni, Xotaa nirimanemoni pakini.

⁹ Kitxakapirïka nisãpiretari mitxi nikamaenetakiti ninoa atokiriakorinimoni. Iuasaaki nota makatxakana ninoa imisiritikosaakina Exito tixiniã. Txamari ninoa !ikamari nisãkire iaõka. Ininiã nitakanapana ninoa. Nikamaenetakiti amaneri kona mitxi nikamaenetakiti atokoikani.

¹⁰ Ãti õti ïkari nikamaenetakiti amaneri nisãpiretariko Isaeo tixini auakani. Ia atoko inakari nikamaenetakiti amaneri: Nitakariko nipaniãtakiti kãkiti ïkitekẽ. Niõkatariko nipaniãtakiti ninoa ãkixinireẽ. Iuasaaki ninoa Teosone nitxauako. Iuasaaki ninoa nota nakitiakori itxauanako.

¹¹ Iuasaaki kãkiti kona oerekari ãti imarotiniri Apiananiri. Kona kãkiti oerekari itari imarotiniri Apiananiri, kotxi iuasaaki ikinimane imarotanoko nota. Poiãoka inakani, apiatakani pakini imarotanoko nota.

¹² Nimaxinïkaretariko ikinika maerekati ikamakitina. Kona nimisiri-taikana ninoa. Kona nixinikaikariko maerekati ikamakitina, itxa Apiananiri. ¹³ Teoso kamakasaakiri ikamaenetakiti amaneri, iuasaaki oerekari kãkiti mitxi ikamaenetakiti Xoteoakorinoka ïkapani ikamape, ininiã inapape. Tiitxi kitxakari patimari xipokini atoko, ikara mitxi Teoso kamaenetakiti xipoka.

9

Teoso Aapoko Aamata Kamakori

¹ Kitxakapirīka Teoso kamaenetakiti isāpiretakasaakiri Moisesi, Teoso oerekari Moisesi oerekiniri kākiti Teoso apisatoō apokini. Iua apaka sāpiretari kākiti iua aapoko ĩkorapokoriti ikaminina ĩkapani. ² Ininiā ninoa kamari Teoso aapoko aamata kamakori. Sasetotxiakori ĩroiniātaā aua tirikapi takiko tiitxiti. Iuaā aua apaka komiri Teosomoni siākori amesa nopini. Iua pakita ninoa takauākatari “Teoso Auini Pakitaātaā.” ³ Apanīkaki mākatxi mata kasipiri arōkakari aua. Iua mākatxi mata apikomoni auakari pakita ninoa takauākatari “Teosonani Auini Pakitaātaā.” ⁴ Iuaā aua kamariāro arikiko amesati oro kamakoro. Iuaā aua Teoso kaixane. Iua kaixa akiritaāka “Teoso kamaenetakiti kaixati.” Iua kaixa nopini mapara itaāka oronokara. Iua āki itakaāka kopitipaki oro kamakoro. Iua kopitipaki āki itakaāka xapitiri komiri manaa inakori. Iua kaixa āki aua apaka Arāo tsonareke. ĩkora mitxi pitxaka iuaīkana. Apaka iua kaixa āki aua ipi kaita. ĩkora kaita nopini aua Teoso paniātakiti iōkatakori. ⁵ Iua kaixa nopini aua ipi Teoso nitiriakori iaxitikini atoko inakani. Oro kamakori ninoa. Akiritaāka Keropiū inakoni. Keropiū matameēkari imīkita iua kaixa tore nopini. Iuaā Teoso maxinīkaretari kākiti maerekani.

Uatxa !apakata apikomoni noerekinii ikara pirena.

⁶ Teoso Auini Pakitaātaā sasetotxiakori ĩroā ikiniōtika iparīkana ikaminina Teoso ĩkapani. ⁷ Sasetotxi auīte apiatakarinoka ĩroā Teosonani Auini Pakitaātaā. Ātikanani ātikatika ĩroā. Iua anikari arēkatxi iuakata. Arēkatxi imanikakaniā, ! ĩroā. Iua arēkatxi isika Teosomoni merepanika iuaka maerekani Teoso makatxakini ĩkapani. Eereka ikamari ikara apanakini kākiti maerekani Teoso makatxakini ĩkapani. ⁸ Iuasaaki Teoso kona auiritari kākiti ĩroini Teosonani Auini Pakitaātaā. Ikara atoko Erekari Matamatakoti oerekaua ate, kotxi kona Teoso oerekapanikari ikinimane kākiti ĩroini Teoso apisatoō. Teoso aapoko aamata kamakori auapanika inakasaaki, Teoso kona oerekari kākiti iuamoni apokini. ⁹ Ikara Teoso aapoko kitxakapirīka auakari ate oerekiko itxaua uatxa. Oerekari ia. Kākiti sikakiti Teosomoni, pirātxi okiko Teoso ĩkapani apaka, kona posotari oeretiniri Teoso teosonetakani ākixinire. ¹⁰ Ikara Teoso oerekakiti kitxakapirīka oerekari kākiti iniākiti atāo inakari, iātakiti atāo inakari pakini. Oerekari kākiti iito arokiko, itii arokiko pakini Teoso apisatoō apokini iposope inini ĩkapani. Teoso kamaenetakiti amaneri apokasaaki, kona akamaikari ikara mitxi Teoso oerekakiti.

Kristo Arēka

¹¹ Kristo apokapeka. Sasetotxi auīte apiatakarari itxaua. Oerekaua erekari Teoso sikakiti. Iparīkauata Teoso aapoko apiaerekatakari āki. Iua Teoso aapoko kākiti makamakiniti. Iua aapoko !auari ĩkorapokoriti. ¹² Iua ĩroākasaaki iuaātaā, ! anikari potxi arēka, kema auīte ākiri arēka ĩroini ĩkapani. Iua ĩroākasaaki Teosonani Auini Pakitaātaā iaxiti auakariātaā, anikari iuaka arēka, kotxi ikitakari iarēka ātikatika ikinimane kākiti ĩkapani. Ininiā iikitxitari Teoso ātikatika kākiti maerekani ĩki, ininiā kākiti aua Teosokata ātipirika. ¹³ Potxi arēkaā, kema auīte arēkaā, kema auīte ākiri ariākori paniā pakiniā, kitxakapirīka sasetotxi tseētari maerekati kamakani Teoso apisatoō apokinina ĩkapani. Ininiā iuasaaki maparanoka oeretaāka. Ākixinirena !oeretaāka.

¹⁴ Apiaerekata Kristo arēka, kotxi iua posotari oeretiniri aākixinire. Maerekati ! auari Kristomoni. Iuaka sikaua Teosomoni Erekari Mata-matakoti posotiireē, ātipirika auakari posotiireē. Iuara oeretari aākixinire. Imakinika akamakiti apinini txīkitakakari imakatxaka. Ininiā uatxa aposota aparīkauatini Teoso ātipirika auāki inakari ĩkapani.

¹⁵ Ininiā iua Kristo txīkitakari Teoso kamaenetakiti amaneri apokini. Ininiā kākiti Teoso akiritakini posotari apakapiniri ātipirika Teoso sikaenetakiti iua

anaakori ĩkapani. Kristo ipĩkasaaki, isikakana ninoa imaerekanina itakanap-inina ĩkapani. Iuasaaki iĩkitxitari Teoso imaerekanina ĩki. Ikara imaerekanina ikamana Teoso kamaenetakiti mitxipe auakari auakasaaki.

¹⁶ Kãkiti ipinini apisa, iõkatsopataritari itii apakapakani uãka, ininiã ipĩkasaaki itii apakapakani imarotaãka. Ininiã iua ipinini imarotiko tsopa auiniã, iuasaaki itii apakapakani apakapari ipĩkari tii. ¹⁷ Ipĩkari tii apakapakani imarotiko tsopa nirekaãka kãkiti ipĩkasaakinokara. Ikara !inirekaãka ipinini apisa. Iua auãkipanika inakasaaki, kãkiti !apakapari itii. ¹⁸ Ininiãkara mitxi Teoso sikaenetakiti isika kãkitimoni, arẽkatxi auakasaaki, ipĩkari auakasaaki. ¹⁹ Kitxakapirĩka Moisesi merepitipanika sãpiretari kãkiti ikinika Teoso paniãtakiti iõkatsopatakoritari. Eereka ikosekari kema auĩte ãkiri arẽka, potxi arẽka pakini. Ikara ikoketa ãparaãkata. Iposo atoko itseẽtari Teoso sãkire aãtsopate, ikinimane kãkiti pakini isopo inakori poriã, soti auĩte piti põkamarariã pakiniã. ²⁰ Iuasaaki itxari: “Ia arẽkatxi oerekaua Teoso kaminiri ikamaenetakiti. Teoso paniãtai hĩkĩpitiniri iua sãkire.” ²¹ Iua atokokana Moisesi tseẽtari Teoso aapoko aamata kamakori, ikinika iua ãki auakari pakini arẽkatxiã. ²² Teoso sãkire iõkatsopatakoritari paniãtari kãkiti, tiitxi pakini oeretiko arẽkatxiã. Okakori mauakaniã, arẽkatxi kitaãkari mauakaniã, Teoso !imakatxakari kãkiti maerekani.

²³ Ininiã Moisesi takari pirãtxi arẽka ikinika Teoso aapoko ãki auakari nopini oeretiniri ĩkapani. Ikinika Teoso aapoko ãki auakari ĩkorapokoritikiri, iaxitikiri oerekiko ĩkapani itxa. Sanõkatxi atoko itxa. Pirãtxi arẽka kona apakata iaxiti ĩkapani. Teoso nirekakari arẽkatxi apiatakari. ²⁴ Kristo iparĩka ikamakasaaki ate ĩkapani, kona iĩroã Teoso aapoko kãkiti kamakitiã. ĩkorapokoritari kãkiti kamari Teoso aapoko atoko inakari, txamari na atão iua aapoko. Kristo ĩroã atão Teoso aapoko Teoso tixineẽ. Uatxa iuaãtaã Teoso apisatoõ iua misãkiretari Teoso ate ĩkapani. ²⁵ Sasetotxiakori auĩte apiatakari ĩroã Teosonani Auini Pakitaãtaã ikinikanani. Iuasaaki anikari pirãtxi arẽka. Kristo !ikamari ikara atoko. ãtikatika Kristo oxiketari iarẽka. ²⁶ Iua ninoa atoko inaãkamako, itokata imisiritaãkamako itixi kamikosaakipekamako. Uatxa imapotõkire õti takote iua apokapeka maerekati ãtikatika imaktxakini ĩkapani. Iuaka isikaua ipinini ĩkapani, amaerekani ixipokini ĩkapani. ²⁷ Teoso kamari ikinimane kãkiti ãtikatika koriini. Eereka ikinimane sari Teoso apisatoõ. Iuasaaki apanakini apakapari imisiritiko. Apanakini apakapari iparĩkana ĩki. ²⁸ Ininiã Kristo okaãka ãtikatika kaiãopokori kãkiti ĩkapani, imaerekanina imaktxakini ĩkapani. Iuaĩkana iua kanapiriã. Iuasaaki !imisiritaãkaikako kãkiti maerekani xika. Iua ĩkasaaki, imaktxakariko iua iãtapakani, maerekani sauaki auakani. Anikana itixinemoni ãtipirika Teosokata auinina ĩkapani.

10

Pirãtxi Arẽka Kona Apakata

¹ Kitxakapirĩka Teoso paniãtakiti Xoteoakorimoni sanõkatxi atoko itxa. Ikara oerekari kãkiti iuasaaki auakani atão inakari apokini ãti õti. Ikinipoko atão inakari !apokapanika ninoamoni. Ininiã pirãtxi okiko ãtipirika kona txĩkitakari kãkiti iposope Teosomoni apokini. !Ikamaerekatana ninoa. ² Pirãtxi arẽka maktxakiniãri kãkiti maerekani, ininiã ninoa takanapamariko pirãtxi okinina, kotxi Teosomoni apokakani oeretapeẽkaika, ininiã imarotamarina ãkixinireẽna imaerekanina mauakani. ³ Txamari pirãtxi arẽka !imaktxakari kãkiti maerekani. Ininiã ikinikanani pirãtxi okakori oerekari kãkiti imaerekani auapanika. ⁴ Kema auĩte arẽka, potxi arẽka pakini kona posotari imaktxakiniri kãkiti maerekani.

⁵ Kristo apokasaaki ĩkorapokoriti, itxari Teoso:
Pirãtxi okakori pitemoni siãkori kona pinireka. Ininiã pite kamari ĩtotxi nota ĩkapani.

⁶ Pirãtxi arikiko pite ĩkapani, pite !apokaerekatari. Kãkiti sikiniri isikakiti pitemoni imaerekani pimakatxakini ĩkapani, pite !apokaerekatari. ! ĩkamapoxokonitai.

⁷ Iuasaaki nitxai. “Uaikarano nota. Paãtsopateẽ iõkatapeẽkaika nota pirena. NiTeosone uai napoka pinireẽkiti nikamini ĩkapani,” itxa Xesosi.

⁸ Merepanika Xesosi txari iri: “Pirãtxi okakori pitemoni siãkori kona pinireka. Pirãtxi arikiko pite ĩkapani, pite !apokaerekatari. Kãkiti sikiniri isikakiti pitemoni, pite !apokaerekatari. !kamapoxokonitai,” itxa. Iuaritika Teoso sãkire iõkatsopatakori kitxakapirĩka paniãtari ikara kamiko. ⁹ Eereka Kristo txari iri: “Uaikarano nota. Uai napoka pinireẽkiti nikamini ĩkapani,” itxa. Ikara atoko inakasaaki, Xesosi xipokari pirãtxi okiko, kotxi iua apoka uai Teoso nireẽkiti ikamini ĩkapani.

¹⁰ Teoso nireẽkiti iaõka ikamini kamaerekataua ate, kotxi Xesosi Kristo ipina ãtikatika ĩkinimane ĩkapani.

¹¹ Sasetoxiakori ĩkorapokoriti auakani sapika ikiniõtika Teoso apisatoõ iparĩkana ikaminina ĩkapani. ãtipirika iua okari pirãtxi Teoso isikini ĩkapani. Itxama, ikara !iposotari maerekati imakatxakini. ¹² Iuaritika Kristo, ate sasetotxine, iuaka sikapekaua ikoriini kãkiti maerekani imakatxakini ĩkapani. Ikamari ikara ãtikatika. Iposo atoko, iitopãka Teoso kikomoni. Ikara atoko ininiã, ixipokari iparĩka. ¹³ Iuaã iãtapari ĩkinika imokaiakari xipokini. Ikiti itakiniãtaã atoko ninoa. ¹⁴ Ininiã ãtikatika okaãka kãkiti ereka inini ĩkapani. Iua kamaãpotana ninoa erekaãpo ininina ĩkapani.

¹⁵ Erekarı Matamatakoti apaka txaua ate ikara atão inini. Merepanika itxari:

¹⁶ Apiananiri txari: “Ia nikamaenetakiti nikamako ninakitiakori ĩkapani ãti õti. Ia nikamaenetakiti: Nipaniãtakiti nitakako ninoa ãkixinireẽ. Nipaniãtakiti niõkatakõ ĩkitekẽna.”

Itxa Erekarı Matamatakoti. ¹⁷ Apikomoni itxa:

Kona nixinikaikari maerekati ikamakıtina. Apaka nipaniãtakiti ninoa takanapakiti, !nixinikaikako.

¹⁸ Teoso makatxakasaakiri maerekati akamakiti, ininiã amaerekani makatxakaãkapeka. Ininiã !uaika okakori kãkiti maerekani makatxakini ĩkapani.

Maãpoka Teosomoni

¹⁹ Ininiã nitariakori uatxa !hĩpĩkarauatape hiĩroini Teosonani Auini Pakitaãtaã, kotxi Xesosi ĩkitxitapekari aĩroini ĩkapani iuaka arẽkaã. ²⁰ Xesosi ipĩkasaaki, iua kamari kimapori amaneri, maxipokati, Teosomoni asini ĩkapani. Ipĩkasaaki, imakatxakari mãkatxi mata Teosonani Auini Pakitaãtaã arõkakari, Teosomoni aĩroini ĩkapani.

²¹ Atemoni aua sasetotxi apiatakari Teoso aapoko nĩkatakari. ²² Ininiã maãpoka Teosomoni. Maãuiritari atão inakarınoka kaikotini aãkixinireẽ. Maãuikari ĩkinika iua sãkire. Kãkiti kitxakapirĩkarini tseẽrauata arẽkatxiã, maerekati makatxakiko ĩkapani. Ininiã maamanaãri Xesosi tseẽtiniri aãkixinire oeretiniri ĩkapani. Kitxakapirĩka kãkiti kipaãtaua Teoso aapoko ĩroini ĩkapani. Iua atokokana maamanaãri Xeosi aĩto arokini ãparaã ereriã. Ikara atoko aniniã, maãpoka Teosomoni. ²³ Iteene maãuikari aimarotakiti asãpiretakiti, kotxi Teoso kamapitkariko ikamaenetakiti. ²⁴ Maxinikariko ia. Natokopa itxa aõtãkikakakinıua atiraõkiuatini ĩkapani, erekari akamini ĩkapani

apaka? ²⁵ !Apakata atakanapiniri aãpotiitiniua Teoso ĩkapani. Apanakini ! itotaikari apotiitiniua Teoso ĩkapani. Masikataparaxiniretakakaua. Apiata masikataparaxiniretakakaua, kotxi aãũte kanapiriini ĩkorapokoritimoni kaiamapeka.

²⁶ Atão inakari aimarotiniã, atão inakari aãpakapiniã, eereka maerekati akamapika, kotxi anirekari maerekati akamini. Iuasaaki ! auaika amaerekani ĩkitxitiko. Iuasaaki ! auaika amaerekani makatxakiko. ²⁷ Iuasaaki aimarotari kãkiti ikara atoko inakani misiritaãkako, kotxi Teoso mokaiakariakori itxauana. Arikatxi apiatakari xipokanako ninoa. Pĩkaretxinoka aua ninoa ĩkapani. ²⁸ Kitxakapirĩka kãkiti makĩpitakaniãri Moisesi paniãtakiti okapeẽkaika. Ipi, atxiĩti ipi ãti pakini kãkiti atamatiniãri iua kaminiri maerekati, ininiã okaãka. !Auiritaãka imitekini. ²⁹ Ininiã natokopa itxa kãkiti misiritiko Teoso ãkiri sãkire imakĩpitakaniã? Apiata iua misiritiko, kotxi Teoso ãkiri ikatxaratini atoko itxa imakĩpitakaniri iua sãkire. Iuasaaki ! ipaxitari iua arẽka amaerekani makatxakakari Teoso sikaenetakiti. Iuasaaki imisãkirepiretari Erekaru Matamatakoti, ikinipoko erekari sikakari. ³⁰ Aimarotari ia sãpiretakari. Iua txari: Notanoka xikatxirauata. Notanoka misiritanako ninoa imaerekanina xika, itxa Teoso.

Apaka Teoso sãkire iõkatsopatakoru txari:

Apiananirinoka sãpiretari kãkiti inakitiakori misiritiko.

³¹ Kãkiti maerekati kamakani apokasaaki Teoso ãtipirika auãki inakari apisatoõ, iuasaaki pamonõkoniri, kotxi kãkiti misiritakari itxaua.

³² Hĩxinikariko merepitipanika Teoso sãkire hãuikini õti. Hĩikite iopinikiko atoko itxa iuasaaki. Iuasaaki himarotari Teoso sãkire. Iuasaaki iteene hãtatsirauata Xesosi sãkire hãuikini xika. Iuaritika iuasaaki hĩtaparaxinireritika hãua. Iuasaaki !hĩtakanapari Xesosi sãkire hãuikini. ³³ Iuasaaki kãkiti apisatoõ apanakini napetai. Ninoa misãkirepiretai hĩte. Imisiritaina hĩte. Iuasaaki hĩte moianatari apanakini Teoso sãkire auĩãkani, kãkiti misiritakini. Ininiã iuasaaki hĩte apaka misiritaãka. ³⁴ Hĩtoretana apanakini Teoso sãkire auĩãkani kateia ãki auakani. Apanakini mixirikari hĩtii Kristo sãkire hãuikini xika, iuaritika hĩpoxokoniua, kotxi iuasaaki himarotapekari auapitika iaxiti hĩtii Teoso sikakiti. ĩkora tiitxi kona xipoka. Apiaerekata tiitxi iuaxiti auakari.

³⁵ Ininiã kona hĩtakanapapiri hĩtaparaxinire, kotxi ãti õti Teoso ĩkitxitai hĩtaparaxinire auiniã. ³⁶ Himĩteenekariko ikinika Kristo ĩkapani. Hĩkamariko ikinika hĩtaparaxinireritika. Ininiã Teoso paniãtakiti hĩkamakasaaki, hãpakapariko isikaenetakiti. ³⁷ Teoso sãkire iõkatsopatakoru txari:

Apikomoni mokatanitika iua kanapiriãko. Iketo õti ikanapiriãpitika.

³⁸ Kãkiti atão inakari kamakari auini erekari, kotxi auikari nota sãkire. Kãkiti sipikapapiretiniãri nisãkire, nota !apokaerekataru iua, itxa Teoso. ³⁹ Ate kona sipikapapiretari Teoso sãkire. Ininiã !axipokaãka. Teoso sãkire auĩãkani atxaua ate. Iua makatxakari amaerekani aãkixinireẽ auakari.

11

Teoso Sãkire Auikiko Pirena

¹ Atão aãuikasaakiri Teoso sãkire, iuasaaki aimarotapitikari aãpakapiniri aiãtapakiti. Atão aãuikasaakiri Teoso sãkire, iuasaaki aimarotari amata-matakiniti auapitika. ² Kitxakapirĩka Teoso apokaerekatana isãkire auĩãkani, kotxi iteene auikarina isãkire.

³ Teoso sãkire aãuikasaaki, aimarotari iua kamari itixi, iaxiti pakini isãkireẽnokara. Aãtamatakitiã ! ikamari itixi, iaxiti pakini. Isãkireẽnokara ikamari ikinipoko.

Teoso Sākire Auiākari Apeo Inakori
(Xénesisi 4.2-12)

⁴ Apeo inakori auikari Teoso sākire, ininiã Teosomoni isikakiti apiaerekata, kotxi Apeo sikari Teosomoni Teoso sākire iaõka. Itari Kaiĩ inakori sikakiti poião erekari. Apeo auikari Teoso sākire, ininiã Teoso apokaerekatari iua sikakiti. Teosomoni atão inakari kamakari itxaua Apeo. Kitxakapirĩka Apeo koriã, iuaritika iua auikiniri Teoso sākire oerekapanikaua Teoso tiritiniri kãkiti isãkire auiãkani.

Teoso Sākire Auiākari Enoki Inakori
(Xénesisi 5.21-24)

⁵ Enoki inakori apaka auikari Teoso sākire. Ininiã Teoso anikari iua iaxiti. Kona ipina. Mapĩkatipanika anikaãka Teosomoni. Iuasaaki kãkiti ! apokaikari iua, kotxi Teoso anikapekari iua. Isini apisa kãkiti imarotari Teoso apokaerekatiniri iua. Iua kamapoxokonitari Teoso. ⁶ Teoso sākire amauikakaniã, kona akamapoxokonitari Teoso. Kãkiti Teosomoni apoãkari, merepanika auikariko Teoso auini. Apaka ninoa auikariko Teoso sakiniri erekari kaiãopokori iua nitakarimoni.

Teoso Sākire Auiākari Noee Inakori
(Xénesisi 5.28-9.29)

⁷ Noee apaka auikari Teoso sākire. Teoso sãpiretari iua kãkiti mimarotakiniti monõkoni. Iuasaaki iua pĩkarauata, ininiã ikamari maporo mitari iua aapoko ãki auakani mapinakani ĩkapani. Noee auikari Teoso sākire, ininiã isãpiretari Teoso misiritiniri kãkiti imaerekani xika. Teoso txĩkitakari iua atão inakari ikamini, kotxi iua auikari Teoso sākire.

Teoso Sākire Auiākari Apraão Inakori

⁸ Apraão apaka auikari Teoso sākire, Teoso paniãtakasaakiri iua ãtiãtaã isini. Iua kĩpitari Teoso sākire, ininiã iua sari, txamari kona imarotari isinimoni. ⁹ Iua auikari Teoso sākire, ininiã iua aua Teoso sikaenetakiti tixitiã. Iuaã iua aapoko aamata kamakori, kotxi ãti tixinikiri itxaua. Apaka Isaki, Xakoo pakini aua aapokotxi aamata kamakori. Ninoa apaka apakapari itixi Teoso sikaenetakiti. ¹⁰ Apraão iãtapari Teoso sitatxine apokini, kotxi Teoso kamari ikara sitatxi. Ixinikakiti iaõka ikamari. Ikara sitatxi kamaãka kaikori nopini, ininiã !ixipoka.

¹¹ Apraão auikari Teoso sākire. Iua imarotari ikiomaneẽpeka inini. Apaka imarotari ĩtanoro Sara kona posotaikari keene onini. Iuaritika auikari Teoso sākire irĩtxi ininiua ĩkapani. Imarotari Teoso sikapitakariko isikaenetakiti. ¹² Ininiã iua kiki iteene kiomãtxi inakariua, iuaritika irĩtxi itxaua. Iua aua itomaneri imekaniriakori, itomaneri apika mekaniriakori pakini. Itomaneri apika mekaniriakori iõriki iaxiti auakani atoko itxanako. Ikipatxite atoko itxanako apika mekaniriakori. Kaiãopanina ninoa.

Teoso Sākire Auiãkani Iãtapakiti

¹³ Ikinika ninoa kãkiti Apeo, Enoki, Noee, Apraão pakini auikari Teoso sākire. Ikorĩãkasaakina, ninoa kona apakaparina ikinika Teoso sikaenetakiti. Ninoa imarotari Teoso sikaenetakiti õtakopanikari apokini tĩkane. Ninoamoni ĩkorapokoriti kona atão ninoa tixine. Maparakini atoko itxauana. ¹⁴ Kãkiti ikara atoko inakani oerekari ninoa nitiniri ninoaka tixine. ¹⁵ Itixi itakanapakitina ixinikaãkamanako, ininiã iuaĩkana ikanapiriãmanako iuaãtaã. ¹⁶ Ninoa kona kanapiriã, kotxi inirekarina apiaerekatakari itixiti, iaxiti auakari. Ininiã Teoso !ipẽtauata ninoa Teosone ininiua ĩkapani, kotxi iua kamapekari sitatxi ninoa ĩkapani.

Apraão Okaaritiniri Imi

¹⁷ Apraão auikari Teoso sãkire, Teoso ataerekatakasaakiri iua. Iuasaaki iposope okiniri Isaki Teoso ïkapani. Teoso sikaenetakiti apakapakari iua Apraão. Iposope imatonõkari imi okini Teoso ïkapani. ¹⁸ Teoso sãpiretapekari iua: “Isakimoni auako pimekaniriakori, papika mekaniriakori pakini,” itxari. ¹⁹ Iuasaaki Apraão xinikari Isaki ipininiã, Teoso õkitikari iua iuaïkana. Iuasaaki Isaki ipinaarita, ininiã kãkiti ipïkari iuaïkana õkitikiniua atoko itxa Isaki iuasaaki.

Isaki, Xakoo, Xosee Pakini Auikiniri Teoso Sãkire

²⁰ Isaki apaka auikari Teoso sãkire, kotxi itakari erekari imi Xakoo, Isaoo pakinimoni, Teoso nireẽkiti iaõka ikaminina tïkane. ²¹ Xakoo apaka auikari Teoso sãkire. Ikorini apisa itakari erekari Xosee anaakorimoni. Iuasaaki isãpiretari Teoso iua ereka inini. Iuasaaki iioïtekaua itsonarekeẽ. ²² Xosee apaka auikari Teoso sãkire. Ipinini apisa isãpiretana Isaeokini Exito osipikinina ïkapani. Ininiã iua paniãtana ninoa anikiniri iua api Teoso siãkiti itixitimoni.

Moisesi Auikiniri Teoso Sãkire

²³ Moisesi iri, inoro pakini auikari Teoso sãkire. Iponaniãka atoko, ninoa kipatari iua ipi ãti pakini kasiriti. Iuasaaki imarotarina Moisesi kona ãti eenetxi atokoni. Ipinimoni itxa. Ninoa imarotari Paraoo paniãtiniri amarini okiko, iuaritika !ipïkarina Paraoo paniãtakiti.

²⁴ Moisesi auikari Teoso sãkire. Mitapeka inakasaaki, kona inirekari kãkiti akiritiniri iua Paraoo ãkero ãkiri ininiua. ²⁵ Iua mereẽri imisiritiko Teoso nakitiakorikata. Ininiã iua sari ninoakata. !Inirekari poxokonitxi maerekati kamakiti, kotxi ikara poxokonitxi mokatanitika xipoka. ²⁶ Iuamoni api-aerekata ninoa xinitiniri iua Kristo sãkire auikini xika. Kona iua nirekari katiiri ininiua Exito auakanikata, kotxi imarotari ãti õti Teoso sikiniri iua iparïka ïki.

²⁷ Exito ipotorikasaaki, iua auikari Teoso sãkire. Iuasaaki Exito auakani auïte omanãkarauata. Iuaritika !ipïkari iua. Imïteenekari ikinipoko, kotxi auikari Matamatakoti sãkire. Atamatakiti sãkire auikini atokotxikana, auikari imatamatakiniti sãkire. ²⁸ Iua auikari Teoso sãkire, ininiã ipaniãtari kãkiti okiniri soti auïte. Eereka ipaniãtari itakiniri iarëka ïronakikoãtaã tinikata. Ininiã Teoso nitiri ipïkitxi mïkari iaxitikiri ninoa nopini inapaãpotakasaaki, kona okari Isaeokini merepanika auakani, kotxi atamatari arëkatxi.

²⁹ Kãkiti Isaeokini auikari Teoso sãkire, ininiã ïpiriãtarina potxoari uiniti Põkamarariã inakori sonãkakari kimaporiti nopini. Kãkiti Exitokini apaka nirekari inapinina ninoa napini atoko. Txamari iuasaaki ãparaã kanapiriãpe iua kimapori nopini, ininiã ïkinika ninoani axãpoãtape.

Teoso Sãkire Auiãkani Kãiatini

³⁰ Isaeokini auikari Teoso sãkire, ininiã Xerikoo sitatxiti iakirokana setxi pakini õti. Iuasaaki pirikeri sitatxi ãkitakari irikapoakata, kotxi ninoa kamari Teoso sãkire iaõka.

³¹ Haapi inakoro kanokarero otxaua mitxi. Eereka oãuikari Teoso sãkire, kotxi oãpakapana kãkiti iuaãtaã apokakani, Teoso iokanatakini, ininiã kona okoriã kãkiti Teoso sãkire mauïãkanikata.

³² Kiripa apikomoni nisãpiretai? Auapitika apikomoni itomaneri kãkiti Teoso sãkire auiãkani. Kona apakata uatxa nisãpiretinii hïte Kitxiãõ pirena, Paraki pirena, Sãsãõ pirena, Xepitee pirena, Tavii pirena, Samoeo pirena, apanakini Teoso sãkire sãpiretakani pirena pakini. ³³ Ninoa kãkiti auikari Teoso sãkire. Ininiã inaiatakasaakina Teoso sãkire mauïãkani, ninoa kãiata. Ninoa kamari atãõ inakarinoka. Iuasaaki apakaparina Teoso sikaenetakiti.

Ninoa okaãka âkitimoni. Iuaritika kona âkiti okana. Âkiti nama totaãka iuasaaki. ³⁴ Xaminamoni okapeëkana, iuaritika xamina !arikana. Kona apakata okikona iouata mitaroã. Ninoa mataparani, iuaritika kataparaxinirepeka itxana, kotxi auikarina Teoso sãkire. Neenamatchi auakasaaki, pataparana ninoa, ininiã âti uãka sotatoakori miteka.

³⁵ Sitoakoro Teoso sãkire auiaãkani iuaãkana aua imiakori, kotxi Teoso ôkitikana ninoa ipãkasaakina. Apanakini Teoso sãkire auiaãkani noropataãka. Imatakanapakaniãrina Teoso sãkire auikinina, okaãkana, iuaritika ninoa ! inirekarina itakanapinirina, kotxi ninoa imarotari âti ôti Teoso ôkitikana ninoa. Iuasaaki apiaerekata ninoa apakapakiti.

³⁶ Apanakini Teoso sãkire auiaãkani napetaãka. Inoropataãkana aãpitsaã. Apanakini Teoso sãkire auiaãkani iaxirikaãka, kateia âki taka inaãkana. ³⁷ Apanakini kiporonakaãka kai soroã. Apanakini kãkiti sehotxiã kitxirãkaãka apanãkaki iãtona, auãkipanika inakasaakina. Apanakini okapeëka iouata mitaroã. Apanakini mãka soti auãte mata, potxi mata pakini. ! Kamãkana. !Katiina. Maerekati kamakani nitana ninoa okinina ãkapani. Imisiritapeëkana. ³⁸ !Apakata ãkorapokoriti ninoa ãkapani, kotxi ninoa iteene erekari.

Ninoa miteëkata ãparaã makipakaniãtaã, ôtanoxiratari auiniãtaã apaka. Aariko itixiãkiriã, kai iriko âki apaka apanakini Teoso sãkire auiaãkani aua, kotxi aapokona !auari.

³⁹ Teosomoni peerekana ninoa, kotxi iteene auikarina iua sãkire. Iuaritika ninoa !apakapapanikari Teoso sikaenetakiti iuasaaki. ⁴⁰ Teoso nirekari apiari erekari ate ãkapani. Inirekana ninoa atekata aãpakapiniri isikaenetakiti.

12

Teoso Oerekari Atão Iua Anaakori Aniniua

¹ Ininiã kaiãopokori Teoso sãkire auiaãkani itixine apokakani atamataua ate uatxa. Ininiã matakanapari ikinika ate iomakotetakari. Matakanapari maerekati akamakiti, kotxi ikara patimari iaxirikiniri axinire. Ataparaxinireritika maãuako. Mamãteenekari ikinipoko. Mitekakani mitekinì atoko mamitekako Teoso oerekinimoni. ² Âtipirika maãtamatarì Xesosi. Maãuikari iua sãkire, kotxi iuanoka amaerekani makatxakakari. Iua txãkitakaua ate atão aãuikiniri Teoso sãkire. Xesosi xinikari poxokonitxi apokini ôti, ininiã iuasaaki imãteenekari aamina ãpiriãmitakari nopini ipinini. !Imaãkatari pãtatxi ikara atoko ipinini. Ikinipoko iposo atoko iitopãka iri kikomoni, kotxi iparãka ate ãkapani iposope. ³ Hãxinikariko Xesosi. Itene imãteenekari maerekati kamakani manirekakaniri iua. Hãxinikariko iua, ininiã kataparaxinirei hãte. Iuasaaki ! hiõkapeta.

⁴ Hãrãka kona xiketapanika maerekati hãtakanapini xika. Ininiã hãte kona naiatari maerekati iua Xesosi naiatiniri atoko. ⁵ Atxiãti himaxinãkaretari Teoso sãpiretakiti ate isikataparaxiniretini ãkapani. Iua akiritaua iua anaakori aniniua. Ia isãkire:

Namarite, Apiananiri auiritai pite atatsiirauatini atão inakari pimartini ãkapani, ininiã kona pimatinaniuatape iua misiritakasaakii pimarekani xika.

⁶ Kotxi Apiananiri misiritana itiretakini maerekati ikamakasaakina, imaerekani itakanapinina ãkapani. Imisiritana ikinimane iua anaakori atão inakari imarotinina ãkapani.

⁷ Ininiã himãteenekariko hãri iaxitikiri misiritinii himaerekani xika. Ikara himisiritiko oerekai Teoso anaakori hininiua, kotxi inãkatarì hãte amarini irãtxi nãkatini atokokana. Ikinì irãtxi ãkorapokoriti auakari misiritari iua anaakori atão erekari ikaminina ãkapani. ⁸ Teoso mamisiritakaniãi hãte

maerekati hīkamakasaaki, ininiā iua anaakori atāo inakani !hītḡaua. Teoso hīri !itḡaua iuasaaki. Ikinimane Teoso sākire auiākani misiritaāka, maerekati ikamakasaakina. ⁹ Akinika ate irītḡi aua īkorapokoriti. Ninoa misiritaua maerekati akamakasaaki. Iuaritika ate paxitana ninoa. Apiata apaxitari aīri iaxiti auakari imisiritakasaakiaua ate, maerekati akamakasaaki, kotxi axinire iri itḡaua. Ininiā akamakasaakirī aīri iaxiti auakari nireēkiti, aāuapininiika atxako. ¹⁰ Īkorapokoriti auakani irītḡi misiritaua maerekati akamakasaaki. Mapakananinani ikara atoko ikamana. Imarotakitina iaōka ikamana. Teoso misiritaua maerekati akamakasaaki ereka anini īkapani iua atoko anini īkapani. ¹¹ Amisiritikosaaki, kona apoxokoniuaata, kotxi patsiiri. Iuaritika eereka akamari atāo inakarinnoka. Iuasaaki erekaxinireua, kotxi Teoso oerekapekaua atakanapiniri amaerekani imisiritakasaakiaua.

¹² Ininiā hōkitikari hīuako sāpakakari. Hīkamataparatarari hīpotoriki iōkapetakari. ¹³ Hōeretariko kimapori atāo hīsini īkapani. Ikinika himaerekani hītakanapako. Ininiā hīkamakiti atāo inakari aua. Ininiā apanakini hīte amatakani !irika hīte maerekani xika. Ininiā maerekati !ikamana, kotxi hīte oerekapekana erekari imarotinina īkapani. Ininiā erekapekana ninoa.

¹⁴ Ikinipoko hīkamako apanakinikata himaneenamauatakani īkapani. Ikinipoko hīkamako erekarinnoka hīkamini īkapani. Kākiti makamakanisaakiri erekari, kona atamatapaniri Apiananiri. ¹⁵ Erepaniko, kotxi atxiīti kona hāpakapari ikinipoko erekari Teoso siākiti. Kona hāuiritapiri kapixi inakari aneini hākixinireē, kotxi ikara maxikari kaiāori kākiti. Itxikotari ninoa ākixinire. ¹⁶ Kona hāuiritapiri anokaretxi kamakani auini hītekata. Kona hāuiritapiri Teoso manirekakiniti kamakari Isao atoko inakari auini hīte sauaki. Merepitipanika iponaniākari iua Isao, txamari isikari iri sikaenetakiti itarimoni axapitiki nipokori apakapini īkapani. ¹⁷ Eereka iuaīkana inirekamari ikara iri sikaenetakiti. Inirekari iri takiniri erekari iuamoni, txamari !apakataika iua apakapiniri. Itxiapata, kotxi mitxi ikamakiti inirekari imamakini, txamari iposope itarimoni iri sikaenetakiti isikini.

¹⁸ Kitxakapirīka kākiti Isaeokini sari ixirata Sinai inakorimoni Teoso paniātakiti apakapinina īkapani. Iuasaaki ixirata arika. Ipiā, itima kataparari apaka aua iuasaaki. Ikara atoko inakari ixiratamoni kākiti maātakakitimoni !haāpoka. ¹⁹ Ixirata Sinai inakoriātaā kākiti kenakotari trōpeta. Ikenakotari iaxitikiri sākire. Iuasaaki iteene ipīkarena auana, ininiā !inirekaikarina ikenakotinirina apikomoni ikara sākiretxi. ²⁰ Kotxi iuasaaki !imīteenekarina ia Teoso paniātakiti, kotxi iuasaaki Teoso txari: “Kākiti, pirātxipeka apaka maātakiniāri oxiratari, ikiporonakaākana kai soroā ipininina īkapani.” ²¹ Iua xirata auīte kamari kākiti pīkarauatini. Iuasaaki Moisesi txari: “Nititinanaka. Iteene nipīkarauata,” itxa.

²² Hīte kona apoka oxiratari Sinai inakorimoni. Hīte apokapeka ixirata auīte iaxitikiri Siāo inakorimoni. Hāpokapeka Xerosareē sitatxiti iaxitikirimoni, Teoso ātipirika auāki inakari sitatxineātaā. Hīte apokapeka Teoso nitiriakori iaxitikini apotiitiniātaāua. Ninoa iaōtiko !auari, kotxi kaiāopokori. ²³ Hīte apopeka Teoso mereēkini apotiitiniātaāua. Ipoxxokoniuatana. Teoso anaakori itḡauana. Iuākana iōkatsopatapeēkaika Teoso aātsopateē itixineē. Hīte apopeka Teosomoni. Iuara sāpiretari kākiti misiritiko. Apaka iua īkitxitana atāo inakari kamakani erekari ikamakiti īkapani. Hīte apopeka erekari kamakanimoni. Teoso txīkitakana ninoa atāo inakari ikaminina. ²⁴ Hīte apoka Xesosimoni. Iuara txīkitakari Teoso kamaenetakiti amaneri apokini. Xesosi arēka xiketakasaaki, hīte apoka Teosomoni. Apeo oxiketari pirātxi

arêka imaerekani makatzakiko ïkapani. Kristo oxiketari iuaka arêka âtitatika amaerekani imakatzakini ïkapani, ininiã Kristo arêka apiaerekata.

²⁵ Ininiã erepaniko. Hïkenakotariko Teoso sãkire isãkirauatakasaaki. Kitxakapirïka kãkiti manirekakaniãri Teoso sãkire sãpiretakari ïkorapokoriti auakari, imisiritaãkana. Imitekinina !auari. Teoso tixine auakari sãkire amanirekakaniã, apiata amisiritiko. Amitekini !auari, ininiã erepaniko. ²⁶ Teoso misãkiretakasaakiri Moisesi, itixi iakeka. Uatxa Teoso sãpiretari ikamaenetakiti. Itxari: “Iuaïkana niõkokariko itixi. Niõkokariko iaxiti apaka,” itxa. ²⁷ Isãkire “iuaïkana,” kotxi iõkokariko ikinipoko ikamakiti. Ninoa makatzakaãkako. Auapitikako maiõkokaeëtakoni. Ikara kaikotako.

²⁸ Teoso auïtetxi ininiãtaãua, ate sinimoni, !iõkokaãka. Iuaãtaã ixipokini !auari. Ininiã mapoxokoniuaata. Masãpiretari iua: “Peerekai pite.” Atão maparïkauata Teoso ïkapani. Makamari iua apokaerekatakiti. Mapaxitari iua. Mapïkari iua manirekakiniti akamini. ²⁹ Kotxi aTeosone xipokari imanirekakiniti, xamina tirinakari xipokiniri atokokana.

13

Iõkatsopari Mapotõkire Pirena

¹ Ininiã hïtiretakakauako. Itaritxi atoko hïtxako, kotxi Teoso anaakori hïtxaua. ² Ätiãtaã ïkani apokiniã, hãpakapanako ninoa haãpoko. Apanakini apakapakasaakina ätiãtaã ïkani, apakapana Teoso nitiriakori itixinekini. Iuasaaki ïmarotarina ninoa Teoso nitiriakori ininiuana. ³ Hïtiretanako Teoso sãkire auiãkani kateia äki auakani. Kateia äki ninoakata hãuini atokokana, hïxinikanako ninoa. Ininiã hïtiretanako misiritakoni. Kãkiti misiritiniãi hïte, iuasaaki hinirekari apanakini tiretini. Iua atokotxikana hïtiretanako misiritakoni.

⁴ Hïpaxitaroko äti ïtanoro. Hïpaxitariko äto ïtaniri. Pïtanirikatanani pisirïkako. Pïtanorokatanani pisirïkako. Teoso misiritanako ikinika kanokarero, kanokareri pakini.

⁵ Txineiro !hïtiretape. !Hinirekapiri äti kãkiti nakiti. Hïpoxokotariko hïteka tii, hïteka txineirote pakini. Apikomoni !hinirekape, kotxi Teoso txari: Nimatakanapapekaniikaraiko hïte. Nimasikapekaniikaraiko hïte, itxa. ⁶ Ininiã ia Teoso sãkire iõkatsopatakori aãuika:

Apiananiri nimoianari itxaua, ininiã kona nipïkari kãkiti kaminiri maerekati notamoni.

⁷ Hïxinikariko hãuïteakori Teoso sãkire hïtemoni sãpiretakani. Hïxinikariko ninoa auini, ninoa ipinini apaka. Hãuikariko Teoso sãkire ninoa auikiniri atokotxikana. ⁸ Xesosi Kristo kitxakapirïka atokotxikana uatxa. Xesosi Kristo uatxa atokotxikana ätipirika.

⁹ Kona hãuikapiri apanakini oerekakiti atão minakati, kotxi ikini sereti oerekakori atão minakati auapitika. Hãuiritariko ikinipoko erekari Teoso sikakiti sikataparatiniri hãkixinire. Anikakiti !isikataparatarari aãkixinire, ininiã !hãuikapiri kãkiti sãpiretini apanakini nipokori erekari hïxinire ïkapani, apanakini nipokori !erekari hïxinire ïkapani.

¹⁰ Sasetotxiakori Teoso aapoko aamata kamakori äki parïkauatakani Teosomoni sikakori takikoãtaã !apakaparina erekari Teoso sikakiti ate apakapiniri atokokana.

¹¹ Teoso aapoko aamata kamakori auakasaaki, sasetotxiakori auïte apitakari anikari pirãtxi arêka Teosonani Auini Pakitaãtaã. Iuaã isikari pirãtxi arêka Teosomoni kãkiti maerekani Teoso makatzakini ïkapani. Iua pirãtxi ïto anikaãka aapokotxi mapotõkire. Iuaã arikaãka. ¹² Xesosi pirãtxi okakori atoko itxa, kotxi anikaãka sitatxi mapotõkire okiko ïkapani. Ininiã iua arêkaã

imakatxakari kākiti maerekani, ikamaerekatina ĩkapani. ¹³ Ininiã masa iuamoni ipininiãtaã. Iua napetiko atokokana maãpakapa. ¹⁴ ĩkorapokoriti kona aua sitatxi maxipoãkati. Aiãtapari sitatxi iaxiti ĩkari.

¹⁵ Kipa asika Xesosimoni Teoso ĩkapani? Ātipirika masikari asãkire erekari. Matxari: “Peerekari Teoso.” Ikara asikakiti Teosomoni, kotxi asãpiretari kākiti iua aãũte ininiua. ¹⁶ !Himaxinĩkaretapiri erekari hĩkamini apanakini-moni. !Himaxinĩkaretapiri himoianatakakiniua. Ikara atoko akaminiã, Teosomoni asikakiti inireẽkiti atoko itxa, ininiã ikara atoko inakari akaminiã, ikamapoxokonitari Teoso.

¹⁷ Hĩkĩpitariko hĩauĩteakori sãkire. Hĩkamariko ninoa paniãtakiti, kotxi ninoa nĩkatari hĩxinire. Teoso sikari ikara parĩkatxi ninoamoni, ininiã ãti õti ninoa sãpiretari Teoso ikamakitina. Ininiã hĩkamariko ninoa paniãtakiti, ininiã iuasaaki ninoa poxokoniuata iparĩkauatakasaaki. Himakamakaniãri ninoa paniãtakiti, ninoa matinaniuata, ininiã ikara atoko inakari !erekari hĩte ĩkapani.

¹⁸ Himisãkiretariko Teoso ate ĩkapani. Aimarotari aãkixinire ereka inini, kotxi anirekari ikiniõtika atão inakarínoka akamini. ¹⁹ Iteene namanaã himisãkiretiniri Teoso, iua paĩtiki iokanatinino iuaĩkana hĩtemoni.

Teoso Misãkiretiko

²⁰ Nimisãkiretari Teoso, kākiti kamaerekaxiniretakari. Aãũte Xesosi ipĩkaripeka inakasaaki, Teoso õkitikari iua. Soti auĩte atoko atxaua. Soti auĩte nĩkatakari apiari atoko itxa Xesosi, ininiã iua iteene nĩkataua. Xesosi ipĩkasaaki, iuasaaki kākiti apakapari Teoso sikaenetakiti. Ātipirika Teoso sikari ikara isikaenetakiti kãkitimoni. ²¹ Nimisãkiretari Teoso isikiniri ikinika erekari hinireẽkiti hĩtemoni, iua nireẽkiti hĩkamini ĩkapani. Namanaãri iua Xesosi Kristo uãkaã, ikaminaua ate iua apokaerekatakiti. Ātipirika kākiti txari Xesosi: “Erekai pite.” Ameẽ.

²² Nitariakori, iteene hĩkenakotariko ikara nisãpiretakiti. Ia niõkatsopatakiti xapitinoka.

²³ Ninirekari himarotiniri aĩtari Tximótxio kateia ãki auakari sikakaãka. Mokatanitika iua apokiniã uai, nota sari iuakata hĩtemoni. ²⁴ Hĩsãpiretari hĩauĩteakori ate xinikamanapitinina ninoa. Hĩsãpiretari ikinimane Teoso naki-tiakori axinikamanapitinina. Xesosi sãkire auĩãkani uai Itãria tixini auakani xinikamanapitai hĩte. ²⁵ Ikinipoko erekari Teoso sikakiti aua hĩtemoni.

Ameẽ.

TXIAKO

Txiako Iokanatsopatakiti

¹ Nota Txiako. Teoso nitiri nitxaua. Apiananiri Xesosi Kristo nitiri nitxaua apaka. Niõkatsopatari ia aãtsopa hĩtemoni, Xoteoakori tosi nirimanetximoni Xesosi sãkire auiãkanimoni. Hĩte iarikape ikinika itixiti.

Ereẽkai hĩte.

Auiãkori Ataerekatiko

² Nitariakori, ikini sereti maerekati apokasaaki hĩtemoni, hieneniãkako, kotxi ikara ataerekatai hĩte. ³ Kotxi himarotari hãuiãkiti ataerekatikosaaki, hĩtaparaxinireritika hãua. Himĩteenekari imakinika himisiritiko hĩpoxokoniritika. ⁴ Ininiã imakinika himĩteenekasaaki, hĩxinikakiti, hĩsãkire, hĩkamakiti pakini erekari. Kona apikomoni pinireka ereka pinini ĩkapani.

⁵ Himarore mauakanisaaki, hamanaãri Teoso imarore isikinii ĩkapani. Ininiã isikaiko hĩte hamanaãkiti. Itori Teoso sikakiti ikinimanemoni. ! Isãpaka ate ãtipirika aamanainiri iua. !Itxitai. Isikapitikari hamanaãkiti.

⁶ Hamanaãkasaakiri, hãuikariko Teoso sikinii hamanaãkiti. !Erekari hĩxinikiniri: “Atxiĩti iua sikano namanaãkiti. Atxiĩti kona isikano namanaãkiti.” Ikara atoko !hĩxinikape. Ikara atoko xinikakari, tsakati potxoari uinitikiri atoko itxa. ĩtima anikari tsakati itano, eereka ixitika. Kãkiti ikara atoko inakari, ãti õti auikari Teoso sãkire, ãti õti kona auikari Teoso sãkire. Itxaãpota.

⁷ Kãkiti ikara atoko inakari kona xatiki apakapari Apiananiri siãkiti, ⁸ kotxi ipi ixinikakiti aua, ininiã apanakini !auikari isãkire ikamakiti tĩkane.

Matiiti, Katiiri Pakini Poxokoniuatini

⁹ Pite aĩtari Teoso sãkire auiãkarii, atxiĩti poiãori pitxaua, iuaritika pipox-okoniuatoko, kotxi Teoso txĩkitakai pite apiari pininiua. ¹⁰ Pite katiirii, pipox-okoniuatoko, kotxi Teoso kamapoiãotakai pite, kotxi katimari pixipokini aãui katimari xipokini atoko. ¹¹ Atokatxi kanĩkasaaki, kapatakari itxaua. Iusaaki katsotati txiaroka. Iui katxaka. !Erekaikaro. Iua atokokana kãkiti katiiri xipokini. Paĩtiki ipinako, ininiã itakanapariko imakinika itii, iparĩka pakini.

Misirikaretxi Mĩteenekakani

¹² Teoso takari erekari kãkitimoni imisiritiko mĩteenekakarimoni, Teoso sãkire matakanapakatimoni. Ikinipoko imĩteenekasaaki, Teoso txĩkitakari iua ãtipirika auini Teosokata. Apiananiri sikaenetari ikara iua tirketanimoni.

¹³ Pinirekasaakiri maerekati pikamini, kona pitxapiri: “Teoso sikanireõtano maerekati nikamini,” kotxi Teoso kamanireõtiko maerekati ikamini ĩkapani !auari. Apaka kona Teoso sikanireõtari kãkiti maerekati ikamini ĩkapani. ¹⁴ Kãkiti sikanireõtaãka maerekati ikamini, kotxi iua ĩto nireẽkiti kosekari iua maerekati ikamini. Iusaaki iteene inirekari inireẽkiti ikamini. ¹⁵ Maerekati piĩto nireẽkiti pikamakasaaki, maerekati itxaua. Ininiã eereka maerekati pikamapika. Eereka iua maerekati txĩkitakari pixinire ipinini.

¹⁶ Nitariakori nota tirketakini, kona hãuiritapiri ãti misirienetini. ¹⁷ Ikinipoko sikakori erekari atão inakari, iaxitikiri itxaua. Aĩri sikakiti ikara. Iuara kamari atokatxi, kasiri, iõriki pakini ponikini. Iua ãtipirika kamari erekarinoka. Kita, uatxa, katana pakini, iua atokotxikana aĩri Teoso. ¹⁸ Aponaniã iuaĩkana aãkixinireẽ, kotxi aãuikari iua sãkire. Iua nirekari aponaniini ikara atoko. Teoso kamari ikinipoko. Ikamakini, merepanika iuaĩkana ponaniãkani, atxaua ate.

Teoso Sākire Kīpitiko Pirena

¹⁹ Ininiā nitariakori nota tirketakini, iteene himixinikariko āti sākire. Eereka iteene hīxinikariko hīkenakotakiti, hīsākirauatini apisapanika. Katima ! hītxape hinaiatiniua. Hinaiatiniua apisa hīxinikariko hīkamakiti tīkane, ²⁰ kotxi kākiti omanākarauatakasaaki, !ikamari atāo inakari Teoso paniātakiti iaōka. ²¹ Ininiā hōkariko ikinika maerekati hākixinire txikotakari. Hītakanapariko ikinipoko maerekati. Hāuikariko Teoso sākire hākixinireē takakori. Himarotariko iuanoka makatxakiniri himaerekani.

²² Teoso sākire akenakotakanani atxa, !hītxape. Hīkamariko isākire iaōka apaka. Teoso sākire kenakotakani makamakaniāri ipaniātakiti, ninoaka misirienetaua. ²³ Teoso sākire kenakotakari makamakaniāri isākire iaōka, kiki ātakaāriā atamatoōtakari atoko itxa. ²⁴ Iua itoō atamataka atoko, isa. Iuasaakipeka imaxinīkaretoōtapekaua. Isanōka !ixinikaika. ²⁵ Ikinika Teoso paniātakiti erekari. Maerekati kamakani iaxirikakoni atoko. !Iposotarina erekari ikaminina. Ininiā kākiti kamakasaakiri Teoso paniātakiti, Teoso paniātakiti sikakari kākiti erekari ikamini ikapani. Kākiti iteene imarotiniāri Teoso paniātakiti, imamaxinīkaretakaniāri, ātipirika ikaminiāri, ininiā Teoso takari erekari iuamoni, ikamakitimoni.

²⁶ Kākiti sāpiretiniāri: “Nota auikari Teoso sākire. Nikamari iua sākire iaōka,” txamari kākiti nini iauīte atoko itxa. !Iposotari iotokakiniri maerekati isāpiretini. Iuaka misirienetaua. Iua auīākiti na atāo. Ikamakiti na atāo apaka. ²⁷ Kākiti auīākiti atāo inakari auakasaaki, ikamakiti atāo inakari auakasaaki, aīri Teoso apokaerekatari. Iua kākiti kamari ia atoko: Itiretana imenōkariakori, tikinitakoni pakini, kotxi mauareni ninoa. !Auiritari iikorapokoriti maerekati txikotiniri iua ākixinire.

2

Hīpaxitana Ikini Kākiti

¹ Nitariakori, Xesosi Kristo aāuīte Apiananiri itxaua. Iua sākire atāo auīākani hininiāua, ininiā hīpaxitariko ikinimane kākiti. !Apakata hīpotxitakininani hītiretini. ² Maxinikariko. Atxiīti hāpotiitakasaakiaua, kiki apoka eremākari. Iuakokiā aneo oro kamakoro aua. Apaka iuasaaki apoka āti kiki matiiti. Kitxakari imāka. ³ !Apakata hīpaxitiniri eremākarinoka. Hīsāpiretiniāri: “Uai iitopanatxi ereri nopini piitopāka,” pitxari. Txamari hīsāpiretari matiiti: “Ikiraā pitima.” Atxiīti hīsāpiretari iua: “Uai ixiti nikiti takote piitopāka,” pitxari. Ikara atoko hīkaminiā, !apakata. ⁴ Ikara atoko hīkamakasaaki, hīxinikari katiiri apiaerekatini, matiiti poiāo ereka inini. Iuasaaki hīxiniākiti na atāo itxaua. Hākixinire maerekati itxaua.

⁵ Nitariakori nota tirketakini, hīkenakotariko nisākire. Teoso mereēpekari matiini iikorapokoriti auakani isākire iteene auikinina ikapani. Ininiā ninoa Teoso tirketakani sariko Teoso auītetxi ininiātaāua. Ikara isikaenetapeka iua tirketanimoni. ⁶ Txamari hīte kona paxitana matiini. !Apakata. Katiirinira misirienetai hīte. Ninoa anikai hīte kākiti misiritiko mereēkanimoni. ⁷ Ninoa katiirini misākirepiretari Teoso. Peerekari iua uāka, iuaritika ninoa kona paxitari iuāka. Ninoa misākirepiretakiti nakitiakori hītxaua hīte.

⁸ Kitxakapirīka Teoso sākire iōkatsopatakori txari: Piteka pitiretiniua atokokanera, pitiretanako pite takote auakani. Ikara ikinimane auīte paniātakiti hīkaminiā, hīkamari atāo inakari. ⁹ Hītiretiniāri hīpotxitakininani, maerekati hīkama. Ikara Teoso paniātakiti oerekai maerekati kamakani hininiāua. ¹⁰ Ikinika Teoso paniātakiti hīkaminiā, txamari ātinoka Teoso paniātakiti himakamakaniā, ininiā ikinika ipaniātakiti makamakani atoko hītxaua. ¹¹ Teoso txari:

Kona pisirĩkape pĩtanoro minakotokatika.

Apaka itxari:

Kona pokaniuatape.

Atxiĩti kona pisirĩka pĩtanoro minakotokatika, txamari pokaniuata, ininiãkara !pikamari ikinika Teoso paniãtakiti. Åatika Teoso paniãtakiti pimakamakaniã, !apakata. Ikara atoko ininiã, Teosomoni maerekati kamakari pitxaua.

¹² Teoso sãkire iaõka akaminiã, aposotari erekari akamini. Ōpoĩkakoni atoko atxaua. Maerekati !imaĩkaikaua. Ininiãkara atão hĩsãkirauatako. Atão inakari hĩkamako, kotxi Teoso kamariko hĩtemoni isãkire iaõka. ¹³ Himaamonĩkakaniãri ãti, Teoso kona amonĩkai hĩte. Imereẽri himisiritiko. Apiaerekata hiamonĩkiniri ãti, maerekati ikamakasaaki. Poião erekari himisiritiniri iua imaerekani xika.

Kãkiti Sãkire, Kãkiti Kamakiti Pakini Pirena

¹⁴ Nitariakori, kãkiti txari: “Nota Teoso sãkire auiãkari nitxaua,” itxamari, !ikamari Teoso nirekaãkiti. Atauako iua auikari Teoso sãkire? Atauako, iua sãkire posotari imaktxakiniri imaerekani Teosomoni isini ĩkapani? Konapitini. ¹⁵ Atxiĩti hĩtari, atxiĩti hĩtaro Teoso sãkire auiãkani imãkana !auari. Atxiĩti nipokori !auari ninoamoni. ¹⁶ Iuasaaki atxiĩti hĩtxana: “Hĩsipiniikaua, erekaxinire hinini. Kamãkaiko. Iteene hinikako,” hĩtxana atxiĩti. Txamari iuasaaki mãkatxi !hĩsikana, nipokori !hĩsikana. Ikara atoko hĩkaminiã, !apakata hĩkamakiti. Hĩsãkirenanira hĩsikiniã, ininiã maxikatiĩka hĩsãpiretakiti. ¹⁷ Atxiĩti ikara atoko atxa. Asãpiretari aũuikiniri Xesosi sãkire. Txamari kona akamari ipaniãtakiti. Ikara atoko aniniã, asãkire kona itxa. Aũuiãkiti sãkiretxiti ipinakarari atoko itxa. !Kakamareri iua.

¹⁸ Kãkiti atxiĩti txari: “Pite auikari Teoso sãkire. Nota parĩkauata Teoso ĩkapani.” Piposotari atxiĩti poerekinino pauĩãkiti, Teoso paniãtakiti pimakamakanisaaki? Kona piposota, kotxi atão pauĩãkiti !auari. Notapekana, nota posotari noerekiniri nisãkire nauĩãkiti nikamakitiã Teoso paniãtakiti nikamakasaaki. Ikara atoko nininiã, kãkiti imarotapitikari atão nauikiniri Xesosi sãkire. ¹⁹ Pite auikari ãtinani Teoso auini. Ininiã erekapitikari pauikakiti. Txamari ikara !imaktxakarari pimaerekani Teosomoni pisini ĩkapani, kotxi Satanasi nitiriakori apaka auikari ãtinani Teoso auini. Iua xika ninoa titinanaka ipĩkarauatiniãna. Ninoa imarotari ãti õti ixipokinina.

²⁰ !Kiĩketei pite. Pinirekatari noerekinii !apakata pisãkireẽ pauikiniri Xesosi sãkire, iua paniãtakiti iaõka pimakamakanisaaki. Iuasaaki pisãkire na atão. Ipĩkari atoko itxa. ²¹ Maxinikariko ate apika atokirini, Apraão. Kitxakapirĩka isikasaakiri amarite Isaki inakori Teosomoni sikakori takikoãtaã, iuasaaki Teoso apokaerekatari ikamakiti, kotxi ikamakiti oerekari Teoso, iua auikiniri isãkire, ininiã Teoso kamaerekatari iua. ²² Ininiã himarotari atão iua auikiniri Teoso sãkire. Ikamakiti oerekari isãkire atão inini. Hĩxinikari iua. Atão ikamari Teoso paniãtakiti, ininiã atão iua auikari Teoso sãkire. ²³ Ininiã Teoso sãkire iõkatsopatakori apokapeka. Itxari:

Apraão auikari Teoso sãkire, ininiã Teoso txĩkitakari iua atão inakari ikamini, Teoso apakapiniri ĩkapani.

Ininiã iua akiritaãka Teoso moianari. ²⁴ Ininiãkara ia himarota. Teoso kamaerekatari kãkiti ãkixinire isãkire iaõka ikamakasaaki. Kona Teoso kamaerekatari kãkiti ãkixinire, isãkirenoka auakasaaki. Inirekari atamatiniri kãkiti parĩka apaka.

²⁵ Åto atão Teoso sãkire auiãkaro nisãpiretai hĩte. Kitxakapirĩka kanokarero Haapi inakoro aua. Teoso kamaerekatari oa ãkixinire, kotxi oa apakapana Xosoe iokanatakini otixine apokasaakina. Oaãpoko okipatana ninoa. Iuasaaki oa oerekana ãti kimaporiti imitekinina ĩkapani.

²⁶ Kākiti ĩtoã ixinire mauakanisaaki, iua ipĩpe. Iua !kakamareri. Ininiã iua atokokana iua sãkire iua auĩãkiti ipinakari atoko, erekari imakamakanisaaki. Iua auĩãkitinani, isãkirenani, !imakatxakari imaerekani.

3

Kākiti Nini Pirena

¹ Nitariakori, !apakata itori hĩte Teoso sãkire oerekakani hininiua, kotxi ate Teoso sãkire oerekakani maerekati akamakasaaki, apiata Teoso misiritaua ate. ² Amakinika ate kerokapanikari. Kākiti makerokakaniãri isãkire, ininiã erekari iua. !Auiritari ĩto kaminiri maerekati.

³ Anirekasaakiri kavaro kĩpitiniri anireẽkiti, atakari inamaã metaoke ĩpiriãketakari. Ininiã iusaaki ikamariko anireẽkiti. Ia metaoke axapitikeri, iuaritika aposotari akakiriokiniri kavaro, ininiã isari anirekinimoni.

⁴ Apaka hĩxinikaroko maporo. Maporo mitaro. ĩtima kataparari anikaro. Maporo oerekakire axapitiki, iuaritika kākiti kakiriokaro maporo oerekakireẽ, ininiã maporo sari kākiti nirekinimoni.

⁵ Iua atokokana, aĩtoã auakari anini apaka axapitiki, iuaritika iposotari iteene maerekati ikamini. Hĩxinikariko. Xaminaminiki axapitiki, iuaritika iposotari iotikiniri itori kikio. ⁶ Iua atokokana ninitxi. Xamina tirinakari atoko itxa, ininiã kona erekari. Maerekati ninitxi sãpiretakiti. Iarika kākiti xinireẽ ikinika, xamina ĩtopa iarikini atoko. Ininiã iua maerekatnoka itxa, ininiã ikinipoko ikamakiti maerekatnoka. Maerekani misiritikoãtaã ĩkari itxa asãkire maerekati. Xamina tirinakari iuaãtaãkiri atoko itxa asãkire maerekati.

⁷ Kākiti piratari ikini sereti kaxipiri ĩtopakiri, kotipiriki, imini, iaã auakari pakini. Itori kākiti piratapeka. ⁸ Txamari ninitxi paneenamari. Kākiti ! iposotari imĩkapiritiniri inini. Kona ikamari anireẽkiti. Imini katsiiri atoko itxa. Imini tsii posotari okiniri kākiti. Iua atokokana, kākiti sãpiretakiti posotari okiniri kākiti.

⁹ Anini posotari isãpiretiniri erekari aĩri aũĩtemoni. Apaka iposotari maerekati isãpiretini kãkitimoni. ĩkora atoko !erekari, kotxi Teoso kamari kākiti iuaka atoko inakari ĩkapani. ¹⁰ Anamaã potorika erekari, maerekati pakini. Nitariakori, ia koketakori na atão. !Apakata. ¹¹ Amomo !oposotari ãparaã ponikoãri, posiãri pakini otxĩkitakini. ¹² Nitariakori, atauako mãka mina iritari iõpeta? Atauako iõpeta mina iritari mãka? Konapitini. Apaka amomo ãparaã ponikoãri !auari ãparaã maxiãri pakini. Iua atokokana kākiti sãkire. !Apakata kākiti ãti õti isãkire ereka inini, ãti õti isãkire maerekati inini.

Imaroretxi Pirena

¹³ Kiripa kimaroreri hĩte sauaki auakari? Kākiti atão kimaroreri inakari, oerekari imarore ikamakiti erekari ikamakasaaki. Erekari ikamakasaaki, !iuikaua, kotxi atão imaroretxi auiniã kãkitimoni, !auiritari iua iuikiniua. ¹⁴ Txamari pinĩkatiniãri xikoretxi papixiri pãkixinireẽ, piteka nireẽkitinani pinirekiniã pãkixinireẽ, kona pitxape: “Kimaroreno nota.” Iusaaki kona pikipatapiri atão inakari. ¹⁵ ĩkora pimarore !iaxitikirini. ĩkorapokoritikirinokara ikara pimarore. Ikara pimarore piĩto nireẽkitikara. Imaroretxi ikara atoko inakari Satanasi oerekakiti. ¹⁶ Xikoretxi auakasaaki, piteka nireẽkitinani pinirekini auakasaaki, ikara atoko inakasaaki, neenamtxinoka aua, ikini sereti maerekati aua apaka.

¹⁷ Imaroretxi iaxiti ĩkari kona ikara atokoni itxa. Iua imaroretxi imarotakari, erekarinoka ikama. !Inirekari neenamtxi. Merepitipanika ixinikari apanakini kākiti nireẽkiti. Apiananiri nireẽkiti ikama. Iamonĩkari ãti. Erekarinoka ikama ãtimoni. Apiarimoni isãkire atokotxikana isãkire

poiãorimoni. Ikamakiti isãkire iaõka itxa. ¹⁸ Kauaĩreri õtãkikari apanakini imaneenamauatakani, ininiãkara itori kãkiti kamari atão inakarinoa.

4

Īkorapokoriti Auakani Nireẽkiti !Hinirekape

¹ Neenamatzixi auakasaaki hĩtemoni, hĩtxitakakasaakiaua, nãpa ikara atoko inakari potorika? Hãkixinireẽ ipotorika neenamatzixi. Hinireẽkiti maerekati xika hineenamauata. ² Hinireẽkiti kona hãpakapa, ininiã hõkari ãti. Iteene hinirekari ãti nakiti, txamari !hãpakapari hinireẽkiti. Hĩtxitakakaua. Hineenamauata. Txamari kona hãpakapari hinireẽkiti. Kona hamanaãri Teoso hinireẽkiti hãpakapini ĩkapani. Ikara xika kona hãpakapari hinireẽkiti. ³ Atxiĩti Teoso hamanaãkasaaki, kona hãpakapari hinirekakitixi, kotxi hamanaãkasaaki, maerekati hĩxinikapana. Hinirekari hãpakapiniri hamanaãkitixi hĩtenani ĩkapani, hĩtenoka poxokoniuatini ĩkapani. Ikara xika Teoso !isikai hinireẽkiti.

⁴ Kanokarero, kanokareri pakini atoko hĩtxaua. Hĩte takanapari Teoso, ĩkorapokoriti auakaninoka hĩtoretini ĩkapani. Hĩtoretiniãri ĩkorapokoritinoka, iuasaaki homanatarixi Teoso. Hinirekiniãri ĩkorapokoriti auakani nireẽkiti, ininiã Teoso mokaiakari hĩtxaua. ⁵ Kona maxikatiĩka Teoso sãkire iõkatsopatakori sãpiretaua ia atoko inakari:

Erekari Matamatakoti aãkixinireẽ auakari nirekari iteene anirekiniri Teoso turetiniua. Iua !inirekari anirekiniri ĩkorapokoriti auakaninoka turetiniua.

⁶ Teoso sikari iteene erekari atemoni, kotxi Teoso sãkire iõkatsopatakori txari: Teoso !apokaerekatari kãkiti iuikakaniua. !Imoianatana ninoa. Kãkiti miuikakaniua, ikinipoko erekari isika ninoamoni.

⁷ Ininiã hãuiritariko Teoso hãuĩte ininiua. Iua nireẽkitinoka hĩkamako. Kona hĩkamapiri Satanasi nireẽkiti. Kona hĩkĩpitapiri iua sãkire, ininiã eereka iua miteka. ⁸ Teosomoni hãpokako, ininiã iua apoka hĩtemoni. Maerekati kamakani hininiãua, hĩtakanapariko himaerekani. Kona hãuiritapiri hũuako kaminiri maerekati. Hĩtepekana, hĩte sãkire ipinimoni itxa. Hãkixinire xinikakiti ipinimoni itxa. Ininiãkara hĩokanatariko maerekati hãkixinire auakari, erekarinoka kaikotini ĩkapani. ⁹ Himatinaniuatako, hĩtxiapatako iteene, maerekati hĩkamakiti xika. Hĩtakanapariko hĩsiroatini hĩtxiapatini ĩkapani. Hĩtakanapariko hĩpoxokoniuatini himatinaniuatini ĩkapani. Ikara atoko hĩkamako, maerekati hĩkamakiti xika. ¹⁰ Apiananirimoni hĩtxariko: “Nimaerekani xika !erekano nota. Minakati nitxaua. !Niposotari erekari nikamini. Piamonĩkano,” hĩtxariko Teoso. Eereka iua sikataparaxiniretai hĩte.

!Himisãkirepiretapiri Hĩtari

¹¹ Nitariakori, !himisãkirepiretakakapeua. ãti misãkirepiretiniãri ãti, kona ipaxitari Teoso paniãtakiti. ãti akiritiniãri ãti: “Maerekati kamakari,” akiritari Teoso paniãtakiti: “maerekati.” Ikara atoko inakasaaki, iuamoni iuaka sãkire apiata, ininiã iua !ikamari Teoso paniãtakiti iaõka. ¹² Teosonokara atão inakari imarotakari aua. Iuanoka posotari isãpiretiniri kãkiti: “Pite kamakiti kona erekari. Pitepekana kamakiti erekari.” Iuanoka posotari ikara atoko ininii, kotxi iuanoka posotari kãkiti maerekani imakatzakini. Iuanoka posotari iokanatiniri kãkiti imisiritikomoni. !Apakata ikara atoko hĩte ininiri apanakini.

Katana Kamaenetakori

¹³ Atxiĩti hĩte txari: “Atxiĩti uatxa, atxiĩti katana asa sitatximoni. Anapariko ãtikanani iuaãtaã. Aparĩkauata itomane txineiro aãpakapini ĩkapani,” hĩtxama.

¹⁴ Txamari kona himarotari katana auakari tĩkane. Kanatokopa itxa kãkiti?

Ianiñ atoko itxa kākiti. Ianiñ apoka, eereka patimari ixipokini. Ikara atoko kākiti auini. ¹⁵ Apiaerekata hīsākire ia atoko hinini: “Teoso nirekiniāri, nauapanika ninakasaaki, nikamariko ikara parīkatxi,” hītxako. ¹⁶ Ikara atoko himasākirauatakaniā, hūikaua, kotxi hūikari hīkamakiti tīkane. Maerekati ikara atoko inakari. ¹⁷ Ininiā erepaniko. Kākiti erekari imarotakani makamakaniāri ikara erekari imarotakiti, ikamari maerekati.

5

Katiiri Pirena

¹ Hīkenakotariko nisākire. Ikinika katiirini kapotxinanirini hīkenakotariko nisākire. Hītxiapatako. Hākiripoatako, kotxi itori hātatsiire apokako hītemoni. ² Hītii paiakapeka. Kapite nikapekari himāka. ³ Hinakiti oro kamakori, pirata kamakori pakini oereēkatapeka. Ikara oerekari hīkamakiti !apakata. Hītii xipokini atoko, hīte apaka xipokako. Apiata himisiritiko. Maxikatiīka hāpotiitari hītii, kotxi itixi xipokini ōti apokanapanoka. ⁴ Himarotariko ia. Kākiti hīte kikioteē parīkauatakasaaki, himisirienetana ninoa. Na atāo hīikitxitana iparīkana īki. Ininiā ninoa akiritari Teoso. Iuasaaki Apiananiri kaposotiireri kenakotari ninoa sākire. ⁵ Īkorapokoriti hāuakasaaki, ikinipoko aua hītemoni. Hiamotari ikinika hīito potxitakiti. Kākiti sikari kema auīte ito kienatxi, okiko ōti manapi paīperi inini ĩkapani. ⁶ Hīte iokanatapekari kākiti erekarini ipininimoni. Hōkapekana ninoa maxikatiīka. Ninoani kona naiatai hīte, iuaritika hōkana ninoani.

Apiananiri Kanapiriini Hiātapini

⁷ Nitariakori, atxiīti hītemoni !katimari Apiananiri kanapiriini, iuaritika hiātapariko hīpoxokoniritika, kotxi himarotapitikari āti ōti iua kanapiriini. Hīxinikariko katakareri. Iua iātapapikari itakare aneini, ikiena iposope inikini ĩkapani. Iātapari āparaā kipini itakare aneini ĩkapani. Iua imarotapitikari ikiena aneini, ininiā iātapari. ⁸ Iua atokokana hiātapariko Apiananiri kanapiriini. Hītaparaxinireritika hiātapari, kotxi Xesosi kaiaapeka ikanapiriini. ⁹ Nitariakori, kona hītxitakapeua. Hītxitakaniāua, hāpakapariko himisiritiko. Kākiti misiritiko mereēkari kaiaapeka apokini hītemoni.

¹⁰ Nitariakori, hīxinikariko Teoso sākire sāpiretakani, kitxakapirīka auakani, sāpiretari Teoso sākire Teoso posotiireē. Ninoa misiritaāka, iuaritika ninoa mīteenekari imakinika. Ninoa oerekaua amīteenekiniri imakinika. ¹¹ Ari, aimarotari Teoso takari erekari misirikaretxi mīteeneēkanimoni. Hīxinikari Xo inakori. Iua iteene atatsiirauata, iuaritika, !itapanapari Teoso. Atatsiirauataka atoko, Apiananiri sikari ikini sereti erekari iuamoni, kotxi katiraōkiri, kaamonīkareri itxaua iua.

¹² Nitariakori, “Ari,” hinakasaaki, “Kona,” hinakasaaki, kona maxikatiīka hīsākirauatape. Hīkamariko hīsāpiretakiti iaōka. Hīkamaenetakiti hīsāpiretakasaaki, kona hākiritapiri Teoso tixine auakani uāka, kona hākiritapiri itixi auakani uāka, hīsāpiretakiti apanakini atāo imarotini ĩkapani. Na atāo hīsākire ininiā, Teoso misiritapitakai.

Teoso Misākiretiko Kākiti ĩkapani

¹³ Hātatsiirauatakasaaki, himisākiretariko Teoso. Hīpoxokiniuatakasaaki, hīxikarauata Teoso ĩkapani. ¹⁴ Āti amianatakasaaki, hīpīkapiretanako kōtākikarerini Xesosi sākire auīākani Teoso imisākiretinina amianatakari ĩkapani. Iuasaaki itakarina iītxi iua amianatakari nopini Apiananiri uākaā. ¹⁵ Hāuikiniāri Teoso posotiire himisākiretakasaakiri Teoso, iua makananitapitikari iua amianatakari. Ininiā Apiananiri ōkitikariko iua. Maerekati ikaminiā, Teoso makatxakari imaerekani apaka. ¹⁶ Ininiā

hĩkerokakiti hĩsãpiretakakauako. Himisãkiretariko Teoso ãti ĩkapani. Ininiã apanakini misãkiretariko Teoso hĩte ĩkapani. Iua atokokana, Teoso txĩkitakari hãkixinire ereka inini. Atão inakarínoka kamakari sãkire kataparari, Teosokata isãkirauatakasaaki, kotxi Teoso kamapitikari iua amanaãkiti iaõka.

¹⁷ Kitxakapirĩka Eríasi inakori, ate atoko inakari iua. Iua misãkiretari Teoso itapararitika ãparaã makipakani ĩkapani. Ikara atoko inakasaaki, ãparaã ! ĩkipa ĩpi ãti pakini anokanani, seisi kasiriti. ¹⁸ Iuaĩkana imisãkiretari Teoso ãparaã iuaĩkana ĩkipini ĩkapani. Ininiã ãparaã kipa. Iuaĩkana itixi iriuata.

¹⁹ Nitariakori, ãti takanapiniãri atão inakari Teoso sãkire, hõtãkikariko iua Teosomoni ikanapiriini ĩkapani. ²⁰ Maerekati kamakari takanapiniãri imaerekani, iua põtãkikasaaki, ininiã pite makatxakapekari iua ĩpinini. Teoso makatxakari ĩkinipoko maerekati ikamakiti.

1 PETRO

Merepanika Petro Iokanatsopatakiti

¹ Petro nitxaua nota. Xesosi Kristo iokanatakiti nitxaua. Niokanatsopata hīte Xesosi sākire auīākanimoni. Hīte iarikape Pōto tixiniā, Karásia tixiniā, Kapatósia tixiniā, Ásia tixiniā, Pitxínia tixiniā pakini. Hītakanapari hīteka tixine Xesosi sākire hāuikini xika. Āti uākakata hāuanāta.

² Aīri Teoso mereēi hīte iua nakitiakori hininiua īkapani. Itixi kamiko apisa, iua imarotapekari hīte iua anaakori hininiua. Erekarī Matamatakoti parīkauata hākixinireē Teoso nireēkitinoka hīkamini īkapani. Ininiā uatxa hīposotiire aua Xesosi Kristo paniātakiti hīkamini īkapani, kotxi Xesosi Kristo arēka xikepoata hīte īkapani. Teoso sikari ikinipoko erekari hītemoni. Itori isikai. Iteene ikamaerekaxiniretai.

Kākiti Maerekani Makatxakiko

³ Mamisākiretari Teoso: “Peerekai pite. Aāuīte Xesosi Kristo Teosone pitxaua. Iua iri pitxaua,” matxari. Maerekati kamakaniua, iuaritika iteene iamoniākaua. Itxīkitakari axinire iuaīkana iponaniini, kotxi Xesosi Kristo ipina, iuaritika iuaīkana ōkitikaua. Ininiā ikiniōtika aimarotari Teoso kaminiri ikinipoko ikamaenetakiti. ⁴ Iuaīkana axinire iponaniā, ininiā iua anaakori atxaua. Ininiā aīri potetakiti erekari aua itixineē aāpakapini īkapani. Ikara ipotetakiti !ixipoka. !Oerēkata. Auapika. Teoso nīkatari ikara hīte īkapani.

⁵ Hīte auikari Teoso sākire, ininiā iposotiire tokapakeētai hīte. Hīte itokapakeētinititika Xesosi kanapiriāko xipokatxi ōtisaaki. ⁶ Ikara himarota, ininiā iteene hīpoxokoniuata. Uatxa atxiīti !erekaxinirei hīte, kotxi ikini sereti maerekati apoka hītemoni. ⁷ Ikini sereti himaxikiko apoka hītemoni, kotxi iusaaki Teoso imarotari atāo hāuikiniri iua sākire, himīteenekiniāri himaxikiko. Iusaaki Teoso ataerekatai hīte, oro ataerekatiko atokokana. Kākiti axitaro oro otxiko makatxakiko īkapani, oronoka kaikotini īkapani. Iusaaki peerekaro. Pakaronero. Iuaritika āti ōti oxipokaākako. Erekaro oro, iuaritika apiaerekata hāuikiniri Teoso sākire, kotxi isākire hāuikini !ixipoka. Xesosi Kristo kanapiriākasaaki īkorapokoriti, Teoso sāpiretaiko hīte: “Erekarī hāuikiniri nisākire, kotxi himīteenekari ikinipoko. Peerekai hīte,” itxaiko hīte. Iusaaki hīto iotximere auape Xesosi iotximere atokokana.

⁸ Hīte kona aōkitapanikari Teoso, iuaritika hītiretari iua. Kona hātamatapanikari, iuaritika hāuikari iua sākire. Ininiā hīte iteene poxokoniuata. Kākiti sākireē !apakata hīsāpiretiniri hīpoxokoni. ⁹ Hīpoxokoniuata, kotxi himaerekani makatxakaākapeka. Ininiā hīxinire !ipinaika, kotxi hāuikari Xesosi sākire.

¹⁰ Kitxakapirīka Teoso sākire sāpiretakani nirekamari imarotininina kākiti maerekani makatxakiko. Initarina ikara imarotininina Teoso sākire iōkatsopatakoriā. Iteene apaiaōkarauatana ikara imarotininina īkapani. Ninoa sāpiretari ikara erekari, Teoso āti ōti sikiniri kākiti. ¹¹ Inirekarina imarotininina ikara erekari apokini ōti. “Kisaakipa apoka atxiīti? Natokopa itxa apokini?” itxanātana. Iusaaki Erekarī Matamatakoti oerekana ninoa ākixinireēna Kristo atatsiirauatini tīkane. Oerekana ninoa Kristo atatsiirauatini xipoka atoko, ikinimane auīte itxauako. Peerekari iusaaki.

¹² Kitxakapirīka Teoso sāpiretari ikamakiti tīkane isākire sāpiretakanimoni, kona ninoanoka imarotini īkapanini. Ninoa sāpiretari Teoso kamakiti tīkane hīte īkapani, kotxi uatxa apokapeka ninoa sākire iaōka. Kitxakapirīka Teoso sāpiretari ikamakiti tīkane ninoamoni, ate uatxa imarotini īkapani. Teoso

iokanapirena erekari sãpiretakani sãpiretapekai uatxa ikara Teoso sãpiretakiti kitxakapirĩka. Teoso paniãtari Erekari Matamatakoti potorikini itixine uai apokini ĩkapani. Erekari Matamatakoti posotiireẽ ninoa sãpiretari Teoso iokanapirena erekari. Teoso nitiriakori iaxitikini iteene nirekamari imarotininirina hĩte imarotakiti.

Ereka Hĩtxako

¹³ Ininiã iposope hĩtxako hĩxinikiniri atão inakari hĩkamini. !Hĩkamapiri maerekati hĩto nireẽkiti. Itene hãuikariko hãpakapiniri ikinipoko erekari Teoso sikakiti Xesosi Kristo kanapiriãkasaaki. ¹⁴ Amarini kaminiri iri paniãtakiti atokotxikana, hĩkamariko Teoso paniãtakiti. Xesosi sãkire himimarotakanisaaki, hĩkamari maerekati hinireẽkiti. Uatxa !hĩkamapinikariko. ¹⁵ Hĩte akiritakari kamari erekarinoka, ininiã iua atokokana erekarinoka hĩkama ikiniõtika. ¹⁶ Teoso sãkire iõkatsopatakori txari: Erekarinoka hĩkamako, kotxi nota kamari erekarinoka, itxa Teoso kitxakapirĩka.

¹⁷ Himisãkiretari hĩri iaxiti auakari. Atãonoka ikaminana ikinimane kãkiti iparĩkana atamatakasaaki. Ininiã kãkiti kamakasaakiri maerekati, aĩri misiritiniri ãti atokotxikana, imisiritari ãti. Himitekini !auari. Hĩxinikariko, haãpoko atão inakari ĩkorapokoriti !auari. Teoso tixineẽ aua haãpoko. Ininiã ĩkorapokoriti hãuakasaaki, iteene hĩpaxitariko Teoso. Hĩpĩkariko iua manirekakiniti hĩkamini. ¹⁸ Mitxi !apakata hãuini, kotxi iuasaaki hĩkamari hãtokiriakorini sãkire iaõka. Uatxa Xesosi oerekai ãtião hãuini, kotxi iamotai hĩte, iua nakitiakori hininiua ĩkapani. Himarotari iamotini. !Iamotai pirataã. !Iamotai oroã. !Iamotai txineiroã, kotxi pirata, oro, txineiro pakini xipokako. ¹⁹ Kristo arẽkaã iamotai hĩte, kotxi ipĩkasaaki iamotai hĩte. Peerekari iua arẽka, kotxi iua arẽka makatxakari amaerekani. Soti auĩte erekari atoko itxa Kristo. Kona maerekati aua iuamoni. ²⁰ Itixi kamiko apisa, Teoso mereẽri iua. Iua apoka uai himaerekani imakatxakini ĩkapani. ²¹ Xesosi txĩkitakai hĩte auikiniri Teoso auini, kotxi Teoso iuaĩkana õkitikari Xesosi ipĩkani sauaki. Iuasaaki isãpiretari Xesosi ikinika ikamakiti ereka inini. Ikara atoko ininiã, hãuikari Teoso sãkire. Himarotari isãkire iaõka ikamini. ²² Erekari Matamatakoti oerekapekai atão inakari, ininiã uatxa hĩkamari atão inakari. Ikara atoko ininiã, hãkixinire erekari. Ininiãkara atão hĩtoretari hĩtariakori. Ininiã iteene hĩtoretakakauako hãkixinireẽ.

²³ Hĩte xinire iuaĩkana iponaniãpeka. Teoso sãkireẽ hĩxinire iponaniã iuaĩkana. Teoso sãkire auapika. !Ixipoka. Ininiã iua anaakori hĩtxaua. Hĩri ĩkorapokoriti auakani xipoka. Hĩri iaxiti auakari !ixipoka, ininiã hĩte iua anaakori !ixipoka apaka. ²⁴ Teoso sãkire iõkatsopatakori txari: Kãkiti katsotati atoko itxa. Katsotati paĩtiki ipinini. Iua atokokana patimari kãkiti ipina. Ikinika erekari ikamakiti, aãui atoko itxa. Aãui patimari ipinini. Iua atokokana patimari kãkiti kamakiti xipokini.

²⁵ Iuaritika Teoso sãkire auapika. !Kaxiporeri, itxa Teoso sãkire iõkatsopatakori. Teoso sãkirepitikara sãpiretaãkapeka hĩtemoni, hĩkenakotakasaakiri Teoso iokanapirena erekari.

2

¹ Ininiãkara hĩtakanapariko ikinipoko maerekati hĩkamakiti. !Himisiriene-tapiri ãti. Hĩkamariko hĩsãkire iaõka. !Hĩxikotapiri ãti. !Himisãkirepiretapiri ãti. Ikini sereti maerekati kãkiti kamakiti hĩtakanapako.

² Hinirekariko Teoso sãkire makoketakoti. Tinitxiã imi axapitiri nirekini atokokana, hinirekariko Teoso sãkire. Teoso sãkire hãpakapakasaaki, himaroãpotari iua, ininiã apiaãpota hãuikiniri iua sãkire. ³ Kotxi uatxa himarotapekari Apiananiri ereka inini.

Kai Atoko Itxa Xesosi

⁴ Ininiã h̄sako Xesosimoni, kotxi auapika inakari itxaua. Kai aapokotxi kamakari manirekakiniti atoko itxa Xesosi. K̄akiti !inirekari iua. Iuaritika Teoso mereēri iua. Teoso tiretakiti itxaua Xesosi. ⁵ H̄ite apaka kai atoko h̄itxaua Teoso aapoko ĩkapani. Itx̄ikitakari h̄ixinire auãki inini, kotxi iua naki-tiakori h̄itxaua. Ininiã, Teoso aapoko atoko h̄itxaua. Ininiã iua aapoko ãki sasetotxi h̄itxaua, iua ĩkapani h̄iparĩkauatini. Ininiã h̄sīkariko iua amanaãkiti, iua nireēkiti. Iua apakapariko h̄sīkakiti, kotxi Xesosi Kristo makatxakapekari himaerekani. ⁶ Teoso s̄akire iōkatsopatakori txari:

H̄atamata. Nitakari kai Sião sitatxitiã. Iua kai apiari, Teoso mereēkiti. Apiaerekata iua. Iua kai atoko inakari s̄akire auiãkani !ipētauata, itxa Teoso s̄akire.

⁷ Iua kai atoko inakari itxaua Xesosi. Peerekari Xesosi h̄itemoni, kotxi h̄ite auikari iua s̄akire. Āti iua atoko inakari !auari. Txamari is̄akire mak̄ipitakani !inirekari iua. Teoso s̄akire iōkatsopatakori txari:

Aiko kamakani txari: “!Apakata ia kai. !Anirekari.” Iuaritika iua kai apiari. Itakaãka aiko kamikosaaki, apanakini kai soro maĩkakari ininiua ĩkapani.

⁸ Iuaĩkana Teoso s̄akire iōkatsopatakori txari:

Iua kai xika k̄akiti m̄akitita. Iua kai xika k̄akiti irika, itxa Teoso s̄akire. Im̄akititana, kotxi !auikarina Teoso s̄akire. Teoso tx̄ikitakana ninoa irikini, kotxi !auikarina iua s̄akire.

⁹ H̄itepekana, Teoso mereēkini h̄itxaua. Sasetotxi h̄itxaua. H̄iparĩkauata Api-ananiri ĩkapani. H̄ite makatxakaãka maerekani sauaki erekarinoka h̄īkamini ĩkapani. Teoso nakitiakori h̄itxaua. Imereēi h̄ite iua ereka inini k̄akiti h̄ōerekini ĩkapani, kotxi ipiã h̄auakasaaki, iuara akiritai h̄ite ipiã h̄itakanapini ĩkapani. Itakai ikamaraã atão inakari himarotini ĩkapani. Peerekari iua kamara.

¹⁰ Mitxi Teoso nakitiakori !h̄itxaua. Uatxa Teoso nakitiakori h̄itxapekaua. Mitxi Teoso !amonĩkapanikai. Uatxa Teoso amonĩkapekai.

Teoso Nitiriakori Iamotakoni Pirena

¹¹ Nitiretakini, uai itixi h̄auakasaaki, ãti tixinikini atoko h̄itxa. Atão h̄ãapoko Teoso tixine aua. Īkorasaaki h̄isaãpota h̄ãapokomoni. Ininiã ikini nixinireritika nõtãkik̄ai h̄ite himakamakaniri maerekati h̄iito nireēkiti. H̄iito nireēkiti h̄ixinire mokaiakari atoko itxa. H̄iito !inirekari h̄ixinire nireēkiti.

¹² Teoso s̄akire mauĩãkani sauaki h̄auakasaaki, ikiniõtika erekarinoka h̄īkamako. Atxiĩti ninoa maxikatiĩka apoĩtai maerekati h̄īkamini, iuaritika iusaaki ninoa imarotari erekarinoka h̄īkamini. Ininiã Teoso ketotini õti manapi iua oerekariko atão inakari ninoamoni. Ininiã iusaaki ixinikarinako erekari h̄īkamakiti. Ininiã itxarinako Teoso: “Peerekai pite,” itxana.

H̄īkamariko H̄īauĩte Paniãtakiti

¹³ H̄īkamariko k̄akiti auĩtetakini paniãtakiti, kotxi Apiananiri nirekari ikara atoko h̄īkamini. Ikinimane h̄īauĩteakori paniãtakiti h̄īkamako. H̄īauĩte apiari paniãtakiti h̄īkamako. ¹⁴ H̄īauĩte poiãori paniãtakiti apaka h̄īkamako, kotxi h̄īauĩte apiari paniãtana h̄īauĩte poiãorini maerekati kamakani imisiritinina ĩkapani. Ipaniãtana ninoa is̄ãpiretinina erekari kamakani: “Erekapitikari h̄īkamakiti.” ¹⁵ Teoso nirekari h̄īkaminiri erekari, ininiã iusaaki miĩkiteni ! iposotari imis̄ãkirepiretinii h̄ite. !Kas̄akirena iusaaki, kotxi apanakini imarotari erekarinoka h̄īkamini. ¹⁶ H̄īposotari ikinipoko hinireēkiti h̄īkamini, kotxi Teoso sikakai h̄ite. Iuaritika kona hinirekapiri maerekati h̄īkamini. Teoso nitiriakori h̄itxaua, ininiã iua paniãtakitinoka h̄īkamako. ¹⁷ H̄īpaxitariko ikinimane. H̄ītiretanako ikinimane aĩtariakori Teoso s̄akire auiãkani. H̄īpĩkariko Teoso. H̄īpaxitariko h̄īauĩte apiari.

Hīkamariko Hīpatrāote Paniātakiti

¹⁸ Nitiritxiakori, hīkamariko hīpatrāote paniātakiti. Hīpaxitariko iua. Atxiīti iua tiretai. Atxiīti imisiritai. Iuaritika hīpaxitariko iua. ¹⁹ Erekapitikari himīteenekiniri kākiti misiritinii maxikatīka. Himīteenekiniāri, Teoso nireēkiti hīkamini īkapani, erekapitikari. ²⁰ Erekarī hīpatrāote misiritinii hīte, maerekati hīkamakasaaki. Iuasaaki himīteenekiniri himisiritiko kona txīkitakari Teoso apokaerekatinii. Erekarī hīkamakasaaki, himīteenekiniāri himisiritiko, iuasaaki Teosomoni erekapitikai.

Kristo Misiritiko

²¹ Teoso akiritai hīte inakitiakori hininiua īkapani, himisiritiko himīteenekini īkapani. Kristo misiritaāka hīte īkapani, ininiā iua nirekarī amīteenekiniri amisiritiko iua misiritiko imīteenekini atokokana.

²² Maerekati !ikama. !Imisirienetari āti.

²³ Ninoa misākirepiretakasaakiri iua, !apakapaenetana. Imisiritakasaakirina iua, !itxitana. !Isāpiretana imisiritinina imaerekanina xika. Iua auikari iri nīkatiniri iua, kotxi atāonoka kamakari itxaua Teoso. Atāo imarotari kākiti kamakiti. ²⁴ Aamina ĩpiriāmitakari nopini Xesosi ĩto misiritaāka ate maerekani xika. Ipina ate īkapani, apikomoni maerekati akamini amanirekakani īkapani. Inirekarī anireēkiti maerekati ipīkarī atoko inini. Itxīkitakari axinire auāki inini atāo inakarinoka akamini īkapani. Xesosi karo txīkitakaua erekape anini.

²⁵ Xesosi himarotini apisapanika, soti auīte pīpinanakakani atoko hītxa. Uatxa hīkanapiriāpeka hīpitikirimoni. Hīxinire nīkatarimoni hāpokapeka uatxa.

3*Taniritxi, Tanorotxi Pakini Ōtākikiko Pirena*

¹ Nitiritxi kaminiri ipatrāote paniātakiti atokokana, hīte tanorotxi hīkamariko hītaniri nireēkiti. Atxiīti hītaniri !auikari Teoso sākire, ininiā erekarinoka hīkamako. Atamatakasaakirina erekarī hīkamakiti, ninoa auikari Teoso sākire. Hīkamakiti erekarī txīkitakana auikinirina Teoso sākire. Hīsākirenoka !itxīkitakana auikinirina. ² Maerekati himakamakanisaaki ikiniōtika, Teoso iteene hīpaxitiniā ikiniōtika, iuasaaki ninoa auikari Teoso sākire atāo inini.

³ Apanakini sito xinikapikari oiāko oōeretini, oro oītoā otakini, omāka ereri oieretakini, oīto ere inini īkapaninani oxinika. Sito erero !oxinikari ikaranani.

⁴ Sito erero oākixinire ereri apaka. Hākixinire ereri inakasaaki, ikara ereri !ixipokapani. Hākixinire ereri inakasaaki, !hītxitapiri hītaniri. Hīkamari iua nireēkiti. Teosomoni apiaerekata hākixinire ereri inini.

⁵ Kitxakapirīka sitoākini ererini, Teoso sākire auīākani, ikara atoko inakani. Ninoa ākixinire erekarī, kotxi ikīpitarina ĩtanirina sākire. ⁶ Sara inakoro kamari Apraō sākire iaōka. Oa kamari Apraō paniātakiti, kotxi oamoni oa auīte itxaua Apraō. Sara anaakoro atoko hītxaua atāonoka hīkaminiā, himapīkarauatakaniā.

⁷ Hīte taniritxi, iua atokokana hīxinikariko erekarī hīkaminana hītanoro. Hīpaxitaroko hītanoro, kotxi !katapararo. Oa apaka hītekata apakapariko Teoso sikakiti erekarī. Iua txīkitakai hāuapininiika hinini iuakata. Hītiretaroko hītanoro, ininiā Teoso kenakotariko himisākiretiniri iua.

Himisiritiko Pirena

⁸ Ia nisākire mapotōkire nisāpiretai. Hīxinikakiti ātika xinikakiti atoko hītxako. Hiamonīkakauako. Hītiretariko āti, hītari hītiretini atokotxikana. Hīkamariko erekarī ātimoni. !Hīuikapeua. ⁹ Āti kaminiāri maerekati hītemoni, !hīkamapiri maerekati iuamoni. Āti misākirepiretakasaakii, kona hīte misākirepiretapiri iua. Āti kaminiāri maerekati hītemoni, iuasaaki hamanaāri Teoso sikiniri erekarī

iuamoni, kotxi Teoso paniātai ikara atoko inakari hīkamini, erekari Teoso sikakiti hīte apaka apakapini īkapani. ¹⁰ Teoso sākire iōkatsopatakori txari:

Pinirekiniāri pauini ereka inini, pinirekiniāri ikiniōtika pipoxokoniuatini, ! pauiritapiri pisākire maerekati inini. !Pimisirienetapiri āti.

¹¹ Pinirekiniāri pauini ereka inini, pitakanapariko maerekati pikamini. Erekarinoka pikamako. Pitakanapariko pineenamauatini. Pinirekariko kākiti auini ereka inini.

¹² Apiananiri nīkatari kākiti atāo inakari kamakani. Teoso imisākiretakasaakina, Teoso kenakotapitikari isākirena. Txamari Apiananiri misiritari maerekati kamakani,

itxa Teoso sākire kitxakapirīka.

¹³ Erekarī hīkamakasaaki, kākiti !inirekarī imisiritinī. ¹⁴ Atāo inakari hīkamakasaaki, kākiti misiritiniāi, hāpakapariko erekari Teoso sikakiti. Ininiā !hīpīkapena ninoa. Maerekaxiniretinoka !hītxape. ¹⁵ Hākixinireē hītxako: “Teosonoka niauīte. Apiananiri itxaua. Iua nireēkitinoka nikamako.” Ikara atoko hītxako. Hāpaiaōkariko Teoso sākire, isākire iteene himarotini īkapani. Ininiā kākiti pimainiāi: “Kinirepa hāuikari Teoso sākire?” Iusaaki himarotari hāpakapapiretiniri iua. Hāpakapapiretakasaakiri iua, !hītxitapiri. Hīpaxitariko iua iusaaki. ¹⁶ Hīsākirauatakasaaki, !hīsāpiretapiri hākixinire manirekakiniti. Hinirekariko erekari hākixinire nireēkiti hīkamini. Apanakini misākirepiretai. Ninoa atamatakasaakiri erekari hīkamakiti Kristo paniātakiti, ipētatarī imisākirepiretinī. ¹⁷ Teoso nirekiniāri hātatsiirauatini erekari hīkamini xika, ininiā erekari, kotxi iusaaki hīkamari erekari. Txamari hātatsiirauatiniā himaerekani hīkamini xika, !erekari, kotxi iusaaki hīkamari maerekati.

¹⁸ Xesosi Kristo ipina kākiti maerekani imakatzakini īkapani. Iusaaki iposope imakatzakiniri kākiti maerekani. Iuaīkana !atatsiirauataika kākiti maerekani imakatzakini īkapani. Erekarinoka kamakari ipīpe maerekati kamakani īkapani. Ipīpe, Teosomoni ate anikini īkapani. Iīto ipīpe, iuari-tika Erekarī Matamatakoti txīkitakari iua iuaīkana auāki inini. ¹⁹ Iusaaki Erekarī Matamatakoti posotiireē isari ipīkani auiniātaāmoni. Iuaā kateia āki ipīkani aua. Iuaā isāpiretana Teoso misiritinina ninoa, kotxi iuaka kāiata. ²⁰ Kitxakapirīka ninoa ipīkani, auākipanika inakasaakina, !inirekarina Teoso paniātakiti ikaminina. Iusaaki Noee kamanātari maporo. Teoso iātapana imaerekanina itakanapinina īkapani. Txamari !itakanaparina. Iusaaki poiāonoka !ipina. Oitonoka !ipina, xirataātxi apokasaaki. Teoso nīkatana ninoa imapinakani īkapani. ²¹ Ikara xirataātxi hīpatxisatiko atokokana. Hīpatxisatiko oerekari kākiti, Teoso makatzakapekai himapinakani īkapani. Hīpatxisataāka hītoākiri txiko makatzakiko !īkapanini, kona maerekati hīkamakiti makatzakiko īkapanini. Hīpatxisatikosaaki, hītxari Teoso: “Nākixinireē ninirekarī nikaminiri ikinika pite nireēkiti iaōka,” hītxariko. Xesosi iuaīkana ōkitikasaakiua, imakatzakai himapinakani īkapani. ²² Iua kanapiriā Teoso tixinemoni. Uatxa iri kikomoni iūtopāka. Iuaā Teoso nitirīakori, auītetxiakori, kaposotiirerini pakini auīte itxaua. Ninoa ikinika kamari Xesosi paniātakiti.

4

Hīkamariko Ikinipoko Teoso Nireēkiti

¹ Xesosi atatsiirauata iītoā hīte īkapani. Ininiā hinirekariko Xesosi xinikakiti iaōka hīkamini. Ikara atoko hinirekiniā, hīxinikakiti sikataparatarī hākixinire. Kākiti atatsiirauatakasaaki iītoā, !inirekaikari maerekati ikamini.

² Ininiākara īkorapokoriti auakasaaki, !inirekaikari maerekati iīto nireēkiti ikamini. Ikamari Teoso nireēkiti iaōka ikiniōtika. ³ Mitxi maerekati hīkamakiti

iaõpe. Mitxi Teoso sãkire mauiãkani nireẽkiti iaõka hĩkama. Ikini sereti maerekati hĩkama iusaaki. Iusaaki hĩkamari ikini sereti hiĩto nireẽkiti. Hinirekari ãti kãkiti iĩto. Hiĩpoãta. Ikinipoko maerekati hĩkama hiĩpoãtakasaaki. Hĩkamari kiiniri maerekati. Hiĩteosonetari kãkiti kamakiti, Teoso mauiiritakiniti.

⁴ Ninoa Teoso sãkire mauiãkani txai: “Kinirepa kona hiĩpotxitari ate kamakiti iaõka hĩkamini? Peerekari akamakiti,” itxaina. Ininiã ninoa nireẽkiti iaõka himanirekakani xika, ninoa misãkirepiretai hiĩte. ⁵ Txamari ãti õti ninoa apakapapiretariko Teoso, kotxi Teoso iposope isãpiretiniri maerekati kamakani misiritiko. Isãpiretari kãkiti auãkipanika inakani, apaka kãkiti mitxi ipĩkani. ⁶ Ininiã Teoso iokanapirena erekari sãpiretaãkapeka kãkiti. Uatxa ninoa ipĩpe. Auãkipanika inakasaaki, isãpiretaãka ninoamoni kãkiti misiritiko imaerekani xika. Isãpiretaãka ninoamoni kãkiti kaminiri Teoso nireẽkiti ãkixinireẽ ikiniõtika.

⁷ Imakinika xipokini õti imatokotapeka. Ininiã kona hãuiritapiri hiĩto kaminiri inireẽkiti. Araõkire hiĩtxako, ininiã hiĩposotari himisãkiretiniri Teoso. ⁸ Iteene hiĩtoretakakauako. Ia apiata Teoso nirekakiti. Iteene hiĩtoretakakauako, kotxi iteene hiĩtoretiniãri ãti, poião hiĩxinikari maerekati ikamakiti. ⁹ Kãkiti apokasaaki hãapoko, hiĩpoxokoniritika hãpakapanako. Kona hiĩtsoatape hãkixinireẽ ninoa apokini xika. ¹⁰ Hiĩkinika hãpakapapekari imaroretxi Teoso parĩka hĩkamini iĩkapani. Ikara Teoso sikakiti hiĩtemoni. Ininiã ikara himaroreẽ hiĩparĩkauata apanakini iĩkapani. Iusaaki Teoso nitiriakori erekarini hiĩtxaua. Hiĩsakariko ãtimoni ikini sereti erekari Teoso sikakiti. ¹¹ Hiĩsãkirauatakasaaki, hiĩsãpiretariko Teoso sãkire kãkitimoni. Himoianatakasaakiri ãti, himoianatariko Teoso posotiireẽ, ininiã iusaaki kãkiti txari Teoso: “Peerekai pite, kotxi Xesosi Křisto nakitiakori atxaua,” itxari Teoso. ãtipirika ikinimane txapikari Teoso: “Peerekai pite. Ikinipoko posotiiretxi aua pitemoni.” Ameẽ.

Xesosi Sãkire Auiãkani Misiritiko

¹² Nitiretakini, !hiĩtikokape himisiritiko apokasaaki, kotxi ikara ataerekatai. Iteene himisiritãkako, kotxi ikara atoko inakari apokapitikako. ¹³ Iusaaki hiĩpoxokoniuatako, kotxi Xesosi atatsiirauatape, ininiã hiĩte apaka atatsiirauatako. Xesosi kanapiriãkasaaki, peerekari iusaaki. Hiĩte atamatariko ikara, ininiã iusaaki iteene hiĩpoxokoniuata. ¹⁴ Kãkiti xinitakasaakii hiĩte, Křisto nakitiakori hininiua xika, hiĩpoxokoniuatako, kotxi iusaaki himarotari Teoso aua hiĩtekata. Himarotari Erekari Matamatakoti aua hãkixinireẽ. ¹⁵ Kokaniri, kiĩtiriri, maerekati kamakari, aãpirena kamakari pakini !hiĩtxapeuako. Ikara atoko inakari hininiãua, apakatapitika hãtatsiirauatini, kotxi hãtatsiirauata maerekati hĩkamini xika. ¹⁶ Iuaritika hãtatsiirauatiniã Xesosi sãkire hãuikini xika, ininiã iusaaki erekapitikari. !Hiĩpẽtauatape. Hiĩtxariko Teoso: “Peerekai pite, kotxi Xesosi nakiti nitxaua,” hiĩtxako. ¹⁷ Apokapeka Teoso anaakori misiritiko õti. Merepanika Teoso misiritari iua anaakori imaerekanina xika. Teoso misiritiniãua ate isãkire auiãkani amaerekani xika, ininiã Teoso iokanapirena erekari manirekakani mitekini !auari. Iteene imisiritana ninoa. ¹⁸ Kitxakapiriĩka Teoso sãkire iõkatsopatakori txari:

Pamimari atão inakari kamakani sini Teoso tixinemoni. Ininiãkara Teoso manirekakani mitekini, maerekati kamakani mitekini !auari. Imisiritãkapitikanako,

itxa Teoso sãkire. ¹⁹ Apanakini atatsiirauata, kotxi Teoso nirekari atatsiirauatini. Ikara atoko hãtatsiirauatiniã, iuaritika erekari hĩkamapanikako. Hãuikariko ikinipoko kamakari sãkire, kotxi iua kamari ikinipoko isãkire iaõka.

5

Kõtākikarerini, Ātokoriakori Pakini

¹ Kõtākikarerini nitxaua nota, ininiā nõtākikai hīte kõtākikarerini. Nota atamatarī Kristo misiritiko. Ikanapiriākasaaki, natamatarī iua iotximere ikinimane auīte inakasaakiua. ² Ininiā nota õtākikai hīte. Hinīkatanako Teoso sākire auiākani ereē. Soti auīteakori ipitikiri nīkatini atokokana, hinīkatana. Hīsāpiretanako Teoso sākire, kotxi ikara sikakienatarī ninoa ākixinire. Teoso sikana ninoa hītemoni hinīkatinina ĩkapani. Atāo hinirekariko hinīkatinina ninoa. Kona hītxape hākixinireē: “!Ninirekari ninīkatinina ninoa, iuaritika ninīkatana, kotxi ikara niparīka.” Kona hīxinikapiri ikara atoko inakari. !Hīparīkauatape txineiro hāpakapini ĩkapani. Hīparīkauatako apanakini himoianatarī ĩkapani. ³ Ninoa auīte atoko !hītxapeua. Teoso sikana ninoa hītemoni hinīkatinina ĩkapani, soti auīteakori ipitikiri nīkatini atokokana, ininiā erekari hīkamako, hīte kamakiti iaōka ninoa kamini ĩkapani. ⁴ Ininiā ipitikiri apiari apokasaaki, Xesosi apokasaaki, hāpakapariko hīparīka ĩki. Iuasaaki hāpakapariko saporīēta atoko inakari. Ikara Teoso sikakiti peerero, ininiā ikara apakapakani auapininiika. Atamatapikarina Teoso iotximere. Iuasaaki erekari hāpakapakiti !ixipoka.

⁵ Hīte ātokoriakoripekana, hīkamarike aneēkani paniātakiti. Hīkinika, himoianatakakauako. !Hīuikapeua, kotxi Teoso sākire iōkatsopatarī txari: Teoso iotokakari iuikakaniua kaminiri inireēkitina. Iua sikari ikinipoko erekari miuikakaniuamoni.

Itxa Teoso sākire. ⁶ Ininiā hīteka poiōtakauako, kotxi Teosonoka kaposotireri. Iketo manapi Teoso iukai hīte, erekari hīkamakiti isāpiretiniri ikinimane. ⁷ Maerekaxiniretinoka hinakasaaki, imakinika himaerekaxinire hīsāpiretariko iua. Hīsikariko himaerekaxinireni iuamoni, kotxi iua tiretai.

⁸ Kona hīkamapiri hīto nireēkiti. Araōkire hītxako, kotxi himokaiakari Satanasi inakori ākiti monōkori atoko itxa. Isaāpota initiniri ikiena. ⁹ Satanasi apokasaaki hītemoni, iteene hāuikariko Teoso sākire. Iuasaaki hītaparaxiniretika hāuako. !Himitekape. !Hīkamapiri inireēkiti. Himarotari hītariakori ikini itixiti auakani atatsiutiniri imisiritikona hīte atatsiirauatarini atokotxikana. ¹⁰ Hīte atatsiirauatoko poiāonoka, eereka Teoso parīka hākixinireē iposope ikamini. Iua sikataparaxiniretai. Iteene hāuikari Teoso sākire iuasaaki. Satanasi !iposotari itxīkitakinii maerekati hīkamini iuasaaki. Teoso, ikinipoko erekari sikakari, kamari ikara atoko inakari hīte ĩkapani. Iua akiritai itixine hīsini, ātipirika hāuini ĩkapani, iua iotximere ātipirika hātamatini ĩkapani, kotxi Kristo Xesosi nakitiakori hītxaua. ¹¹ Ātipirika ikinimane txari iua: “Peerekai pite.” Ātipirika ikinimane auīte itxaua. Ameē.

Petro Takapiretanapini

¹² Sírasi moianatano ia niōkatsopatakiti axapitiri niōkatsopatini hīte ĩkapani. Iua aītari. Iua iteene auikari Xesosi sākire. Niōkatsopata hīte nisikataparaxiniretini ĩkapani. Ninirekari himarotiniri atāo asāpiretinii erekari Teoso sikakiti pirena. !Hītakanapapiriko erekari Teoso sikakiti hītemoni. ¹³ Teoso nakitiakori, Papirónia sitatxiti auakani, xinikamanapitai hīte. Teoso mereēna ninoa hīte imereini atokotxikana. Marko, namarite atoko inakari, xinikamanapitai hīte apaka. ¹⁴ Haōkitakakasaakiua, himaratakakauako, kotxi hītiretakakaua. Teoso kamaerekaxiniretai hīte Kristo Xesosi sākire auiākani. Ameē.

2 PETRO

Petro Iuaĩkana Iokanatsopatakiti

¹ Nota Simão Petro nitxaua. Xesosi Kristo nitiri, iua iokanatakiti nitxaua. Niokanatsopata hĩtemoni, kotxi hĩte auikari Xesosi Kristo sãkire, ate auikiniri atokotxikana. Peerekari iua sãkire aãuikini. Aãuikari iua sãkire, kotxi atãonoka kamakari itxaua. ATeosone, amaerekani makatxakakari itxaua Xesosi Kristo.

² Himaroãpotakasaakina Teoso, aãuĩte Xesosi pakini, hãpakapari ikinipoko erekari ninoa sikakiti. Itori hãpakapa. Ninoa iteene kamaerekaxiniretai hĩte.

Erekari Akamini

³ Teoso posotiireẽ isikaua imakinika anireẽkiti ĩkorapokoriti aãuini ĩkapani, Teoso paniãtakiti akamini ĩkapani. Aãpakapari iua posotiire, iua aimarotakasaaki. Iua akiritaua iua nakitiakori aniniua ĩkapani. Aãpoka iuamoni akiritakasaakiua, kotxi peerekari iua. Aãpoka iuamoni, kotxi erekarinoka ikama. ⁴ Ikara atoko ininiã, isikaua apia erekari isikaenetakiti. Isikaenetakiti anirekakiti apiari. Ikamaenetari ikamakiti erekari ikaminaua. Teoso nirekari ikara atoko ikaminiãua, atão inakarinoka akamini ĩkapani, atão inakarinoka Teoso kamini atokotxikana. Kristo sãkire mauĩãkani nirekari maerekati ĩtona nireẽkiti ikaminina. Hĩte ĩnirekaikari ninoa nireẽkiti iaõka hĩkamini, ininiã ikara maerekati ĩnokai hĩte.

⁵ Ininiã ikinika hãkixinire taparaã hãuikariko Teoso sãkire. Hãuikiniãri Teoso sãkire, hĩkamariko erekarinoka. Erekarinoka hĩkaminiã, ĩnirekariko Teoso sãkire iteene himarotini. ⁶ Iteene himarotiniãri Teoso sãkire, hĩto auĩte hĩtxauako. Hĩto auĩte ĩniniãua, ĩmĩteenekariko ĩmĩsiritiko. ĩmĩsiritiko ĩmĩteenekiniã, hĩkamariko erekari Teoso kaminiri atokokana. ⁷ Hĩkaminiãri erekari Teoso kaminiri atokokana, hĩtiretanako hĩtariakori, Teoso sãkire auĩãkani. Hĩtariakori, Teoso sãkire auĩãkani, hĩtiretiniã, hĩtiretari ikinimane. ⁸ Ikara atoko ĩniniã, ikara atoko apiaãpotiniã, aãuĩte Xesosi Kristo ĩmarotakasaaki, erekari hĩparĩka iua ĩkapani. Iuasaaki makamareti atoko ĩhĩtxapeuako. ĩmĩnariko ito kãkiti Kristomoni isãkire auikinina ĩkapani. ⁹ Ikara erekari mauakaniã hĩtemoni, mõiãreni atoko hĩtxaua. ĩHimarotari atão inakari. ĩHĩxinikari Teoso kamakiti katana. ĩmaxinĩkaretapekari Xesosi makatxakiniri ĩmaerekani mitxi hĩkamakiti.

¹⁰ Ininiã nitariakori, ikara atoko ĩhĩtxapeko. Hĩkamariko ikinipoko Teoso paniãtakiti, ininiã iteene ĩmarotari Teoso akiritini ĩnakitiakori ĩniniua ĩkapani. Iuasaaki ĩmarotari Teoso mereinii hĩte iua anaakori ĩniniua ĩkapani. Ikara atoko inakari hĩkaminiã, ĩhĩkamari maerekati. ¹¹ Ikara atoko hĩkaminiã, Teoso ipoxokoniritika apakapai hĩte aãuĩte Xesosi Kristo auĩtetxi ĩniniãtaãua hãuini ĩkapani. Iuaã Xesosi, amaerekani makatxakakari, ãtipirika ikinimane auĩte itxauako.

Atão Inakari Teoso Sãkire

¹² ĩnirekari ikara noerekakiti ãtipirika ĩsãpiretinii. ĩmarotapekari ikara noerekakiti, iuaritika iuaĩkana ĩsãpiretai. Hĩte ĩmarotari ikara noerekakiti atão inini, iuaritika kona nitakanapari ikara ĩsãpiretinii. ¹³ Nota auapanika ĩnakasaaki, notamoni atãopitika ĩtxĩkitakinii hĩte ikara noerekakiti hĩxinikini. ¹⁴ Kotxi ĩmarotari paĩtiki ĩpinini. Aãuĩte Xesosi Kristo oerekapekano paĩtiki ĩpinini. ¹⁵ Ininiã uatxa Teoso sãkire ĩsãpiretapikai, ĩniniã kona ĩmaxinĩkaretari noerekakiti ĩpĩkasaaki.

¹⁶ Asãpiretai aãuĩte Xesosi Kristo posotiire. Asãpiretai iua iuaĩkana kanapirini. Ikara asãpiretakiti hĩtemoni kona kãkiti sãkireni. Kona kãkiti ĩmarorerini

xinikakitini asāpiretai. Atāo inakari ate sāpiretai hīte, kotxi ateka atamatarī Xesosi ikinimane auīte ininiua. ¹⁷ Aīri Teoso oerekari iuikiniri iua. Oerekari iua ereka inini, kotxi itxari iua: “Ere namarite, nitiretakiti. Iua iteene kamapoxokonitano,” itxa Teoso kaposotiireri. ¹⁸ Ateka kenakotari ikara Teoso sākire, itixineē isākirauatakasaaki. Iusaaki ate aua Xesosikata ōtanoxiratarī Teoso nakiti nopini.

¹⁹ Ininiā aimarotapitikari Teoso sākire sāpiretakani sāpiretakiti kitxakapirīka atāo inini. Himixinikariko ninoa sāpiretakiti. Ninoa sāpiretakiti tirikapi ipiā iopinikini atoko itxa, kākiti sinimoni atamatini īkapani, kotxi axinikasaakiri ninoa oerekakiti, aimarotari atāo inakari, atāo minakati pakini. Teoso sākire sāpiretakani sāpiretakiti hīxinikiniritika Xesosi kanapiriāko. Iusaaki iua txīkitakai Teoso iteene himarotini. Iusaaki atokatxi ponikini atoko itxa Xesosi apokini. Iōriki īkanōkapanika pokīkini atoko itxa iusaaki Xesosi apokini. ²⁰ Merepanika ninirekari iteene himarotini Teoso sākire sāpiretakani sāpiretakiti Teoso sākire iōkatsopatakoriā. Kona ninoa sākireni. Kona ninoa xinikakitini. ²¹ Kitxakapirīka Teoso sākire sāpiretakani kona iōkatsopatarī kākiti nireēkiti sākiretxiti. Erekari Matamatakoti txīkitakari kākiti Teoso nakitiakori sāpiretiniri atāo inakari Teoso sākire.

2

Atāo Minakati Oerekakani

¹ Kitxakapirīka Teoso sākire sāpiretakani auakasaaki, auari apaka atāo minakati oerekakani. Iua atokotxikana uatxa aua atāo minakati oerekakani hīte sauaki. Kākiti mimarotakanisaakiri, oerekari atāo minakati. Kona erekari ninoa oerekakiti. Na atāo ninoa oerekari Teoso sākire. Ninoa !auikari Apiananiri ipinini kākiti īkapani Teoso iīkitxitini īkapani. Ikara xika mokatantika Teoso xipokanako ninoa. ² Itori kākiti auikari isākirena, ininiā ikamarina ninoa kamakiti atokokana. Ikamarina maerekati iītona nireēkiti, maerekati ninoa kamini atokotxikana. Ininiā ikara xika, apanakini misākirepiretari Teoso sākire atāo inakari auikiko. ³ Kapotxinanirini ninoa atāo minakati oerekakani. Isākirena atāo minakati xika, imisirienetai. Ninoa nireēkiti iaōka ikaminiina hīte. Kitxakapirīka Teoso sāpiretapekari imisiritinina ninoa imaerekanina xika. Ixipokinina ōti paītiki apokapitikako. Teoso !imaka. Ninoa xipokini ōti apokapitikako.

⁴ Teoso nitiriakori iaxiti auakani kamakasaakiri maerekati, imisiritana. ! Auiritana imitekinina. Iokanātana maerekani misiritikoātaā. Iuaā itakana kateia āki ipiā. Iuaā iātaparina Teoso misiritinina ninoa imaerekanina xika.

⁵ Kitxakapirīka Teoso xipokari ikinimane kākiti iua nireēkiti manirekakani xirataātxiā. Teoso !auritana ninoa mitekini. Noe, apikomoni setxi kākitekata nīkataāka. Ninoanoka !xipokaāka. Iua nīkatari Noe, kotxi atāo inakari sāpiretakari itxaua.

⁶ Apaka ixipokari Sotoma sitatxiti auakani, Komoha sitatxiti auakani pakini arikatxiā. Atapaninoka kaikota iusaaki. Ininiā ikara pinitari kākiti Teoso nireēkiti manirekakani. ⁷ Iusaaki Teoso makatxakari Aroo inakori imapinakani īkapani, kotxi erekari kamakari itxaua. Maerekati kamakani txīkitakari Aroo matinaniuatini, kotxi ikiniōtika iua atamatarī maerekati ninoa kamakiti, maerekati ninoa īto nireēkiti. Itxiko atoko itxa ninoa kamakiti. ⁸ Aroo, atāo inakari kamakari, aua ninoa sauaki. Ikiniōtika atamatarī maerekati ninoa Teoso paniātakiti manirekakani kamakiti. Ikiniōtika ikenakotari maerekati ninoa sāpiretakiti. Ininiākara ākixinireē Aroo maerekaxiniretinoka itxa ninoa maerekani xika, kotxi iua ākixinireē inirekari atāo inakaranoka ikamini.

⁹ Ikara atoko ininiã, Apiananiri imarotari iua nireëkiti nirekakani imakatzakini imisiritikosaakina. Iua apaka imarotari imisiritiniri atão minakati kamakani uatxa. Apaka imarotari imaïkinina ninoa, kãkiti misiritiko sãpiretiko õtisaaki imisiritinina ïkapani. ¹⁰ Iteene Teoso misiritari kãkiti, maerekati iïto nireëkiti kamakani. Ninoa maerekani txikotari ninoa ãkixinire. Apaka iteene imisiritari auïtetxi paniãtakiti makamakani.

Ninoa atão minakati oerekakani iteene iuikaua. !Ipaxitarina ãti. !Ipïkarina imisãkirepiretinirina iaxiti auakani. ¹¹ Teoso nitiriakori iaxitikini iteene kaposotiireni. Apiataparatanana ninoa. Iuaritika Teoso nitiriakori !apoïtana ninoa atão minakati oerekakani. !Imisãkirepiretana Teoso apisatoõ.

¹² Ninoa atão minakati oerekakani misãkirepiretari ikinika imimarotakinina. Kaxipiri ïtopa auakari atoko itxana, kotxi ikamarina iïtona nireëkitinoka. Kaxipiri ïtopa auakari iponaniã, eereka imaïkaãka, oka inaãka. Iua atokokana ninoa atão minakati oerekakani xipokaãkako imaerekanina xika.

¹³ Ininiã ninoa misiritaãka, kotxi na atão ninoa kamakiti. Kona ïkanõkananini ikamarina maerekati. Ipotxitarina maerekati iïtona nireëkiti ikaminina pokamara, ikinimane atamatini ïkapani. Ninoa kamapikari maerekati, iuaritika apotiitauana hïtekata kiiniri Teoso ïkapani hïkamakasaaki. Ininiã apanakini !auikari hïte sãkire ninoa maerekani xika. Itxiko mãkatxi kasarori nopinikiri atoko itxana ninoa. Karõtxi kãkiti toõã auakari atoko itxana ninoa. ¹⁴ Inirekapikarina sito ïtanoro minakotokatika isirïkinina. Kona iposotarina iotokakinirina maerekati ikaminina. Anikarina kãkiti mataparaxinireni, maerekati ikaminina ïkapani. Kapotxinanixinirena ninoa. Ininiã Teoso misiritapitikanako ninoa. ¹⁵ Ninoa osipikari kimapori atão inakari. Ipïpinanakana. Ikamarina maerekati Paraão inakori maerekani atokokana. Iua Paraão, Peo inakori ãkiri. Kitxakapirïka aua. Iua nirekaro txineiro maerekati ikamini ïkapani. ¹⁶ Txamari ipira txitari iua imaerekani xika, kotxi Teoso txïkitakari poho sãkirauatini kãkiti sãkirauatini atokokana. Ininiã ipira iotokakari iua atão minakati sãpiretakari kaminiri maerekati miïkiteti.

¹⁷ Ninoa atão minakati oerekakani !iposotari ikaminirina ikamaenetakitina. Aariko ãparaã mauakiniti atoko itxana. Kãkiti nirekari ãparaã, txamari !auari. Katxiãri ïtima anikakiti atoko itxana ninoa. Kãkiti nirekari ãparaã kipini, txamari !ikipa. Teoso mereëri ipiaãtaã ninoa ãtipirika kaikotini ïkapani. Kãkiti atamarauatini iuaãtaã !auari. ¹⁸ !Kiïkiteri ninoa sãkire. Iuikauana isãkirauatakasakina. Isãpiretarina kãkiti, erekari akaminiri aïto nireëkiti. Ininiã isikanireõtari kãkiti ikara maerekati ikamini. Imisirienetarina Teoso sãkire poiãopanika auïãkani. Ninoa !okananipanikani auikari Teoso sãkire. !Okananipanikani imarotarina atão inakari. Atão minakati oerekakani sikanireõtana ninoa ikara maerekati ikaminina.

¹⁹ Itxana: “Kateia ãki auakani atoko hïtxaua. !Erekari ikara atoko hinini. Hïkamariko hinirekakiti. Ininiã ikara atoko hïkaminiã, hïsikakaãka,” itxana. Txamari ninoaka kateia ãki auakani atoko itxauana, kotxi ninoa !iposotari itakanapinirina imaerekanina. Imaerekanina iauïtena itxaua, kotxi ikamarina imaerekanina paniãtakinoka. ²⁰ Mitxi ninoa imarotari Apiananiri Xesosi Kristo sãkire, kãkiti maerekani makatzakakari sãkire. Iuasaaki ninoa iotokakari ikaminirina Xesosi sãkire mauïãkani kamakiti, kãkiti xinire maerekati inini txïkitakakari. Txamari eereka iuaïkana ikamarina ikara maerekati. Eereka !iposotaikarina ikara maerekati itakanapinina. Ininiã uatxa apiata imisiritikona. ²¹ Erekamariko atão inakari kamiko ninoa mimarotakanimako, kotxi ninoa imarotari, iuaritika !inirekaikarina Teoso

paniātakiti, iua iokanatakini sāpiretakiti. Uatxa ninoa misiritiko apiata.

²² Atāopitikara kitxakapirīka sākiretxiti:

Anāpa kanapiriā okanakakitimoni onikiniri ĩkapani. Irari ipitikiri arokakito kanapiriā iāropemoni osirīkini ĩkapani.

Ininiā iuaīkana ninoa atāo minakati oerekakani kamari maerekati, mitxi ninoa takanapakiti.

3

Apiananiri Kanapiriini

¹ Nitiretakini, mitxi niokanatsopatapeka hītemoni. Iuaīkana niōkatsopatari ia aātsopa. Imakinika niōkatsopata, kotxi ninirekari hīte iuaīkana hīxinikiniri erekari mitxi himarotakiti. ² Ninirekari hīxinikiniri Teoso sākire sāpiretakani sākire kitxakapirīka, kotxi Teoso nakitiakori itxauana. Apaka ninirekari hīxinikiniri ate paniātakiti, kotxi Apiananiri iokanatakini atxaua. Kākiti maerekani makatxakakari iokanatakini atxaua.

³ Merepanika himarotariko ia: Imapotōkire ōti takote auako kākiti Teoso sākire napetakani. Ninoa kamari maerekati iītona nireēkiti. ⁴ Ia atoko itxanako: “Ītapari iua? ‘Nikanapiriāko,’ itxa iua. Txamari kona apoka. Aātokiriakorini ipīkasaakipanika, itixi kamikosaakipanika iuatxikana. Mitxi itixi, uatxa iuatxikana,” itxana.

⁵ Ninoa nirekari imaxinīkaretinirina Teoso kamakiti kitxakapirīka auakari, kotxi Teoso txīkitakari iaxiti apiko nopinixiti auini isākireē. Apaka ikamari itixi āparaā kamakori. Ikamari itixi āparaā sauaki. ⁶ Apaka ninoa maxinīkaretari ia: Teoso iokanataro iua āparaā, ininiā xirataātxi xipokari itixi mitxi auakari, ikinimane kākiti iuasaaki auakani apaka. ⁷ Uatxa isākireē inīkatari iaxiti apiko nopinixiti, itixi pakini arikatxi xipokiniri ĩkapani. Imakinika inīkatiniritika Teoso manirekakani misiritiko isāpiretako. Iuasaaki ninoa xipokaākako. Iuasaaki ixipokari iaxiti apiko nopinixiti, itixi pakini.

⁸ Nitiretakini, kona himaxinīkaretapiri ia nisākire: Teosomoni āti ōti, mio anokanani atokotxikana itxa. Iuamoni mio anokanani, āti ōti atokotxikana itxa. ⁹ Apiananiri kamapitikari ikamaenetakiti. Apanakini kākiti xinikari !katimari ikaminiri ikamaenetakiti. Kona ikara atokoni. Iātapari kākiti auikiniri isākire, kotxi !nirekari kākiti sini imisiritikomoni. Inirekari ikini-maner takanapiniri imaerekani.

¹⁰ Apiananiri kanapiriākasaaki, kiītiriri ĩkanōka apokini atokokana. Iua apoka kākiti mimarotakanisaakiri. Iuasaaki iaxiti apiko nopinixiti ereēkoka itaparakieneritika. Iuasaaki ikinipoko xipokaāka arikatxiā. Iuasaaki iteene ipataka aua. Imakinika itixi xipokako iuasaaki.

¹¹ Ikara atoko itxako ikinipoko xipokini, ininiākara natokopa itxa hāuini ikiniōtika ereka hinini? Erekarinoka hīkamako ikiniōtika, kotxi iua nakitiakori hītxaua. Teoso nireēkitinoka hīkamako ikiniōtika. ¹² Iuasaaki hiātapari hīpoxokoniritika Teoso keto apokini. Iteene hinirekariko ikara ōti apokini. Iuasaaki iaxiti apiko nopinixiti xipokaāka arikatxiā. Ikinika iākokako kapatakari xika. ¹³ Iuaritika aiātapari iaxiti apiko nopinixiti amaneri, itixi amaneri apaka atāo inakari kamakani ĩkapani. Ikara atoko inakari Teoso sikaenetakiti.

¹⁴ Ininiā nota tiretakini, hinirekasaakiri Xesosi kanapiriini ōti apokini, iteene hīparīkauatako maerekati himakamakani ĩkapani. Ininiā iua kanapiriākasaaki, iua imarotari himakamakaniri maerekati. Iuasaaki imarotari hīkerokiniri !auari. Iuasaaki imarotari erekaxinire hinini. ¹⁵ !Katimari iua kanapiriini, kotxi iātapari kākiti takanapiniri maerekati ikamakiti, imisiritiko mapokakani ĩkapani. Iua atokokana aītari

atiretakiti Paoro iōkatsopata hītemoni Teoso imaroreē. ¹⁶ Ikinika Paoro iokanatsopatakitiā isāpiretari Apiananiri kanapiriini ōti Teoso imaroreē. Ipixini iua iōkatsopatakiti pamimari kākiti imarotiniri ĩkapani. Aua kākiti mīikiteni. !Apakata aāuikiniri ninoa sākire. Kākiti ikara atoko inakani oerekari Paoro iōkatsopatakiti, apanakini Teoso sākire iōkatsopatakori pakini, txamari na atāo ninoa sāpiretakiti. Ipinimoni ninoa oerekakiti. Imamakarina Teoso sākire, ininiā ikara xika ixipokaākanako.

¹⁷ Nitiretakini, himarotapekari pamonōkoniri ninoa atāo minakati oerekakiti. Ininiā araōkire hītxako. Kona hāuikapiri Teoso sākire kerokakani sākire, kotxi Teoso paniātakiti makamakani itxauana. Kona hītakanapapiri Teoso sākire atāo inakari, uatxa iteene hāuikakiti. ¹⁸ Ikiniōtika himarotariko ikinipoko erekari aāuīte Xesosi Kristo sikakiti hītemoni, amaerekani makatxakakari sikakiti hītemoni. Ikiniōtika himaroāpotariko iua. Ninirekari ikinimane uatxa sāpiretiniri iua: “Peerekai pite.” Ninirekari ikinimane ātipirika sāpiretiniri iua: “Peerekai pite.” Ameē.

1 XOÃO

Merepanika Xoão Iokanatsopatakiti

Xesosi “Teoso Säkire” Inakori

¹ Nota iökatsopata hïte ïkapani, iua “Teoso säkire” inakori asäpiretini ïkapani. Ätipirika auakari itxaua. Itxïkitakari ikinipoko auäki inini. Itixi kamiko apisa iua aua. Atera kenakotari isäkire. Aökiä ate atamatari iua. Auakoä amaätakari iua. Ininiä atäopitika ate imarotari iua. ² Iua ikinipoko auäki inïkitaäkari. Iuaka oerekaua atemoni. Ate imarotapekari iua, ininiä asäpiretai aätamatakiti, akenakotakiti pakini. Ate säpiretai hïte iua ätipirika auakari, käkiti auäki inïkitaäkari, ininiä käkiti auapikako Teosokata. Iua Xesosi Kristo inaäka akiritiko. Iua aua irikata, Teosokata. Iuaka oerekaua atemoni. Aätamatari iïto. ³ Ate säpiretai hïte aätamatakiti, akenakotakiti pakini, amoianatakakiniua ïkapani. Atäo nisäpiretai. Amoianatakakaua Teosokata, Xesosi Kristo pakinikata. ⁴ Ia säkiretxiti aiokanata hïtemoni, iteene hïpoxokoniuatini ïkapani.

Teoso Pokamara Atoko Itxa

⁵ Teoso pokamara atoko itxa, kotxi maerekati !ikama. Ipiä !auari Teoso auiniätaä, kotxi maerekati !ikama. Ikara iokanapirena imi säpiretaua ate. Ininiä ate säpiretai hïte. ⁶ Maerekati akamakasaaki, ipiaä auakani atoko atxa. Iuasaaki, “Teoso amoianata,” aniniä, paxirari asäkire. Kona atäo akamakiti iuasaaki. ⁷ Teoso aua ikamaraä, kotxi erekarinoka ikama. Ate ikamaraä aäüiniä Teoso atoko aniniä, erekarinoka akaminiä, ininiä ate Teoso säkire auïäkani moianariakori atxaua, ininiä amoianatakakaua. Ikamaraä aäüiniä, Teoso arokaua Xesosi arëkaä. Imaktxakari ikinika maerekati akamakiti, kotxi imi Xesosi Kristo ipina ate ïkapani. Iarëka xikepoakata ate maerekani imaktxakini ïkapani.

⁸ “Na nota kamari maerekati,” aniniä, ateka misirienetaua. Ikara atoko aniniä, ate !imarotari atäo Teoso säkire aäkixinireë. ⁹ Amaerekani Teosomoni asäpiretiniä, iua makatxakapitikari amaerekani. Oeretari ate äkixinire. Imaktxakari ikinipoko amaerekani. Ikamari ikara atoko, kotxi imaktx-akaenetari amaerekani. Ikamapitikari ikamaenetakiti. Ikamapikari atäo. ¹⁰ “Uatxapiima maerekati !nikama,” pininiä, pitemoni Teoso säkire paxirari atxiïti? Kotxi Teoso txapekari käkiti: “Maerekati kamakari käkiti.” “Maerekati !nikama,” pininiä, !pimarotari Teoso säkire päkixinireë. !Pikamari Teoso säkire iaöka iuasaaki.

2

Käkiti Teoso Atäo Imarotakari

¹ Namariteni nota tirketakini atoko hïtxaua hïte. Ikara niökatsopata, maerekati himakamakani ïkapani. Maerekati akamakasaaki, masäpiretari Xesosi Kristo. Äiri Teoso misäkiretakari itxaua Xesosi. Atäo inakarinnoka kamakari itxaua iua. Iua misäkiretari Teoso ate ïkapani, amaerekani imaktx-akini ïkapani. ² Iua makatxakari maerekati akamakiti. Kona ate maerekaninanini imaktxaka. Ipina ikini itixiti auakani maerekani imaktxakini ïkapani.

³ Teoso paniätakiti akïpitiniä, atäo aimarotari Teoso. ⁴ Teoso paniätakiti makïpitakiti, “Nota imarotari Teoso,” inakari, paxirari isäkire. Äkixinireë !imarotari atäo inakari Teoso säkire. ⁵ Teoso säkire kïpitakari iteene tirketari Teoso. Kininiäpa aimarotatari iua nakiti aniniäua? ⁶ Akamakiti ikiniötika

Xesosi kamakiti atokokana akaminiã, iusaaki aimarotari Teoso nakiti aniniãua. “Teoso nakiti nitxaua,” pininiã, pikamariko Xesosi kamakiti atokokana.

Iteene Matiretakakaua

⁷ Nitiretakini, Apiananiri paniãtaua atiretakakiniua. Ia paniãtxi niõkatsopatakiti hĩtemoni, kona amaneriikani. Hĩkenakopiretapekari ikara paniãtxi merepitipanika Xesosi sãkire hĩkenakotakasaaki. Iusaaki hĩkenakotari ikara paniãtxi hĩtiretakakiniua tĩkane. Ikara paniãtxi kitxakapirĩkari itxaua. Hĩkenakotapekari ikara paniãtxi. ⁸ Iuaritika ikara paniãtxi amaneri itxaua. Xesosi kĩpitari ikara paniãtxi, kotxi itiretari kãkiti. Hĩte apaka tiretari kãkiti, ininiã aimarotari ikara paniãtxi ereka inini. Ininiã ipiã napaãpota, kotxi kãkiti imaroãpotari atão Teoso sãkire. Atão inakari kãkiti imarotakasaaki, pokamarari atoko itxa kãkiti ãkixinireẽ.

⁹ “Pokamara naua,” pininiã, txamari iusaaki pomanatari pitari Xesosi sãkire auiãkari, ikara atoko pininiã, uatxapiima ipiã pauapanika. ¹⁰ Pitari Xesosi auiãkari pitiretiniã, pokamara pauapitika. Ininiã erekari pãkixinire, ininiãkara pãkixinireẽ auakari kona txĩkitakai maerekati pikamini. ¹¹ Pitari Xesosi sãkire auiãkari pomanatiniã, ipiã auakari atoko pitxaua. Iusaaki pitĩpokotapika ipiã. !Pimarotari pisinimoni. Mõsiãreti atoko pitxaua, kotxi !apakata patamarauatini ipiã xika.

¹² Namariteni nota tiretakini, niõkatsopata hĩte ĩkapani, kotxi Xesosi makatxakapekari himaerekani, kotxi kãkiti maerekani makatxakakari itxaua.

¹³ Hĩte irĩtxiakoripekana, niõkatsopata hĩte ĩkapani, kotxi hĩte iteene imarotari Xesosi, itixi kamikosaaki auapeka inakari.

Hĩte ãtokoriakoripekana, niõkatsopata hĩte ĩkapani, kotxi homitikapekari Satanasi hĩtapararitika.

Namaritenipekana, niõkatsopata hĩte ĩkapani, kotxi himarotari aĩri Teoso.

¹⁴ Hĩte irĩtxiakoripekana, niõkatsopata hĩte ĩkapani, kotxi himarotari Xesosi. Itixi kamikosaaki auakaripeka itxaua.

Hĩte ãtokoriakoripekana, niõkatsopata hĩte ĩkapani, kotxi pataparari hãkixinire. Teoso sãkire auapika hãkixinireẽ. Homitikapekari Satanasi hĩtapararitika.

!Hinarekapi Itixi Auakani Nireẽkiti

¹⁵ Itixi auakani nireẽkiti atoko inakari !hinirekape, kotxi ninoa nirekari maerekati ikaminina. Hĩtiretiniãri ninoa kamakiti, !hĩtiretari aĩri Teoso. ¹⁶ Maerekati kãkiti kamakiti ia atoko itxapaniko: Inirekarina maerekati ĩtona nireẽkiti ikaminina. Inirekarina maerekati okina nireẽkiti ikaminina. Iuikauana, katii ininiãuana. Iuikarina ikamakitina. Ikara maerekati kãkiti kamakiti potorika ĩkorapokoriti. Kona Teosomonikirini ikara. ¹⁷ Itixi xipokako. Ikinipoko tiitxi kãkiti nireẽkiti apaka xipokako. Kãkiti Teoso nireẽkiti kamakarirako !xipoka. Auapininiika Teosokata.

Kristo Omanatakani

¹⁸ Namariteni nota tiretakini, itixi xipokini õti katanapanoka apoka. Kristo omanatakani auĩte apokako itixi xipokini õti apisa. Ikara himarotapeka. Uatxa Kristo omanatakani itomane apokapeka. Ikara atoko ininiã, aimarotari itixi xipokini õti takotepeka inini. ¹⁹ Ninoa Kristo omanatakani, mitxi atekata apotiitaua, Teosokata aãpotiitakasaakiua. Txamari ninoa !auikari Xesosi sãkire ate auikiniri atokokana, ininiã ninoa sipe. Ninoa atão Xesosi sãkire auikaãkamako, atekata ikaikotapikamanako. Itakanapaua, kotxi ate auikari Xesosi sãkire. Ninoa !auikari.

²⁰ Teoso, erekarinoka kamakari, sikapekai hīte Erekarī Matamatakoti hīmoianari tīkane. Ininiā hīte imarotari atāo inakari Xesosi sākire. ²¹ Hīte imarotari atāo inakari Xesosi sākire, iuaritika niōkatsopata hītemoni. Niokanatsopata hītemoni, kotxi himarotari atāo inakari. Paxiene kamakari !imarotari atāo inakari sākiretxiti.

²² Natokopa itxa iua paxiene kamakari? Paxiene kamakari txari: “Xesosi kona Teoso mereēkitini.” Kākiti ikara atoko inakari Kristo omanatakari itxaua iua. Iua !inirekari aīri Teoso. Imi apaka !inireka. ²³ “Xesosi kona Teoso ākirini” inakari, na kaikota Teosokata. “Teoso ākiripitikara Xesosi” inakarirako kaikotapitikako Teosokata.

²⁴ Hāuiritariko merepitipanika Xesosi sākire hīkenakotakiti kaikotini hākixinireē. Ikara kaikotiniā hākixinireē, Teoso ākirikata hīkaikotapikako. Aīri Teosokata hīkaikota apaka. ²⁵ Xesosi sikaenetapekaua aāuapininiika anini Teosokata.

²⁶ Niōkatsopata hīte nōtākikini īkapani, kotxi aua kākiti Xesosi hītakanapini nireēkani. ²⁷ Erekarī Matamatakoti, Xesosi sikakiti, auapanika hīte ākixinireē, ininiā hīte na nirekari āti koerekareri. Iua Erekarī Matamatakoti oerekai ikinipoko. Iua oerekakiti atāopitika. Kona paxieneni iua. Ininiā hīkaikotako Xesosikata, Erekarī Matamatakoti oereēkiti hīkīpitini.

²⁸ Ininiā namariteni nota tīretakini, hīmoianatapikariko Xesosi. Ininiā uaimoni ikanapiriākasaaki, hīpīkarauatini !auari. Ininiā na hīpētauata haōkitakasaakiri iua. ²⁹ Xesosi kamari atāo inakarinoka. Ikara himarotapeka. Ininiākara himarotari, kākiti atāo inakarinoka kamakani Xesosi anaakori ininiuana.

3

Teoso Anaakori

¹ Aīri Teoso iteene tīretaua ate. Hīxinikariko iua tiraōki. Iua iteene tīretaua ate, ininiā, “Namariteni,” itxaua ate. Ari, atāopitikara Teoso anaakori atxaua. Ninoa Teoso anaakori minakanuia !auikari Teoso anaakori aniniua, kotxi ninoa !imarotari Teoso. ² Nitīretakini, Teoso anaakori atxapekaua uatxa. Eereka !aimarotari kanatokoako atxapaniko. Ia aimarotapitika. Xesosi kanapiriākasaaki, Xesosi atoko atxapekauako, kotxi iusaaki aātamariko iua. ³ Kākiti ikara auīākani, !inirekarina maerekati ikaminina, kotxi Xesosi !ikamari maerekati.

⁴ Maerekati kamakari !ikamari Teoso paniātakiti. Amakamakanisaakiri Teoso paniātakiti, iusaakipeka akamari maerekati. ⁵ Himarotari Xesosi apokapeka īkorapokoriti maerekati akamakiti imakatzakini īkapani. Xesosi !ikamari maerekati. ⁶ Kākiti Xesosi ātipirika moianatakari !inirekaikari maerekati ikamini. Iua ātipirika maerekati kamakari !aōkitapanikari Xesosi. !Imarotapanikari Xesosi.

⁷ Namariteni nota tīretakini, !hāuiritapiri apanakini misirienetini hīte. Atāo inakarinoka kamakari kamapitikari Teoso nireēkitinoka, Xesosi kaminiri atokokana, kotxi Xesosi kamari atāo inakarinoka. ⁸ Ātipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaakipekara ikamaāpokatapitiporiri maerekati. Uatxa ikamapanikari. Teoso ākiri apoka īkorapokoriti maerekati Satanasi parīka ixipokini īkapani.

⁹ Teoso anaakori !inirekaikari maerekati ikaminina, kotxi Teoso aua ākixinireēna. Ininiā !iposotarina maerekati ikamaāpotinina, kotxi iritarina Teoso. ¹⁰ Ininiā kipa Teoso anaakori txataua? Atāo inakarinoka kamakanira

Teoso anaakori txaua. Āti taretakanira Teoso anaakori txaua. Ininiā kipa Satanasi anaakori txataua? Erekarī makamakanira Satanasi anaakori txaua. Āti matiretakanira Satanasi anaakori txaua.

Kākiti Tiretakakiniua Pirena

¹¹ Matiretakakaua. Merepitipanika Xesosi sākire hīkenakotakasaaki, hīkenakotari ikara ōtākipirenatxi, hītiretakakiniua. ¹² Kaiī inakori atoko !hītẏape. Maerekatīnoka kamakari nakiti itẏaua iua Kaiī. Satanasi nakiti itẏaua. Kaiī okari atāo itarika. Kixikapa okari? Ixikotiniri xika okapiri, kotxi itari kamari erekarinoka. Kaiī kamari maerekatīnoka.

¹³ Nitariakori, Xesosi sākire mauīākani omanatakasaakii hīte, ! hītẏorīkaātapeko. “Kixikapa ninoa omanataua ate?” !hītẏapeko, kotxi ikara atoko inakari apokapitīkako. ¹⁴ Atiretiniāri aītariakori Xesosi sākire auīākani, aimarotari !apinaika. Aāuapininiika Teosokata. Matiraōkiti ākixinire ipīkari atoko itẏa. ¹⁵ Kākiti itari omanatakari, Xesosi sākire auīākari omanatakari, kokaniri atoko itẏaua. Himarotari kokaniri !auari ātipirika Teosokata.

¹⁶ Xesosi Kristo ipina amaerekani imakatzakini īkapani, ātipirika Teosokata aāuini īkapani. Ikara oerekaua atāo tiraōkitxi. Ininiā erekarī aītariakori atiretini. Xesosi taretiniua ate atokokana, erekarī atiretiniri aītariakori. Atẏiīti apina aītari mapinakani īkapani. ¹⁷ Pitii, pikiena pakini auiniāi, pitari, Teoso sākire auīākari tii, ikiena pakini mauakaniā, pisikariko iuamoni. Pimasikakaniāri iuamoni, Teoso tiraōki pākixinireē !auari. ¹⁸ Namariteni nota taretakini, “Apanakini ate taretā,” atẏaua, txamari kaamoni inakasaakina na asikana minakati, ininiā na atāo atiretana. Atāo matiretana apanakini. Kaamoni inakasaakina, masikana ninoa amonitakitina.

Teoso Sākire Kīpitakari

¹⁹ Ikara atoko akaminiā, aimarotari Teoso anaakori aniniāua. Aimarotari atāo inakari sākiretxiti akīpitini. Ikara atoko akaminiā, erekapitīkari aākixinire. Ikara atoko akaminiā, !apīkari Teoso amisākiretini. ²⁰ “Kona erekano,” pininiā pākixinireē, mitxi pimaerekani pikamini xika, !pipīkarauatape, kotxi Teoso iteene imarotai, iuaritika iteene iamoniāi. Poiāoka aimarotari aākixinireē auakari. Teoso imarotari ikinipoko.

²¹ Nitiretakini, pākixinireē: “Namanaāpekari Teoso imakinika nimaerekani imakatzakini,” pininiā, kataparaxinirepitikai Teoso pimisākiretini. ²² Ininiā iua sikaua aamanaākiti, kotxi ate kamari ipaniātakiti iaōka. Iua apokaerekatakitinoka akama. ²³ Teoso paniātaua ate: “Hāuikariko namarite Xesosi Kristo sākire.” Apaka Teoso paniātaua: “Hītiretakakauako.” Teoso paniātaua ikara akamini. ²⁴ Teoso sākire iaōka kamakari kaikotapika Teosokata ātipirika. Teoso kaikotapika iuakata ātipirika apaka. Aimarotari Teoso kaikotini atekata, kotxi iua sikaua Erekarī Matamatakoti aākixinireē auini īkapani.

4

Atamakaerekarauatini

¹ Nitiretakini, !hāuikapiri ikinimane kākiti sākire, “Erekarī Matamatakoti aua nota ākixinireē,” inakani. Hātaerekatanako ninoa. Atāo Erekarī Matamatakoti auatana atẏiīti ākixinireēna? Atẏiīti matamatakoti ākixinireēna auakari kona Teosomoni īkarini. Itomaneri kākiti, “Nota Teoso sākire sāpiretakarino,” inakani, txamari na atāo ninoa sākire. Kākiti ninoa atoko inakani aua ikini itixitika. !Isāpiretarina atāo Teoso sākire. Imisirienetarina kākiti. ² Kākiti sāpiretiniāua: “Teoso ākiri Xesosi Kristo apokapeka īkorapokoriti. Kākitipeka itẏaua,” ininiā iuasaaki aimarotari Erekarī Matamatakoti auapitika iua ākixinireē. Ikara atoko aimarotari Erekarī Matamatakoti Teoso

sikakiti auaĩtotiniri kãkiti. ³ Kãkiti sãpiretiniãua: “Xesosi na atão kãkiti ! itxaua,” ininiã iuasaaki aimarotari Erekar Matamatakoti ! auari iua kãkiti ãkixinireẽ. Matamatakoti iua kãkiti ãkixinireẽ auakari Satanasi nakiti itxaua. Kristo omanatakari nakiti itxaua. Iua Erekar Matamatakoti Teoso nakiti itxaua. Hikenakopiretapekari: “Maerekati Matamatakoti Kristo omanatakari iokanatakiti apokapitikako ĩkorapokoriti,” itxa. Uatxa apokapeka.

⁴ Hĩte namariteni, Teoso nakitiakori hĩtxaua. Ininiã hĩte ! auikari atão minakati sãpiretakani sãpiretakiti, kotxi Erekar Matamatakoti hĩte ãkixinireẽ auakari apia posotiireri itxaua iua. Maerekati matamatakoti, Xesosi sãkire mauiãkani ãkixinireẽ auakari, kaposotiireri itxaua, iuaritika Erekar Matamatakoti hĩte ãkixinireẽ auakari apia sikaimaroretai hĩte. ⁵ Ninoa atão minakati sãpiretakani xinikakiti, itixi auakani xinikakiti atokotxikana, ininiãkara itixi auakani auikari ninoa sãkire. ⁶ Atepekana, Teoso nakitiakori atxaua. Teoso imarotakari auikari asãkire. Teoso nakiti minakatiua ! auikari asãkire. Ininiãkara aimarotari kãkiti Erekar Matamatakoti auaãkixiniretakini. Iua Erekar Matamatakoti atãonoka isãkirauata. Aimarotari kãkiti ãti matamatakoti auaãkixiniretakini. Iua ãti matamatakoti kamisirienereri itxaua.

Teoso Tiraõki

⁷ Nitiretakini, matiretakakaua, kotxi tiraõkitxi Teosomoni potorikakari itxaua. Katiraõkirini Teoso anaakori itxauana. Ninoa atão imarotari Teoso. ⁸ Matiraõkiti ! imarotari Teoso, kotxi Teoso tiraõkiuatapika. Tiraõkitxi Teosomoni potoriãkari itxaua. ⁹ Teoso iokanatar imatonõkari imi atemoni, Teosokata ãtipirika aãuini ĩkapani. Ikara atoko ininiã, Teoso oerekaua itiretiniua. ¹⁰ Ikara tiraõkitxi atão inakari itxaua. Mitxi ate ! atiretari Teoso. Iuaritika iua tiretaua ate, ininiã iokanatar imi atemoni ipinini ĩkapani, maerekati akamakiti imakatzakini ĩkapani.

¹¹ Nitiretakini, ikara atokorako itxa Teoso tiretiniua, ininiã matiretakakaua. ¹² ! Auari Teoso atamatakari, iuaritika Teoso auari aãkixinireẽ, atiretakakiniãua. Ininiã Teoso oerekaua atão atiraõkiuatini.

¹³ Aimarotari Teosokata akaikotini ãtipirika. Aimarotari Teoso ãtipirika kaikotini atekata. Aimarotari ikara atoko inakari, kotxi iua sikari Erekar Matamatakoti atemoni. ¹⁴ Aãtamatapekari Xesosi kamakiti. Akenakotapekari isãpiretakiti. Ininiã asãpiretari ikinimane, aĩri Teoso iokanatar imi kãkitimoni, amaerekani makatzakakari ininiua ĩkapani, kãkiti ãtipirika Teosokata auini ĩkapani. ¹⁵ “Xesosi Teoso ãkiripitikara,” ina sãkiretakani, Teoso kaikotapika ninoakata. Apaka ninoa kaikota Teosokata ãtipirika. ¹⁶ Aimarotari Teoso tiretiniua. Aãuikapiretapitikari Teoso tiretiniua.

Teoso tiraõkiuatapika. Kãkiti katiraõkiri kaikota Teosokata ãtipirika. Teoso kaikota ãtipirika iuakata apaka. ¹⁷ Teoso oerekapekua atão atiraõkiuatini iua tiraõkiuatini atokokana. Ininiã kataparaxinireua Kristo apisatoõ aãpokasaaki, kãkiti misiritiko õtisaaki. Aimarotari ! imisiritaua iuasaaki, ininiã kataparaxinireuako, kotxi ĩkorapokoriti aãuakasaaki Kristo atoko atxaua. ¹⁸ Atiraõkiuatakasaaki, !apĩkarauata. Atão atiraõkiuatiniã, !auari apĩkare. Apĩkarauatakasaaki, amaãkaua.

¹⁹ Atiretari Teoso, kotxi mitxipeka iua tiretaua ate. ²⁰ Iua itari omanatakari, “Nota tiretari Teoso” ina sãkiretakari, paxirari isãkire. !Itiretari itari iuakata auakari. Ininiã ! iposotari itiretiniri Teoso imaõkitakiniti. ²¹ Ininiã Teoso paniãtaua: “Teoso tiretakari tiretariko itari apaka.”

5

Teoso ãkiri Auikiko

¹ Xesosi Teoso mereẽkiti itxaua. Ikara auiãkani Teoso anaakori itxauana. Aĩri Teoso atiretiniã, aĩtariakori apaka atireta, kotxi Teoso anaakori ninoa

apaka txaua. ² Teoso atiretiniã, inireëkiti iaõka akaminiã, aimarotari Teoso anaakori apaka atiretini. ³ Teoso atiretiniã, akĩpitari ipaniãtakiti. Aposotari akaminiri ipaniãtakiti, kotxi na kamimari ipaniãtakiti. ⁴ Aposotari akaminiri iua paniãtakiti, kotxi iua anaakori atxapekaua, ininiã isikataparataua, maerekati itixi auakani nireëkiti amakamakani ĩkapani. Kininiãpa isikataparataua maerekati ninoa nireëkiti amakamakani ĩkapani? Isikataparataua, kotxi Xesosi sãkire aũuika. ⁵ Kipa posotari maerekati itixi auakani nireëkiti imakamakani? Kãkiti auikiniãri Xesosi Teoso ãkiri ininiãua, iuanokara posotari maerekati imakamakani.

⁶ Xesosi Kristo Teoso ãkiri itxaua. Teoso oerekapekaua Xesosi iua ãkiri ininiãua. Kãuaãriã Xesosi patxisatikosaaki isãpiretaua. Iuaĩkana Teoso sãpiretaua Xesosi iua ãkiri ininiãua, Xesosi ipĩkasaaki iarẽka ixikepoatakasaaki. Teoso sãpiretaua kona Xesosi patxisatikosaakinanini. Iua oerekaua Xesosi Teoso ãkiri ininiãua ipĩkasaaki apaka. Erekari Matamatakoti sãpiretaua Xesosi Teoso ãkiri ininiãua. Iua atãonoka isãkire. ⁷ Teoso tixini auakani ipi, ãti pakini oerekaua Xesosi Teoso ãkiri ininiãua, aĩri Teosoma, “Teoso Sãkire” inakorima, Erekari Matamatakotima pakini. Naia ipi, ãti pakini ãtinoka. ⁸ ĩkorapokoriti auakani ipi, ãti pakini, Erekari Matamatakotima, Xesosi patxisatikoma, Xesosi ipininima pakini oerekaua Teoso ãkiri ininiãua Xesosi. ⁹ Kãkiti erekarini sãpiretakiti aũuikapitika, ininiã apiata maũuikari Teoso sãpiretakiti, kotxi atãonoka isãkire. Iuara sãpiretaua Xesosi iua ãkiri ininiãua. ¹⁰ Teoso ãkiri auĩãkari ãkixinire imarotari ikara Teoso sãpiretakiti atão inini. Teoso sãpiretakiti mauĩãkati txari: “Paxirari Teoso sãkire,” kotxi !auikari Teoso sãpiretakiti Xesosi iua ãkiri ininiua. ¹¹ Kiripa Teoso sãpiretaua? Iua sãpiretaua: “Nitxĩkitakai auãki hinini notakata hãuapininiika hinini tĩkane. Ikara atoko nitxĩkitakai namarite nakitiakori hinakasaakia.” ¹² Iua Teoso ãkiri nakiti Teosokata ãtipirika auako. Iua Teoso ãkiri nakiti minakatiua, !auapani ãtipirika Teosokata.

Aũuini ãtipirika Anini Tĩkane

¹³ Hĩte auikari Xesosi Teoso ãkiri ininiua. Niokanatsopata hĩtemoni, Teosokata ãtipirika hãuini himarotini ĩkapani. ¹⁴ Teoso nireëkiti atokotxikana aamanainiãri Teoso, aimarotari ikenakotari amisãkiretiniri, ininiã kataparaxinirepitikaua amisãkiretiniri, kotxi aimarotari iua apakapapiretapitikaua. ¹⁵ Ikara atoko aniniã, aimarotari ikenakotari aamanaãkiti, ininiã isikapitikaua.

¹⁶ Himarotakasaakiri pitari kaminiri maerekati, himisãkiretari Teoso iua ĩkapani. Ininiã Teoso makatxakari maerekati ikamakiti. Teoso kamari iua ãtipirika iuakata auini ĩkapani. Ikara maerekati makatxakiko auapitika, ininiã kona itxĩkitakari iua xinire ipinini. ãtião maerekati kãkiti kamakiti aua. Ikara maerekati makatxakiko !auari, ininiã itxĩkitakari kãkiti xinire ipinini. Nota !õtãkikai himisãkiretiniri Teoso ikara atoko inakari maerekati kamakari ĩkapani. ¹⁷ Teoso paniãtakiti amakamakaniã, iuara maerekati txaua. Iuaritika aamanainiãri Xesosi ikara maerekati imakatxakini, ininiã ikara maerekati !itxĩkitakari kãkiti xinire ipinini.

¹⁸ Teoso anaakori atão inakani !inirekaikari maerekati ikaminina. Aimarotari ikara. !Inirekaikarina maerekati ikaminina, kotxi Teoso ãkiri nĩkatana ninoa. Ininiã maerekati auĩte Satanasi liposotari imisiritinina.

¹⁹ Ikini itixiti auakani auĩte itxaua Satanasi, maerekati kamakari. Iuaritika aimarotari Teoso anaakori aniniua ate.

²⁰ Aimarotari, Teoso ãkiri apokapeka ĩkorapokoriti. Aimarotari iua sikaua imarore, ininiã aimarotari Teoso atão inakari. Akaikota iua atão inakarikata.

Ari akaikota imi Xesosi Kristokata. Teoso atão inakari itxaua iua. Itxĩkitakaua iuakata ãtipirika aãuini.

²¹ Namariteni, nota tirketakini, !hĩteosonetapiri Teoso minakatiua. Ameẽ.

2 XOÃO

Iuaĩkana Xoão Iokanatsopatakiti

¹ Nota Xoão, mitxipe Xesosi imarotakarino nota. Niokanatsopata hĩte Xesosi sãkire auiãkanimoni, hamariteakorimoni apaka. Teoso mereẽpekai hĩte inakitiakori hininiua ĩkapani. Nitiretai, kotxi hĩtiretari Teoso sãkire atão inakari. Kona notananini tiretai hĩte. Ikinimane atão inakari imarotakani tiretai hĩte apaka. ² Atiretai hĩte, kotxi atão inakari aua aãkixinireẽ. Atão inakari kaikotapika atekata ãtipirika.

³ Aĩri Teoso, imi Xesosi Kristo pakini sikari ikinipoko erekari hĩtemoni. Amonĩkai hĩte. Ikamaerekaxiniretaina hĩte. Ininiãkara himarotari atão inakari. Himarotari Teoso tiraõki.

⁴ Iteene nipoxokoniua, kotxi nimarotari apanakini hĩte kĩpitapikari Teoso sãkire. Atão inakarinoka hĩkama, kotxi aĩri Teoso paniãtaua ikara atoko inakari akamini. ⁵ Nota tiretakini, ia nipaniãtai: “Matiretakakaua.” Ikara Teoso paniãtakiti !amanerini. Akenakopiretapekari ikara Teoso paniãtakiti, merepitipanika Xesosi sãkire akenakotakasaaki. ⁶ Kisaakipa atiraõkiuata? Teoso paniãtakiti ikiniõtika akĩpitakasaakira, iusaaki atiraõkiuata. Merepitipanika pikenakotapekari ia Xesosi paniãtakiti: “Matiraõkiuata ikiniõtika.”

Kristo Omanatakani

⁷ Kaiãopokori kamisirienererini aua ikini itixiti. Ninoa sãkire: “Na kãkiti !itxaua Xesosi Kristo,” itxana isãkirena. Ikara atoko inakani misirienetari kãkiti. Kristo omanatakani itxauana ninoa. ⁸ Erepaniko. !Hãuikapiri isãkirena atão minakati, kotxi ninoa nirekari ixipokinirina hĩparĩka Teoso ĩkapani. Hinirekapitikari Teoso sikinii ikinipoko hĩparĩka ĩki.

⁹ Kãkiti takanapiniãri Kristo oerekakiti sãkiretxiti, ikamari maerekati. Teoso nakiti !itxaua. Kãkiti ãtipirika auikiniãri Kristo oerekakiti, imoianatari aĩri Teoso, imi pakini. ¹⁰ Kãkiti apokiniã paapoko, Kristo oerekakiti mauikakati, sãkiretxi atão minakati oerekakari, kona pauiritapiri ikaikotini paapoko. !Papakapapiri iua. ¹¹ Iua apakapakari apaka kamari maerekati iuakata, kotxi auiritari atão minakati isãpiretini.

¹² Ninirekari ito nisãpiretinii, txamari !ninirekari aãtsopaã nisãpiretakiti nitakini. Ninirekari naõkitinii hĩte. Iusaaki asãkirauatako aãpisatoõtakakiniua, ininiã iteene apoxokoniua iusaaki.

¹³ Hĩtariakori Teoso mereẽkini uai auakani iokanapireta hĩtemoni. Ixinika-manapitaina hĩte. Ameẽ.

3 XOÃO

Iuaĩkana Xoão Iokanatsopatakiti

¹ Nota Xoão, mitxi Xesosi imarotakarino, niõkatsopata pite nitiretakiti Kaiomoni. Nitiretai pite, kotxi pite turetari atão inakari Teoso sãkire.

² Nitiretakiti, ninirekari ereka pinini pauini. Nimarotari pãkixinire ereka inini. Iua atokotxikana ninirekari piĩto ereka inini pimamianareni ĩkapani.

³ Aĩtariakori mitxi hĩtemoni nota iokanatakini, apokapeka uai. Isãpiretanona pite iteene auikiniri atão inakari Teoso sãkire. Ikiniõtika pikamari Teoso sãkire iaõka. Atãonoka pikama. Ininiã ninoa minapiretakiti iteene kamapoxokonitano. ⁴ Namariteni atoko hĩtxaua, ininiã nikenakopiretakasaakiri ikiniõtika hĩkaminiri atão inakari Teoso sãkire iaõka, nipoxokoniuata. Ikara atoko inakari minapirenatxi, ninoa minapiretakiti, apia kamapoxokonitano nota.

⁵ Nitiretakiti peerekai pite, kotxi ikiniõtika pimoianatana aĩtariakori ereẽ apokakani. Mitxi !pimarotana ninoa, iuaritika pimoianatana. ⁶ Ninoa aĩtariakori sãpiretapekari pitiraõki Xesosi sãkire auĩãkanimoni uai auakanimoni. Paapoko iuaĩkana ipotorikasaakina, erekari ninoa amonitakiti pisikinina, kotxi Teoso apokaerekatari ikara atoko pitiretinina. ⁷ Ninoa takanapari aapokona Xesosi sãkire isãpiretinina ĩkapani. Xesosi sãkire mauĩãkani ! isikana iamonitakitina ninoamoni. ⁸ Ininiãkara maãpakapana Xesosi sãkire sãpiretakani aãuapokoã. Ininiã amoianatana Teoso sãkire atão inakari iaripiretini ĩkapani.

Txiótepi, Temétxio Pakini

⁹ Niõkatsopatapeka Xesosi sãkire auĩãkanimoni ereẽ pauiniãtaã auakanimoni. Txamari Txiótepi inakori !ikĩpitari nõtãkikare. Iua iuikapikaua. Inirekari ninoa auĩtetiniri iua, ininiã !imaãkatari nisãkire. ¹⁰ Iua kamapiretapikaua ate. Kona ikarananini ikama. Apaka !apakapana aĩtariakori, hĩtemoni sikani. Apaka !auiritana apanakini apakapinina ninoa. !Auiritaikari aĩtariakori nirekaãkani apotiitiniua Teoso misãkiretiko aikotiã. Ereẽ napokasaaki, iusaakiko nisãpiretai hĩte iua apisatoõ ikinika maerekati ikamakiti.

¹¹ Nitiretakiti, !pikamapiri maerekani kamakiti atoko. Erekarini kamakiti atoko inakarananira pikamako. Erekarini kamakari Teoso nakiti itxaua. Maerekati kamakari !imarotari Teoso.

¹² Temétxio inakoripekana, ikinimane sãpiretari iua ereka inini. Atão inakari Teoso sãkire oerekaua Temétxio kamakiti atão inini. Ate apaka sãpiretari iua ereka inini. Himarotari atão inakaranoka asãpireta.

¹³ Ninirekamari ito nisãpiretinii, txamari !nininekari aãtsopaã nisãpiretakiti nitakini. ¹⁴ Ninirekari paĩtiki naõkitinii pite. Iusaaki asãkirauatako aãpisatoõtakahauako.

¹⁵ Ninirekari Teoso kamaerekaxiniretinii. Aĩtariakori uai auakani sãpiretai ixinikamanapitinii. Pisãpiretana ikinikana aĩtariakori ereẽ auakani, axinikamanapitinina ninoa.

XOTA

Xota Iokanatsopatakiti

¹ Nota Xota. Xesosi Kristo nitiri amotakori nitxaua. Txiako itari nitxaua. Niokanatsopata kãkitimoni, Teoso akiritakinimoni, Teoso aïri tiretakinimoni. Xesosi Kristo nïkatakiniimoni niokanatsopata.

² Teoso iteene amonïkai. Iteene ikamaerekaxiniretai. Iteene itiretai.

Atão Minakati Oerekakani

³ Hïte nota tiretakini, Xesosi makatzakapekari himaerekani, nota maerekani apaka. Ninirekamari niõkatsopatiniri amaerekani makatzakiko pirena hïtemoni. Iuanoka ninireka niõkatsopatini, txamari nixinikari erekape ãtião niõkatsopatini. Ninirekari nõtãkikinii. Teoso oerekakiti sãkiretxiti inakitiakorimoni isikakiti hinïkaenatariko. Teoso oerekakiti ikinika isikapekari inakitiakorimoni. !Hãuritapiri apanakini koketiniri ikara ninoa oereëkitikata. ⁴ Hïte Xesosi sãkire auiãkani sauaki aua Teoso mapaxitakani. Merepanika ninoa apotiitakasaakiua hïtekata, !himarotari kamisirienererini ininiuana. Ninoa koketari isãkirena Teoso sãkirekata. Ninoa sãkire: “Ate sirïka anireëkitokata, kotxi Teoso katiraõkiri, ininiã iua !imisiritaua.” Ikara atokora itxana ninoa. Xesosi Kristonokara aãuïte. Apiananiri itxaua. Iuaritika ninoa !inirekari Xesosi. Kitxakapirïka Teoso sãkire iõkatsopatakori sãpiretari Teoso misiritiniri kãkiti ninoa atoko inakani.

⁵ Kitxakapirïka Exito tixini auakani misiritana Xoteoakori. Himarotapekari ikara inakari. Ninirekari iuaïkana hïxinikiniri ikara inakari pirena. Teoso moianatana Xoteoakori, ininiã ninoa miteka, Exito tixini osipikinina ïkapani. Hïxinikariko ia: Teoso makatzakana ninoa iuasaaki imapinakanina ïkapani, iuaritika mapa kasiriti napa atoko Teoso okana ninoa iua sãkire mauiãkani.

⁶ Ætipekana nisãpiretai. Hïxinikariko Teoso nitiriakori iaxitikini kitxakapirïka. Teoso txïkitakana ninoa auïtetxi ininiuana, txamari !inirekaikarina Teoso paniãtakiti ikaminina, ininiã itakanaparina auiniãtaãna Teoso tixineë. Hïxinikariko ia: Teoso paniãtana ninoa ipiaã ikaikotinina ãtipirika. Itixi xipokini õtisaaki Teoso misiritanako ninoa.

⁷ Ætipekana nisãpiretai. Hïxinikariko Sotoma sitatxiti, Komoha sitatxiti, apanakini sitatxiti apaka iuaãtaã takote auakari. Iuaã auakani !inirekari Teoso paniãtakiti ikaminina, ninoa Teoso nitiriakori atokokana. Maerekatinoka inirekapikana, kiki sirïkini ãti kikikata. Ininiã Teoso xipokari iuaã auakari sitatxiniri. Ninoa maerekani xika Teoso iokanatana ninoa arikatxi maxipokatimoni. Iuaã imisiritaãkapikana. Ikara õtãkikaua maerekati amakamakani tïkane.

⁸ Ninoa maerekati kamakani, kamisirienererini hïte sauaki auakani, kitxakapirïkarini atokokana itxana. Ixiniãkitina maerekati xika ninoaka ïto imisiritauana. !Inirekarina Teoso ninoa auïte ininiuana. Imisãkirepiretarina Teoso nitiriakori iaxiti auakani. ⁹ Mikeo inakori Teoso nitiriakori auïte itxaua, iuaritika !imisãkirepiretari ãti Teoso nitiri iaxitikiri. Kitxakapirïka iua Mikeo Satanasikata itaparakienatakakaua, kotxi Mikeo nirekari Moisesini ïto ikatini, txamari Satanasini nirekari Moisesini ïto iua inakiti ïkapani. Iuasaaki Mikeo !imisãkirepiretari Satanasini. Ianoka isãkire: “Teoso misiritapanikaiko pite,” itxari Satanasini. ¹⁰ Txamari ninoa kamisirienererini hïte sauaki auakani misãkirepiretari ikinika imimarotakinina. Ninoa ïïkite kaxipiri ïtopa auakani ïïkite atokokana, kotxi ikamarina ïïtonani nireëkiti. Ikara ïïkitena xipokanako ninoa.

¹¹ Teoso misiritanako ninoa. Kitxakapirīka Kaiī inakori kamari maerekati. Iua maerekani atokokana ninoa maerekani. Kitxakapirīka Paraão inakori kamari maerekati txineiro apakapini ĩkapani. Iua maerekani atokokana ninoa maerekani. Kitxakapirīka Koree inakori !inirekari Moisesi iauīte ininiua. Iua atokokana ninoa !inirekari Teoso iauītetini. Ininiã ixipokaãkanako Koree xipokiko atokokana.

¹² Hãpotiitakasaakiua hinipokotini ĩkapani, ninoa kamisirienererini apaka nipokota hītekata. !Ipētauatana. Itxikotarina iua kiiniri imaerekanina xika. Ninoaka itiretaua. !Itiretarina apanakini. Ītima anikari katxiãri iaxitikiri, ininiã katxiãri napiniãtaã ãparaã kipa, takari aneini ĩkapani. Txamari ninoa kamisirienererini katxiãri ãki ãparaã mauakiniti atoko itxa. !Erekana kãkiti ĩkapani. Mitaãsaaki aua txipokori, txamari ninoa kamisirienererini mitaãsaaki aamina mariti atokokana ninoa. Aamina mariti ipĩkari atoko, kotxi !iminua. Ninoa iua atokokana, kotxi !ikamari erekari. Aamina mariti tokaãka. Ikotsa maporokaãka, ininiã atão ipĩkari itxaua. Ninoa kamisirienererini ikara aamina atoko, kotxi ipinanako. !Ikaikotana Teosokata ãtipirika.

¹³ Potxoari uiniti tsakati pamonõkoniri atoko itxa ninoa kamisirienererini. Tsakati sori txiko atoko itxa ninoa maerekani. Iõriki atoko itxana. Iua iõriki sinimoni !kimarotikori. Ninoa sariko ipiãmoni ãtipirika ikaikotinina ĩkapani. Teoso mereẽri ikara ipiaãtaã ninoa auini ĩkapani.

¹⁴ Kitxakapirīka Enoki inakori sãpiretapekari kamisirienererini pirena. Iua Enoki Adão apika mekaniri apika mekaniri itxaua. Enoki txari: Hãtamatariko. Apiananiri apokako itiximoni itomaneri inakitiakorikata. Mio, apikomoni mio, apikomoni mio, itxaãpokata inakitiakori iuakata ĩkani.

¹⁵ Iua ikinipoko misiritiko sãpiretakari itxaua. Iua apokasaaki, isãpiretanako maerekati kamakani misiritiko, Teoso manireẽkani misiritiko, kotxi Teoso !ipotxitari ninoa kamakiti. Ninoa misãkirepiretapikari Teoso. Ninoa maerekani xika, Teoso imanirekakanina xika, imisiritaãkanako, itxa Enoki sãpiretakiti kitxakapirīka.

¹⁶ Ninoa kamisirienererini ãtipirika tsoatapika. ãtipirika apoĩtapikana apanakini. Iĩtona nireẽkitinanira ikamana. Iuikauana. “Peerekai pĩte,” itxana ãtimoni inireẽkitinani apakapinina ĩkapani.

Õtãkipirenatxi

¹⁷ Nitiretakini hĩxinikariko aãuĩte Xesosi Kristo iokanatakini sãpiretakiti akokaxiti. ¹⁸ Ninoa txai: “Xipokatxi õti kaiamapeka inini manapi apokanako kikiakori hĩte napetakani tĩkane. Ninoa kamariko ninoaka nireẽkiti, Teoso manireẽkiniti,” itxana Xesosi Kristo iokanatakini sãpiretakiti. ¹⁹ Ninoa maerekani xika kãkiti txitakakaua. Ninoa kamisirienererini kamari iĩtona nireẽkitinoka. Erekari Matamatakoti !auinana ninoa.

²⁰ Hĩtepekana nota tirketakini, iteene hãuikapikariko Teoso oereẽkiti. Ikara atoko hininiã, kataparaxinireiko hĩte. Hãuikariko Teoso oereẽkiti, kotxi Teoso sãkire itxaua. Himisãkiretariko Teoso. Erekari Matamatakoti oerekai atão hĩsãkirauatini ĩkapani. ²¹ Maerekati kamakani, iuaritika aãuĩte Xesosi Kristo !imisiritai. Iua anikai ãtipirika iuakata hãuini ĩkapani. Ikara hiãtapakasaaki, ãtipirika hĩxinikapikariko Teoso tiraõki hĩte ĩkapani. !Hĩtakanapapiri iua.

²² Apanakini !auikapanikari ikinika Teoso oereẽkiti, iuaritika !hĩtxitapena. Himoianatanako ninoa iteene auikiniri ĩkapani. ²³ Pamonõkoniri, kãkiti kamakasaakiri maerekati. Xamina tirinakari atoko itxa imisiritikona imaerekanina xika. Ininiã hĩsãpiretanako Teoso sãkire, imisiritikona apokini apisapanika. Xamina tirinakari ãki katxakakari pimakatxakini atokokana itxa, pisãpiretakasaakiri Teoso sãkire ninoamoni. Apanakinipekana hiamonĩkako. Hiamonĩkasaakina, erepaniko, kotxi pamonõkoniri ninoa

maerekani. Homanatariko maerekati ninoa kamakiti, hĩte makamakaniri ĩkapani.

Peerekari Teoso

²⁴ Teoso kaposotiireri nĩkataua maerekati amakamakani ĩkapani. Iua anikaua iua apisatoõ apoxokoniritika. Iuasaakiko amaerekani !auaikako. Peerekari aãuini iua apisatoõ. ²⁵ Āti Teoso !auari. Iuanokara Teoso txaua. Iuanokara kimaroreri. Amaerekani makatxakakari itxaua, kotxi aãũte Xesosi Kristo ipina ate ĩkapani. Iua iotximere aua, kotxi imaerekani !auari. Auĩtetxiakori auĩte itxaua iua. Kaposotiireri iua. Iposotari ikinipoko ikamini. Itixi kamiko apisapanika ikara atoko itxa Teoso. Uatxa ikara atoko itxapanika Teoso. ĩkara atoko itxapikako ātipirika Teoso. Ameẽ.

APOKORÍPISI Xesosi Kristo Iuaka Oerekinia Pirena

Ia Aãtsopa Oerekaua Xesosi Kamakiti

¹ Ia aãtsopa oerekari Teoso nakitiakori Xesosi Kristo paítiki kamaenetakiti. Teoso iokanatari initiri iaxitikiri Xoãomoni Xesosi Kristo kamaenetakiti oerekini íkapani. ² Ikinika Xoão atamatakiti, ikinika ikenakotakiti pakini isãpireta ia aãtsopaã. Ikara atoko isãpiretaua ate Teoso sãkire, Xesosi Kristo sãpiretakiti iuamoni. ³ Ia aãtsopa atatsopatakani Teoso takariko erekari ninoamoni. Teoso takariko erekari ia isãkire kenakotakanimoni, ia isãkire kípitananimoni, kotxi ikinika Xoão iõkatsopatakiti okatapaniri apokini.

Xoão Iõkatsopare

⁴ Nota Xoão. Niokanatari ia niõkatsopare Teoso mereëkinimoni. Setxi sitatxiti Ásia inakori tixini auakanimoni niokanata niõkatsopare.

Teoso sikari ikinipoko erekari hitemoni. Ikamaerekaxiniretai hite. Uatxa iua aua. Merepitipanika kitxakapiríka iua aua. Iua átipirika auapikako. Setxi matamatakoni iaxitikini Teoso topãkiniãtaã apisatoõ auakani sikari erekari hitemoni. ⁵ Xesosi Kristo apaka sikari erekari hitemoni. Atão inakarínoka sãpiretakari itxaua iua. Iua merepitipanika õkitikaua ipíkani sauaki. Apaka itixi auakani auíteakori auíte itxaua iua.

Iua ate tiretakari. Ipina ate íkapani amaerekani imakatzakini íkapani, ininiã isikakaua erekari akamini íkapani. ⁶ Itxíkitakaua auítetxiakori aniniua. Itxíkitakaua sasetotxiakori aniniua, kotxi asãkirauata Teosokata. Ininiã atxari Xesosi:

“Átipirika peerekai pite. Átipirika pitenokara kaposotiireri. Ameë.”

⁷ Hãtamata, Xesosi napani. Iua inako katxiãrikata. Iuasaaki ikinimane kãkiti atamatariko. Aamina ípiriãmitakari nopini iua tokakitakani apaka atamatariko iua. Iuasaaki ikini uãkati kãkiti atapariko iua. Ninoa atapakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameë.

⁸ Apiananiri txari:

—Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiretxi aua notamoni —itxa.

Xoão Atamatarí Aítari Iaxitikiri

⁹ Nota Xoão, hítari. Nikamari Xesosi Kristo nireëkiti, ininiã himoianari nitxaua, kotxi átipirika nimíteenekari nimisiritiko, hite misiritiko himíteenekini atoko. Ikara misirikaretxi apokapitika atemoni, kotxi aãuíte Xesosi Kristo nakitiakori atxaua. Nota aua Patamosi inakori pokomiriíti. Nitakaãka uai, kotxi Teoso sãkire nisãpireta apanakinimoni. Ikinipoko nimarotakiti Xesosi Kristo pirena nisãpiretini xika kãkiti takano nota uai. ¹⁰ Kãkiti Apiananiri xinikini õtisaaki, Erekari Matamatakoti sikaimaroretano nota. Iuasaaki nikenakotari sãkiretxi nitikinimoni. Sãkiretxi apiaenetakari, trõpeta atoko nikenakota. ¹¹ Itxari:

—Kãkiti apisapanika naua nota. Nota auapanika ikinipoko xipokaãka atoko. Piõkatsopata aãtsopaã patamatakiti tíkane. Eereka piokanatari iua aãtsopa kãkiti Teoso mereëkinimoni setxi sitatxiti auakanimoni Ásia tixineë. Piokansopata Épeso sitatxiti auakanimoni, Esimina sitatxiti auakanimoni,

Pékamo sitatxiti auakanimoni, Txiatxira sitatxiti auakanimoni, Satxima sitatxiti auakanimoni, Piratéopia sitatxiti auakanimoni, Araotxiséia sitatxiti auakanimoni pakini —itxa notamoni.

¹² Ininiã eereka nikirioka notakata sãkirauatakari natamatini ïkapani. Nikiriokasaaki, natamatari setxi tirikapi topãkini oro kamakori. ¹³ Tirikapi topãkiniãtaã, natamatari kãkiti itari iaxitikiri, iuaritika ipinimoni itxaua. Iua mãka õtanori. Ikitiãpeka apoka. Ipakiomatare atoko oro kamakoro aua itorotamoni. ¹⁴ Iãko iteene kasarori mapoa atoko itxa. Xamina tirinakari atoko itxa oki. ¹⁵ Ikiti mẽkorïka pirõsi xamina ãki imẽkorïkini atoko. Isãkire ene ãparaã torõkani atoko. ¹⁶ Iuako ikikomoni imaïkaro setxi iõriki. Inamaã iouata mitari pokïka. Iua iouata ipi uanaro aua. Atokatxi iotximere atoko itxa itoõ.

¹⁷ Natamatakasaakiri, nirika ikitimoni. Koriãkari atoko nitxa. Ininiã iuasaaki itakari iuako ikikomonikiri nota nopini. Itxano:

—Kona pipïkarauatape, kotxi ikinipoko auini apisapanika nota aua. Ikinipoko xipokaãka atoko nota auapanika. ¹⁸ Nota auãkipika inakarino. Nota koriãkaripekano, iuaritika hãtamatano. ãtipirika auãki inakarino nota. Ameẽ. Kaposotiireno nota, kotxi nipaniãtari kãkiti ipinini. Niposotiire aua niokanatiniri kãkiti maerekati kamakani misiritikoãtaã. ¹⁹ Piõkatsopatari mitxi patamatakiti, uatxaika patamatakiti pakini. Apikomoni noerekakiti apaka piõkatsopata, kotxi noerekaiko katana itiximoni ïkari. ²⁰ Kiripa ninoa iõriki setxi pakini niuako nikipomoni auakani? Teoso nitiriakori itxauana. Ninoa anikari nota sãkire nisãkire auiãkanimoni ninoa setxi sitatxi auakanimoni. Kiripa ninoa setxi tirikapi topãkini oro kamakori? Nisãkire auiãkani ninoa setxi sitatxi auakani itxauana —itxa Xesosi Xoãomoni.

2

Xesosi Iokanapirena Épeso Auakanimoni

¹ Xesosi misãkiretari Xoão:

—Piokanatariko ia nisãkire Teoso nitirimoni, Teoso sãkire auiãkanikata auakarimoni Épeso sitatxitiã:

Ninoa setxi iõriki mãkkakarino nota. Nimaïkari ninoa iõriki niuako nikipomoni. Ninoa setxi tirikapi topãkini oro kamakori sauaki tïpokotakarino nota. Ia nota sãkire. ² Nimarotari ikinika hïkamakiti. Nimarotari itori parïkatxi pamimari hïkama. Parïkatxi kamimari inakasaaki, kona hïtakanapari. Maerekati kamakani apokasaaki hïtemoni, kona hïte apakapana. Apokapeka apanakini kãkiti hïtemoni. Itxana: “Teoso iokanatakiniraua ate.” Txamari, kona atão ninoa sãkire. Nimarotari kona hïte auiritana ninoa kaminiri maerekati. Hïte atamakaerekatana. Eereka himarotari kona atão ninoa sãkire. ³ Himisiritaãka nisãkire hïsapiretini xika, iuaritika himïteenekari ikinipoko nota ïkapani. Kona hïsapaka hïparïkauatini nota ïkapani.

⁴ Ikara hïkamakiti erekari, txamari hïtakanapari hïtiretinino. Merepanika hïtiretano. ⁵ Hïxinikariko merepitipanika hïtiretinino. Uatxa poiãoka hïtiretano. Iuaïkana hïkamariko merepitipanika hïkamakiti atokõ. Himatakanapakaniãri ikara himaerekani, patimari napokini hïtemoni. Nimakatxakariko hïtirikapite topãkini. Ininiã Teoso sãkire auiãkani !auaika ereẽ, himatakanapakaniãri ikara himaerekani. ⁶ Auapitika atão hïkamakiti, kotxi hïte omanatari Nikoraito inakoni kamakiti. Nota apaka omanatari ninoa kamakiti.

⁷ Kakenakokii hïte, ininiã hïkenakotariko Erekari Matamatakoti sãkire Teoso sãkire auiãkanimoni. Maerekati makamakati nauiritako amãtiiri

Teoso tixine apanĩkaki auakari itximini. Iua amãtiiri tximakari auapika
 ātipirika Teosokata,
 —itxa Xesosi Épeso auakanimoni.

Xesosi Iokanapirena Esimina Auakanimoni

⁸ —Piokanatariko ia nisãkire Teoso nitirimoni, Teoso sãkire auiãkanikata
 auakarimoni Esimina sitatxitiã:

Ikinipoko auini apisapanika nota aua. Ikinipoko xipokaãka atoko, nota
 auapanika. Nipĩpe, iuaritika iuaĩkana nõkitikaua. Uatxa !nipinaika. Ia nota
 sãkire. ⁹ Nimarotari hãtatsiire. Nimarotari hĩte minakati !auari. Iuaritika
 ikinipoko erekari aua hĩtemoni. Nimarotari apanakini misãkirepiretinii
 hĩte. Ninoa txa: “Xoteoakorira ate.” Txama kona atão Xoteoni !itxauana.
 Ninoa apotiitiniãtaãua Satanasi nakiti. ¹⁰ Kona hĩpĩkapiri himisiritiko
 ĩkapani ĩkari. Satanasi takari apanakini hĩte kateia āki ataerekatini ĩkapani.
 Himisiritaãkako tesi pakini õti. Atxiĩti hĩpina nisãkire hãuikini xika, iuaritika
 kona hĩtakanapapiri nisãkire hãuikini, ininiãkara nisikai ātião saporĩeta. Iua
 saporĩeta apakapakari auapika ātipirika Teosokata.

¹¹ Kakenakokii hĩte, ininiã hĩkenakotariko Erekari Matamatakoti sãkire
 Teoso sãkire auiãkanimoni. Maerekati makamakati kona iuaĩkana ikoriãika,
 —itxa Xesosi Esimina auakanimoni.

Xesosi Iokanapirena Pékamo Sitatxiti Auakanimoni

¹² Eereka Xesosi iuaĩkana misãkiretari Xoão:

—Piokanatariko ia nisãkire Teoso nitirimoni, Teoso sãkire auiãkanikata
 auakarimoni Pékamo sitatxitiã:

Notamoni auari oa iouata ipi uana auakito. Ia nota sãkire. ¹³ Nimarotari
 ikinika hĩkamakiti. Nimarotari hãuiniãtaã. Ereẽ Satanasi kãkiti auĩte itxaua.
 Iuaritika hĩte auikari nota sãkire. Kona hĩte takanapari nisãkire hãuikini.
 Ātxipa inakori auama hĩte sauaki. Iua sãpiretapikari nisãkire kãkitimoni.
 Ikara xika okapeẽka ereẽ Satanasi auiniãtaã. Iuaritika kona hãsikano. !
 Hĩtakanapari nisãkire hãuikini.

¹⁴ Txamari auapitika hĩkerokakiti. Aua kãkiti hĩte sauaki Paraão in-
 akori sãkire auiãkani. Kitxakapirĩka iua oerekari Paraki inakori kãkiti
 Isaeo auakani imisirienetini. Iua Paraki xika ikamarina maerekati, kotxi
 inikarina xinitxi teoso kamakorimoni sikakori. Oerekana kãkiti kaminiri
 maerekati iĩto nireẽkiti āti kãkiti ĩtokata. !Apakata kãkiti auikiniri Paraão
 sãkire. ¹⁵ Hĩte sauaki aua kãkiti Nikoraito inakoni sãkire auiãkani. Nota
 omanatari ninoa auiãkiti sãkiretixiti. ¹⁶ Hĩtakanapariko ikinika himaerekani.
 Hĩkanapiriãko notamoni. Ikara atoko himakamakaniã, patimari hĩtemoni
 napokini. Ininiã nineenamauata maerekati kamakanikata mitaro iouataã
 ninamaã auakaroã.

¹⁷ Kakenakokii hĩte, ininiã hĩkenakotariko Erekari Matamatakoti sãkire
 Teoso sãkire auiãkanimoni. Maerekati makamakati nisikariko komiri iax-
 itikiri kipatakori. Apaka nisikariko kai kasarori maerekati makamakan-
 imoni. Iua kai nopini iõkataãka kãkiti uãka amaneri apanakini mimaro-
 takiniti. Apakapakarinani imarotari iuãka amaneri,
 —itxa Xesosi Pékamo auakanimoni.

Xesosi Iokanapirena Txiatxira Auakanimoni

¹⁸ Eereka Xesosi iuaĩkana misãkiretari Xoão:

—Piokanatariko ia nisãkire Teoso nitirimoni, Teoso sãkire auiãkanikata
 auakarimoni Txiatxira sitatxitiã:

Teoso ākirirano nota. Noki xamina tirinakari atoko itxa. Nĩkiti mẽkorĩka
 pirõsi atoko itxa. Ia nota sãkire. ¹⁹ Nimarotari ikinika hĩkamakiti.
 Nimarotari hĩtiraõki. Nimarotari iteene hãuikari nisãkire. Nimarotari
 iteene hĩparĩkauata nota ĩkapani, apanakini ĩkapani apaka. Hĩparĩka nota

Īkapani pasāpaniri inakasaaki, iuaritika hīkamapanikari nota Īkapani. Uatxa apiaāpota hīparīka nota Īkapani.

²⁰ Itxama, nisāpiretaiko hīkerokakiti. Hīte auiritaro sito, Xesapeo inakoro, maerekati okamini hīte sauaki. Oa txa: “Teoso sākire sāpiretakarono nota.” Otxama, omisirienetana ninitiriakori. Oa xika, ninoa kamari maerekati iitona nireēkiti apanakinikata isirīkinina. Apaka ninoa nikari nipokori teoso kamakori sikakori. ²¹ Niātapari otakanapiniri omaerekani, txamari kona onirekari otakanapiniri omaerekani. ²² Ininiā nota kamariko oa amianatini. Oakata sirīkakani matakanapakaniāro, iteene ninoa atatsi-irauata. ²³ Oa anaakori nokapitikako. Ikara atoko inakasaaki, ikinimane Teoso sākire auīākani imarotariko nimarotari ikinika kākiti ākixinire, ikinika ixinikakiti pakini. Ininiā erekari nisikako erekari kamakanimoni. Apaka nimisiritari maerekati kamakani. Hīkamakiti iaōka nīkitxitai hīte.

²⁴ Uatxa nimisākiretai hīte apanakini Txiatxira sitatxiti auakani. Hīte auikari Teoso sākire. Hīte !auikari Xesapeo sākire. Hīte kona apaiaōkari Satanasi oerekakiti, iua imarore. Kona ninirekari nisikini apikomoni parīkatxi nota Īkapani, kotxi uatxa iteene hīparīkauata nota Īkapani. ²⁵ Ianoka ninireka hīkamini. Hīte auikari nisākire, ininiā hāuikiniritika nisākire, nikanapiriāko.

²⁶ Iua maerekati makamakati, ātipirika nipaniātakiti kamakari, iuamoni nisikariko niposotiire itixi auakani auīte ininiua. ²⁷ Teoso sākire kitx-akapirīkari txari:

Auītetxi itxauako. Itapararitika ipaniātana ninoa inireēkiti ikaminina.

Imakamakaniārina inireēkiti, imisiritana ninoa, tiitxi kamakari tii imanirekakiniti ipakauanakini atoko.

Niri posotiire napakapakiti atoko iua apakapa. ²⁸ Apaka nisikariko iōriki Īkanōkapanikero iuamoni, ininiā notaka nisikaua iuamoni, kotxi iua iōriki atoko nitxaua. ²⁹ Kakenakokii hīte, ininiā hīkenakotariko Erekar Mata-matakoti sākire Teoso sākire auīākanimoni, —itxa Xesosi Txiatxira auakanimoni.

3

Xesosi Iokanapirena Satxi Auakanimoni

¹ Iuaīkana Xesosi misākiretari Xoāo:

—Piokanatariko ia nisākire ninitirimoni, Teoso sākire auīākanikata auakari-moni, Satxi sitatxitiā:

Notamoni aua ninoa setxi Matamatakoni Teoso nakiti. Notamoni aua ninoa setxi iōriki. Ia nota sākire. Nimarotari hīparīka. Apanakini sāpiretai hīte auāki hinini hīxinire, txamari Teosomoni koriākanipekarai hīte. ² Himereka. Araōkire hītxapaniko. Hīsikataparitari erekari hākixinireē auakari, kotxi iua erekari ipinaariāpota. Ininiā hītxīkitakari iua erekari auāki inini iuaīkana. Notamoni hīparīka Teoso apisatoō na atāo. ³ Hīxinikariko hāpakapakiti, apaka hīkenakotakiti. Hīkīpitariko hīkenakotakiti. Hītakanapariko maerekati. Erekar hīkamako, kotxi kītiriri apokini atoko napokako uai. Kākiti kona imarotari kītiriri apokini manapi. Ikara atokokana nitxako nikanapiriākasaaki.

⁴ Hīte Satxi sitatxiti auakani sauaki auapanika apanakini maerekati makamakani. Ninoa auikapitikari nisākire. Ninoa kākiti imāka matxikotakani atoko itxana. Ininiā notakata isanako. Imākana kasarori. Ikara atoko nikaminana, kotxi ninoa kamari erekari nipaniātakiti.

⁵ Maerekati makamakani ieretakariko mākatxi kasarori. Kona noakapaniriko iuākana naātsopateē. Kākiti iuākana ikara aātsopaā auakani ātipirika auapikako Teosokata. Ikara atoko ininiā, nisāpiretari iuākana nirimoni,

initiriakori iaxitikini pakinimoni. Nitxana: “Nota nakitiakori itxauana ninoa.”

⁶ Kakenakokii hïte, ininiã hïkenakotariko Erekarî Matamatakoti sãkire Teoso sãkire auiãkanimoni,
—itxa Xesosi Satxi auakanimoni.

Xesosi Iokanapirena Piratéopia Auakanimoni

⁷ Iuaïkana Xesosi misãkiretari Xoão:

—Piokanatariko ia nisãkire Teoso nitirimoni, Teoso sãkire auiãkanikata auakarimoni Piratéopia sitatxitiã:

Nota maerekati makamakatirano. Atão inakaranani sãpiretakarîkarano nota. Kaposotiireri auïtetxi Tavii inakori atoko nitxa, kotxi nota matakakakiti, kona ãti totari. Nota totakiti kona ãti matakakari. ⁸ Nimarotari hïte parïka. Hãtamata. Hïparïka nota ïkapani aapokotxi tore matakakakori atoko itxa. Kona ãti posotari iseretiniri. Ininiã kãkiti ! iposotari iotokakinii hïte nisãkire hïãpiretini. Ikara atoko nikaminii hïte, kotxi kona kataparai hïte. Ikara atoko nikaminii hïte, kotxi hïkïpitari nisãkire. Kona hïkipatari nisãkire apanakini apisatoõ. ⁹ Apanakini txari: “Atão Xoteoakori atxaua.” Txamari Satanasi nakitiakori itxauana. Paxirari ninoa sãkire. Nikamariko ninoa kapotoreëkiniãua hïte apisatoõ. Iuasaaki ninoa txako: “Atãopitikara Xesosi tiretapitikai.” ¹⁰ Hïkïpitapekari nisãkire. Kamonõkoniri inakasaaki, kona hïtakanapari nisãkire, ininiãkara apia maerekati ikini itixiti apokasaaki, iuasaaki ninïkatakaiko hïte. Iua maerekati kona misiritai hïte. Iua maerekati apokako itixi auakani atamakaerekatini ïkapani.

¹¹ Erepaniko, patimapaniriko napokini ereë. ãtipirika hïkamariko erekari. Hïtakanapapikariko maerekati. Ininiã iuasaaki ãti kona posotari imakatzakiniri auïtetxi saporietane hïtemoni nisikakiti. !Imakatzakarina ikara hïparïka ïki. ¹² Nikamariko maerekati makamakati itïkare mina atoko inini niTeosone misãkiretiko aikoti ãki. Auapika Teoso misãkiretiko aikoti ãki, ininiã !itakanapari Teoso sãkire. Niõkatariko niTeosone uãka iua nopini. Apaka niõkatariko Teoso sitatxine uãka iua nopini. Ininiã apanakini imarotari Teoso nakitiakori ininiuana ninoa. Iua Teoso sitatxine Xerosareë amaneri iua tixine katxakakari. Iua maerekati makamakati nopini niõkatariko apaka nota uãka amaneri.

¹³ Kakenakokii hïte, ininiã hïkenakotariko Erekarî Matamatakoti sãkire Teoso sãkire auiãkanimoni,
—itxa Xesosi Piratéopia auakanimoni.

Xesosi Iokanapirena Araotxiséia Auakanimoni

¹⁴ Iuaïkana Xesosi misãkiretari Xoão:

—Piokanatariko ia nisãkire Teoso nitirimoni, Teoso sãkire auiãkanikata auakarimoni Araotxiséia sitatxitiã:

Niuãka “Ameë.” Nota atão sãkiretxiti sãpiretakarîkarano. Nikamari ikinika nisãpiretakiti. Merepanika nikamari ikinipoko. Ininiã ikinipoko auïte nitxaua nota. ¹⁵ Nimarotari ikinika hïparïka. Hïtxari: “Nauikapitikari Xesosi sãkire.” Txamari kona iteene hinirekari hïkaminiri nipaniãtakiti. Apaka kona iteene hinirekari hïtakanapiniri nisãkire. Kona kapatakari atokoni hïtxaua hïte. Kona katxïkareri atokoni hïtxaua hïte. Poomari atoko hïtxaua. Notamoni apiaerekata kapatakari atoko hininiuua hïte. Iuasaaki iteene hinirekari hïparïkauatini nota ïkapani. Iteene himanirekakaniãri hïparïkauatini nota ïkapani, apiaerekata katxïkareri atoko hininiuua hïte, nisãkire ikinika hïtakanapini. ¹⁶ Notamoni hïte ãparaã poomari atoko hïtxa. Ininiã kona ãparaã kapatakaãri atoko !hïtxa. Apaka kona ãparaã katxïkareëri

atoko !h̄txa. Ikara atoko inakasaaki !niniakai. Ininiã mapara nikanakai h̄ite. ¹⁷ H̄ite txa: “Katxineiroteua ate. Katiua ate. Apikomoni anirekakiti ! auari,” h̄txa. Txama kona himarotari h̄äkixinireẽ iteene himatinaniuatini. H̄äkixinireẽ minakati ! auari. H̄äkixinireẽ mokiri atoko h̄txaua. Kasarari atoko h̄txaua h̄äkixinireẽ. Ikara atoko hininiã, kona himarotari Teoso. ¹⁸ Nõtãkikai h̄ite hiamotiniri notamoni auakari oro atoko inakari. Oa oro xamina oeretakito. Ikara atoko h̄kaminiã, ikinika hinirekakiti auako h̄itemoni. Hiamotariko m̄akatxi kasarori notamonikiri h̄eretakini ìkapani, ininiã kona h̄ip̄etauata kasara hinini xika. Ikara atoko h̄kaminiã, h̄äkixinire ! auari maerekati. Hiamotariko apaka pin̄txi notamoni auakari h̄õki ìkapani, ininiã atão h̄iposota h̄atamarauatini.

¹⁹ Nitiretakini nõtãkika, apaka noerekana. Ininiã ikinipoko atão h̄kamako maerekati h̄itapanapini ìkapani. ²⁰ H̄atamatako. H̄äkixinire toreẽ nota auapeka. Nota haãpoko maparakiri akiritakari atoko. H̄ikenakotiniãri nakiritinii, h̄õsereiniãri h̄äkixinire tore, niõroã h̄itekata nikaikotini ìkapani. Iuasaaki ninipokota h̄itekata. H̄ite nipokota notakata.

²¹ Nauiritari maerekati makamakati topãkini notakata aūtetxi topanere nopini. Iua aūtetxi topanere nota nakiti. Iua atokotxikana nota topãka nirikata aūtetxi topanere nopini iua nakiti nopini, kotxi maerekati makamakati nota apaka txaua. ²² Kakenakokii h̄ite, ininiã h̄ikenakotariko Erekar Matamatakoti sãkire Teoso sãkire aūiãkanimoni, —itxa Xesosi Araotxiséia auakanimoni.

4

Iaxiti Aūtetxi Topanere

¹ Eereka natamatari iaxiti tore. Itore imatakakaãka. Merepanika nikenakotari trõpeta atoko inakari. Kãkiti sãkire atoko itxa. Imisãkiretano:

—Uai pina notamoni. Noerekaiko katana auakari t̄kane.

² Iuasaakipeka Erekar Matamatakoti anikano. Iuasaaki natamatari aūtetxi topanere iaxiti. Topãkakari aua iua nopini. ³ Iuaã topãkakari kai peereri pom̄ekoriri atoko itxa. Iua kai satõnia inakori atoko. Apaka ãti kai sãtxio inakori atoko itxa iua topãkakari. Kisi ãkitari iua aūtetxi topanere. Iua kisi kai esimerãota inakori atoko itxa.

⁴ Iua ìtinikata aua v̄txi koatro pakini topanerexi. V̄txi koatro pakini totiakori topãka iua topanerexi nopini. Ninoa m̄aka kasarori. Ikiina aua saporiēta oro kamakori. ⁵ Aūtetxi topanereãtaã atamataãka ito m̄ëkokari. Iotxira, iokaamori aua iuaãtaã. Iteene poenexitiri. Iua aūtetxi topanere apisatoõ aua setxi tirikapi. Setxi Matamatakoni Teoso nakitiakori itxauana ninoa setxi tirikapi.

⁶ Iua aūtetxi topanere apisatoõ ipoa ãtakaãri atoko itxa. Aūtetxi topanere ìtinikata aua koatro Teoso tixine auakani. Ninoa ok̄txinoka xãpokāitotakini. Auana okina ikini iõtoãna. Itorotaãna aua okina. Iporikiãna apaka aua okina.

⁷ Ok̄txinoka xãpokāitotakiti ãti, ãkiti atoko itxa. ãtipekana kema aūte atoko itxa. ãtipekana aua kiki toõ atoko. ãtipekana kokoi araãkari atoko itxa. ⁸ Ninoa ikininape aua im̄ikitana seisi pakini. Im̄ikitana nopini, ipatapi apaka okina aua. Kona itomatana. Ikini pokamarariti, ikini ìkanõkati itxana:

“Erekai. Erekai. Erekai. Teoso Apiananiri pitxaua. Kaposotiireri pitxaua.

ãtipirika auakarii. Kitxakapir̄ika auakarii. Uatxa auakarii. Katana apaka pite auapanika,”

itxana ãtipirika.

⁹ Ninoa ok̄txinoka xãpokāitotakini xipoãtakasaaki, ixikaretarina Teoso paxitiko pirena. Ixikaretarina: “Ikinipoko ikamakiti ate ìkapani erekarinoka.

Peerekari iua auñtetxi topanere topākakari, ātipirika auapika inakari.” Ni-noa xikaretari ikara Teoso ĩkapani. ¹⁰ Ninoa vñtxi koatro pakini totiakori xikarauatakasaaki, ikapotoreēkauana ixitimoni iua auñtetxi topanere nopini topākakari apisatoō. “Ateosone,” itxana iua ātipirika auapika inakarimoni. Itakarina isaporiētane Apiananiri apisatoō, kotxi Teosonokara ikinimane auñte. Iuasaaki itxana:

¹¹ “Apiananiri, aTeosone pitxaua. Erekaite, ininiā apakatapitika apaxitini. Apakatapitika ikinimane sāpiretini: ‘Peerekai.’ Apakatapitika pite apakapiniri ikini posotiiretxi. Ikara atāo, kotxi pite kamari ikinika. Pite kamari ikinika, kotxi pite nirekari pikaminiri. Pite nirekari ikinipoko auini,” itxana ninoa vñtxi koatro pakini totiakori.

5

Aātsopa Iapiriākori Pirena

¹ Iuasaaki natamatari aātsopa iapirikakori iua auñtetxi topanere nopini topākakari uakoā. Iuako ikikomoniĳiriā aua. Iua aātsopa auari iōka ākiriko, inopinimoni pakini. Iua aātsopa aua setxi popitari kākiti makatamēkakaniri ĩkapani. ² Iuasaaki natamatari āti Teoso nitiri iaxitikiri. Kataparari iua. Itaparasākireritika itxa:

—Kiripa apakata imaktxakiniri ia popitari? Kiripa posotari ikatamēkiniri ia aātsopa? —itxa.

³ Itxama, kona auari iaxiti auakari, kona auari itixi auakari, apaka kona auari itixi patapi auakari, iua aātsopa katamēkakari !auari. Ninoa !iposotari ikatamēkinirina iua aātsopa. !Iposotarina atamatinirina iua aātsopa āki.

⁴ Ininiā iteene nitxiapata, kotxi iua aātsopa iapiriākori katamēkakari !auari. Erekaite kamakari !apokaāka ikatamēkiniri ĩkapani, atatsopatiniri ĩkapani.

⁵ Iuasaaki ninoa totiakori āti txari notamoni:

—Kona pitxiapatape. Patamata ikiraā. Ākiti atoko inakari iua. Xotaa apika mekaniriakori auñte iua. Tavii apika mekaniri iua. Oerekapekari Satanasi poiāori inini. Iua apiata. Ininiā iuanani posotari ikatamēkiniri iua aātsopa iapiriākori. Iuanani posotari imaktxakiniri ninoa setxi popitari —itxa iua toti.

⁶ Iuasaaki natamatari soti auñte okakori atoko. Iua itima iua auñtetxi topanere apisatoō. Ninoa ipi ipi pakini okñtxinoka xāpokañtotakini, ninoa totiakori pakini ākitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso nakitiakori aua. Teoso iokanataka ninoa ikini itixitimoni. ⁷ Iua soti auñte atoko inakari sari iua auñtetxi topaneremoni. Imaĳkari aātsopa topaneretxi nopini topākakari uakoā auakari. Iuako ikikomoniĳiriā aua. ⁸ Imaĳkasaakiri, ninoa koatro okñtxinoka xāpokañtotakini, ninoa vñtxi koatro totiakori pakini patimari ipamakinina soti auñte apisatoō. Ikinikana auari arpa inakori xikari ikaminina ĩkapani. Imakinikana auari kopitipaki oro kamakori. Naia kopitipaki xāpoka koria atoko inakari peeremariri. Ia kamariāro Teoso sākire auñākani sākire iuamoni.

Amaneri Xikariti

⁹ Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aātsopa iapiriākori. Pitenani apakata pimaktxakiniri popitari, kotxi pitenanira erekari. Pite okaāka. Piarēkaā piamotaua ate Teoso ĩkapani. Piamotapekua ikini uākati kākiti sauaki. Ikini āti uāka sākire sākiretakani sauaki piamotapekua. Ikinika itixiti auakani sauaki piamotapekua ate.

¹⁰ Pite txíkitakaua ate auñtetxiakori aniniua, sasetotxiakori apaka aniniua, Teoso íkapani aparíkauatini. Ininiã itixi auakani auñte atxauako ate.”

¹¹ Iuasaaki natamatari itomaneri Teoso nitiriakori. Nikenakotari ninoa sãkire. Kaiãopokori ninoa. Señ mio, apikomoni señ mio, apikomoni señ mio itxaãpokatana. !Apakata ninoa iaõtiko. Ninoa ãkitari iua auñtetxi topanere, okítxinoka xãpokañtotakini, totiakori pakini. ¹² Itapasãkireritika ixikarauatana. Itxana:

“Soti auñte okaãka kãkiti íkapani. Ininiã ãtipirika apakata iua apakapiniri posotiiretxi, ikinika erekari, imaroretxi, taparãtxi pakini. Apakata ikinimane paxitiniri iua. Apakata ikinimane sãpiretiniri iua ereka inini. Apakata ikinimane iuikiniri iua.”

Ikara atoko ninoa xikarauata.

¹³ Ikara eereka nikenakotari ikinika iaxiti auakani, ikinika íkorapokoriti auakani, ikinika itixi patapi auakani, ikinika potxoari uiniti nopini auakani, ikinika potxoari uiniti ãki auakani pakini xikarauatini. Itxana:

“Íkinika erekari ãtipirika aua iua auñtetxi topanere topãkakarimoni, iua soti auñte pakinimoni. Íkinika ãtipirika paxitana. Íkinika ãtipirika txari: ‘Peerekana ninoa.’ Íkinika taparãtxi ãtipirika aua ninoamoni.”

¹⁴ Ininiã ninoa koatro, okítxinoka xãpokañtotakini txana:

—Ameẽ.

Iuasaaki ninoa vñtxi koatro totiakori patimari pamakini.

—ATEosone pitxaua —itxana iua ãtipirika auakarimoni.

6

Soti Auñte Makatxakari Popitari

¹ Natamatari soti auñte makatxakiniri ãti popitari. Ikara natamatakasaaki, nikenakotari okítxinoka xãpokañtotakiti sãkire. Isãkire ikarokirauatini atoko itxa.

—Uai pinako. Patamata —itxa.

² Iuasaaki natamatari kavaro kasarori. Kiki aua oporikiã. Iua tapotxi aua. Auñtetxi saporietane sikaãka iuamoni. Iua sari ikini itixitimoni kãkiti auñte ininiua íkapani.

Ãti Popitari Makatxakiko

³ Eereka soti auñte makatxakari ãti popitari aãtsopaã, ininiã ipi auape. Iuasaaki nikenakotari ãtipekana, okítxinoka xãpokañtotakiti sãkire:

—Uai pinako. Patamata —itxa.

⁴ Ikara eereka natamatari kavaro põkamarari. Kiki aua oporikiã. Iua kiki sikaãka posotiiretxi neenamati ikamini ikini itixitiã, ininiã neenamati mauakaniãtaã !auari. Itxíkitakari kãkiti okakakiniua. Isikaãka iouata mi-tapoari ineenamauatini íkapani.

Ãti Popitari Makatxakiko

⁵ Eereka soti auñte makatxakari ãti popitari, ininiã ipi ãti auape. Iuasaaki ãtipekana, okítxinoka xãpokañtotakiti txari:

—Uai pina. Patamata —itxa.

Ininiã iuasaaki natamatari kavaro pomamari. Kavaro nopini topãkakari aua minari iaõtiko iuakoã. ⁶ Eereka nikenakotari ãti sãkirauatini okítxinoka xãpokañtotakini sauaki. Itxa:

—Ipixini kiro triko íki, ãti õti kãkiti paríka íkitxikana. ãti, ipixini pakini kiro atarokiri atoko inakari íki, ãti õti kãkiti paríka íkitxikana. Iñtxiã íki, ovaã íki pakini poiãopanikako.

Ãti Popitari Makatxakiko

⁷ Eereka soti auíte makatzakari áti popitari, ininiã ipi ipi pakini auape. Iuasaaki nikenakotari imapotôkirekiri, okîtxinoka xâpokaîtotakiti sâkire. Itxari: —Uai pina. Patamata —itxa.

⁸ Iuasaaki natamatari kavaro posêtakari. Inopini topâkakari uâka “Ipîkitxi” inaãka. Áti iua tikini sa. Iua akiritaãka “Maerekani Misiritikoãtaã” inaãka. Isikaãkana posotiiretxi kaiãopokori itixi auakani okiniua îkapani, ininiã koatro kâkiti auiniãtaã áti okaãka. Ninoa okana kâkiti neenamatiã, natxiã, amianariã, kaxipiri kaneenamariã pakini.

Áti Popitari Makatzakiko

⁹ Ininiã soti auíte iuaãkana makatzakari áti popitari, ininiã ipi ipi áti pakini auape. Iuasaaki natamatari Teosomoni sikakori takikoãtaã patapi kâkiti okakoni. Ninoa okaãka Teoso sâkire isâpiretinina xika. Kona itakanaparina isâpiretinina Teoso kamakiti ninoa îkapani, ininiã ikara xika okaãkana.

¹⁰ Itaparasâkireritika akirikatarina Teoso. Itxana:

—Apiananiri, âtipirika erekari kamakarii pite. Atãonoka pisâkire. Kirisaakipa pimisiritari itixi auakani? Kirisaakipa pixikatxitaua ate, kotxi ninoa okaua ate? —itxana.

¹¹ Ininiã mâkatxi kasarori sikaãka ninoamoni. Eereka isâpiretaãkana:

—Hiâtapariko apikomoni. Teoso nirekari apanakini hîtariakori, iniritariakori okiko hîte atoko iniko. Hîtariakori okaãka atoko, Teoso xikatxitai hîte. Hiâtapariko ikara ôti —itxa.

Áti Popitari Makatzakiko

¹² Eereka nitikari soti auíte makatzakiniri áti popitari, ininiã seisi pakini auape. Iuasaakipeka itixi iteene iakeêkata. Atokatxi mamãka, sako mata pomamari potxi iãko kamakori atoko. Kasiri kamarãka arêkatxi atoko.

¹³ Iôriki itori iaxiti auakaro irika îkorapokoritimoni. Amãtiiri îtima iokatxaãkiti atoko otxa. ¹⁴ Natamatari iaxiti aãtsopa iapirikiniua atoko. Ikinika ixirata mitari, ikinika ipokomiriã pakini makatzakaãka. Átiãtaã itakaãka.

¹⁵ Iuasaaki îkorapokoriti auîtetxiakori, kâkiti kaposotiirerini, katiirini, so-tato auíteakori, kâkiti katapararini, nitiritxi amotakoni, nitiritxi minakaniua pakini kipataua aarikoã, kai mitari sauaki ixirataã. ¹⁶ Iuasaaki itxana ixirata auîtemoni apaka kai mitarimoni:

—Hîrikako ate nopini. Hîkipataua, kotxi topaneretxi nopini topâkakari, soti auíte pakini nirekari imisiritiniua ate. ¹⁷ Soti auíte misirikare ôti manapi apopeka. Kona kâkiti mîteenekari ikara misirikaretxi.

7

Sêto Koarêta Koatro Mio Teoso Nitiriakori Itixi Auakani

¹ Eereka natamatari Teoso nitiri iaxitikiri timini atokatxi pokîkinimoni, áti atokatxi ereêkokinimoni, áti atokatxi kimapore sanaremoni, áti atokatxi kimapore kikomoni. Ininiã ipi ipi pakinipe ninoa. Ninoa maãkari îtima ipi ipi pakini itixi auakari îtimati. Ininiã îtima kona inapaika itixiã. Kona kãuaãriã !inapaika îtima. Kona aaminaã !inapaika îtima. ² Natapari áti Teoso nitiri iaxitikiri inaãpotini atokatxi pokîkinimoni. Teoso âtipirika auakari takaôtxikare aua iuamoni. Itaparasâkireritika akiritana ninoa ipi ipi pakini Teoso nitiriakori. Ninoa parîka itixi, potxoari uiniti pakini imisiritinina. ³ Iua Teoso takaôtxikare auakiti txari ninoamoni:

—Uatxa kona himisiritapiri itixi, potxoari uiniti, aamina pakini. Himisiritinina apisa, ate takari Teoso takaôtxikare iniritariakori itixi auakani teãtaã.

⁴ Eereka nimarotari Teoso takaôtxikare apakapakani. Itakaôtxikaãkana sêto koarêta koatro mio kâkiti. Ikini uãka Isaeo tixinikini takaôtxikaãka.

- ⁵ Tosi mio Xotaa apika mekani takaõtxikaãka.
 Tosi mio Hopë apika mekani takaõtxikaãka.
 Tosi mio Katxi apika mekani takaõtxikaãka.
⁶ Tosi mio Asee apika mekani takaõtxikaãka.
 Tosi mio Natarii apika mekani takaõtxikaãka.
 Tosi mio Manasee apika mekani takaõtxikaãka.
⁷ Tosi mio Simião apika mekani takaõtxikaãka.
 Tosi mio Arevii apika mekani takaõtxikaãka.
 Tosi mio Isakaa apika mekani takaõtxikaãka.
⁸ Tosi mio Seporõ apika mekani takaõtxikaãka.
 Tosi mio Xosee apika mekani takaõtxikaãka.
 Tosi mio Pëxamiĩ apika mekani takaõtxikaãka.

Itomaneri Kãkiti Teoso Apisatoõ

⁹ Ikara eereka natamatari itomaneri kãkiti apotiitakaniu. !Apakata kãkiti iaõtiniri ikinikana. Aua kãkiti ikini itixitikini, kãkiti ikini sereti. Aua ikini uãka sãkire sãkiretakani. Ikinikana ninoa timanãta Apiananiri apisatoõ, soti auĩte pakini apisatoõ. Ninoa mãka kasarori. Aãtape aua iuakoãna.

¹⁰ Itaparasãkireritika itxana:

—ATEosone topãka auĩtetxi topanere nopini. Iuara, soti auĩte pakini makatxakapekari amaerekani.

¹¹ Iuasaaki ikinika Teoso nitiriakori iaxiti auakani tima. Ninoa ãkitana auĩtetxi topanere, totiakori, ninoa ipi ipi okĩtxinoka xãpokaĩtotakini pakini. Ikapotoreẽkauana itoõna xitimoni, auĩtetxi topanere apisatoõ. “Ateosone pite,” itxana Teosomoni. ¹² Ixipoãtana Teosomoni:

—Ameẽ. ãtipirika ikinimane sãpiretai ereka pinini. Peerekai. Kimarorei. Erekarĩ pikamakiti ate ĩkapani. Ikinimane paxitai. Kaposotiirei. Pataparai. ãtipirika ikara atoko atxai. Ameẽ.

¹³ Ininiã eereka ninoa totiakori ãti pimaãno nota:

—Kiripa ninoa kãkiti mãkatxi kasarori ieretakakani? Namonipa inana ninoa? —itxa iua.

¹⁴ Ininiã nota txari iua:

—Pitera imarotari.

Ininiã iua txano:

—Ninoa iteene misiritaãkapeka. Uatxa ixipope ninoa misiritiko. Soti auĩte makatxakapekari imaerekanina. Ininiã imãkana soti auĩte arẽkaã arokakori atoko itxauana. Uatxa kasarori imãkana, kotxi itxiko !auari. Soti auĩte makatxakapekari kãkiti maerekani ipĩkasaaki, ininiã mãkatxi kasarori atoko itxa ninoa ãkixinire.

¹⁵ —Ininiã ninoa aua Teoso topanere apisatoõ. Imisãkiretiko aikoti ãki iparĩkauatana Teoso ĩkapani ikiniõtika pokamara, ĩkanõka pakini. Ininiã iua auĩtetxi topanere nopini topãkakari auapikako ninoa sauaki. ¹⁶ Ninoa kona natxitaika. Kona iposonataikana. Atokatxi kona arikana ninoa. Kona kapatakari kona arikana. ¹⁷ Kotxi soti auĩte auĩtetxi topanereãtaã auakari nĩkatanako ninoa. Iua anikana ninoa sõtoãrimoni. Iuaã auakari sõtoãri iãtakani ãtipirika auapikako. Teoso makatxakariko ikinika iãtsaãna. !Itxiapataikana.

8

Imapotõkire Popitari Makatxakiko

¹ Imapotõkire popitari imakatxakasaaki, ikinipoko tsorĩkaxitita Teoso tixineẽ. Ikara atoko ipixini oara. ² Eereka natamatana setxi Teoso nitiriakori, iua apisatoõ timakani. Isikaãkana setxi xikari kamiko trõpeta inakori.

³ Eereka āti Teoso nitiri apoka. Itima Teosomoni sikakori takikoātaā. Kamariāro arikiko koanati oro kamakori iuamoni aua. Kamariāro ito sikaāka iuamoni, Teosomoni isikini ĩkapani, ikinika Teoso nakitiakori amanaākiti sākiretxitikata. Ininiā arikari iua kamariāro Teosomoni sikakori takikoātaā nopini. Oro kamakori iua Teosomoni sikakori takikoātaā auītetxi topanere apisatoō. ⁴ Ininiā iuakoā kamariāro txiā, Teoso nakitiakori amanaākiti sākiretxitikata kanĭka Teoso apisatoō. ⁵ Ininiā eereka iua Teoso nitiri kosekari okoana. Ixāpokakari xaminaminiki mēkorĭkakariā, Teosomoni sikakori takikoātaā nopini auakariā. Eereka okari itiximoni. Iuasaakipeka aua karokirauari, mēkokari pakini. Apaka iusaaki itixi iakeēkata.

Koatro Trōpetā Pirena

⁶ Ininiā ninoa setxi Teoso nitiriakori setxi trōpetā auakini iposope itrōpetane ixōkinina ĩkapani.

⁷ Ininiā ninoa Teoso nitiriakori āti xikarauata itrōpetaneē. Iusaaki katxĭkareri kai soro atoko inakari, apaka xaminaminiki mēkorĭkakari arēkatxiā koketakori okaāka itiximoni. Ikara xika apanakini aamina itixi auakari arika, ininiā ipi āti pakini aamina auiniātaā ātika arikaāka. Ikinika katsotati arika apaka.

⁸ Eereka āti Teoso nitiri xikarauata itrōpetaneē. Ininiā ixirata auĭte atoko inakari arikatxikata okaāka potxoari uinitimoni. Ininiā ipixini potxoari uiniti arēkatxi itxapekaua. ⁹ Ininiā apanakini potxoari uiniti āki auakani ipĭpe, ininiā ipi āti pakini potxoari uiniti auakani auiniātaā ātika ipĭpe. Iusaaki apanakini maporonĭ apaka xipokaāka, ininiā ipi āti maporo auiniātaā ātoka xipokaāka.

¹⁰ Eereka āti Teoso nitiri xikarauata itrōpetaneē, ininiā ipi āti pakini iniritiriakori xikarauatape. Iusaaki iōriki mitari iaxitikero katxaākata. Otirika tirikapi atoko. Oĭrika ipixini uini nopini. Oĭrika ipixini sōtoāri nopini apaka. ¹¹ Iōriki uāka, “Kapixiro,” otxaua. Ininiā ipixini āparaā kapixiā. Ipi āti pakini sōtoāri auiniātaā, ātinoka sōtoāri kapixiā. Ito kākiti iātari iua āparaā, eereka ikoriāna, kotxi kapixiāri āparaā.

¹² Ininiā āti Teoso nitiri xikarauata itrōpetaneē, ininiā ipi ipi pakini iniritiriakori xikarauatape. Iusaaki atokatxi ponikare, kasiri, iōriki pakini kona iteene !iponikaika. Imamākapeka. Ininiākara pokamara ipi ipi pakini oara atokatxi !iponikaika. Iua atokotxikana ĩkanōka ipi ipi pakini oara kasiri, iōriki pakini !iponikaika. ¹³ Ininiā eereka nitikarauatakasaaki, nikenakotari āti Teoso nitiri sākire. Iua araaāpota Teoso tixine. Itapasākireritika itxari:

—Erepaniko. Erepaniko. Erepaniko itixi auakanii. Auapanika apikomoni ipi, āti pakini trōpetā Teoso nitiriakori xōkini ĩkapani.

9

Āti Trōpetā Xōkiko

¹ Ininiā āti Teoso nitiri xikarauata itrōpetaneē. Iusaaki nitikari āto iōriki iaxitikero katxakini itiximoni. Iōrikimoni osikaāka xavi aariko mamapotōkire irikoti tore ĩkapani. ² Ininiā iōriki atoko inakari mataakari iua aariko. Eereka katxiāri kaiāopoko pokĭka. Katxiāri tokori arikikosaaki atoko itxa. Eereka iaxiti, atokatxi pakini piāka itxiā xika. ³ Iposo atoko txĭtxiri atoko inakari pokĭka itxiā. Posotiiretxi isiākana, ininiā kaxĭpiro itixi auakari posotiire atoko aua txĭtxirimoni, kākiti ioākini ĩkapani. ⁴ Ipaniātaākana katsotati imokakanina, apaka takari, aamina pakini imokakanina. Ipaniātaākana imisiritinina Teoso takaōtxikare iteētaā mauakini. ⁵ Kona isikaākana posotiiretxi kākiti okinina ĩkapani. Sĭko kasiritinanira ninoa paniātaāka imisiritinina ninoa.

Imisiritarina kaxapiro ioākini atoko. ⁶ Iuasaaki kākiti nirekariko ipinini. Itxama, kona iposotarina ikoriinina. Initarina ipīkitxi, txamari iuasaaki ipīkitxi mitekapeka.

⁷ Iua txītxiri kavaro atoko itxana. Kavaro neenamatzxi kamakani atoko itxana. Ikiāna aua saporīēta atoko oro kamakori. Itoōna kākiti toō atoko itxana. ⁸ Ninoa iāko sito iāko atoko itxana. Itsiriīna ākiti tsiriī atoko itxana. ⁹ Itorota ipatinina koana metao kamakori atoko. Imīkitana ene kavaro ito-maneri miteēkani ene atoko. Mitekaī ene atoko itxana. ¹⁰ Ninoa xipi kaxapiro xipi atoko itxana. Oko aua ixipiāna. Ninoa posotari kamatsiitiniri kākiti sīko kasiriti. ¹¹ Ninoa auīte aua. Iua Satanasi nitiri. Mitxi aariko mamapotōkire irikoti āki auakari iua. Xoteo sākireē iua uāka Apatō itxaua. Kreko sākireē iua uāka Aporioō itxaua. Popīkari sākireē “Ikinipoko Xipokakari,” itxaua.

¹² Āti misirikaretxi napapeka. Txama auapanikako apikomoni ipi misirikaretxi.

Āti Trōpeta Xōkiko

¹³ Āti Teoso nitiri xikarauata itrōpetaneē. Iuasaaki seisi trōpeta xōkapeēkaika. Teosomoni sikakori takikoātaā oro kamakori aua ipi ipi pakini iko. Ikara Teoso apisatoō. Nikenakotari iko takote auakari sākirauatini. ¹⁴ Ininiā iua txari Teoso nitiri iua trōpetaā xikarauatakari:

—Pisikakanako ipi ipi pakini Teoso nitiriakori iaxirikakoni Eoparatxi inakori uiniti auakani.

¹⁵ Naia ipi, ipi pakini Teoso nitiriakori iposopekana ia anokanani, ia kasiriti, ia ōti, ia oara manapi īkapani. Ininiā ninoa sikakaāka kaiāopokori kākiti okinina īkapani. Ininiā ipi āti pakini kākiti auiniātaā auiritaāka ātika okinina. ¹⁶ Āti sāpiretano ninoa sotatone kavaro nopini auakani tosētosi mirōo aua. Kaiāopokori.

¹⁷ Natamatari ninoa sotatoakori kavaro nopini nitaponemoni. Natamataksaakina ia atoko ninoa. Itorotana koana metao kamakori auana. Apanakini torota koana pōkamarari xamina tirinakari atoko itxa. Apanakini poporeri. Apanakini posētakari ēxōpiri atoko. Ikiina ākiti kii atoko. Inamaāna ipokīka xamina tirika, katxiāri, ēxōpiri pakini. ¹⁸ Ikara xamina tirinakari, ikara katxiāri, ikara ēxōpiri pakini inamaāna pokīkakari, okari kaiāopokori kākiti itixi auakani. Ininiā ipi āti pakini kākiti auiniātaā ninoa okari ātika. ¹⁹ Kavaro posotiire inamaā, ixipiā pakini aua. Ninoa xipi imini atoko itxa. Ixipiāna aua ito kiiri. Ninoa kii misiritari kākiti.

²⁰ Ininiā itomane kākiti koriā ia misirikari xika. Iuaritika kākiti mokakoni maerekati kamakani ! inirekari itakanapinirina imaerekani. Ninoa kapotoreēkapanikaua Satanasi nitiriakorimoni. Ikamapanikarina ninoa amanaākiti. Iteosonetari aamina kamakori, oro kamakori, pirata kamakori, pirōsi kamakori, kai kamakori pakini. Ninoa teosone kona posotari atamarauatini. Kona iposotarina ikenakorauatini. Kona iposotarina itīpokotinina. ²¹ Ninoa kākiti okapanikari apanakini. Ikamapanikarina mīiti parīka. Isiriīkapanikana apanakinikata. Iītiriīkapanikarina apanakini kākiti tii. Kona inirekarina maerekati itakanapinina.

10

Aātsopa Axapitiri Iapirikakori

¹ Iuasaaki natamatari Teoso nitiri iaxitikiri katxakini īkorapokoritimoni. Kataparari iua. Iua katxiāri iaxitikiri āki. Katxiāri imāka atoko itxa. Kisi ikii nopini aua. Itoō atokatxi atoko itxa. Itapike aātsota tirinakari atoko itxa. ² Imaīkanātari aātsopa iapirikakori axapitiri. Iuakoā aātsopa ikatamēka.

Itakari ikiti ikikomunikiri potxoari uiniti nopini. Isanaremonikiri ikiti itakari imiriĩ. ³ Akiripoakata ākiti atoko. Iuasaaki setxi iokaamori kenakotaāka. ⁴ Iuasaaki niōkatsopaaritari ninoa setxi iokaamori sākire. Txamari nikenakotari āti iaxitikiri sākire. Itxano:

—Kona piōkatsopatapiri ninoa setxi iokaamori sākire —itxa iaxitikiri.

Aātsopa Axapitiri Nikiko

⁵ Iuasaaki Teoso nitiri aua āti ikiti imiriĩ. Potxoari uiniti nopini āti ikiti aua. Iua ōtanōkari iuako iaxiti. ⁶ Iuasaaki itxa:

—Uatxa nisāpiretakiti Teoso ātipirika auakari sākire. Ikamari ikinika iaxiti, iaxiti auakani pakini. Ikamari ikinika ĩkorapokoriti, ĩkorapokoriti auakani pakini. Ikamari potxoari uiniti, ikinika iua āki auakani pakini. Teoso misiritinina maerekati kamakani !okananiikari apokini. ⁷ Apikomoni āti trōpeta xikarauatapanika. Iuasaaki kitxakapirīka Teoso kipatakiti oerekaākako. Teoso sāpiretakiti initiriakori ĩkorapokoritimoni, isākire sāpiretakanimoni paītiki oerekaākako —itxa Teoso nitiri.

⁸ Eereka iuaĩkana nikenakotari iaxitikiri sākirauatini:

—Pisa. Papariko aātsopa iapirikakori, Teoso nitiri uakoā auakari. Iua āti ikiti imiriĩ, āti ikiti potxoari uiniti pakini aua kititakari.

⁹ Ininiā nisa iuamoni, ininiā nitxari iua:

—Pisikano ere aātsopa iapirikakari.

Iuasaaki itxano:

—Papakapariko, nika pitxari ia aātsopa. Pitikakoā kapixiriko ia pinikakiti, iuaritika pinamaā potxoariko. Mapa atoko itxako —itxano nota.

¹⁰ Ininiā nimaĩkari ĩkora aātsopa, nika nitxari. Ninamaā potxoari. Mapa atoko itxa. Txamari nitikakoā kapixiri iua aātsopa ninikakiti. ¹¹ Iposo atoko isāpiretano:

—Iuaĩkana pisāpiretariko apikomoni Teoso sākire, kaiāopokori kākkitimoni, kaiāopokori āti uākamoni, kaiāopokori āti uāka sākire sākiretakanimoni, kaiāopokori auītetxiakorimoni pakini pisāpiretariko nisākire —itxano.

11

Ipi Teoso Sākire Sāpiretakani

¹ Aāke niaōrauatini ĩkapani nisikaāka. Iuasaaki Teoso nitiri txano:

—Pisa. Piaōtariko Teoso misākiretiko aikoti. Piaōtariko Teosomoni sikakori takikoātaā. Piaōtana Teoso misākiretakani iuaā auakani. ² Kona piaōtapiri Teoso misākiretiko aikoti pirikere, kotxi Xoteo minakaniuua apotiitiniātaāua iuaā. Iuaā ninoa ĩkapani. Ninoa misiritariko Teoso sitatxine koarēta toisi kasiriti. Ikara Teoso sitatxine, Xerosareē inakori. ³ Nisikaposotiiretanako ipi kiki. Teoso sākire sāpiretakani ninoa. Ninoa ieretakariko sako mata. (Sako mata kākiti ieretakasaaki oerekari imatinaniuatini.) Ininiā mio tosētosi sesēta ōti pakini ninoa sāpiretariko nisākire.

⁴ Ninoa ipi oriva mina atoko itxana. Apaka ipi tirikapi topākini atoko itxana. Ikinini itixiti auakani auite apisatoō, Teoso apisatoō ninoa aua. ⁵ Kākiti nirekasaakiri imisiritinina ninoa, iuasaaki xamina tirinakari pokīka inamaāna. Ininiā iuasaaki imokaiakarini xipope. Kākiti nirekasaakiri imisiritinina, ikara atoko itxa okikona. ⁶ Teoso sākire isāpiretakasaakina, iposotarina iaxiti itotini. Ininiā iuasaaki āparaā kona ikipaika ĩkorapokoriti. Ninoa posotari āparaā arēkatxi inīkitakini. Iposotarina itxīkitakiniri ikini sereti maerekati apokini ĩkorapokoriti auakanimoni. Inirekasaakina, ninoa posotari ikara ikinika ikaminina.

⁷ Teoso sākire isāpiretinina xipoka atoko, monōkori aariko mamapotōkire irikoti āki potoriākari pokīka. Iuasaaki iua kamari neenamtxi ninoa ipi

Teoso sãkire sãpiretakanikata. Eereka iua okapena ninoa. ⁸ Ininiã ninoa ïto sirĩkako kimaporiãtaã, mitari sitatxitiã. Iua sitatxitiã Apiananiri tokakitaãka aamina ïpiriãmitakari nopini. Iua sitatxi akiriuaãkataãka Sotoma, Exito pakini, kotxi Sotoma, Exito pakini atoko itxa Xerosareẽ. ⁹ Ininiã iuaã ikini kãkiti, ikini inirimane, ikinimane ãti uãka sãkire sãkiretakani, ikini ãti uãka atamatanako ninoa ïto kimaporiãtaã. Iuaã ikaikotanako ipi õti, ãti õti, ipixini õti pakini. Kãkiti kona auiritari ikatikona. ¹⁰ Ininiã ikini kãkiti atamatariko ninoa koriãkani ïto. Ininiãkara ikinimane eneniãkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini ïkapani. Ninoa kamariko ikara atoko inakari, kotxi ninoamoni naia ipi Teoso sãkire sãpiretakani misiritana ninoa. Ininiã ninoa eneniãka, kotxi Teoso sãkire sãpiretakani koriãpeka.

¹¹ Iuaritika ipi õti, ãti õti, ipixini õti pakini napaka atoko, Teoso txĩkitakana ninoa iuaĩkana auãki ininina ïkapani. Õkitakauana. Iuasaaki kãkiti atamatana, ininiã ipĩkarauatana. ¹² Ikara eereka ninoa ipi Teoso sãkire sãpiretakani kenakotari iaxitiki sãkirauatini:

—Uaimoni hina.

Ininiã ninoa kanĩka katxiãriã Teoso tixinemoni. Ninoa mokaiakariakori itikana ninoa kanĩkaãpotini Teoso tixinemoni. ¹³ Iuasaakipeka itixi iteene iakeẽkata. Ininiã iua sitatxitiã kaiãopokori aapokotxi irika. Tesi aapokotxi auiniãtaã ãtika irika. Iuasaaki setxi mio kãkiti ipina. Kãkiti auapanika inakani pĩkarauata. Iuasaaki itxana:

—Teoso iaxiti auakari apiatakari itxaua —itxana.

¹⁴ ïkora misirikaretxi xipopeka. Iuasaaki ipi misirikaretxi apiari napapeka. Iuaritika erepaniko, kotxi paĩtiki ãti misirikaretxi apiari apokapanikako.

Trõpeta Imapotõkirekiri Xõkiko

¹⁵ Iuasaaki Teoso nitiri mapotõkirekiri xikarauata itrõpetaneẽ. Itomane iaxiti auakani iteene akiritari:

—Ikini itixiti auakani auĩte itxapekaua aãũte Teoso, Kristo pakini. ãtipirika iua ikinimane auĩte itxauako —itxana.

¹⁶ Iuasaaki vĩtxi koatro totiakori Teoso topãkiniãtaã apisatoõ topãkakani pamaka Teoso apisatoõ. Itxana:

¹⁷ “Erekapitikari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirĩka aua. Katana ãtipirika pauapika. Erekapitiki, kotxi kaposotiirei, ininiã ãtipirika ate auĩte pitxaua.

¹⁸ Kãkiti ikini itixiti auakani omanãkarauata. Uatxa piteka omanãkarauatini manapi apope. Uatxa apokapeka ipĩkani misiritiko mereĩko õti. Pinitiriakori, pisãkire sãpiretakani, apaka pinakitiakori pite paxitakani pakini ïkitxitiko õti apokapeka. Ikinimane kãkiti poiãorini, kãkiti kaposotiirerini pakini apakapariko ikamakitina ïki. Iuasaaki pixipokariko ïkorapokoriti xipokakani,” itxana.

¹⁹ Eereka natamatari iuaã Teoso tixineẽ imisãkiretiko aikoti tore imataakaãka. Iua aiko ãki natamatari Teoso kaixane, iua apokiniãtaã. Iuasaaki natamatari ito mẽkokari. Nikenakotari ito okaratxirari, ito iokaamori pakini. Itixi iakeẽkata. Ito ãparaã kai soro katxĩkareri atoko katxaka.

12

Imini Mitapoari, Sito Pakini

¹ Eereka nitaponeẽ nitikoka. “Kipa atxiĩti?” nitxa nãkixinireẽ. “Natokopa itxa Teoso oerekiniri kãkiti?” Kotxi sito tokiã Teoso tixine. Atokatxi iotximere

iakirokaro oa omāka atoko inakari. Kasiri aua okiti patapi. Okiiā aua auītetxi saporietane, tosi iōriki kamakori. ² Oa kamixiro. Oa akiripoakata oātatsiirauatini xika, kotxi kaiamapeka amarini oāuākitakini.

³ Eereka iuaīkana nitikoka, kotxi imini mitapoari tokiā Teoso tixineē. Pōkamarari. Iua setxi ikii aua. Aua tesi iko. Ikininape ikii aua auītetxi saporietane. ⁴ Ixipiā ikosekari kaiāopokori iōriki iaxitikero, uai ixiti oka itxaro iōriki. Itima oa sito apisatoō, kotxi paītiki amarini oāuākitaka. Inirekari iixirākiniri amarini, amarini auakasaaki. ⁵ Eereka oa sito auākitakari amarini, kiki. Oa sito ākiri aneēkasaaki ikini itixiti auakani auīte itxauako. Auītetxi kataparari itxauako iua amarini. Auakasaaki, imini !ixirākari amarini. Patimari maīkiko iua amarini. Teoso auinimoni anikaāka amarini. Iuaātaā Teoso topākanāta auītetxi itopanere nopini. ⁶ Oa sito miteka āparaā makipakaniātaā. Teoso oerekatapekari iuaā okaikotini īkapani. Iuaā oinīkataākako mio tosētosi sesēta ōti. Ipi anokanani, āti anokanani ipixini pakini itxa.

⁷ Eereka aua neenamtxi Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. ⁸ Teoso nitiriakori tapara apiata, ininiā imini initiriakorikata !auritaākaika Teoso tixine ikaikotinina. ⁹ Iua imini mitapoari iokanataāka maparamoni. Iua imini kitxakapirīkaripekara. Iua Txiapo inakori. Iua Satanasi inakori. Iua misirienetari kākiti ikini itixiti auakani. Maparamoni iokanatikosaaki, iua, initiriakori pakini okaākana uai īkorapokoritimoni.

¹⁰ Eereka nikenakotari Teoso tixinekiri sākire kataparakieneri:

—Kākiti maerekani makatxakiko apokapeka uatxa. Teoso makatxakari kākiti maerekani. Uatxa Kristo posotiire oerekaāka. Uatxa oerekari ikinimane auīte ininiua. Teoso mereēkiti ikinimane auīte itxaua uatxa, kotxi aītariakori kamapiretakari iokanatapeēkaika mapara. !Ikaikotaika Teoso tixine. Mitxi ikamapiretari aītariakori Teoso apisatoō. Pokamara, īkanōka ikamapiretana. ¹¹ Aītariakori iokanatapekari Satanasi isini. Ninoa posotari iokanatiniri Satanasi, kotxi Teoso Soti Auītene ipina ninoa īkapani. Iarēka xiketa ninoa īkapani. Ninoa posotari Satanasi iokanatinina, kotxi ninoa sāpiretari atāo inakari Teoso sākire. Ninoa iposope okikona Teoso īkapani. ¹² Hīte Teoso tixine auakani hīpoxokoniuatoko. Txamari hīte itixi auakani, potxoari uiniti auakani, erepaniko, kotxi Satanasi apopeka ereē hīte sauaki. Iua iteene naiataua, kotxi imarotari paītiki Teoso !auritaikari iua maerekati apikomoni ikamini —itxa iua Teoso tixinekiri sāpirena.

¹³ Uai itiximoni okikosaaki, imini mitapoari asikatikinitaro oa sito amarini auākitakakaro okiniro īkapani. ¹⁴ Oa osikaāka ipi mīkitatxi kokoi mitari mīkita, oāraini īkapani. Oa araā āparaā makipakanimoni. Teoso oerekinimoni osa. Iuaā Teoso nīkataro oa ipi anokanani, āti anokanani, ipixini pakini. Iuaā imini mitapoari !iposotari oamoni apokini. ¹⁵ Oa araākasaaki, imini mitapoari koporikaātari āparaā inamaākiri oa tikini. Uini atoko itxīkitakari āparaā, oa sito axāpoātini īkapani. ¹⁶ Kipatxi !auritari āparaā sini oamoni. Ixoreka. Ixorekasaaki, ikinika āparaā imini namaākiri kipatxi āki isa. ¹⁷ Ininiā imini iteene omanataro oa sito. Ininiā asikatikinitana apanakini oa anaakori inaiatinina īkapani. Kākiti Teoso paniātakiti kamakani oa anaakori itxauana. Kākiti Xesosi Kristo sākire auiākani oa anaakori itxauana.

13

Monōkori Potxoari Uiniti Pokīkaātakari

¹ Ininiā nitaponeē nitima ikipatxite nopini. Iuaā nitikari monōkori potxoari uiniti pokīkaātini, kanīkiīta itxa. Iuamoni auari iko tesi pakini.

Apaka ikii setxi aua. Ikinika iko aua auñtetxi saporietane. Ikini ikii aua uãkatxi Teoso misãkirepiretakari. ² Iua monõkori nitikakiti ãkiti kaiõkari atoko itxa iñto. Ikiti oso kiti atoko itxa. Inama ãkiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiã iua auñtetxi itxaua. Imini auñtetxi ininiua atoko itxa. Imini txĩkitakari iua potxoari uinitikiri sãkire kaposotiire inini, isãkire kãkiti auikini ïkapani. ³ Nota atamatariki ininiri. Ikii ãti ipĩpe ikaro mitari xika. Eereka ikaro tximõka. Iuaĩkana auãki itxa ikii ipinakari. Kãkiti ikini itixitikini atamatakasaakiri, itsorĩkaãtana. Ininiã auikarina isãkire. Ikamarina iua nireẽkiti. ⁴ Ikinimane auikari imini mitapoari sãkire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sãkire. Ninoa teosonetari iua apaka. Ninoa sãkire:

— ãti kaposotiireri potxoari uiniti pokĩkaãtakari atoko inakari !auari. Kãkiti !iposotari inaiatiniri iua —itxana.

⁵ Iua potxoari uinitikiri auiritaãka isãpiretiniri maerekati sãkiretxiti. Imisãkirepiretari Teoso. Auiritaãka auñtetxi ininiua koarẽta toisi pakini kasiriti. ⁶ Iua misãkirepiretari Teoso. Imisãkirepiretari Teoso uãka. Imisãkirepiretari Teoso auiniãtaã. Imisãkirepiretari Teoso tixine auakani. ⁷ Iua auiritaãka inaiatiniri kãkiti Teoso nakitiakori. Apaka auiritaãka ninoa imaĩkini. Auiritaãka kãkiti ikini uãkati auñte ininiua, ikini itixiti auakani auñte ininiua, ikini kãkiti sãkire sãkiretakani auñte ininiua. Ikinimane auñtetari iua maerekati kamakari. ⁸ Ikini itixiti auakani, Teoso nakitiakori minakaniua, auikariko iua potxoari uiniti pokĩkaãtakari sãkire, kotxi iteosonetarina iua. Itixi kamiko apisapanika ninoa uãka !iõkataãka Soti Auñte okakori aãtsopateẽ. Iua aãtsopaã auauãkatakani auapikako Teosokata mapĩkaninoka ininina.

⁹ Hĩte, ia atatsopatananii kakenakokii, ininiã hĩkenakotariko nisãkire. ¹⁰ Teoso nirekiniãri kateia ãki pitakiko, ininiã erekapitikari kateia ãki pauini. Teoso nirekiniãri pokiko iouata mitariã, erekapitikari pokiko. Ininiã pokaãkako iouata mitariã. Ininiã hĩte Teoso nakiti inakaniua himĩteenekariko himisiritiko. Kona hĩtakanapapiri Teoso kimapore. ãtipirika hĩkamariko Teoso nirekakiti.

Monõkori Itixiãkiri

¹¹ Eereka nota itikari ãti monõkori. Itixiã ipokĩka. Aua ipi iko. Soti auñte ãkiri iko atoko itxa, iuaritika isãkirauata imini sãkire atokokana. ¹² Potxoari uiniti pokĩkaãtakari nitiri itxaua iua itixiã pokĩkakari. Potxoari uinitikiri sikaposotiiretari iua, ininiã isari ikini itixitimoni. Itxĩkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximõka. ¹³ Iua itixiã pokĩkakari kamari posotiiretxi mitxi mĩmarotakoti. Ipaniãtari xamina tirinakari iaxiti auakari ïkorapokoriti apokini ikinimane atamatiniri ïkapani. ¹⁴ Iua potxoari uinitikiri auiritari itixiãkiri kaminiri posotiiretxi iua ïkapani. Posotiiretxi xika itixiãkiri misirienetari ikinimane itixiã auakani. Itxĩkitakari kãkiti kaminiri potxoari uinitikiri ïto atoko inakari kai kamakori. Ikara atoko ipaxitarina potxoari uinitikiri, kotxi ikarotaãka iouata mitariã, iuaritika iuaĩkana auapanika ikii. ¹⁵ Itixiã pokĩkakari auiritaãka itxĩkitakiniri potxoari uiniti pokĩkaãtakari atoko inakari kai kamakori kosekasinaniretiniaua, ininiã iua kai kamakori posotari isãkirauatini kãkitikata. Ipaniãtari kãkiti okiko imanirekakanisaakiri iteosonetiniri iua. ¹⁶ Itixiã pokĩkakari paniãtari ikinimane kãkiti apakapiniri Satanasitakaõtxikare iuakoãna ikikomoni, minakaniã iteãtaãna. Ipaniãtari ikinimane kãkiti auñtetxi inakaniua, auñtetxi minakaniua, katiini, matiini, nitiritxi, nitiritxi minakaniua pakini, apakapiniri Satanasitakaõtxikare.

17 Kākiti iua takaōtxikari mauakiniti ! auiritaāka iamotiitinina. ! Auiri-taākana ivētxirauatinina. Iua takaōtxikari potxoari uinitikiri uāka. Iuāka mauakanisaaki, aua nómero iua nakiti.

18 Kimarore hītxako, ikara himarotini ĩkapani. Kimarore hininiā himarotari potxoari uinitikiri nomerone kiki uāka itxa. Nómero 666.

14

Soti Auīte Sēto Koarēta Koatro Mio Kākitikata

1 Eereka nionakaāta nitaponeē. Natamatari Soti Auīte. Ōtanoxiratarari nopini auanāta. Ixirata uāka Siāo inaāka. Kākiti sēto koarēta koatro mio pakini aua iuakata. Kaiāopokori kākiti. Iteētaāna Soti Auīte iri uāka iōkatsopatapeēkaika.

2 Eereka nikenakotari ninoa xikarauatini. Itorōkani ene atoko itxa, kotxi ama eneeneri. Ikarokirauatini ene atoko itxa ninoa xikare. Viorāo ene atoko itxa iua xikari ene. 3 Ninoa kākiti sēto koarēta koatro mio pakini tima auītetxi topanere apisatoō, okītxinoka xāpokaītotakini ipi ipi pakini apisatoō. Totiakori vītxi koatro pakini apisatoō apaka itimana. Ninoa sēto koarēta koatro mio xikaretari xikari amaneri. Apanakini !imaīkari iua xikari amaneri. Ninoa sēto koarēta koatro mio ĩkorapokoriti Teoso amotakini, ninoanoka posotari ixikaretiniri iua amaneri xikariti. 4 Ninoa kiki !isirīkana sitokata. !Auiritarina ĩtona kaminiri maerekati. Soti Auīte sinimoni ninoa apaka sa. ĩkorapokoriti auakasaakina, Teoso amotana ninoa. Ninoa merepanika sikaāka Teosomoni, Teoso Soti Auītene pakinimoni. 5 !Ikamarina maxīkatiīka isākirena. Atāo inakaranoka isāpiretana. !Ikerokarina isākirena Teoso iauītena apisatoō.

Ipi Āti Pakini Teoso Nitiri Sākire

6 Eereka nitikari Teoso nitiri araaāpotini iaxiti itanoxiti. Iua sāpiretari Teoso iokanapirena erekari kākitimoni ĩkini itixiti auakanimoni. Iua iokanapirenatxi kona xipoka. Isāpiretari Teoso iokanapirena erekari ĩkini uākatimoni. Āti uāka sākire ipinimoni. Āti uāka sākire ipinimoni. Itxaāpota, itixi auakani sākire, iuaritika isāpiretari Teoso iokanapirena ĩkini uākatimoni. 7 Itapasākireritika itxari:

—Hīpīkariko Teoso. Hīsāpiretariko, iua Apiananiri ininiua. Apokapeka kākiti maerekati kamakani misiritiko ōti. Hīteosonetariko Teoso, kotxi iua kamari iaxiti, ĩkoraxiti, potxoari uiniti, sōtoāri pakini —itxa iua Teoso nitiri araākari sākire.

8 Iua sākirauataka atoko, āti Teoso nitiri txari:

—Papirónia sitatxiti xipokapeka. Iuaā auakani kaposotiirerini, iuaritika ixipokapena. Papirónia sitatxiti auakani paniātari imakinika itixi auakani maerekati ikaminina, maerekati ĩtotxi nireēkiti. Ininiā ninoa kamari maerekati Papirónia auakani paniātakiti.

9 Ninoa Teoso nitiriakori ipi sākirauataka atoko, āti Teoso nitiri txari itapasākireritika:

—Teoso misiritanako kākiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako kākiti Satanasi takaōtxikare iteētaāna takakani, iuakoāna takakani. 10 Kākiti iua atoko inakani misiritaākako, kotxi Teoso iteene omanākarauata maerekati ninoa kamakiti xika. Teoso misiritanako ninoa, ininiā atatsiirauatana xamina tirinakariā. Ēxópiri arikanako ninoa. Teoso nitiriakori erekarini, itixine auakani, Teoso Soti Auītene pakini itikariko ikara kākiti misiritiko. 11 Iua xamina txīkitakari kākiti atatsiirauatini. Iua xamina tirinapikako. !Ixipoka. Itirinapika. Itxiākapika. Ninoa misiritiko !iotoka. Pokamara, ĩkanōka auapika

ninoa misiritiko. Kâkiti iua potxoari uunitikiri teosonetakani, potxoari uunitikiri atoko inakari kai kamakori teosonetakani, iuâka iïtoâna auaitotakini misiritaâkako ikara atoko —itxa iua Teoso nitiri sâkire.

¹² Ininiâ hïte Teoso nakitiakori, hïte ipaniâtakiti kïpitakani, hïte Xesosi nireêkiti âtipirika kamakani, kataparaxinire hïtxako. Himïteenekariko kâkiti misiritinii.

¹³ Eereka nikenakotari Teoso tixine auakari sâkire. Itxano:
—Nisâpiretakiti piðkatsopata. Kâkiti ipïkasaaki Apiananiri ïkapani iparïkauatakasaaki, Teoso sikari erekari iuamoni.

Iua Erekari Matamatakoti txari:
—Ia atâo. Mitxi pasâpaniri Teoso parïka ikaminina. Uatxa itomatana, kotxi Teoso imarotapekari erekari ikamakitina.

Takari Amiko Pirena

¹⁴ Eereka nitaponeê nionakaâta iaxiti. Iuasaaki natamatari katxiâri kasarori iuaâ. Aïtari iaxitikiri atoko inakari topâka iua katxiâri nopini. Ikiiâ aua auïteti saporietane oro kamakori. Iuakoâ saasara âtoiâo aua. Pauanaro.

¹⁵ Iposo atoko âti Teoso nitiri pokïka Teoso aapoko. Iua itapasâkireritika akiritari iua katxiâri nopini topâkakari:

—Pikosekariko pisaasarate. Pamariko takari, kotxi takari amiko manapekara. Takari ikini itixitikiri amiko manapekara.

¹⁶ Ininiâ iua katxiâri nopini topâkakari isaasarateê isauakari ikini itixiti nopini auakari. Amari takari imakinika.

¹⁷ Iposo atoko nitikari âti Teoso nitiri pokïka Teoso aapoko Teoso tixineê. Iuamoni apaka aua saasara âtoiâo iuakoâ. Pauanaro.

¹⁸ Iuaïkana âti Teoso nitiri apoka. Teosomoni sikakori takikoâtaâ ipotorika iua. Inïkatari xamina tirinakari iuaâ. Iua itapasâkireritika akiritari Teoso nitiri saasara auakiti:

—Pimaïkaroko pisaasarate. Pimakatxakaroko ova ikini itixitikero, kotxi ova oionapeka —itxa.

¹⁹ Ininiâ Teoso nitiri isaasarateê isauakaro ova ikini itixitikero. Itsotakitatato ovatsa. Iposo atoko okaro ova ori ova iopetiko mitari âki. Okatsonakaâka. Teoso omanâkare iua ova iopetiko atoko itxa, kotxi Teoso iteene omanâkarauata kâkiti maerekani xika. ²⁰ Ova ori kâkiti kitiâ iopetikoâtaâ sitatxi mapotðkire. Txamari na ovapeñi ikara atoko itxa. Arêkatxiâra ikara atoko itxa. Iua arêkatxi uini panaâ atoko itxa. Tresêtosi kirómetro arêkatxi aua. Arêkatxi ïpanaâ kavaro namaâpeka apoka arêkatxi. Âti metro ipixini ïpanaâ arêkatxi.

15

Teoso Misirikare Mïkani Setxi

¹ Eereka nitaponeê nitikoka iuaïkana.
—Kipa atxiïti? —nitxa iuaïkana nâkixinireê, kotxi natamatari Teoso nitiriakori setxi itixineê.

Ninoa minari misirikaretxi setxi pakini kâkitimoni. Apikomoni misirikaretxi !auaika. Ia misirikaretxi setxi inokasaakiri kâkiti, Teoso misiritana ninoa imaerekanina xika.

² Eereka natamatari ipoa atoko inakari. Âtakaâri, xamina tirinakarikata koketakori atoko itxa ipoa. Kâkiti tima ipoa ïtinikata. Ninoa iokanatapekari Satanasi sini, kotxi !ikamarina iua potxoari uunitikiri paniâtakiti. Iua potxoari uunitikiri atoko inakari kai kamakori paniâtakiti !ikamana. !Apakaparina Satanasi takaðtxikare, iuâka nomerone. Ikininape aua viorâo atoko inakari Teoso sikakiti. ³ Ninoa xikaretari Moisesi xikare, Teoso nitiri uai

itixi auakari xikare. Ixikarenātari Teoso Soti Auĩtene xikare. Ia ixikaretana. Itxana:

“Teoso Apiananiri, ikini posotiiretxi auakitii pite. Peerekari piparĩka. Pite kaposotiireri. Pite atāonani pikamakiti. Ikini uākati auĩte pitxaua pite.

⁴ Ikinimane paxitaiko pite ipĩkareritika, kotxi pite Apiananiri pitxaua. Ikinimane txaiko pite: ‘Peerekai,’ itxaina. Kotxi pitenoka !auari maerekati. Kākiti ikini uākati apokako pitemoni. Ninoa txaiko: ‘Ate teosone pitxaua,’ itxana kotxi ikinimane itikari erekari pikamakiti.”

Ikara atoko itxa ninoa xikaretakiti.

⁵ Eereka natamatari Teoso aapoko āki. Natamatari iua auiniātaā. ⁶ Iposo atoko ninoa Teoso nitiriakori setxi, misirikaretxi setxi mĩkani, pokĩka Teoso aapoko. Ninoa māka katsopiri, pomēkoriri. Ninoamoni aua oro kamakori. Itinimaĩ nopini inapa. ⁷ Ninoa ipi ipi pakini okĩtxinoka xāpokaĩtotakini iuaā aua. Okĩtxinoka xāpokaĩtotakiti sikari iātatxi setxi pakini oro kamakori ninoa setxi Teoso nitiriakorimoni. Teoso auapininiika inakari xāpokakapekari iua setxi pakini iātatxi omanākareē. ⁸ Teoso iotximere xāpoka iua aapoko āki. Katxiāri kasarori atoko itxa. Iuasaaki kākiti !auritaāka Teoso aapoko ĩroini, ninoa Teoso nitiriakori, misirikaretxi mĩkani setxi pakini, misiritakasaakina kākiti.

16

Iātatxi Teoso Omanākare Auakiti

¹ Eereka nikenakotari Teoso aapoko āki auakari sākire. Itaparakieneritika imisākiretana ninoa Teoso nitiriakori setxi. Itxana:

—Hĩsa. Hĩkitakari Teoso omanākare iātatxi āki auakari itixi auakanimoni — itxa.

² Ininiā ninoa Teoso nitiriakori sari. Merepanika ātika initiri kitakari iātatxi ākikiri itixi auakanimoni. Iuasaaki kimiti mitari, katsiiri, apoka kākiti Satanasĩ takaōtxikare auakini ĩtomoni. Potxoari uinitikiri atoko inakari kai kamakori teosonetakani ĩtomoni apoka ikara atoko inakari amianari.

Āti Iātatxi

³ Iposo atoko ātipekana Teoso nitiri kitakari iātatxi ākikiri potxoari uinitimoni. Iuasaaki āparaā arēkatxi itxapekaua. Kākiti ipĩkari arēka atoko itxa iuasaaki. Ininiā ikinipoko potxoari uiniti auakani iuasaaki xipoka.

Āti Iātatxi

⁴ Iposo atoko ātipekana Teoso nitiri kitakari iātatxi ākikiri uinimoni, sōtoāri pakinimoni. Iuasaaki āparaā arēkatxinoka itxapekaua. ⁵ Iuasaaki nikenakotari Teoso nitiri āparaā nĩkatakari sākire. Itxari Teosomoni:

—Pite maerekati makamakatii. Ātipirika auakarii pite. Atāo pikamakiti pimisiritinina maerekati kamakani ĩkora atoko. ⁶ Kotxi ninoa okari kākiti pite nakitiakori. Okarina pisākire sāpiretakani. Ninoa oxiketari ninoa arēka. Ininiā uatxa pite sikana arēkatxi iātinina. Atāo imisiritikona kotxi maerekati ikamana —itxa Teoso nitiri.

⁷ Iposo atoko nikenakotari āti sākire. Teosomoni sikakori takikoātaā auakari iua. Itxari Teoso:

—Pite Teoso Apiananiri, Kaposotiireri pitxaua. Erekapitikari maerekati kamakani pimisiritini. Pite kona kerokari pikamakiti, kotxi atāo inakari-noka pikama —itxa.

Āti Iātatxi

⁸ Eereka ātipekana Teoso nitiri kitakari iātatxi ākikiri atokatximoni. Iuasaaki atokatxi apiata patakata. Auritaāka kākiti arikini itaparapatakaā. ⁹ Ininiā

kākiti arikaāka atokatxi patakaā. Iuaritika !inirekarina maerekati ikamak-itina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenaā akiritari Teoso uāka.

Āti Iātatxi

¹⁰ Ininiā ipi ipi pakini Teoso nitiriakori kitakapekari iātatxi ākikiri itiximoni. Eereka iuaīkana āti Teoso nitiri kitakari iātatxi ākikiri auītetxi topaneremoni iua potxoari uiniti pokīkaātakari topaneremoni. Iuasaakipeka iua potxoari uinitikiri auītetxi ininiātaāua patimari ipiākini. Kākiti iuaātaā auakani akatsaninitaua itsii xika. ¹¹ Iuaritika !inirekarina maerekati ikamakitina itakanapinina. Imisākirepiretarina Teoso iaxiti apiko nopinixiti auakari, atatsiirena xika, kimiti xika.

Āti Iātatxi

¹² Eereka iuaīkana Teoso nitiri āti kitakari iātatxi ākikiri mitari uinitimoni Eoparatxi inakorimoni. Iuasaaki uini auaā. Isonāka. Kimapori itxaua, auītetxiakori atokatxi pokīkinimoni īkani inapinina īkapani. ¹³ Iposo atoko nitikari maerekani matamatakoni ipi āti pakini. Atiniro atoko itxana. Āto pokīka mitapoari imini namaā. Āto pokīka iua potxoari uiniti pokīkaātakari namaā. Āto pokīka iua itixi pokīkakari namaā. Iua itixi pokīkakari iua Satanasi sākire sāpiretakari itxaua. Na atāoene isākire. Poxirari ikama. ¹⁴ Ninoa maerekani matamatakoni ipi āti pakini Satanasi nitiriakori. Ninoa kamari posotiiretxi. Isana auītetxiakorimoni, ikini itixiti auakanimoni. Akiritana kākiti apotiitiniua ineenamauatinina īkapani. Teoso kaposotiireri naiatanako ninoa itixi xipokini ōtisaaki.

¹⁵ Hīte ia atatsopatakanii, Apiananiri txai hīte:

—Erepaniko. Napokako kītiriri apokini atoko, kākiti mimarotakinipatika. Napokasaaki ereē, pikoatiniā, kamāka pininiā, pipoxokoniua. Ikara atoko pininiā, kona kasarai ikinimane apisatoō pisini, ininiā kona kapētai —itxa Apiananiri sākire.

¹⁶ Eereka ninoa ipi āti pakini Satanasi nitiriakori maerekani matamatakoni, apotiitari auītetxiakori Amaketō inakoriātaā. Iuaātaā akiritaāka Amaketō Xoteo sākireē.

Imapotōkire Iātatxi

¹⁷ Ninoa setxi Teoso nitiriakori, seisi kitakapekari iātatxi ākikiri. Ātinoka !ikitakapanikari. Iuasaakiika iua kitakari iātatxi ākikiri ītimamoni. Iuasaaki nikenakotari auītetxi itopanereātaā auakari sākire:

—Ixipokapeka —itxa itaparakieneritika.

¹⁸ Iposo atoko iotxira mēkoākata. Ikarokirauata. Pataparaeneri. Itixi iakeēkata. Mītxi !auari itixi iakeēkatini īkora atoko inakari. Iuasaaki-ikarako apiatako. ¹⁹ Iua sitatxi apiari Papirónia inakori xoreka. Ipikata ixoreka, ininiā ipi āti pakini sitatxiti atoko itxaua. Ikini itixiti auakari sitatxi xipokaāka iuasaaki. Teoso !imaxinīkaretari Papirónia sitatxiti auakani kamakiti, ininiā iteene imisiritana ninoa, kotxi iteene omanākarauata imaerekanina xika. ²⁰ Iuasaaki ikini ipokomiriī !auaika. Ōtanoxiratariki nipoko xipoka iuasaaki. ²¹ Katxīkareri iaxiti auakari, kai mitari atoko inakari, katxaka itiximoni. Apanakini kai minani koarēta sīko kiro. Iua irika kākiti nopini. Ikara katxakakari pamonōkonipaniri. Iua xika kākiti iteene misākirepiretari Teoso.

17

Sito Potxoari Uinitikiri Nopini Topākakaro

¹ Ninoa Teoso nitiriakori setxi pakini iātatxi setxi auakini, seisi kaikota. Ātika ina notamoni. Itxano nota:

—Notakata pisa. Noerekai sitatxi miramaneri. Sito kanokarero ka-posotiirero atoko itxa iua sitatxi. Oa topākanāta uini itori nopini. Iuaā auakani misiritiko noerekaiko pite. ² Auītetxiakori ikini itixiti auakani kamari maerekati iua sitatxiti auakanikata isirīkinina. Iua sitatxi auakani txīkitakari kākiti ikini itixiti auakani maerekati ikaminina. Kapoāroā poātakari nirekini atokokana, ninoa nirekari iua maerekati iua sitatxiti auakani kamakiti — itxa notamoni.

³ Eereka iua Erekari Matamatakoti paniātano iua Teoso nitirikata nisini. Iua Teoso nitiri anikano āparaā makipakaniātaā. Iuaā natamataro sito topākanāta iua potxoari uinitikiri nopini. Pōkamaraītori iua. Iītoā aua iōkatakori kaiāopokori Teoso imisākirepiretini iōka. Ikii setxi aua. Iko tesi aua.

⁴ Oa sito māka pomamari ipixini. Pōkamarari itxa omāka. Pakaroneri omāka. Oītoā aua oro, pérora, kai soro pomēkoriri pakini aua. Omaīkari iākoanatxi oro kamakori. Iua iākoanatxi āki aua maerekati okamakiti itxiko atoko inakari. Maerekati oīto kamakiti ikara atoko itxa. ⁵ Oteētaā aua sākiretxi iōkatakori. Itxari: “!Kimarotikori. Kanokareroakoro inoro itxaua Papirónia sitatxiti miramaneri. Maerekati kamakani inoro itxaua Papirónia.” ⁶ Nitikaro oa sito opoātini, Teoso nakitiakori arēka oātini xika. Xesosi sākire auikinina xika, okaākana. Natamatakasaakiro nitikoka.

—Kipa atxiīti? —nitxa.

⁷ Iua Teoso nitiri txano:

—Kininiāpa pitikoka? Nisāpiretaiko oa sito pirena. Apaka nisāpiretaiko iua potxoari uinitikiri pirena, ikii setxi, iko tesi auakiti pirena, oa porikitakari pirena nisāpiretai, kotxi kona pimarotari. ⁸ Iua potxoari uinitikiri patamatakiti mitxi aua, txamari uatxa !auaika. Iua eereka ipokīkapanikako aariko mamapotōkire irikotiā. Eereka anikaākako ixipokikomoni. Ikini itixiti auakani Teoso aātsopateē iuākana maiōkatakoni tikokako iua potxoari uinitikiri atamatakasaakinako. Itixi kamiko apisa iuākana !iōkatsopataāka Teoso aātsopateē. Iua aātsopaā iōkauākatakonioka ātipirika auapikako Teosokata. Kākiti tikokako iua potxoari uinitikiri atamatakasaakina, kotxi mitxi auāki itxa, eereka !auaika, eereka iuaīkana auākipeka itxa.

⁹ —Ikara inakari pimarotini īkapani, iteene pimixinikariko. Kinirepa ikii setxi aua? Kotxi ōtanoxiratarari setxi apaka aua. Oa sito topākanāta iua ōtanoxiratarari nopini. ¹⁰ Kinirepa ikii setxi aua? Kotxi auītetxiakori setxi apaka auako. Auītetxi !itxaikauana ninoa sīko. Ātinoka auītetxi txapanikaua. Āti kona apokapanika. Iua apokasaaki mapaōtinoka auītetxi itxauako. ¹¹ Iua potxoari uinitikiri mitxi auāki inakari, iposo atoko !auaika inakari, iua apokako. Iuara auītetxi txauako. Iua mitxi apotiitaua ninoa setxi auītetxiakorikata. Āti ōti iua xipokaākako.

¹² —Patamatarari iko tesi pakini. Kinirepa iko tesi aua? Kotxi auītetxi tesi aua. Ninoa auītetxiakori kākiti auīteakori !itxapanikauana. Ninoa sika-posotiiretaākako auītetxi ininiuana iua potxoari uinitikirikata. Ninoa auītetxi itxauanako āti oaranoka. ¹³ Ikininape ninoa tesi auītetxiakori parīkauata iua potxoari uinitikiri īkapani. Iposotiireēna, itaparaāna iparīkauatana iua potxoari uinitikiri īkapani. ¹⁴ Inaiatarinako Teoso Soti Auītene. Teoso Soti Auītene iokanatana ninoa isinina, kotxi iuanani Apiananiri itxaua. Auītetxiakori auīte itxaua. Ātipirika iuakata sikani, iua akiritakini, imereēkini, ātipirika iua nireēkiti kamakani, ninoa moianatarari iua Soti Auīte ineenamauatini —itxa Teoso nitiri sākire.

¹⁵ Iua Teoso nitiri apikomoni txari notamoni:

—Pite atamataro oa kanokarero topākanāta kāuaāri nopini. Kinirepa kāuaāri nopini oāua? Kotxi iuaātaā kākitipokoni, ikini uāka, ikini itixiti auakani, ikini āti uāka sākire sākiretakani pakini. Iua kāuaāri mitari atoko itxana. ¹⁶ Iua potxoari uinitikiri, ninoa tesi auītetxiakori pakini omanataroko oa kanokarero. Ninoa makatxakariko ikinipoko oa nakiti. Imakatxakarinaroko omāka. Kasarapeka otxako. Oxini inikanako. Ninoa xipokaroko oa xaminaā. ¹⁷ Teoso txīkitakari Teoso nireēkiti ikaminina, kotxi ninoa auītetxiakori parīkauata iua potxoari uinitikiri īkapani Teoso nireēkiti iaōka. Ininiā Teoso sākire mitxi auakari auapeka. Isākire iaōka ikamana. Ininiā ninoa nirekari iparīkauatinina iua potxoari uinitikiri īkapani. Ininiā ninoa auītetxiakori itxauana iua potxoari uinitikiri īkapani.

¹⁸ —Oa sito kanokarero patamatakito kona atāo sitoni. Sitatxi miramaneriā auakani oa sito kanokarero atoko itxana, kotxi iua sitatxiā auakani paniātana ikini auītetxiakori itixi auakani maerekati inireēkitina ikaminina.

18

Papirónia Sitatxiti Xipokini

¹ Ikara inaāka atoko nitikari āti Teoso nitiri Teoso tixine auakari katxakaāpotini īkorapokoriti Teoso tixine potoriākari. Iua kaposotiireri. Iotximere iopinikari imakinika itixi. ² Iua sākirauata itaparāsākireritika. Itxari:

—Ixipokapeka Papirónia sitatxiti miramaneri. !Auaika. Uatxa Satanasini nitiriakori aua iuaā. Ikini sereti maerekani matamatakoni aua iuaā. Araākari ikini sereti arakakari nikakani, kākiti mapokaerekatakiniti, iuaā apoka. ³ Oa sito kanokarero atoko itxa iua sitatxi, kotxi iua sitatxi auakani txīkitakana ikini itixiti auakani maerekanitxi ninoa kamakiti iaōka ikaminina. Papirónia sitatxiti auakani kamari maerekati iitona nireēkiti. Itixi auakani nirekari ikara maerekati ikaminina kapoāroā poātakari nirekini atokokana. Auītetxiakori ikini itixiti auakani kamari ikara maerekati Papirónia sitatxiti auakanikata. Tiitxi vētxitakani apakaparo txineiro kaiāopokoro, kotxi Papirónia sitatxiti auakani amotari tiitxipokoni —itxa Teoso nitiri sākire.

⁴ Eereka nikenakotari āti Teoso tixine auakari sākire. Itxari:

“Hīte nota nakitiakori inakani takanapariko iua sitatxi. !Hīkamapiri maerekati ninoakata. Ininiā !himisiritaāka ninoakata.

⁵ Kotxi maerekati ninoa kamakiti apiaāpota. Tiitxi tsorinatakori atoko itxana ninoa maerekani. Iaxitipeka apokaāpota ninoa maerekani. Teoso xinikari ninoa maerekani, ininiā iua misiritanako ninoa.

⁶ Himisiritanako ninoa. Hīte imisiritinina atokokana, hīte misiritana ninoa. Ipikata himisiritanako ninoa, ninoa maerekani xika. Ninoa misiritapekari apanakini, ininiā ia imisirikarena xika ipikata himisiritanako ninoa.

⁷ Hītxīkitakanako ninoa atatsiirauatinina. Hītxīkitakanako ninoa maerekaxiniretinoka ininina. Ikara atoko ninoamoni hīkaminiā, atāopitikara hīkamakiti, kotxi iteene iuikauana ninoa. Itomaneri itiina, ininiā ninoa iarinouata. Ninoa sākire: ‘Ate uai topākanāta, kotxi auītetxi kaposotiireni atxaua. Tikinitakoro atoko !atxaua, ininiā maerekaxiniretika !atxa,’ itxana ākixinireēna.

⁸ Ikara isākirena xika āti ōti ninoa misiritaākako. Amianari, maerekaxinirenitxi, natxi pakini apokako ninoamoni. Arikatxi xipokanako ninoa, kotxi Teoso iuasaaki misiritanako ninoa. Imisiritanako ninoa, kotxi Teoso Apiananiri Kaposotiireri itxaua,”

itxa iua Teoso tixine auakari sākire.

Kākiti Txiapatini Sitatxi Xipokini Xika

⁹ Auñtetxiakori ikini itixiti auakani, Papirónia sitatxiti auakanikata sirĩkakani, ninoakata tiitxi apokaerekatakani, itikasaakirina iua sitatxi misiritiko, iteene itxiapatana. Ninoa auñtetxiakori txiapata iua sitatxi arikasaaki, xamina txiã itikasaakina. ¹⁰ Õtakoxiti itimana, kotxi ipĩkarina sitatxi auakani xipokini. Iuasaaki itxanako:

—!Erekari. !Erekari. Ia sitatxiti miramaneri !auaika. Papirónia sitatxiti !auaika. Kãkiti kaposotiirerini xipokapeka. Ñti oaranoka arikatxi xipokapena ninoa imaerekanina xika.

¹¹ Ikini itixiti tiitxi vëtxitakani apaka txiapatako. Ninoa maerekaxinireni-noka itxanako sitatxi auakani xipokasaaki.

—Kiripa amotatari atii uatxa? —itxana.

¹² Mitxi ninoa vëtxitari oro, pirata, kai soro pomëkoriri, kai soro kasarori pérora inakori. Mitxi ivëtxitarina mãkatxi mata arínio inakori, mãkatxi mata seta inakori, mãkatxi mata põkamarari, mãkatxi mata pomamari pakini, ivëtxitana. Ivëtxitarina ikini sereti aamina eremari inakari. Ivëtxitarina ikini sereti tiitxi iko kamakori, aamina pakaroneri kamakori, pirõsi kamakori, metao kamakori, kai kamakori. ¹³ Ivëtxitarina kanera, koketxi pakini. Ivëtxitarina kamariãro miha inakori. Ivëtxitarina kamariãro pirãkĩsësi inakori. Ivëtxitarina iãriã, aseitona iĩ, triko, triko pani pakini. Ivëtxitarina kema auĩte, soti auĩte, kavaro, mitekaĩ kavaro anikakiti pakini. Kãkiti apaka ivëtxitana, nitiritxi ĩkapani. Kãkiti ĩto, kãkiti xinire apaka inirekana ivëtxitinina. ¹⁴ Ninoa tiitxi vëtxitakani sãkire sitatximoni:

—Ikinika hĩtii erekari hinireëkiti xipokaãkapeka. Ikinika hĩtxineirote !auaika. !Auaika hãpokaerekatakiti. Hĩtii arikapeka —itxana ninoa sãkire.

¹⁵ Ninoa tiitxi vëtxitakani katxineiroterini itxauana, kotxi kãkiti iua sitatxiti auakani mitxi amotari ninoa tii. Iua sitatxi xipokasaaki, ninoa tiitxi vëtxitakani timanãta òtakoxiti, kotxi ipĩkarina sitatxi arikini. Itxiapatana. Imatinaniuatana. ¹⁶ Itxana:

—!Erekari. Sitatxi miramaneri !auaika uatxa. Mitxi ia sitatxi peerepokori sito erero atoko itxa. Oia sito mãka pakaroneri, pomamari, põkamarari pakini. Oĩtoã aua oro, kai soro pomëkoriri. Pérora pakini aua. Oia sito atokokana ia sitatxi. ¹⁷ Ñti oara napa atoko ia sitatxiã auakani tii kakaroneri xipokapeka —itxana.

Sitatxi arikasaaki, maporo auakini, maporo ãki sikani, maporo ãki parĩkauatakani apaka òtakoxiti atamatarina iua sitatxi arikini. ¹⁸ Ninoa itikasaakiri katxiãri iua sitatxi arikini, itxana:

—Ia sitatxi miramaneri atoko inakari !auari —itxana ninoa.

¹⁹ Iuasaaki itakarina atapani ikiiãna imatinaniuatiniãna. Itxiapatana iuasaaki. Imatinaniuatana iuasaaki. Itxarina:

—!Erekari. !Erekari. Kamatinanipitikari sitatxi miramaneri xipokini. Mitxi iuaã ikinimane maporo auakini apakapari kaiãopokoro txineiro, kotxi iuaã auari txineiropokoni. Eereka ãti oara napaka atoko ixipokapeka ikinika —itxana isãkirena.

²⁰ Hĩtepekana Teoso tixine auakanii hĩpoxokoniuatoko iua sitatxi xipokiniã. Hĩte Teoso nakitiakori hĩpoxokoniuatoko. Hĩte Xesosi moianariakorii, hĩte Teoso sãkire sãpiretakanii pakini hĩpoxokoniuatoko, kotxi Teoso arikapekari iua sitatxiã auakani hĩte imisiritinina xika.

Kai Miramaneri Potxoari Uunitimoni Okiko

²¹ Eereka ãti Teoso nitiri kataparari maĩkari kai meraminapoari. Kai triko kamiriãkari atoko itxa iua kai. Okari potxoari uunitimoni. Iua txari:

—Itapararitika kai nokini atoko, Papirónia sitatxiti miramaneri xipokini. !Atamataãkaika sitatxi iuaã —itxa isãkire.

²² Itxari iua sitatximoni:

—Xikari !ikenakotaãkaika ereẽ. !Auaika xikari viorãokata, koitxikata, trõpeta pakinikata. Ereẽ kãkiti parĩkauatini !auaika. Atarokiri kamiko ene !kakenakotikoikari. ²³ Tirikapĩ kamara !katamatikoikari ereẽ. Taniriu-atakani kiinirite ene !kakenakotikoikari. Ereẽ mitxi vētxirauatakani apiari itxauana. Ninoa atoko inakari !auari ikini itixiti. Kãkiti ereẽ auakani misirienetana ikini kãkiti ikini itixiti auakani, kotxi ninoa sãkire maerekatinoka —itxa Teoso nitiri sãkire.

²⁴ Papirónia sitatxiti misiritaãka, kotxi iuaã auakani okapena Teoso sãkire sãpiretakani kãkiti Teoso nakitiakori. Ikinimane kãkiti itixi okakoni xika Papirónia sitatxiti xipokaãka.

19

Areroia, Peerekari Teoso

¹ Eereka nikenakotari kãkiti sãkire, kaiãopokori kãkiti Teoso tixine auakani. Itaparasãkireritikana itxana:

—Areroia. Peerekari Teoso. Ate Teosone makatxakari kãkiti maerekani. Kaiotximereri aTeosone. Kaposotiireri. ² !Ikerokari ikamakiti, kotxi atão inakarinnoka ikama, ininiã atão imisiritinina maerekati kamakani. Erekari-noka ikama aTeosone. Iua misiritari Papirónia sitatxiti. Kanokarero kaposotiirero atoko itxa iua sitatxi, kotxi iua sitatxi auakani iomatari kãkiti xinire ikini itixiti auakani xinire, kotxi oerekarina maerekati ãtotxi nireẽkiti ikaminina. Teoso misiritana Papirónia auakani, kotxi okana Teoso nitiriakori itixi auakani —itxana ninoa sãkire.

³ Iuaãkana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiãri iuaãkiri itimatxiãtapikako ãtipirika —itxana.

⁴ Iuasaaki ninoa totiakori vĩtxi koatro pakini, ninoa okĩtxinoka xãpokaãtotakini ipi ipi pakini apaka, ipamakana Teoso apisatoõ. Iuasaaki Teoso topãkanãta auĩtetxi topanere nopini. Ninoa misãkiretari iua:

—Pite aTeosone. Peerekai pite. Ameẽ, areroia —itxana ninoa.

Soti Auĩte Ìtanorouatini Kiiniriti

⁵ Eereka nikenakotari Teoso topanereẽ auakari sãkire. Itxari:

—Hĩte Teoso nitiriakori ikini itixiti auakanii, “Peerekari aTeosone” hĩtxako. Hĩte auĩtetxi inakanii, auĩtetxi minakanii apaka, hĩpĩkiniãri Teoso, “Peerekari aTeosone,” hĩtxako —itxa.

⁶ Iposo atoko nikenakotari itomaneri kãkiti sãkire ene atoko itxa, ãparaã kai auiniãtaã auakari ene atoko itxa, ikarokirauatini ene atoko itxa. Nikenakotari ninoa sãkire:

—Areroia, peerekari Teoso, kotxi aTeosone, Apiananiri, kaposotiireri, ikinimane auĩte itxaua —itxana ninoa.

⁷ —Mapoxokoniuata. Apoxokoniritika masãkirauata. Matxari: “Peerekari Teoso.” Teoso Soti Auĩtene Ìtanorouatini iketo apokapeka. Ìtaniriuatakaru iua ìkapani oãiamatapeka. ⁸ Osikaãka mãkatxi ereri, kasarori oieretaãkiti ãkane —itxana ninoa sãkire.

Teoso nakitiakori kamakiti atão inakari oa mãka atoko itxa.

⁹ Iposo atoko iua Teoso nitiri txano nota:

—Ia piõkatsopata. Iua Soti Auĩte Ìtanorouatini kiiniriti kemaĩtxitakoni poxokoniuata —itxa notamoni.

Iuaãkana itxano:

—Ia nisãpiretakiti Teoso sãkire atão itxa.

¹⁰ Ikara nikenakotakasaaki nipamaka iua Teoso nitiri apisatoõ, Teoso apisatoõ pamaãkarino atoko nitxaua. Txamari iua txano:

—Kona pipamakape nota apisatoõ. Nota Teoso nitiri pite atoko, pitariakori Xesosi sãpiretakiti auiãkani atoko. Teoso apisatoõnani pipamakako. Xesosi sãpiretakiti iopinikari Teoso sãkire sãpiretakani ãkixinire. Ininiã ninoa sãpiretari kãkiti atão Teoso sãkire —itxa.

Kavaro Kasarori Nopini Topãkakari

¹¹ Eereka natamatari Teoso tixineẽ auakari. Natamatari kavaro kasarori. Iua kavaro nopini topãkakari ikamaenetakiti kamakari itxaua. Isãkire atãonoka. Atão imereẽri kãkiti misiritiko imaerekani xika, kotxi iua imarotari ikinipoko kãkiti kamakiti, ininiã ikamari atão. Inaiatana maerekati kamakani, kotxi iua kamari atão. ¹² Oki xamina tirinakari atoko itxa. Ikiã ito auĩtetxi saporietane aua. Iuãka iõkatakori iĩtoã aua. !Kimarotikori iua uãka. Iuanoka imarotari iuãka. ¹³ Arẽkatxinoka imãkaã aua. Iua akiritaãka, “Teoso Sãkire” inakori. ¹⁴ Isotatoneakori, Teoso nitiriakori Teoso tixine auakani, saãpota iuakata. Iua iĩkiika. Ninoa apaka topãka kavaro kasarori nopini. Imãkana peereri, kasarori. ¹⁵ Iua “Teoso Sãkire” inakori namaã opokĩka iouata mitaro neenamati ikamini iĩkapani. Kauanaro. Iua iouataneẽ okanako imokaiakarini ikini ãti uãka, ininiã ikini ãti uãka auĩte kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotiireri omanãkare ova katxaratiko atoko itxako. Teoso iteene omanãkarauata iuasaaki kãkiti maerekani xika. ¹⁶ Iua “Teoso Sãkire” inakori mãkaã, itapikeẽ apaka iõkataãka: “Auĩtetxiakori auĩte. Apiananiri,” iõkataãka.

¹⁷ Iposo atoko natamatari ãti Teoso nitiri. Atokatxi iotximereẽ itima. Iua itaparakieneritika akiritari ikinika itano araãkani:

—Hina. Hãpoka Teoso kiiniritemoni. Mitari ikiinirite —itxa.

¹⁸ —Hina. Auĩtetxiakori xini hinika. Sotatoakori auĩteakori xini hinika. Sotato xini apaka hinika. Kavaro xini hinika. Hinikari kikiãkini kavaro nopini topãkakani xini apaka. Hinikari ikini kãkiti xini, nitiritxi iamotakoni xini, nitiritxi minakaniua xini, kãkiti apiatakani xini, kãkiti mapiatakani xini apaka hinika —itxari itano araãkani.

¹⁹ Eereka nitikari iua potxoari uinitikiri. Iuakata aua itixi auakani auĩteakori, isotatoneakori apaka. Ninoa apotiitaua, iua kavaro kasarori nopini topãkakari isotatoneakorikata inaiatinina iĩkapani. ²⁰ Iua neenamati xipoka atoko, iua potxoari uinitikiri maĩkaãka. Isãkire sãpiretakari, atão minasãkiretakati, imaĩkaãka apaka. Mitxi iua kamari posotiiretxi iua potxoari uinitikiri iĩkapani. Ikara posotiiretxi xika imisirienetana ninoa potxoari uinitikiri takaõtxikare auaitotakini. Imisirienetana ninoa iua kai kamakori teosonetakani. Iua potxoari uiniti pokĩkaãtakari, isãkire sãpiretakari pakini, auãkipanika okaãka ipoa atoko inakarimoni, eõpõri arikiniãtaã. ²¹ Isotatoneakori okapeẽka iouataã, kavaro kasarori nopini topãkakari namaãkeroã. Iuasaaki ikinika maiori nikapena ninoa xini. Kamitopekana. ! Iposotaikarina ikinika okakoni xini inikinina.

20

Mio Anokananisaaki

¹ Eereka nitikari Teoso nitiri katxakaãpotini Teoso tixine iĩkari. Iuakoã iua minaro xavi iua mamapotõkire irikotimoni. Apaka iminari kohẽtxi mitari. ² Iuasaaki imaĩkari iua imini mitapoari. Kitxakapirĩkarikara iua imini. Iua maerekani matamatakoni auĩte, Satanasi inakori. Iua maĩkari Satanasi. Iaxirikari kohẽtxiã, mio anokanani imatĩpokotakani tĩkane. ³ Iua Teoso nitiri okari Satanasi iua aarikoã, tota itxari itore. Ikakiriokari oa xavi itore sonaã, ininiã !apakata itore matakakiko. Ininiã mamapotõkire irikoti ãki ikaikota

Satanasi. !Iposotaikari imisirienetiniri ikini itixiti auakani. Mio anokanani auako iriko āki iua Satanasi. Mio ano napaāka atoko auiritaāka ipokīkini. Mapaōtinoka auiritaāka mapara auini.

⁴ Eereka natamatari auītetxiakori topanere. Kaiāopokori auari iuaā. Natamatari iua topanerexi nopini topākakani. Ninoa txīkitaāka auītetxi ininiuana. Iuasaaki natamatari apanakini kākiti. Mitxi sauakanopitakoni. Okapeēkana Xesosi iokanapirena, Teoso sākire pakini isāpiretinina xika. !Iteosonetarina iua potxoari uinitikiri. Iua kai kamakori !iteosonetana. Iua potxoari uinitikiri takaōtxikare !itakana iteētaāna, iuakoāna pakini. Iuaīkana auapekana. Auītetxi itxapekauana Kristokata. Mio anokanani auītetxi itxauana. ⁵ Ikara ipīkani ōkitikiko merepanika ipīkani ōkitikiko. Iua mio anokanani napaāka atoko apanakini ipīkani ōkitikaāka. ⁶ Ipīkani merepanika ōkitikiko iuaīkana auāki ininina īkapani, Teoso nakitiakori itxauana ninoa. Teoso sikari erekari ninoamoni. !Atatsiitarina ātiāo ipīkitxi Teoso misiritakasaakina maerekati kamakani. Sasetotxi itxauana, kotxi Teoso nireēkiti ikamana. Kristo nireēkiti apaka ikamana. Mio anokanani auītetxi itxauana Teosokata.

Satanasi Xamina Mitapoarimoni Okiko

⁷ Mio ano napaāka atoko, Satanasi kateia āki auakari, sikakaākako. Ipokīka mapara. ⁸ Iuasaaki Satanasi ĩpirixititari itixi kākiti ikini āti uāka imisirienetini īkapani. Iua misākiretari āti uāka Koki inakori, Makoki inakori pakini. Txamari na atāo isākire. Inirekari ninoa neenamauatini iuakata. Apitiitana ninoa Teoso nakitiakori inaiatinina īkapani. Itori kākiti Satanasi apotiitakini. Uini ikipatxite atoko itxana.

⁹ ĩpirixititarina itixi. Iakirokarina Teoso tirketakiti sitatxiti, kākiti Teoso nakitiakori auiniātaā. Iuasaaki xamina iaxitikiri katxaka. Ixipokana ninoa ikinikana. ¹⁰ Iuasaaki Satanasi, kākiti misirienetakari, okaāka arikatxi mitapoarimoni ēxōpiri arikikoātaā. Iua potxoari uinitikiri, isākire sāpiretakari pakini okapeēkaika iuaā. Iuaā ninoa atatsiirauatapikako pokamara, īkanōka ātipirika. !Ixipoka ninoa atatsiirauatini.

Ipinakani Apakapari Iparīkana Īki

¹¹ Eereka natamatari auītetxi topanere kasarori mitari. Natamatari iua inopini topākakari. Iuasaaki patimari iaxiti, itixi pakini ereēkokini iua topākakari apisatoō. Iaxiti, itixi pakini kona katamatikoikari. ¹² Iposo atoko natamatari kākiti mitxi ipinakani timini Teoso topanere apisatoō. Kākiti apiarini, kākiti poiāorini pakini tima Teoso apisatoō. Iposo atoko itori aātsopa katamēkitataāka. Iua aātsopaā aua ikinika kākiti kamakiti. Apaka āti aātsopa katamēkaāka. Kākiti uāka aua iua aātsopaā Teosokata auakani īkapani. Iuasaaki ninoa mitxi ipinakani apakapari ikamakitina ĩki uai itixiā auakasaakina. ¹³ Ninoa mitxi potxoari uiniti āki ipinakani apoka iuaā. Mitxi kipatxiā ikatakoni apaka apoka iuaā. Ikini kākiti ipīkani auiniātaā auakani apoka iuaā. Ikinika apakapari ikamakitina ĩki, ikamakitina itixiā auakasaakina. ¹⁴ Eereka ipīkitxi, ipīkani auiniātaā pakini okaāka iua arikatxi mitapoarimoni. Iua arikatxi mitapoarimoni iuaīkana kākiti ipina ātiāo ipīkitxi maxipokatimoni. ¹⁵ Kākiti ātipirika Teosokata auakani uāka aua Teoso aātsopateē. Kākiti iuaā mauauākatakani okaāka iua arikatximoni.

21

Iaxiti, Itixi Pakini Amaneri Txapekaua

¹ Eereka natamatari iaxiti amaneri, itixi amaneri pakini. Iaxiti mitxiri ereēkokape. Īkora itixi mitxiri ereēkokape. Potxoari uiniti ! auaika.

² Natamatari Teoso sitatxine Xerosareë amaneri. Iua sitatxi Teoso tixinekiri. Teoso paniātari iua sitatxi ĩkorapokoriti apokini. Natamatari ikatxakaãpotini. Iua sitatxi peereri. Sito ĩtaniriuatakasaaki, omãka peereri oĩtanirimoni osini ĩkapani. Oa sito erero atoko itxa iua sitatxi. ³ Nikenakotari Teoso topanereë auakari sãkire. Itaparasãkireritika itxari:

—Uatxa Teoso kamari iua auini kãkiti sauaki. Iua ninoakata aua. Iua nakitiakori itxauana. Teosora aua ninoakata. Ninoa Teosone itxaua. ⁴ Iuasaaki iua kaxipokariko ninoa oki ãtsaã. !Itxiapataikana. Ipĩkitxi !auaika. Matinanitxi !auaika. ãtsaãtxi !auaika. Katsiiri !auaika. Ikinipoko mitxiri ereëkokapeka uatxa —itxa.

⁵ Iua auĩtetxi topanere nopini topãkakari txari:

—Uatxa nikamari ikinipoko amaneri —itxa.

Apikomoni itxari notamoni:

—Piõkatsopataris nisãkire, kotxis nisãkire atão. Nisãpiretakiti apokapitikako.

⁶ Apikomoni itxano:

—Uatxa niparĩka xipopeka. !Auaika. Merepitipanika iõka Aopa inakori atoko nitxa, kotxi nota merepitipanika aua. Imapotõkire iõka Ómika inakori atoko nitxa, kotxi ikinipoko mapotõkire nitxaua apaka. Nisikari kãkiti posonatakani iãtini ĩkapani. Na ninirekari ĩiki. Iãtarinako ãparaã amomoãkiri. Iua ãparaã txĩkitakari kãkiti ãtipirika Teosokata auini. ⁷ Nisikariko iua ãparaã kãkiti Satanasi nireëkiti makamakanimoni. Ninoa Teosone nitxaua nota. Nota anaakori itxauanako ninoa. ⁸ Kãkiti mataparaxinireni okaãkako xamina mitarimoni. Teoso sãkire mauikakani apaka okaãkako iua xaminamoni. Maerekati potxitakani, kokanirini, maerekati iĩtoãna potxitakiti kamakani apaka okaãkako xamina mitapoarimoni. Miĩti apaka okaãkako iuamoni. Teoso kamakori teosonetakani okaãkako iuamoni. Ikinika kãkiti maxikatĩka sãpiretakani apaka okaãkako xamina mitarimoni. Ninoa kãkiti ikinikana misiritaãkako arikatxi mitariã, êxópiri arikikoãtaã. Iuaã kãkiti iuaĩkana ipina, ãtião ipĩkitxi maxipokatimoni —itxa iua auĩtetxi topanere nopini topãkakari sãkire.

Xerosareë Sitatxiti Amaneri

⁹ Ninoa Teoso nitiriakori setxi, iãtatxi setxi auakini, ãti ina notamoni. Iua txari:

—Uai pina. Noerekaiko pite iua Soti Auĩte tirketakito ĩtanoro ĩkapani —itxa.

¹⁰ Iua Erekaris Matamatakoti anikano nota. Itxĩkitakari Teoso nitiri anikinino oxiratari nopini. Mitaxiratariã oerekano sitatxi Teoso nakiti Xerosareë inakori. Natamatari iua sitatxi Teoso tixine potorikakari katxakaãpotini ĩkorapokoritimoni. ¹¹ Teoso iotximeretxikana aua iua sitatxi. Kai pomẽkoriri kakaroneri xásipi inakori mẽkorĩkini atoko itxa iotximere. Iua sitatxi iotximere peereri. Kristao mẽkori atoko itxa. ¹² Pirikeri kai kamakori piriketari iua sitatxi. Iua pirikeri mitapoari, paĩtanori. Iua pirikeri tosi itore aua. Teoso nitiriakori iaxitikini tosi nĩkatari iua tosi itore. Ikinika itore nopini iõkataãka Isaeo anaakori uãka, kotxi Isaeo tosi imiakori aua. ¹³ Ipi ãti pakini iua itore atokatxi pokĩkinimoni. Ipi ãti pakini iua itore atokatxi pokĩkini sanaremoni. Ipi ãti iua itore atokatxi pokĩkini ikikomoni. Ipi ãti pakini iua itore atokatxi ereëkokinimoni. ¹⁴ Iua sitatxi pirikere tosi kai mitari nopini ikamaãka. Ikinika iua kai nopini Soti Auĩte moianariakori uãka iõkataãka, kotxi Soti Auĩte moianariakori tosi aua.

¹⁵ Iua Teoso nitiri notakata sãkirauatakari aua aãke oro kamakori iuaõã. Iua aãke iua sitatxi, itore, ipirikere pakini iaõtiko. ¹⁶ Sitatxi tore atokatxi pokĩkinimoni ipotorika. Itore atokatxi ereëkokinimoni apoka. Iaõtari ipi mio, koatrosẽtosi pakini kirómetro. Maioakari. Iuaĩkana ipotorika sitatxi itore atokatxi pokĩkini sanaremoni. Itore atokatxi pokĩkini ikikomoni apoka.

Iaõtari iua atokotxikana ipi mio, koatrosētosi pakini kirómetro. Eereka iaõtari sitatxi ítano timakari. Iua atokotxikana ipi mio, koatrosētosi pakini kirómetro. Iua Teoso nitiri iaõtari iua sitatxi iua aãkeẽ. ¹⁷ Iua Teoso nitiri iaõtari pirikeri timakari. Sesêta metro ítano. Teoso nitiri iaõrauata kãkiti iaõrauadini atokokana. ¹⁸ Iua pirikeri kai kamakori xásipi inakori. Iua sitatxi oro kamakori. Kristao erero atoko itxa oa oro. ¹⁹ Iua kai mitari pirikeri patapi auakari ipataãka ikini sereti kai soroã. Pomëkoriri, kakaroneri iua kai soro.

Ãti iua kai mitari aua kai soro xásipi inakori.

Ãti iua kai mitari aua kai soro sapira inakori.

Ãti aua ákata inakori.

Ãti aua esimeráota inakori.

²⁰ Ãti kai mitari aua kai soro satónia inakori.

Ãti kai mitari aua kai soro sátxio inakori.

Ãti aua krisórito inakori.

Ãti aua periro inakori.

Ãti aua topásio inakori.

Ãti aua krisópraso inakori.

Ãti aua xasíto inakori.

Ãti aua ametxísita inakori.

²¹ Iua tosi itore tosi kai kasarori kamakori. Iua kai kasarori pérora inakoro. Iua itore átika, pérora átoka kamakori. Oro kamakori itxaua kimapori. Peereri. Pomëkoriri. Kristao atoko itxa ahoa.

²² Kona natamatari Teoso misãkiretiko aikoti. !Auari iua aiko iua sitatxiã, kotxi Teoso Apiananiri kaposotiireri, iua Soti Auíte apaka iuaã auapikana.

²³ Iuaã !inirekaãka atokatxi, kasiri pakini sitatxi iopinikini ïkapani, kotxi Teoso iotximere iopinikari ikinipoko. Iua Soti Auíte sitatxi tirikapite atoko itxaua.

²⁴ Kãkiti maerekanitxi mauakini ikini ãti uãka auari iua kama-raã. Kãkiti ikini itixiti auakani auíteakori apokako iuaã Teoso ipaxitinina ïkapani, inirekakitina Teosomoni isikinina ïkapani.

²⁵ Iua sitatxi tore imatakakaãkapika. Ìroãpikana kãkiti. !Itotaãka, kotxi ïkanõkari !auari iuaã.

²⁶ Kãkiti ikini itixiti auakani anikariko ikinipoko erekari iua sitatximoni Teoso ipaxitinina ïkapani.

²⁷ Kãkiti maerekati kamakani !auiritaãkana Ìroinina. Ìtotxi nireëkiti kamakani !auiritaãkana Ìroinina.

Atão masãpiretakani apaka !auiritaãkana Ìroinina. Kãkiti Teoso iõkauãkatakini aãtsopateẽ, ninoanokara auiritaãka Ìroinina iua sitatxitiã. Iua Soti Auíte aãtsopateẽ auauãkatakani auapikako Teosokata.

22

Iua ãparaã Iãtakari Aua Teosokata ãtipirika

¹ Eereka iua Teoso nitiri oerekano sõtoãri. Iua sõtoãri mapotõkire ikiitaã Teoso itopanere aua. Apaka iua Soti Auíte itopanere aua iuaã. Iua ãparaã peereëri. Kristao mëkori atoko itxa iua ãparaã. Iua ãparaã iãtakari !ipina.

ãtipirika auapika. ² Iua sitatxi apanĩkaki aua ahoa mitapoari. Iua sõtoãri sa ahoa apanĩkaki. Sõtoãri ïtinikata aua amãtiirinape. Iua amãtiiri tximakani !ipina. Auapikana. !Ipinaikana. Kasiri iaõka iriuata iua amãtiiri. ãti kasiriti iri ãtião, eereka ãti kasiriti ãtião. Iuaĩkana ãti kasiriti ãtião. Itxaãpota iua amãtiiri iriuatini iuaxiti. Tosi pakini kasiriti amãtiiri iriuata. Amãtiiri tsopa sikataparatarari kãkiti ïto, ikinimane kãkiti itixi auakani ïto.

³ Teoso misiritiniri kãkiti !auaika. Teoso, Soti Auíte pakini auĩtetxi itx-auana iuaã. Teoso nitiriakori itixi auakani kamari iua nireëkiti. ⁴ Ninoa atamatariko itoõ. Teoso uãka iteëtaãna auako. ⁵ Ìkanõka !auaika iuaxiti.

Kākiti iuaã kona nirekaikari tirikapi, atokatxi kamara pakini, kotxi Teoso Apiananiri iopinikari ikinika iuaã. Kākiti iuaã auakani auñtetxiakori itxauana ātipirika.

⁶ Eereka iua Teoso nitiri txari notamoni:

—Atāo nisākire. Ia iaõka apokapitikako. Teoso Apiananiri sikari Erekari Matamatakoti isākire sãpiretakanimoni. Iua paniātari initiri itixine auakari oerekinina initiriakori itixi auakani Teoso kamakiti apokini apisapanika — itxa iua Teoso nitiri sākire.

Xesosi Kanapiriini Pirena

⁷ —Hīkenakota —itxa Xesosi. —Patimariko napokini ereẽ. Ia aãtsopa sãpiretari ereẽ nikanapiriini pirena. Kākiti auikiniāri Teoso sākire ia aãtsopa sãpiretakiti, apakapari erekari Teoso sikakiti —itxa Xesosi.

⁸ Nota Xoã sãpiretai hñte nitiākiti. Nikenakotakiti apaka nisãpiretai hñte. Ikinika nikenakotaka atoko, ikinika natamataka atoko, iuasaaki nipamaka iua Teoso nitiri apisatoõ, kotxi iua oerekari ikinipoko notamoni. Nipamaka iua apisatoõ Teoso apisatoõ nipamakini atokokana. ⁹ Txamari iua Teoso nitiri txari notamoni:

—Kona pipamakape nota apisatoõ. Nota Teoso nitiri pite atokokana nitxa. Pitariakori Teoso sākire sãpiretakani Teoso nitiriakori itxauana. Ninoa atokokana nitxa nota. Ikini kākiti ia aãtsopa sãpiretakiti auñkani Teoso nitiriakori itxauana. Ninoa atokokana nitxa nota. Teoso apisatoõnoka pipamakiniā atāo —itxa Teoso nitiri sākire.

¹⁰ Iuañkana itxano nota:

—Ia aãtsopa sãpiretari Teoso kamakiti apokini apisapanika. Na pikipatapiri ia aãtsopa sãpiretakiti, kotxi pañtiki Teoso sākire iaõka apokapitikako.

¹¹ Maerekati pikamapanika pinakasaaki, ininiā apikomoni maerekati pikama. Maerekati piñto nireẽkiti pikamapanika pinakasaaki, ininiā apikomoni pikama. Atāo inakari pikaminiā, apikomoni atāo inakari pikama. Teoso nireẽkitinoka pikaminiā, ininiā apikomoni Teoso nireẽkitinoka pikama —itxa.

¹² —Hīkenakota —itxa Xesosi. —Patimapaniriko napokini ereẽ. Nimiriko ikinimane parñka ñki ninoa apakapini ñkapani. ¹³ Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Ikinipoko auini apisapanika nota aua. Ikinipoko xipokaãka atoko nota auapanika. Itixi kamiko apisapanika naua. Itixi xipoka atoko nauapanika nota —itxa Xesosi.

¹⁴ Teoso sikari erekari iua nireẽkiti kamakanimoni. Ninoa kākiti auiritaãkako Teoso amãtiirite itximinina auapika ininina ñkane. Auiritaãkanako ñroinina Teoso sitatxineẽ. ¹⁵ Kākiti maerekati iñtona nireẽkiti kamakani ! auiritaãka ñroinina iua sitatxitiã. Miñti, ñtanoro minakatokatika sirñkakani, kokanirini pakini ! auiritaãka ñroinina iua sitatxitiã. Apaka kākiti ikamakitika teosonetakani ! auiritaãka ñroinina iua sitatxitiã. Aãpirena potxitakani, atāo minasākiretakani pakini ! auiritaãka ñroinina iua sitatxitiã.

¹⁶ —Nota, Xesosi txaua. Nota paniātari ninitiri nitixine auakari sãpiretiniri ia nisākire pitemoni, ininiā ikara pite sãpiretanako Teoso misākiretikoãtã apotiitakaniua. Tavii apika mekanirirano nota. Iõriki mitaro pokamara iatokopeka inakasaaki ñkaro atoko nitxa nota —itxa Xesosi.

¹⁷ Erekari Matamatakoti txari Xesosi:

—Uai pina.

Xesosi nakitiakori txari iua:

—Uai pina.

Hñte ia nisākire kenakotakanii, hñtxariko:

—Uai pina.

Hĩte posonatakani, uai hina. Hinirekiniãri, ia ãparaã hiãtako, kotxi ia ãparaã kãkiti auapininiika inĩkitaãkari. Ia ãparaã Teoso sikakiti kãkitimoni. Na piĩkitxitari.

¹⁸Nota, Xoão, õtãkikari kãkiti ia Teoso sãkire iõkatsopatakori kenakotakani. Ia Teoso sãpiretakiti apokini apisapanika, isãpiretaua. Ia aãtsopa sãpiretari kãkiti misiritiko. Ninoa misiritiko atokotxikana Teoso misiritai hĩte, hĩkoketiniãri hĩteka sãkire Teoso sãkirekata. ¹⁹Kãkiti kipatiniãri ipixini ia Teoso sãpiretakiti iõkatsopatakori, Teoso !auiritari iua tximiniri iua amãtiiri kãkiti auapininiika inĩkitaãkari. !Auiritari iua ãroini isitatxineẽ. Ia aãtsopa sãpiretapekari iua amãtiiri, iua sitatxiti pakini.

²⁰Xesosi txari:

—Ia niokanapirena atão. Iposopeka napokini tĩkane.

Atxari iuamoni:

—Ameẽ. Ari, uai pina Xesosi, Apiananiri.

²¹Xesosi Apiananiri sikari ikinipoko erekari ikinimane Teoso nakitiakorimoni. Ameẽ.